



UNIV. OF  
TORONTO  
LIBRARY

Toronto University Library  
Presented by

Mess<sup>rs</sup> Joseph Baer & Co.  
through the Committee formed in  
The Old Country

to aid in replacing the loss caused by  
The disastrous Fire of February the 14<sup>th</sup> 1890







LL  
L7888K LIVY

(T. LIVII PATAVINI)  
HISTORIARVM LIBRI

QVI SVPERSVNT OMNES  
ET DEPERDITORVM FRAGMENTA

EX RECENSIONE

ARN. DRAKENBORCHII

PASSIM REFACTA

CVM INDICE RERVM LOCVPLETISSIMO

---

ACCESSIT

PRAETER VARIETATEM LECTIONVM

GRONOVIANAE ET CREVIERIANAE

GLOSSARIVM LIVIANVM

CVRANTE

AVGVSTO GVILIELMO ERNESTI

---

EDITIO QVARTA

RECOGNITA ET IN LIBB. XXXI — XXXVIII ATQVE XLI —  
XLV AD CODD. BAMBERGENSIS ET VINDOBONENSIS FIDEM  
EMENDATA

AB

IOANNE THEOPHILO KREYSSIGIO

---

TOMVS PRIMVS

---

L I P S I A E

IN LIBRARIA WEIDMANNIA

G. R E I M E R

MDCCCXXIII.



17886 K

UNIVERSITY OF TORONTO LIBRARY



14445  
118/91

L

VIRO PERILLVSTRI  
B. G. NIEBVHRIO C. F.  
SCRIPTORI RERVM ROMANARVM  
INCOMPARABILI  
HOC OPVS  
PVBLICVM PIETATIS ET OBSERVANTIAE  
MONVMENTVM EXSTARE VOLVIT

EDITOR.

WHO TELL US

R. G. ALLEN

SCOTT'S

INDICATOR

FOR

OF THE

FOR THE

EDITOR



---

B. G. NIEBVHRIO C. F.

S. P. D.

IO. THEOPH. KREYSSIGIVS.

---

Ex quo Sallustii historiarum fragmenta, multo diligentius, quam ab aliis factum erat, ex schedis Vaticanis exscripta, et Ciceronis aliorumque scriptorum reliquias, ex codice itidem Vaticano, eoque palimpsesto, abs Te erutas atque eruditionis Tuae luce illustratas, una cum Livii fragmento, ex iisdem membranis post Brunsum ac Iuvenatium plenius et emendatius edito, Roma ad me, quem vix de nomine nesses, perquam benevole transmisisti, nihil profecto ardentius exoptavi, quam ut publicum aliquod pietatis erga Te meae animique meritorum Tuorum veneratione perfusi documentum exstaret. Iam vero circumspicienti mihi, quodnam potissimum munus suapte natura gratum nec verborum lenociniis exornandum Tibi vicissim offerrem, neque contigit, neque per vitae meae rationes

contingere potuit, ut, Tua vestigia persecutus, opus ineditum et argumenti novitate pariter ac gravitate Gaii institutionum commentariis, quos, quum Veronae ageres, iureconsultis ex insperato faventibus, ab interitu vindicasti, aequiparandum ex bibliothecarum tenebris in lucem protraherem, Tuique nominis splendore magis etiam conspicuum redderem. Accipe igitur explicata fronte volumina Livii, historicorum Romanorum principis, quae Te diurna nocturna-que manu versasse, praeclara ingenii et doctrinae, quae exegisti, monumenta demonstrant, nostro qualicunque studio emendata, atque, quum ex factis, non ex dictis, amicos pensando esse, Livius ipse dixerit, me in hoc, quidquid est consilii, exsequendo id unice spectasse, ut, quanti Te faciam, quantopere Tua benevolentia superbiam, luculento aliquo testimonio declararem; persuasissimum habe. Ita vale et mihi meisque rebus favere perge.

Scripsi Misenaë ad Albim, a. d. XI. Calend.  
Septembr. A. MDCCCXXIII.

---

---

## LECTORI AEQVO ET DOCTO

S. P. D.

### IO. THEOPH. KREYSSIGIVS.

---

Quum divenditis exemplis Livii, ab Aug. Guil. Ernestio editi, bibliopola honestissimus de tertia huius operis repetitione cogitaret, eius recognoscendi provinciam, ultro mihi delatam, eo promptius suscipiendam putavi, quo maior et liquidior voluptas ex Livio legendo relegendoque in me redundasset. Huc accessit, quod muneris mei rationes ita ferebant, ut Livii annales magno adolescentium nobis in disciplinam traditorum numero per multorum deinceps annorum spatium uno veluti tenore interpretarer et, quae sit lactea huius scriptoris ubertas, docendo accuratius discerem. Itaque huic labori, neque a studiis neque ab officiis meis alieno, par esse mihimet ipsi visus circumspicere coepi, qua ratione caverem, ne opera qualiscunque nostra in tollendis typographi mendis unice versaretur atque, licet textus, quem vocant, ex recensione Arn. Drakenborchii, servata etiam plerumque orthographia \*) et interpun-

\*) Hanc post alios, veluti G. H. Schaeferum in Glossar. Liv. s. v. *aspernari*, recte nuper impugnavit Fr. Lindemannus, collega coniunctissimus, in praefat. ad Selecta e poetis Latinis carmina p. 8. neque Drakenborchius ipse hac in re sibi constitit, sed modo, ut hoc utar, *urgere* scripsit, modo *urgere*, quod Ernestius ubique fere secutus est.



ctione, esset describendus, omni scripturae vel codicum auctoritate vel coniecturarum probabilitate emendatae laude careret. Quamquam enim mihi non aequae ac Georg. Ludov. Walchio fortunae beneficio contigerat, ut quadraginta amplius Livii codices manu scriptos aut ipse pervolvere aut ab aliis excussos ad librariorum errores corrigendos adhibere possem, iuvabat tamen principi rerum Romanarum scriptori pro virili parte et me ipsum consulere.

Nihil igitur mihi haec animo agitati accidere potuit opportunius, nihil exoptatius, quam ut Franc. Goellerus codicem Livii, antiquitate pariter ac praestantia conspicuum, ex scriniis bibliothecae Bambergensis protraheret atque lectionum, quam dicunt, varietatem ex illo codice enotatam, prius quam evulgaretur, humanissime mecum communicaret. Huius enim codicis auctoritate effectum esse, ut Livii liber tricesimus tertius, quem praeter capita septemdecim priora, olim ex hoc ipso codice Bambergensi a Franc. Bartholino delibata, Nic. Carbachii opera ex unico codice Moguntino editum esse constat, in nostra Livii editione novam plane tersioremque indueret speciem, ex commentariis Goelleri, notis Fr. Iacobsii, quem aliquoties mecum in easdem coniecturas incidisse, mirifice laetor, nostraque ad Goellerum epistola \*), nimis sero a bibliopola cunctatore emissa, luce clarius apparet. Neque tamen in hoc tantum libro lacunae permultae, quarum ne vestigia quidem interdum comparebant, ex codicis Bambergensis copiis suppleri et plurimi loci misere depravati, quorum emendationem viri doctissimi vel plane desperaverant vel coniecturis ingeniosissimis tentaverant,

\*) Quum haec epistola festinantius esset exaranda, insunt ei plura, quae mihi nunc displiceant, v. c. quae p. 439. sq. ad Liv. XXXIII, 1. de verbis: *quum iam adpropinquaret urbi*, et p. 463, sqq. de Liv. XL, 50. disputavi.

eius auctoritate confidentius corrigi et certius constitui potuerunt, sed etiam ad librum tricesimum primum et secundum, quos et ipsos codicum lumen passim desiderare constat, ceterosque usque ad tricesimum octavum eximia codicis Bambergensis virtus pertinuit. Cui quidem virtuti, in libro tricesimo tertio maxime conspicuae, ne nimium ubique tribuisse dicar, uti haud vereor, ita etiam non is ego sum, qui me omnem lectionum varietatem, ex hoc codice excerptam, aequabili diligentia et circumspectione ad narrationis Livianae contextum reparandum contulisse, neque aliis eundem post me laborem suscepturis emendationum spicilegium reliquisse existinem.

Uberiorem praeterea messem nos sperare iubebat antiquissimus ille codex olim Laurishamensis, nunc Vindobonensis, a Drakenborchio in praefat. Tom. VII, p. 66. sq. cupidissime expetitus, ex quo Sim. Grynaeus iudicio Pet. Lambecii in Commentarior. de Biblioth. Caes. Vindob. lib. II. cap. 8. p. 943. sqq. sive ed. Liv. Drakenborch. Tom. VII. p. 223. sqq. cui etiam Walchius in Emendatt. Liv. p. 246. coll. p. 255. sq. accessit, quinque postremos, qui supersunt, Livii libros ita evulgavit, ut, quamvis magnam in exantlando hoc labore difficillimo adhibuerit doctrinam atque diligentiam, permulta tamen relinqueret ex codice iterum inspecto et melius et certius emendanda. Ne igitur unci huius codicis praesidium porro desideraretur, Copitarius, custos bibliothecae Vindobonensis in codicibus antiquis perscrutandis versatissimus, rogatu C. A. Boettigeri, viri liberalissimi, cui me, ut multis aliis beneficiis, ita etiam hoc nomine obstrictum sentio, impigre operi sese accinxit atque, mercedem haudquaquam sperendam cum bibliopola liberalissimo pactus, non solum lectionum varietatem, ex codice cum editione Drakenborchiana collato diligenter enotatam, quae quarto huius editionis volumini inseretur, mihi sub-

ministravit, sed etiam, quo certius de codicis scriptura constaret, in pluribus locis, qui aliquam haberent dubitationem, per epistolas a me compellatus, codicem denuo inspexit et singulos literarum apices est rimatus. Quo factum est, ut multiplex sane utilitas, quam in Epistola ad Goellerum p. 477. coll. p. 453. laetissima exspectatione praecipiebam, ex huius codicis, auro contra, ut cum Plauto loquar, non cari, collatione ad me aliosque Livii editores et interpretes redundaret. Primum enim in universum, quid vetustis illis membranis, quae lacunis et scripturae ceteroquin luculentae mendis paene innumeris sunt contaminatae, quidve Grynaei ingenio, cuius acumen permultis in locis venerabundus suspexi, ubique debeatur, clarissime apparet; deinde singuli Livii loci, quorum genuina scriptura vel intemerata in codice exstat, sed nescio quo casu Grynaei aciem effugit, vel leviter depravata a Grynaeo minus bene reparata est, codicis ipsius auctoritate et certissima emendatione a nobis potuerunt atque ab aliis in partes nostras aliquando successuris poterunt in integrum restitui; denique alii, qui vel lacunis interrupti, vel librarii erroribus ita deformati sunt, ut pro conclamatis haberi possint, nobis aliisque post Grynaei curas largam coniectandi materiem praebuerunt et praebebunt.

Quamquam igitur codicum Bambergensis et Vin-dobonensis auxilio adiuti repetitam hanc Livii editionem ita potuimus adornare, ut novam veluti editionum familiam ducat, tamen silentio non praetermittendus est codex Lipsiensis, cuius varias lectiones, in quatuor prioribus libris repertas, olim P. D. Longolius in Drakenborchii gratiam excerpsit, et quem postea Ernestius, id quod in praefatione secundae Livii editioni praemissa profitetur, penitus excussurus erat. Usus huius codicis, qui in locupletissima Senatus Lipsiensis bibliotheca adservatur, mihi benevole



concessit H. Bluemnerus, bibliothecae illius praefectus ad bonas literas, quas doctrina ornat, quoquo modo iuvandas paratissimus, et, quae eius erga me fuit humanitas plane singularis, permisit, ut, quum omnem lectionum varietatem, quam magna ex parte vix notatu dignam esse, ex Drakenborchii notis nostraeque Epistola ad Goellerum p. 414 sq. et p. 418. sqq. intelligitur, excerpere nollem, ipsum tamen codicem de locis selectis consulere pervellem, eum per aliquot annos continuos domi meae haberem. Atque maiorem saltem fructum ex hoc codice percepi, quam ex codice Dresdensi, in Eberti Hist. Biblioth. Reg. Dresdens. p. 279. n. 165. commemorato, cuius lectiones glossasque ad Liv. XXXIV, 2—4. pertinentes Lindemannus amicissimus mecum communicavit, et codicis lacinia, quae Liv. XXVII, 15 et 16. continet atque, quum non nisi cap. 16. probabiliorem lectionem: *auri octoginta tria pondo*, refragantibus codicibus ceteris omnibus, exhibere et H. Loriti sive Glareani coniecturam confirmare videatur, iusto copiosius a me descripta est in Diss. de codicis membranaei, T. Livii Pat. Historiarum libros olim complexi, fragmento, Norimbergae in bibliotheca Murriana reposito. Lips. MDCCCXII. Cui libello quum etiam lectionis varietatem ex editione Tarvisina quarta, quae anno MCCCCLXXXV. evulgata et a Livii editoribus non satis accurate excussa est, diligenter excerptam inseruerim, ut de aliarum quoque editionum, quae antiquitatis commendationem habent, usu critico pauca adiciam, res ipsa admonet.

Quum enim ad criticum, quem vocant, apparatus non codices tantum, sed etiam editiones antiquas, ad praestantissimorum plerumque codicum fidem expressas ideoque a permultis veterum scriptorum editoribus perperam neglectas, referendas esse, nostra aetate inter criticos conveniat et, quantum inde utilitatis capi possit, inter Germanos Im. G. Huschkius in

Tibullo, inter Anglos Pet. Elmsleius in Euripide, inter Italos Car. Fea in Horatio, aliique in aliis scriptoribus luculentis docuerint exemplis, harum quoque nonnullas, quae mihi in promptu essent, passim in consilium adhibendas esse putavi. Ac primum quidem, quum non ita instructus essem a supellectile literaria, ut editiones Livii, quae saeculo quinto decimo prodierunt, nondum satis a criticis examinatas, pervolutare possem, non sine fructu inspexi Ascensianam, ad decem venerandae vetustatis codices anno MDXIII. exactam et triennio post repetitam, de cuius virtutibus Chr. Godofr. Muellerus in Observationum Livianarum specimine, Cizae MDCCLXXXIX. edito, exposuit; deinde Moguntinam, anno MDXVIII. et proxime insequenti a Carbachio adornatam et codicis Moguntini copiis locupletatam, qua Drakenborchius, ut uno negligentiae exemplo defungar, ita usus est, ut ad errorum emendationem a Vulphg. Augusto praefationibus subiectam non attenderet ac passim Aldinae primae perperam tribueret, quae Moguntinae essent tribuenda; denique Frobenianam primam et secundam, quarum illi Grynaeum anno MDXXXI. postremos quinque Livii libros ex codice Laurishamensi addidisse constat, hanc anno MDXXXV. B. Rhenanus et Sigism. Gelenius, sive codicum auctoritatem sive coniecturae probabilitatem secuti\*), ita adornarunt, ut non solum editionum proximarum fundamentum esset, sed etiam ad recensionem Gronovianam et Drakenborchianam forsitan nimis saepe momentum haberet.

His igitur praesidiis instructus ad Livii textum, a Drakenborchio ad rationes criticas constitutum, passim refingendum ita accessi, ut, sublatis typographi vitiis, quae Drakenborchius in erratorum indice Tom

\*) Vid. quae Drakenborchius in praefat. Tom. VII. p. 52 sqq. et p. 65. hac de re disseruit.

VII. p. 348. partim emendavit \*), partim praetermisit \*\*), in prima tertiaque decade multa quidem intacta relinquerem, aliquoties tamen lectioni vulgatae, Crevierium, Lallemandum, Strothium, Doeringium, Rupertium, Walchium aliosque secutus, vel codicum scripturam vel criticorum coniecturam, quae mihi quoque probaretur, substituerem; in quarta autem decade, praecipue libro tricesimo tertio, ac decadis quintae dimidia parte locos permultos codicum Bambergensis et Vindobonensis auctoritate supplerem atque corrigerem et meae etiam coniecturae, praecipue in postremis Livii libris ex unico codice editis, aliquid tribuerem, omniumque mutationum rationem in notis quarto huius editionis volumini adiiiciendis bona fide redderem. Praeterea editionis Drakenborchianae lectiones, ubicunque aliquid a me mutatum est, inserui lectionum varietati, Ernestii et amicorum eius opera ex editionibus Gronoviana et Crevieriana enotatae, quam non solum textui Liviano, sed epitomis quoque subiiciendam curavi. Quum autem in iteratam harum editionum collationem, molestam illam neque admodum fructuosam \*\*\*), tanquam in aliquod pistrinum, detrudi nol-

\*) Ne haec quidem a recentioribus Livii editoribus correctae esse, docui in Epistola ad Goellerum p. 419. sq. atque in editione Drakenborchiana nuper Stutgardiae repeti coepta etiam nunc, quod mireris, Liv. X, 46. vitiose *pondo millia trecenta triginta* legitur.

\*\*) Perperam enim Drakenborchii editio, ut alia taceam, Liv. XLI, 18. *constat pro constabat*, eiusdem libri cap. 26. *utrumque* pro *utrimque*, quod iam Doeringium Livio recte restituisse, dixi in Epistola ad Goellerum p. 444. et Liv. XLII, 10. *qui decernerent* pro *quid decernerent* exhibet; quos errores, quum per alias editiones sint propagati, in varietate lectionum notandos esse putavi.

\*\*\*) Nam primum lectiones tantum non omnes, a Drakenborchio in textu repositas, Gronovius et Crevierius in notis comprobaverunt; deinde permulti errores ex editione Gruteriana per Elzevirianam in Gronovii et Crevierii edi-

lem, eam non nisi passim, ubi Ernestium eiusque socios vel erratorum indices, singulis editionis Gronovianae voluminibus adiectos, non inspexisse vel alia ratione per negligentiam peccasse viderem, diligenter emendavi et, data occasione, inter ipsum textus recognoscendi laborem additamentis locupletavi. Qua quidem in re magnopere me adiutum esse profiteor notis Lallemandi, cuius editionem sero demum nactus intellexi, me nihil fraudis subesse opinantem editionis Crevierianae minoris exemplo, cuius sex volumina Lutetiae Parisiorum annis MDCCLXXXV. MDCCLXXX. MDCCLXXIV. MDCCLXXXI. MDCCLXXXIX et MDCCLXIX. ex I. Barbou officina prodierunt, in errorem esse inductum, quem, maiore voluminis primi parte iam typis exscripta, corrigere non possem. Nam quum Crevierius ipse in praefatione huic editioni praemissa p. 5. sq. professus esset, textum huius novae editionis ex maiore illa, quae summa diligentia curata sit, ita descriptum esse, ut hic non minus illimis, atque etiam purior in quibusdam defaecatiorque prodiret, minorem hanc Crevierii editionem a maiore locis compluribus discrepare, non miratus sum atque id ipsum in varietate lectionum passim adnotavi. Postea vero, quum pervenissem ad locum Liv. VII, 8. ubi ex palmaria Crevierii et F. W. Reizii coniectura *ab Signinis* pro *ab signis* rescripsi, neque eadem, quae Schaeferus in praefat. ad Meletemata critica p. 6. ex Crevierii notis adtulit, in meo exemplo legi animadvertissem, bibliopolae Parisiensis fraus apparuit. Comparato enim genuinae editionis a Crevierio ipso anno MDCCXLVII. et sequenti adornatae exemplo, in quinque prioribus adulterinae illius editionis voluminibus textum Livianum, licet nota anni MDCCLXXIV. in voluminis tertii titulo conspicua, iudicio nostro

tionem irrepserunt. Vid. Drakenborch. praefat. Tom. VII p. 69. sq.



adversari videatur, ex Lallemandi editione descriptum et Crevierii notas partim omissas, partim hic et illic, ut novo textui accommodarentur, vel refectas vel contractas adeoque truncatas esse, facile intellexi. Hac igitur editione pseudocrevieriana, ut vocabulo recens conficto utar, augeri, si placet, poterit syllabus editionum Livii, a Drakenborchio concinnatus, quem primo nostrae editionis volumini praemittere malui, quam cum Ernestio volumini quarto includere; ita quidem, ut praeter notas passim adspersas et uncinis inclusas adderem editiones Livii praecipuas, post Drakenborchium vel perfectas vel inchoatas, et elenchum editionum fragmenti Liviani, breviorum quidem, sed emendatiorum et novis aliquot additamentis auctum, adicerem ex nostra Adumbratione notitiae literariae de T. Livii Pat. Historiarum lib. XCI. fragmento, Romae in bibliotheca Vaticana reposito. Lips. MDCCCXIII.

Hoc enim Livii fragmentum, ceterorum omnium, quae supersunt, amplissimum et pretiosissimum, quod P. I. Brunsius, V. M. Juvenatium laboris gravissimi socium nactus, abhinc annis quinquaginta ex codice olim Palatino, nunc Vaticano, eoque palimpsesto, primus evulgavit et nuper B. G. Niebuhrius multo integrius et emendatius edidit, cum reliquis fragmentis nostrae Livii editioni mantissae instar addere eo minus dubitavi, quo vehementius promissi constantia postulare videbatur, ut nomen de hoc fragmento iterum edendo et pristinae integritati utcumque restituendo ante hos sedecim annos contractum\*), tan-

\*) Anno enim MDCCCVII. ineunte textum fragmenti Liviani ita ex coniectura mutatum et suppletum edidi, ut in hoc libello perfectioris editionis praenuntio nunc multa mihi met ipsi displiceant; anno autem MDCCCXII. exeunte novam eius editionem programme publice proposito et Actorum seminarii regii et societatis philologicae Lipsiensis Vol. II. Part. II. p. 545. sqq. inserto iterum

dem aliquando cum foenore dissolverem. Neque est, cur huius mor e aut me poeniteat, aut lectores pigeat, quum praeter fragmenti apographum, a Brunsio ipso diligentissime exaratum, aliasque schedas, quibus idem fragmenti nondum penitus eruti particulas ex codice petitas inscripsit, et editionem Neapolitanam, quam cum chartis illis Brunsius mihi muneris loco obtulit, editionis Hamburgensis exemplum, editoris manu correctum, ex bibliotheca Brunsi, post eius mortem publice distracta, mihi comparaverim, aliaque praesidia, magnam partem rarissima, undique conquisiverim. Insigni enim fortunae favore mihi contigit, ut, officiosa amicorum voluntate mirifice adiutus, non solum fragmenti Liviani tricies ferme typis exscripti editiones, si discesseris a Veneta, quae anno MDCCXCI. prodit, et Parisina, quam I. T. Harduinus anno MDCCXCIV. adornavit, omnino omnes, atque in his etiam longe rarissimas, veluti Romanam, quam Fr. Iacobsius ex bibliotheca Gothana benevole mecum communicavit ac Fr. Chr. Matthiae mihi dono dedit, et Upsaliensem, quam ab Io. Ihrrio paratam Upsalia ad me transmisit Andr. Svanborgius, nancisceretur, sed etiam versiones, sermone vernaculo et peregrino conscriptas, aliosque libros ac libellos, qui ad fragmenti historiam et explicationem pertinent, in promptu haberem. Quibus quidem praesidiis iam dudum comparatis quum nunc accesserit editio Niebuhrii, qui, prius quam de editionis Hamburgensis

promisi. Quae fragmento Liviano additurus eram Sallustii historiarum fragmenta, olim ab Is. Vossio inter codices Petavianos Holmiae reperta et postea ex bibliotheca Christinae, Suecorum reginae, in Vaticanam translata, ad fidem apographi, quod me Niebuhrii benevolentiae acceptum referre, iam in Epistola ad Goellerum p. 472. sqq. professus sum, multo pleniora et emendatiora, quam F. D. Gerlachius, recentissimus Sallustii editor, p. 253. sqq. exhibuit, alio tempore et loco emittam.

virtutibus per literas a me certior esset factus, de Romanae editionis integritate nihil dubitans, adhibito medicamento, non tantum multa ex iis, quae Brunsius et Iuvenatius pro desperatis reliquissent, plenius eruit, verum etiam ea, quae iam editio Hamburgensis satis integra exhiberet, denuo pervestigavit atque paucas, quae restant, lacunas probabiliter supplevit, fragmenti Liviani textum multo certius, quam olim potuissem, editionem eius prolatando constituere potui. Ne autem huic editioni aliquid ad perfectionem deesse videretur, Brunsii ad Kennicottum epistolam atque Franc. Cancellarii praefationem et epilogum, quae fragmenti reperti historiam enarrant eiusque faciem externam describunt, cum auctariis ex Niebuhrii potissimum editione petitis, textui praemittendas; textum ipsum, argumento praefixo, ad codicis Vaticani fidem vulgari nostro caractere quadrato diligentissime repraesentandum, itemque minuto exprimendum ac supplementis explendum; adnotationes interpretum superiorum sive integras, sive excerptas, cum varietate lectionum et nostris quilibuscunque observationibus subiiciendas atque Danvillii commentationem de nominibus populorum et oppidorum, quorum mentio in fragmento iniicitur, cum versionibus fragmenti anglico et gallico sermone compositis coronidis loco addendam esse iudicavi.

Praeterea ex hoc ceterisque Livii fragmentis post Ernestii et Schaeferi curas passim collocupletabuntur index rerum Drakenborchianus et glossarium Livianum atque, quod par est, omnibus Livii locis a me vel correctis vel suppletis accommodabuntur. Typothetae denique errores, quorum complures ab iis, qui plagulis emendandis praecessent, non sublato esse aegerrime fero, omnes omnino, nisi qui nostrorum quoque oculorum aciem effugerint, in quarti voluminis fine indicabuntur.

Haec habui, quae de laboris a me suscepti ratione praefarer tribus Livii voluminibus, ex bibliopolae voluntate, cui adversari religio erat, iam nunc, opere nondum absoluto, in publicum emitendis, quae duo reliqua volumina non ita longo pro rerum adhuc peragendarum gravitate intervallo sequentur.

Scripsi Misenaë in illustri Afraneo, a. d. XI. Calend. Septembr. A. MDCCCXIII.

---



---

## PRAEFATIO

### EDITIONIS PRIMAE.

---

Quum consultum visum esset librario, viro honestissimo, in cuius officina aliquoties Livianum opus, a Io. Clerico editum, repetitum erat, novam editionem curari, quae non multo maiori pecunia veniret, studiosae quippe iuventuti destinata, et haberet aliquid novi boni; huius ego negotii curam eo libentius imponi mihi passus sum, quum esset instituti totius ratio a venerando patruo meo petita, viro de litteris et de ecclesia non magis, quam de me, merito, cuius sub auspiciis in utilitatem publicam nonnihil conferre laetarer.

Tantum autem post Gronovios profectum est in Liviani operis contextu emendando et ab librariorum editorumque peccatis purgando, ut novi textus exhibendi prima nobis cura occurreret. Itaque placuit ex recentissima atque emendatissima Drakenborchii recensione contextum exscribendum curare; ratis, et ipsi historicorum latinorum principi hoc deberi, ut a iuvenibus, qualis fuisset, non qualis esset ab aliis vel effictus, vel deformatus, cognosceretur, et vero etiam ipsi iuventuti, cui quam emendatissima exempla auctorum graecae et latinae linguae ad legendum proponi debent. Io. Frid. Gronovius merito ille quidem suo Livii sospitator dicitur, textumque dedit eiusmodi, ut illa aetate melior atque correctior spe-

rari non posset; sed postea tamen, tanto intervallo facto, Creverius et Drakenborchius, tum codicibus scriptis adiuti, tum editionibus principibus copiosius instructi, eodem propemodum tempore, eum Livii contextum dedere, qui ad veritatem propius multo accederet. In hoc autem genere quum non minus temporum et fortunae beneficium sit, quam hominum, salva manet magno Gronovio laus Livii restituti, salva existimatio. Atque tum hanc ob causam consentaneum visum est, et e re studiosae iuventutis, praesertim, cui in scholis Livius praelegeretur, subiicere textui Drakenborchiano varietatem lectionis Gronovianae; tum quod e Basileensi maxime repetitione frequentiora sint apud nos exempla Gronoviana, iuvenumque manibus terantur. Et est ille ipse contextus Gronovianae recensio-  
nis basis Creverianae ex auctoritate codicum regionum, non rarissime ille quidem, sed tamen non nimis saepe correctus, nec minus Drakenborchianae. Poteramus notanda discessione textus Creveriani supersedere, si quidem Drakenborchio a principio editionis suae curandae exemplum Creverianum ad manus fuisset, ut eius lectionibus uti potuisset: quamquam etiam raritas ipsa huius editionis in his terris suasit, negotium collationis duplicare, ne desiderari quidquam posset, quod ab illis triumviris in emendando Livio praestitum esset. Eam autem varietatem omnem non nostris ipsorum tantum oculis confisi notavimus, sed et aliorum amica opera usi sumus; ut consilio proposito, quantum per imbecillitatem humanam licet, satisfactum esse speremus. Ceterum, si quis miretur in his saepe etiam minutias notatas esse; ut nihil eorum, quae possim, defendendi mei causa dicam; diligentiam certe idem nostram perspiciet, nec, ut opinamur, improbabit. In epitomarum autem diversis exemplis comparandis, quas notavimus varietates; notavimus autem aequè diligenter, atque in textu Liviano ipso, omnes; eas,

quoniam e re iuvenum non nimis esse putabamus, conspici in ipso contextu Liviano, ad calcem uno in loco perlustrandas proposuimus \*).

Illud autem iuvenum commodis vel maxime aptum fore putavimus, si indicem rerum locupletissimum haec editio nostra adiunctum haberet. Is est Drakenborchianus, resectis tamen iis, quae ad librorum Livii deperditorum supplementa Freinsheimiana pertinerent. Ex quo vel obiter inspecto intelligetur, quanta rerum copia Livius abundet, ut vel hac de causa frugifera maxime lectio eius videri debeat. Sed ad paratiorem etiam usum eorum exscripta illa omnia exsignataque sunt, quorum opera in legendo aliquamdiu Livio versata est, quique interdum, quod se legisse recordentur, requirant.

Sed quoniam in Livio permagna pars est latinitatis et melioris et exquisitioris, nec rerum cognitio accurata, nisi ab intellecta oratione venire potest, magnum adiumentum latinitatis illius studiosis et Livii lectoribus adiungi posse dudum visum est viris doctis, si quis indicem latinitatis Livianae conficiendi negotium susciperet. Illud ergo opus nos, eum laborem, studiosorum causa subeundum putavimus. In quo duo nobis proposita fuerunt. Primum enim velut in compendio quodam exhibere voluimus, quae proprie Liviana essent, praetermissis fere iis, quae communia viderentur. Ita, opinor, facile intelligi poterit ab iis, qui cognoscere cupient, primum Liviana dictio quanta quotque bona habeat, quam exquisita permulta et elegantia, deinde vero etiam quam multa cum oratorio et poetico sermone coniuncta, tum, quam singularia non pauca, interdum, quae vix imitanda esse videantur: denique a quibus initiis latinitas poste-

[\*) Nos commodius esse duximus, lectionum varietatem epitomarum quoque textui subiicere.]

rior historicorum, inprimisque Taciti insolentior, profecta sit.

Nec vero in hoc substitimus, sed etiam ad intelligendum adiuvere iuvenes aliosque volumus; praesertim qui aliena ope carerent. Itaque interpretationes addidimus, glossaque perpetua instruximus indicem hunc, ubi nec e vicinia propositorum, nec ex ipsa characterum diversitate, quorsum attendendum, quomodo quaeque intelligenda, assequi liceret. Id consilium interdum nobis necessitatem imposuit rerum in priori indice commemoratarum mentionem faciendi et explicationes addendi. Atque etiam varietatem lectionum in censum vocavimus, praesertim ubi et ipsae ad explicandum aut illustrandum valerent; eodemque consilio nec emendationes interpretum negleximus, nonnunquam et a nobis emendandi periculo facto.

Ceterum etsi excussimus vastos commentarios in Drakenborchiana editione omnes, adhibuimusque magnam in textu Liviano legendo et relegendo diligentiam, quae ad notandi negotium pertineret; longe tamen absumus ab ea arrogantia, ut omnia, quae pro instituto nostro notari debebant, observata esse a nobis in indicemque hunc relata atque explicata confidamus, nec credamus, non parvum adhuc spicilegium relictum esse. Id si nihil aliud, certe omnis omnium indicum talium et lexicorum vel ab diligentissimis confectorum historia nos moneret. Praeterea mihi fortasse usu venit, ut, quum inter legendum dulcedine rerum et orationis tenerer, ipse consilii mei obliviscerer, et notare negligerem, quae debebam. Alio tempore fortasse nimis et obscure diligentes fuimus quum in eorum locum descenderemus, quorum causa lectionem et observationem instituissimus; et ea notata et proposita videri poterunt, quae praetermitti potuissent; praesertim quum non idem omnibus in hac re sensus sit, non eadem omnibus animi affectio



non omnibus idem in his litteris profectus aut usus. Quotusquisque autem est tam lynceus, ut omnia animadvertat, omnibus horis satis acute videat? His de causis speramus aequis nos in hanc partem iudicibus usuros esse, praesertim iis, qui similes labores exsudarunt, hoc est idoneis arbitris. Accedit, quod nullius superioris indicis ex eo genere adminiculis uti nobis contigit. Nam Maettarianus\*), cuius magna fuit apud nostros, nescio unde orta, existimatio, admodum ieiunus est, nec ille verborum modo index, vel potius indiculus, ut nullus plane usus eius nobis esse potuerit. Creverius autem promiserat ille quidem verborum indicem\*\*), sed et ipse ab hoc negotio deterritus est magnitudine laboris\*\*\*).

Placuit etiam catalogum editionum Livianarum, qui reperitur in editionis Drakenborchianae tomo septimo, sublicere, eique nonnullas recentiores addidimus†).

\*) Si quidem auctorem Maettarium habet. Nam eius nomen editio Livii, quae ei vulgo tribuitur, non prae se fert. Nec vero aliam alibi Maettarii editionem indicatam reperi, ut etiam ex catalogo editionum Livianarum Drakenborchiano intelligere licet. [Hunc indicem, editioni Lond. 1722. primum emissae additum, a Maettario confectum esse, negat Ebert. in Lex. bibliograph. Vol. I. p. 1001. n. 12109.]

\*\*) In praefat. Tom. I. p. 71. „Indicem locutionum Livianarum, quo hactenus carent litterae, adiungere consilium est: utilissimum laborem, sed qui, licet in carpendis et colligendis Latinae elegantiae floribus occupatus, tot tamen spinis horreat, ut, nisi auxilium nobis amicae manus praesto futurum esse confideremus, ipsi parem tam gravi molestiae non auderemus spondere constantiam.“

\*\*\*) In praefat. Tom. VI. p. 2. „Poterant a nobis adhuc expectari duo alii indices, geographicus alter, alter locutionum Livianarum. Sed veremur, ne prior ille etc. Alter nos labor, licet utilissimus, immani difficultate deterruit.“

[†) Ernestius duas tantum addiderat Livii editiones, quarum

Nec vero, ut hoc addamus, ea parva res videri debet, si quis his, aliisque maioribus adminiculis nixus ad orationis Livianae rerumque per eam traditarum accuratam cognitionem pervenerit. In tota antiquitate Romana, cuius cognoscendae tanta necessitas atque utilitas est, incertus vagetur et erret, nisi qui duce Livio utatur. Non exstitit unquam interpres Taciti, Suetonii aliorumque scriptorum historiae Romanae idoneus, quin hanc sibi facultatem Livio legendo et accurate cognoscendo pepererit. Sed latius patet illa utilitas. Nemo enim ad illos auctores recte legendos, ad iuris veteris latinitatem historiamque intelligendam, ad historiam et antiquitatem Romanam omnem accurate cognoscendas, alio, quam Livio, comite aditum sibi patefecerit. Regnarunt profecto in illis partibus doctrinae, tam ad usum necessariae, tam ad voluptatem iucundae, quotquot illam viam ingressi persecutique sunt. Contra, qui, non qua eundum, sed, qua itur, iere, hoc est, qui antiquitates iuris Romanasque universas e lexicis potius antiquitatum, et compilatorum ex eo genere libris hausere, quam e Livio eique similibus veterum scriptoribus; ii vero omnes incidere in errores gravissimos, quorum nunc quoque multi in opinionibus et libris multorum offenduntur.

Quod reliquum est, optamus, ut tandem aliquando vel magistri scholarum vel adolescentes vulgatam de intelligendi Livii difficultate opinionem ex animis dimittant. Nam etsi forma orationis, diversa utique ab Caesariana et Ciceroniana, ad illum legendum accedentibus speciem difficultatis maioris obiiicit; breviori tamen usu omnis illa tollitur. Id memetipsum res docuit, quum ad eius lectionem quondam in disciplina venerandi patris mei venissem: qui quidem dicere solet, in nullo alio auctore latino discipulis

altera Crevierii cura Paris. 1747. 48. altera accurante Th. Ruddimanno Edinburg. 1751. prodiit.]

olim in schola Thomana proposito melius sibi rem successisse, quam in Livio cursoriis lectionibus explicando. Hoc ille instituto, quoad ibi docuit, usus est inter eos, qui privata opera eius in addiscendis bonis litteris fruebantur: ex eaque disciplina, inter multos alios et ipsi Livii amorem retulimus.

Quodsi quid ad Livii lectionem faciliorem iuventuti reddendam contulero, satis magnum laboris prae-  
mium accepisse me existimabo. Scrips. Lipsiae in  
mercato vernali A. C. MDCCCLXIX.

---

---

## PRAEFATIO

### EDITIONIS SECVNDÆ.

---

**N**on putaram, post trium lustrorum intervallum Livii denuo edendi necessitatem mihi venturam esse. Nam et fraude famelici hominis editio mea repetita erat \*), et aliae Livii editiones, cura virorum doctorum deinceps comparuerunt paranturque quum maxime. Atque, ut verum fatear, ne optaram quidem, ut recudendi Livii opera mihi rursus imponeretur; non, quod laborem subterfugerem, aut cessator esse solem: Ammiano enim ante hos duodecim annos, excitatus favore illo, quo glossarium Livianum exceptum fuerat, eandem operam navavi: sed, quod usu cognoveram, in summo studio, de latinitatis auctoribus bene merendi, non posse tali instituto summis ingeniis; eorumque imitatoribus, tantum dari atque impertiri, quantum in optatis fuisset. Habent sane indices eiusmodi hoc vitii, ut neque figurarum notatio, neque constructionum insolentia, neque singularum elegantiarum ratio, ab universo quippe, vel contextu, vel orationis habitu saepe pendentium, satis exhiberi queat, certe non ita proponi conspicienda, ut in promptu esse videantur. Has equidem ob causas pertaesus istiusmodi laborem ingratum obscur-

[\*) Ernestii querela haud dubie pertinet ad editionem Livii, quae Bamberg. 1778. prodiiit.]



ramque diligentiam, ut mihi vacare tali tamque promodum irritò negotio liceret, optaveram. Sed reputans tamen, in commentariis perpetuis, vel iterum iterumque, atque etiam saepius, repetendo easdem annotationes, vel non minus saepe reiiciendo lectores ad semel observata, haud paullo plus incommodi ac taedii iuvenibus, utriusque fere impatientibus, creari, ut etiam deterreantur a cognoscendarum dictionis virtutum studio, praesertim in tractandis plurium voluminum editionibus; non potui non, vel invito mihi, persuadere, artibus dicendi velut in tabula propositis, ac per indicis opportunitatem sine mora obviis, utique bene illis consuli, qui optimi cuiusque scriptoris ingenium assumere cuperent, et ad latinae linguae facultatem niterentur. Huius ego praecipuae utilitatis memor, nec librario diutius adversandum ratus, dedi operam, ut lactea illa Livii ubertas in glossario a me retractato copiosius aliquanto compareret. Quae igitur paucis exsignare, atque ita, salva perspicuitate, exhibere licebat, ea simpliciter notavi; alia, quorum intellectus non satis promptus esset, additamento aliquo illustravi; pleraque integris locis, sensu certe pleno, exscripsi atque proposui: primo, ut aliquot locis, iisque se invicem excipientibus et inter se comparatis, ipse sui esset interpretes Livius; deinde, ut, praeter verborum copiam, altera etiam eloquentiae dos, h. e. sapientia Liviana agnosci posset. Nihil facilius est, quam scriptorum loca paucis, atque ita excerpere, ut eorum explicatio et necessaria videatur, et sine difficultate addi queat. Hanc ego vanitatem curiose vitavi, maluique cum utilitate ac suavitate lectorum nil nisi exsignasse videri, quam interpretis male seduli personam, cum iniuria Livii, sustinuisse. Iam sponte intelligitur, si tale opus exspectationi omnium, in omnibus necessitatibus, plane satisfacere deberet, aliquot illud voluminibus, spissis quidem, compre-

hendendum fuisse; quemadmodum concordantiae bibliorum, ut hoc utar, non aequant modo eorum textum, sed etiam superant. Sed exempla non desunt e profano genere. Textus quidem Virgilianus quantulus est ad Livianum! Quis autem nescit, indicem editioni Heynianae subiectum quatuor et viginti plagulis contineri? Haec ideo dicenda erant, ne quis in hocce glossario antiquitatis publicae et privatae, vocabulorum item per occasionem prodigiorum a Livio adhibitorum, aliorumque rationem prope nullam habitam esse crimineretur. Quamquam huic desiderio index rerum Drakenborchianus, ad calcem quarti voluminis repetitus, vel me indicente, occurrere poterat. Secundum haec illud mihi propositum relinquebatur, ut propemodum non nisi latinitas popularis, et ingenium Livianum copiosa illa dictione expressum, a me exhiberetur. In quo, licet uno, attamen infinitae observationis negotio, quantum sit, quod adhuc desiderari queat, ipse optime intelligo. Eius rei causas, sane culpam elevantes, apud peritos et aequos iudices commemorare non attinet. Unam tamen hanc indicare cogor, quod, de voluntate librarii, hoc mihi respiciendum fuit, ut glossarium superiori editioni adiectum in tantum augeretur, in quantum integri voluminis, quatuor prioribus aequale, modus pateretur: quae quidem ratio, quum peculii iuvenilis modulus necessario spectandus sit, non nimis inepta videbitur. Itaque abstinendum mihi etiam fuit ab uberioribus illustrationibus, quae in promptu erant. In his autem, quae sunt e medio genere a me dicta, fortasse non ubique nominasse videbor eos, quos vel explicationum vel emendationum auctores sum secutus. Per me igitur licet, ut omnia in utroque genere a me ipso dicta, aliis accepta referantur. Malo subiniquis in me, quam ridiculus videri. Quis enim risum tenuisset, Drakenborchii, Dukeri, Gronovii, aliorum nominibus unaquaque pagina saepius a me citatis? in

quo vereor, ne vel sic modum nonnunquam excesse-  
rim. Huius autem diligentiae necessitas mihi impo-  
netur, quum, in usum provectorum, volumen ex-  
cerptarum observationum conficiam, hauriendarum  
illarum non modo ex eorum, quos ante nominavi,  
sospitatorum Livii animadversionibus, sed etiam e  
Baueri, Schelleri, denique Strothii, virorum cele-  
berrimorum mihiq̃ue amicissimorum, notis et obser-  
vationibus, quibus vel iam donatus est Livius, vel  
deinceps donabitur. Enimvero, praeter haec inge-  
niorum ac doctrinae praesidia, in hoc novo volumine  
ipsi textui Liviano nonnihil prodesse continget,  
posteaquam copia mihi facta est codicis MS. bonae  
notae, totumque prope Livianum opus continentis,  
collati iam illius quidem in multis locis, sed nondum  
penitus excussi. Is codex asservatuꝫ in Amplissimi  
Senatus urbis huius bibliotheca, unde Illustris Muel-  
leri, Magnifici Consulis et bibliothecae Praefecti  
longe meritissimi, beneficio commodatum accepi; ut  
taceam, aliunde quoque excerptorum e MS. spem  
mihi factam esse. De tempore nihil certi promittere  
licet. Est enim illud non unius anni negotium, nec,  
nisi absolutis illorum triumvirorum operibus, ab-  
solvendum \*).

Sed de ipsa hac Livii editione adhuc aliquid est  
dicendum. Est haec mera illa quidem repetitio tex-  
tus Drakenborchiani, sed tamen et melius ordinata,  
quum singulis voluminibus singulae decades conti-  
neantur, et accuratius typis exscripta. In uno, quod  
sciam, iniuria Livio facta est, quum quidem, prae-  
eunte Drakenborchio, lib XXII. cap. 39. med. duo  
vocabula *non supplementum* omissa sunt; locus enim  
integer hic est: *non commeatus, non supplemen-  
tum, non pecuniam habeat?* Hoc vitium operarum in

[\*] Satis constat, Ernestium promissis non stetisse. De co-  
dice Lipsiensi vide, quae diximus supra in praefat. p. X. sq.]

nota Cel. Strothii ad h. l. sero a me observatum erat \*). In ceteris spero fore, ut nemo offendat. Fragmentum etiam libri XCI. a Cel. Brunsio e bibliotheca Vaticana ante hos duodecim annos editum epitomis librorum deperditorum subiiciendum curavimus Vol. IV. p. 297. De indice rerum memorabilium ibidem exhibito superius dictum est. Hoc denique praecipui habet haec nova editio, quod singulis paginis chronologiam exhibet, e Creveriana editione notatam: quam in Drakenborchiana desiderari a viris doctis animadverteram.

Quodsi haec opera mea Livio navata eo profuerit, ut a bonarum litterarum studiosis ingenii cultus animique facilius accipiatur, impense laetabor. Scr. Lipsiae in mercatu vernali A. C. MDCCCLXXXV.

---

[\*) Vix opus est, ut dicam, hoc vitium, in tertia quoque editione servatum, a me sublatum esse.]



---

## PRAEFATIO

### EDITIONIS TERTIAE.

---

Quod hanc recentissimam Liviani operis editionem, sine nova contextus retractatione, solummodo repetitam e superioribus in publicam lucem emisimus, factum est valetudine pristini editoris, Augusti Guilielmi Ernestii, quem multos per annos afflixerat gravis et continuus morbus, cui et nuper victus succubuit. Illa tamen repetitio non nisi ad quatuor priora operis volumina pertinet. Quintum enim volumen, quo glossarium Livianum continebitur, quamvis serius, tamen, ut speramus, auctius et emendatius prodibit. Dabamus e bibliopolio Weidmanniano Lipsiae mense Septembri MDCCCI.

---

---

ARN. DRAKENBORCHII  
S Y L L A B V S  
EDITIONVM PRAECIPVARVM  
T I T I L I V I I.

---

Romae per Contr. Sweynheym et Arn. Pannartz, cura Io. An. Episcopi Aleriensis, qui editionem hanc a se recognitam, addita praefatione, quam pleraeque editiones seculo xv. et initio seculi xvi. excusae servarunt, dedicavit summo Pontifici Paulo II. Veneto, et Marco Sancti Marci Cardinali, in forma maiore.

Huic editioni annus, quo prodiit, non adscribitur: antevertisse tamen annum mccccclxxi. eo argumento probat I. Fr. Gronovius in Praefat. quod illo anno Paulus Pontifex, cui dicatur, mortalitatem explevit. Hinc Fabric. in Bibl. Latin. eam retulit ad annum mccccclxx. similiterque viri Clariss. Thom. Hearne et Io. Clericus in Indice praecipuarum Livii editionum. Verum Clariss. Mich. Maittaire in Annal. Typograph. Tom. i. pag. 66. et Tom. iv. pag. 283. potius referendam contendit ad annum mccccclxix. quia Veneta Livii editio, quae sequitur, et lucem adspexit anno mccccclxx. eandem, quam haec Romana, Episcopi Aleriensis epistolam praefert, et hinc posterior, quam illa, censenda est. Aleriensis enim epistola indicat, se editioni, quae Romae excusa est, dedicandae conscriptam esse: neque facile credi potest, utramque editionem alteram Romae, alteram Venetiis eodem anno exiisse. Non convenit etiam de ipsius editoris nomine. *Ioannes Antonius de Buxiis* vocatur Ughello in Ital. Sacr. Tom. iii. pag. 503. ubi ipsi, in Ecclesia S. Petri ad Vincula sepulto, sequens epitaphium positum fuisse refertur: *Ioanni Antonio Episcopo Aleriensi,*

patria *Viglevanensi*, *Sixti IV. Pontif. Mar. Ref. Biblioth. Secretarioque*, venerando senatui ac toti Ecclesiae charo, qui fuit pietate, fide, literis insignis, de patria, parentibus, amicis, et omnibus bene meritus, *Iacobus frater germanus pientiss. vix. ann. LII. mens. VI. dies II. obiit anno Iubilci M. CCCC. LXXV. prid. Non. Febr. Contra Ioannes Andreas* vocatur apud Pomponium Infortunatum in vita Lucani, quam ex Lucani editione Romana anni *MCCCLXIX.* in sua repetiit Clariss. Oudendorpius. Similiter apud Raph. Volaterr. lib. *xxi.* Comment. Urban. fol. 246. verso, et apud Petr. Cyrneum lib. *iv.* de Reb. Corsic. (quem edidit Murator. Tom. *xxiv.* Rer. Ital. Script.) pag. 490. His synchronis, aut certe aetate proximis, scriptoribus consentiunt I. Fr. Gronovius in Praefat. Liviana, et Maittaire in Annal. Typogr. Tom. *i.* pag. 43. et Tom. *iv.* p. 112. Insuper tomo *iii.* Commentariorum Lyrani in SS. Biblia, qui ab ipso Aleriensi anno *MCCCLXXII.* editi sunt, praemissa est eius epistola hoc titulo: *In tertium volumen Nicolai de Lyra Io. Andree Alerien Episcopi Sanctissimi D. N. Papae Bibliothecarii ad Xystum IIII. Pont. Maximum Epistola.* Quaenam virorum doctorum sententia, haec, an illa, verior sit, certius adfirmare poterunt, quibus memorati Epitaphii inspicundi copia erit. Mihi verisimilius videtur, in Epitaphio per compendium scriptum fuisse *Io. An. Episcopo Aleriensi*, quemadmodum nomen eius in multis epistolis, quas libris a se editis ipse addidit, exaratum occurrit, ut inter alias in his, quas Livio, tum tomo *i.* Commentariorum Lyrani in SS. Biblia, et aliis praemisit: illum vero, qui Epitaphium ex lapide descripsit, sive Ughellus, sive quis alius fuerit, inde perperam *Ioanni Antonio Episcopo Aleriensi* fecisse.

1470. Venetiis per Vindelinum Spirensem, sive de Spira, in forma maiore.

In hac editione denuo apparere epistolam Ioannis Andreae Episcopi Aleriensis, quae iam in praecedenti Romana data erat, monuit Clariss. Maittaire in Annal. Typograph. Tom. *i.* p. 69. et Tom. *iv.* p. 289. Ad finem huius editionis adscribitur annus *MCCCLXX.* et subiiciuntur sex et quadraginta versus, quorum laudatus Maittaire priori loco sex, posteriori eisdem sex et insuper decem alios exhibuit. Eos omnes ex raro obvia editione hac, quae Lipsiae in bibliotheca Senatoria exstat \*), mihi descripsit Clarissimus

[\*) Eius exemplum etiam in bibliotheca Academiae Lipsiensis adservari, ex Eberti Hist. Biblioth. Reg. Dresdens. p. 355. didici.]

Sachsius, quos libens lubens cum lectore communicabo.  
Erant autem tales:

*Proderat haud multum, LivI, abs te scripta fuisse  
Maxima, si Romae facta pari eloquio:  
Quae seu desidiis, alio seu crimine quovis,  
Sive et temporibus cuncta fere occiderant:  
Quaeque superfuerant opera, haec tam rara videri,  
Ut pene ipsorum copia nulla foret.  
Et VINDELINO debebis tu quoque, formis  
Egregie impressit has modo qui decadas:  
Atque ipsas iisdem scaevis (sic) velut hostibus acri  
Bello oppugnatas fortiter eripuit.  
Hac etenim studiis non tantum Romulidumve  
Historiis opera, quam tibi, consuluit.  
Quippe tuo hac in re cum Romae nomine iuncto,  
Alterutrum servans servat utrumque simul.  
Ergo tua ut perdens opera est invisus habendus,  
Horum servator sic tibi amandus erit.  
Magna loquar, sed vera tamen. Conferre putatur  
Ad famam natos progenuisse probos.  
Non parvo maiora tamen monumenta putanda  
Sunt opera, excellens quae parit ingenium.  
Nec vero tantum fluxi quia corporis illi  
Existunt foetus, perpetui haec animi:  
Verum etiam nati quia non a patribus omnes,  
Sunt quibus affecti dotibus, accipiunt.  
Si qua autem gravis atque ornata oratio, qualem  
Cernimus esse tuam, composita extiterit;  
Huic nihil est prorsus, quod non suus offerat auctor:  
Sive eius formam, sive alia aspicias.  
Ipse hanc effingit, polit hanc, atque induit ipse,  
Ipse, anima tamquam, sensibus instituit.  
An natos igitur servanti cuncta putares  
Te debere, nihil haec opera eximia?  
Alde, quod et perpulchra effinxit et optima, cunctis  
Hoc etiam \*) ut placeant, haec monumenta tua.  
Atque tot impressit, totum his iam possit in orbem  
Diffundi, atque acuum nomen in omne tuum.  
Sed tua quae probitas, dignas non ambiget ullus  
Quin habeas grates ipse tuo artifici.  
Id superest, quando nulla est tam digna suppellex, (sic)*

[\*) Drakenborchius de horum verborum structura satis, puto, expedita laborans scripserat: Hoc (sic) etiam etc.]



*Quaeque tot ac tantis usibus esse queat.  
 Si neque iam magno sumptu magnoque labore,  
 Sed sibi quem minimo quisque parare valet:  
 Historias quisquis, quisquis sua commoda curat,  
 Impressa haec frustra non sinat esse opera.  
 Verum sic etenim sua quemque industria multum  
 Invenit, ipsa paret, lectitct ipsa diu.*

Hanc editionem nunquam vidisse videtur I. Fr. Gronovius; qui, quum in Franc. Robortelli Convenientia Supputationis Livianae cum marmoribus Capitolinis cap. III. et in Emendationibus lib. II. cap. LIV. memoratum vidisset librum Livii, qui a Vendelino impressus fuit anno MCCCCLXX. ex Victorini Feltrensis exemplari, hanc et praecedentem editionem unam eandemque esse, et, qui se in calce voluminis Sweynheyum appellat, ab Italis, Germanica vocabula invertere solitis, Vendelinum vocatum fuisse credit; quum tamen Conradus Sweynheyum et Arnoldus Pannartz, qui priorem impresserunt, typographiam Romae, at Vendelinus de Spira, qui posteriorem hanc edidit, eandem artem Venetiis exercuerint. Verisimile etiam videtur, editionem Livianam, quam Augustae Vindelicorum anno MCCCCLXX. excusam Lipsiae in bibliotheca amplissimi Senatus adservari Fabricius in Biblioth. Lat. retulit, non aliam, quam hanc Venetam, esse, et nomen typographi Vendelini ei, ex quo Fabricius huius editionis notitiam nactus est, persuasisse, ut crederet, librum Augustae Vindelicorum editum esse: editionem certe eo anno in illa urbe emissam ibidem non occurrere, ex testibus fide dignis accepi. Ex eodem errore etiam Vir Doctus in vita Livii, quam Niceromius inseruit Memoriis, virorum Illustrum Historiae inservientibus, Tom. v. p. 177. affirmasse videtur, primam Livii editionem esse, quae Augustae Vindelicorum anno MCCCCLXX. in forma maiore prodit.

1471. Romae per Udalricum Gallum, studio Ioannis Antonii Campani, cuius praefatio ad Cardinalem Papiensem praemititur, tribus voluminibus, in forma maiore.

Huic editioni annum adscriptum non fuisse, testatur Clariss. Maittaire in Annal. Typogr. Tom. I. pag. 72. Ipse non nisi quarta decade, sive libro XXXI. et sequentibus, usus sum beneficio Illustrissimi Lovelii, et huius partis finem nullum etiam annum adscriptum vidi, sed hos tantum sex versus, qui, teste Meyero in Annal. Flandr. ad annum MCCCCLX. p. m. 297. Antonium Campanum auctorem habuerunt.

*Anser Tarpeii custos Iovis, unde, quod alis  
 Constreperes, Gallus decidit, ultor adest.  
 Vuldricus Gallus, ne quem poscantur in usum,  
 Edocuit pennis nil opus esse tuis.  
 Imprimit ille die, quantum non scribitur anno:  
 Ingenio, haud noceas, omnia vincit homo.  
 Campanus.*

Eosdem versus etiam in fine primi voluminis exstare testatur Maittaire *ibid.* Tom. iv. pag. 292. Contra Thom. Hearne et Io. Clericus eam ad annum 1472. referunt: sed I. Fr. Gronovius in Praefatione ex bibliothecae regiae, quae Parisiis est, indice monet, decada primam anno MCCCCLXXI. tertiam et quartam anno MCCCCLXXII. lucem vidisse. Vide etiam Maittaire *loc. laud.* qui testem huius rei advocat Fabric. in *Bibl. Lat. lib. i. cap. xi.* editionis annorum 1712. et 1721. [Hanc editionem, quam medio fere anno 1470. impressam esse probabile sit, proximum a principe locum obtinere, docuit Ebert. in *Lex. bibliograph. Vol. i. p. 996. n. 12072.*]

1472. Romae per Conradum Sweynheym et Arnoldum Pannartz, in forma maiore.

Ad finem Livii hi versus legebantur:

*Aspicias, illustris lector, quicumque libellos,  
 Si cupis artificum nomina nosse, lege.  
 Aspera ridebis cognomina Teutona, forsitan  
 Mitiget ars Musis inscia verba virum.  
 Conradus Suueynheym Arnoldus Pannartzque magistri  
 Romae impresserunt talia multa simul.*

In domo Petri de Maximis M. CCCC. LXXII. die XVI. Iulii. Hanc editionem ex Illustrissimi Lovelii bibliotheca utendam accepi.

1478. Mediolani per Philippum de Lavagnia, in forma maiore.

[Ex editione Veneta, quae anno 1470. prodiit, derivata esse videtur Ebert. in *Lex. bibliograph. Vol. i. p. 996. n. 12075.*]

1480. Mediolani per Antonium Zarothum, in forma maiore.

In fine huius editionis, quam adhibui, adscripta erant haec verba: *Has tris Titi Livii decadas Petrus Iustinus Philelus, ut amicis quibusdam suis morem gereret, quam diligentissime recognovit. Impressit autem Mediolani opifex consummatissimus Antonius Zarothus, opera et impensis Ioannis Legnani, decimo Kalendas Novembres: regnantibus illustrissimis Mediolani ducibus Bona, et Ioanne Galeacio Maria Sphortia, anno a natali Christiano millesimo quadringentesimo octogesimo.*

1480. . . . . per Michaelē Manzolinum Parmensem, in forma maiore.

In fine huius editionis, qua ex munificentia Illustrissimi Lovelii usus sum, haec adscripta inveni: *Titi Livii Patavini historici illustris decadis quartae libri finiunt, quos Michael Manzolinus Parmensis ductu, impensa, solertique diligentia viventibus posterisque imprimi curavit anno salutis M. CCCC. LXXX. pridie Calendas Novembres.* Locus, ubi liber impressus est, non additur. Monet autem Maittaire in *Annal. Typograph. Tom. iv. pag. 406.* librum impressum quidem esse a typographo Parmensi, non tamen, ut Orland. *pag. 148.* putabat, Parmae; putat autem eum deceptum esse a Cornelio Beughemio *pag. 85.* quem saepius describere solet. Eodem errore ego etiam ubique hanc editionem in notis Parmensem vocavi, perperam ad id inductus, quod Manzolinus se Parmensem dixerit. Verum postea ex Clariss. Maittaire *Annal. Typograph. Tom. i. pag. 84. et Tom. iv. pag. 235.* didici, Michaelē Manzolinum Parmensem typographiam Tarvisii exercuisse, ibidemque ab anno MCCCCLXXVII. ad annum MCCCCLXXXI. varios libros emisisse. Quam igitur in notis editionem Parmensem vocavi, Tarvisina prima; quam vero Tarvisinam primam et secundam, Tarvisina secunda et quarta dicendae erant. Parmensem tamen editionem huius anni MCCCCLXXX. a Melchiorē Suessa excusam memorat Fabricius in *Bibliotheca Latina lib. i. cap. xi.* testatus se eius notitiam ex Beughemio accepisse. Sed perperam. Nullus enim Melchior Suessa sive Sessa inter typographos seculo xv. sive anno MXXD. memoratur, sed demum occurrit anno MDVIII. qui sibi anno MDXVII. socium adscivit Petrum de Ravanis, et cum eo Livium anno MDXX. Venetiis edidit, ut inferius suo loco videndum erit.

1481. Parisiis, in forma maiore.

Hanc editionem memorat Maittaire *Annalium Typogr. Tom. v. part. ii. pag. 532.*

1482. Tarvisii per Ioannē Vercellium, in forma maiore.

Ad calcem huius editionis sequentia adiecta invenio: *Has Titi Livii decadas, a Luca Porro quam diligentissime recognitas, Tarvisii Ioannes Vercellius impressit Anno salutis millesimo quadringentesimo octogesimo secundo.* Hanc editionem ubique in notis Tarvisinam primam perperam vocavi, quum Tarvisina secunda dicenda fuisset. Vide, quae de editione praecedente dicta sunt.

1483. . . . . per Michaelē Manzolinum Parmensem, in forma maiore.

Hanc editionem ex bibliotheca Hobendorfsiana laudat Maittaire in *Annal. Typogr.* Tom. iv. pag. 450. Ex illis autem, quae ad similem editionem, anno MCCCCLXXX. excusam, dixi, constat, hanc etiam impressam fuisse Tarvisii. Ita fuit Tarvisina tertia.

1485. Tarvisii per Ioannem Vercellensem, in forma maiore.

Hanc etiam editionem a Luca Porro recognitam esse, ex illis, quae ad finem libri subiiciuntur, constat. Eam usus meus commodavit Vir Clarissimus Sigebertus Havercampius; quam male in notis Tarvisinam secundam pro quarta a me appellatam esse, praecedentibus consequens est. Alibi etiam memoratam inveni editionem T. Livii Tarvisinam ex recognitione Lucae typis Ioannis Vercellensis anno MCCCCXCV. sed annum illum operarum errore pro anno MCCCCLXXXV datum esse verisimile est. Certe Maittaire recentiore hanc in *Annal. Typogr.* non memoravit, neque etiam Ioannes Vercellensis anno MCCCCXCV. Tarvisii typographiam exercuisse videtur.

1485. Parisiis, in forma maiore.

Hanc editionem memorat Maittaire in *Annal. Typogr.* Tom. v. part. II. pag. 532.

1491. Venetiis cum Annotationibus Sabellici, in forma maiore.

Hanc editionem ex Fabricii Bibliotheca Latina memorat Maittaire in *Annal. Typogr.* Tom. i. pag. 309. Sed Tom. iv. pag. 532. addit, ad eius calcem hanc formulam adiectam esse: *Impress. die V. Novembris, M. CCCC. LXXXXI. regnante Augustino Barbadico duce Venetiarum.* Cuius vero typis excusa fuerit, neutro loco memoratur. Ipse Sabellicus in praefatione refert, se Livium ad vetustum exemplar, ex bibliotheca Benedicti Cornarii Patricii Veneti depromptum, contulisse, petente Bernardino Hierasmio Novocomensi, homine fide et industria singulari, ut clarissimam historiam aliquanto integriorem novae impressioni subiiceret. Verum licet plures circa annum hunc typographi Bernardini Venetiis floruerint, nullus tamen memoratur Bernardinus Hierasmius Novocomensis.

1492. Venetiis, in forma maiore.

Haec editio ex bibliotheca Adr. Pauw recensetur apud Maittaire in *Annal. Typogr.* Tom. i. pag. 314. et Tom. iv. pag. 545. Suspicio tamen est, hanc et praecedentem eandem esse, earumque alteram, et quidem hanc, ex solo operarum errore natam esse.



1493. Venetiis per Matthaeum Capcasa Parmensem, in forma maiore.

Maittaire in Annal. Typogr. Tom. v. part. II. pag. 23. editionem hanc memoravit ex Orland. pag. 418.

1495. Mediolani per Uldericum Sinzenzeler, impensis Alexandri Minutiani, in forma maiore.

Editionem hanc memorans Maittaire in Annal. Typogr. Tom. I. pag. 332. et Tom. IV. pag. 590. testatur, ad finem eius legi haec verba: *Impressit Uldericus Sinzenzeler impensis Alexandri Minutiani; ex quam emendato exemplari, si cum ceteris conferes, quam facillime intelliges, candidissime lector; cui etiam librarium culpam, quantum licuit, idem Alexander praestare conatus est, Mediolani pridie quam Lud. M. SE. Anglus princeps sapientissimus huius incliti imperii sceptrum et ducalia insignia a Maximiliano imperatore per legatum acciperet. Anno salutis M. CCCC. LXXXV. die XXV. Maii.*

1495. Venetiis per Philippum Pincium Mantuanum, in forma maiore.

In hac editione repetuntur M. Antonii Sabellici brevissimae in Livium annotationes, locis suo ordine aut in integrum restitutis, aut in fronte, ne quid temere offenderetur, brevi indice relictis. Iis autem praemittitur ipsius Sabellici praefatio ad Magnificum et praestantem virum Benedictum Cornarium, Patricium Venetum. Ad finem libri haec verba subiuncta video: *T. Livii Patavini decades expliciunt, Venetiis per Philippum Pincium Mantuanum summa cura et diligenti studio impressae. Anno ab Incarnatione Domini M. CCCC. XCV. III. Nonas Novembris, Imperante Serenissimo Augustino Barbado, Venetiarum duce felicissimo.*

1498. Venetiis per Bartholomaeum de Zanis de Portesio, in forma maiore.

Recensuit hanc editionem Maittaire in Annal. Typogr. Tom. I. pag. 353. et Tom. IV. pag. 662. addens, eam sine notis prodidisse. Eadem servatur in bibliotheca Traiectina, unde utendam accepi, ac didici, in ea repetitas fuisse Sabellici Annotationes. Ad calcem eius libri haec adscribuntur verba: *T. Livii Patavini decades expliciunt, Venetiis per Bartholomaeum de Zanis de Portesio summa cura et diligenti studio impressae. Anno ab Incarnatione Domini 1498. die XX. Iunii.*

1501. Venetiis per Georgium de Rusconibus Mediolanensem, in forma maiore.

Hanc editionem, quae in locupletissima bibliotheca Leidensi exstat, eadem continere, quae ambae praecedentes, amice meo monuit Clariss. Oudendorpius; qui eam mea causa

examinavit. Ex eodem dilici, ad finem eius hanc temporis, quo lucem adspexit, et typographi notitiam reperiri: *Titi Livii Patavini decades expliciunt, Venetiis per Georgium de Rusconibus Mediolanensem summa cura et diligenti studio impressae, anno ab Incarnatione Domini 1501. die 4. Decembris.*

. . . . apud Alexandrum Minutianum, in forma maiore.

Huic editioni praefixa Minutiani epistola data est *Mediolani Ibid. Sept. 1505.* ad finem autem libri hunc temporis characterem inveni: *Apud Alexandrum Minutianum Nonis Quintilibus mens. Iulii.* Ex his editionem illam referendam puto ad annum MDV. ac verisimile videtur, excusam esse Mediolani. In ea enim urbe Minutianus tabernam librariam etiam seculo praecedente exeunte exercuit, et impensas in editionem Livii, quae anno MCCCXCV in ea urbe prodiit, contulit, ut supra vidimus. Ipse etiam hoc seculo XVI. ineunte ibidem varios libros typis impressit. Anno MDII Iustinum. Vide Maittaire *Annal. Typogr. Tom. II. pag. 156.* Anno MDIII. Bernardi Corii *Historiam Mediolanensem.* Vide Maittaire *ibid. p. 163. et 165.* Anno MDXIII. Iosephi opera Latine, et Egesippum. Vide Maittaire *ibid. pag. 247.* Livium hunc a se editum Minutianus dedicavit Iaffredo Carolo Iurisconsultissimo, Delphinatus ac Mediolanensis senatus Praesidi sapientissimo, testatus, *se non imitatum esse eorum temeritatem, qui, ut scire videantur, omnia corrigere ac emendare profitentur: sed quae sibi aut dubia aut obscura visa fuerint, ea se intentata reliquisse, ut per pristina dictionum aliqua vestigia vera et sincera lectio investigari possit.* Verum ut pateat, quid de hoc sive editore, sive typographo sentiendum sit, adscribam locum, licet paullo longiorem, ex Parrhasii Epistola, qua Commentarium in Claudiani libros de Raptu Proserpinae eidem Iaffredo Carolo dedicat. Ita inquit: *Non est (ne nobis blandiamur) hodie, non est Horatio bene monenti parere, scriptaque vel in paucos menses, nedum (quod illi placet) in annos novem comprimere, nisi laboris sui fructu fraudari quis velit. Adsunt enim ignavissimi quidam fuci, qui favis alienisque mellificationibus insidiantur: et quae multo longoque studio comperta sunt ab aliis, impudentissime pro suis ostentant. Ut iste vix satis idoneus impressor, qui castigationes in Livium meas ex magna parte subripere, tibi nuncupatim dicare non erubuit: in quo non minus existimationi tuae, quam mihi, fecit iniuriam. quasi vero divinus tuus animus interceptis gaudcat rebus, et in hoc etiam Superos non imitetur, quibus (ut Porphyrius auctor est) furta non litant. Ego, vir integerrime, triennio iam Livii bellum Macedonicum, frequenti professus auditorio, singulis lectionibus emen-*

davi, quod ante nos (absit verbo invidia) nemo tentavit: ostendique certissimis argumentis, ab eo, quam dixi, decada depravatam locis amplius mille. Veritus itaque, ne sua laniena per nos in publicum proderetur, editione praevenire festinavit: camque rem dissimulanter me laturum speravit, si sub umbra tui nominis emitterentur: ac si non eadem gratiora tibi futura sint a proprio iustoque domino, quam ab inverecundo plagiarario. Quum praesertim nusquam ille potuerit afferre correctionis alienae rationem, quod nos inter legendum fecimus, quae propediem sub tuis auspiciis exhibit in publicum, sex in toto Livio vulnere millibus a me curatis aut splene contextis.

1506. Venetiis, per fratres Ioannem et Bernardinum Vercellenses, in forma maiore.

Hanc editionem, a Maittaire Tom. v. Annal. Typogr. part. II. pag. 21. recensitam, et a Fabric. in Bibl. Latina ex Graevii bibliotheca memoratam, possideo. Exhibet autem simul Sabellici in Livium Annotationes, omissa tamen eius ad Cornarium Praefatione. Ad finem libri haec leguntur: *T. Livii Patavini decades expliciunt, Venetiis per Ioannem ac Bernardinum eius fratrem Vercellenses summa cura et diligenti studio impressae, Anno Domini M. CCCC. VI. XXVII. Nonas Ianuarii imperante Serenissimo Leonardo Lauridano Venetiarum duce felicissimo.*

1510. Parisiis impensis Ioannis Parvi et Ascensii, in forma maiore.

Hanc editionem, a Maittaire in Annal. Typogr. Tom. II. pag. 216. memoratam, possideo. Ei autem praefigitur Iodoci Badii Ascensii epistola ad Georgium Aloinum, hanc temporis notam praeferens: *Ex Chalcographia nostra apud Parrhisios, pridie annuntiationis atque incarnationis dominicae M. D. X. Praeterea Sabellici in Livium Annotationes, deficiente tamen eius ad Cornarium praefatione; tum ipsius Badii Ascensii in Livianam lectionem Isagogen cum prooemii primi expositione. Ad calcem editionis haec verba reperiuntur: Diligentiore cura, in aedibus Ascensianis, in illustri Parrhisiorum Academia, impensis Ioannis Parvi et ipsius Ascensii. Anno salutis Christianae M. D. X. ad Idus Martias.*

1511. Venetiis per Philippum Pincium Mantuanum, in forma maiore.

Hanc editionem, a Maittaire in Annal. Typographicis omissam, servat bibliotheca publica Amstelaedamensis. Ad eius autem calcem hanc subscriptionem legi, Vir Clarissimus Petrus Burmannus, Historiarum, Eloquentiae et Poeseos ibidem Professor meritissimus, me monuit: *T. Livii*



*decades feliciter expliciunt, Venetiis a Philippo Pincio Mantuano impressae anno Domini MCCCCXI. die XVII. Septembr. incliti domini, Domini Leonardi Lauredani Venetiarum ducis tempestate. [Hanc subscriptionem paullo aliter et rectius, ni fallor, protulerunt editores Bipontini in Notit. literar. de T. Liv. p. 107.]*

1511. Parisiis apud Badium Ascensium, in forma octuplice.

Hanc editionem primam fuisse censet I. Fr. Gronovius in Praefat. quae hac forma contracta, charta *ὀκταπύχῳ*, prodiit. Neque aliam ea antiquiorem vidi. Testatur autem se non ipsam editionem, sed tantum specimen vidisse, dissimulato loco et tempore, quo prodiit, unam utriusque notam praefereus Augustini Becharii Sacerdotis ad studiosos alloquium; unde etiam passim in notis Becharii nomine eam laudat. Suspiciabatur insuper, non multo seriore, si non antiquiorem, esse ea, quam Georgius de Rusconibus Medicenensis anno mccccci. Venetiis procuravit. Verum eandem rectius recensuit Fabr. in Bibl. Latina, ac testatus est, prodiisse Parisiis apud Badium Ascensium anno mccccxi. ex Sabellici recognitione cum Augustini Becharii ad studiosos alloquio. Eam a Maittaire in Annal. Typographicis memorari, reperire non potui. [Rarissimam hanc editionem, nec loci nec temporis nota insignitam, Lugduni circa annum 1510. prodiisse, suspicatus est Ebert. in Lex. bibliograph. Vol. i. p. 997. n. 12083. praeunte Ernestio ad Fabricii Biblioth. Lat. Tom. i. p. 281. sq.]

1513. Parisiis apud Badium Ascensium, in forma maiore.

In hac editione, quam etiam Maittaire in Annal. Typographicis omisisse videtur, continentur eadem omnia, quae in antea memorata anni mdx. exstabant; ita tamen, ut Ascensii in Livianam lectionem Isagoge auctior prodierit, et insuper addatur vocabulorum Livianorum compendiaria explanatio. Praeterea, contextum Livianum cum decem diversae monetae aut scripturae codicibus collatum esse, nova Ascensii Praefatio priori subiecta docet, quae hanc notam Chronologicam praeferebat: *Pridie natalis Dominici M. D. XIII.* In calce vero libri haec formula adscripta reperitur: *Ex aedibus Ascensianis longe accuratiore, quam pridem, vigilantia, collato videlicet exemplari cum decem venerandae vetustatis codicibus et non oscitantis iudicio recognito, atque plus quam sexcentis locis illustrato, in illustri Parrisiorum Academia, impensis Ioannis Parvi et ipsius, qui impressit, Ascensii, anno redemptionis humanae M. D. XIII. ad Nonas Decembres.*

1516. Parisiis ex aedibus Ascensianis, in forma maiore.



Haec editio, quam itidem Maittaire in *Annal. Typographicis* non recensuit, eadem omnia exhibet, quae proxime praecedens, eique quam simillima est, adeo ut utraque totidem foliis absolvatur. Non tamen propterea existimandum est, eam tantum fraude, bibliopolis nostris hodie admodum frequenti, se a priori diversam esse mentiri. Plura enim exstant indicia, unde colligi potest, eam hoc anno revera totam iterum excusam esse. Titulus enim praecedentis editionis exhibet signum, quo Ioannes Parvus, sive Petit, quem Ascensius artis suae socium adsumserat, uti solitus erat; nempe duos Leones, scutum lilio et litteris L. P. inscriptum sustinentes, adiecto subius nomine eius, IEHAN PETIT. Huius contra titulus praefert binos Leones, scutum bipartitum sustinentes, cuius superiori parte conspiciuntur tres coronae, aequali ordine aliae ad latus aliarum dispositae, pars autem inferior pellis murinae imaginem imitatur, addito subius nomine LODOVICUS HORNKEN. Deinde in priori editione haec verba sub descripto signo leguntur: *vaenundantur ab Ioanne Parvo et Iodoco Badio Ascensio*: in posteriori autem haec: *vaenundantur ab Gotfrido Hittorpio*. Insuper formula ad finem huius editionis addita, in quibusdam differt ab illa, quam praecedenti adiectam esse modo vidimus. In hac enim ultima eius pars his verbis concipitur: *in illustri Parrhisiorum academia, rursus opera et accuratatione Ascensiana, anno redemptionis humanae M. D. XVI. ad Nonas Iunias*. Denique ex toto passim contextu Liviano duas diversas editiones esse clarissime elucet. Quamvis enim posterioris paginae illis prioris ferme semper respondeant, nulla tamen earum est, in qua non aliquot occurrant versus, qui in hac editione vel plures vel pauciores, quam in illa, literas contineant: in qua non itidem plures voces reperiantur, quae in hac editione per quaedam scribendi compendia, in illa vero omnibus literis exarantur. [Hanc editionem non Parisiis, sed Coloniae impressam esse, suspicati sunt editores Bipontini in *Notit. literar. de T. Liv.* p. 103. sq.]

1518 vel 1519. Moguntiae apud Ioannem Scheffer, in forma maiore.

Ad finem librorum Livii haec temporis nota a typographo adscripta est: *Moguntiae in aedibus Ioannis Scheffer, mense Novembri anno MDXVIII. Praemissum Imperatoris Maximiliani privilegium datum est die nona mensis Decembris an. M. D. XVIII. Sed Erasmi Praefatio VII. Cal. Mart. an. M. D. XIX. et Nicolai Carbachii Praefatio Idibus Martis M.*

**D. XIX.** In hac editione, post Imperatoris Maximiliani privilegium, continentur primo Ulrichi Hutteni equitis Praefatio ad Albertum Brandenburgensem, Cardinalem, Archiepiscopum Moguntinum et Magdeburgensem, principem Electorem; tum Erasmi ad Misobarbaros atque eosdem Philomusos Praefatio, quam utramque viri docti memoratu dignam iudicant, quoniam illi, qui Moguntiam artis typographicae inventricem venditant, ex illis etiam sententiam firmare soleant. Post indicem deinde in Livium eiusque epitomas, et consules in Livio et epitomis occurrentes, ordine Chronologico dispositos, sequuntur epitomae Livianae et ipsius Livii contextus. Admodum autem memorabilis est haec editio, quia prima omnium exhibuit maximam partem libri xxxiii. a cap. xvii. §. 6. usque ad libri istius finem, qui integer antea pro deperdito habitus est, et ultimam partem lib. xl. a cap. xxxvii. §. 3. usque ad finem: quae operis Liviani particulae in lucem protractae sunt ex bibliothecae Moguntinae, quae in aede maxima ac metropolitana est, perquam vetusto codice, characteribus Longobardicis in membrana scripto. Quum autem codex ille, omnium huius partis praestantissimus, qui partem lib. xxxiii. ultimam et libros sequentes usque ad finem libri xl. continebat, passim a vulgata priorum editionum lectione diversus abiret, Nic. Carbachius eum dignum esse censuit, quem diligenter cum olim excusis committeret, eiusque excerptas variantes huic Livii editioni subiiceret, praemissa Praefatione, qua consilii rationem reddidit. Eo autem facto optime de Livio meritus est, atque hunc thesaurum, aut certe eius partem, nobis servavit; qui utrum hodie adhuc supersit, aut ubi lateat, incertum est. [Historiarum Livianarum partes, quas prima omnium exhibet editio Moguntina, a Iac. Mazochio Romae 1519. repetitas esse, testatur Ebert. in Lex. bibliograph. Vol. i. pag. 997. n. 12085.]

1518. 1519. 1520. 1521. et 1533. Venetiis apud Aldum quinque tomis, in forma octuplice.

Primus tomus continet decem primos Livii libros, ad cuius calcem haec adiecta sunt: *Venetiis in aedibus Aldi, et Andreae soceri, mense Decembri, M. D. XVIII.* Secundus bellum Punicum secundum: ad finem autem haec nota chronologica adscripta est: *Venetiis in aedibus Aldi, et Andreae soceri, mense Februario, M. D. XIX.* Tertius quartam liberorum decada, hac ad finem addita subscriptione: *Venetiis in aedibus Aldi, et Andreae soceri, mense Novembri, M. D. XX.* Quartus complectitur primo omnium

decadum epitomas, licet cuique superstitum librorum Livii, qui praecedentibus tomis exhibentur, sua praefigatur epitome; secundo L. Florum; tertio Polybii Historiarum libros quinque, Nicolao Perotto interprete in linguam Latinam conversos. Ad finem tandem tomi exstat haec temporis nota: *Venetiis in aedibus Aldi, et Andreae soceri, mense Martio. M. D. XXI.* Quum postea liber Livii quadragesimus primus et quatuor sequentes, sive eorum fragmenta, ex bibliothecarum tenebris eruti et in apertam lucem protracti essent, haeredes Aldi, ne quid editioni suae deesset, recens publicatos Livii libros ipsi quoque typis suis descripserunt, et quatuor prioribus tomis quintum hunc, quasi appendicem, addiderunt. Eius fini subiecta est haec temporis nota: *Venetiis in aedibus haeredum Aldi Manutii Romani, et Andreae Asulani soceri, mense Maio. M. D. XXXIII.* Quinque hi tomi, suo quisque anno, memorantur apud Maittaire in *Annal. Typograph.* Tom. II. pag. 316. 335. 598. 613. et 787. Huius editionis quartus tomus hodie plerumque a reliquis dividitur, et quasi huc non pertinens separatim memoratur; quum tamen titulus, qui tomo primo praefigitur, illa, quae toto opere continebantur, exhibens, etiam tomo quarto inserta nominatim memoret. Is autem titulus ei appositus est, si non quum tomus primus ederetur, certe quum quartus prodiret, antequam quintus adderetur; cuius nulla ibi mentio occurrit.

1520. Venetiis, in forma maiore.

Hanc editionem, quam me unquam videre non memini, memorat Maittaire in *Annal. Typograph.* Tom. II. pag. 598. eamque excusam esse dicit per Melchiorem Sessam et Petrum de Ravanis socios, die III. Maii. Eandem neque Hearnius, neque Clericus memorarunt. Editionem Venetam huius anni, in forma maiore ab Aldo excusam, memorat Catalogus Henr. Hadr. van der Marck, Toparchae in Leur, pag. 20. Eius tamen apud alios mentionem nondum reperi. [Haec editio ex prima editione Aldina, quae inde ab anno 1518. prodiit, repetita esse videtur Ebert. in *Lex. bibliograph.* Vol. I. p. 998. n. 12086.]

1521. Venetiis apud Aldum, in forma maiore.

Hanc editionem recensent Hearnius et Clericus. Gesneri Catalogum librorum, qui in officina Aldi Manutii Venetiis excusi sunt, Tom. III. *Annal. Typogr.* inseruit Maittaire, in quo pag. 245. memorantur Livii omnia, accurate denuo impressa, in folio (1521.) Occurrit etiam in modo laudato Catalogo Henr. Hadr. van der Marck, ubi pag. 21. inter edi-



tiones Aldinas in folio hoc titulo, qui forte ex ipso libro petitus est, describitur: *Ex XIV. T. Livii decadibus prima, tertia, quarta; duplex epitome, altera a T. Livio, altera a L. Floro; Polybii libri V. de rebus Romanis in Latinum a Nic. Perotto, quos in locum secundae decadis substituímus, quia multa in illis leguntur, quae secunda decade continebantur. Venet. apud Aldum 1521. [Titulum huius editionis pleniorē dederunt editores Bipontini in Notit. literar. de T. Liv. p. 114.]*

1522. et 1532. Florentiae apud haeredes Philippi Iuntae, in forma octuplice.

Hanc editionem habuit et consuluit I. Fr. Gronovius, qui in Praefatione testatur, eam per Aldina vestigia inces-  
sisse, carmine etiam in laudem Asulani praeposito. Eandem recensuit etiam Maittaire in *Annal. Typograph. Tom. v. part. II. pag. 22.* qui docet, singulis tomis, decadas primam, tertiam et quartam continentibus, ad calcem adiectam esse hanc formulam: *Florentiae per haeredes Philippi Iuntae M. D. XXII. septimo Idus Augusti.* Postea vero repertos quintae decadis priores quinque libros, sive eorum fragmenta, itidem ex Iuntarum officina prodiisse, hac subscriptione ad finem addita: *impress. Florentiae in aedibus Bernardi Iuntae, anno XXXII. supra M. et D. duodecimo Cal. Maias.*

1525. Coloniae apud Ioannem Soterem, in forma maiore.

Huius editionis titulus testatur, Livii libros triginta, qui soli ex centum quadraginta supersunt, auctore Iacobo Sobio, castigatiores, quam antehac unquam visi sunt, prodire anno M. D. xxv. mense Septemb. Dedicatio Sobii subscriptas praefert *Calendas Septembres ann. Domini M. D. XXV.* Denique ad calcem libri haec verba adiecta exstant: *Coloniae apud Io. Soterem, impensis honesti civis Petri Quentel anno MDXXV. mense Augusto.* Sobium, Livii editorem, laudans Sturmius in *Epist. dedicat. ante Tom. II. Orat. Ciceronis* dicit, Coloniae literas floruisse, quum in ea Sobius aliique docerent, Sobium vero tunc vim morbi abstulisse. Editionem hanc Livianam, quam curavit Sobius, ut ceteris castigatiorē laudat Rhenanus ad Livii lib. xxvii. cap. xvi. §. 10. et ad cap. xvii. §. 11. Eius coniecturam, quam in contextum recepit, quamvis praeter MStorum auctoritatem, nihilominus ut ingeniosam praedicat Gruter. ad Livii lib. I. cap. xxiii. §. 6. Perperam Fabricius in *Bibl. Latin. editionem* hanc Basileensem vocavit, dicens Livium anno mxxv. Basileae ex Iacobi Sobii castigatione prodiisse.

1527. Parisiis apud Petrum Vidovaeum, in forma maiore.



Hanc editionem recensuit Maittaire in *Annal. Typogr.* Tom. II. pag. 688. ac testatur, eam venundatam fuisse a Ioanne Parvo, bibliopola adscriptitio, impressam vero a Petro Vidovaeo mense Aprili, M. D. XXVII.

1528. Coloniae apud Eucharium Cervicornum, in forma maiore.

Huic editioni locus, ubi prodiit, adscriptus non apparet, sed tantum excusa esse dicitur ab Euchario Cervicorno. Eum vero chalcographiam et ante et post annum MDXXXVIII. Coloniae exercuisse, ibique varios libros Godefrido Hittorio, civi et bibliopolae Coloniensi, typis suis descripsisse constat. Maittaire ullam huius editionis mentionem in *Annal. Typogr.* fecisse non memini, quam tamen memorarunt Fabricius in *Bibl. Latin.* et Hearnius ac Clericus in *Indice editionum Livianarum.* Eandem tantum se vidisse, sed consulere non potuisse, I. Fr. Gronovius in *Praefatione* testatur.

1529. Parisiis apud Nicolaum Savetier, in forma maiore.

Hanc editionem recensuit Maittaire in *Annal. Typograph.* Tom. II. pag. 721. et auctor est, ei hanc notam additam esse: *Veneunt in aedibus Ambrosii Girault, in vico Divi Iacobi, sub insigni regis David, imprimebat Nicolaus Savetier, mense Aprili 1529.* Contra eius exemplaris, quod oculis meis subiectum est, initio haec adscripta vidi: *Veneunt in Clauso Brunelli apud Nicolaum Crespin, sub signo Divae Catharinae; ad eius finem vero sequentia: Imprimebat Nicolaus Savetier mense Aprili 1529.* Hinc colligo, vel Nicolaum Savetier Livium, suis impensis excusum, distrabendum dedisse duobus bibliopolis, Ambrosio Girault, et Nicolao Crespin; vel ambos illos, iuncta societate, Livium opera Savetierii imprimi curasse, et quemque eorum recepta exemplaria suis nominibus notasse. Editionem hanc Levescatium curasse, I. Fr. Gronovius in *Praefat.* Fabricius in *Bibliothec. Latin.* et Hearnius ac Clericus in *Indice Editt. Liv.* testantur. Certe eius Dedicatio ad Io. de Tartas I. U. consultissimum in capite huius editionis exstat. Vix tamen aliquid de suo contulit, sed ubique ferme editionem Ascensianam anni MDXIII. vel anni MDXVI. secutus est, et lectiones illis solis proprias adoptavit.

1530. Parisiis apud Badium Ascensium, in forma maiore.

In titulo libri haec nota conspicitur: *Vacuundantur ipsi Ascensio. 1530.* Dedicatiois subscriptio his verbis concipitur: *E Chalcographia nostra apud Parrhisios rursum ad sextum Calendas Novemb. M. D. XXX.* Ad finem autem libri

XL. haec formula additur: *Sub prelo Ascensiano ad VI. Cal. Novemb. 1530.* Quum autem anno sequenti MDXXXI. Simon Grynaeus quinque postremos Livii libros, a se in MSto vetusto repertos, opera Frobenii primum Basileae edidisset, mox eodem adhuc anno Ascensius non modo recens inventos ac publicatos Livii libros typis suis Parisiis descripsit, hoc temporis caractere post libri XLV. finem addito: *Sub prelo Ascensiano anno M. D. XXXI. mense Iulio;* verum etiam Chronologiam Glareani, quae in eadem editione Basileensi primum lucem adspexit, in ordinem literarum digessit, ac libro XLV. subiecit, addita hac subscriptione: *Sub prelo Ascensiano ad Idus Iulias anno M. D. XXXI.* Insuper editio haec eadem omnia complectitur, quae editiones priores Ascensianas annorum MDXIII. et MDXVI. continere antea suo loco dixi.

1531. Basileae apud Frobenium, in forma maiore.

Titulus splendidae huius editionis testatur, librum excusum esse *Basileae in officina Frobeniana mense Martio anno M. D. XXXI.* Apposita Erasmi ad Carolum Montioium Praefatio data est *apud Friburgum Brisgoiae, Calend. Martiis anno M. D. XXXI.* Praefationem eius excipiunt decades Livii prima, tertia, et quarta, ac cuique earum praefixae librorum, quos continent, Epitomae: hinc decadis quintae libri quinque priores: quos nunc primum typis excusos Grynaeus ex vetusto monasterii Laurishaimensis codice in apriam lucem protulit. De hoc codice Erasmus in memorata ad Montioium Praefatione egit. Libro ultimo, sive XLV. iterum subiicitur, libros hos editos esse *Basileae, in officina Frobeniana, per Hieronymum Frobenium, Io. Hervagium, et Nicolaum Episcopium, MDXXXI.* Tum sequuntur omnium Livii librorum, et superstitum, et deperditorum, Epitomae; postea Indices in libros Livii: ad quorum calcem apponitur Allocutio ad Lectorem; qua, quantum iniuria temporis ex recens editis quinque posterioribus Livii libris deperditum sit, accurata diligentia docemur. Tandem ultimo loco in editione hac Basileensi sequitur Glareani Chronologia in omnes Livii decadas, ab urbe condita in sextum Tiberii Caesaris annum, praefixo iterum novo titulo; cui itidem, ut et eius calci, additur, Chronologiam hanc editam esse *Basileae ex officina Frobeniana, anno M. D. XXXI. mense Martio.*

1532. Venetiis apud Lucam Antonium Iuntam, in forma maiore.

Innotuit mihi haec editio ex solo Maittaire, qui eam recensuit in *Annal. Typograph.* Tom. II. pag. 771. et hoc

modo descripsit: *T. Livius*; accesserunt decadis *V. libri quinque*, numquam antehac editi, cum *Chronologia Henrici Glareani*, in aedibus *Lucae Antonii Iuntae Florentini*. MDXXXII. in initio additur, *Mense Februario*; in fine die decima *Januarii*. [Quinque *Livii* libros, quos *Grynaeus* ex codice *Lauris-hamensi* primum evulgavit, a *L. A. Iunta* anno 1532. etiam separatim editos esse, auctor est *Ebert*. in *Lex. bibliograph.* Vol. I. p. 998. n. 12090. Ceterum haec editio *Iuntina* a *Sim. Colinaeo Parisiis* anno 1541. nitidissime repetita esse traditur in *Fabricii Biblioth. Lat.* Tom. I. p. 283. ed. *Ern.*]

1532. *Parisiis* apud *Simonem Colinaeum* prodierunt conciones *Livii* cum notis *Ioachimi Perionii*, in forma octuplice.

Hanc editionem memorarunt *Crenii*, *Hulsii*, aliorumque catalogi. Vide etiam *Maittaire Annal. Typograph.* Tom. v. part. II. pag. 23. Postea alibi etiam haec editio repetita est.

1535. *Basileae* ex officina *Frobeniana*, in forma maiore.

Ad finem huius editionis illa temporis nota addita est: *Basilcae in officina Frobeniana per Hieronymum Frobenium et Nicolaum Episcopium mense Decembri anno M. D. XXXIII.* sed titulus libri annum MDXXXV. praefert. Continet autem eadem ferme, quae praecedens *Frobeniana* anni MDXXXI. nisi quod in hac iam primum appareant *Rhenani* et *Gelenii* in *Livium Notae*; et quod *Glareani Chronologia*, ab ipso recognita, auctor prodeat, a *Troia* capta usque ad *Iustinianum Caesarem*. Testatur insuper titulus huius libri, historiam *Livianam* longe, quam nuper, emaculatiorem prodire, quod nunc demum ad vetera exemplaria collata sit.

1537. *Lugduni* quatuor voluminibus, in forma octuplice.

Recenset hanc editionem *Maittaire* Tom. v. *Annal. Typograph.* part. II. pag. 22. ac testatur excusam esse *Lugduni* apud haeredes *Simonis Vincentii*. M. D. XXXVII. continere autem etiam *Notas Glareani*. Quod si verum est, haec prima erit *Notarum Glareani* editio. Alii tamen testantur, prodiisse cum *Annotationibus Rhenani* et *Gelenii*, et ita forte erit eadem, atque illa, quae mox sequitur.

1537. *Lugduni*, in forma octuplice.

Hanc editionem refero fide *Fabricii* in *Bibliotheca Latina*; ubi testatur, eam prodiisse ex *Trechseliorum* officina, et continere *Rhenani* ac *Gelenii* *Notas*. [Editionem praecedentem ab hac non diversam esse docuerunt editores *Bipontini* in *Notit. literar. de T. Liv.* p. 121.]

1537. *Francofurti*, in forma octuplice.

Haec editio memoratur in *bibliothecae Crenianae Catalogo*. *T. Liv. Tom. I.*

logo pag. 68. [Obiter etiam commemoratur in Fabricii Biblioth. Lat. Tom. I. p. 284. ed. Ern.]

1538. Parisiis apud Vascosanum, in forma quadruplice.

In una bibliotheca Hulsiana Tom. II. num. 5535. hanc editionem memoratam invenio, ubi prodierit dicitur ex typographia Vascosani, et tres decadas continere.

1539. Basileae ex officina Hervagiana, in forma maiore.

Editio haec eadem continet, quae Basileensis Frobeniana anni MDXXXV.

1540. Lugduni, in forma maiore.

Memoratur haec editio in Indice editionum Livianarum Hearnii et Clerici.

1540. Basileae, in forma maiore.

Hanc editionem cum Notis Glareani memoratam vidi in bibliotheca Mallinckrotiana. Fabricius vero in Biblioth. Latin. testatur, Henr. Loriti Glareani Notas in Livium Caesareo quinto Imperatori inscriptas esse, cum Chronologia historiae Romanae recognita, anno MDXL. in forma maiore. Utrum vero solae, an simul cum Livio prodierint, nec ubi, vel a quo typographo excusae sint, retulit. Neque certiora referre possum, quum editionem huius anni non viderim. Id ex Glareani Praefatione ad Caesarem Ferdinandum, quae annum MDXL. praefert, et in editione Lugdunensi anni MDXLII. et alibi exstat, didici, ex officina Michaelis Isingrini, qui Basileae officinam exercuit, et Ioannis Bebelii typographi Basileensis gener exstitit, Glareani Chronologiam separatim prodierit, ut, qui antea Livii codices habebant, neque eundem auctorem bis parare volebant, hoc eius labore frui possent. [Vid. Ebert. Lex. bibliograph. Vol. I. p. 998. n. 12092.]

1541. Venetiis apud haeredes Lucae Antonii Iuntae, in forma maiore.

Hanc editionem memorat Fabric. in Biblioth. Latin. non addens, qua forma prodierit. Eadem editione usus est Latinus Latinius ad Livium cum MStis conferendum, qui nec ipse formam, qua editio illa excusa est, indicavit. Ex numero tamen foliorum, quem subinde edidit, satis constat, non alia, quam maiore, in lucem exiisse. Utrum Hearnius et Clericus, in Indice editionum Livianarum recensentes editionem Venetam, quae anno MDXLII. cum Glareani epitome Chronologica in forma maiore impressa sit, hanc, an aliam ab hac diversam intellexerint, dispicere nequeo, quum neutram viderim.



1542. Lugduni apud Sebastianum Gryphium quatuor voluminibus, in forma octuplice.

Tres priores tomi continent superstites Livii libros: quartus Glareani notas, praemissa eius ad Carolum V. Imperatorem Praefatione, data *Friburgi Brisgoiae, anno a Iesu Christi natali M. D. XL. Calend. Maii*; tum Laurentii Vallae de Tarquiniis adversum Livium disputationes, eiusque emendationes ad sex libros priores Livii de bello Punico secundo; deinde Glareani Chronologiam, per Iodocum Badium Ascensium in seriem literarum redactam; et ultimo loco ipsam Glareani Chronologiam auctam, cum Praefatione ad Ferdinandum Caesarem, data *Friburgi Brisgoiae, anno a Christo nato M. D. XL. Calend. Septembrib.* Gesnerus in *Pandectis lib. de Historiis duodecimo apud Maittaire Annal. Typogr. Tom. II. pag. 572.* refert, hac editione contineri Annotationes Beati Rhenani, Sigismundi Gelenii, Henrici Glareani, ac Chronologiam eiusdem Glareani. Editio exstat in *Biblioth. Traiectina*, verum Rhenani et Gelenii Annotationes non adsunt.

1543. Parisiis apud Michaellem Vascosanum, in forma maiore.

Appositus quidem titulus testatur, Livium hunc prodiisse *Parisiis apud Audoenum Parvum sub Lilio aureo ad Divum Iacobum. M. D. XLIII.* verum privilegium, ut Livius hoc modo imprimeretur, senatus Parisiensis anno M. D. XLII. nono Calend. Novemb. concessit *Michaeli Vascosano et Audoeno Parvo.* Titulus etiam, qui Annotationibus adiunctis praemittitur, desinit hac formula: *Parisiis imprimebat Michael. Vascosanus sibi et Odoino Parvo.* Unde colligo, editionem hanc excusam esse typis Vascosani, venditam autem fuisse partim ab eo, partim ab Odoino Parvo. Haec autem editio non modo continet omnia, quae praecedens Lugdunensis Gryphiana anni M. D. XLII. verum etiam Sabellici pauculas Annotationes. [Hanc editionem a Mich. Vascosano Parisiis anno 1562. repetitam esse, dicunt editores Bipontini in *Notit. literar. de T. Liv. p. 126.*]

1543. Basileae apud Ioannem Hervagium, in forma maiore.

Hanc editionem adiunctas habere Annotationes Rhenani, Gelenii, et Glareani, huiusque Chronologiam, auctor est Fabric. in *Bibl. Latin.* Eandem memorant etiam Hearnius et Clericus, testati eam prodiisse *ex recensione Hervagii*, nullamque Annotationum Glareani mentionem faciunt. [Accuratus hanc editionem descripserunt editores Bipontini in *Notit. literar. de T. Liv. p. 123.*]

1544. Argentorati, in forma octuplice, prodierunt Io. Vel-

curionis Notae in Livii lib. I. et II. quae postea saepius aliis editionibus insertae sunt. Memoravit hanc editionem Fabricius in Biblioth. Latin.

1545. Lovanii, in forma quadruplice, lucem vidisse Notas Petri Nannii in Livii lib. III. testatur Fabricius in Bibl. Latin. Utrum vero eadem sint, atque illae, quas ineditas putavi, an diversae, quum librum non viderim, dicere nequeo.

1548. Lugduni apud Sebastianum Gryphium quatuor voluminibus, in forma duodecima.

Editionem Lugdunensem Gryphianam huius eiusdem anni, sed in forma octuplice, memorant Hearnius et Clericus in Indice Editt. Livian. quam me unquam vidisse non memini.

1549. Basileae apud Ioannem Hervagium, in forma maiore.

Titulo huius editionis illa adscripta est formula: *Basileae per Ioannem Hervagium, anno M. D. XLIX. mense Martio.* quae eadem ferme in fine libri occurrit. Recensuit hanc editionem Caelius Secundus Curio, qui in Praefatione, data *Basileae Cal. Ian. M. D. XLVIII.* testatur, se Livium cum veteribus et novis aliquot exemplaribus ex iis, quae emendatiora atque meliora habentur, contulisse: et ex eo labore hunc se fructum retulisse affirmavit, ut Livii ad ducenta loca emendarit, et pristino nitori restituerit. Adiectae sunt Rhenani ac Gelenii Annotationes, et Glareani Chronologia. Perperam Hearnius et Clericus in Indice Editt. Livian. referunt, editionem hanc recensuisse Hervagium, qui eam tantum typis suis descripsit.

1551. Francofurti duobus voluminibus cum Notis Guilielmi Godelevaei, in forma octuplice.

Has eius Notas variae aliae editiones post adoptarunt. [Commemoratur haec editio, ut alios taceam, in Fabricii Biblioth. Lat. Tom. I. p. 284. ed. Ern. Sed Godelevaei notas demum anno 1568. prodiisse, docuerunt editores Bipontini in Notit. literar. de T. Liv. p. 128.]

1552. Parisiis apud Michaellem Vascosanum, in forma maiore.

Maittaire in Annal. Typogr. Tom. III. pag. 613. refert, Mich. Vascosanum hanc editionem dedicasse Iacobo Varadeo, in supremo Parisiensi senatu regio consiliario, epistola data x. Cal. Iun. m. d. LII. Prodiisse autem cum Annotationibus diversorum, et in Glareani Annotationum fronte legi, typis descriptam esse apud Michaellem Vascosanum et Audouenum Parvum. Fabricius in Biblioth. Lat. testatur, eam adiunctas habuisse Laurent. Vallae Emendationes et Epistolam Apologeticam de duobus Tarquiniis ad Alphon-

sum Siciliae Regem; Sabellici item et Rhenani ac Gelenii Notas Editionem hanc nondum videre contigit, et hinc verbis eius controversiam movere nequeo. Dicere tamen liceat, suspicionem mihi natam esse, Vascosanum tantum repetiisse priorem editionem anni M. D. XLIII. et hinc pro Rhenano et Gelenio Glareanum memorandum esse. Potuit autem ipsi fraudi fuisse titulus obiter inspectus. Certe ille, qui priori editioni praefigitur, et in hac verisimiliter repetitus est, testatur, in editione Vascosana Livium diligenti observatione Annotationum Rhenani et Gelenii recognitum ac restitutum esse: quod forsitan ita acceperit, quasi Rhenani et Gelenii Annotationes additae fuerint; quae certe in prima Vascosani editione omissae sunt. [Hanc editionem non ex Vascosana, quae anno 1543. prodiit, sed ex Hervagiana, quae anno 1549. emissa est, derivatam esse, testatur Ebert. in Lex. bibliograph. Vol. I. p. 999. n. 12094.]

1553. Lugduni, in forma maiore.

In huius editionis titulo haec nota conspicitur: *Lugduni apud Antonium Vincentium, M. D. LIII.* Illa vero in eius fine: *Lugduni, excudebat Ioannes Frellonius, M. D. LIII.* Hinc colligendum est, Livium typis Frellonii, sed sumtibus Vincentii descriptum fuisse. Certe, Frellonium Vincentio libros excudere solitum fuisse, observat Maittaire Annal. Typogr. Tom. III. pag. 141. Continet haec editio, quae Valta, Sabellicus, Rhenanus, Gelenius, Glareanus, Velcurio et alii Livio illustrando contulerunt. Gelenii autem Annotationibus subiiciuntur paucae quaedam Emendationes ex codice Theodorici Morelli.

1554. Lugduni apud Sebastianum Gryphium quatuor voluminibus, in forma octuplice.

Eandem editionem memorat etiam Maittaire Tom. v. Annal. Typograph. part. II. pag. 22. ex quo, ut et ex bibliotheca Henr. Hadr. van der Marck, Toparchae in Leur, part. II. pag. 59. constat, anno sequenti ibidem ex eadem officina, quasi huius editionis appendicem, novum tomum prodixisse, continentem Rhenani, Gelenii, et Glareani in Livium Annotationes. Sed Fabricius in Bibl. Lat. Gryphium eo anno in forma octuplice excudisse refert notas Rhenani, Gelenii, Sabellici, Io. Velcurionis, et Io. Saxonii, cum Chronologia Glareani.

1554. Lugduni apud Sebastianum Gryphium tribus voluminibus, in forma duodecima.

Haec editio recensetur etiam in modo laudata bibliotheca Marckiana, et apud Fabricium in Biblioth. Latina. [Non



nisi chartarum forma haec editio a praecedente differre videtur. Cf. Ebert. Lex. bibliograph. Vol. I. p. 999. n. 12092.]

1554. Basileae apud Nicolaum Episcopium iuniorem quatuor voluminibus, in forma octuplice.

Idem Episcopus anno MDLVI. huic editioni, tamquam appendicem, adiecit tomum V. qui continet Scholia et Chronologiam Sigonii.

1554. Basileae apud Ioannem Hervagium duobus voluminibus, in forma octuplice.

Hanc editionem memorat Fabricius in Biblioth. Latin. ac testatur, ei adiectas esse Castigationes et Notas Vallae, Sabellici, et Caelii Secundi Curionis. Verum nullas unquam Castigationes aut Notas in Livium Curio conscripsit. Dicere itaque voluit, Livium editum esse ex recognitione Curionis. Vide Maittaire in Annal. Typograph. Tom. V. part. II. pag. 22. [Contra haec Harlesius in Introduct. in notit. literat. Rom. Part. II. p. 422. ita disputavit: „Quod Drakenborchius negat, Curionem ullas unquam castigationes aut notas in Livium conscripsisse, in eo errasse videtur. Saltem in Athenis Rauricis pag. 292. dicitur Curio edidisse in Livium notas et praefationem de mensuris, ponderibus reque nummaria Romanorum et Graecorum. Basil. 1549.“]

1555. Basileae per Ioannes Hervagios, in forma maiore.

Haec editio continet omnia, quae viri docti ad Livii emendationem vel illustrationem hoc tempore in lucem miserant; ita tamen, ut Vallae, Sabellici, Rhenani, Gelenii, et Theodorici Morelli in Livium Castigationes in ipsis Annotationibus Glareani suis locis insertae sint, atque editor se illas, quas futes et nullius momenti iudicaret, inde reiecissee testatus fuerit, ne inutili labore lectorem gravaretur.

1555. Venetiis apud Paulum Manutium, Aldi filium, in forma maiore.

Haec editio prima exhibet Caroli Sigonii Scholia, quibus Livii historiae et earum epitomae partim emendantur, partim explanantur; ut et eiusdem Sigonii in eosdem libros Chronologia, ipsorummet auctorum verbis confirmata. Erravit itaque Hearnius, qui Scholiis Sigonii Chronologiam Glareani iunctam in hac et aliis Sigonii editionibus credidit, quem eius errorem improvide adoptavit Io. Clericus.

1566. Venetiis apud Paulum Manutium, Aldi filium, in forma maiore.

In hac editione repetita sunt Sigonii in Livium Scholia, eiusdemque, non vero, ut Hearnius et Clericus affirmant,



Glareani, Chronologia Liviana. In Scholiis autem Sigonius multa mutavit, meliora sive sponte, sive a Faerno, Robortello, aliisque edoctus.

1568. Francofurti, in forma maiore.

Fabricius in Biblioth. Lat. ubi hanc editionem recenset, testatur, eam prodiisse cum Vallae Emendationibus, Notisque Sabellici, Velcurionis, Rhenani, Gelenii, Glareani, et Sigonii, Ioannis item Saxonii et Godelevaei Observationibus. Ipsam hanc editionem nunquam videre contigit, sed ei similem atque ex hac expressam puto, quae decennio post prodiit anno MDLXXVIII. quia in ea quaedam Praefationes occurrunt, quae huius editionis annum praescriptum habent, et inde repetitae sunt.

1572. Venetiis in aedibus Mabutianis, in forma maiore.

Haec tertia est Scholiorum et Chronologiae Livianae editio. Scholia autem ab auctore multis in partibus aucta esse, titulus testatur.

1573. Lutetiae Parisiorum apud Michaellem Sonnum via Iacobaea, sub scuto Basileensi, in forma maiore.

Hac editione continentur omnium interpretum Commentarii, e regione verborum Livii inserti. Praeterea Sigonii in Livium Scholiis et Chronologiae interpositae sunt Glareani defensiones et antilogiae; sive id primum in hac editione factum sit, sive ut potius credo, iam antea in editione anni MDLXXVIII. quam videre nunquam mihi contigit. Praefuisse videtur huic editioni, aut certe eam D. Nicolao Thuano, Carnutum Antistiti, dedicavit Iacobus Gohorius, cuius etiam paucae in Livii libros tres priores Animadversiones praemittuntur.

1578. Francofurti ad Moenum apud Ioannem et Sigismundum Feyerabendt duobus voluminibus, in forma maiore.

In tomi I. huius editionis titulo illa adscribitur nota: *Francofurti ad Moenum apud Ioannem et Sigismundum Feyerabendt. M. D. LXXVII. ad finem dedicationis, inverso ordine, memorantur Sigismundus et Ioannes Feyerabendt cognati. Eodemque iterum modo ad finem primi et secundi tomi: Impressum Francofurti ad Moenum, apud Georgium Corvinum, impensis Sigismundi et Ioannis Feyerabendinorum. M. D. LXXVIII.* Tomo primo, praeter contextum Livianum, picturis et sculptis tabulis exornatum, omniumque librorum Epitomas, continetur insuper Chronologia Liviana, a Ioachimo Grello ex Glareani et Sigonii Chronologiis quasi in unum conflatis constans, quae ex auctoris praefationi subscripta temporis nota iam in editione Francofurtana, quae decennii spatium hanc praecessit, comparuisse videtur. In tomm

secundum digestaè sunt Annotationes, Castigationes et Scholia virorum doctorum, qui eo et superiori seculo floruerunt, praefixa Godelevaei Praefatione, quae quum etiam annum MDLXVIII. adscriptum habeat, omnia itidem ex decennio priore editione repetita esse verisimile fit.

1588. Francofurti impensis Sigism. Feyrabendii et sociorum, in forma maiore.

Ex titulo, Grellii Chronologiae, et alio virorum doctorum Annotationibus praefixo, et ex nota ad calcem operis obvia constat, librum hunc excusum esse typis Ioannis Wechelii, et impensis Sigismundi Feyrabendii, Henrici Thackii, et Petri Vischeri, sociorum. Edidit autem et recognovit Franciscus Modius. Et quidem continet eadem omnia ferme, quae praecedens editio anni MDLXXVIII. nisi quod huic insuper accesserint Notae ipsius Modii, una cum fragmentis vetustiorum historicorum, quos Livius secutus est. Hearne, tres Francofurtenses editiones annorum MDLXXXVIII. MDCVIII. et MDCXXVIII. simul memorans, imprudenter addidit, omnes a Modio recensitas cum Notis Gruteri et aliorum prodixisse. Peius deinde erravit Io. Clericus, qui quamque earum, ordine suo illas referens, a Modio recensitam et Notis Gruteri aliorumque instructam esse lectori persuadere voluit; quem errorem sponte deprehendere et emendare potuisset, si ipsas editiones, in omnium bibliothecis obvias, consulendi exiguam molestiam subire voluisset.

1588. Francofurti tribus voluminibus, in forma octuplice.

Hanc editionem laudarunt Fabricius in *Biblioth. Lat.* Hearnius et Clericus. Pars etiam exstitit bibliothecae Hulsianae. Vide eius *Catalog. Tom. III. num. 5917.*

1588. Francofurti tribus voluminibus, in forma duodecima.

Hanc memorat Fabricius in *Biblioth. Lat.* Exstat etiam in *Appendice Biblioth. Leidens. pag. 519.*

1589. Londini, in forma quadruplice.

Fabricius in *Biblioth. Lat.* auctor est, huic editioni additas fuisse Chronologiam ac Notas Robortelli et Godelevaei.

1589. Lugduni, in forma octuplice.

Memorarunt hanc editionem Hearnius et Clericus, ac testati sunt, ei additam esse Chronologiam, accommodatam ad tabulas Capitolinas Verrii Flacci, (forte intelligitur illa, quam Ioachimus Grellius ex prioribus Glareani et Sigonii composuit) et Annotationes Godelevaei.

1592. Venetiis apud Aldum, in forma maiore.

Addita sunt Car. Sigonii Scholia; quae ab auctore multis in partibus aucta et emendata esse, libri titulus testatur.

1595. Antwerpiae ex officina Plantiniana apud Viduam et Ioannem Moretum prodierunt Fragmenta Historicorum, dudum ab Antonio Augustino collecta, et a Fulvio Ursino emendata: quibus subiunctae sunt eiusdem Ursini in varios Historicos, et inter illos etiam in Livium, Notae, in forma octuplice.

1599. Francofurti tribus voluminibus, in forma octuplice.  
Editio haec memoratur in Catalogo bibliothecae Hulsianae Tom. III. num. 5918.

1608. Francofurti ad Moenum, ex officina typographica Ioannis Saurii, impensis haeredum Petri Fischeri, in forma maiore.

Titulus alteri operis parti additus refert, prodiisse quidem ex officina Sauriana, sed impensis Ionaë Rhodii anno M. DC. VII. Ionas Rhodius autem a Grutero in Praefatione Ionaë Rosa vocatur. Hanc Livii editionem recensuit Ianus Gruterus, et notas virorum doctorum ferme omnium, quas priores editiones continebant, exhibuit, exceptis tamen illis Velcurionis et Saxonii: recenter vero addidit Notas Fulvii Ursini et Marcelli Donati. [Hanc editionem, titulo tantum renovato, iterum Francofurti 1612. emissam esse, recte suspicati sunt editores Bipontini in Notit. literar. de T. Liv. p. 133.]

1609. Francofurti, in forma octuplice.

Hanc editionem memorant Hearnius et Clericus, testati adiunctas esse Godelevaei Observationes.

1609. Genevae, in forma maiore.

Eo anno Genevae editi sunt scriptores Latini veteres Historiae Romanae, atque inter illos etiam Livius.

1614. Lugduni, in forma octuplice.

Hanc editionem memorat Fabricius in Bibliotheca Latina.

1616. Romae apud Bartholomaeum Zannettum, in forma octuplice.

Haec editio continet tantum librum XXXIII. Livii, et in ea primum nunc ex codice bibliothecae Cathedralis Bambergensis Caspar Lusignanus evulgavit principium huius libri, sive XVII. priora capita, quae antea desiderabantur, additis Francisci Bartholini Urbinatis, qui ex cod. descriptum Romam attulerat, et Antonii Quaerengi Castigationibus. Observat autem Fabricius in Biblioth. Lat. male in fronte atque per omnes paginas inscribi librum XLIII. Error tamen ab editore, libro iam absoluto, deprehensus est, unde etiam pag. ultima sive 79. haec verba adduntur: *Ubicumque impres-*

*sum est lib. XLIII. lege XXXIII.* Quin etiam, divenditis iam aliquibus exemplaribus, primum folium recusum, et error emendatus est. Certe duplex eius editionis exemplar haec scribens ante oculos habeo, quorum alterum observationem Fabricii veram esse probat, in alterius fronte et sedecim prioribus paginis recte editur *liber XXXIII.* In illo exemplari, quod habuit G. Io. Vossius, folium primum non mutatum fuisse videtur. Ab eo enim in errorem inductus lib. i. de Histor. Lat. non tantum in inscriptione capitis XIX. sed etiam in ipso capite, de hoc fragmento recens invento agens, semper meminit libri XLIII. Incaute dein, Vossii vestigia premens, eundem errorem commisit Io. Christianus Neu in Accession. ad Whear. Relect. Hiemal. pag. 113. [Omnem lectionum varietatem ex hac libri tricesimi tertii editione diligenter enotavi in Epist. ad Goeller. p. 420. sqq.]

1616. Venetiis apud Io. Baptistam Ciottum idem liber XXXIII. cum eodem fragmento editus est, in forma octuplice.

Hanc editionem memorarunt Fabricius in Biblioth. Latina, Hearnius et Clericus.

1616. Parisiis idem liber XXXIII. simul cum eodem fragmento editus est, in forma octuplice.

Hanc editionem recensuit Fabricius in Biblioth. Latina.

1617. Paderbornae idem etiam liber XXXIII. simul cum eodem fragmento editus est, in forma octuplice.

Eius editorem esse Ioannem Horrion e Societate Iesu, qui etiam Notas, nomine suppresso, addidit, monuerunt viri docti. Ipsius Notas postea editioni suae, quam cum Notis Variorum curavit anno MDCLXV. inseruit I. Fr. Gronovius.

1619. Francofurti, in forma octuplice.

Hanc denuo a se eo tempore recensitam, et a tutoribus Fischerianis impressam esse, testatur Gruterus in praefatione editionis anni MDCXXVIII.

1621. Lugduni cum Chronologia et Indicibus, in forma quadruplice.

Memorant hanc editionem Hearnius et Clericus.

1622. Genevae, in forma minore.

Refertur a Fabricio in Biblioth. Lat. pag. 186. [Tom. i. p. 285. ed. Ern. ubi etiam editio praecedens commemoratur.]

1625. Parisiis apud societatem minimam, in forma maiore.

In calce libri hi quinque bibliopolae, tamquam socii, memorantur, Iosephus Cottereau, Sebastianus Chappelet, Iacobus Quesnel, Dionysius Moreau, et Samuel Thiboust. Hi primam Gruteri editionem anni MDCVIII. et omnia in illam recepta, eo inscio et non consulto, tanta superstitione ex-



primere conati sunt, ut paginae paginis responderent. Verum pessime a librariis habita innumeris eorum negligentia commissis erroribus scatet; quos insuper Gruterus in Praefat. editionis tertiae anni MDCXXVIII. eo nomine traduxit, quod, curis suis secundis relictis, primas secuti sint, quasi frugibus repertis adhuc glandium amarore delectarentur. Insuper observat, nihil boni in tam vasti operis progressu expectandum esse de illis, qui in ipso statim titulo, sive, ut loquitur, in frontispicii meditullio tantopere impegerunt, ut ridiculis soloecismis se prostituerint. In fine huius editionis conspiciuntur *Excerpta ex Livii Decadibus moralia, politica, et historica, cum aliis Latinorum et Graecorum scriptorum locis et Eclogis collata ordine Alphabetico, Fed. Morelli Professorum et Interpretum regionum Decani opera ac studio*. Perperam Hearnius hanc editionem retulit ad annum MDCXXIII. quem tamen secutus est Clericus.

1628. Francofurti ad Moenum typis Guolphgangi Hofmanni, impensis haeredum Iacobi Fischeri, in forma maiore.

Est haec tertia Gruteri editio, cui Notae eius criticae et politicae, et quinquaginta in Tacitum Discursus additi sunt, nec non observationes Godelevaei, et veterum Historicorum fragmenta, per Franciscum (immo Antonium) Riccobonum collecta. Parum huic editioni Gruterus supervixit. Nam praefatio eius his verbis desinit: *Deproperabam animo ac corpore aeger, fine Augusti mensis MDCXXVII. Heidelbergae, et obiit die xx. Septembris, eodem anno MDCXXVII. In hac autem primum omnium Livii libri in capita divisi sunt.*

1633. Amsterdami apud Guilielmum Blaeu, in forma duodecima.

1634. Lugduni Batavorum ex officina Elzeviriana ac recensione Heinsiana, tribus voluminibus, in forma duodecima.

Fabricius in Biblioth. Latin. testatur, Livium ex recensione Dan. Heinsii nitide admodum ex officina Elzeviriana Lugduni Batavorum vulgatum esse anno MDCXXIV. Nescio utrum vere, an operarum errore. Fatetur tamen I. Fr. Gronovius in Praefatione anni MDCXLV. Livium bis ante suam editionem ex officina Elzeviriana prodiisse. [Hanc editionem Lugdunensem meram, eamque vitiosam, editionis Gruterianae, anno 1628. emissae, repetitionem esse, monuerunt editores Bipontini in Notit. literar. de T. Liv. p. 137. et Ebert. in Lex. bibliograph. Vol. I. p. 1000. n. 12102.]

1634. Francofurti, tribus voluminibus, in forma octuplice.

1645. Lugduni Batavorum ex officina Elzeviriana quatuor voluminibus, in forma duodecima.

Prima haec est editio, quae prodiit ex recensione I. Fr. Gronovii. Eius autem tomus quartus continet I. Fr. Gronovii Notas in Livium. [Huius editionis tomos tres priores anno 1644. quartum anno 1645. prodiisse, dixi in Epist. ad Goeller. p. 423. not.]

1654. Lugduni Batavorum apud Elzevirium ex recensione I. Fr. Gronovii, tribus voluminibus, in forma duodecima.

1659. Francofurti ad editionem Gruterianam, additis Notis Godelevaei, in forma octuplice.

1661. Amstelaedami ex recensione I. Fr. Gronovii, in forma duodecima.

1665. Amstelaedami apud Ludovicum et Danielem Elzevrios, cum perpetuis I. Fr. Gronovii et Variorum Notis, tribus voluminibus in forma octuplice.

1677. Romae prodiit Bibliotheca sacra et profana Latini Latini: cuius parti secundae insertae sunt eius Observationes et Correctiones in T. Livium, in forma maiore.

1678. Amstelaedami apud Danielem Elzevirium ex recensione I. Fr. Gronovii, in forma minore.

1679. Amstelaedami apud Danielem Elzevirium cum perpetuis Car. Sigonii et I. Fr. Gronovii Notis, quibus etiam suas aliorumque Notas adiecit Iacobus Gronovius, tribus voluminibus, in forma octuplice. [Huic editioni, cuius tomus secundus et tertius anno 1678. prodiit, addendus est I. Fr. Gronovii Observationum liber novus. Davent. 1652. sive liber quartus in altera Gronovianarum observationum editione, a Fr. Platnero Lips. 1755. curata.]

1679. Cantabrigiae ad editionem Gronovianam duobus voluminibus, in forma octuplice.

1679. Parisiis sex voluminibus, in forma quadruplice.

Hanc editionem Interpretatione et Notis illustravit Ioannes Duiatius, Antecessorum Parisiensium et Regionum Professorum Primicerius, in usum Delphini. Accesserunt Supplementa Livii per Freinshemium, quae magna ex parte primum in hac editione in lucem prodierunt. [Repetita est haec editio brevibusque Io. Clerici notis et indice aucta Vernet. 1714. atque in Anglia propediem repetetur.]

1694. Patavii quinque voluminibus, in forma octuplice, ut testantur Hearnius et Clericus, vel in forma duodecima, ut auctor est Fabricius in Biblioth. Lat.

Hanc editionem optimorum exemplarium collatione recognitam, et novis additamentis, chartis Geographicis etc.

illustratam esse, viri docti testantur. [Non solum Patav. 1707. id quod Drakenborchius infra ad hunc annum adnotavit, haec editio repetita est, sed etiam ibid. 1718. 1727. et 1740. atque Venet. 1739.]

1696. Francofurti apud Frid. Knochium, in forma octuplice.

Haec editio a Io. Gerardo Arnolde, Gymnasii Francofurtani rectore, curata esse dicitur, praemissa eius dissertatione de Livii vita et scriptis. Vide Fabricii Biblioth. Lat.

1703. Londini duobus voluminibus, in forma octuplice.

Fabricius in Biblioth. Lat. testatur, hanc editionem ad Gronovianam recensitam, lemmatibus historicis ad paginarum oras notatis, tabulisque Geographicis instructam esse.

1707. Patavii quinque voluminibus, in forma duodecima.

Memoratur haec editio in Catalogo bibliothecae Hulsianae, Tom. III. num. 5920.

1708. Oxonii sex voluminibus, in forma octuplice.

Hanc editionem curavit Thom. Hearne, eamque MStorum codicum collatione recognovit, Annotationibusque illustravit.

1710. Amstelædami et Traiecti ad Rhenum decem voluminibus, in forma octuplice.

Haec editio, quam recensuit, et Notulis auxit Io. Clericus, insuper exhibet integra Freinshemii Supplementa, tabulas Geographicas, et Anonymi copiosum indicem. [Omissis Freinshemii Supplementis cum Io. Matth. Gesneri praefatione repetita est Lips. 1735. 1743. et 1755.]

1722. Londini sex voluminibus, in forma duodecima.

Is, qui hanc editionem curavit, nomen suum non adscripsit. [Haec editio, quae Clerici recensionem sequi videtur, cum Freinshemii aliorumque Supplementis Lond. 1749. repetita est.]

1735 — 42. Parisiis sex voluminibus, in forma quadruplice.

Hanc editionem, quae continet etiam Supplementa librorum amissorum a Io. Freinshemio concinnata, recensuit et Notis illustravit, I. B. L. Crevier, Rhetoricae Professor in collegio Dormano Bellovaco Universitatis Parisiensis.

1740. Basileae tribus voluminibus, in forma octuplice.

Haec editio repetiit maiorem Iac. Gronovii, et, quemadmodum illa, instructa est perpetuis Car. Sigonii et I. Fr. Gronovii Notis, quibus etiam suas et aliorum Notas adiecit Iac. Gronovius.

Hactenus Drakenborchius. Quae inde ab hoc tempore prodierunt praecipuae Livii editiones, sive ad umbilicum

adductae, sive inchoatae tantum, necdum absolutae, hae fere sunt.

1738—46. Lugd. Bat. et Amst. cum Io. Freinshemii Supplementis, curante Arn. Drakenborch vii. voll. 4.

Haec editio praestantissima, quam omnium, quotquot secutae sunt, fundamentum esse constat, Drakenborchii adnotationibus ineditis et lectionum varietate codicis Veithiani codicumque Helmstadiensium 1. et 2. locupletata, Stuttgartiae inde ab anno 1820. quatuordecim tomis repeti coepta est.

1743. Heidelberg. curante B. C. Maurisio, fol.

De hac Livii editione, quae continetur Tom. I. Collectionis scriptorum veterum latinorum historiae Romanae, Heidelberg. 1743 — 48. paratae, vide editores Bipontinos in Notit. literar. de T. Liv. p. 144. sq.

1747. 48. Paris. cum I. B. L. Crevierii notis ad usum scholarum accommodatis, vi. voll. 8,

Textus huius editionis, id quod editor ipse in praefat. p. 4. sq. profitetur, ex maiore illa, quae Parisiis 1735 — 42. prodit, descriptus est, sed passim emendatus. In notis etiam novas interdum coniecturas proferri, ex Walchii Emendatt. Liv. p. 274. coll. p. 243. intelligitur. Certatim repetita est haec editio Amst. 1749. Lond. 1750. Venet. 1751. Patav. 1759. Paris. 1768. 69. Venet. 1791. Lond. 1813. et Oxon. 1814. De adulterina eius repetitione, quae textum Livianum ex Lallemandi editione, anno 1775. adornata, descriptum notasque Crevierii passim interpolatas exhibet, diximus supra in praefat. p. XIV. sq.

1751. Patavii, ex recensione Arn. Drakenborchii, vi. voll. 8.

Num ex hac editione, quae ab editoribus Bipontinis in Notit. literar. de T. Liv. p. 145. commemoratur, derivatae sint duae editiones, quarum altera sive Patavii sive Venetiis 1759. altera Venetiis 1791. prodit, se non posse definire, fatetur Harlesius in Supplement. ad brev. notit. literat. Rom. Part. I. p. 314. coll. Ephemerid. literar. Ienens. a. 1795. No. 164. p. 550. sqq. Illud tamen satis constat, eundem Remondinium, qui Livii opera cum lib. xci. fragmento Venetiis 1791. denuo edidit, vel unum ex eius maioribus iam anno 1751. minorem Crevierii editionem repetisse. Vide editores Bipontinos in Notit. literar. de T. Liv. p. 145.

1751. Berolini, curante I. P. Millero, iii. voll. 8.

Haec editio tam diligentia in textu exscribendo adhibita, quam nitore typorum commendabilis est.



1751. Edinburg. accurate Th. Ruddimanno, iv. voll. 12.

Repetita est haec editio accurata et nitida, quae locis compluribus, partim auctoritate codicum a Drakenborchio aliisque collatorum, partim ex Kennethi Mackenzie aliorumque coniectura mutatis, a Drakenborchiana discrepat, Amst. 1752. atque Edinburg. 1764. et 1772.

1766. Laubani, Excerpta Liviana ed. C. L. Bauer. 8.

Hic liber, in tironum quidem usum editus, sed etiam doctis Livii interpretibus profuturus, primum repetitus est, praefixo titulo: *Chrestomathia Liviana*, Lips. et Lauban. 1770—74. deinde cum inscriptione: *Liviana Excerpta, vel Chrestomathia Liviana*, Lips. 1785. 1800. 1813. et 1823.

1769. Lips. ex recensione Arn. Drakenborchii, curante Aug. Guil. Ernesti. iii. voll. 8.

Editore invito recusa est, ut de re ambigua verbo dubiae auctoritatis utar, haec editio Bamberg, 1778. tum ab ipso Ernestio recognita prodiit Lips. 1785. v. voll. 8. denique post editoris obitum repetita est ibidem 1801—4. v. voll. 8. quorum ultimum complectitur Ernestii glossarium Livianum, a G. H. Schaefero emendatum plurimisque accessionibus locupletatum. Ceterum ex hac editione septem priores Livii libri repetiti sunt Upsal. 1795. et glossarium Livianum additum est editioni Oxoniensi, quae primum anno 1800. deinde anno 1813. prodiit. Vid. infra ad annum 1800.

1775. Paris. recensuit I. N. Lallemand. vii. voll. 12.

Nitidissimae huius editionis fundamentum est Drakenborchiana, a qua tamen editor, Crevierii aliorumque coniecturas secutus, permultis in locis discessit et mutationum omnium rationem in notis reddidit.

1779—83. Mannhemii, cum Io. Freinsheimii Supplementis, cura et sumtibus Societatis literatae, xii. voll. 8.

Huic editioni variae lectiones editionum Gronovianae et Crevierianae, ex Ernestii editione petitae, brevesque notae, ex Drakenborchii commentariis excerptae, probabili studio adiectae sunt. Repeti coepta est anno 1822.

1780 — 84. Lips. et Goth. cum animadversionibus F. A. Stroth, iii. voll. 8.

Haec tria volumina, quorum primum Goth. 1784. repetitum est, quindecim Livii libros continent. Editionem opera Strothii perquam laudabili inchoatam Doeringius continuavit et absolvit. Vid. infra ad annum 1796.

1784 — 86. Biponti, cum Io. Freinsheimii Supplementis et Notitia literaria, studiis Societatis Bipontinae, xiii. voll. 8.

Anno 1806. repetita est haec editio, quae textum Drakenborchianum cum praestantioribus editionibus collatum exhibet.

1794. Bassani, cum notis Clerici et Crevierii, ex recensione Arn. Drakenborchii. 8.

Num haec Livii editio, quae in Th. Chr. Fr. Enslini, bibliopolae Berolinensis, Bibliotheca auctorum classicorum, et graecorum et latinorum, p. 83. ed. tert. commemoratur, diversa sit ab ea, cui lib. xci. fragmentum anno 1791. adiectum est, alii viderint.

1794. Lond. ex recensione Arn. Drakenborchii et H. Homer, viii. voll. 8.

De huius editionis mihi nunquam visae virtutibus non habeo, quod dicam. Commemoravit eam Ebert. in Lex. bibliograph. Vol. i. p. 1002. n. 12117.

1796 — 1819. Gothae, cum animadversionibus F. A. Strothii suisque observationibus ed. Fr. Guil. Doering, vii. voll. 8.

Huius editionis, etsi circumactis demum annis tribus et viginti absolutae, tamen non ea, qua par erat, doctrina et diligentia adornatae, Vol. i. anno 1805. et 1816. Vol. ii. anno 1805. atque Vol. iii. anno 1822. repetitum est. Index historicus, ab editore promissus, etiam nunc desideratur.

1800. Oxonii, ex recensione Arn. Drakenborchii, vi. voll. 8.

Accesserunt huic editioni, quae ibidem anno 1813. repetita est, gentes et familiae Romanorum, auctore R. Streinino, quod opusculum primum Paris. 1559. ac Venet. 1571. editum et deinde Io. Georg. Graevii Thes. Antiquitatt. Rom. Tom. vii. p. 1. sqq. insertum est, atque Ernestii glossarium Livianum, auctius nonnihil, si titulo fides habenda, et in locis quam plurimis emendatum.

1807. 8. Gotting. cum commentario perpetuo ed. G. A. Ruperti, vi. voll. 8.

De Rupertii et Doeringii editionibus, in quibus multi multa reprehenderunt, vide censoris doctissimi iudicium in Ephemerid. literar. Ienens. a. 1811. No. 19 — 22. p. 145. sqq.

1809. Cupri Fifanor. Livii Historiarum libri v. priores, ed. I. Hunter. 12.

Commemoravit hunc libellum Ebert. in Lex. bibliograph. Vol. i. p. 1002. n. 12125.

1815 — 19. Hafniae, Livii Historiarum libri i — x. cum Strothii, Doeringii aliorumque animadversionibus excerptis suisque ed. E. Moeller, ii. voll. 8.

Primum volumen huius editionis in scholarum usum pa-

ratae ante annum 1815. prodiisse, titulus recentior antiquiori, eique rescisso, bibliopolarum more subiectus indicare videtur.

1821. Lipsiae, ap. C. Tauchnitium, ed. stereotypa, v. voll. 12.

Haec editio, vili admodum pretio parabilis, chartarum et typorum bonitate non minus quam diligentia in textu exscribendo adhibita vulgares illas, quae Halae 1802. 1811. 1815. et 1819. prodierunt, longe multumque superat.

1822. Francofurt. ad Moen. Livii Historiarum lib. **xxxiii.** cum Fr. Iacobsii suisque notis ex cod. Bambergensi ed. Franc. Goeller. Acc. Epistola Io. Theoph. Kreyssigii ad Editorem et varietas lectionum in libb. **xxxi—xxxviii.** ex eodem codice excerpta. 8.

Quantum utilitatis codex Bambergensis in Livio edendo nobis praebuerit aliisque sit praebiturus, breviter docuimus supra in praefat. p. **viii.** sq.

1822. Paris. ad codd. Parisinos recens. et cum selectis commentariis, item Supplementis Io. Freinsheimii ed. N. E. Le-maire. 8.

Haec editio satis splendida, nuper demum inchoata, necdum perfecta, pars est Collectionis auctorum classicorum latinorum, quae nunc quum maxime Parisiis adornatur, atque praeter selectam lectionum varietatem, ex insigni codicum Parisinorum numero non ea, quae criticos decet, diligentia enotata, excerptasque aliorum interpretum notas, integrum continet Rupertii commentarium, vix tanto apud externos honore dignum.

---

---

E L E N C H U S  
E D I T I O N U M  
F R A G M E N T I L I V I A N I  
E X C O D I C E V A T I C A N O E R U T I.

---

Quum prius quam Niebuhrius fragmenti Liviani, ex codice Vaticano exscripti, sospitator exstitisset, duae omnino essent eius recensione, quarum alteram perfectiorem exhibet editio Hamburgensis, a Brunsio ipso curata, alteram imperfectiorem editio Romana, a Franc. Cancellario ex Iuvenatii schedis adornata, atque editores et interpretes fragmenti vel alterutram vel utramque sequerentur, omnes editiones eius et versiones, quotquot Niebuhrii editionem praecesserunt, in tres classes describendas esse, facile intelligitur \*).

\*) De fragmenti Liviani editionibus, praeter ea, quae editores et interpretes passim in praefationibus ac prolegomenis hac de re disse-  
runt, conferas velim Christoph. Saxii *Onomast. literar.* Part. 1. p. 567. sq. ed. alt. Theoph. Christoph. Harlesii *Introduct. in notit. literat. Rom.* Part. II. p. 428. et 431. ed. alt. eiusdemque *Notit. brev. literat. Rom.* p. 199. et *Supplement. ad brev. notit. literat. Rom.* Part. 1. p. 314. Io. Georg. Meuselii *Biblioth. hist.* Vol. IV. Part. 1. p. 153. sq. Guil. Dav. Fuhrmanni *Handb. der class. Literat.* Vol. IV. p. 634. sq. Fr. Ad. Eberti *Bibliograph. Lex.* Vol. 1. p. 1002. No. 12123. Io. Christoph. Gattereri *Hist. Journal.* Tom. VII. p. 241. sqq. *Erfurt. gelehrte Zeitung.* 1773. No. 65. et 66. p. 539. sqq. et 547. sqq. *Allgem. deutsch. Biblioth.* 1774. *Anhang. vom 13. bis 24. Bd.* Sect. II. p. 803. sq. *Goetting. Anzeigen von gelehrt. Sachen.* 1774. Vol. 1. No. 2. p. 11. sqq. et *Zugabe zu den Goetting. Anzeigen.* 1777. Vol. II. No. 42. p. 669. *Neue Leipz. Zeitung von gelehrt. Sachen.* 1774. Part. 1. p. 28. sqq. atque Io. Fr. Herelii *commentationem in Meuselii Fortgesetzten Betracht. über die neuesten hist. Schriften.* Part. 1. Sect. 1. p. 41. sqq. Quae in hoc libro p. 50. ab Io. Enschedio, homine Batavo, parata esse dicitur fragmenti Liviani editio, nunquam, opinor, evulgata est.



## I. Editiones Fragmenti Liviani,

quae Brunssii recensionem sequuntur.

*Fragmentum ex Lib. XCI. Historiarum T. Livi Patavini. Nunc primum eruit ex Codice MS. Vaticano, quomdam Palatino, inter Latinos signato No. 24. et Celeb. B. Kennicott inscripsit P. I. Bruns. Hamburgi 1773. fol.*

Haec fragmenti Liviani editio, cui egregia Brunssii ad Kennicottum epistola praemittitur, uti propterea quod fragmenti textum ad apographi Brunssiani fidem plerumque constitutum, multo, quam editio Romana, perfectiorem et integriorem exhibet, primo loco ponenda est, ita etiam numero et tempore princeps habenda. Niebuhrius quidem p. 87. ait, Brunssium in patriam reducem ex emendatiore recensione fragmentum evulgasse; audito, Romae id editum esse. Id vero secus est. Etsi enim Brunssii epistola ad Kennicottum pridie Calendas Martias, Cancellarii autem epistola ad Rezzonicum a. d. vii. Calendas Martias 1773. data est, Romanam tamen editionem, blateronum vanissimorum, quos Cancellarius in epilogo exagitat, rumoribus tandem compressis, serius quam Hamburgensem esse evulgatam, docent censorum Romanorum approbationes, illi p. 60. subiectae, quae a. d. vii. Idus Iunias eiusdem anni literis consignatae sunt. Quid, quod etiam principio epistolae Caiet. Melioris ad Nic. Gorgam, quae a. d. xi. Calendas Quintiles 1773. scripta est, p. 93. editionis Neapolitanae haec leguntur: *Iuvenatii nostri tarditatem noli diutius accusare. Fragmentum propediem vulgabitur; et longi temporis usuram ipsa rei elegantia, mihi crede, resarciat.* Ceterum editio Hamburgensis, omisso tamen fragmenti textu literis maiusculis descripto et ne typographi quidem erroribus sublatis, haud eleganter repetita est Parisiis 1773. 8.

1. *Fragmentum ex T. Livii Historia, Romae nuper detectum, notisque criticis illustratum, exhibet Io. Ihre, Resp. Andr. Gust. Örbom. Upsaliae 1774. 4.*

Titulum huius libelli, nostris in oris longe rarissimi et ne Brunssio quidem visi, in quo Ihrius multos fragmenti locos egregie vel emendavit vel explicavit, Harlesius ex Ephemeridibus Gottingensibus in Introduct. in notit. literat. Rom. Part. II. p. 431. ita corruptum protulit: *Fragmentum de T. Livii historia Romana, nuper detectum notisque criticis illustratum, respondente A. G. Orbarn. Upsaliae 1777.* Idem error obiectus est Rupertio Vol. IV. p. 271. similisque Meuselio, qui in Biblioth. hist. Vol. IV, Part. I. p. 154. refert, Ihrii libellum anno 1776. prodisse. Postea insertus est operi praeclaro nec ubique obvio,

quod ita inscribitur: *Thesaurus Sueo-Gothicus, continens scripta varia, vel ab auctoribus Suecis composita, vel res Suecicas spectantia; collecta et edita a Car. Christoph. Gjörwell. Tom. I. Fasc. I. Holmiae 1781. 8. No. iv. p. 92. sqq.*

2. *C. Cornelii Taciti Opera, supplementis, notis et dissertationibus illustravit Gabr. Brotier. Parisiis 1776. 8. Tom. iv. p. 549. sqq.*

Huic editioni operum Taciti, quinquennio post priorem a Brotierio curatae, adiectum est opusculum ita inscriptum: *Fragmentum Lib. XCI. Historiarum T. Livii Pat. supplemento et annotationibus illustravit Gabr. Brotier. Usus est Brotierii notis et supplementis, quae res ad antiquam Hispaniae geographiam pertinentes melius explicant, quam locos fragmenti corruptos et lacunosos emendant et resarciunt, editor fragmenti Liviani Mannhemensis, ad tertiam classem referendus. Totum opusculum, onisso tamen textu fragmenti literis maiusculis exscripto, minus accurate repetitum est ad calcem editionum Bassanensis et Venetae, de quibus infra, quum ad secundam editionum classem pervenerimus, dicendi locus erit.*

3. *Fragmentum ex Lib. XCI. Historiarum T. Livii Patavini. Ex codice Vaticano, quondam Palatino, eruit P. I. Bruns; vertit et supplementis explevit I. T. Harduinus. Parisiis 1794. 12.*

In hunc fere modum, nisi me omnia fallunt, Harduinus sive latine sive gallice inscripsit suam fragmenti Liviani editionem, quam ut oculis usurparem, mihi non contigit. Ea usus, imo abusus est Fr. Ios. Noelius, ex cuius editione, de qua posthac dicam, hoc saltem intellexi, Harduini supplementa nemini, qui sermonis Liviani puritatem et elegantiam noverit, probatum iri.

## II. Editiones fragmenti Liviani,

quae Iuvenatii recensionem exhibent.

*T. Livi Historiarum Lib. XCI. Fragmentum ἀνέκδοτον, descriptum et recognitum a CC. VV. V. M. Giovenazzio, P. I. Bruns, ex Schedis vetustissimis Bibliothecae Vaticanae. Eiusdem Giovenazzii in idem Fragmentum Scholia. Romae 1773. 4.*

Haec est splendida illa fragmenti Liviani editio Romana, nostris in terris oppido rara et Brunsio in Anglia semel tantum visa, quam Cancellarius, prologo et epilogo addito, ex Iuvenatii schedis adornavit. Sed quo plura fronte promittit, eo pauciora habet in recessu. Quum enim Iuvenatii apogra-

phum inchoatum magis esset, quam perfectum, haec editio textum fragmenti, in tertia praesertim et sexta columna, multo imperfectiorem exhibet, quam Hamburgensis, atque ab hac insuper locis quinquaginta amplius discedit. Scholia Iuvenatii, licet interdum sint iusto prolixiora, amplae tamen et multiplicis doctrinae copiis referta sunt, atque de locis vel librarii culpa depravatis, vel literarum extritarum obscuritate ambiguis, nec non de rebus grammaticis, historicis et geographicis ita exponunt, ut ad fragmenti Liviani emendationem atque interpretationem fructus ex iis longe uberrimus redundet. Praeterea huic editioni adiecta sunt duo scripturae specimina, ex Hieronymi prologo in librum Iobi ac libri Iudithae cap. xvi, 8—13. deprompta, quorum alterum fragmenti lin. 24—30. et lin. 54—60. alterum eiusdem lin. 145—150. et lin. 175—180. exhibet; utrumque autem Cancellarii et Iuvenatii iudicio a codicis palimpsesti scriptura, teste Niebuhrio p. 22. non sine summa difficultate delineanda, longissime recedit.

1. *T. Livi Historiarum Lib. XCI. Fragmentum ἀνέκδοτον, descriptum et recognitum a Clariss. Viris V. M. Giovenazzio, P. I. Bruns, ex Schedis vetustissimis Bibliothecae Vaticanae. Eiusdem Giovenazzii in idem Fragmentum Scholia novis accessionibus in altera hac editione locupletata. Accedit Clariss. Viri Caiet. Migliore de nonnullis Ciceronis, ut videntur, Fragmentis ex eodem Vaticano Codice excerptis Epistola. Neapoli 1773. 8.*

Vixdum Romana fragmenti Liviani editio in lucem erat emissa, quum illius iterum et multo, quam antea, accuratius atque emendatius excudendae consilia agitare coeperunt typographi Neapolitani; qui Bern. Tanusii beneficio exemplum eius nacti, ipsius Iuvenatii manu ad libri oram correctum et adnotationibus auctum, ab eo ne latum quidem, quod aiunt, unguem recedendum existimarunt, ita ut haec editio, in nostris regionibus haud facile parabilis, una omnium editionum Italicarum optima ac perfectissima sit habenda. Neque enim multum de laudibus eius deminui putaverim, quod potiora tantum ex Cancellarii praefatione et epilogo delibata continet atque scripturae specimina non exhibet; praesertim quum praeter aliquot Fastorum Praenestinatorum sexennio post a P. F. Foggino editorum fragmenta, Iuvenatii scholiis p. 66. sqq. inserta, ad eam insuper accesserit Melioris epistola, in qua unum tantum Ciceronis, tria Senecae fragmenta ex codice Vaticano prolata esse, docuit Niebuhrius p. 79. sq. et p. 102. sq. Idem, ut hoc obiter addam, p. 79. statuit, editionem Romanam Neapoli, urbe patria, repetendam curasse hunc ipsum Meliorem; quem, ut maxima fuerit eius arrogantia, tamen ea,



quae in typographorum praefatione p. 14. leguntur, de epistola sua praedicasse, vix adducor, ut credam. Ex recentioribus autem Livii editoribus Ernestium Vol. iv. p. 297. sqq. ex editione Neapolitana, id quod ipse in nota subiecta profitetur, et eum, qui anno 1800. editionem Oxoniensem paravit, Tom. iv. p. 579. sqq. cum Rupertio Vol. iv. p. 268. sqq. ex Ernestii editione, id quod ex vitiis typographicis religiose servatis intelligitur, neque potius ex Hamburgensi, textum fragmenti Liviani cum Iuvenatii emendationibus intra uncinos inclusis repetendum curasse, miror ac paene indignor.

2. *T. Livi Historiarum Lib. XCI. Fragmentum ἀνέκδοτον, descriptum et recognitum a Clariss. Viris V. M. Giovenazzio, P. I. Bruns, ex Schedis vetustissimis Bibliothecae Vaticanae. Eiusdem Giovenazzii in idem Fragmentum Scholia. Cum praefatione I. A. Ernesti. Lipsiae 1773. 8.*

Editionis Romanae exemplum, ab Io. Ludov. Blancono Roma missum, Ernestius ita repetendum curavit, ut praefationem, in qua partim nonnullas Iuvenatii emendationes vel confirmare vel confutare studuit, partim de corruptis quibusdam fragmenti Liviani locis egregie disputavit, libello praemitteret; in hoc autem, licet plura tacite correxerit, typis iterum exscribendo haud ubique caveret, ne operae ab archetypo deflecterent. Ceterum huic quoque editioni ex Romana sunt addita scripturae specimina, in quibus chalcographus Lipsiensis, homo ineptus et valde ridiculus, satis habuit literas ex Hieronymi prologo in Iobum et Iudithae libello depromptas aeri insculpere, atque per errorem inexcusabilem, quem Herelius, cui editio Romana non ad manus erat, in Meuselii opere supra laudato p. 48. sq. coniectura adsecutus est, antiquiorem illam et subtiliorem codicis Liviani scripturam, sub recentiore et crassiore latentem, plane omisit. Textum fragmenti Liviani ex hac editione caractere quadrato et minuto non satis accurate exprimi iusserunt Livii editores Bipontini Vol. xii. p. 300. sqq. eundemque I. P. Ostertagius, ineptias perabsurdas, quas refutare nihil adinet, de codice Vaticano, quem librum opisthographum fuisse negat, eiusque scriptura in prolegomenis commentus, literis minusculis descriptum notisque brevibus illustratum historiarum Livianarum versionem adiecit Vol. x. p. 240 sqq.

3. *Mercurio Historico y Politico. Junio. 1771. En Madrid. 12. p. 124. sqq.*

Piget taedetque incuriae, qua fragmentum Livianum in menstruis hisce commentariis, in ipsa Hispania, ad quam illius argumentum proxime pertinet, olim evulgatis, ad edi-



tionis Romanae exemplar est excusum; quae quidem, licet praescripto lemmate: *Signe la copia puntual del Fragmento*, summa ostentetur accuratio, tanta fuit, ut fragmenti textus, qui caractere minuto descriptus est, quam plurimis, iisque turpissimis, typothetae erroribus scateat.

4. *Mercur de France, dédié au Roi. Par une Société de gens de lettres. Octobre, 1773. Vol. I. à Paris. 8. p. 115. sqq.*

Huic libro menstruo inserta legitur: *Lettre de M. l' Abbé Roubaud, contenant un Fragment de Tite-Live, nouvellement découvert à Rome*, quae primum, quomodo fragmentum Livianum tam repertum quam editum sit, breviter enarrat, deinde eius textum literis minusculis ex editione Romana exscriptum continet. Sub epistolae finem Rubaldus: *Je vous prie, inquit, d' avoir soin qu'il ne s'y glisse aucun changement à l' impression; je le copie avec la plus scrupuleuse exactitude.* Nihilo tamen secius vitiorum, quae perinulta et gravia irrepserunt, alia exactissimae scilicet Rubaldi diligentiae, alia maximae typographi negligentiae tribuenda esse, ex gallica fragmenti Liviani versione, quam Poinsinet de Sivry ad Rubaldi apographum concinnavit et editor inde a p. 121. fragmento subiunxit, liquido apparet. Auctus est vitiorum typographicorum numerus in repetita huius libri editione, quae in Batavia prodiit, titulo leviter immutato: *Mercur de France, dédié aux Oisifs. Par une Société de gens de lettres. Octobre, 1773. Vol. I. No. XIII. à Amsterdam. 8. p. 115. sqq.* et mendorum foedissimorum sentina dicenda est.

5. *T. Livii Historiarum Lib. XCI. Fragmentum ἀνέκδοτον, descriptum et recognitum a Clariss. Viris V. M. Giovenazzio, P. I. Bruns, ex Schedis vetustissimis Bibliothecae Vaticanae. Eiusdem Giovenazzii in idem Fragmentum Scholia, novis accessionibus in hac novissima editione locupletata. Accedit idem Fragmentum cum Supplementis ad ea quae in eodem desunt, et cum peculiaribus Notis Clariss. Viri Gabr. Brotier. Bassani 1791. 8.*

In hac fragmenti Liviani editione, quae non solum editioni operum Livianorum, Bassani eodem anno adornatae, mihi autem nunquam visae, ad calcem addita, sed etiam, titulo peculiari praefixo atque mutatis paginarum numeris, separatim divendita est, Cancellarii praefatio et epilogus, textus fragmenti caractere maiore ac minore descriptus et Iuvenatii scholia maximam partem, contra, quam typographus ipse in Monito ad Lectorem p. 3. perhibuit, ex editione Romana, scholiorum autem additamenta, novis accessionibus, quas titulus pollicetur, haud locupletata, ex editione Neapolitana ita sunt expressa, ut passim editoris fidem

et typothetae diligentiam in his omnibus aequae desideres, atque in opusculi Broteriani repetitione, de qua supra p. LXVIII. memoravi.

6. *T. Livii Opera, quae supersunt, obscuriorum locorum interpretationibus et selectis adnotationibus illustrata ab I. B. L. Crevier, cum eiusdem Supplementis in postremos libros, ex recensione Arn. Drakenborchii. Editio postrema, cui nunc primum accedit Fragmentum libri XCI. nuper inventum in Bibliotheca Vaticana et Scholiis illustratum a V. M. Giovenazzio. Venetiis 1791. vi. voll. 8.*

Hanc Livii editionem, quam ut uspiam viderem, mihi non contigit, Harlesius commemoravit in Supplement. ad brev. notit. literat. Rom. Part. I. p. 314. atque de ea conferri iussit Ephemerid. literar. Ienens. a. 1795. No. 164. p. 550. sqq. Quae ibi censor de interno et externo huius editionis habitu exposuit, mihi facile persuadent, ut inter eam et Bassanensem, quae eodem anno prodisse dicitur, sive nullum omnino sive perquam exiguum discrimen intercedere existimem. Iuvenatium ipsum hanc Livii editionem parasse, Rupertius in prooem. p. 63. perperam memoriae prodidit.

7. *Histoire Romaine de Tite-Live. Traduction nouvelle par Dureau de Lamalle, revue par M. Noël. Tom. XV. à Paris 1812. 8. p. 171. sqq. coll. Tom. I. praefat. p. 15. sqq.*

Vidit meliora probavitque, deteriora tamen secutus est Noëlius, qui quidem, inexplicabili errore impeditus, fragmenti Liviani textum, licet editiones a Brotierio et Harduino ex editione Hamburgensi derivatas ad manum haberet, hac sola, eaque gravi scilicet de causa, quod tres editiones, Romanam, Lipsiensem et Bipontinam, pro una numerandas, cum Harduini, ideoque etiam, quod Noëlium praeteriisse videtur, cum Brotierii editione locis permultis non convenire intellexisset, ad illarum potius fidem repetendum curavit; ea autem, quae Harduinus ex editione Hamburgensi multo integriora protulerat et supplementis minime probandis expleverat, tanquam spuria hominis nescio cuius commenta, in notas textui eiusque versionis subiectas amandavit, atque insuper adnotationes, ex Brunsi et Brotierii notis, Iuvenatii scholiis et Danvillii commentatione sine ullo delectu et iudicio consarcinatas, sub finem addidit.

---

## III. Editiones fragmenti Liviani

ad utramque recensionem concinnatae.

1. *T. Livii Pat. Historiarum libri, qui supersunt XXXV. Recensuit I. N. Lallemand. Tom. I. Parisiis 1775. 8. p. XLVIII. sqq. coll. p. XVI. sq.*

Fragmenti Liviani textum Lallemandus secundum editiones Hamburgensem et Romanam constituit, emendationibus Iuvenatii suisque subiectis.

2. *C. Sallustii Crispi Historiarum Fragmenta, Divione 1780. 4. p. 15 sqq.*

Haec fragmentorum Sallustianorum editio, quae post Brossii obitum prodiit, Livianum quoque fragmentum ex editione Hamburgensi, receptis tamen editionis Romanae additamentis tantum non omnibus et plerisque Iuvenatii emendationibus textui intra uncinos insertis, satis accurate descriptum, itemque Brotierii passim ac Brossii supplementis expletum continet. Ex hac editione Divionensi Io. Christoph. Schlueterus in praeclara operis Brossiani interpretatione fragmentum Livianum repeliit et permultis, iisque gravissimis, operarum peccatis deturpatum germanicae eius versioni subiecit Vol. II. p. 141. sqq. et p. 153. sqq.

3. *T. Livii Pat. Historiarum libri, qui supersunt, omnes. Tom. XII. Mannhemii 1783. 8. p. 177. sqq. coll. Tom. I. p. 9. sqq.*

Qui huic Livii editioni magna cum laude praefuit, fragmenti Liviani textum non solum ex editione Hamburgensi, adhibita tamen Romana quoque vel Lipsiensi, caractere quadrato, eoque nitidissimo, diligenter descriptum, sed etiam Brotierii supplementis, secundum Iuvenatii recensionem passim correctis, utcumque reparatum cum selectis Brotierii annotationibus ita sub prelum revocavit, ut haec fragmenti editio omnium, quae eam praecesserunt, accuratissima sit iudicanda.

4. *T. Livii Historiarum Lib. XCI. Fragmentum. Recensuit Io. Theoph. Kreyssig. Chemnitii 1807. 8.*

De hoc libello, quem non nisi praesidiis a Brunsio acceptis instructus tanquam praevium editionis perfectionis indicem emisi, vide, si lubet, Actorum seminarii regii et societatis philologicae Lipsiensis Vol. II. Part. II. p. 430. sqq. et Ephemerid. literar. Lips. a. 1807. No. 14. p. 224.

Omnibus autem, quorum hic recensum egimus, fragmenti Liviani editoribus palmam praeripuit Niebuhrius, qui abhinc triennio et quod excurrit denuo illud ex codice Vaticano edidit in libro ita inscripto:



*M. Tullii Ciceronis Orationum pro M. Fonteio et pro C. Rabirio Fragmenta*, *T. Livii Lib. XCI. Fragmentum plenius et emendatius*, *J. Senecae Fragmenta ex membranis Bibliothecae Vaticanae edita a B. G. Niebuhrio C. F. Romae 1820. 8. p. 85. sqq. coll. p. 18. sqq.*

De huius editionis virtutibus plane eximiis, partim in codice Vaticano accuratissime et doctissime describendo, partim in fragmenti Liviani textu, in tertia praesertim et sexta columna multis partibus auctiore, diligentissime et emendatissime exhibendo maxime conspicuis, quum iam supra in praefat. p. XVI. sq. breviter dixerim, nihil amplius restat, quam ut pauca addam de fragmenti Liviani versionibus, quas et ipsas in tres classes dividendas esse vidimus.

Brunsii igitur recensionem secuti sunt primum anglicus fragmenti interpres, qui illud, praemissa fragmenti reperti historia, in *The Gentleman's Magazine, and Historical Chronicle. Vol. XLIII. For the Year 1773. By Sylvanus Urban, Gent. London. 8. p. 314. sqq.* ita ad verbum expressit, ut accuratissimam quidem diligentiam adfectaret, sed passim a vero locorum singulorum sensu longissime aberraret; deinde anonymus ille, cuius germanica extremae fragmenti particulae interpretatio in No. 59. *des Deutschen, sonst Wandsbecker Bothen, von 1773. 8. p. 4. sq.* speciminis loco proposita est, quae, ne quid gravius dicam, a linguae vernaculae pariter ac nostri saeculi elegantia mirum quantum abhorret; denique Harduinus, de cuius versione, ex qua pauca tantum Noelius Tom. XV. p. 181. et 183. in notis protulit, iudicare nequeo, quum hanc fragmenti Liviani editionem nullo pacto potuerim nancisci.

Ad recensionem Iuvenatii compositae sunt duae versiones gallicae, quarum altera Sivrii, quae, quum mendosum Rubaldi apographum sequatur, non solum originis suae maculas paene omnes refert, sed etiam ineptis lacunarum supplementis aliisque vitiis laborat, in *Mercure de France, dédié au Roi. Par une Société de gens de lettres. Octobre, 1773. Vol. I. à Paris. 8. p. 121. sqq.* legitur, altera Noelii, quae Sivrii interpretationi, quam rectius paraphrasin dixeris, longe anteponenda atque, editione Hamburgensi et Harduini supplementis passim saltem in auxilium vocatis, ita adornata est, ut uno tenore decurrat, operum Livianorum versioni: *Histoire Romaine de Tite-Live. Traduction nouvelle par Dureau de Lamalle, revue par M. Noël. Tom. XV. à Paris 1812. p. 175. sqq.* adiecta est.

Secundum utramque recensionem concinnata est versio itidem gallica, quam Brossius, cuius librum Noelius, id quod in populari mireris, ignorasse videtur, Livii verbis pressius ac-



commodatam, supplementis probabiliter expletam notisque historicis et geographicis egregie illustratam inseruit operi praestantissimo: *Histoire de la République Romaine, dans le cours du VII<sup>e</sup>. siècle; par Salluste. Tom. I. à Dijon 1777. 4. Lib. II. cap. 46. 47. et 49. p. 576. sqq. et p. 589. sqq. atque Schlueterus Vol. II. p. 141. sqq. et p. 153. sqq. vernaculo sermone ita repetiit, ut plerumque non tam Brossii interpretationem, quam textum latinum recte exprimeret.*

Praeterea ad fragmenti Liviani explicationem et emendationem praecipue pertinet Danvillii commentatio, ita inscripta: *Mémoire sur des Noms de Peuples et de Villes, dont le Fragment du XCI. Livre de Tite-Live, trouvé dans un Manuscrit du Vatican, de l'ancienne Bibliothèque Palatine fait mention; par M. d'Anville, quae eodem, quo Livii fragmentum Hamburgi et Romae evulgatum est, anno conscripta atque aliquanto post edita est in pretiosissima opusculorum variorum et perutilium collectione: Mémoires de Littérature, tirés des Registres de l'Académie Royale des Inscriptions et Belles-Lettres. Tom. XLI. à Paris 1780. 4. p. 761. sqq.*

---



T. LIVII PATAVINI  
HISTORIARUM LIBRI  
QUI SUPERSUNT OMNES.

---

TOMUS PRIMUS.

---





T. LIVII PATAVINI  
HISTORIA RUM  
AB URBE CONDITA  
LIBRI.

---

EPITOME LIBRI I.

**A**dventus Aeneae in Italiam, et eius res gestae 1) referuntur 2). Ascanii regnum Albae, et deinceps Silviorum 3). Numitoris filia, a Marte compressa, nati Romulus et Remus. Amulius obtruncatus. Urbs a Romulo condita. Senatus lectus. Cum Sabinis bellatum. Opima spolia Iovi Feretrio lata. In curias populus divisus. Fidenates et Veientes victi. Romulus consecratus. Numa Pompilius ritus sacrorum tradidit; Iano templum constituit; eiusque portam, pacatis omnibus circa populis, primus clausit. cum Dea Egeria sibi congressus nocturnos esse simulans, feroces populi animos ad religionem perpulit. Tullus Hostilius Albanos bello petiit. Post haec trigeminarum 4) pugna. Horatius absolutus. Metti Fuffetii supplicium. Alba diruta, Albani in civitatem recepti. Sabinis bellum indictum. Ad postremum fulmine Tullus absumtus 5). Ancus Marcius ceremonias, a Numa institutas, renovavit. Latinis victis et ad civitatem adscitis montem Aventinum adsignavit. Politorium, urbem Latinorum, bello repetitam, quam prisci Latini occupaverant, diruit. pontem publicium in Tiberim fecit. Ianiculum collem urbi addidit. fines imperii protulit. Ostiam condidit. Regnavit annos viginti quatuor 6). Eo regnante Lucumo, Damarati 7) Corinthii filius, a Tarquiniiis, Etruriae civitate, Romam venit; et, in amicitiam Anci receptus, Tarquinii nomen ferre coepit; et post mortem Anci regnum excepit. Centum additis, Patrum numerum auxit. Latinos subegit, circum designavit, ludos edidit. Sabinorum bello petitus equitum centurias

1) et res ab eo gestae Gron.

4) Tergeminarum Eaed.

Crev.

2) referuntur del. Eaed.

5) add. est Eaed.

3) et Silvii Aeneae, ac deinceps Silviorum regum, primo libro continentur. Eaed.

6) triginta tres Eaed.

7) Demarathi Crev.

ampliauit. Tentandae scientiae caussa Atti Navii auguris, consuluisse fertur, an id, de quo cogitaret, effici posset: quod quum ille fieri posse respondisset, iussisse, eum novacula cotem praecidere; idque protinus ab Atto factum. Sabinos praeterea acie vicit, urbem muro circumdedit, cloacas fecit. Occisus est ab Anci filiis, quum regnasset annos triginta octo. Successit ei Ser. Tullius, natus ex captiva nobili Corniculana; cui puero, adhuc in cunis posito, caput arsisse traditum est. Veientes 8) atque Etruscos proelio fudit. Censum primus 9) egit. Lustrum condidit, quo civium capita 10) censa octoginta millia esse dicuntur. Classes centuriasque descripsit. Pomoerium protulit. Colles urbi, Quirinalem, Viminalem, Esquilinumque adiecit. Templum Dianae cum Latinis in Aventino fecit. Interfectus est a L. Tarquinio, Prisci filio, consilio filiae suae Tulliae, quum regnasset annos quadraginta 11) quatuor. Post hunc L. Tarquinius Superbus, neque Patrum, neque populi iussu, regnum invasit: quo die scelerrata Tullia per patris iacentis corpus carpentum egit. Armatos circa se ad custodiam corporis sui habuit. Turnum Herdonium fraude interemit. Bellum cum Volscis gessit; et ex eorum praeda templum Iovi in Capitolio fecit. Terminus et Iuventas non addixere: quorum arae moveri non poterunt. Filii Sex. Tarquinius dolo Gabios in potestatem suam redigit 12). Huius filii Delphos profectis, et consulentibus, quis eorum regnaturus esset Romae, dictum est, eum regnaturum, qui primus 13) matrem osculatus esset. Quod responsum quum ipsi aliter interpretarentur, Iunius Brutus, qui cum iis profectus erat, prolapsus se simulavit, et terram osculatus est. idque factum eius eventus rei comprobavit. Nam quum, inpotenter se gerendo, Tarquinius Superbus omnes in odium sui adduxisset; ad ultimum, propter expugnatam nocturna vi a Sexto filio eius Lucretiae pudicitiam (quae, vocato patre ad se Tricipitino et viro Collatino, obtestata, ne inulta mors eius esset, cultro se interemit) Bruti opera maxime expulsus est, quum regnasset annos viginti quinque. Tunc consules primum creati sunt L. Iunius Brutus et L. Tarquinius Collatinus.

8) *Is Veientes* Crev.11) *triginta* Eaed.9) *add. omnium* Gron. Crev.12) *redegit* Crev.10) *civium capita* del. Eaed.13) *primum* Gron. Crev.

## P R A E F A T I O.

**F**acturusne operae pretium sim, si a primordio urbis res populi Romani perscripserim, nec satis scio; nec, si sciam, dicere ausim: quippe qui, quum veterem, tum vulgatam esse rem, videam, dum novi semper scriptores, aut in rebus certius aliquid adlaturus se, aut scribendi arte rudem vetustatem superaturos, credunt. Utcumque erit, iuvabit tamen, rerum gestarum memoriae principis terrarum populi pro virili parte et me <sup>a)</sup> ipsum consuluisse; et, si in tanta scriptorum turba mea fama in obscuro sit, nobilitate ac magnitudine eorum, meo qui nomini obficient, me consoler. Res est praeterea et inmensi operis, ut quae supra septingentesimum annum repetatur; et quae, ab exiguis profecta initiis, eo creverit, ut iam magnitudine laboret sua: et legentium plerisque, haud dubito, quin primae origines proximaque originibus minus praebitura voluptatis sint, festinantibus ad haec nova, quibus iam pridem praevalentis populi vires se ipsae conficiunt. Ego contra hoc quoque laboris praemium petam, ut <sup>b)</sup> me a conspectu malorum, quae nostra tot per annos vidit aetas, tantisper, certe dum prisca illa tota mente repeto, avertam, omnis expers curae, quae scribentis animum, etsi non flectere a vero, sollicitum tamen efficere possit. Quae ante conditam condendamve urbem, poeticis magis decora fabulis, quam inconruptis rerum gestarum monumentis, traduntur, ea nec adfirmare, nec refellere, in animo est. Datur haec venia antiquitati, ut, miscendo humana divinis, primordia urbium augustiora faciat. Et, si cui populo licere oportet, consecrare origines suas, et ad Deos referre auctores, ea belli gloria est populo Romano, ut, quum suum conditorisque sui

a) *me* del. Crev.

b) *uti* Gron. Crev.

parentem Martem potissimum ferat, tam et hoc gentes humanae patiantur aequo animo, quam imperium patiuntur. Sed haec et his similia, utcumque animadversa aut existimata erunt, haud in magno equidem ponam discrimine. Ad illa mihi pro se quisque acriter intendat animum, quae vita, qui mores fuerint: per quos viros, quibusque artibus, domi militiaeque, et partum et auctum imperium sit. labente deinde paullatim disciplina, velut desidentes primo mores sequatur animo; deinde ut magis magisque lapsi sint; tum ire coeperint praecipites: donec ad haec tempora, quibus nec vitia nostra, nec remedia pati possumus, perventum est. Hoc illud est praecipue in cognitione rerum salubre ac frugiferum, omnis te exempli documenta in inlustri posita monumento intueri: inde tibi tuaeque reipublicae, quod imitere, capias: inde, foedum inceptu, foedum exitu, quod vites. Ceterum aut me amor negotii suscepti fallit, aut nulla unquam res publica nec maior, nec sanctior, nec bonis exemplis ditior fuit: nec in quam civitatem <sup>c)</sup> tam serae avaritia luxuriaque immigraverint: nec ubi tantus ac tam diu paupertati ac parsimoniae honos fuerit. adeo, quanto rerum minus, tanto minus cupiditatis erat. Nuper divitiae avaritiam, et abundantes voluptates desiderium per luxum atque libidinem pereundi perdendique omnia invexere. Sed querelae, ne tum quidem gratae futurae, quum forsitan et necessariae erunt, ab initio certe tantae ordiendae <sup>d)</sup> rei absint. Cum bonis potius ominibus votisque ac precationibus Deorum Dearumque, si, ut poetis, nobis quoque mos esset, libentius inciperemus, ut orsis tanti operis successus prosperos darent.

c) civitatem del. Gron.

d) ordiundae Gron, Crev.



# T. LIVII PATAVINI

## LIBER I.

Iam primum omnium satis constat, Troia capta, in ceteros saevitum esse Troianos; duobus, Aenea Antenoreque <sup>e)</sup>, et vetusti iure hospitii, et quia pacis reddendaeque Helenae semper auctores fuerant, omne ius belli Achivos abstinuisse. Casibus deinde variis Antenorem cum multitudine Henetum, qui, seditione ex Paphlagonia pulsus, et sedes et ducem, rege Pylaemene ad Troiam amisso, quaerebant, venisse in intimum maris Hadriatici sinum: Euganeisque, qui inter mare Alpesque incolebant, pulsus, Henetos Troianosque eas tenuisse terras: et in quem primum egressi sunt locum, Troia vocatur, pagoque inde Troiano nomen est, gens universa Veneti appellati. Aenean, ab simili clade domo profugum, sed ad maiora initia rerum ducentibus fatis, primo in Macedoniam venisse: inde in Siciliam quaerentem sedes delatum: ab Sicilia classe Laurentem agrum tenuisse: Troiae et huic loco nomen est. Ibi egressi Troiani, ut quibus ab immenso prope errore nihil, praeter arma et naves, superesset, quum praedam ex agris agerent, Latinus rex Aboriginesque, qui tum ea tenebant loca, ad arcendam vim advenarum armati ex urbe atque agris concurrunt. Duplex inde <sup>f)</sup> fama est: alii proelio victum Latinum pacem cum Aenea, deinde adfinitatem iunxisse tradunt: alii, quum instructae acies constitissent, priusquam signa canerent, processisse Latinum inter primores, ducemque advenarum evocasse ad conloquium; percunctatum deinde, qui mortales essent,

e) *Aeneas Antenoreque* Crev.    f) *exinde* Gron. Crev.

unde, aut quo casu profecti domo, quidve quaerentes in agrum Laurentem exissent? postquam audierit, multitudinem Troianos esse; ducem Aenean, filium Anchisae et Veneris; cremata patria et domo profugos sedem condendaeque urbi locum quaerere, et nobilitatem admiratum gentis virique, et animum vel bello vel paci paratum, dextera data fidem futurae amicitiae sanxisse. Inde foedus ictum inter duces, inter exercitus salutationem factam. Aenean apud Latinum fuisse in hospitio. ibi Latinum apud Penates Deos domesticum publico adiunxisse foedus, filia Aeneae in matrimonium data. ea res utique Troianis spem adfirmat tandem stabili certaque sede finiendi erroris. Oppidum condunt. Aeneas ab nomine uxoris Lavinium adpellat. Brevi stirps quoque virilis ex novo matrimonio fuit; cui Ascanium parentes dixerunt nomen.

II. Bello deinde Aborigines Troianique simul petiti. Turnus rex Rutulorum, cui pacta Lavinia ante adventum Aeneae fuerat, praelatum sibi advenam aegre patiens, simul Aeneae Latinoque bellum intulerat. Neutra acies laeta ex eo certamine abiit. victi Rutuli: victores Aborigines Troianique ducem Latinum amisere. Inde Turnus Rutulique, diffisi rebus, ad florentes Etruscorum opes Mezentiumque, eorum regem, confugiunt: qui, Caere opulento tum oppido imperitans, iam inde ab initio minime laetus novae origine urbis, et tum nimio plus, quam satis tutum esset adcolis, rem Troianam crescere ratus, haud gravatim socia arma Rutulis iunxit. Aeneas, adversus tanti belli terrorem ut animos Aboriginum sibi conciliaret, ne sub eodem iure solum, sed etiam nomine, omnes essent, Latinos utramque gentem adpellavit. Nec deinde Aborigines Troianis studio ac fide erga regem Aenean cessere. fretusque his animis coalescentium in dies magis

duorum populorum Aeneas, quamquam tanta opibus Etruria erat, ut iam non terras solum, sed mare etiam per totam Italiae longitudinem, ab Alpibus ad fretum Siculum, fama nominis sui inplesset, tamen, quum moenibus bellum propulsare posset, in aciem copias eduxit. Secundum inde proelium Latinis, Aeneae etiam ultimum operum mortalium fuit. situs est, quemcumque eum dici ius fasque est, super Numicium flumen. Iovem indigetem adpellant.

III. Nondum maturus imperio Ascanius Aeneae filius erat: tamen id imperium ei ad puberem aetatem incolume mansit. tantisper tutela muliebri (tanta indoles in Lavinia erat) res Latina et regnum avitum paternumque puero stetit. Haud nihil ambigam, (quis enim rem tam veterem pro certo adfirmet?) hiccine fuerit Ascanius, an maior, quam hic, Creusa matre Ilio incolumi natus, comesque inde paternae fugae, quem Iulum eundem Iulia gens auctorem nominis sui nuncupat. Is Ascanius, ubicumque et quacumque matre genitus, (certe natum Aenea constat) abundante Lavinii multitudine, florentem iam (ut tum res erant) atque opulentam urbem matri, seu novercae, reliquit: novam ipse aliam sub Albano monte condidit; quae, ab situ porrectae in dorso urbis, Longa Alba adpellata. Inter Lavinium et Albam Longam coloniam deductam triginta ferme interfuere anni. tantum tamen opes creverant, maxime fuis Etruscis, ut ne morte quidem Aeneae, nec deinde, inter muliebrem tutelam rudimentumque primum puerilis regni, movere arma aut Mezentius Etruscique, aut ulli alii adcolae ausi sint. Pax ita convenerat, ut Etruscis Latinisque fluvius Albula, quem nunc Tiberim vocant, finis esset. Silvius deinde regnat, Ascanii filius, casu quodam in silvis natus. Is Aenean Silvium creat. is deinde Latinum Silvium. Ab eo coloniae aliquot deductae, Prisci

Latini adpellati. Mansit Silvii postea omnibus cognomen, qui Albae regnarunt. Latino Alba ortus, Alba Atys, Atye Capys, Capye Capetus, Capeto Tiberinus; qui, in traiectu Albulae amnis submersus, celebre ad posteros nomen flumini dedit. Agrippa inde Tiberini filius; post Agrippam Romulus Silvius, a patre accepto imperio, regnat. Aventino, fulmine ipse ictus, regnum per manus tradidit. is, sepultus in eo colle, qui nunc est pars Romanae urbis, cognomen colli fecit. Proca deinde regnat: is Numitorem atque Amulium procreat. Numitori, qui stirpis maximus erat, regnum vetustum Silviae gentis legat. Plus tamen vis potuit, quam voluntas patris aut verecundia aetatis. Pulso fratre, Amulius regnat, addit sceleri scelus. stirpem fratris virilem interimit: fratris filiae Rheae Silviae per speciem honoris, quum Vestalem eam legisset, perpetua virginitate spem partus adimit.

IV. Sed debebatur, ut opinor, fati tantae origo urbis, maximique secundum Deorum opes imperii principium. Vi compressa Vestalis, quum geminum partum edidisset, seu ita rata, seu quia Deus auctor culpae honestior erat, Martem incertae stirpis patrem nuncupat. Sed nec Dii, nec homines, aut ipsam, aut stirpem a crudelitate regia vindicant. sacerdos vincula in custodiam datur; pueros in profluentem aquam mitti iubet. Forte quadam divinitus super ripas Tiberis effusus lenibus stagnis, nec adiri usquam ad iusti cursum poterat amnis; et, posse quamvis languida mergi aqua infantes, spem ferentibus dabat, ita velut defuncti regis imperio, in proxima adluvie, ubi nunc ficus Ruminalis est, (Romularem vocatam ferunt) pueros exponunt. Vastae tum in iis locis solitudines erant. Tenet fama, quum fluitantem alveum, quo expositi erant pueri, tenuis in sicco aqua destituisset, lupam sitientem ex montibus, qui



circa sunt, ad puerilem vagitum cursum flexisse: eam submissas infantibus adeo mitem prae buisse mammas, ut lingua lambentem pueros magister regii pecoris invenerit. Faustulo fuisse nomen ferunt. Ab eo ad stabula Larentiae uxori educandos latos. Sunt, qui Larentiam, vulgato corpore, lupam inter pastores vocatam putent; inde locum fabulae ac miraculo datum. Ita geniti, itaque <sup>g)</sup> educati, quum primum adolevit aetas, nec in stabulis, nec ad pecora segnes, venando peragrarere circa saltus. Hinc, robore corporibus animisque sumto, iam non feras tantum subsistere, sed in latrones, praeda onustos, in petus facere, pastoribusque rapta dividere: et cum his, crescente in dies grege iuvenum, seria ac iocos celebrare.

V. Iam tum in Palatino monte Lupercal hoc fuisse ludicrum ferunt, et a Pallanteo, urbe Arcadica, Pallantium, dein Palatium <sup>h)</sup>, montem adpellatum. Ibi Euandrum, qui ex eo genere Arcadum multis ante tempestatibus tenuerat <sup>i)</sup> loca, sollemne adlatum ex Arcadia instituisse, ut nudi iuvenes, Lyceum Pana venerantes, per lusum atque lasciviam currerent; quem Romani deinde vocarunt Inuum. Huic deditis ludicro, quum sollemne notum esset, insidiosos ob iram praedae amissae latrones, quum Romulus vi se defendisset, Remum cepisse; captum regi Amulio tradidisse, ultro accusantes. Crimini maxime dabant, in Numitoris agros ab his in petum fieri: inde eos, conlecta iuvenum manu, hostilem in modum praedas agere. sic Numitori ad supplicium Remus deditur. Iam inde ab initio Faustulo spes fuerat, regiam stirpem apud se educari; nam et expositos iussu regis infantes sciebat, et tempus, quò ipse eos sustulisset,

g) ita Gron. Crev.

i) ea tenuerat Gron. tenuerit

h) Palatium, deinde Palati. Crev.  
num Eaed.

ad id ipsum congruere; sed rem inmaturam, nisi aut per occasionem, aut per necessitatem, aperiri noluerat. necessitas prior venit. ita, metu subactus, Romulo rem aperit. Forte et Numitori, quum in custodia Remum haberet, audissetque, geminos esse fratres, comparando et aetatem eorum, et ipsam minime servilem indolem, tetigerat animum memoria nepotum: sciscitandoque eo demum <sup>k)</sup> pervenit, ut haud procul esset, quin Remum agnosceret. Ita undique regi dolus nequitur. Romulus, non cum globo iuvenum, (nec enim erat ad vim apertam par) sed aliis alio itinere iussis certo tempore ad regiam venire pastoribus, ad regem inpetum facit: et a domo Numitoris alia comparata manu adjuvat Remus, ita regem obtruncant.

VI. Numitor, inter primum tumultum hostes invasisse urbem atque adortos regiam dictitans, quum pubem Albanam in arcem praesidio armisque obtinendam avocasset; postquam <sup>l)</sup> iuvenes, perpetrata caede, pergere ad se gratulantes vidit, extemplo advocato concilio, scelera in se fratris, originem nepotum, ut geniti, ut educati, ut cogniti essent, caedem deinceps tyranni, seque eius auctorem ostendit. Iuvenes, per mediam concionem agmine ingressi, quum avum regem salutassent, secuta ex omni multitudine consentiens vox ratum nomen imperiumque regi effecit. Ita Numitori Albana permissa re, Romulum Remumque cupido cepit, in iis locis, ubi expositi, ubique educati erant, urbis condendae. et supererat multitudo Albanorum Latinorumque. ad id pastores quoque accesserant, qui omnes facile spem facerent, parvam Albam, parvum Lavinium prae ea urbe, quae conderetur, fore. Intervenit deinde his

k) eodem Gron. Crev. c. Drak.

l) Pro *postquam* Gron. et Crev. *propemodum* semper exhibent *posteaquam*. Id in uni-

versum monuisse satius, opinor, erit, quam taedium lectoribus eadem adnotatione prope singulis paginis excitare.

cogitationibus avitum malum, regni cupido, atque inde foedum certamen coortum a satis miti principio <sup>m)</sup>). Quoniam gemini essent, nec aetatis verecundia discrimen facere posset, ut Dii, quorum tutelae ea loca essent, auguriis legerent, qui nomen novae urbi daret, qui conditam imperio regeret, Palatium <sup>n)</sup>) Romulus, Remus Aventinum ad inaugurandum templa capiunt.

VII. Priori Remo augurium venisse fertur, sex vultures: iamque, nunciato augurio, quum duplex numerus Romulo se ostendisset, utrumque regem sua multitudo consalutaverat. tempore illi praecepto, at hi numero avium, regnum trahebant. Inde, cum altercatione congressi, certamine irarum ad caedem vertuntur. ibi in turba ictus Remus cecidit. Vulgatio-  
 gator fama est, ludibrio fratris Remum novos transiluisse muros: inde ab irato Romulo (quum verbis quoque increpitans adiecisset, *Sic deinde, quicumque alius transiliet moenia mea*) interfectum. Ita solus potitus imperio Romulus; condita urbs conditoris *Roma* nomine adpellata. Palatium primum, in quo ipse *cond. Ol.*  
 erat educatus, muniit: sacra Diis aliis Albano ritu, *VII. 1. 2.*  
 Graeco Herculi, ut ab Euandro instituta erant, facit. *ante C. N.*  
 Herculem <sup>o)</sup>) in ea loca, Geryone interemto, boves mira specie abegisse memorant, ac prope Tiberim fluvium, qua, prae se armentum agens, nando traiecerat, loco herbido, ut quiete et pabulo laeto reficeret boves, et ipsum fessum via procubuisse. ibi quum eum, cibo vinoque gravatum, sopor obpressisset, pastor adcola eius loci, nomine Cacus, ferox *75<sup>1</sup>.*

m) principio. Hic minorem interpunctionem habet Gron. coniuncta ora ione ad *regeret* usque. Ibi autem maior interpunctio dirimit orationem. [Eodem modo Crev. quoque hunc locum distinguit.]

n) Palatinum Gron. Crev.

o) *Herculem etc.* Hic initium capitis septimi fecit Creverius. Similes variationes, in sequentibus, ne tanti quidem plerumque momenti, notare non placuit.

viribus, captus pulchritudine boum, quum avertere eam praedam vellet; quia, si agendo armentum in speluncam compulisset, ipsa vestigia quaerentem dominum eo deductura erant; aversos boves, eximium quemque pulchritudine, caudis in speluncam traxit. Hercules, ad primam auroram somno excitus, quum gregem perlustrasset oculis, et partem abesse numero sensisset, pergit ad proximam speluncam, si forte eo vestigia ferrent. quae ubi omnia foras versa vidit, nec in partem aliam ferre, confusus atque incertus animi, ex loco infesto agere porro armentum coepit. Inde quum actae boves quaedam ad desiderium, ut fit, relictarum mugissent, reddita inclusarum ex spelunca boum vox Herculem convertit. quem quum vadentem ad speluncam Cacus vi prohibere conatus esset; ictus clava, fidem pastorum nequidquam invocans, morte occubuit. Euander tum ea, profugus ex Peloponneso, auctoritate magis, quam imperio, regebat loca: venerabilis vir miraculo literarum, rei novae inter rudes artium homines; venerabilior divinitate credita Carmentae matris, quam fatiloquam, ante Sibyllae in Italiam adventum, miratae hae gentes fuerant. Is tum Euander, concursu pastorum, trepidantium circa advenam manifestae reum caedis, excitus, postquam facinus facinorisque caussam audivit, habitum formamque viri aliquantum ampliorem augustioremque humana intuens, rogitat, qui vir esset? Ubi nomen patremque ac patriam accepit; *Iove nate, Hercules, salve*, inquit; *te mihi mater, veridica interpres Deum, aucturum coelestium numerum cecinit; tibi que aram hic dicatum iri, quam opulentissima olim in terris gens Maximam vocet, tuoque ritu colat.* Dextra Hercules data, *accipere se omen inpleturumque fata, ara condita atque dicata*, ait. Ibi tum primum bove eximia capta de grege sacrum Hercoli, adhibitjs ad ministerium



dapemque Potitiis ac Pinariis, quae tum familiae maxime inclitae ea loca incolebant, factum. Forte ita evenit, ut Potitii ad tempus praesto essent, iisque exta adponerentur; Pinarii, extis adesis, ad ceteram venirent dapem. inde institutum mansit, donec Pinarium genus fuit, ne extis sollemnium vescerentur. Potitii, ab Euandro edocti, antistites sacri eius per multas aetates fuerunt: donec, tradito servis publicis sollemni familiae ministerio, genus omne Potitiorum interiit. Haec tum sacra Romulus una ex omnibus peregrina suscepit; iam tum immortalitatis virtute partae, ad quam eum sua fata ducebant, fautor.

VIII. Rebus divinis rite perpetratis, vocataque ad concilium multitudine, quae coalescere in populi unius corpus nulla re, praeterquam legibus, poterat, iura dedit: quae ita sancta generi hominum agresti fore ratus, si se ipse venerabilem insignibus imperii fecisset, quum cetero habitu se augustiorem, tum maxime lictoribus duodecim sumtis, fecit. Alii ab numero avium, quae augurio regnum portenderant, eum secutum numerum putant. me haud poenitet eorum sententiae esse, quibus et adparitores et hoc genus ab Etruscis finitimis, unde sella curulis, unde toga praetexta sumta est, numerum quoque ipsum ductum placet: et ita habuisse Etruscos, quod, ex duodecim populis communiter creato rege, singulos singuli populi lictores dederint. Crescebat interim urbs, munitionibus alia atque alia adpetendo loca, quum<sup>p)</sup> in spem magis futurae multitudinis, quam ad id, quod tum hominum erat, munirent. Deinde, ne vana urbis magnitudo esset, adliciendae<sup>q)</sup> multitudinis caussa, vetere consilio condentium urbes, qui, obscuram atque humilem conciendo ad se multitudi-

p) quum alia a. a. loca, in  
spem etc. Gron. Crev.

q) adliciendae Eaed. c. Drak.

nem, natam e terra sibi prolem ementiebantur; locum, qui nunc septus descendantibus inter duos lucos est, Asylum aperit. eo ex finitimis populis turba omnis sine discrimine, liber an servus esset, avida novarum rerum perfugit: idque primum ad coeptam magnitudinem roboris fuit. Quum iam virium haud poeniteret, consilium deinde viribus parat. centum creat senatores: sive quia is numerus satis erat; sive quia soli centum erant, qui creari Patres possent. Patres certe ab honore, patriciique progenies eorum adpellati.

IX. Iam res Romana adeo erat valida, ut cuilibet finitimarum civitatum bello par esset; sed, penuria mulierum, hominis aetatem duratura magnitudo erat. quippe quibus nec domi spes prolis, nec cum finitimis connubia essent. Tum ex consilio Patrum Romulus legatos circa vicinas gentes misit, qui societatem connubiumque novo populo peterent. *Urbes quoque, ut cetera, ex infimo nasci: deinde, quas sua virtus ac Dii iuvent, magnas opes sibi magnumque nomen facere. Satis scire, origini Romanae et Deos adfuisse, et non defuturam virtutem. proinde ne gravarentur homines cum hominibus sanguinem et genus miscere.* Nusquam benigne legatio audita est: adeo simul spernebant, simul tantam in medio crescentem molem sibi ac posteris suis metuebant. A plerisque rogitantibus dimissi, *Ecquod feminis quoque asylum aperuissent? id enim demum compar connubium fore.* Aegre id Romana pubes passa, et haud dubie ad vim spectare res coepit. cui tempus locumque aptum ut daret Romulus, aegritudinem animi dissimulans, ludos ex industria parat, Neptuno Equestri sollemnes: Consualia vocat. Indici deinde finitimis spectaculum iubet: quantoque adparatu tum sciebant, aut poterant, concelebrant; ut rem claram expectatam-

que facerent. Multi mortales convenere, studio etiam videndae novae urbis; maxime proximi quique, Caeninenses, Crustumini, Antemnates. Iam Sabinorum omnis multitudo, cum liberis ac coniugibus, venit. invitati hospitaliter per domos, quum situm moeniaque et frequentem tectis urbem vidissent, mirantur, tam brevi rem Romanam crevisse. Ubi <sup>U. c. 4.</sup> <sup>a. C. 748.</sup> spectaculi tempus venit, deditaeque eo mentes cum oculis erant, tum ex composito orta vis: signoque dato inventus Romana ad rapiendas virgines discurret: magna pars forte, ut in quem quaeque inciderat, raptae; quasdam forma eccellente, primoribus Patrum destinatas, ex plebe homines, quibus datum negotium erat, domos deferebant. Unam, longe ante alias specie ac pulchritudine insignem, a globo Talassii cuiusdam raptam ferunt. multisque sciscitantibus, cuinam eam ferrent, identidem, ne quis violaret, Talassio ferri clamitatum. inde nuptialem hanc vocem factam. Turbato per metum ludicro, moesti parentes virginum profugiunt, incusantes violati hospitii foedus, Deumque invocantes, cuius ad sollemne ludosque, per fas ac fidem decepti, venissent. Nec raptis aut spes de se melior, aut indignatio est <sup>r)</sup> minor: sed ipse Romulus circuibat, docebatque: *patrum id superbia factum, qui connubium finitimis negassent: illas tamen in matrimonio, in societate fortunarum omnium civitatisque, et, quo nihil carius humano generi sit, liberum fore. Mollirent modo iras; et, quibus fors corpora dedisset, darent animos. Saepe ex iniuria postmodum gratiam ortam: eoque melioribus usuras viris, quod adniscurus pro se quisque sit, ut, quum suam vicem functus officio sit, parentum etiam patriaeque expleat desiderium. Accedebant blanditiae virorum, factum purgantium cupi-*

<sup>r)</sup> est del. Gron.

ditate atque amore: quae maxime ad muliebre ingenium efficaces preces sunt.

X. Iam admodum mitigati animi raptis erant: at raptarum parentes tum maxime sordida veste lacrimisque et querelis civitates concitabant. nec domi tantum indignationes continebant, sed congregabantur undique ad Titum Tatium, regem Sabinorum: et legationes eo, quod maximum Tatii nomen in his regionibus erat, conveniebant. Caeninenses Crustumini et Antemnates erant, ad quos eius iniuriae pars pertinebat. Lente agere iis Tatius Sabinique visi sunt. Ipsi inter se tres populi communiter bellum parant. Ne Crustumini quidem atque Antemnates, pro ardore iraque Caeninensium, satis se inpigre movent. ita per se ipsum nomen Caeninum in agrum Romanum inpetum facit. Sed effuse vastantibus fit obvius cum exercitu Romulus, levique certamine docet, vanam sine viribus iram esse: exercitum fundit fugatque: fustum persequitur: regem in proelio obtruncat et spoliatur. duce hostium occiso, urbem primo inpetu capit. Inde exercitu victore reducto, ipse quum factis vir magnificus, tum factorum ostentator haud minor, spolia ducis hostium caesi suspensa fabricato ad id apte ferculo gerens, in Capitolium adscendit: ibique ea quum ad quercum pastoribus sacram deposuisset, simul cum dono designavit templo Iovis fines, cognomenque addidit Deo: *Iupiter Feretri*, inquit, *haec tibi victor Romulus rex regia arma fero, templumque iis regionibus, quas modo animo metatus sum, dedico, sedem opimis spoliis, quae, regibus ducibusque hostium caesis, me auctorem sequentes, posteri ferent.* Haec templi est origo, quod primum omnium Romae sacratum est. ita deinde Diis visum, nec irritam conditoris templi vocem esse, qua laturos ea spolia posteros nuncupavit: nec, multitudine compotum eius doni vulgari laudem. bina



postea, inter tot annos, tot bella, opima parta sunt spolia. adeo rara eius fortuna decoris fuit.

XI. Dum ea ibi Romani gerunt, Antemnatum exercitus per occasionem ac solitudinem hostiliter in fines Romanos incursionem facit. raptim et ad hos Romana legio ducta palatos <sup>s)</sup> in agris obpressit. Fusi igitur primo inpetu et clamore hostes: oppidum captum. duplicique victoria ovantem Romulum Hersilia coniux, precibus raptarum fatigata, orat, ut parentibus earum det veniam, et in civitatem accipiat: ita rem coalescere concordia posse. facile inpetratum. Inde contra Crustumino profectus, bellum inferentes. Ibi minus etiam, quod <sup>t)</sup> alienis cladibus ceciderant animi, certaminis fuit. Utroque coloniae missae. plures inventi, qui propter ubertatem terrae in Crustumino nomina darent. et Romam inde <sup>U. c. 5.</sup> frequenter migratum est, a parentibus maxime ac <sup>a. C. 747.</sup> propinquis raptarum. Novissimum ab Sabinis bellum ortum, multoque id maximum fuit. nihil enim per iram aut cupiditatem actum est: nec ostenderunt bellum prius, quam intulerunt. Consilio etiam additus dolus. Sp. Tarpeius Romanae praeerat arci. Huius filiam virginem auro corrumpit Tati, ut armatos in arcem accipiat. aquam forte ea tum sacris extra moenia petitem ierat. Accepti obrutam armis necavere: seu ut vi capta potius arx videretur, seu prodendi exempli causa, ne quid usquam fidum proditori esset. Additur fabulae <sup>u)</sup>, quod vulgo Sabini aureas armillas magni ponderis brachio laevo, gemmatosque magna specie annulos habuerint, pepigisse eam, quod in sinistris manibus haberent; eo scuta illi pro aureis donis congesta. Sunt, qui eam ex pacto tradendi, quod in sinistris manibus esset, di-

s) *palantes* Gron. Crev.

t) *quod iam* Eaed.

u) *fabula* Eaed.

recto arma petisse dicant: et fraude visam agere, sua ipsam pereintam mercede.

XII. Tenuere tamen arcem Sabini: atque inde postero <sup>x)</sup> die, quum Romanus exercitus instructus, quod inter Palatinum Capitolinumque collem campi est, complexisset, non prius descenderunt in aequum, quam, ira et cupiditate recuperandae arcis stimulante animos, in adversum Romani subiere. Principes utrimque pugnam ciebant; ab Sabinis Mettus <sup>y)</sup> Curtius, ab Romanis Hostus Hostilius. hic rem Romanam iniquo loco ad prima signa animo atque audacia sustinebat. Ut Hostus cecidit, confestim Romana inclinatur acies; fusaque est ad veterem portam Palatii. Romulus, et ipse turba fugientium actus, arma ad coelum tollens, *Iupiter, tuis, inquit, iussus avibus hic in Palatio* <sup>z)</sup> *prima urbi fundamenta ieci. arcem iam, scelere emtam, Sabini habent. inde huc armati, superata media valle, tendunt. At tu, pater Deum hominumque, hinc saltem arce hostes: deme terrorem Romanis, fugamque foedam siste. Hic ego tibi templum Statori Iovi, quod monumentum sit posteris, tua praesenti ope servatam urbem esse, voveo. Haec precatus, veluti si* <sup>a)</sup> *sensisset auditas preces, Hinc, inquit, Romani, Iupiter optimus maximus resistere atque iterare pugnam iubet. Restitere Romani, tamquam coelesti voce iussi. ipse ad primores Romulus provolat. Mettus Curtius ab Sabinis princeps ab arce decucurrerat, et effusos egerat Romanos, toto quantum foro spatium est. nec procul iam a porta Palatii erat, clamitans, Vicinus perfidos hospites, inbelles hostes. Iam sciunt, longe aliud esse virgines*

<sup>x)</sup> *Postera* Gron. Crev.

<sup>y)</sup> *Mettius*. Sic semper Eaed. [At Gronov. in Erratorum indice: *Mettius* l. *Mettus*. Idem ibidem monuit, etiam in Epit. huius libri *Metti*

pro *Mettii* legendum esse. Sed ad Lib. VII, 6. ubi in Ed. Gron. *Metio* exstat, in Errat. ind. legitur: *Metio* l. *Mettio*.]

<sup>z)</sup> *Palatino* Eaed.

<sup>a)</sup> *si del.* Eaed..

*rapere, aliud pugnare cum viris.* In eum, haec gloriantem, cum globo ferocissimorum iuvenum Romulus inpetum facit. Ex equo tum forte Mettus pugnabat: eo pelli facilius fuit: pulsum Romani persequuntur. et alia Romana acies, audacia regis accensa, fundit Sabinos. Mettus in paludem sese, strepitu sequentium trepidante equo, coniecit: adverteratque ea res etiam Sabinos tanti periculo viri. Et ille quidem, adniventibus ac vocantibus suis, favore multorum addito animo, evadit. Romani Sabinique in media convalle duorum montium redintegrant proelium. sed res Romana erat superior.

XIII. Tum Sabinæ mulieres, quarum ex iniuria bellum ortum erat, crinibus passis scissaque veste, victo malis muliebri pavore, ausae se inter tela volantia inferre, ex transverso inpetu facto, dirimere infestas acies, dirimere iras; hinc patres, hinc viros orantes, *ne se sanguine nefando soceri generique respergerent: ne parricidio macularent partus suos, nepotum illi, liberum hi progeniem. Si adfinitatis inter vos, si connubii piget, in nos vertite iras: nos caussa belli, nos vulnere ac caedium viris ac parentibus sumus. melius peribimus, quam sine alteris vestrum viduae aut orbae vivemus.* Movet res tum multitudinem, U. c. 7. tum duces. Silentium et repentina fit quies. inde <sup>a.</sup> C. 745. ad foedus faciendum duces prodeunt: nec pacem modo, sed et civitatem unam ex duabus faciunt: regnum consociant, imperium omne conferunt Romam. Ita geminata urbe, ut Sabinis tamen aliquid daretur, Quirites a Curibus adpellati. monumentum eius pugnae, ubi primum ex profunda emersus palude equus Curtium in vado statuit, Curtium lacum adpellarunt. Ex bello tam tristi laeta repente pax cariores Sabinas viris ac parentibus, et ante omnes Romulo ipsi, fecit. Itaque, quum populum in curias triginta divideret, nomina earum curiis inposuit. Id non traditur, quum

haud dubie aliquanto numerus maior hoc mulierum fuerit, aetate, an dignitatibus suis virorumve, an sorte lectae sint, quae nomina curiis darent. Eodem tempore et centuriae tres equitum conscriptae sunt, Ramnenses ab Romulo, ab Tito Tatio Titienses adpel-  
lati. Lucerum nominis et originis caussa incerta est. Inde non modo commune, sed concors etiam, regnum duobus regibus fuit.

U. c. 12. XIV. Post aliquot annos propinqui regis Tatii le-  
a. C. 740. gatos Laurentium pulsant. quumque Laurentes iure gentium agerent, apud Tatium gratia suorum et preces plus poterant. Igitur illorum poenam in se vertit. nam Lavinii, quum ad sollemne sacrificium eo venisset, concursu facto, interficitur. Eam rem minus aegre, quam dignum erat, tulisse Romulum ferunt. seu ob infidam societatem regni, seu quia haud iniuria caesum credebat. Itaque bello quidem abstinit: ut tamen expiarentur legatorum iniuriae regisque caedes, foedus inter Romam Laviniumque urbes renovatum est. Et cum his quidem insperata pax erat: aliud multo propius, atque in ipsis prope portis, bellum ortum. Fidenates, nimis vicinas prope se convalescere opes rati, priusquam tantum roboris esset, quantum futurum adparebat, occupant bellum facere. iuventute armata inmissa, vastatur agri, quod inter urbem ac Fidenas est. Inde ad laevam versi, quia dextra Tiberis arcebat, cum magna trepidatione agrestium populantur: tumultusque repens, ex agris in urbem inlatus, pro nuncio fuit. Excitus Romulus (neque enim dilationem pati tam vicinum bellum poterat) exercitum educit: castra a Fidenis mille passuum locat. ibi modico praesidio relicto, egressus omnibus copiis, partem militum locis circa densa ob-  
sita virgulta obscuris subsidere in insidiis iussit; cum parte maiore atque omni equitatu profectus, id quod quaerebat, tumultuoso et minaci genere pugnae, ad-



equitando ipsis prope portis, hostem excivit; fugae quoque, quae simulanda erat, eadem equestris pugna causam minus mirabilem dedit. et quum, velut inter pugnae fugaeque consilium trepidante equitatu, pedes quoque referret gradum, plenae repente portis effusi hostes impulsa Romana acie, studio instandi sequendique trahuntur ad locum insidiarum. Inde subito exorti Romani transversam invadunt hostium aciem. Addunt pavorem nota e castris signa eorum, qui in praesidio relictii fuerant. ita multiplici terrore perculsi Fidenates, prius pene quam Romulus, qui cum eo equis ierant, circumagerent frenis equos, terga vertunt: multoque effusius, (quippe vera fuga) qui simulantes paullo ante secuti erant, oppidum repetebant. non tamen eripuerunt se hosti: haerens in terga Romanus, prius quam fores portarum obicerentur, velut agmine uno inrumpit.

XV. Belli Fidenatis contagione irritati Veientium animi et consanguinitate, (nam Fidenates quoque Etrusci fuerunt) et quod ipsa propinquitas loci, si Romana arma omnibus infesta finitimis essent, stimulabat, in fines Romanos excucurrerunt, populabundi magis, quam iusti more belli. Itaque non castris positis, non exspectato hostium exercitu, raptam ex agris praedam portantes, Veios redire: Romanus contra, postquam hostem in agris non invenit, dimicationi ultimae instructus intentusque, Tiberim transit. quem postquam castra ponere, et ad urbem accessurum Veientes audire; obviam egressi, ut potius acie decernerent, quam inclusi de tectis moenibusque dimicarent. Ibi, viribus nulla arte adiutis, tantum veterani robore exercitus rex Romanus vicit: persecutusque fusos ad moenia hostes, urbe valida muris ac situ ipso munita abstinuit: agros rediens vastat, ulciscendi magis, quam praedae, studio. Ea-que clade, haud minus quam adversa pugna, subacti

Veientes pacem petitum oratores Romam mittunt. Agri parte multatis in centum annos induciae datae. Haec ferme, Romulo regnante, domi militiaeque gesta: quorum nihil absonum fidei divinae originis divinitatisque post mortem creditae fuit; non animus in regno avito recuperando, non condendae urbis consilium, non bello ac pace firmandae. ab illo enim profectu viribus datis tantum valuit, ut in quadraginta deinde annos tutam pacem haberet. multitudini tamen gratior fuit, quam Patribus; longe ante alios acceptissimus militum animis. trecentosque armatos ad custodiam corporis, quos Celeres adpellavit, non in bello solum, sed etiam in pace, habuit.

U. c. 37.  
a. C. 715.

XVI. His immortalibus editis operibus, quum ad exercitum recensendum concionem in campo ad Caprae paludem haberet, subito coorta tempestas cum magno fragore tonitribusque tam denso regem operuit nimbo, ut conspectum eius concioni abstulerit. nec deinde in terris Romulus fuit. Romana pubes, sedato tandem pavore, postquam ex tam turbido die serena et tranquilla lux rediit, ubi vacuam sedem regiam vidit, etsi satis credebat Patribus, qui proximi steterant, sublinem raptum procella; tamen, velut orbitatis metu icta, moestum aliquamdiu silentium obtinuit. Deinde, a paucis initio facto, Deum Deo natum, regem, parentemque urbis Romanae salvere universi Romulum iubent. pacem precibus exposcunt, uti volens propitius suam semper sospitet progeniem. Fuisse credo tum quoque aliquos, qui discerptum regem Patrum manibus taciti arguerent: manavit enim haec quoque, sed perobscura, fama. Illam alteram admiratio viri et pavor praesens nobilitavit. Consilio etiam unius hominis addita rei dicitur fides. namque Proculus Iulius, sollicita civitate desiderio regis, et infensa Patribus, gravis, ut traditur, quamvis magnae rei auctor, in concionem prodit. *Romulus,*

inquit, *Quirites, parens urbis huius, prima hodierna luce coelo repente delapsus, se mihi obvium dedit. quum, perfusus horrore venerabundusque, adstitissem, petens precibus, ut contra intueri fas esset; abi, nuncia, inquit, Romanis, Coelestes ita velle, ut mea Roma caput orbis terrarum sit: proinde rem militarem colant: sciantque, et ita posteris tradant, nullas opes humanas armis Romanis resistere posse.* haec, inquit, locutus, sublimis abiit. Mirum, quantum illi viro, nuncianti haec, fidei <sup>b)</sup> fuerit; quamque desiderium Romuli apud plebem exercitumque, facta fide immortalitatis, lenitum sit.

XVII. Patrum interim animos certamen regni ac cupido versabat. nec dum a singulis, quia nemo magnopere eminebat in novo populo, pervenerant factiones: inter ordines certabatur. oriundi ab Sabinis, ne, quia post Tatii mortem ab sua parte non erat regnatum, in societate aequa possessionem imperii amitterent, sui corporis creari regem volebant. Romani veteres peregrinum regem adspernabantur. In variis voluntatibus regnari tamen omnes volebant, libertatis dulcedine nondum experta. Timor deinde Patres incessit, ne civitatem sine imperio, exercitum sine duce, multarum circa civitatum irritatis animis, vis aliqua externa adoriretur. et esse igitur aliquod caput placebat; et nemo alteri concedere in animum inducebat. Ita <sup>c)</sup> rem inter se centum Patres, decem decuriis factis, singulisque in singulas decurias creatis, qui summae rerum praeessent, consociant. U. c. 58. decem imperitabant, unus cum insignibus imperii et <sup>a.</sup> C. 714. lictoribus erat: quinque dierum spatium finiebatur imperium, ac per omnes in orbem ibat: annumque intervallum regni fuit. id ab re, quod nunc quoque tenet nomen, Interregnum adpellatum. Fremere de-

b) fides Gron. Crev.

c) Itaque Eaed.

inde plebs; multiplicatam servitutem, centum pro uno dominos factos: nec ultra nisi regem, et ab ipsis creatum, videbantur passuri. Quum sensissent ea moveri Patres, obferendum ultro rati, quod amissuri erant, ita gratiam ineunt, summa potestate populo permissa, ut non plus darent iuris, quam detinerent <sup>d)</sup>. decreverunt enim, ut, quum populus regem iussisset, id sic ratum esset, si Patres auctores fierent: hodieque in legibus magistratibusque rograndis usurpatur idem ius, vi ademta. priusquam populus suffragium ineat, in incertum comitiorum eventum Patres auctores fiunt. Tum interrex, concione advocata: *Quod bonum, faustum, felixque sit, inquit, Quirites, regem create; ita Patribus visum est. Patres deinde, si dignum, qui secundus ab Romulo numeretur, crearitis, auctores fient.* Adeo id gratum plebi fuit, ut, ne victi beneficio viderentur, id modo sciscerent iuberentque, ut senatus decerneret, qui Romae regnaret.

XVIII. Inclita iustitia religioque ea tempestate Numae Pompilii erat. Curibus Sabinis habitabat, consultissimus vir, ut in illa quisquam aetate esse poterat, omnis divini atque humani iuris. Auctorem doctrinae eius, quia non exstat alius, falso Samium Pythagoran edunt: quem, Servio Tullio regnante Romae, centum amplius post annos, in ultima Italiae ora, circa Metapontum Heracleamque et Crotona, iuvenum aemulantium studia coetus habuisse constat. Ex quibus locis, etsi eiusdem aetatis fuisset, quae <sup>e)</sup> fama in Sabinos, aut quo linguae commercio, quemquam ad cupiditatem discendi excivisset? quove praesidio unus per tot gentes, dissonas sermone moribusque, pervenisset? Suapte igitur ingenio temperatum animum virtutibus fuisse opinor magis; instructum-

d) *retinerent* Gron. Crev.e) *qua* Eaed.



que non tam peregrinis artibus, quam disciplina tetrica ac tristi veterum Sabinorum. quo genere nulum quondam incorruptius fuit. Audito nomine Numae, Patres Romani, quamquam inclinari opes ad Sabinos, rege inde sumto, videbantur, tamen, neque se quisquam, nec factionis suae alium, nec denique Patrum aut civium quemquam praeferre illi viro ausi, ad unum omnes Numae Pompilio regnum defendendum decernunt. Adcitus, sicut Romulus augurato <sup>U. c. 39.</sup> urbe condenda regnum adeptus est, de se quoque <sup>a. C. 713.</sup> Deos consuli iussit. inde ab augure (cui deinde, honoris ergo, publicum id perpetuumque sacerdotium fuit) deductus in arcem, in lapide ad meridiem versus consedit. Augur ad laevam eius, capite velato, sedem cepit, dextra manu baculum sine nodo aduncum tenens, quem lituum adpellaverunt. inde ubi, prospectu in urbem agrumque capto, Deos precatus, regiones ab oriente ad occasum determinavit; dextras ad meridiem partes, laevas ad septentrionem esse dixit. Signum contra, quo longissime conspectum oculi ferebant, animo finivit. Tum, lituo in laevam manum translato, dextra in caput <sup>f)</sup> Numae inposita, precatus est ita: *Iupiter pater, si est fas, hunc Numam Pompilium, cuius ego caput teneo, regem Romae esse, uti tu signa nobis certa adclarassis inter eos fines, quos feci.* Tum peregit verbis auspicia, quae mitti vellet. quibus missis, declaratus rex Numa de templo descendit.

XIX. Qui, regno ita potitus, urbem novam; conditam vi et armis, iure eam legibusque ac moribus de integro condere parat. quibus quum inter bella adsuescere videret non posse, quippe efferatos militia, animos; mitigandum ferocem populum armorum desuetudine ratus, Ianum ad infimum Argiletum, in-

f) capite Gron.

dicem pacis bellicue, fecit: apertus ut in armis esse civitatem; clausus pacatos circa omnes populos significaret. Bis deinde post Numae regnum clausus fuit: semel T. Manlio consule, post Punicum primum perfectum bellum: iterum, quod nostrae aetati Dii dederunt, ut videremus, post bellum Actiacum, ab Imperatore Caesare Augusto, pace terra marique parata. Clauso eo, quum omnium circa finitunorum societate ac foederibus iunxisset animos, positus externorum periculorum curis, ne luxuriarentur otio animi, quos metus hostium disciplinaque militaris continuerat; omnium primum, rem ad multitudinem inperitam, et illis seculis rudem, efficacissimam, Deorum metum iniiciendum ratus est. qui quum descendere ad animos sine aliquo commento miraculi non posset, simulat sibi cum Dea Egeria congressus nocturnos esse: eius se monitu, quae acceptissima Diis essent, sacra instituere; sacerdotes suos cuique Deorum praeficere. Atque omnium primum, ad cursum lunae, in duodecim menses describit annum. quem (quia tricenos dies singulis mensibus luna non explet, desuntque dies solido anno, qui solstitiali circumagitur orbe) intercalaribus mensibus interponendis, ita dispensavit, ut quarto et vigesimo anno ad metam eandem solis, unde orsi essent, plenis annorum omnium spatiis dies congruerent. Idem nefastos dies fastosque fecit, quia aliquando nihil cum populo agi utile futurum erat.

XX. Tum sacerdotibus creandis animum adiecit, quamquam ipse plurima sacra obibat, ea maxime, quae nunc ad Dialem flaminem pertinent. Sed, quia in civitate bellicosa plures Romuli, quam Numae, similes reges putabat fore, iturosque ipsos ad bella, nec sacra regiae vicis desererentur, flaminem Iovi adsiduum sacerdotem creavit, insignique eum veste et curuli regia sella adornavit. huic duos flamines ad-

iecit: Marti unum, alterum Quirino. Virginesque Vestae legit, Alba oriundum sacerdotium, et genti conditoris haud alienum. his, ut adsiduae templi antistites essent, stipendium de publico statuit: virginitate aliisque ceremoniis venerabiles ac sanctas fecit. Salios item duodecim Marti Gradivo legit, tunicaeque pictae insigne dedit, et super tunicam aeneum pectori tegumen: coelestiaque arma, quae ancilia appellantur, ferre, ac per urbem ire canentes carmina cum tripudiis sollemnique saltatu iussit. Pontificem deinde Numam Marcium, Marci filium, ex Patribus legit, eique sacra omnia exscripta exsignataque adtribuit; quibus hostiis, quibus diebus, ad quae templa sacra fierent, atque unde in eos sumtus pecunia erogaretur. Cetera quoque omnia publica privataque sacra pontifices scitis subiecit: ut esset, quo consultum plebes veniret; ne quid divini iuris, negligendo patrios ritus, peregrinosque adsciscendo, turbaretur. Nec coelestes modo ceremonias, sed iusta quoque funebria placandosque Manes, ut idem pontifex edoceret; quaeque prodigia, fulminibus aliove quo visu <sup>g)</sup> missa, susciperentur atque curarentur: ad ea elicienda ex mentibus divinis, Iovi Elicio aram in Aventino dicavit, Deumque consuluit auguriis, quae suscipienda essent.

XXI. Ad haec consultanda procurandaque, multitudine omni a vi et armis conversa, et animi aliquid agendo occupati erant, et Deorum adsidua insidens cura, quum interesse rebus humanis coeleste Numen videretur, ea pietate omnium pectora inbuerat, ut fides ac iusiurandum, proximo legum ac poenarum metu <sup>h)</sup>, civitatem regerent. et quum ipsi se homines in regis, velut unici exempli, mores formarent;

g) viso Gron. Crev.

h) proxime l. a. p. metum  
Eaed.

tum finitimi etiam populi, qui ante, castra, non urbem, positam in medio ad sollicitandam omnium pacem, crediderant, in eam verecundiam adducti sunt, ut civitatem, totam in cultum versam Deorum, violari ducerent nefas. Lucus erat, quem medium ex opaco specu fons perenni rigabat aqua. quo quia se persaepe Numa sine arbitris, velut ad congressum Deae, inferebat, Camenis eum lucum sacravit; quod earum ibi concilia cum coniuge sua Egeria essent. Et soli Fidei sollemne instituit. ad id sacrarium flamines bigis, curru arcuato, vehi iussit, manuque ad digitos usque involuta rem divinam facere: significantes fidem tutandam, sedemque eius etiam in dextris sacratam esse. Multa alia sacrificia locaque sacris faciendis, quae Argeos pontifices vocant, dedicavit. Omnium tamen maximum eius operum fuit tutela, per omne regni tempus, haud minor pacis, quam regni. Ita duo deinceps reges, alius alia via, ille bello, hic pace, civitatem auxerunt. Romulus septem et triginta regnavit annos: Numa tres et quadraginta. Tum valida, tum temperata et belli et pacis artibus, erat civitas.

U. c. 82.

a. C. 670.

XXII. Numae morte ad interregnum res rediit. Inde Tullum Hostilium, nepotem Hostilii, cuius in infima arce clara pugna adversus Sabinos fuerat, regem populus iussit. Patres auctores facti. Hic non solum proximo regi dissimilis, sed ferocior etiam Romulo fuit. tum aetas viresque, tum avita quoque gloria animum stimulabat. Senescere igitur civitatem otio ratus, undique materiam excitandi belli quaerebat. Forte evenit, ut agrestes Romani ex Albano agro, Albani ex Romano praedas in vicem agerent. Imperitabat tum C. Cluilius Albae. utrimque legati fere sub idem tempus ad res repetendas missi. Tullus praeceperat suis, ne quid prius, quam mandata, agerent. satis sciebat, negaturum Albanum;



ita pie bellum indici posse. Ab Albanis socordius res acta: excepti hospitio ab Tullo blande ac benigne, comiter regis convivium celebrant. tantisper Romani et res repetiverant priores, et neganti Albano bellum in trigesimum diem indixerant. haec renunciant Tullo. Tum legatis Tullus dicendi potestatem, quid petentes venerint, facit. illi, omnium ignari, primum purgando terunt tempus: *Se invitos quidquam, quod minus placeat Tullo, dicturos; sed imperio subigi: res repetitum se venisse. Ni reddantur, bellum indicere iussos.* Ad haec Tullus. *Nunciate, inquit, regi vestro, regem Romanum Deos facere testes, uter prius populus res repetentes legatos adspernatus dimiserit, ut in eum omnes expetant huiusce clades belli.*

XXIII. Haec nunciant domum Albani. Et bellum utrimque summa ope parabatur, civili simillimum bello, prope inter parentes natosque; Troianam utramque prolem, quum Lavinium ab Troia, ab Lavinio Alba, ab Albanorum stirpe regum oriundi Romani essent. Eventus tamen belli minus miserabilem dimicationem fecit: quod nec acie certatum est; et, tectis modo dirutis alterius urbis, duo populi in unum confusi sunt. Albani priores ingenti exercitu in agrum Romanum inpetum fecere. castra ab urbe haud plus quinque millia passuum locant, fossa circumdant: fossa Cluilia ab nomine ducis per aliquot secula adpellata est, donec cum re nomen quoque vetustate abolevit. In his castris Cluilius Albanus rex moritur; dictatorem Albani Mettum Fuffetium creant. Interim Tullus ferox, praecipue morte regis, magnumque Deorum numen, ab ipso capite orsum, in omne nomen Albanum expetiturum poenas ob bellum inpium dictitans, nocte, praeteritis hostium castris, infesto exercitu in agrum Albanum pergit. Ea res ab stativis excivit Mettum. ducit, quam proxime ad hostem potest; inde legatum praemissum nunciare

U. c. 85.

a. C. 667.

Tullo iubet, priusquam dimicent, opus esse conloquio: si secum congressus sit, satis scire, ea se adlaturum, quae nihilo minus ad rem Romanam, quam ad Albanum, pertineant. Haud adspernatus Tullus, tametsi vana adferebantur, in aciem<sup>i)</sup> educit. Exeunt contra et Albani. Postquam instructi utrimque stabant, cum paucis procerum in medium duces procedunt. Ibi infit Albanus: *Iniurias et non redditas res ex foedere, quae repetitae sint, et ego regem nostrum Cluiliū, causam huiusce esse belli, audisse videor: nec te dubito, Tulle, eadem prae te ferre. sed, si vera potius, quam dictu speciosa, dicenda sunt, cupido imperii duos cognatos vicinosque populos ad arma stimulat. Neque, recte, an perperam, interpreter: fuerit ista eius deliberatio, qui bellum suscepit. me Albani gerendo bello ducem creavere. Illud te, Tulle, monitum velim: Etrusca res, quanta circa nos teque maxime sit, quo propior es Etruscis<sup>k)</sup>, hoc magis scis. multum illi terra, plurimum mari pollent. Memor esto, iam, quum signum pugnae dabis, has duas acies spectaculo fore; ut fessos confectosque, simul victorem ac victum, adgrediantur. Itaque, si nos Dii amant, quoniam, non contenti libertate certa, in dubiam imperii servitiique aleam imus, ineamus aliquam viam, qua utri utris imperent, sine magna clade, sine multo sanguine utriusque populi, decerni possit. Haud displicet res Tullo, quamquam, tum indole animi, tum spe victoriae, ferocior erat. Quaerentibus utrimque ratio initur, cui et fortuna ipsa praebeuit materiam.*

XXIV. Forte in duobus tum exercitibus erant trigemini fratres, nec aetate, nec viribus dispare. Horatios Curiatiosque fuisse, satis constat; nec ferme res antiqua alia est nobilior. tamen in re tam clara

i) suos in aciem Gron.

k) quo propiores vos Gron.  
Crev. c. Drak.

nominum error manet; utrius populi Horatii, utrius Curiatii fuerint. Auctores utroque trahunt: plures tamen invenio, qui Romanos Horatios vocent. hos ut sequar, inclinat animus. Cum trigeminis agunt reges, ut pro sua quisque patria dimicent ferro. ibi imperium fore, unde victoria fuerit. nihil recusatur: tempus et locus convenit. Priusquam dimicarent, foedus ictum inter Romanos et Albanos est his legibus, ut, cuiusque populi cives eo certamine vicissent, is alteri populo cum bona pace imperitaret. Foedera alia aliis legibus, ceterum eodem modo omnia, fiunt. Tum ita factum accepimus, nec ullius vetustior foederis memoria est. Fecialis regem Tullum ita rogavit: *Iubesne me, Rex, cum patre patrato populi Albani foedus ferire?* iubente rege, *Sagmina*, inquit, *te, Rex, posco.* Rex ait, *Puram tollito.* Fecialis ex arce graminis herbam puram adtulit. postea regem ita rogavit: *Rex, facisne me tu regium nuncium populi Romani Quiritium? vasa, comitesque meos?* Rex respondit: *Quod sine fraude mea populi Romani Quiritium fiat, facio.* Fecialis erat M. Valerius. patrem patratum Sp. Fusium fecit, verbena caput capillosque tangens. Pater patratus ad iusiurandum patrandum, id est, sanciendum fit foedus; multisque id verbis, quae longo effata carmine non operae est referre, peragit. Legibus deinde recitatis: *Audi*, inquit, *Iupiter; audi, pater patrato populi Albani; audi tu, populus Albanus; ut illa palam prima postrema ex illis tabulis cerave recitata sunt sine dolo malo, utique ea hic hodie rectissime intellecta sunt, illis legibus populus Romanus prius non deficiet. Si prior defexit publico consilio, dolo malo; tu illo die, Iupiter, populum Romanum sic ferito, ut ego hunc porcum hic hodie feriam: tantoque magis ferito, quanto magis potes pollesque.* Id ubi dixit, porcum saxo silice percussit. Sua item carmina Albani suumque iusiuran-

dum per suum dictatorem suosque sacerdotes peregerunt.

XXV. Foedere icto, trigemini, sicut convenerat, arma capiunt. Quum sui utrosque adhortarentur, *Deos patrios patriam ac parentes, quidquid civium domi, quidquid in exercitu sit, illorum tunc arma, illorum intueri manus*: feroces et suoapte ingenio, et pleni adhortantium vocibus, in medium inter duas acies procedunt. Consederant utrimque pro castris duo exercitus, periculi magis praesentis, quam curae, expertes. quippe imperium agebatur, in tam paucorum virtute atque fortuna positum. itaque ergo erecti suspensique in minime gratum spectaculum animo intenduntur. Datur signum. infestisque armis, velut acies, terni iuvenes, magnorum exercituum animos gerentes, concurrunt: nec his, nec illis periculum suum; publicum imperium servitiumque obversatur animo. futuraque ea deinde patriae fortuna, quam ipsi fecissent. Ut primo statim concursu increpuere arma, micantesque fulsere gladii, horror ingens spectantes perstringit: et, neutro inclinata spe, torpebat vox spiritusque. Consertis deinde manibus, quum iam non motus tantum corporum, agitatioque anceps telorum armorumque, sed vulnera quoque et sanguis spectaculo essent; duo Romani, super alium alius, vulneratis tribus Albanis, exspirantes conruerunt. ad quorum casum quum conclamasset gaudio Albanus exercitus, Romanas legiones iam spes tota, nondum tamen cura, deseruerat, exanimes vice unius, quem tres Curiatii circumsteterant. Forte is integer fuit, ut universis solus nequaquam par, sic adversus singulos ferox. ergo, ut segregaret pugnam eorum, capessit fugam, ita ratus secuturos, ut quemque vulnerare adfectum corpus sineret. Iam aliquantum spatii ex eo loco, ubi pugnatum est, aufugerat, quum respiciens videt magnis intervallis sequentes: unum



haud procul ab sese abesse. in eum magno inpetu rediit <sup>1)</sup>). Et, dum Albanus exercitus inclamat Curiatiis, uti <sup>m)</sup>) opem ferant fratri, iam Horatius, caeso hoste victor, secundam pugnam petebat. tum clamore, qualis ex insperato faventium solet, Romani adiuvant militem suum: et ille defungi proelio festinat. Prius itaque, quam alter, qui nec procul aberat, consequi posset, et alterum Curiatium conficit. Iamque, aequato Marte, singuli supererant; sed nec spe, nec viribus pares. alterum, intactum ferro corpus et geminata victoria, ferocem in certamen tertium dabant: alter, fessum vulnere, fessum cursu trahens corpus, victusque fratrum ante se strage, victori obicitur hosti. nec illud proelium fuit. Romanus exsultans, *Duos, inquit, fratrum Manibus dedi: tertium causae belli huiusce, ut Romanus Albano imperet, dabo.* Male sustinenti arma gladium superne iugulo defigit: iacentem spoliat. Romani ovantes ac gratulantes Horatium accipiunt; eo maiore cum gaudio, quo prope metum res fuerat. Ad sepulturam inde suorum nequaquam paribus animis vertuntur; quippe imperio alteri aucti, alteri ditionis alienae facti. Sepulcra exstant, quo quisque loco cecidit. duo Romana uno loco propius Albam, tria Albana Romam versus; sed distantia locis, et ut <sup>n)</sup>) pugnatum est.

XXVI. Priusquam inde digrederentur, roganti Metto, ex foedere icto quid imperaret, imperat Tullus, uti iuventutem in armis habeat: usurum se eorum opera, si bellum cum Veientibus foret. ita exercitus inde domos abducti. Princeps Horatius ibat, trigemina <sup>o)</sup>) spolia prae se gerens: cui soror virgo, quae desponsa uni ex Curiatiis fuerat, obvia ante portam Capenam fuit: cognitoque super humeros fratris

1) *redit* Gron. Crev.  
m) *ut* Eaed.

n) *ut et* Gron.  
o) *trigemina* Gron. Crev.

paludamento sponsi, quod ipsa confecerat, solvit crines, et flebiliter nomine sponsum mortuum adpellat. Movet feroci iuveni animum comploratio sororis in victoria sua tantoque gaudio publico. Stricto itaque gladio, simul verbis increpans, transfigit puellam. *Abi hinc cum immaturo amore ad sponsum, inquit, oblita fratrum mortuorum vivique, oblita patriae. Sic eat, quaecumque Romana lugebit hostem. Atrox visum id facinus Patribus plebique: sed recens meritum facto obstabat. tamen raptus in ius ad regem. Rex, ne ipse tam tristis ingratiue ad vulgus iudicii, aut, secundum iudicium, supplicii auctor esset, concilio populi advocato, Duumviros, inquit, qui Horatio perduellionem iudicent, secundum legem facio. Lex horrendi carminis erat: Duumviri perduellionem iudicent. Si a duumviris provocarit, provocatione certato: si vincent, caput obnubito: infelici arbori reste suspendito: verberato vel intra pomoerium, vel extra pomoerium. Hac lege duumviri creati, qui se absolvere non rebantur ea lege, ne innoxium quidem, posse, quum condemnassent; tum alter ex his, P. Horati, tibi perduellionem iudico, inquit. I, licitor, conliga manus. Accesserat licitor, iniiciebatque laqueum. tum Horatius, auctore Tullo, clemente legis interprete, Provoco, inquit. ita de provocatione certatum ad populum est. Moti homines sunt in eo iudicio, maxime P. Horatio patre proclamante, se filiam iure caesam iudicare. ni ita esset, patrio iure in filium animadversurum fuisse. Orabat deinde, ne se, quem paullo ante cum egregia stirpe conspexissent, orbum liberis facerent. Inter haec senex, iuvenem amplexus, spolia Curiatorum fixa eo loco, qui nunc Pila Horatia adpellatur, ostentans, *Hunc-cine*, aiebat, *quem modo decoratum ovantemque victoria incedentem vidistis, Quirites, eum sub furca vinc-tum inter verbera et cruciatus videre potestis? quod vix**

*Albanorum oculi tam deforme spectaculum ferre possent. I, lictor, conliga manus, quae paullo ante armatae imperium populo Romano pepererunt. I, caput obnube liberatoris urbis huius: arbori infelici suspende: verbera, vel intra pomoerium, modo inter illa pila et spolia hostium; vel extra pomoerium, modo inter <sup>p)</sup> sepulcra Curiatorum. Quo enim ducere hunc iuvenem potestis, ubi non sua decora eum a tanta foeditate supplicii vindicent? Non tulit populus nec patris lacrimas, nec ipsius parem in omni periculo animum: absolveruntque admiratione magis virtutis, quam iure caussae. Itaque, ut caedes manifesta aliquo tamen piaculo lueretur, imperatum patri, ut <sup>q)</sup> filium expiaret pecunia publica. Is, quibusdam piacularibus sacrificiis factis, quae deinde genti Horatiae tradita sunt, transmisso per viam tigillo, capite adoperto, velut sub iugum misit iuvenem. Id hodie quoque publice semper reffectum manet. Sororium tigillum vocant. Horatiae sepulcrum, quo loco conruerat icta, constructum est saxo quadrato.*

**XXVII.** Nec diu pax Albana mansit. invidia vulgi, quod tribus militibus fortuna publica commissa fuerit, vanum ingenium dictatoris corripit; et, quoniam recta consilia haud bene evenerant, pravis reconciliare popularium animos coepit. Igitur, ut prius in bello pacem, sic in pace bellum quaerens, quia suae civitati animorum plus, quam virium, cernebat esse, ad bellum palam atque ex edicto gerendum <sup>r)</sup> alios concitat populos: suis per speciem societatis prodicionem reservat. Fidenates, colonia Romana, Veientibus sociis consilii adsumtis, pacto transitionis Albanorum ad bellum atque arma incitantur. Quum Fidenae aperte descissent, Tullus Metto, exercitu-

p) intra Gron. c. Drak.

q) ut del. Gron. Crev.

r) gerendum Crev.

que eius ab Alba adcito, contra hostes ducit. ubi Anienem transiit, ad confluentes conlocat castra. Inter eum locum et Fidenas Veientium exercitus Tiberim transierat. Ili et in acie prope flumen tenuere dextrum cornu: in sinistro Fidenates propius montes consistunt. Tullus adversus Veientem hostem dirigit suos: Albanos contra legionem Fidenatium conlocat. Albano non plus animi erat, quam fidei. nec manere ergo, nec transire aperte ausus, sensim ad montes succedit. Inde, ubi satis subisse sese ratus est, erigit totam aciem: fluctuansque animo, ut tereret tempus, ordines explicat. Consilium erat, qua fortuna rem daret, ea inclinare vires. Miraculo primo esse Romanis, qui proximi steterant, ut nudari latera sua sociorum digressu senserunt: inde eques citato equo nunciat regi, abire Albanos. Tullus in re trepida duodecim vovit Salios, fanaque Pallori ac Pavori. *equitem*, clara increpans voce, ut hostes exaudirent, *redire in proelium iubet: nihil trepidatione opus esse: suo iussu circumduci Albanum exercitum, ut Fidenatium nuda terga invadant.* idem imperat, ut hastas equites erigere iubeat. Id factum magnae partipeditum Romanorum conspectum abeuntis Albani exercitus intersepsit. qui viderant, id, quod ab rege auditum erat, rati, eo acrius pugnant. Terror ad hostes transit: et audiverant clara voce dictum, et magna pars Fidenatium, ut qui coloni additi Romanis essent, Latine sciebant. Itaque, ne subito ex collibus decursu Albanorum intercluderentur ab oppido, terga vertunt. Instat Tullus, fusoque Fidenatium cornu, in Veientem, alieno pavore perculsum, ferocior redit. Nec illi tulere inpetum: sed ab effusa fuga flumen obiectum a tergo arcebat. Quo postquam fuga inclinavit; alii, arma foede iactantes, in aquam caeci ruebant; alii, dum cunctantur in ripis, inter fugae pugnaeque consilium obpressi. Non alia ante Romana pugna atrocior fuit.



**XXVIII.** Tum Albanus exercitus, spectator certaminis, deductus in campos. Mettus Tullo devictos hostes gratulatur: contra Tullus Mettum benigne adloquitur. Quod bene vertat, castra Albanos Romanis castris iungere iubet: sacrificium lustrale in diem posterum parat. Ubi inluxit, paratis omnibus, ut adsolet, vocari ad concionem utrumque exercitum iubet. Praecones, ab extremo orsi, primos excivere Albanos. hi, novitate etiam rei moti, ut regem Romanum concionantem audirent, proximi constitere. Ex composito armata circumdatur Romana legio. centurionibus datum negotium erat, ut sine mora imperia exsequerentur. Tum ita Tullus infit: *Romani, si umquam ante alias ullo in bello fuit, quod primum Diis immortalibus gratias ageretis, deinde vestrae ipsorum virtuti, hesternum id proelium fuit. Dimicatum est enim non magis cum hostibus, quam, quae dimicatio maior atque s) periculosior est, cum proditione ac perfidia sociorum. Nam, ne vos falsa opinio teneat, iniussu meo Albani subiere ad montes: nec imperium illud meum, sed consilium et imperii simulatio fuit: ut nec, vobis ignorantibus deseri vos, averteretur a certamine animus; et hostibus, circumveniri se a tergo ratis, terror ac fuga iniiceretur. Nec ea culpa, quam arguo, omnium Albanorum est. ducem secuti sunt: ut et vos, si quo ego inde agmen declinare voluissem, fecissetis. Mettus ille est ductor itineris huius, Mettus idem huius machinator belli, Mettus foederis Romani Albanique raptor. Audeat deinde talia alius, nisi in hunc insigne iam documentum mortalibus dederō. Centuriones armati Mettum t) circumstant. rex cetera, ut orsus erat, peragit. Quod bonum, faustum, felixque sit populo Romano ac mihi, vobisque, Albani; populum omnem Albanum Romam traducere in animo est;*

s) ac Gron. Crev.

t) Mettum del. Gron.

*civitatem dare plebi; primores in patres legere; unam urbem, unam rempublicam facere. Ut ex uno quondam in duos populos divisa Albano res est, sic nunc in unum redeat. Ad haec Albana pubes, inermis ab armatis septa, in variis voluntatibus, communi tamen metu cogente, silentium tenet. Tum Tullus: Mette Fuffeti, inquit, si ipse discere posses fidem ac foedera servare, vivo tibi ea disciplina a me adhibita esset. Nunc quoniam tuum insanabile ingenium est, at tu tuo supplicio doce humanum genus ea sancta credere, quae a te violata sunt. Ut igitur paullo ante animum inter Fidenatem Romanamque rem ancipitem gessisti, ita iam corpus passim distrahendum dabis. Exinde, duabus adnotis quadrigis, in currus earum distentum inligat Mettum. deinde in diversum iter equi concitati, lacerum in utroque curru corpus, qua inhaeserant vinculis membra, portantes. Avertere omnes a tanta foeditate spectacula oculos. Primum ultimumque illud supplicium apud Romanos exempli parum memoris legum humanarum fuit. in aliis gloriari licet, nulli gentium mitiores placuisse poenas.*

U. o. 87.

a. G. 665.

XXIX. Inter haec iam praemissi Albani<sup>u)</sup> erant equites, qui multitudinem traducerent Romam. Legiones deinde ductae ad diruendam urbem. Quae ubi intravere portas, non quidem fuit tumultus ille, nec pavor, qualis captarum esse urbium solet; quum, effractis portis, stratisve ariete muris, aut arce vi capta, clamor hostilis et cursus per urbem armatorum omnia ferro flammaque miscet: sed silentium triste ac tacita moestitia ita defixit omnium animos, ut, prae metu obliti, quid relinquerent, quid secum ferrent, deficiente consilio, rogitantesque alii alios, nunc in liminibus starent, nunc errabundi domos suas, ultimum illud visuri, pervagarentur. Ut vero iam

u) *Albani* Gron.

equitum clamor exire iubentium instabat, iam fragor tectorum, quae diruebantur, ultimis urbis partibus audiebatur, pulvisque, ex distantibus locis ortus, velut nube inducta omnia inpleverat; raptim, quibus quisque poterat, elatis, quum larem ac penates tectaque, in quibus natus quisque educatusque esset, relinquentes exirent: iam continens agmen migrantium inpleverat vias: et conspectus aliorum mutua miseratione integrabat lacrimas. vocesque etiam miserabiles exaudiebantur; mulierum praecipue, quum obsessa ab armatis templa augusta praeterirent, ac velut captos relinquerent Deos. Egressis urbem Albanis, Romanus passim publica privataque omnia tecta adaequat solo, unaque hora quadringentorum annorum opus, quibus Alba steterat, excidio ac ruinis dedit. Templis tamen Deum (ita enim edictum ab rege fuerat) temperatum est,

XXX. Roma interim crescit Albae ruinis. duplicatur civium numerus. Coelius additur urbi mons; et, quo frequentius habitaretur, eam sedem Tullus regiae capit, ibique <sup>x)</sup> habitavit. Principes Albanorum in Patres, ut ea quoque pars reipublicae cresceret, legit Tullios <sup>y)</sup>, Servilios, Quinctios <sup>z)</sup>, Geganios, Curiatios, Cloelios: templumque ordini ab se aucto curiam fecit, quae Hostilia usque ad patrum nostrorum aetatem adpellata est. et, ut omnium ordinum viribus aliquid ex novo populo adiiceretur, equitum decem turmas ex Albanis legit. Legiones et veteres <sup>U. c. 100.</sup> eodem supplemento explevit, et novas scripsit. <sup>a. C. 652.</sup> Hac fiducia virium Tullus Sabinis bellum indicit, genti ea tempestate secundum Etruscos opulentissimae viris armisque. Utrunque iniuriae factae, ac res nequidquam erant repetitae. Tullus ad Feroniae fanum mercatu

x) add. *deinde* Gron. Crev. z) *Quintios* Eaed,

y) *Iulios* Eaed.

frequenti negotiatores Romanos comprehensos querebatur. Sabini suos prius in lucum confugisse ac Romae retentos. hae caussae belli ferebantur. Sabini, haud parum memores, et suarum virium partem Romae ab Tatio locatam, et Romanam rem nuper etiam adiectione populi Albani auctam, circumspicere et ipsi externa auxilia. Etruria erat vicina, proximi Etruscorum Veientes. Inde, ob residuas bellorum iras maxime sollicitatis ad defectionem animis, voluntarios traxere. et apud vagos quosdam ex inopi plebe etiam merces valuit. Publico auxilio nullo adiuti sunt. valuitque apud Veientes (nam de ceteris minus mirum est) pacta cum Romulo induciarum fides. Quum bellum utrinque summa ope pararent <sup>a)</sup>, vertique in eo res videretur, utri prius arma inferrent, occupat Tullus in agrum Sabinum transire. Pugna atrox ad silvam Malitiosam fuit. ubi et peditum quidem robore, ceterum equitatu aucto nuper, plurimum Romana acies valuit. Ab equitibus repente investitis turbati ordines sunt Sabinorum: nec pugna deinde illis constare, nec fuga explicari sine magna caede potuit.

**XXXI.** Devictis Sabinis, quum in magna gloria magnisque opibus regnum Tulli ac tota res Romana esset, nunciatum regi Patribusque est, in monte Albano lapidibus pluisse. Quod quum credi vix posset, missis ad id visendum prodigium, in conspectu, haud aliter quam quum gradinem venti glomeratam in terras agunt, crebri cecidere coelo lapides. Visi etiam audire vocem ingentem ex summi cacuminis luco, ut patrio ritu sacra Albani facerent, quae, velut Diis quoque simul cum patria relictis, oblivioni dederant: et aut Romana sacra susceperant, aut, fortunae, ut fit, obirati, cultum reliquerant Deum. Romanis quoque ab eodem prodigio novemdiale sacrum publice susceptum est: seu voce coelesti ex Albano monte

a) *pararetur* Gron.



missa, (nam id quoque traditur) seu aruspicum monitu. mansit certe sollemne, ut, quandoque idem prodigium nunciaretur, feriae per novem dies agerentur. Haud ita multo post pestilentia laboratum est. unde quum pigritia militandi oriretur; nulla tamen ab armis quies dabatur ab bellicoso rege, salubriora etiam credente militiae, quam domi, iuvenum corpora esse: donec ipse quoque longinquo morbo est implicitus. Tunc adeo fracti simul cum corpore sunt spiritus illi feroces, ut, qui nihil ante ratus esset minus regium, quam sacris dedere animum, repente omnibus magnis parvisque superstitionibus obnoxius degeret, religionibusque etiam populum inpleret. vulgo iam homines, eum statum rerum, qui sub Numa rege fuerat, requirentes, unam opem aegris corporibus relictam, si pax veniaque ab Diis impetrata esset, credebant. Ipsum regem, tradunt, volventem commentarios Numae, quum ibi quaedam occulta sollemnia sacrificia Iovi Elicio facta invenisset, operatum his sacris se abdidisse: sed non rite initum aut curatum id sacrum esse; nec solum nullam ei oblatam coelestium speciem, sed ira Iovis, sollicitati prava religione, fulmine ictum cum domo conflagrasse. Tullus magna gloria belli regnavit annos duos et triginta.

XXXII. Mortuo Tullo, res, ut institutum iam <sup>U. c. 114.</sup> inde ab initio erat, ad Patres redierat: hique inter-<sup>a. C. 638.</sup> regem nominaverant. quo comitia habente, Ancum Marcium regem populus creavit: Patres fuere auctores. Numae Pompilii regis nepos, filia ortus, Ancus Marcius erat. qui, ut regnare coepit, et avitae gloriae memor, et quia proximum regnum, cetera egregium, ab una parte haud satis prosperum fuerat, aut neglectis religionibus, aut prave cultis; longe <sup>b)</sup> antiquissimum ratus, sacra publica, ut ab Numa instituta erant, facere; omnia ea ex commentariis regis pontificem <sup>c)</sup>

b) longeque Gron.

c) add. maximum Gron.

in album relata, proponere in publico iubet. inde et civibus otii cupidis, et finitimis civitatibus facta spes, in avi mores atque instituta regem abiturum. Igitur Latini, cum quibus, Tullo regnante, ictum foedus erat, sustulerant animos: et, quum incursionem in agrum Romanum fecissent, repetentibus res Romanis superbe responsum reddunt; desidem Romanum regem inter sacella et aras acturum esse regnum rati. Medium erat in Anco ingenium, et Numae, et Romuli memor: et, praeterquam quod avi regno magis necessariam fuisse pacem credebat, quum in novo, tum feroci populo; etiam, quod illi contigisset otium, sine iniuria id se haud facile habiturum: tentari patientiam et tentatam contemni: temporaque esse Tullo regi aptiora, quam Numae. Ut tamen, quoniam Numa in pace religiones instituisset, a se bellicae ceremoniae proderentur; nec gererentur solum, sed etiam indicerentur bella aliquo ritu; ius ab antiqua gente Aequicolis, quod nunc feciales habent, descripsit, quo res repetuntur. Legatus, ubi ad fines eorum venit, unde res repetuntur, capite velato filo (lanae velamen est) *Audi, Iupiter*; inquit, *audite, fines*; cuiuscumque gentis sunt, nominat) *audiat Fas. Ego sum publicus nuncius populi Romani, iuste pieque legatus venio, verbisque meis fides sit.* Peragit deinde postulata. Inde Iovem testem facit: *Si ego iniuste impieque illos homines illasque res dedier nuncio populi Romani mihi exposco, tum patriae compotem me numquam siris* <sup>d)</sup> *esse.* Haec, quum fines suprascandit, haec, quicumque ei primus vir obvius fuerit, haec, portam ingrediens, haec, forum ingressus, paucis verbis carminis concipiendique iurisiurandi mutatis, peragit. si non deduntur, quos exposcit, diebus tribus et triginta (tot enim sollemnes sunt) peractis, bellum ita indicit: *Audi, Iupiter, et tu, Iuno, Quirino,*

d) *sinas* Gron. Crev.

*Diique omnes coelestes, vosque terrestres, vosque inferni audite. Ego vos testor, populum illum, (quicumque est, nominat) iniustum esse, neque ius persolvere. Sed de istis rebus in patria maiores natu consulamus, quo pacto ius nostrum adipiscamur. Cum his nuncius Romam ad consulendum redit. Confestim rex his ferne verbis Patres consulebat: Quarum rerum, litium, causarum condixit pater patratus populi Romani Quiritium patri patrato priscorum Latinorum hominibusque priscis Latinis, quas res dari, fieri, solvi oportuit, quas res nec dederunt, nec fecerunt, nec solverunt, dic, inquit ei, quem primum sententiam rogabat, quid censes? Tum ille: Puro pioque duello quaerendas censeo, itaque consentio, consciscoque. Inde ordine alii rogabantur: quandoque pars maior eorum, qui aderant, in eandem sententiam ibat, bellum erat consensu <sup>e)</sup>. Fieri solitum, ut fecialis hastam ferratam aut sanguineam praeustam ad fines eorum ferret, et, non minus tribus puberibus praesentibus, diceret: Quod populi priscorum Latinorum hominesque prisci Latini adversus populum Romanum Quiritium fecerunt, deliquerunt, quod populus Romanus Quiritium bellum cum priscis Latinis iussit esse, senatusque populi Romani Quiritium censuit, consensit, conscivit, ut bellum cum priscis Latinis fieret; ob eam rem ego populusque Romanus populis priscorum Latinorum hominibusque priscis Latinis bellum indico facioque. id ubi dixisset, hastam in fines eorum emittebat. Hoc tum modo ab Latinis repetitae res, ac bellum indictum: moremque eum posterì acceperunt.*

**XXXIII.** Ancus, demandata cura sacrorum flaminibus sacerdotibusque aliis, exercitu novo conscripto profectus, Politorium, urbem Latinorum, vi cepit; secutusque morem regum priorum, qui rem

e) consensum. Crev. Gro- nem maiorem post consen-  
noviana tollit interpunctio- su.

Romanam auxerant hostibus in civitatem accipiendis, multitudinem omnem Romam traduxit. et, quum circa Palatium, sedem veterum Romanorum <sup>f)</sup>, Sabini Capitolium atque arcem, Coelium montem Albani in-  
 plessent; Aventinum novae multitudini datum. additi eodem haud ita multo post, Tellenis Ficanaque captis, novi cives. Politorium inde rursus bello repetitum, quod vacuum occupaverant prisci Latini. eaque causa diruendae urbis eius fuit Romanis, ne hostium semper receptaculum esset. Postremo, omni bello Latino Medulliam compulso, aliquamdiu ibi Marte incerto, varia victoria, pugnatum est: nam et urbs tuta munitionibus, praesidioque firmata valido erat, et, castris in aperto positis, aliquoties exercitus Latinus cominus cum Romanis signa contulerat. Ad ultimum, omnibus copiis connisus, Ancus acie primum vincit: inde, ingenti praeda potitus, Romam redit, tum quoque multis millibus Latinorum in civitatem acceptis; quibus, ut iungeretur Palatio Aventinum, ad Murciae datae sedes. Ianiculum quoque adiectum; non inopia loci, sed ne quando ea arx hostium esset. id non muro solum, sed etiam, ob commoditatem itineris, ponte sublicio, tum primum in Tiberi <sup>g)</sup> facto, coniungi urbi placuit. Quiritium quoque fossa, haud parvum munimentum a planioribus aditu locis, Anci regis opus est. Ingenti incremento rebus auctis, quum in tanta multitudine hominum, discrimine recte an perperam facti confuso, facinora clandestina fierent, carcer ad terrorem incrementis audaciae media urbe, imminens foro aedificatur. Nec urbs tantum hoc rege crevit, sed etiam ager finesque. Silva Maesia Veientibus adempta, usque ad mare imperium prolatum, et in ore Tiberis Ostia <sup>h)</sup> urbs condita: salinae circa factae, egregie-

f) *veteres Romani Gron.*  
 Crev.

g) *Tiberim Crev.*  
 h) *Hostia Gron.*



que rebus bello gestis, aedis <sup>1)</sup> Iovis Feretrii amplificata.

XXXIV. Anco regnante, Lucumo, vir in pigrum ac <sup>U. c. 121.</sup> divitiis potens, Romam commigravit, cupidine maxi- <sup>a. C. 631.</sup> me ac spe magni honoris, cuius adipiscendi Tarquiniis (nam ibi quoque peregrina stirpe oriundus erat) facultas non fuerat. Damarati <sup>k)</sup> Corinthii filius erat; qui, ob seditiones domo profugus, quum Tarquiniis forte consedisset, uxore ibi ducta, duos filios genuit. Nomina his Lucumo atque Aruns fuerunt. Lucumo superfuit patri, bonorum omnium haeres: Aruns prior, quam pater, moritur, uxore gravida relicta. Nec diu manet superstes filio pater: qui quum, ignorans nurum ventrem ferre, in memor in testando nepotis decessisset, puero, post avi mortem in nullam sortem bonorum nato, ab inopia Egerio inditum nomen. Lucumoni contra, omnium haeredi bonorum, quum divitiae iam animos facerent, auxit ducta in matrimonium Tanaquil, summo loco nata, et quae haud facile iis, in quibus nata erat, humiliora sineret ea, quae innupsisset. Spernentibus Etruscis Lucumonem, exsule advena ortum, ferre indignitatem non potuit oblitaque ingenitae erga patriam caritatis, dummodo virum honoratum videret, consilium migrandi ab Tarquiniis cepit. Roma est ad id potissimum visa. in novo populo, ubi omnis repentina atque ex virtute nobilitas sit, futurum locum forti ac strenuo viro: regnasse Tatium Sabinum: arcessitum in regnum Numam a Curibus: et Ancum Sabina matre ortum, nobilemque una imagine Numae esse. Facile persuadet, ut cupido honorum, et cui Tarquiniis materna tantum patria esset. Sublatis itaque rebus commigrant Romanam. Ad Ianiculum forte ventum erat. ibi ei, carpento sedenti cum uxore, aquila, suspensis demissa leniter alis, pileum aufert: superque carpentum cum

i) aedes Gron. Crev.

k) Demarati Crev.

magno clangore volitans, rursus, velut ministerio divinitus missa, capiti apte reponit. inde sublimis abiit. Accepisse id augurium laeta dicitur Tanaquil, perita, ut vulgo Etrusci, coelestium prodigiorum mulier. Excelsa et alta sperare complexa virum iubet. eam alitem ea regione coeli et eius Dei nunciam venisse. circa summum culmen hominis auspiciū fecisse. levasse humano superpositum capiti decus, ut divinitus eidem redderet. Has spes cogitationesque secum portantes, urbem ingressi sunt; domicilioque ibi comparato, L. Tarquinius Priscum edidere nomen <sup>1)</sup>. Romanis <sup>m)</sup> conspicuum eum novitas divitiaeque faciebant: et ipse <sup>n)</sup> fortunam benigno adloquio, comitate invitandi, beneficiisque, quos poterat, sibi conciliando, adjuvabat; donec in regiam quoque de eo fama perlata est: notitiamque eam brevi, apud regem liberaliter dextreque obeundo officia, in familiaris amicitiae adduxerat iura, ut publicis pariter ac privatis consiliis bello <sup>o)</sup> domique interesset: et, per omnia expertus, postremo tutor etiam liberis regis testamento institueretur.

XXXV. Regnavit Ancus annos quatuor et viginti, cuilibet superiorum regum belli pacisque et artibus et gloria par. Iam filii prope puberem aetatem erant. eo magis Tarquinius instare, ut quam primum comitia regi creando fierent. Quibus indictis, sub tempus pueros venatum ablegavit. isque primus et petisse ambitiose regnum, et orationem dicitur habuisse ad conciliandos plebis animos compositam: *quum se non rem novam petere: quippe qui non primus, quod quisquam indignari mirarive posset, sed tertius Romae peregrinus regnum adfectet: et Tatium non ex peregrino solum, sed etiam ex hoste, regem factum: et Numam,*

1) nomen edidere Crev.

m) Iam et Romanis Gron.  
Crev.

n) et ipse quoque Eaed.

o) belli Crev.

ignarum urbis, non petentem, in regnum ultro adcitum: tum se <sup>o</sup>), ex quo sui potens fuerit, Romam cum coniuge ac fortunis omnibus commigrasse: maiorem partem aetatis eius, qua civilibus officiis fungantur homines, Romae se, quam in vetere patria, vixisse. domi militiaeque sub haud poenitendo magistro, ipso Anco rege, Romana se iura, Romanos ritus didicisse. Obsequio et observantia in regem cum omnibus, benignitate erga alios cum rege ipso certasse. Haec eum haud falsa me-<sup>U. c. 138.</sup> morantem ingenti consensu populus Romanus regnare<sup>a. C. 614.</sup> iussit. Ergo virum, cetera egregium, secuta, quam in petendo habuerat, etiam regnantem ambitio est. nec minus regni sui firmandi, quam augendae reipublicae, memor, centum in Patres legit; qui deinde minorum gentium sunt adpellati. factio haud dubia regis, cuius beneficio in curiam venerant. Bellum primum cum Latinis gessit, et oppidum ibi Apiolas vi cepit: praedaeque inde maiore, quam quanta belli fama fuerat, revecta, ludos opulentiùs instructiusque, quam priores reges, fecit. Tum primum circo, qui nunc maximus dicitur, designatus locus est. loca divisa Patribus equitibusque, ubi spectacula sibi quisque facerent; fori adpellati. Spectavere furcis duodenos ab terra spectacula alta sustinentibus pedes. Ludicrum fuit equi pugilesque, ex Etruria maxime adciti. sollemnes deinde annui mansere ludi, Romani Magnique varie adpellati. Ab eodem rege et circa forum privatis aedificanda divisa sunt loca; porticus tabernaeque factae.

XXXVI. Muro quoque lapideo circumdare urbem parabat, quum Sabinum bellum coeptis intervenit. Adeoque ea subita res fuit, ut prius Anienem transirent hostes, quam obviam ire ac prohibere exercitus Romanus posset. Itaque trepidatum Romae est. et primo dubia victoria magna utrimque caede

<sup>o</sup>) quum, se non — — Gron. Crev. c. Drak.  
adcitum. Se, ex quo etc.

pugnatum est. Reductis deinde in castra hostium copiis, datoque spatio Romanis, ad comparandum de integro bellum, Tarquinius, equitem maxime suis deesse viribus ratus, ad Ramnes, Titienses, Luceres, quas centurias Romulus scripserat, addere alias constituit, suoque insignes relinquere nomine. Id quia inaugurato Romulus fecerat, negare Attus <sup>p)</sup> Navius, inclitus ea tempestate augur, neque mutari, neque novum constitui, nisi aves addixissent, posse. Ex eo ira regi mota, eludensque artem, (ut ferunt) *Agedum, inquit, divine tu, inaugura, fierine possit, quod nunc ego mente concipio.* Quum ille, in augurio rem expertus, profecto futuram dixisset; *Atqui hoc* <sup>q)</sup> *animo agitavi,* inquit, *te novacula cotem discissurum. cape haec, et perage, quod aves tuae fieri posse portendunt.* tum illud haud cunctanter discidissem cotem ferunt. Statua Atti <sup>r)</sup> capite velato, quo in loco res acta est, in comitio, in gradibus ipsis ad laevam curiae fuit: cotem quoque eodem loco sitam fuisse memorant, ut esset ad posteros miraculi eius monumentum. Auguriis certe sacerdotioque augurum tantus honos accessit, ut nihil belli domique postea, nisi auspicato, gereretur: concilia populi, exercitus vocati, summa rerum, ubi aves non admisissent, dirimerentur. Neque tum Tarquinius de equitum centuriis quidquam mutavit: numero alterum tantum adiecit, ut mille et octingenti equites in tribus centuriis essent. Posteriores modo sub iisdem nominibus, qui additerant, adpellati sunt: quas nunc, quia geminatae sunt, sex vocant centurias.

XXXVII. Hac parte copiarum aucta, iterum cum Sabinis confligitur. Sed praeterquam quod viribus creverat Romanus exercitus, ex occulto etiam additur dolus, missis, qui magnam vim lignorum, in Anienis ripa iacentem, ardentem in flumen coniicerent: ventoque iuvante accensa ligna, et pleraque in

p) Accius Gron. Crev.

r) Accii posita capite etc.

q) haec Eaed. [In Crev. min. Gron. Accii capite etc. Crev. hoc legitur.]



ratibus, incompacta publicis s) quum haerent, pontem incendunt t). Ea quoque res in pugna terrorem adtulit Sabinis. Effusis eadem fugam inpediit: multique mortales, quum hostem effugissent, in flumine ipso periere: quorum fluitantia arma ad urbem cognita in Tiberi prius pene, quam nunciari posset, insignem victoriam fecere. Eo proelio praecipua equitum gloria fuit. utrimque ab cornibus positos, quum iam pelleretur media peditum suorum acies, ita incurrisse ab lateribus ferunt, ut non sisterent modo Sabinas legiones, ferociter instantes cedentibus, sed subito in fugam averterent u). Montes effuso cursu Sabini petebant, et pauci tenere; maxima pars, ut ante dictum est, ab equitibus in flumen acti sunt. Tarquinius, instandum perterritis ratus, praeda captivisque Romam missis, spoliis hostium (votum id Vulcano erat) ingenti cumulo accensis, pergit porro in agrum Sabinum exercitum inducere: et, quamquam male gesta res erat, nec gesturos melius sperare poterant, tamen, quia consulendi res non dabat spatium, iere obviam Sabini tumultuario milite. iterumque ibi fusi, perditis iam prope rebus, pacem petiere.

XXXVIII. Collatia, et quidquid circa Collatiam agri erat, Sabinis adentum. Egerius (fratris hic filius erat regis) Collatiae in praesidio relictus. deditosque Collatinos ita accipio, eamque deditiois formulam esse. Rex interrogavit: *Estisne vos legati oratoresque missi a populo Collatino, ut vos populumque Collatinum dederetis? Sumus. Estne populus Collatinus in sua potestate? Est. Deditisne vos, populumque Collatinum, urbem, agros, aquam, terminos, delubra, utensilia, divina, humanaque omnia, in meam populiue Romani ditionem? Dedimus. At ego recipio.* Bello Sabino x) perfecto, Tarquinius triumphans Romam rediit. inde

s) et pleraque, in ratibus incompacta, publicis etc. Gron. c. Drak.

t) succendunt Gron. Crev.

u) verterent Gron.

x) Sabino bello Gron. Crev.

priscis Latinis bellum fecit. ubi nusquam ad universae rei dimicationem ventum est, ad singula oppida circumferendo arma, omne nomen <sup>z)</sup> Latinum domuit. Corniculum, Ficulea <sup>a)</sup> vetus, Cameria, Crustumrium, Ameriola, Medullia, Nomentum, haec de priscis Latinis, aut qui ad Latinos defecerant, capta oppida. Pax deinde est <sup>b)</sup> facta. Maiore inde animo pacis opera inchoata, quam quanta mole gesserat bella: ut non quietior populus domi esset, quam militiae fuisset. Nam et muro lapideo, cuius exordium operis Sabino bello turbatum erat, urbem, qua nondum munerat, cingere parat: et infima urbis loca circa forum aliasque interiectas collibus convalles, quia ex planis locis haud facile evehebant aquas, cloacis e fastigio in Tiberim ductis siccant: et aream ad aedem in Capitolio Iovis, quam voverat bello Sabino, iam praesagiente animo futuram olim amplitudinem loci, occupat fundamentis.

XXXIX. Eo tempore in regia prodigium visu eventumque mirabile fuit. Puero dormienti, cui Ser. Tullio nomen fuit, caput arsisse ferunt multorum in conspectu. Plurimo igitur clamore inde ad tantae rei miraculum orto excitos reges. et quum quidam familiarium aquam ad restinguendum ferret, ab regina retentum: sedatoque eam tumultu, moveri vetuisse puerum; donec sua sponte experrectus esset. Mox cum somno et flammam abiisse. Tum abducto in secretum viro Tanaquil, *Viden' tu puerum hunc, inquit, quem tam humili cultu educamus? Scire licet, hunc lumen quondam rebus nostris dubiis futurum, praesidiumque regiae adflictae. proinde materiem ingentis publice privatimque decoris omni indulgentia nostra nutriamus.* Inde puerum liberum loco coeptum haberi, erudiri que artibus, quibus ingenia ad magnae fortunae cultum excitantur. Evenit facile, quod Diis cordi esset. Iu-

z) *nomen omne* Gron. Crev.

b) *est del.* Eaed.

a) *Ficulnea* Eaed.

venis evasit vere indolis regiae. nec, quum quaeretur gener Tarquinio, quisquam Romanae iuventutis ulla arte conferri potuit: filiamque ei suam rex despondit. Hic quacumque de caussa tantus illi honos habitus credere prohibet, serva natum eum, parvumque ipsum servisse. Eorum magis sententiae sum, qui, Corniculo capto, Ser. Tullii, qui princeps in illa urbe fuerat, gravidam viro occiso uxorem, quum inter reliquas captivas cognita esset, ob unicam nobilitatem ab regina Romana prohibitam ferunt servitio partum Romae edidisse, Prisci Tarquinii <sup>c)</sup> domo. Inde tanto beneficio et inter mulieres familiaritatem auctam, et puerum, ut in domo a parvo eductum, in caritate atque honore fuisse: fortunam matris, quod capta patria in hostium manus venerit, ut serva natus crederetur, fecisse.

XL. Duodequadragesimo ferme anno, ex quo regnare coeperat Tarquinius, non apud regem modo, sed apud Patres plebemque longe maximo honore Ser. Tullius erat. Tum Anci filii duo etsi antea semper pro indignissimo habuerant, se patrio regno tutoris fraude pulsos, regnare Romae advenam, non modo civicae, sed ne Italicae quidem stirpis; tum inpensius his indignitas crescere, si ne ab Tarquinio quidem ad se rediret regnum, sed praeceps inde porro ad servitia caderet: ut in eadem civitate post centesimum fere annum, quam Romulus Deo prognatus, Deus ipse, tenuerit regnum, donec in terris fuerit, id servus serva natus possideat. tum commune Romani nominis, tum praecipue id domus suae dedecus fore, si, Anci regis virili stirpe salva, non modo advenis, sed servis etiam, regnum Romae pateret. Ferro igitur eam arcere contumeliam statuunt. Sed et iniuriae dolor in Tarquinium ipsum magis, quam in Servium, eos stimulabat: et quia gravior ultor caedis, si superesset, rex futurus erat, quam privatus:

c) in *Prisci Tarquinii* Gron. Grev.

tum, Servio occiso, quemcumque alium generum delegisset, eundem regni haeredem facturus videbatur. Ob haec ipsi regi insidiae parantur. Ex pastoribus duo ferocissimi delecti ad facinus, quibus consueti erant uterque agrestibus ferramentis, in vestibulo regiae, quam potuere tumultuosissime, specie rixae in se omnes adparitores regios convertunt; inde, quum ambo regem adpellarent, clamorque eorum penitus in regiam pervenisset, vocati ad regem pergunt. Primo uterque vociferari, et certatim alter alteri obstrepere, coerciti ab lictore, et iussi in vicem dicere, tandem obloqui desistunt. Unus rem ex composito orditur. Quum <sup>d)</sup> intentus in eum se rex totus averteret, alter elatam securim in caput deiecit; relictoque in vulnere telo, ambo se foras eiiciunt.

XLI. Tarquinius moribundum quum, qui circa erant, exceperissent, illos fugientes lictores comprehendunt, clamor inde concursusque populi, mirantium quid rei esset. Tanaquil inter tumultum claudi regiam iubet, arbitros eiecit <sup>e)</sup>: simul, quae curando vulneri opus sunt, tamquam spes subesset, sedulo comparat; simul, si destituat spes, alia praesidia molitur. Servio propere accito quum pene exsanguem virum ostendisset; dextram tenens orat, ne inultam mortem soceri, ne socrum inimicis ludibrio esse sinat. *Tuum est, inquit, Servi, si vir es, regnum; non eorum, qui alienis manibus pessimum facinus fecere. Erige te, Deosque duces sequere, qui clarum hoc fore caput divino quondam circumfuso igni portenderunt. Nunc te illa coelestis excitet flamma, nunc expergiscere vere. Et nos peregrini regnavimus. Qui sis, non unde natus sis, reputa. Si tua re subita consilia torpent, at tu mea sequere.* Quum clamor in petusque multitudinis vix sustineri posset, ex superiore parte aedium per fenestras, in novam viam versas, (habitabat enim rex ad Iovis Statoris) populum Tanaquil adloquitur: lubet

d) Dum Gron. Crev.

e) eiicit Eaed.



*bono animo esse, sopitum fuisse regem subito ictu, fer-  
rum haud alte in corpus descendisse. iam ad se redisse.  
Inspectum vulnus, absterso cruore. omnia salubria esse  
confidere, prope diem ipsum eos visuros. Interim Ser-  
Tullio iubere populum dicto audientem esse. Eum iura  
redditurum, obiturumque alia regis munia esse<sup>f)</sup>). Ser-  
vius cum trabea et lictoribus prodit; ac, sede regia  
sedens, alia decernit, de aliis consulturum se regem  
esse simulat. Itaque, per aliquot dies, quum iam  
exspirasset Tarquinius, celata morte, per speciem  
alienae fungendae vicis suas opes firmavit. tum de-  
mum palam facto, et comploratione in regia orta,  
Servius, praesidio firmo munitus, primus iniussu po-  
puli, voluntate Patrum regnavit. Anci liberi, iam  
tum<sup>g)</sup>) comprehensis sceleris ministris, ut vivere re-  
gem, et tantas esse opes Servii nunciatum est, Sues-  
sam Pometiam exsulatum ierant.*

U. c. 176.

a. c. 576.

XLII. Nec iam publicis magis consiliis Servius,  
quam privatis, munire opes. et ne, qualis Anci libe-  
rum animus adversus Tarquinium fuerat, talis adver-  
sus se Tarquini liberum esset, duas filias iuvenibus  
regiis, Lucio atque Arunti Tarquiniis, iungit. Nec  
rupit tamen fati necessitatem humanis consiliis, quin  
invidia regni etiam inter domesticos infida omnia at-  
que infesta faceret. Peroportune ad praesentis quie-  
tem status bellum cum Veientibus (iam enim induciae  
exierant) aliisque Etruscis sumtum. In eo bello et  
virtus et fortuna enituit Tullii. fusoque ingenti ho-  
stium exercitu, haud dubius rex, seu Patrum, seu  
plebis animos periclitaretur, Romam rediit. Adgredi-  
turque inde ad<sup>h)</sup>) pacis longe maximum opus. Ut, quem-  
admodum Numa divini auctor iuris fuisset, ita Ser-  
vium conditorem omnis in civitate discriminis ordi-  
numque, quibus inter gradus dignitatis fortunaeque  
aliquid interlucet, posteris fama ferrent. Censum

U. c. 197.

a. C. 555.

f) esse del. Gron. Crev.

h) ad del. Eaed.

g) tunc Eaed.

enim instituit, rem saluberrimam tanto futuro imperio: ex quo belli pacisque munia non viritim, ut ante, sed pro habitu pecuniarum fierent. Tum classes centuriasque et hunc ordinem ex censu descripsit, vel paci decorum, vel bello.

XLIII. Ex iis, qui centum millium aeris, aut maiorem, censum haberent, octoginta confecit centurias, quadragenas seniorum ac iuniorum. Prima classis omnes adpellati. Seniores, ad urbis custodiam ut praesto essent: iuvenes, ut foris bella gererent. arma his imperata, galea, clipeum, ocreae, lorica; omnia ex aere. haec ut tegumenta corporis essent. tela in hostem, hastaque et gladius. Additae huic classi duae fabrum centuriae, quae sine armis stipendia facerent. datum munus, ut machinas in bello ferrent. Secunda classis intra centum usque ad quinque et septuaginta millium censum instituta; et ex his, senioribus iunioribusque, viginti conscriptae centuriae: arma imperata, scutum pro clipeo, et praeter lorica omnia eadem. Tertiae classis in quinquaginta millium censum esse voluit. totidem centuriae et hae, eodemque discriminine aetatum, factae: nec de armis quidquam mutatum; ocreae tantum ademptae. In quarta classe census quinque et viginti millium, totidem centuriae factae. arma mutata, nihil praeter hastam et verutum datum. Quinta classis aucta, centuriae triginta factae: fundas lapidesque missiles hi secum gerebant, in his adcesi, cornicines, tubicinesque <sup>i)</sup>, in tres centurias distributi. Undecim millibus haec classis censebatur. Hoc minor census reliquam multitudinem habuit. inde una centuria facta est, immunis militia. Ita pedestri exercitu ornato distributoque, equitum ex primoribus civitatis duodecim scripsit centurias. Sex item alias centurias, tribus ab Romulo institutis <sup>k)</sup>, sub iisdem, quibus in-

i) *tibicinesque* Gron. Crev.  
c. Drak,

k) *centurias tribus ab Romulo institutis sub* Gron. c. Drak.

auguratae erant, nominibus fecit. Ad equos emendos dena millia aeris ex publico data; et, quibus equos alerent, viduae adtributae, quae bina millia aeris in annos singulos penderent. Haec omnia in dites a pauperibus inclinata onera. Deinde est honos additus. non enim (ut ab Romulo traditum ceteri servaverant reges) viritum suffragium eadem vi eodemque iure promiscue omnibus datum est: sed gradus facti, ut neque exclusus quisquam suffragio videretur, et vis omnis penes primores civitatis esset. Equites enim vocabantur primi; octoginta inde primae classis centuriarum: ibi si variaret, quod raro incidebat, ut secundae classis vocarentur: nec fere umquam infra ita descenderent, ut ad infimos pervenirent. Nec mirari oportet, hunc ordinem, qui nunc est, post expletas quinque et triginta tribus, duplicato earum numero, centuriis iuniorum seniorumque, ad institutam ab Ser. Tullio summam non convenire. quadrifariam enim urbe divisa regionibus collibusque, quae habitabantur partes, Tribus eas adpellavit; ut ego arbitror, ab tributo: nam eius quoque aequaliter ex censu conferendi ab eodem inita ratio est. Neque hae tribus ad centuriarum distributionem numerumque quidquam pertinere.

XLIV. Censu perfecto, quem maturaverat metu legis de incensis latae cum vinculorum minis mortisque, edixit, ut omnes cives Romani, equites peditesque, in suis quisque centuriis, in campo Martio prima luce adessent. Ibi instructum exercitum omnem suovetaurilibus lustravit. idque conditum lustrum adpellatum, quia is censendo finis factus est. Millia octoginta eo lustro civium censa dicuntur. Adiecit scriptorum antiquissimus Fabius Pictor, eorum, qui ferre arma possent, eum numerum fuisse. Ad eam multitudinem urbs quoque amplificanda visa est. Addit duos colles, Quirinalem Viminalemque. inde deinceps augeat Esquilias: ibique ipse, ut loco dignitas

fieret, habitat. Aggere et fossis et muro circumdat urbem. ita pomoerium profert. Pomoerium, verbi vim solam intuentes, postmoerium interpretantur esse. Est autem magis circa murum locus, quem in condendis urbibus quondam Etrusci, qua murum ducturi erant, certis circa terminis inaugurato consecrabant: ut neque interiore parte aedificia moenibus continuarentur, quae nunc vulgo etiam coniungunt; et extrinsecus puri aliquid ab humano cultu pateret soli. Hoc spatium, quod neque habitari, neque arari fas erat, non magis quod post murum esset, quam quod murus post id, pomoerium Romani adpellarunt. et in urbis incremento semper, quantum moenia processura erant, tantum termini hi consecrati proferebantur.

XLV. Aucta civitate magnitudine urbis, formatis omnibus domi et <sup>1)</sup> ad belli et ad pacis usus, ne semper armis opes adquirerentur, consilio augere imperium conatus est, simul et aliquod addere urbi decus. Iam tum erat inclitum Dianae Ephesiae fanum: id communiter a civitatibus Asiae factum fama ferebat. Quum consensum Deosque consociatos laudaret mire Servius inter procures Latinorum, cum quibus publice privatimque hospitia amicitiasque de industria iunxerat; saepe iterando eadem perpulit tandem, ut Romae fanum Dianae populi Latini cum populo Romano facerent. Ea erat confessio, caput rerum Romanam esse, de quo toties armis certatum fuerat. Id quamquam omissum iam ex omnium cura Latinorum, ob rem toties infeliciter tentatam armis, videbatur; uni se ex Sabinis fors dare visa est privato consilio imperii recuperandi. Bos in Sabinis nata cuidam patrifamiliae dicitur, miranda magnitudine ac specie. Fixa per multas aetates cornua in vestibulo templi Dianae monumentum ei fuere miraculo. Habita, ut erat, res prodigii loco est: et cecinere vates, cuius civitatis eam civis Dianae inmolasset, ibi fore imperium;

1) et del. Gron. Crev.



idque carmen pervenerat ad antistitem fani Dianae. Sabinus, ut prima <sup>m)</sup> apta dies sacrificio visa est, bovem Romam actam deducit ad fanum Dianae, et ante aram statuit. Ibi antistes Romanus, quum eum magnitudo victimae celebrata fama movisset, memor responsi Sabinum ita adloquitur: *Quidnam tu, hospes, paras?* inquit, *inceste sacrificium Dianae facere? Quin tu ante vivo perfunderis flumine? Infima valle praeestit Tiberis.* Religione tactus hospes, qui omnia, ut prodigio responderet eventus, cuperet rite facta, ex templo descendit ad Tiberim. Interea Romanus immolat Dianae bovem. id mire gratum regi atque civitati fuit.

XLVI. Servius, quamquam iam usu haud dubium <sup>n)</sup> regnum possederat, tamen, quia interdum iactari voces a iuvene Tarquinio audiebat, se iniussu populi regnare, conciliata prius voluntate plebis, agro capto ex hostibus viritim diviso, ausus est ferre ad populum, *vellent, iuberentne, se regnare?* tantoque consensu, quanto haud quisquam alius ante, rex est declaratus. Neque ea res Tarquinio spem adfectandi regni minuit: immo eo inpensius, quia de agro plebis adversa Patrum voluntate senserat agi, criminandi Servii apud Patres, crescendique in curia sibi occasionem datam ratus est, et ipse iuvenis ardentis animi, et domi uxore Tullia inquietum animum stimulante. Tulit enim et Romana regia sceleris tragici exemplum, ut taedio regum maturior veniret libertas; ultimumque regnum esset, quod scelere partum foret. Hic L. Tarquinius (Prisci Tarquinii regis filius neposne fuerit, parum liquet; pluribus tamen auctoribus filium ediderim) fratrem habuerat Aruntem Tarquinium, mitis ingenii iuvenem. His duobus, ut ante dictum est, duae Tulliae, regis filiae, nupserant, et ipsae longe dispares moribus. Forte ita inciderat, ne duo violenta ingenia matrimonio iungerentur, fortuna, credo, populi Romani, quo diuturnius Servii regnum

m) *primum* Gron. Crev.n) *dubie* Eaed.

esset, constituique civitatis mores possent. Angebatur ferox Tullia, nihil materiae in viro neque ad cupiditatem, neque ad audaciam esse; tota in alterum versa Tarquinium, eum mirari, eum virum dicere, ac regio sanguine ortum: spernere sororem, quod virum nacta muliebri cessaret audacia. Contrahit celeriter similitudo eos, ut fere fit malum malo aptissimum. sed initium turbandi omnia a femina ortum est. Ea, secretis viri alieni adsuefacta sermonibus, nullis verborum contumeliis parcere, de viro ad fratrem, de sorore ad virum; et se rectius viduam, et illum coelibem futurum fuisse contendere, quam cum in pari iungi, ut elanguescendum aliena ignavia esset. Si sibi eum, quo digna esset, Dii dedissent virum, domi se propediem visuram regnum fuisse, quod apud patrem videat. Celeriter adolescentem suae temeritatis inplet. Lucius <sup>o</sup>) Tarquinius et Tullia minor prope continuatis funeribus quum domos vacuas novo matrimonio fecissent, iunguntur nuptiis, magis non prohibente Servio, quam adprobante.

XLVII. Tum vero in dies infestior Tullii senectus, infestius coepit regnum esse. iam enim ab scelerare ad <sup>p</sup>) aliud spectare mulier scelus: nec nocte, nec interdiu virum conquiescere pati, ne gratuita praeterita parricidia essent. *Non sibi defuisse, cui nupta diceretur, nec cum quo tacita serviret: defuisse, qui se regno dignum putaret: qui meminisset, se esse Prisci Tarquinii filium; qui habere, quam sperare, regnum mallet. Si tu is es, cui nuptam esse me arbitror, et virum et regem adpello: sin minus, eo nunc peius mutata est res, quod isthic cum ignavia est scelus. Quin adcingeris? Non tibi ab Corintho, nec ab Tarquiniiis, ut patri tuo, peregrina regna moliri necesse est. Dii te penates patriique, et patris imago, et domus regia, et in domo regale solium, et nomen Tarquinium creat vocatque re-*

<sup>o</sup>) Aruns Gron. Crev. c.  
Drak.

<sup>p</sup>) ad del. Gron. Crev.

*gem. Aut si ad haec parum est animi, quid frustraris civitatem? quid te ut regium iuvenem conspici sinis? Facesse hinc Tarquinius, aut Corinthum. Devolvere retro ad stirpem, fratri similior, quam patri. His aliisque increpando iuvenem instigat, nec conquiescere ipsa potest: si, quum Tanaquil, peregrina mulier, tantum moliri potuisset animo, ut duo continua regna viro, ac deinceps genero, dedisset; ipsa, regio semine orta, nullum momentum in dando adimendoque regno faceret. His muliebribus instinctus furiis Tarquinius circumire et prensare <sup>q)</sup> minorum maxime gentium, Patres; admonere paterni beneficii, ac pro eo gratiam repetere; adlicere donis iuvenes: tum de se ingentia pollicendo, tum regis criminibus omnibus locis crescere. postremo, ut iam agenda rei tempus visum est, stipatus agmine armatorum, in forum inrupit; inde, omnibus percussis pavore, in regia sede pro curia sedens, Patres in curiam per praeconem ad regem Tarquinium citari iussit. Convenere extemplo, alii iam ante ad hoc praeparati, alii metu, ne non venisse fraudi esset, novitate ac miraculo adtoniti, et iam de Servio actum rati. Ibi Tarquinius, maledicta ab stirpe ultima orsus; *Servum, servaque natum, post mortem indignam parentis sui, non inter regno, ut antea, inito, non comitiis habitis, non per suffragium populi, non auctoribus Patribus, muliebri dono regnum occupasse. Ita natum, ita creatum regem, fautorem infimi generis hominum, ex quo ipse sit, odio alienae honestatis ereptum primoribus agrum sordidissimo cuique divisisse: omnia onera, quae communia quondam fuerint, inclinasse in primores civitatis: instituisse censum, ut insignis ad invidiam locupletiorum fortuna esset, et parata, unde, ubi vellet, egentissimis largiretur.**

XLVIII. Huic orationi Servius quum intervenisset, trepido nuncio excitatus, extemplo a vestibulo

q) *prehensare* Gron. Crev.

curiae magna voce, *Quid hoc*, inquit, *Tarquini, rei est? qua tu audacia me vivo vocare ausus es Patres? aut in sede considerare mea?* Quum ille ferociter ad haec, *Se patris sui tenere sedem, multo, quam servum, potior rem filium regis regni haeredem: satis illum diu per licentiam eludentem insultasse dominis;* clamor ab utriusque fautoribus oritur, et concursus populi fiebat in curiam: adparebatque regnaturum, qui vicisset. Tum Tarquinius, necessitate iam <sup>r)</sup> ipsa cogente ultima audere, multo et aetate et viribus validior, medium adripit Servium; elatumque e curia in inferiorem partem per gradus deiecit. Inde ad cogendum senatum in curiam redit. Fit fuga regis adparitorum; atque comitum. Ipse prope exsanguis, quum semianimi regio comitatu domum se reciperet, pervenissetque ad summum Cyprium vicum, ab iis, qui missi ab Tarquinio fugientem consecuti erant, interficitur. Creditur, quia non abhorret a cetero scelere, admonitu Tulliae id factum. carpento certe (id quod satis constat) in forum invecta, nec reverita coetum virorum, evocavit virum e curia; regemque prima adpellavit. a quo facessere iussa ex tanto tumultu quum se domum reciperet, pervenissetque ad summum Cyprium vicum, ubi Dianium nuper fuit; flectenti <sup>s)</sup> carpentum dextra in Urbium <sup>t)</sup> clivum, ut in collem Esquilium eveheretur, restitit pavidus, atque inhibuit frenos is, qui iumenta agebat, iacentemque dominae Servium trucidatum ostendit. Foedum inhumanumque inde traditur scelus, monumentoque locus est: Sceleratum vicum vocant, quo amens, agitantibus furiis sororis ac viri, Tullia per patris corpus carpentum egisse fertur; partemque sanguinis ac caedis paternae cruento vehiculo, contaminata ipsa respersaque, tulisse ad penates suos virique sui: quibus iratis, malo regni principio similes prope diem exitus

r) add. etiam Gron. Crev.

t) Virbium Eaed. c. Drak.

s) Flectente Eaed.



sequerentur. Ser. Tullius regnavit annos quatuor et quadraginta, ita ut bono etiam moderatoque succedenti regi difficilis aemulatio esset. Ceterum id quoque ad gloriam accessit, quod cum illo simul iusta ac legitima regna occiderunt. Id ipsum tam mite ac tam moderatum imperium tamen, quia unius esset, deponere eum in animo habuisse, quidam auctores sunt; nisi scelus intestinum liberandae patriae consilia agitati intervenisset.

XLIX. Inde L. Tarquinius regnare coepit, cui U. c. 220.  
 Superbo cognomen facta indiderunt, quia socerum a. C. 532.  
 gener sepultura prohibuit, *Romulum quoque insepul-*  
*tum perisse* dictitans: primores Patrum, quos Servii  
 rebus favisse credebatur, interfecit: conscius deinde,  
 male quaerendi regni ab se ipso adversus se exemplum  
 capi posse, armatis corpus circumsepsit. neque enim  
 ad ius regni quidquam praeter vim habebat; ut qui ne-  
 que populi iussu, neque auctoribus Patribus regnaret.  
 Eo accedebat, ut in caritate civium nihil spei reponenti  
 metu regnum tutandum esset: quem ut pluribus in-  
 cuteret, cognitiones capitalium rerum sine consiliis  
 per se solus exercebat: perque eam causam occidere,  
 in exilium agere, bonis multare poterat non suspectos  
 modo aut invisos, sed unde nihil aliud, quam prae-  
 dam, sperare posset. Ita Patrum praecipue numero  
 imminuto, statuit nullos in Patres legere; quo contem-  
 ptior paucitate ipsa ordo esset, minusque per se nihil  
 agi indignarentur. Hic enim regum primus traditum  
 a prioribus morem de omnibus senatum consulendi  
 solvit: domesticis consiliis rempublicam administra-  
 vit: bellum, pacem, foedera, societates per se ipse,  
 cum quibus voluit, iniussu populi ac senatus, fecit,  
 diremitque. Latinorum sibi maxime gentem concili-  
 abat, ut peregrinis quoque opibus tutior inter cives  
 esset. neque hospitia modo cum primoribus eorum,  
 sed adfinitates quoque, iungebat. Octavio Mamilio  
 Tusculano, (is longe princeps Latini nominis erat,

si famae credimus, ab Ulixē<sup>u)</sup> Deaque Circe oriundus) ei Mamilio filiam nuptum dat; perque eas nuptias multos sibi cognatos amicosque eius conciliat.

L. Iam magna Tarquinii auctoritas inter Latinorum procures erat; quum, in diem certam ut ad lucum Ferentinae conveniant, indicit: esse, quae agere de rebus communibus velit. Conveniunt frequentes prima luce. ipse Tarquinius diem quidem servavit; sed paullo ante, quam sol occideret, venit. Multa ibi tota die in concilio variis iactata sermonibus erant. Turnus Herdonius ab Aricia ferociter in absentem Tarquinium erat invectus; *Haud mirum esse, Superbo<sup>x)</sup> inditum Romae cognomen.* (iam enim ita clam quidem mussitantes, vulgo tamen, eum adpellabant.) *An quidquam superbius esse, quam ludificari sic omne nomen Latinum? Principibus longe ab domo excitis, ipsum, qui concilium indixerit, non adesse. tentari profecto patientiam, ut, si iugum acceperint, obnoxios premat. Cui enim non adparere, adfectare eum imperium in Latinos? Quod si sui bene crediderint cives, aut si creditum illud, et non raptum parricidio, sit, credere et Latinos (quamquam ne sic quidem alienigenae) debere. Sin suos eius poeniteat, (quippe qui alii super alios trucidentur, exsulatum eant, bona amittant,) quid spei melioris Latinis portendi? Si se audiant, domum suam quemque inde abituros: neque magis observaturos diem concilii, quam ipse, qui indixerit, observet.* Haec atque alia eodem pertinentia seditiosus facinorosusque homo, hisque artibus opes domi nactus, quum maxime dissereret, intervenit Tarquinius. Is finis orationi fuit. Aversi omnes ad Tarquinium salutandum. qui, silentio facto, monitus a proximis, ut purgaret se, quod id temporis venisset, *disceptatorem*, ait, *se sumtum inter patrem et filium: cura reconciliandi eos in gratiam moratum esse: et, quia ea res emisset illum diem, postero die acturum, quae*

u) Ulysse Gron. Crev.

x) add. ei Gron.

*constituisset. Ne id quidem ab Turno tulisse tacitum ferunt. dixisse enim, Nullam breviorē esse cognitionem, quam inter patrem et filium, paucisque transigi verbis posse: nī pareat patri, habiturum infortunium esse.*

LI. Haec Aricinus in regem Romanum increpans ex concilio abiit. Quam rem Tarquinius aliquanto, quam videbatur, aegrius ferens, confestim Turno necem machinatur; ut eundem terrorem, quo civium animos domi obpresserat, Latinis iniiceret. et quia pro imperio palam interfici non poterat, oblato falso crimine insontem obpressit. per adversae factionis quosdam Aricinos servum Turni auro corruptit, ut in deversorium eius vim magnam gladiatorum inferri clam sineret. ea quum una nocte perfecta essent, Tarquinius, paullo ante lucem aditis ad se principibus Latinorum, quasi re nova perturbatus, *moram suam hesternam, velut Deorum quadam providentia inlatam, ait, saluti sibi atque illis fuisse. ab Turno dici sibi et primoribus populorum parari necem, ut Latinorum solus imperium teneat. Adgressurum fuisse hesterno die in concilio. dilatam rem esse, quod auctor concilii affuerit y), quem maxime peteret. Inde illam absentis insectationem esse natam, quod morando spem destituerit. Non dubitare, si vera deferantur, quin prima luce, ubi ventum in concilium sit, instructus cum coniuratorum manu armatusque venturus sit. Dici, gladiatorum ingentem numerum esse ad eum convectum, id vanum nec ne sit, extemplo sciri posse. Rogare eos, ut inde secum ad Turnum veniant.* Suspectam fecit rem et ingenium Turni ferox, et oratio hesternā, et mora Tarquini; quod videbatur ob eam differri caedes potuisse. Eunt inclinatis quidem ad credendum animis, tamen, nisi gladiis deprehensis, cetera vana existimaturi. Ubi est eo ventum, Turnum ex somno excitatum circumstant custodes: comprehensisque servis, qui ca-

y) *abfuerit* Gron. Crev.

ritate domini vim parabant, quum gladii abditi ex omnibus locis deverticuli <sup>2)</sup> protraherentur; enimvero manifesta res visa, iniectaéque Turno catenae: et confestim Latinorum concilium magno cum tumultu advocatur. Ibi tam atrox invidia orta est, gladiis in medio positis, ut, indicta caussa, novo genere leti, deiectus ad caput aquae Ferentinae, crate superne iniecta saxisque congestis, mergeretur.

LII. Revocatis deinde ad concilium Latinis, Tarkinus, conlaudatisque, qui Turnum novantem res pro manifesto parricidio merita poena adfecissent, ita verba fecit: *Posse quidem se vetusto iure agere, quod, quum omnes Latini ab Alba oriundi sint, in eo foedere teneantur, quo ab Tullo res omnis Albana cum colonis suis in Romanum cesserit imperium. Ceterum se utilitatis id magis omnium caussa censere, ut renovetur id foedus: secundaque potius fortuna populi Romani ut participes Latini fruantur, quam urbium excidia vastationesque agrorum, quas Anco prius, patre deinde suo regnante, perpassi sint, semper aut expectent, aut patiantur.* Haud difficulter persuasum Latinis, quamquam in eo foedere superior Romana res erat. ceterum et capita nominis Latini stare ac sentire cum rege videbant, et Turnus sui cuique periculi, si adversatus esset, recens erat documentum. Ita renovatum foedus, indictumque iunioribus Latinorum, ut ex foedere die certa ad lucum Ferentinae armali frequentes adessent. Qui ubi ad edictum Romani regis ex omnibus populis convenere; ne ducem suum, neve secretum imperium, propriave signa haberent, miscuit manipulos ex Latinis Romanisque, ut ex binis singulos faceret, binosque ex singulis. ita geminatis manipulis centuriones inposuit.

LIII. Nec, ut iniustus in pace rex, ita dux belli pravus fuit. quin ea arte aequasset superiores reges, ni degeneratum in aliis huic quoque decori obsecisset.

2) diverticuli Gron. Crev.



Is primus Volscis bellum in ducentos amplius post suam aetatem annos movit, Suessamque Pometiam ex his vi cepit. ubi quum divendenda <sup>a)</sup> praeda quadraginta <sup>b)</sup> talenta argenti aurique refecisset <sup>c)</sup>; concepit animo eam amplitudinem Iovis templi, quae digna Deum hominumque rege, quae Romano imperio, quae ipsius etiam loci maiestate esset. Captivam pecuniam in aedificationem eius templi seposuit. Excepit deinde eum lentius spe bellum, quo Gabios, propinquam urbem, nequidquam vi adortus, quum obsidendi quoque urbem spes pulso a moenibus ademta esset, postremo minime arte Romana, fraude ac dolo, adgressus est; nam quum, velut posito bello, fundamentis templi iaciendis aliisque urbanis operibus intentum se esse simularet, Sextus filius eius, qui minimus ex tribus erat, transfugit ex composito Gabios, patris in se saevitiam intolerabilem conquerens; *Iam ab alienis in suos vertisse superbiam: et liberorum quoque eum frequentiae taedere; ut, quam in curia solitudinem fecerit, domi quoque faciat: ne quam stirpem, ne quem haeredem regni relinquat. Se quidem, inter tela et <sup>d)</sup> gladios patris elapsam, nihil usquam sibi tutum, nisi apud hostes L. Tarquinii, credidisse. Nam, ne errarent, manere his bellum, quod positum simuletur; et per occasionem eum incautos invasurum. Quod si apud eos supplicibus locus non sit, pererraturum se omne Latium <sup>e)</sup>: Volscosque se inde, et Aequos, et Hernicos petiturum; donec ad eos perveniat, qui a patrum crudelibus atque inpiis suppliciis tegere liberos sciant. Forsitan etiam ardoris aliquid ad bellum armaque se adversus superbissimum regem ac ferocissimum populum inventurum.* Quum, si nihil morarentur, infensus ira porro inde abiturus videretur, benigne ab Gabinis excipitur. vetant mirari, si, qualis in cives, qualis in

a) divendita Gron. Crev.

c) recepisset Gron. Crev.

dividenda Drak.

d) ac Eaed.

b) quadringentâ Gron. c.  
Drak.

e) add. pulsumque se inde  
Volscos et Aequos etc. Eaed.

socios, talis ad ultimum in liberos esset. In se ipsum postremo saeviturum, si alia desint. Sibi vero gratum adventum eius esse: futurumque credere brevi, ut, illo adiuvante, ab portis Gabinis sub Romana moenia bellum transferatur.

LIV. Inde in concilia <sup>f)</sup> publica adhiberi. ubi, quum de aliis rebus adsentire se veteribus Gabinis diceret, quibus hae notiores essent, ipse idemdem belli auctor esse, in eo sibi praecipuam prudentiam adsumere, quod utriusque populi vires nosset, sciretque, invisam profecto superbiam regiam civibus esse, quam ferre ne liberi quidem potuissent. Ita quum sensim ad rebellandum primores Gabinorum incitaret, ipse cum promptissimis iuvenum praedatum atque in expeditiones iret, et dictis factisque omnibus ad fallendum instructis vana adcreceret fides, dux ad ultimum belli legitur. Ibi quum, inscia multitudine, quid ageretur, proelia parva inter Romam Gabiosque fierent, quibus plerumque Gabina res superior esset; tum certatim summi infimique Gabinorum Sex. Tarquinius dono Deum sibi missum ducem credere. Apud milites vero obeundo pericula ac labores, pariter praedam munifice largiendo, tanta caritate esse, ut non pater Tarquinius potentior Romae, quam filius Gabiis esset. Itaque, postquam satis virium conlectum ad omnes conatus videbat, tum e suis unum sciscitatum Romam ad patrem mittit, quidnam se facere vellet? quandoquidem, ut omnia unus Gabiis posset, ei Dii dedissent. Huic nuncio, quia, credo, dubiae fidei videbatur, nihil voce responsum est. rex velut deliberabundus, in hortum aedium transit, sequente nuncio filii: ibi, inambulans tacitus, summa papaverum capita dicitur baculo decussisse. Interrogando exspectandoque responsum nuncius fessus, ut re imperfecta, redit Gabios; quae dixerit ipse, quaeque viderit, refert: seu ira, seu odio, seu superbia

f) *consilia* Crev.

insita ingenio, nullam eum vocem emisisse. Sexto ubi, quid vellet parens, quidve praeciperet tacitis ambagibus, patuit; primores civitatis, criminando alios apud populum, alios sua ipsos invidia opportunos interemit. multi palam; quidam, in quibus minus speciosa criminatio erat futura, clam interfecti. Patuit quibusdam volentibus fuga, aut in exsilium acti sunt, absentiumque bona iuxta atque interemtorum divisi<sup>g)</sup> fuere. Largitionis inde praedaeque et dulcedine privati<sup>h)</sup> commodi sensus malorum publicorum adimi, donec, orba consilio auxilioque, Gabina res regi Romano sine ulla dimicatione in manum traditur.

LV. Gabiis receptis, Tarquinius pacem cum Aequorum gente fecit; foedus cum Tuscis renovavit. Inde ad negotia urbana animum convertit. quorum erat primum, ut Iovis templum in monte Tarpeio, monumentum regni sui nominisque, relinqueret: Tarquinius reges ambos, patrem vovisse, filium perfecisse. Et, ut libera a ceteris religionibus area esset tota Iovis templique eius, quod inaedicaretur, exaugurare fana sacellaque statuit; quae aliquot ibi a Tatio rege, primum in ipso discrimine adversus Romulum pugnae vota, consecrata, inaugurataque postea fuerant. Inter principia condendi huius operis movisse numen ad indicandam tanti imperii molem traditur Deos: nam, quum omnium sacellorum exaugurationes admitterent aves, in Termini fano non addixere. Id<sup>i)</sup> omen auguriumque ita acceptum est; non motam Termini sedem, unumque eum Deorum non evocatum sacratis sibi finibus, firma stabiliaque cuncta portendere. Hoc perpetuitatis auspicio accepto, secutum aliud, magnitudinem imperii portendens, prodigium est. caput humanum integra facie aperientibus fundamenta templi dicitur adparuisse. Quae vi-

g) *divisa* Gron. Crev.

h) *et privati dulcedine* Eaed.

i) *idque* Eaed.

sa species, haud per ambages, arcem eam imperii caputque rerum fore portendebat. idque ita cecinere vates, quique in urbe erant, quosque ad eam rem consultandam ex Etruria advixerant. Augebatur ad impensas regis animus. Itaque Pometinae manubiae, quae perducendo ad culmen operi destinatae erant, vix in fundamenta subpeditavere. eo magis Fabio, praeterquam quod antiquior est, crediderim, quadraginta<sup>k</sup> ea sola talenta fuisse, quam Pisoni; qui quadraginta millia pondo argenti seposita in eam rem scribit, summam pecuniae neque ex unius tum urbis praeda sperandam, et nullius, ne horum quidem magnificentiae operum, fundamenta non exsuperaturam.

LVI. Intentus perficiendo templo, fabris undique ex Etruria aditis, non pecunia solum ad id publica est usus, sed operis etiam ex plebe. qui quum haud parvus et ipse militiae adderetur labor, minus tamen plebs gravabatur, se templa Deum exaedificare manibus suis: quae posthac et ad alia, ut specie minora, sic laboris aliquanto maioris, traducebatur opera; foros in circo faciendos, cloacamque maximam, receptaculum omnium purgamentorum urbis, sub terram agendam: quibus duobus operibus vix nova haec magnificentia quidquam adaequare potuit. His laboribus exercita plebe, quia et urbi multitudinem, ubi usus non esset, oneri rebatur esse, et colonis mittendis occupari latius imperii fines volebat; Signiam Circeiosque colonos misit, praesidia urbi futura terra marique. Haec agenti portentum terribile visum. anguis, ex columna lignea elapsus, quum terrorem fugamque in regiam fecisset, ipsius regis uon tam subito pavore perculit pectus, quam anxiiis inplevit curis. Itaque quum ad publica prodigia Etrusci tantum vates adhiberentur, hoc velut domestico exterritus visu, Delphos ad maxime inclitum in terris oraculum mittere

k) *quadringenta* Gron. c. Drak.



statuit. neque responsa sortium ulli alii committere ausus, duos filios per ignotas ea tempestate terras, ignotiora maria, in Graeciam misit. Titus et Aruns profecti. comes his additus L. Iunius Brutus, Tarquinia sorore regis natus, iuvenis longe alius ingenio, quam cuius simulationem induerat. Is, quum primores civitatis, in quibus fratrem suum ab avunculo interfectum audisset, neque in animo suo quidquam regi timendum, neque in fortuna concupiscendum relinquere statuit, contemtuque<sup>1)</sup> tutus esse, ubi in iure parum praesidii esset. Ergo ex industria factus ad imitationem stultitiae, quum se suaque praedae esse regi sineret, Bruti quoque haud abnuvit cognomen: ut sub eius obtentu cognominis liberator ille populi Romani animus latens opperiretur tempora sua. Is tum ab Tarquiniis ductus Delphos, ludibrium verius, quam comes, aureum baculum, inclusum corneo cavato ad id baculo, tulisse donum Apollini dicitur, per ambages effigiem ingenii sui. Quo postquam ventum est, perfectis patris mandatis, cupido incessit animos iuvenum sciscitandi, ad quem eorum regnum Romanum esset venturum. Ex infimo specu vocem redditam ferunt: *Imperium summum Romae habebit, qui vestrum primus, o iuvenes, osculum matri tulerit.* Tarquinii, ut Sextus, qui Romae relictus fuerat, ignarus responsi expersque imperii esset, rem summa ope taceri iubent; ipsi inter se, uter prior, quum Romam redissent, matri osculum daret, sorti permittunt. Brutus, alio ratus spectare Pythicam vocem, velut si prolapsus cecidisset, terram osculo contigit: scilicet, quod ea communis mater omnium mortalium esset. Reditum inde Romam, ubi adversus Rutulos bellum summa vi parabatur.

LVII. Ardeam Rutuli habebant, gens, ut in ea regione atque in ea aetate, divitiis praepollens. eaque

1) *contemptu* Gron. Crev.

ipsa caussa belli fuit, quod rex Romanus tum ipse ditari, exhaustus magnificentia publicorum operum, tum praeda delinire popularium animos studebat; praeter aliam superbiam regno infestos etiam, quod se in fabrorum ministeriis ac servili tamdiu habitos opere ab rege indignabantur. Tentata res est, si primo impetu capi Ardea posset. ubi id parum processit, obsidione munitionibusque coepti premi hostes. In iis stativis, ut sit longo magis, quam acri bello, satis liberi commeatus erant: primoribus tamen magis, quam militibus. Regii quidem iuvenes interdum otium convivii comessionibusque inter se terebant. forte potantibus his apud Sex. Tarquinium, ubi et Collatinus coenabat Tarquinius, Egerii filius, incidit de uxoribus mentio: suam quisque laudare miris modis. inde certamine accenso, Collatinus negat, *verbis opus esse, paucis id quidem horis posse sciri, quantum ceteris praestet Lucretia sua. Quin, si vigor iuventas inest, conscendimus equos, invisimusque praesentes nostrarum ingenia? Id cuique spectatissimum sit, quod ne opinato viri adventu occurrerit oculis.* Incaluerant vino. *age sane, omnes. citatis equis avolant* <sup>m)</sup> *Romam.* Quo quum, primis se intendentibus tenebris, pervenissent, pergunt inde Collatiam: ubi Lucretiam, haudquaquam ut regias nurus, quas in convivio luxuriae cum aequalibus viderant tempus terentes, sed nocte sera deditam lanae inter lucubrantis ancillas in medio aedium sedentem inveniunt. Muliebris certaminis laus penes Lucretiam fuit. adveniens vir Tarquiniique excepti benigne. victor maritus comiter invitat regios invenes. Ibi Sex. Tarquinium mala libido Lucretiae per vim stuprandae capit. tum forma, tum spectata castitas incitat. Et tum quidem ab nocturno juvenili ludo in castra redeunt.

LVIII. Paucis interiectis diebus, Sex. Tarqui-

m) *advolant* Gron. Crev.

nus, inscio Collatino, cum comite uno Collatiam venit. ubi exceptus benigne ab ignaris consilii, quum post coenam in hospitale cubiculum deductus esset, amore ardens, postquam satis tuta <sup>n)</sup> circa, sopitique omnes videbantur, stricto gladio ad dormientem Lucretiam venit, sinistraque manu mulieris pectore obpresso, *Tace Lucretia*, inquit, *Sex. Tarquinius sum; ferrum in manu est: moriere, si emiseris vocem*. Quum pavida ex <sup>o)</sup> somno mulier nullam opem, prope mortem imminentem, videret; tum Tarquinius fateri amorem, orare, miscere precibus minas, versare in omnes partes muliebrem animum. ubi obstinatum videbat, et ne mortis quidem metu inclinari, addit ad metum dedecus: cum mortua iugulatum servum nudum positurum, ait, ut in sordido adulterio necata dicatur. Quo terrore quum vicisset obstinatum pudicitiam velut vitrix libido, profectusque inde Tarquinius, ferox expugnato decore muliebri, esset; Lucretia, moesta tanto malo, nuncium Romam eundem ad patrem, Ardeamque ad virum mittit, ut cum singulis fidelibus amicis veniant: ita facto maturatoque opus esse; rem atrocem incidisse. Sp. Lucretius cum P. Valerio Volesi filio, Collatinus cum L. Iunio Bruto venit; cum quo forte Romam rediens ab nuncio uxoris erat conventus. Lucretiam sedentem moestam in cubiculo inveniunt. adventu suorum lacrimae obortae. quaerentique viro, *Satin' salvae? Minime*, inquit; *quid enim salvi est mulieri, amissa; pudicitia? Vestigia viri alieni, Collatine, in lecto sunt tuo. Ceterum corpus est tantum violatum, animus sinons. mors testis erit. Sed date dexteras fidemque, haud inpune adultero fore. Sex. est Tarquinius, qui hostis pro hospite priore nocte vi armatus mihi sibi que, si vos viri estis, pestiferum hinc abstulit gaudium*. Dant ordine omnes fidem: conso-lantur aegram animi, avertendo noxam ab coacta in auctorem delicti. mentem peccare, non corpus: et,

n) satis omnia tuta Gron. Crev.

o) e Eaed,

unde consilium afuerit, <sup>p)</sup> culpam abesse. *Vos, inquit, videritis, quid illi debeatur: ego me, etsi peccato absolvo, supplicio non libero. nec ulla deinde inpudica Lucretiae exemplo vivet. Cultrum, quem sub veste abditum habebat, eum in corde defigit: prolapsaque in vulnus, moribunda cecidit. Conclamant vir pat-terque.*

LIX. Brutus, illis luctu occupatis, cultrum, ex vulnere Lucretiae extractum, manantem cruore prae se tenens, *Per hunc, inquit, castissimum ante regiam iniuriam sanguinem iuro, vosque, Dii, testes facio, me L. Tarquinius Superbum, cum scelerata coniuge et omni liberorum stirpe, ferro, igni, quacumque dehinc vi possim, exsecuturum. nec illos, nec alium quemquam regnare Romae passurum.* Cultrum deinde Collatino tradit; inde Lucretio ac Valerio, stupentibus miraculo rei, unde novum in Bruti pectore ingenium. Ut praeceptum erat, iurant: totique ab luctu versi in iram, Brutum, iam inde ad expugnandum regnum vocantem, sequuntur ducem. Elatum domo Lucretiae corpus in forum deferunt, concientque miraculo, ut fit, rei novae atque indignitate homines. pro se quisque scelus regium ac vim queruntur. Movet tum patris moestitia, tum Brutus, castigatorem lacrimarum atque inertium querelarum, auctorque, quod viros, quod Romanos deceret, arma capiendi adversus hostilia ausos. Ferocissimus quisque iuvenum cum armis voluntarius adest. sequitur et cetera iuventus. Inde, pari praesidio relicto Collatiae ad portas, custodibusque datis, ne quis eum motum regibus nunciaret, ceteri armati, duce Bruto, Romam profecti. Ubi eo ventum est, quacumque incedit, armata multitudo pavorem ac tumultum facit. rursus, ubi anteire primores civitatis vident, quidquid sit, haud temere esse rentur. Nec minorem motum animorum Romae

p) *abfuerit* Gron. Crev.



tam atrox res facit, quam Collatiae fecerat. Ergo ex omnibus locis urbis in forum curritur. Quo simul ventum est, praeco ad tribunum Celerum, in quo tum magistratu forte Brutus erat, populum advocavit. Ibi oratio habita, nequaquam eius pectoris ingenii-que, quod simulatum ad eam diem fuerat, de vi ac libidine Sex. Tarquinii, de stupro infando Lucretiae et miserabili caede, de orbitate Tricipitini, cui morte filiae caussa mortis indignior ac miserabilior esset. addita superbia ipsius regis, miseriaeque et labores plebis, in fossas cloacasque exhauriendas demersae. Romanos homines, victores omnium circa populorum, opifices ac lapicidas pro bellatoribus factos. Indigna Ser. Tullii regis memorata caedes, et invecta corpori patris nefando vehiculo filia; invocatique ultores parentum Dii. His atrocioribusque, credo, aliis, quae praesens rerum indignitas haudquaquam relatu scriptoribus facilia subiicit, memoratis incensam multitudinem perpulit, ut imperium regi abrogaret, exsulesque esse iuberet L. Tarquinius cum coniuge ac liberis. Ipse, iunioribus, qui ultro nomina dabant, lectis armatisque, ad concitandum inde adversus regem exercitum Ardeam in castra est profectus; imperium in urbe Lucretio, praefecto urbis iam ante ab rege instituto, relinquit. Inter hunc tumultum Tullia domo profugit, exsecrantibus, quacumque incedebat, invocantibusque parentum furias viris mulieribusque.

LX. Harum rerum nunciis in castra perlatis, quum re nova trepidus rex pergeret Romam ad comprimendos motus, flexit viam Brutus, (senserat enim adventum) ne obvius fieret; eodemque fere tempore, diversis itineribus, Brutus Ardeam, Tarquinius Romam, venerunt. Tarquinio clausae portae, exsiliun-que indictum: liberatorem urbis laeta castra accipere: exactique inde liberi regis. Duo patrem secuti sunt, qui exsulatum Caere in Etruscos ierunt. Sex. Tarquinius, Gabios, tamquam in suum regnum, pro-

fectus, ab ultoribus veterum simultatum, quas sibi ipse caedibus rapinisque conciverat, est interfectus. **L. Tarquinius Superbus** regnavit annos quinque et viginti. Regnatum Romae ab condita urbe ad liberatam annos ducentos quadraginta quatuor. Duo consules inde comitiis centuriatis a praefecto urbis ex commentariis **Ser. Tullii** creati sunt, **L. Iunius Brutus** et **L. Tarquinius Collatinus**.

---

## EPITOME LIBRI II.

Brutus iureiurando populum adstrinxit, neminem regnare Romae passuros 1): Tarquinium Collatinum, collegam suum, propter adfinitatem Tarquiniorum suspectum, coëgit consulatu se abdicare, et civitate cedere. bona regum diripi iussit: agrum Marti consecravit, qui Campus Martius nominatus est. adolescentes nobiles, in quibus suos quoque et sororis 2) filios, quia coniuraverant de recipiendis regibus, securi percussit. servo indici, cui Vindicio 3) nomen fuit, libertatem dedit: ex cuius nomine vindicta est adpellata. Quum adversus reges, qui, contractis Veientium et Tarquiniensium copiis, bellum intulerant, exercitum duxisset, in acie cum Arunte, filio Superbi, commortuus est: eumque matronae annum luxerunt. P. Valerius consul legem de provocatione ad populum tulit: Capitolium dedicatum est. Porsena, rex Clusinarum, bello pro Tarquiniis suscepto, quum ad Ianiculum venisset, ne Tiberim transiret, virtute Coclitis Horatii prohibitus est; qui, dum alii pontem sublicium rescindunt, solus Etruscos sustinuit; et, ponte rupto, armatus se in flumen misit, et ad suos tranavit. Alterum accessit virtutis exemplum a Mucio: qui, quum ad feriendum Porsenam castra hostium intrasset, occiso scriba, quem regem esse putabat, comprehensus, inpositam altaribus manum, in quibus sacrificatum erat, exuri passus est; dixitque, tales trecentos esse coniuratos in mortem ipsius regis. quorum admiratione coactus Porsena pacis condiciones ferre, bellum omisit, acceptis obsidibus. ex quibus virgo una Cloelia, deceptis custodibus, per Tiberim ad suos tranavit: et, quum reddita esset, a Porsena 4) honorifice remissa, equestri 5) statua donata est. Ap. Claudius ex Sabinis Romam transfugit: ob hoc Claudia tribus adiecta est. Numerus tribuum ampliatus est, ut essent viginti una. Adversus Tarquinium Superbum, cum Latinorum exercitu bellum inferentem, A. Postumius dictator prospere pugnavit apud lacum Regillum. Plebs, quum propter nexos ob aes alienum in Sacrum montem 6)

1) *passurum* Gron. Crev.

2) *fratris* Crev.

3) *Vindicius* Gron. Crev.

4) *esset Porsenae* Eaed.

5) *equestrique* Eaed.

6) *Sacrum in montem* Eaed.

secessisset, consilio Menenii Agrippae a seditione revocata est. Idem Agrippa, quum decessisset, propter paupertatem publicoinpendio elatus est. Tribuni plebis quinque creati sunt. Oppidum Volscorum Corioli captum est virtute et opera C. Marcii, qui ob hoc Coriolanus vocatus est. Ti. Atinius, vir de plebe, quum in visu admonitus esset, ut de quibusdam religionibus ad senatum perferret, et neglexisset, amisso filio, debilis factus, postquam, delatus ad senatum lectica, eadem illa indicaverat, usu pedum recepto, domum reversus est. Quum C. Marcus Coriolanus, qui in exilium erat pulsus, dux Volscorum factus, exercitum hostium urbi Romae admovisset, et missi ad eum primum legati, postea sacerdotes frustra deprecati essent, ne bellum patriae inferret; Veturia mater et Volumnia uxor impetraverunt ab eo, ut recederet. Lex agraria primum lata est. Sp. Cassius consularis regni crimine damnatus est necatusque. Oppia, virgo Vestalis, ob incestum viva defossa est. Quum vicini hostes Veientes incommodi magis, quam graves, essent, familia Fabiorum id bellum gerendum depoposcit; misitque in id trecentos sex armatos, qui ad Cremeram ad unum ab hostibus caesi sunt, uno inpubere domi relicto. Ap. Claudius consul, quum adversus Volscos contumacia exercitus male pugnatum esset, decimum quemque militum fuste percussit. Res praeterea adversum Volscos, et Aequos, et Veientes, et seditiones inter Patres plebemque continet.

---



## T. LIVII PATAVINI

## LIBER II.

**L**iberi iam hinc populi Romani res, pace belloque U. c. 245.  
a. C. 507. gestas, annuos magistratus, imperiaque legum, potentiora quam hominum, peragam. Quae libertas ut laetior esset, proximi regis superbia fecerat. nam priores ita regnarunt, ut haud inmerito omnes deinceps conditores partium certe urbis, quas novas ipsi sedes ab se auctae multitudini addiderunt, numerentur: neque ambitur, quin Brutus idem, qui tantum gloriae, Superbo exacto rege, meruit, pessimo publico id facturum fuerit, si libertatis inmaturae cupidine priorum regum alicui regnum extorsisset. Quid enim futurum fuit, si illa pastorum convenarumque plebs, transfuga ex suis populis, sub tutela inviolati templi aut libertatem, aut certe inpunitatem, adepta, soluta regio metu, agitari coepta esset tribunicis procellis? et in aliena urbe cum Patribus serere certamina, priusquam pignora coniugum ac liberorum caritasque ipsius soli, cui longo tempore adsuescitur, animos eorum consociasset? Dissipatae res nondum adultae discordia forent: quas fovit tranquilla moderatio imperii, eoque nutriendo perduxit, ut bonam frugem libertatis maturis iam viribus ferre possent. Libertatis autem originem inde magis, quia annum imperium consulare factum est, quam quod deminutum quidquam sit ex regia potestate, numeres. Omnia iura, omnia insignia primi consules tenuere. id modo cautum est, ne, si ambo fasces haberent, duplicatus terror videre-

tur. Brutus prior, concedente collega, fasces habuit: qui non acrior vindex libertatis fuerat, quam deinde custos fuit. Omnium primum avidum novae libertatis populum, ne postmodum flecti precibus aut donis regis posset, iureiurando adegit, neminem Romae passuros regnare. Deinde, quo plus virium in senatu frequentia etiam ordinis faceret, caedibus regis deminutum Patrum numerum, primoribus equestri gradu lectis, ad trecentorum summam explevit, traditumque inde fertur, ut in senatum vocarentur, qui Patres, quique conscripti essent. conscriptos, videlicet, in novum senatum adpellabant lectos. Id mirum quantum profuit ad concordiam civitatis iungendosque Patribus plebis animos.

U. c. 345. II. Rerum deinde divinarum habita cura. et, quia  
a. C. 307. quaedam publica sacra per ipsos reges factitata erant, ne ubiubi regum desiderium esset, regem sacrificulum creant. Id sacerdotium pontifici subiecere, ne additus nomini honos aliquid libertati, cuius tunc prima erat cura, obficeret. ac nescio, an, nimis undique eam minimis quoque rebus muniendo, modum excesserint. Consul is alterius, quum nihil aliud obfenderit, nomen invisum civitati fuit. *Nimum Tarquinius regno adsuesse, initium a Prisco factum. Regnassee deinde Ser. Tullium. ne intervallo quidem facto, oblitum, tamquam alieni, regni Superbum Tarquinius: velut haereditatem gentis scelere ac vi repetisse. Pulso Superbo, penes Collatinum imperium esse. Nescire Tarquinius privatos vivere. non placere nomen. periculosum libertati esse.* Illic primo sensim tentantium animos sermo per totam civitatem est datus, sollicitamque suspicione plebem Brutus ad concionem vocat. Ibi omnium primum iusiurandum populi recitat. *Neminem regnare passuros, nec esse Romae, unde periculum libertati foret. Id summa ope tuendum esse: neque ullam rem, quae eo pertineat, contemnendam. Invitum se dicere hominis causa: nec dicturum fuisse, ni caritas*

*reipublicae vinceret. Non credere populum Romanum, U. c. 245. solidam libertatem recuperatam esse. Regium genus, a. C. 507. regium nomen, non solum in civitate, sed etiam in imperio esse. Id obficere, id obstare libertati. Hunc tu, inquit, tua voluntate, L. Tarquini, remove metum. Meminimus, fatemur, eiecisti reges. Absolve beneficium tuum. Aufer hinc regium nomen. Res tuas tibi non solum reddent cives tui, auctore me; sed, si quid deest, munifice augebunt. Amicus abi. exonera civitatem vano forsitan metu. Ita persuasum est animis, cum gente Tarquinia regnum hinc abiturum. Consuli primo tam novae rei ac subitae admiratio incluserat vocem. Dicere deinde incipientem primores civitatis circumstant, eadem multis precibus orant. Et ceteri quidem movebant minus. postquam Sp. Lucretius, maior aetate ac dignitate, socer praeterea ipsius, agere varie, rogando alternis suadendoque, coepit, ut vincte consensu civitatis pateretur; timens consul, ne postmodum privato sibi eadem illa cum bonorum amissione, additaque alia insuper ignominia, acciderent, abdicavit se consulatu: rebusque suis omnibus Lavinium translatis, civitate cessit. Brutus ex senatusconsulto ad populum tulit, ut omnes Tarquiniae gentis exsules essent: collegam sibi comitiis centuriatis creavit P. Valerium, quo adiutore reges eiecerat.*

III. Quum haud cuiquam in dubio esset, bellum ab Tarquiniiis imminere, id quidem spe omnium serius fuit. ceterum, id quod non timebant, per dolum ac prodicionem prope libertas amissa est. Erant in Romana iuventute adolescentes aliquot, nec ii tenui loco orti, quorum in regno libido solutior fuerat, aequales sodalesque adolescentium Tarquiniorum, adsueta more regio vivere. Eam tum, aequato iure omnium, licentiam quaerentes, libertatem aliorum in suam vertisse servitutem inter se conquerebantur. *Regem hominem esse, a quo inpetres, ubi ius, ubi iniuria opus sit: esse gratiae locum, esse beneficio; et*

U. c. 245. *irasci et ignoscere posse: inter amicum atque inimicum*  
 a. C. 507. *discrimen nosse. Leges rem surdam, inexorabilem esse,*  
*salubriorem melioremque inopi, quam potenti: nihil*  
*laxamenti nec veniae habere, si modum excesseris. peri-*  
*culosum esse, in tot humanis erroribus sola innocentia*  
*vivere.* Ita, iam sua sponte aegris animis, legati ab  
 regibus superveniunt, sine mentione reditus bona  
 tantum repetentes. eorum verba postquam in senatu  
 audita sunt, per aliquot dies ea consultatio tenuit:  
 ne non reddita, belli caussa; reddita, belli materia  
 et adiumentum essent. Interim legati alii alia moliri,  
 aperte bona repetentes, clam recuperandi regni con-  
 silia struere. et, tamquam ad id, quod agi videbatur,  
 ambientes nobilium adolescentium animos pertentant.  
 a quibus placide oratio accepta est, his literas ab Tar-  
 quiniis reddunt; et de accipiendis clam nocte in urbem  
 regibus colloquuntur.

IV. Vitelliis Aquilliisque fratribus primo com-  
 missa res est. Vitelliorum soror consuli nupta Bruto  
 erat: iamque ex eo matrimonio adolescentes erant li-  
 beri, Titus Tiberiusque. eos quoque in societatem  
 consilii avunculi adsumunt. praeterea et nobiles ali-  
 quot adolescentes conscii adsumti, quorum vetustate  
 memoria abiit. Interim quum in senatu vicisset sen-  
 tentia, quae censebat reddenda bona; eamque ipsam  
 causam morae in urbe haberent legati, quod spatium  
 ad vehicula comparanda a consulibus sumsissent, qui-  
 bus regum asportarent res; omne id tempus cum con-  
 iuratis consultando absumunt, evincuntque instando,  
 ut literae sibi ad Tarquinius darentur: nam aliter qui  
 credituros eos, non vana ab legatis super rebus tan-  
 tis adferri? Datae literae, ut pignus fidei essent, ma-  
 nifestum facinus fecerunt. nam quum, pridie quam le-  
 gati ad Tarquinius proficiscerentur, et coenatum forte  
 apud Vitellios esset, coniuratique ibi, remotis arbi-  
 tris, multa inter se de novo, ut fit, consilio egissent;  
 sermonem eorum ex servis unus excepit, qui iam ant-



ea id senserat agi: sed eam occasionem, ut literae <sup>U. c. 245.</sup> legatis darentur, quae deprehensae rem coarguere <sup>a. C. 507.</sup> possent, exspectabat. postquam datas sensit, rem ad consules detulit. Consules, ad deprehendendos legatos coniuratosque profecti domo, sine tumultu rem omnem obpressere: literarum in primis habita cura, ne interciderent. proditoribus extemplo in vincula coniectis, de legatis paullulum addubitatum est: et quamquam visi sunt commisisse, ut hostium loco essent, ius tamen gentium valuit.

V. De bonis regiis, quae reddi ante censuerant, res integra refertur ad Patres. illi victi ira vetuere reddi, vetuere in publicum redigi. Diripienda plebi sunt data; ut, contacta regia praeda, spem in perpetuum cum his pacis amitteret. Ager Tarquiniorum, qui inter urbem ac Tiberim fuit, consecratus Marti, Martius deinde campus fuit. Forte ibi tum seges far-  
ris dicitur fuisse matura messi. quem campi fructum quia religiosum erat consumere, desectam cum stramento segetem magna vis hominum simul inmissa cor-  
hibus fudere in Tiberim, tenui fluentem aqua, ut mediis caloribus solet. ita in vadis haesitantis frumenti acervos sedisse inlitos limo. Insulam inde paullatim, et aliis, quae fert temere flumen, eodem invectis, factam. postea credo additas moles, manuque adiutum, ut tam eminens area, firmaque <sup>a)</sup> templis quoque ac porticibus sustinendis esset. Direptis bonis regum, damnati proditores, sumtumque supplicium, conspectus eo, quod poenae capiendae ministerium patri de liberis consulatus inposuit, et, qui spectator erat amovendus, eum ipsum fortuna exactorem supplicii dedit. Stabant deligati ad palum nobilissimi iuvenes. sed a ceteris, velut ab ignotis capitibus, consulis liberi omnium in se averterant oculos, miserebatque non poenae magis homines, quam sceleris, quo poenam meriti essent; illos, eo potissimum anno pa-

a) firma Gron. Crev.

U. c. 245. triam liberatam, patrem liberatorem; consulatum or-  
 a. C. 507. tum ex domo Iunia, Patres, plebem, quidquid Deo-  
 rum hominumque Romanorum esset, induxisse in  
 animum, ut superbo quondam regi, tum infesto ex-  
 suli, proderent. Consules in sedem processere suam,  
 missique lictores ad sumendum supplicium nudatos  
 virgis caedunt, securique feriunt: quum inter omne  
 tempus pater, vultusque, et os eius, spectaculo esset,  
 eminente animo patrio inter publicae poenae ministe-  
 rium. Secundum poenam nocentium, ut in utram-  
 que partem arcendis sceleribus exemplum nobile es-  
 set, praemium indici, pecunia ex aerario, libertas et  
 civitas, data. Ille primum dicitur vindicta liberatus.  
 quidam vindictae quoque nomen tractum ab illo pu-  
 tant; Vindicio ipsi nomen fuisse. Post illum obser-  
 vatum, ut, qui ita liberati essent, in civitatem ac-  
 cepti viderentur.

VI. His, sicut acta erant, nunciatis, incensus  
 Tarquinius non dolore solum tantae ad irritum caden-  
 tis spei, sed etiam odio iraque, postquam dolo viam  
 obseptam vidit, bellum aperte moliendum ratus, cir-  
 cumire supplex Etruriae urbes; orare maxime Veien-  
 tes Tarquiniensesque, *ne se ortum, eiusdem sanguinis,*  
*extorrem egentem ex tanto modo regno, cum liberis ado-*  
*lescentibus ante oculos suos perire sinerent. Alios pere-*  
*gre in regnum Romanum aditos: se regem, augentem bel-*  
*lo Romanum imperium, a proximis scelerata coniura-*  
*tione pulsum. eos inter se, quia nemo unus satis dignus*  
*regno visus sit, partes regni rapuisse; bona sua diripi-*  
*enda populo dedisse, ne quis expers sceleris esset. Pa-*  
*triam se regnumque suum repetere, et persequi ingratos*  
*cives velle. Ferrent opem, adiuverent; suas quoque ve-*  
*teres iniurias ultum irent, toties caesas legiones, agrum*  
*ademptum. Haec moverunt Veientes: ac pro se quis-*  
*que, Romano saltem duce, ignominias demendas,*  
 belloque amissa repetenda, minaciter fremunt. Tar-  
 quinienses nomen ac cognatio movet. pulchrum vide-

batur, suos Romae regnare. Ita duo duarum civita-<sup>U. c. 245.</sup>  
tium exercitus, ad repetendum regnum belloque per-<sup>a. G. 507.</sup>  
sequendos Romanos, secuti Tarquinium. Postquam  
in agrum Romanum ventum est, obviam hosti consu-  
les eunt. Valerius quadrato agnine peditem ducit:  
Brutus ad explorandum cum equitatu antecessit. Eo-  
dem modo primus eques hostium agminis fuit, (prae-  
erat Aruns Tarquinius, filius regis) rex ipse cum le-  
gionibus sequebatur. Aruns, ubi ex lictoribus procul  
consulem esse; deinde iam propius ac certius facie  
quoque Brutum cognovit, inflammatus ira, *Ille est vir,*  
*inquit, qui nos extorres expulit patria. Ipse, en, ille,*  
*nostris decoratus insignibus, magnifice incedit. Diī*  
*regum ultores adeste.* Concitat calcaribus equum, at-  
que in ipsum infestus consulem dirigit. Sensit in se iri  
Brutus. Decorum erat tum ipsis capessere pugnam  
ducibus: avide itaque se certamini offert. adeoque  
infestis animis concurrerunt, neuter, dum hostem  
vulneraret, sui protegendī corporis memor, ut, con-  
trario ictu per parmam uterque transfixus, duabus  
haerentes hastis moribundi ex equis lapsi sint. simul  
et cetera equestris pugna coepit; neque ita multo post  
et pedites superveniunt. Ibi varia victoria, et velut  
aequo Marte pugnatum est. dextra utrimque cornua  
vicere, laeva superata. Veientes, vinci ab Romano  
milite adsuēti, fusi fugatique <sup>b</sup>). Tarquiniensis, no-  
vus hostis, non stetit solum, sed etiam ab sua parte  
Romanum pepulit.

VII. Ita quum pugnatum esset, tantus terror  
Tarquinium atque Etruscos incessit, ut, omīssa irrita  
re, nocte ambo exercitus, Veiens Tarquiniensisque,  
suas quisque abirent domos. Adiciunt miracula huic  
pugnae: silentio proximae noctis ex silva Arsia in-  
gentem editam vocem; Silvani vocem eam creditam;  
haec dicta, *Uno plus Etruscorum cecidisse in acie; vin-*  
*cere bello Romanum.* Ita certe inde abiere Romani, ut

b) add. sunt Gron. Crev.

U. c. 245. victores; Etrusci pro victis. Nam, postquam inluxit,  
 a. C. 507. nec quisquam hostium in conspectu erat, P. Valerius  
 consul spolia legit, triumphansque inde Romam red-  
 iit. collegae funus, quanto tum potuit adparatu, fe-  
 cit. sed multo maius morti decus publica fuit moesti-  
 tia, eo ante omnia insignis, quia matronae annum,  
 ut parentem, eum luxerunt, quod tam acer ultor vio-  
 latae pudicitiae fuisset. Consuli deinde, qui super-  
 fuerat, ut sunt mutabiles vulgi animi, ex favore non  
 invidia modo, sed suspicio etiam cum atroci crimine,  
 orta. Regnum eum adfectare, fama ferebat: quia nec  
 collegam subrogaverat in locum Bruti, et aedificabat  
 in summa Velia. ibi alto atque munito loco arcem  
 inexpugnabilem fore. Haec dicta vulgo creditaque  
 quum indignitate angerent consulis animum, vocato ad  
 concilium populo, submissis fascibus in concionem  
 descendit <sup>c)</sup>. Gratum id multitudini spectaculum fuit;  
 submissa sibi esse imperii insignia: confessionemque  
 factam, populi, quam consulis, maiestatem vimque  
 maiorem esse. Ubi audire iussi, consul *laudare for-*  
*tunam collegae, quod, liberata patria, in summo hono-*  
*re, pro republica dimicans, matura gloria, nec dum se*  
*vertente in invidiam, mortem occubuisset. se superstitem*  
*gloriae suae ad crimen atque invidiam superesse: ex li-*  
*beratore patriae ad Aquillios se <sup>d)</sup> Vitelliosque recidis-*  
*se. Numquamne ergo, inquit, ulla adeo a vobis spectata*  
*virtus erit, ut suspicione violari nequeat? Ego me, il-*  
*lum acerrimum regum hostem, ipsum cupiditatis regni*  
*crimen subitutum timerem? Ego, si in ipsa arce Capi-*  
*tolioque habitarem, metui me crederem posse a civibus*  
*meis? tam levi momento mea apud vos fama pendet?*  
*Adeone est fundata leviter fides, ut, ubi sim, quam qui*  
*sim, magis referat? Non obstabunt P. Valerii aedes*  
*libertati vestrae, Quirites; tuta erit vobis Velia. De-*  
*feram non in planum modo aedes, sed colli etiam subii-*  
*ciam: ut vos supra suspectum me civem habitetis. In*

c) ascendit Gron. Crev.

d) se del. Eaed.



*Velia aedificent, quibus melius, quam P. Valerio, creditur libertas.* Delata confestim materia omnis infra Veliam; et, ubi nunc Vicaepotae est, domus in infimo clivo aedificata.

VIII. Latae deinde leges, non solum quae regni suspicione consulem absolverent, sed quae adeo in contrarium verterent, ut popularem etiam facerent. inde cognomen factum Publicolae est. ante omnes de provocatione adversus magistratus ad populum, sacrandoque cum bonis capite eius, qui regni occupandi consilia inisset, gratae in vulgus leges fuere. Quas quum solus pertulisset, ut sua unius in his gratia esset, tum deinde comitia collegae subrogando habuit. Creatus Sp. Lucretius consul, qui magno natu, non subficientibus iam viribus ad consularia munera obeunda, intra paucos dies moritur. Subfectus in Lucretii locum M. Horatius Pulvillus. Apud quosdam veteres auctores non invenio Lucretium consulem: Bruto statim Horatium subgerunt. credo, quia nulla gesta res insignem fecerit consulatum, memoria intercidissee. Nondum dedicata erat in Capitolio Iovis aedes. Valerius Horatiusque consules sortiti, uter dedicaret. Horatio sorte evenit. Publicola ad Veientium bellum profectus. Aegrius, quam dignum erat, tulere Valerii necessarii, dedicationem tam incliti templi Horatio dari. id omnibus modis impedire conati, postquam alia frustra tentata erant, postem iam tenenti consuli foedum inter precationem Deum nuncium incutiunt; *mortuum eius filium esse, funestaque familia dedicare eum templum non posse.* Non crediderit factum, an tantum animo roboris fuerit, nec traditur certum, nec interpretatio est facilis. Nihil aliud ad eum nuncium a proposito adversus, quam ut cadaver efferri iuberet, tenens postem, precationem peragit, et dedicat templum. Haec post exactos reges domi militiaeque gesta primo anno. Inde P. Valerius iterum, T. Lucretius consules facti.

U. c. 245.  
a. C. 507.

U. c. 246.  
a. C. 506.

IX. Iam Tarquinii ad Lartem Porsenam, Clusinum regem, perfugerant. ibi, miscendo consilium precesque, nunc orabant, *ne se, oriundos ex Etruscis, eiusdem sanguinis nominisque, egentes exsulare pateretur*: nunc monebant etiam, *ne orientem morem pellendi reges inultum sineret. Satis libertatem ipsam habere dulcedinis. Nisi, quanta vi civitates eam expetant, tanta regna reges defendant, aequari summa infimis. nihil excelsum, nihil, quod supra cetera emineat, in civitatibus fore. Adesse finem regnis, rei inter Deos hominesque pulcherrimae.* Porsena, tum regem esse Romae, tum Etruscae, gentis regem, amplum Tusci ratus, Romam infesto exercitu venit. Non unquam alias ante tantus terror senatum invasit. Adeo valida res tum Clusina erat, magnumque Porsenae nomen. nec hostes modo timebant, sed suosmet ipsi cives, ne Romana plebs, metu perculsa, receptis in urbem regibus, vel cum servitute pacem acciperet. Multa igitur blandimenta plebi per id tempus ab senatu data. annonae imprimis habita cura, et ad frumentum comparandum missi, alii in Volscos, alii Cumas. Salis quoque vendendi arbitrium, quia inpenso pretio venibat, in publicum omne sumtum <sup>e)</sup>, ademptum privatis. Portoriisque <sup>f)</sup> et tributo plebes <sup>g)</sup> liberata, ut divites conferrent, qui oneri ferendo essent: pauperes satis stipendii pendere, si liberos educarent. Itaque haec indulgentia Patrum, asperis postmodum rebus in obsidione ac fame, adeo concordem civitatem tenuit, ut regium nomen non summi magis, quam infimi, horrerent: nec quisquam unus malis artibus postea tam popularis esset, quam tum bene imperando universus senatus fuit.

X. Quum hostes adessent, pro se quisque in urbem ex agris demigrant: urbem ipsam sepiunt prae-

e) omni sumtu Gron. Crev.  
c. Drak.

f) Portoriis quoque Gron.  
Crev.

g) plebe Eaed.

sidiis. alia muris, alia Tiberi obiecto videbantur tuta. U. c. 245.  
 Pons sublicius iter pene hostibus dedit: ni unus vir<sup>a. C. 506.</sup>  
 fuisset, Horatius Cocles; (id munimentum illo die fortuna urbis Romanae habuit) qui, positus forte in statione pontis, quum captum repentino inpetu Ianiculum, atque inde citatos decurrere hostes vidisset, trepidamque turbam suorum arma ordinesque relinquere, reprehensans singulos, obsistens, obtestansque Deum et hominum fidem, testabatur: *nequidquam deserto praesidio eos fugere. Si transitum pontem a tergo reliquissent, iam plus hostium in Palatio Capitolioque, quam in Ianiculo, fore. Itaque monere, praedicere, ut pontem ferro, igni, quacumque vi possent, interrumpant. Se inpetum hostium, quantum corpore uno posset obsisti, excepturum.* Vadit inde in primum aditum pontis: insignisque inter conspecta cedentium pugnae terga, obversis cominus ad ineundum proelium armis, ipso miraculo audaciae obstupescit hostes. duos tamen cum eo pudor tenuit, Sp. Lartium ac T. Herminium, ambos claros genere factisque. Cum his primam periculi procellam, et quod tumultuosissimum pugnae erat, parumper sustinuit. deinde eos quoque ipsos, exigua parte pontis relicta, revocantibus, qui rescindebant, cedere in tutum coegit. Circumferens inde truces minaciter oculos ad proceres Etruscorum, nunc singulos provocare, nunc increpare omnes, *Servitia regum superborum, suae libertatis inmemores, alienam obpugnatum venire.* Cunctati aliquamdiu sunt, dum alius alium, ut proelium incipiant, circumspectant. pudor deinde commovit aciem, et, clamore sublato, undique in unum hostem tela coniiciunt. Quae quum in obiecto cuncta scuto haesissent, neque ille minus obstinatus ingenti pontem obtineret gradu, iam inpetu conabantur detrudere virum; quum simul fragor rupti pontis, simul clamor Romanorum, alacritate perfecti operis sublatus, pavore subito inpetum sustinuit. Tum Cocles, *Tiberine pater, inquit, te sancte precor, haec*

U. c. 216. *arma et hunc militem propitio flumine accipias. Ita sic*  
 a. C. 505. armatus in Tiberim desiluit: multisque superinciden-  
 tibus telis incolumis ad suos tranavit, rem ausus plus  
 famae habituram ad posteros, quam fidei. Grata er-  
 ga tantam virtutem civitas fuit: statua in comitio po-  
 sita, agri quantum uno die circumaravit, datum. Pri-  
 vata quoque inter publicos honores studia eminebant.  
 nam in magna inopia pro demesticis copiis unusquis-  
 que ei aliquid, fraudans se ipse victu suo, contulit.

XI. Porsena, primo conatu repulsus, consiliis  
 ab obpugnanda urbe ad obsidendam versis, praesidio  
 in Ianiculo locato, ipse in plano ripisque Tiberis ca-  
 stra posuit; navibus undique adcitis, et ad custodiam,  
 ne quid Roman frumenti subvehi sineret, et ut prae-  
 datum milites trans flumen per occasiones aliis atque  
 aliis locis traiceret <sup>h</sup>): brevique adeo infestum omnem  
 Romanum agrum reddidit, ut non cetera solum ex a-  
 gris, sed pecus quoque omne in urbem compelleretur,  
 neque quisquam extra portas propellere auderet. Hoc  
 tantum licentiae Etruscis, non metu magis, quam con-  
 silio, concessum. namque Valerius consul, inten-  
 tus in occasionem multos simul et effusos improviso  
 adoriundi, in parvis rebus neglegens ultor, gravem  
 se ad maiora vindicem servabat. Itaque, ut eliceret  
 praedatores, edicit suis, postero die frequentes porta  
 Esquilina, quae aversissima ab hoste erat, expelle-  
 rent pecus; scituros id hostes ratus, quod in obsidione  
 et fame servitia infida transfugerent. Et sciare per-  
 fugae indicio; multoque plures, ut in spem univer-  
 sae praedae, flumen traiciunt. P. Valerius inde T.  
 Herminium cum modicis copiis ad secundum lapidem  
 Gabina via occultum considerare iubet: Sp. Lartium  
 cum expedita inventute ad portam Collinam stare, do-  
 nec hostis praetereat. deinde se obicere, ne sit ad  
 flumen reditus. Consulum alter T. Lucretius porta  
 Naevia cum aliquot manipulis militum egressus: ipse

<sup>h</sup>) *traicerent Gron. Crev.*



Valerius Coelio monte cohortes delectas educit. hi-U. c. 246.  
 que prius adparuere hosti. Herminius, ubi tumultum<sup>a. C. 506.</sup>  
 sensit, concurret ex insidiis, versisque in Valerium  
 Etruscis terga caedit. dextra laevaque, hinc a porta  
 Collina, illinc ab Naevia, redditus clamor. ita caesi  
 in medio praedatores, neque ad pugnam viribus pares,  
 et ad fugam septis omnibus viis. finisque ille tam effuso  
 evagandi<sup>1)</sup> Etruscis fuit.

XII. Obsidio erat nihilominus et frumenti cum  
 summa caritate inopia; sedendoque expugnaturum se  
 urbem spem Porsena habebat: quum C. Mucius, ado-  
 lescens nobilis, cui indignum videbatur, populum  
 Romanum servientem, quum sub regibus esset, nullo  
 bello nec ab hostibus ullis obsessum esse; liberum eum-  
 dem populum ab iisdem Etruscis obsideri, quorum  
 saepe exercitus fuderit; itaque, magno audacique ali-  
 quo facinore eam indignitatem vindicandam ratus,  
 primo sua sponte penetrare in hostium castra consti-  
 tuit. dein metuens, ne, si consulum iniussu et igna-  
 ris omnibus iret, forte deprehensus a custodibus Ro-  
 manis retraheretur ut transfuga, fortuna tum urbis  
 crimen adfirmante, senatum adiit: *Transire Tiberim,*  
*inquit, Patres, et intrare, si possim, castra hostium*  
*volo; non praedo, nec populationum in vicem ultor. ma-*  
*ius, si Dii iuvant, in animo est facinus.* Adprobant  
 Patres: abdito intra vestem ferro, proficiscitur. Ubi  
 eo venit, in confertissima turba prope regium tribu-  
 nal constitit. Ibi quum stipendium forte militibus  
 daretur, et scriba, cum rege sedens pari fere ornatu,  
 multa ageret, eum milites vulgo adirent, timens sci-  
 scitari, uter Porsena esset, ne ignorando regem se-  
 met ipse aperiret, quis esset, quo temere traxit for-  
 tuna facinus, scribam pro rege obruncat. Vadentem  
 inde, qua per trepidam turbam cruento mucrone sibi  
 ipse fecerat viam, quum, concursu ad clamorem facto,  
 comprehensum regii satellites retraxissent, ante tri-

i) vagandi Gron. Crev.

U. c. 246. bunal regis destitutus, tum quoque, inter tantas for-  
 a. C. 506. tunae minas, metuendus magis, quam metuens: *Romanus sum, inquit, civis. C. Mucium vocant. hostis hostem occidere volui. nec ad mortem minus animi est, quam fuit ad caedem. Et facere et pati fortia, Romanum est. Nec unus in te ego hos animos gessi: longus post me ordo est idem petentium decus. Proinde in hoc discrimen, si iuvat, adcingere, ut in singulas horas capite dimices tuo; ferrum hostemque in vestibulo habeas regiae. Hoc tibi iuventus Romana indicimus bellum: Nullam aciem, nullum proelium timueris. Uni tibi, et cum singulis, res erit. Quum rex, simul ira infensus, periculoque conterritus, circumdari ignes minitabundus iuberet, nisi expromeret propere, quas insidiarum sibi minas per ambages iaceret: En tibi, inquit, ut sentias, quam vile corpus sit iis, qui magnam gloriam vident: dextramque accenso ad sacrificium foculo iniicit. quam quum velut alienato ab sensu torreret animo; prope adtonitus miraculo rex, quum ab sede sua prosiluisset, amoverique ab altaribus iuvenem iussisset, Tu vero abi, inquit, in te magis, quam in me, hostilia ausus. Iuberem macte virtute esse, si pro mea patria ista virtus staret. Nunc iure belli liberum te, intactum inviolatumque hinc dimitto. Tum Mucius, quasi remunerans meritum, Quandoquidem, inquit, est apud te virtuti honos, ut beneficio tuleris a me, quod minis nequisti; trecenti coniuravimus principes iuventutis Romanae, ut in te hac via grassaremur. Mea prima sors fuit. ceteri, ut cuique ceciderit primo, quoad te opportunum fortuna dederit, suo quisque tempore, aderunt.*

XIII. Mucium dimissum, cui postea Scaevolae a clade dextrae manus cognomen inditum, legati a Por-sena Romam secuti sunt. Adeo moverat eum et primi periculi casus, quo nihil se praeter errorem insidiatoris texisset, et subeunda dimicatio toties, quot coniurati superessent, ut pacis conditiones ultro fer-

ret Romanis. Iactatum in conditionibus nequidquam de Tarquiniis in regnum restituendis, magis quia id negare ipse nequiverat Tarquiniis, quam quod negatum iri sibi ab Romanis ignoraret. De agro Veientibus restituendo inpetratum: expressaque necessitas obsides dandi Romanis, si Ianiculo praesidium deduci vellent. His conditionibus composita pace, exercitum ab Ianiculo deduxit Porsena, et agro Romano excessit. Patres C. Mucio virtutis caussa trans Tiberim agrum dono dedere, quae postea sunt Mucia prata appellata. Ergo, ita honorata virtute, feminae quoque ad publica decora excitatae. Et <sup>k)</sup> Cloelia virgo, una ex obsidibus, quum castra Etruscorum forte haud procul ripa Tiberis locata essent, frustrata custodes, dux agminis virginum inter tela hostium Tiberim transavit: sospitesque omnes Romam ad propinquos restituit. Quod ubi regi nunciatum est, primo incensus ira, oratores Romam misit ad Cloeliam obsidem deprecandam; alias haud magni facere: deinde in admirationem versus, *supra Coclites Muciosque dicere id facinus esse, et prae se ferre, quemadmodum, si non dedatur obses, pro rupto se foedus habiturum; sic deditam, inviolatam ad suos remissurum.* Utrunque constitit fides: et Romani pignus pacis ex foedere restituerunt: et apud regem Etruscum non tuta solum, sed honorata etiam, virtus fuit: laudatamque virginem parte obsidum se donare dixit: ipsa, quos vellet, legeret. Productis omnibus, elegisse inpubes <sup>l)</sup> dicitur: quod et virginitati decorum, et consensu obsidum ipsorum probabile erat, eam aetatem potissimum liberari ab hoste, quae maxime opportuna iniuriae esset. Pace redintegrata, Romani novam in femina virtutem novo genere honoris, statua equestri, donavere. in summa Sacra via fuit posita virgo insidens equo.

k) Et del. Gron. Crev.

l) impuberes Eaed.

U. c. 246.

a. C. 506.

**XIV.** Huic tam pacatae profectioni ab urbe regis Etrusci abhorrens mos, traditus ab antiquis, usque ad nostram aetatem inter cetera sollemnia manet bonis vendendis, bona Porsenae regis vendendi. Cuius originem moris, necesse est, aut inter bellum natam esse, neque omissam in pace; aut a <sup>m)</sup> mitiore crevisse principio, quam hic prae se ferat titulus bona hostiliter vendendi. Proximum vero est ex iis, quae traduntur, Porsenam, discedentem <sup>n)</sup> ab Ianiculo, castra opulenta, convecto ex propinquis ac fertilibus Etruriae arvis commeatu, Romanis dono dedisse, inopi tum urbe ab longinqua obsidione. ea deinde, ne populo inmisso diriperentur hostiliter, venisse, bonaque Porsenae adpellata, gratiam muneris magis significante titulo, quam auctionem fortunae regiae, quae ne in potestatem quidem populi Romani esset. Omisso Romano bello, Porsena, ne frustra in ea loca exercitus adductus videretur, cum parte copiarum filium Aruntem Ariciam obpugnatum mittit. Primo Aricinos res necopinata perculerat. arcessita deinde auxilia, et a Latinis populis, et a Cumis, tantum spei fecere, ut acie decernere auderent. Proelio inito, adeo concitato impetu se intulerant Etrusci, ut funderent ipso incursu Aricinos. Cumanae cohortes, arte adversus vim usae, declinavere paullulum; efflu-seque praelatos hostes conversis signis ab tergo ador-tae sunt. Ita in medio prope iam victores caesi Etrusci: pars perexigua, duce amisso, quia nullum propius perfugium erat, Romam inermes et fortuna et specie supplicum dalati sunt. ibi benigne excepti divisique in hospitia. Curatis vulneribus, alii pro-fecti domos, nuncii hospitalium beneficiorum. Mul-tos Romae hospitem urbisque caritas tenuit. his lo-cus ad habitandum datus, quem deinde *Tuscum vicum* adpellarunt.

m) a del. Gron. Crev.

n) descendentem Eaed.



**XV. P. Lucretius inde et P. Valerius Publicola** <sup>o)</sup> U. c. 247. consules facti. Eo anno postremum legati a Porsena <sup>a. c. 505.</sup> de reducendo in regnum Tarquinio venerunt. quibus quum responsum esset, missurum ad regem senatum legatos; missi confestim honoratissimus quisque ex Patribus. *Non, quum breviter reddi responsum potuerit, non recipi reges, ideo potius delectos Patrum ad eum missos, quam legatis eius Romae daretur responsum: sed ut in perpetuum mentio eius rei finiretur, neu in tantis mutuis beneficiis in vicem animi sollicitarentur: quum ille peteret, quod contra libertatem populi Romani esset; Romani, nisi in perniciem suam faciles esse vellent, negarent, cui nihil negatum vellent. Non in regno populum Romanum, sed in libertate esse. ita induxisse in animum, hostibus potius, quam regibus, portas patefacere. Eam esse voluntatem omnium, ut, qui libertati erit in illa urbe finis, idem urbi sit. Proinde, si salvam esse vellet Romam, ut patiatur liberam esse, orare. Rex verecundia victus, Quando id certum atque obstinatum est, inquit, neque ego obtundam saepius eadem nequidquam agendo: nec Tarquinius spe auxilii, quod nullum in me est, frustrabor. Alium hinc, seu bello opus est, seu quiete, exsilio quaerant locum, ne quid meam vobiscum pacem distineat.* Dictis facta amiciora adiecit. obsidum quod reliquum erat, reddidit. agrum Veientem, foedere ad Ianiculum icto ademptum, restituit. Tarquinius, spe omni reditus incisa, exsulatum ad generum Mamilium Octavium Tusculum abiit. Romanis pax fida ita cum Porsena fuit.

**XVI. Consules** <sup>p)</sup> M. Valerius, P. Postumius. Eo <sup>U. c. 249.</sup> anno bene pugnatum cum Sabinis. consules triumpharunt. <sup>a. c. 503.</sup> Maiore inde mole Sabini bellum parabant. adversus eos, et ne quid simul ab Tusculo (unde, etsi non apertum, suspectum tamen bellum erat,) repentinum periculi oriretur, P. Valerius quartum, T. Lu- <sup>U. c. 250.</sup> cretius iterum consules facti. Seditio, inter belli pa- <sup>a. c. 502.</sup>

o) add. *tertium* Gron. Crev.p) add. *deinde* Eaed.

cisque auctores orta in Sabinis, aliquantum inde virium transtulit ad Romanos. namque Attus <sup>q)</sup> Clausus, cui postea Ap. Claudio fuit Romae nomen, cum pacis ipse auctor a turbatoribus belli premeretur, nec par factioni esset, ab Regillo, magna clientium comitatus manu, Romam transfugit. His civitas data agerque trans Anienem. vetus Claudia tribus, additis postea novis tribulibus, qui ex eo venirent <sup>r)</sup> agro, adpellata. Appius, inter Patres lectus, haud ita multo post in principum dignationem pervenit. Consules, infesto exercitu in agrum Sabinum profecti, quum ita vastatione, dein <sup>s)</sup> proelio, afflixissent opes hostium, ut diu nihil inde rebellionis timere possent, triumphantes Romam redierunt. P. Valerius, omnium consensu princeps belli pacisque artibus, anno post, Agrippa Menenio, P. Postumio consulibus, moritur, gloria ingenti, copiis familiaribus adeo exiguis, ut funeri sumtus deesset: de publico est elatus. Luxere matronae, ut Brutum. Eodem anno duae coloniae Latinae, Pometia et Cora, ad Auruncos deficiunt. cum Auruncis bellum initum: fusoque ingenti exercitu, qui se ingredientibus fines consulibus ferociter obtulerat, omne Auruncum bellum Pometiam compulsus est. Nec magis post proelium, quam in proelio, caedibus temperatum est. et caesi aliquanto plures erant, quam capti; et captos passim trucidaverunt. ne ab obsidibus quidem, qui trecenti accepti numero erant, iram belli hostis abstinuit. Et hoc anno Romae triumphatum.

U. c. 251.  
a. C. 501. XVII. Secuti consules, Opiter Virginius et Sp. Cassius, Pometiam primo vi, deinde vineis aliisque operibus, obpugnaverunt. in quos Aurunci, magis iam inexpiabili odio, quam spe aliqua aut occasione, coorti, quum plures igni, quam ferro, armati excurrissent <sup>t)</sup>, caede incendioque cuncta complent.

q) *Atta* Gron. Crev.

r) *venerant* Eaed.

s) *deinde* Eaed.

t) *excurrissent* Eaed.

vineis incensis, multis hostium vulneratis et occisis, consulum quoque alterum, (sed utrum, nomen auctores non adiiciunt) gravi vulnere ex equo deiectum, prope interfecerunt. Romam inde, male gesta re, reditum. inter multos saucios consul spe incerta vitae relictus. Interiecto deinde haud magno spatio, quod vulneribus curandis supplendoque exercitui satis esset, tum ira maiore belli, tum viribus etiam auctis, Poemetiae arma inlata. et quum, vineis reffectis aliaque mole belli, iam in eo esset, ut in muros evaderet miles, deditio est facta. ceterum nihilo minus foede, dedita urbe, quam si capta foret, Aurunci passim principes securi percussi, sub corona venierunt coloni alii; oppidum dirutum, ager veniit. Consules, magis ob iras graviter ultas, quam ob magnitudinem perfecti belli, triumpharunt.

XVIII. Insequens annus Postumum Cominium<sup>U. c. 253.</sup> et T. Lartium consules habuit. Eo anno Romae,<sup>a. C. 499.</sup> quum per ludos ab Sabinorum iuventute per lasciviam scorta raperentur, concursu hominum rixa ac prope proelium fuit; parvaque ex re ad rebellionem spectare res videbatur. Supra belli Latini metum id quoque accesserat, quod triginta iam coniurasse populos, concitante Octavio Mamilio, satis constabat. In hac tantarum exspectatione rerum sollicita civitate, dictatoris primum creandi mentio orta. sed nec quo anno, nec quibus consulibus, quia ex factione Tarquinia essent, (id quoque enim traditur) parum creditum sit, nec quis primum dictator creatus sit, satis constat, apud veterrimos tamen auctores T. Lartium dictatorem primum, Sp. Cassium magistrum equitum, creatos invenio. Consulares legere: ita lex iubebat, de dictatore creando lata. Eo magis adducor, ut credam, Lartium, qui consularis erat, potius, quam M. Valerium, M. filium, Volesi nepotem, qui nondum consul fuerat, moderatorem et magistrum consulibus adpositum, qui, si maxime ex ea familia legi dictatorem

vellent, patrem multo potius M. Valerium, spectatae virtutis et consularem virum, legissent. Creato dictatore primum Romae, postquam praeferri secures viderunt, magnus plebem metus incessit, ut intentiones essent ad dicto parendum. neque enim, ut in consulibus, qui pari potestate essent, alterius auxilium, neque provocatio erat; neque ullum usquam, nisi in cura parendi, auxilium. Sabinis etiam creatus Romae dictator (eo magis quod propter se creatum crediderant) metum incussit. itaque legatos de pace mittunt. quibus, orantibus dictatorem senatumque, ut veniam erroris hominibus adolescentibus darent, responsum; *ignosci adolescentibus posse, senibus non posse, qui bella ex bellis sererent*. actum tamen est de pace: inpetrataque foret, si, quod inpensae factum in bellum erat, praestare Sabini (id enim postulatum erat) in animum induxissent. Bellum indictum. tacitae induciae quietum annum tenuere.

U. c. 254. XIX. Consules Ser. Sulpicius, M. Tullius. nihil dignum memoria actum. T. Aebutius deinde et C. Vetustius. His consulibus Fidenae obsessae, Crustumeria capta, Praeneste ab Latinis ad Romanos descivit. nec ultra bellum Latinum, gliscens iam per aliquot annos, dilatum. A. Postumius dictator, T. Aebutius magister equitum, magnis copiis peditum equitumque profecti, ad lacum Regillum in agro Tusculano agmini hostium obcurrerunt. et, quia Tarchinios esse in exercitu Latinorum auditum est, suscineri ira non potuit, quin extemplo confligerent. Ergo etiam proelium aliquanto, quam cetera, gravius atque atrocius fuit. non enim duces ad regendam modo consilio rem adfuere, sed, suismet ipsis corporibus dimicantes, miscuere certamina. nec quisquam procerum ferme hac aut illa <sup>u)</sup> ex acie sine vulnere, praeter dictatorem Romanum, excessit. In Postumium, prima in acie suos adhortantem instruente-

<sup>u)</sup> illac Gron. Crev.



que, Tarquinius Superbus, quamquam iam aetate et viri-  
 bus erat gravior, equum infestus admisit: ictusque ab la-  
 tere, concursu suorum receptus in tutum est. Et ad alte-  
 rum cornu Aebutius magister equitum in Octavium  
 Mamilium inpetum dederat. nec fefellit veniens Tu-  
 sculanum ducem: contra quem et ille concitat equum.  
 tantaque vis infestis venientium hastis fuit, ut bra-  
 chium Aebutio traiectum sit, Mamilio pectus per-  
 cussum. Hunc quidem in secundam aciem Latini re-  
 cepere. Aebutius, quum saucio brachio tenere telum  
 non posset, pugna excessit. Latinus dux, nihil de-  
 territus vulnere, proelium ciet; et, quia suos percul-  
 sos videbat, arcessit cohortem exsulum Romanorum,  
 cui L. Tarquinii filius praeerat. ea, quod <sup>x)</sup> maiore  
 pugnabat ira ob erepta bona patriamque ademptam, pug-  
 nam parumper restituit.

XX. Referentibus iam pedem ab ea parte Ro-  
 manis, M. Valerius, Publicolae frater, conspicatus  
 ferocem iuvenem Tarquinium, ostentantem se in pri-  
 ma exsulum acie, domestica etiam gloria accensus;  
 ut, cuius familiae decus eiecti reges erant, eiusdem  
 interfecti forent, subdit calcaria equo, et Tarquinium  
 infesto spiculo petit. Tarquinius retro in agmen suo-  
 rum infenso cessit hosti. Valerium, temere inve-  
 ctum in exsulum aciem, ex transverso quidam ador-  
 tus transfigit: nec quidquam equitis vulnere equo retar-  
 dato, moribundus Romanus, labentibus super corpus  
 armis, ad terram defluxit. Dictator Postumius, post-  
 quam cecidisse talem virum, exsules ferociter citato  
 agmine invehit, suos percussos cedere animadvertit;  
 cohorti suae, quam delectam manum praesidii causa  
 circa se habebat, dat signum, ut, quem suorum fu-  
 gientem viderint, pro hoste habeant. ita metu an-  
 cipi versi a fuga Romani in hostem, et restituta acies.  
 Cohors dictatoris tum primum proelium iniit. integris  
 corporibus animisque fessos adorti exsules caedunt.

x) quo Gron. Crev.

U. c. 255. Ibi alia inter procures coorta pugna. Imperator La-  
 a. C. 497. tinus, ubi cohortem exsulum a dictatore Romano prope  
 circumventam vidit, ex subsidiariis manipulos aliquot  
 in primam aciem secum rapit. hos agmine venientes  
 T. Herminius legatus conspicatus, interque eos insig-  
 nem veste armisque Mamilium noscitans, tanto vi  
 maiore, quam paullo ante magister equitum, cum ho-  
 stium duce proelium init, ut et uno ictu transfixum  
 per latus occiderit Mamilium, et ipse inter spoliandum  
 corpus hostis veruto percussus, quum victor in castra  
 esset relatus, inter primam curationem exspirave-  
 rit. Tum ad equites dictator advolat, obtestans, ut,  
 fesso iam pedite, descendant ex equis, et pugnam  
 capessant. Dicto parvare: desiliunt ex equis, pro-  
 volant in primum, et pro antesignanis parmas obii-  
 ciunt. Recipit extemplo animum pedestris acies, post-  
 quam iuventutis procures aequato genere pugnae se-  
 cum partem periculi sustinentes vidit. Tum demum  
 impulsus Latini, perculsaque inclinavit acies. Equiti <sup>y</sup>)  
 admoti equi, ut persequi hostem posset <sup>z</sup>). secuta et  
 pedestris acies. Ibi, nihil nec divinae nec humanae  
 opis dictator praetermittens, aedem Castori vovisse  
 fertur: ac pronunciasse militi praemia, qui primus,  
 qui secundus, castra hostium intrasset. tantusque ar-  
 dor fuit, ut eodem inpetu, quo fuderant hostem, Ro-  
 mani castra caperent. Hoc modo ad lacum Regillum  
 pugnatum est. Dictator et magister equitum trium-  
 phantes in urbem rediere.

U. c. 256. XXI. Triennio deinde nec certa pax, nec bellum  
 a. C. 496. fuit. Consules Q. Cloelius et T. Lartius. Inde A.  
 U. c. 257. Sempronius et M. Minucius. His consulibus aedes  
 a. C. 495. Saturno dedicata: Saturnalia institutus festus dies.  
 A. deinde Postumius et T. Virginus consules facti.  
 U. c. 258. Hoc demum anno ad Regillum lacum pugnatum, apud  
 a. C. 494. quosdam invenio; A. Postumium, quia collega dubiae  
 fidei fuerit, se consulatu abdicasse; dictatorem inde fa-

y) *Equitibus Gron. Crev.* z) *possent Laed.*

ctum. Tanti errores implicant temporum, aliter apud alios ordinatis magistratibus, ut, nec qui consules secundum quosdam, nec quid quoque anno actum sit, in tanta vetustate, non rerum modo, sed etiam auctororum, digerere possis. Ap. Claudius deinde et P. Servilius consules facti. Insignis hic annus est nuncio Tarquinii mortis. Mortuus est Cumis, quo se post fractas opes Latinorum ad Aristodemum tyrannum contulerat. Eo nuncio erecti Patres, erecta plebes. sed Patribus nimis luxuriosa ea fuit laetitia: plebi, cui ad eam diem summa ope inservitum erat, iniuriae a primoribus fieri coepere. Eodem anno Signia colonia, quam rex Tarquinius deduxerat, suppleto numero colonorum, iterum deducta est. Romae tribus una et viginti factae. Aedes Mercurii dedicata est Idibus Maiis.

U. c. 259.

a. C. 493.

XXII. Cum Volscorum gente Latino bello neque pax, neque bellum fuerat. nam et Volsci comparaverant auxilia, quae mitterent Latinis, ni maturatum ab dictatore Romano esset; et maturavit Romanus, ne proelio uno cum Latino Volcoque contenderet. Hac ira consules in Volscum agrum legiones duxere. Volscos, consilii poenam non metuentes, necopinata res perculit. Armorum inmemores obdantes dant trecentos principum a Cora atque Pometia liberos. ita sine certamine inde abductae legiones. Nec ita multo post Volscis levatis metu suum rediit ingenium: rursus occultum parant bellum, Hernicis in societatem armorum adsumtis. Legatos quoque ad sollicitandum Latium passim dimittunt. Sed recens ad Regillum lacum accepta clades Latinos ira odioque eius, quicumque arma suaderet, ne ab legatis quidem violandis abstinuit. Comprehensos Volscos Romam duxere. Ibi traditi consulibus. indicatumque est, Volscos Hernicosque parare bellum Romanis. Relata re ad senatum, adeo fuit gratum Patribus, ut et captivorum sex millia Latinis remitterent,

U. c. 259. et de foedere, quod prope in perpetuum negatum fuerat, rem ad novos magistratus reicerent. Enimvero tum Latini gaudere facto, pacis auctores in ingenti gloria esse. Coronam auream Iovi donum in Capitolium mittunt. cum legatis donoque, qui captivorum remissi ad suos fuerant, magna circumfusa multitudo venit. Pergunt domos eorum, apud quem quisque servierant: gratias agunt, liberaliter habiti cultique in calamitate sua. inde hospitia iungunt. Numquam alias ante publice privatimque Latinum nomen Romano imperio coniunctius fuit.

XXIII. Sed et bellum Volscum imminebat, et civitas, secum ipsa discors, intestino inter Patres plebemque flagrabat odio, maxime propter nexos ob aes alienum. Fremebant, *se, foris pro libertate et imperio dimicantes, domi a civibus captos et obpressos esse; tutioremque in bello, quam in pace, inter hostes, quam inter cives, libertatem plebis esse.* invidiamque eam, sua sponte gliscentem, insignis unius calamitas accendit. Magno natu quidam cum omnium malorum suorum insignibus se in forum proiecit. obsita erat squalore vestis, foedior corporis habitus pallore ac macie peremti. Ad hoc, promissa barba et capilli efferaverant speciem oris. Noscitabatur tamen in tanta deformitate, et ordines duxisse aiebant, aliaque militiae decora vulgo, miserantes eum, iactabant. ipse, testes honestarum aliquot locis pugnarum, cicatrices adverso pectore ostentabat. Sciscitantibus *unde ille habitus? unde deformitas?* quum circumfusa turba esset prope in concionis modum, Sabino bello, ait, *se militantem, quia propter populationes agri non fructu modo caruerit, sed villa incensa fuerit, direpta omnia, pecora abacta, tributum iniquo suo tempore imperatum, aes alienum fecisse: id, cumulatam usuris, primo se agro paterno avitque exuisse, deinde fortunis aliis: postremo, velut tabem, pervenisse ad corpus. Ductum se ab creditore, non in servitium, sed in ergastulum et*



*carnificinam esse.* Inde ostentare tergum, foedum U. c. 259. recentibus vestigiis verberum. Ad haec visa audita— a. C. 493. que clamor ingens oritur. Non iam foro se tumultus continet, sed passim totam urbem pervadit. Nexu vincti solutique se undique in publicum proripiunt, implorant Quirilium fidem. Nullo loco deest seditio- nis voluntarius comes. multis passim agminibus per omnes vias cum clamore in forum curritur. Magno cum periculo suo, qui forte Patrum in foro erant, in eam turbam inciderunt. nec temperatum manibus foret, ni propere consules, P. Servilius et Ap. Claudius, ad comprimendam seditionem intervenissent. In eos multitudo versa, ostentare vincula sua deformi- tateinque aliam. Haec se meritos dicere, exprobran- tes suam quisque alius alibi militiam. Postulare mul- to minaciter magis, quam suppliciter, ut senatum vo- carent: curiamque ipsi, futuri arbitri moderatoresque publici consilii, circumstant. Pauci admodum Pa- trum, quos casus obtulerat, contracti ad consules: ceteros metus non curia modo, sed etiam foro arce- bat. nec agi quidquam per infrequentiam poterat se- natus. Tum vero eludi atque extrahi se multitudo putare; et, Patrum qui abessent, non casu, non me- tu, sed impediendae rei caussa abesse, et consules ipsos tergiversari; nec dubie ludibrio esse miseras suas. Iam prope erat, ut ne consulum quidem ma- iestas coerceret iras hominum. quum, incerti, mo- rando, an veniendo, plus periculi contraherent, tan- dem in senatum veniunt: frequentique tandem curia, non modo inter Patres, sed ne inter consules quidem ipsos, satis conveniebat. Appius, vehementis inge- nii vir, imperio consulari rem agendam censebat: uno aut altero adrepto, quieturos alios. Servilius, leni- bus remediis aptior, concitatos animos flecti, quam frangi, putabat quum tutius, tum facilius, esse.

XXIV. Inter haec maior alius terror. Latini equites cum tumultuoso advolant nuncio: *Volscos in-*

U. c. 259. *festo exercitu ad urbem obpugnandam venire.* quae au-  
 a. C. 493. dita (adeo duas ex una civitate discordia fecerat) longe aliter Patres ac plebem adfecere. Exsultare gaudio plebes; *ultores superbiae Patrum adesse dicere Deos.* alius alium confirmare, ne nomina darent: cum omnibus potius, quam solos, perituros. Patres militarent, Patres arma caperent, ut penes eosdem pericula belli, penes quos praemia, essent. At vero curia, moesta ac trepida ancipiti metu et ab cive et ab hoste, Servilium consulem, cui ingenium magis popolare erat, orare, ut tantis circumventam terroribus expediret rempublicam. Tum consul, misso senatu, in concionem prodit. ibi curae esse Patribus ostendit, ut consulatur plebi. ceterum deliberationi de maxima quidem illa, sed tamen parte civitatis, metum pro universa republica intervenisse. nec posse, quum hostes prope ad portas essent, bello praevertisse quidquam: nec, si sit laxamenti aliquid, aut plebi honestum esse, nisi mercede prius accepta, arma pro patria non cepisse; neque Patribus satis decorum, per metum potius, quam postmodo voluntate, adflictis civium suorum fortunis consuluisse. Concioni deinde edicto addidit fidem, quo edixit, *Ne quis civem Romanum vinctum aut clausum teneret, quo minus ei nominis edendi apud consules potestas fieret. Ne quis militis, donec in castris esset, bona possideret, aut venderet: liberos nepotesve eius moraretur.* Hoc proposito edicto, et, qui aderant, nexi profiteri extemplo nomina; et undique ex tota urbe proripientium se ex privato, quum retinendi ius creditori non esset, concursus in forum, ut sacramento dicerent, fieri. Magna ea manus fuit; neque aliorum magis in Volscobello virtus atque opera enituit. Consul copias contra hostem educit. parvo dirimente intervallo castra ponit.

XXV. Proxima inde nocte Volsci, discordia Romana freti, si qua nocturna transitio proditiove fieri

possit, tentant castra. Sensere vigiles: excitatus U. c. 259.  
 exercitus, signo dato: concursus est ad arma. Ita <sup>a. C. 455.</sup>  
 frustra id inceptum Volscis fuit. reliquum noctis  
 utrimque quieti datum. Postero die prima luce Vols-  
 ci, fossis repletis, vallum invadunt. Iamque ab om-  
 ni parte munimenta vellebantur, quum consul, quam-  
 quam cuncti undique, et nexi ante omnes, ut signum  
 daret, clamabant, experiendi animos militum caus-  
 sa parumper moratus, postquam satis adparebat in-  
 gens ardor, dato tandem ad erumpendum signo, mi-  
 litem avidum certaminis emittit. Primo statim incur-  
 su pulsi hostes: fugientibus, quoad insequi pedes po-  
 tuit, terga caesa: eques usque ad castra pavidos egit.  
 mox ipsa castra, legionibus circumdatis, quum Vols-  
 cos inde etiam pavor expulisset, capta direptaque.  
 Postero die ad Suessam Pometiam, quo confugerant  
 hostes, legionibus ductis, intra paucos dies oppidum  
 capitur: captum praedae datum. inde paullum recre-  
 atus egens miles. Consul cum maxima gloria sua  
 victorem exercitum Romam reducit. decedentem Ro-  
 mam Ecetranorum Volscorum legati, rebus suis ti-  
 mentes post Pometiam captam, adeunt. His ex se-  
 natusconsulto data pax, ager ademptus.

XXVI. Confestim et Sabini Romanos territave-  
 re: tumultus enim fuit verius, quam bellum. Nocte  
 in urbe nunciatum est, exercitum Sabinum praeda-  
 bundum ad Anienem amnem pervenisse. ibi passim  
 diripi atque incendi villas. Missus extemplo eo cum  
 omnibus copiis equitum A. Postumius, qui dictator  
 bello Latino fuerat. secutus consul Servilius cum de-  
 lecta peditum manu. Plerosque palantes eques cir-  
 cumvenit. nec advenienti peditum agmini restitit Sa-  
 bina legio. Fessi, tum itinere, tum populatione noc-  
 turna, magna pars in villis repleti cibo vinoque, vix  
 fugae quod satis esset virium habuere. Nocte una au-  
 dito perfectoque bello Sabino, postero die, in magna  
 iam spe undique partae pacis, legati Aurunci senatum

U. c. 259. adeunt, ni decedatur Volsco agro, bellum indicentes.  
 a. C. 493. Cum legatis simul exercitus Auruncorum domo profectus erat. cuius fama, haud procul iam ab Aricia visi, tanto tumultu concivit Romanos, ut nec consuli ordine patres, nec pacatum responsum arma inferentibus arma ipsi capientes dare possent. Ariciam infesto agmine itur: nec procul inde cum Auruncis signa conlata, proelioque uno debellatum est.

XXVII. Fuis Auruncis, victor tot intra paucos dies bellis Romanus promissa consulis fidemque senatus exspectabat: quum Appius, et insita superbia animo, et ut collegae vanam faceret fidem, quam asperrime poterat, ius de creditis pecuniis dicere. deinceps et, qui ante nexi fuerant, creditoribus tradebantur, et nectebantur alii. Quod ubi cui militi inciderat, collegam adpellabat: concursus ad Servilium fiebat, illius promissa iactabant, illi exprobrabant sua quisque belli merita cicatricesque acceptas. postulabant, ut aut referret ad senatum, aut <sup>a)</sup> ut auxilio esset consul civibus suis, imperator militibus. Movebant consulem haec; sed tergiversari res cogebat. adeo in alteram causam non collega solum praeceps ierat, sed omnis factio nobilium. ita, medium se gerendo, nec plebis vitavit odium, nec apud Patres gratiam iniit. Patres mollem consulem et ambitiosum rati; plebes fallacem. brevique adparuit, aequasse eum Appii odium. Certamen consulibus inciderat, uter dedicaret Mercurii aedem. Senatus a se rem ad populum reiecit: utri eorum dedicatio iussu populi data esset, eum praeesse annonae, mercatorum collegium instituere, sollemnia pro pontifice iussit suscipere. Populus dedicationem aedis dat M. Laetorio, primi pili centurioni: quod facile adpareret, non tam ad honorem eius, cui curatio altior fastigio suo data esset, factum, quam ad consulum ignominiam. Saevis inde utique consulum alter Patresque. sed plebi

a) ut referret ad senatum, ut auxilio esset etc. Gron. Crev.



creverant animi; et longe alia, quam primo institu-<sup>U. c. 259.</sup>  
 erant, via grassabantur. Desperato enim consulum<sup>a. C. 495.</sup>  
 senatusque auxilio, quum in ius duci debitorem vi-  
 dissent, undique convolabant. neque decretum exau-  
 diri consulis prae strepitu et clamore poterat: neque,  
 quum decresset, quisquam obtemperabat. Vi ageba-  
 tur, metusque omnis et periculum libertatis, quum in  
 conspectu consulis singuli a pluribus violarentur, in  
 creditores a debitoribus verterant<sup>b)</sup>. Super haec ti-  
 mor incessit Sabini belli; delectuque decreto, nemo  
 nomen dedit, furente Appio, et insectante ambitio-  
 nem collegae; qui populari silentio rempublicam pro-  
 deret, et ad id, quod de credita pecunia ius non dix-  
 isset, adiiceret, ut ne delectum quidem ex senatus-  
 consulto haberet. *non esse tamen desertam omnino  
 rempublicam. neque proiectum consulare imperium. Se  
 unum et suae et Patrum maiestatis vindicem fore.*  
 Quum circumstaret quotidiana multitudo licentia ac-  
 censa, adripi unum insignem ducem seditionum iussit.  
 Ille, quum a lictoribus iam traheretur, provocavit:  
 nec cessisset provocationi consul, quia non dubium  
 erat populi iudicium, nisi aegre victa pertinacia foret,  
 consilio magis et auctoritate principum, quam populi  
 clamore. adeo supererant animi ad sustinendam invi-  
 diam. Crescere inde malum in dies, non clamoribus  
 modo apertis, sed, quod multo perniciosius erat, se-  
 cessione occultisque conloquiis. Tandem invisi plebi  
 consules magistratu abeunt, Servilius neutris, Appi-  
 us Patribus mire gratus.

XXVIII. A. Virginius inde et T. Vetustus con-<sup>U. c. 260.</sup>  
 sulatum ineunt. Tum vero plebes, incerta quales ha-<sup>a. C. 492.</sup>  
 bitura consules esset, coetus nocturnos, pars<sup>c)</sup> Es-  
 quiliis, pars in Aventino, facere; ne in foro subitis  
 trepidaret consiliis, et omnia temere ac fortuito age-  
 ret. Eam rem consules rati, ut erat, perniciosam;

b) verterat Gron. Crev.

c) add. in Eaed.

U. c. 260. ad Patres deferunt: sed delatam consulere ordine non  
 a. C. 492. licuit adeo tumultuose excepta est clamoribus undique et indignatione Patrum, si, quod imperio consulari exsequendum esset, invidiam eius consules ad senatum reiicerent. *Profecto si essent in republica magistratus, nullum futurum fuisse Romae, nisi publicum, concilium. Nunc in mille curias concionesque (quum alia in Esquilis, alia in Aventino fiant concilia) dispersam et dissipatam esse rempublicam. Unum, Hercule, virum, (id enim plus esse, quam consulem) qualis Ap. Claudius fuerit, momento temporis discussurum illos coetus fuisse.* Correpti consules quum, quid ergo se facere vellent, (nihil enim segnius molliusve, quam Patribus placeat, acturos) percunctarentur, decernunt, ut delectum quam acerrimum habeant. otio lascivire plebem. Dimisso senatu, consules in tribunal adscendunt. citant nominatim iuniores. Quum ad nomen nemo responderet, circumfusa multitudo in concionis modum negare, *Ultra decipi plebem posse. Numquam unum militem habituros, ni praestaretur fides publica. libertatem unicuique prius reddendam esse, quam arma danda: ut pro patria civibusque, non pro dominis, pugnent.* Consules, quid mandatum esset a senatu, videbant: sed eorum, qui intra parietes curiae ferociter loquerentur, neminem adesse, invidiae suae participationem: et adparebat atrox cum plebe certamen. Prius itaque, quam ultima experirentur, senatum iterum consulere placuit. tum vero ad sellas consulum prope<sup>d)</sup> convolaverunt minimus quisque natus Patrum, abdicare consulatum<sup>e)</sup> iubentes, et deponere imperium, ad quod tuendum animus deesset.

XXIX. Utraque re satis experta, tum demum consules: *Ne praedictum negetis, Patres conscripti, adest ingens seditio. Postulamus, ut ii, qui maxime ignaviam increpant, adsint nobis habentibus delectum.*

d) *propere* Gron. Crev.

e) *consulatu* Eaed.

*Acerrimi cuiusque arbitrio, quando ita placet, rem age-* U. c. 260.  
*mus.* Redeunt in tribunal; citari nominatim unum<sup>a</sup>. C. 492.  
 ex iis, qui in conspectu erant, dedita opera iubent.  
 Quum staret tacitus, et circa eum aliquot hominum,  
 ne forte violaretur, constitisset globus, lictorem ad  
 eum consules mittunt. quo repulso, tum vero, *in-*  
*dignum facinus esse*, clamitantes, qui Patrum consu-  
 libus aderant, devolant de tribunali, ut lictori auxi-  
 lio essent. Sed ab lictore, nihil aliud quam prehen-  
 dere prohibito, quum conversus in Patres inpetus es-  
 set, consulum intercurso rixa sedata est: in qua ta-  
 men, sine lapide, sine telo, plus clamoris atque ira-  
 rum, quam iniuriae, fuerat. Senatus, tumultuose  
 vocatus, tumultuosius consulitur, quaestionem postu-  
 lantibus iis, qui pulsati fuerant, decernente ferocis-  
 sino quoque, non sententiis magis, quam clamore et  
 strepitu. Tandem, quum irae resedissent, exprobran-  
 tibus consulibus, nihilo plus sanitatis in curia, quam  
 in foro, esse, ordine consuli coepit. Tres fuere sen-  
 tentiae. P. Virginius rem non vulgabat: *de iis tantum,*  
*qui, fidem secuti P. Servilii consulis, Volsco, Aurun-*  
*co, Sabinoque militassent bello, agendum censebat.* T.  
 Lartius <sup>f)</sup>, *Non id tempus esse, ut merita tantummodo*  
*exsolverentur. totam plebem aere alieno demersam esse:*  
*nec sisti posse, ni omnibus consulatur. quin, si alia*  
*aliorum sit conditio, accendi magis discordiam, quam*  
*sedari.* Ap. Claudius, et natura inmitis, et efferatus  
 hinc plebis odio, illinc Patrum laudibus, *Non miseriis,*  
*ait, sed licentia, tantum concitum turbarum; et lasci-*  
*vire magis plebem, quam saevire. Id adeo malum*  
*ex provocatione natum. quippe minas esse consu-*  
*lum, non imperium; ubi ad eos, qui una pecca-*  
*verint, provocare liceat. Agedum, inquit, dictato-*  
*rem, a quo provocatio non est, creemus. Iam hic,*  
*quo nunc omnia ardent, conticescet furor. Pulset tum*

f) *Largius* hic et in sqq. *Lartius* ubique legitur.]  
 Gron. Crev. [In Crev. min.]

U. c. 260. *mihi lictorem, qui sciet, ius de tergo vitæque suæ penes*  
 a. C. 492. *unum illum esse, cuius maiestatem violavit* <sup>g)</sup>.

XXX. Multis, ut erat, horrida et atrox videbatur Appii sententia: rursus Virginii Lartiique exemplo haud salubres; utique Lartii putabant sententiam, quæ totam fidem tolleret. medium maxime et moderatum utroque consilium Virginii habebatur. Sed factione respectuque rerum privatarum, quæ semper obfecere obficientque publicis consiliis, Appius vicit: ac prope fuit, ut dictator ille idem crearetur. quæ res utique alienasset plebem periculosissimo tempore, quum Volsci Aequique et Sabini forte una omnes in armis essent. Sed curæ fuit consulibus et senioribus Patrum, ut imperium, suo vehemens, mansueto permitteretur ingenio. M. Valerium dictatorem Volesi filium creant. Plebes, etsi adversus se creatum dictatorem videbat, tamen, quum provocationem fratris lege haberet, nihil ex ea familia triste nec superbum timebat. Edictum deinde, a dictatore propositum, confirmavit animos, Servilii fere consulis edicto conveniens. sed et homini et potestati melius rati credi, omisso certamine nomina dedere. Quantus nunquam ante exercitus, legiones decem effectæ: ternæ inde datae consulibus, quatuor dictator usus. Nec poterat iam bellum differri. Aequi Latinum agrum invaserant. oratores Latinorum a senatu petebant, ut aut mitterent subsidium, aut se ipsos tuendorum finium causa capere arma sinerent. Tullius visum est, defendi inermes Latinos, quam pati retractare arma. Vetusius consul missus est. is finis populationibus fuit. Cessere Aequi campis: locoque magis, quam armis, freti, summis se iugis montium tutabantur. Alter consul, in Volscos profectus, ne et ipse tereret tempus, vastandis maxime agris hostem ad conferenda propius castra dimicandumque acie excivit. Medio inter castra campo, ante suum

g) violavit Crev.



quisque vallum, infestis signis constitere. multitudine U. c. 260.  
 aliquantum Volsci superabant. Itaque effusi et con- a. C. 492.  
 temtim pugnam iniere. Consul Romanus nec promo-  
 vit aciem, nec clamorem reddi passus, defixis pilis  
 suos iussit: ubi ad manum venisset hostis, tum  
 coortos tota vi gladiis rem gerere. Volsci, cursu et  
 clamore fessi, quum se velut stupentibus metu intulis-  
 sent Romanis, postquam impressionem sensere ex  
 adverso factam, et ante oculos micare gladios, haud  
 secus, quam si in insidias incidissent, turbati ver-  
 tunt terga; et ne ad fugam quidem satis virium fuit,  
 quia cursu in proelium ierant. Romani contra, quia  
 principio pugnae quieti steterant, vigentes corporibus,  
 facile adepti fessos, et castra inpetu ceperunt, et, ca-  
 stris exutum hostem Velitras persecuti, uno agmine  
 victores cum victis in urbem inrupere. plusque ibi  
 sanguinis, promiscua omnium generum caede, quam  
 in ipsa dimicatione, factum. paucis data venia, qui  
 inermes in deditionem venerunt.

XXXI. Dum haec in Volscis geruntur, dicta-  
 tor Sabinos, ubi longe plurimum belli fuerat, fundit,  
 fugatque, exiitque castris. Equitatu inmisso mediam  
 turbaverat hostium aciem, qua, dum se cornua latius  
 pandunt, parum apte introrsum ordinibus aciem fir-  
 maverant. turbatos pedes invasit. eodem inpetu ca-  
 stra capta, debellatumque est. Post pugnam ad Re-  
 gillum lacum non alia illis annis pugna clarior fuit.  
 dictator triumphans urbem invehitur. Super solitos  
 honores locus in circo ipsi posterisque ad spectaculum  
 datus; sella in eo loco curulis posita. Volscis devi-  
 ctis Veliternus ager ademptus: Velitras coloni ab urbe  
 missi et colonia deducta. Cum Aequis post aliquanto  
 pugnatum est, iuvito quidem consule, quia loco ini-  
 quo subeundum erat ad hostes: sed milites, extrahi  
 rem criminantes, ut dictator, priusquam ipsi redirent  
 in urbem, magistratu abiret, irritaque, sicut ante  
 consulis, promissa eius caderent, perpulere, ut forte

U. c. 260. temere in adversos montes agmen erigeret. Id male  
 a. C. 492. commissum ignavia hostium in bonum vertit: qui,  
 priusquam ad coniectum teli veniretur, obstupefacti  
 audacia Romanorum, relictis castris, quae munitissi-  
 mis tenuerant locis, in aversas <sup>h)</sup> valles desiluere:  
 ubi satis praedae et victoria incruenta fuit. Ita trida-  
 riam re bello bene gesta, de domesticarum rerum  
 eventu nec Patribus nec plebi cura decesserat. tanta  
 quum gratia, tum arte praeparaverant foeneratores,  
 quae non modo plebem, sed ipsum etiam dictatorem  
 frustrarentur. Namque Valerius, post Vetusii con-  
 sulis reditum, omnium actionum in senatu primam  
 habuit pro victore populo, retulitque, quid <sup>i)</sup> nexis  
 fieri placeret. quae quum reiecta relatio esset, *Non  
 placeo, inquit, concordiae auctor. optabitis, me Dius  
 fidius, prope diem, ut mei similes Romana plebes patro-  
 nos habeat. Quod ad me adtinet, neque frustrabor ul-  
 tra cives meos, neque ipse frustra dictator ero. Dis-  
 cordiae intestinae, bellum externum fecere, ut hoc ma-  
 gistratu egeret respublica. Pax foris parta est, domi  
 impeditur. privatus potius, quam dictator, seditioni in-  
 terero.* ita, curia egressus, dictatura se abdicavit. Ad-  
 paruit caussa plebi, suam vicem indignantem magi-  
 stratu abisse. itaque, velut persoluta fide, quoniam  
 per eum non stetisset, quin praestaretur, decedentem  
 domum cum favore ac laudibus prosecuti sunt.

XXXII. Timor inde Patres incessit, ne, si di-  
 missus exercitus foret, rursus coetus occulti coniura-  
 tionesque fierent. itaque, quamquam per dictatorem  
 delectus habitus esset, tamen, quoniam in consulum  
 verba iurassent, sacramento teneri militem rati, per  
 causam renovati ab Aequis belli educi ex urbe legio-  
 nes iussere. quo facto maturata est seditio. Et primo  
 agitatum dicitur de consulum caede, ut solverentur  
 sacramento: doctos deinde, nullam scelere religio-  
 nem exsolvi, Sicinio quodam auctore, iniussu con-

h) *aversas* Gron. Crev. c. Drak. i) *add. de Gron. Crev.*

sulum in Sacrum montem secessisse (trans Anienem U. c. 260. annem est) <sup>k)</sup> tria ab urbe millia passuum. ea fre- <sup>a. C. 492.</sup>quentior fama est, quam, cuius Piso auctor est, in Aventinum secessionem factam esse. Ibi sine ullo duce vallo fossaque communitis castris quieti, rem nullam, nisi necessariam ad victum, sumendo, per aliquot dies, neque lacessiti neque lacessentes, sese tenere. Pavor ingens in urbe, metuque mutuo suspensa erant omnia. Timere relictam ab suis plebes violentiam Patrum, timere Patres residem in urbe plebem, incerti, manere eam, an abire mallent. quam diu autem tranquillam, quae secesserit, multitudinem fore? quid futurum deinde, si quod externum interim bellum exsistat? nullam profecto, nisi in concordia civium, spem reliquam ducere. eam per aequa, per iniqua, reconciliandam civitati esse. Placuit igitur oratorem ad plebem mitti Menenium Agrippam, facundum virum et, quod inde oriundus erat, plebi carum. Is, intromissus in castra, prisco illo dicendi et horrido modo nihil aliud, quam hoc, narrasse fertur: *Tempore, quo in homine non, ut nunc, omnia in unum consentiebant, sed singulis membris suum cuique consilium, suus sermo fuerat, indignatas reliquas partes, sua cura, suo labore ac ministerio ventri omnia quaeri: ventrem, in medio quietum, nihil aliud, quam datis voluptatibus frui: conspirasse inde, ne manus ad os cibum ferrent, nec os acciperet datum, nec dentes conficerent. hac ira, dum ventrem fame domare vellent, ipsa una membra totumque corpus ad extremam tabem venisse. Inde adparuisse, ventris quoque haud segne ministerium esse: nec magis ali, quam alere eum, red-dentem in omnes corporis partes hunc, quo vivimus vigemusque, divisum pariter in venas maturum, confecto cibo, sanguinem. Comparando hinc, quam intestina corporis seditio similis esset irae plebis in Patres, flexisse mentes hominum.*

k) Signa parenthes. et voc. est del. Gron. Crev.

U. c. 261.

a. C. 491.

**XXXIII.** Agi deinde de concordia coeptum, cessumque in conditiones, ut plebi sui magistratus essent sacrosancti, quibus auxilii latio adversus consules esset; neve cui Patrum capere eum magistratum liceret. Ita tribuni plebei creati duo, C. Licinius et L. Albinus. hi tres collegas sibi creaverunt. in his Sicinium fuisse, seditionis auctorem; de duobus, qui fuerint, minus convenit. Sunt, qui duos tantum in Sacro monte creatos tribunos esse dicant, ibique sacratam legem latam. Per secessionem plebis Sp. Cassius et Postumus Cominius consulatum inierunt. his consulibus cum Latinis populis ictum foedus. ad id feriendum consul alter Romae mansit; alter, ad Volscum bellum missus, Antiates Volscos fundit fugatque: compulsos in oppidum Longulam persecutus, moenibus potitur. Inde Poluscam, item Volscorum, cepit: tum magna vi adortus est Coriolos. Erat tum in castris inter primores iuvenum C. Marcius, adolescens et consilio et manu promptus, cui cognomen postea Coriolano fuit. Quum subito exercitum Romanum, Coriolos obsidentem, atque in oppidanos, quos intus clausos habebat, intentum sine ullo metu extrinsecus imminenti belli, Volscae legiones, profectae ab Antio, invasissent, eodemque tempore ex oppido erupissent hostes, forte in statione Marcius fuit. Is, cum delecta militum manu, non modo inpetum erumpentium retudit, sed per patentem portam ferox irupit: caedeque in proxima urbis facta, ignem, temere arreptum, imminentibus muro aedificiis iniecit. Clamor inde oppidanorum, mixtus muliebri puerilique ploratu, ad terrorem, ut solet, primum ortus<sup>1)</sup> et Romanis auxit animum, et turbavit Volscos, utpote capta urbe, cui ad ferendam opem venerant. Ita fusi Volsci Antiates, Corioli oppidum captum. tantumque sua laude obstitit famae consulis Marcius, ut, nisi foedus cum Latinis, columna aenea insculptum, mo-

1) *primo ortu* Gron. Crev. c. Drak.



numento esset, ab Sp. Cassio uno, quia collega afu-  
 erat <sup>m)</sup>), ictum, Postumum Cominium bellum gessisse <sup>a. C. 490.</sup>  
 cum Volscis, memoria cessisset. Eodem anno Agrip-  
 pa Menenius moritur, vir omni vita pariter Patribus  
 ac plebi carus; post secessionem carior plebi factus.  
 Huic interpreti arbitroque concordiae civium, legato  
 Patrum ad plebem, reductori plebis Romanae in ur-  
 bem sumtus funeri defuit. extulit eum plebs sextanti-  
 bus conlatis in capita.

XXXIV. Consules deinde T. Geganius, P. Mi-  
 nucius facti. Eo anno, quum et foris quieta omnia a  
 bello essent, et domi sanata discordia, aliud multo  
 gravius malum civitatem invasit: caritas primum an-  
 nonae, ex incultis per secessionem plebis agris; fa-  
 mes deinde, qualis clausis solet. ventumque ad inter-  
 itum servitiorum utique et plebis esset, ni consules  
 providissent, dimissis passim ad frumentum coemen-  
 dum, non in Etruriam modo dextris ab Ostia litori-  
 bus, laevoque per Volscos mari usque ad Cumas, sed  
 quaesitum in Siciliam <sup>n)</sup> quoque. adeo finitimorum  
 odia longinquis coegerant indigere auxiliis. Frumen-  
 tum Cumis quum coemtum esset, naves pro bonis Tar-  
 quiniorum ab Aristodemo tyranno, qui haeres erat,  
 retentae sunt. in Volscis Pomptinoque ne emi quidem  
 potuit: periculum quoque ab inpetu hominum ipsis  
 frumentatoribus fuit. Ex Tuscis frumentum Tiberi  
 venit: eo sustentata est plebs. Incommodo bello in  
 tam artis commeatibus vexati forent, ni Volscos, iam  
 moventes arma, pestilentia ingens invasisset. ea clade  
 conterritis hostium animis, ut etiam, ubi ea remis-  
 set, terrore aliquo tenerentur, et Velitris auxere nu-  
 merum colonorum Romani, et Norbae in montes no-  
 vam coloniam, quae arx in Pomptino esset, miserunt.  
 M. Minucio deinde et A. Sempronio consulibus, magna <sup>U. c. 265.</sup>  
 vis frumenti ex Sicilia advecta: agitatumque in senatu, <sup>a. C. 489.</sup>

m) *abfuerat* Gron. Crev.

n) *Sicilia* Eaed.

U. c. 263. quanti plebi daretur. Multi venisse tempus premen-  
 a. C. 489. dae plebis putabant, recuperandique iura, quae ex-  
 torta secessione ac vi Patribus essent: in primis Mar-  
 cius Coriolanus, hostis tribuniciae potestatis, *Si anno-*  
*nam*, inquit, *veterem volunt, ius pristinum reddant*  
*Patribus. Cur ego plebeios magistratus, cur Sicinium*  
*potentem* <sup>o)</sup> *video, sub iugum missus, tamquam a la-*  
*tronibus redemptus? Egone has indignitates diutius pa-*  
*tiar, quam necesse est? Tarquinium regem qui non tu-*  
*lerim, Sicinium feram? secedat nunc, avocet plebem:*  
*patet via in Sacrum montem aliosque colles. Rapiant*  
*frumenta ex agris nostris, quemadmodum tertio anno*  
*rapuere. Utantur* <sup>p)</sup> *annona, quam furore suo fecere.*  
*Audeo dicere, hoc malo domitos ipsos potius cultores*  
*agrorum fore, quam ut armati per secessionem coli pro-*  
*hibeant. Haud tam facile dictu est, faciendumne fu-*  
*erit, quam potuisse arbitror fieri, ut, conditionibus*  
*laxandi annonam, et tribuniciam potestatem, et om-*  
*nia invitis iura inposita Patres demerent sibi.*

XXXV. Et senatui nimis atrox visa sententia  
 est, et plebem ira prope armavit. *Fame se iam, sic-*  
*ut hostes, peti; cibo victuque fraudari: peregrinum*  
*frumentum, quae sola alimenta ex insperato fortuna*  
*dederit, ab ore rapi, nisi C. Marcio vincti dedantur*  
*tribuni, nisi de tergo plebis Romanae satisfiat. Eum*  
*sibi carnificem novum exortum, qui aut mori, aut servire*  
*iubeat. In exeuntem e curia inpetus factus esset, ni*  
*peropportune tribuni diem dixissent. Ibi ira est sub-*  
*pressa. se iudicem quisque, se dominum vitae necis-*  
*que inimici factum videbat. Contemptim primo Mar-*  
*cus audiebat minas tribunicias: auxilii, non poenae,*  
*ius datum illi potestati; plebisque, non Patrum, tri-*  
*bunos esse. sed adeo infensa erat coorta plebs, ut*  
*unius poena defungendum esset Patribus. Restite-*  
*runt tamen adversa invidia, usque sunt, qua suis*

o) add. *pollentemque* Gron.  
 Crev.

p) *Fruantur, utantur* Gron.

quisque, qua totius ordinis viribus. Ac primo tentata U. c. 263.  
 res est, si, dispositis clientibus, absterrendo singu- a. C. 439.  
 los a coitionibus conciliisque, disiicere rem possent.  
 Universi deinde processere, (quidquid erat Patrum,  
 reos diceres) precibus plebem exposcentes; *unum sibi*  
*civem, unum senatorem, si innocentem absolvere nollent,*  
*pro nocente donarent.* Ipse quum die dicta non adesset,  
 perseveratum in ira est. Damnatuſ absens in Vol-  
 scos exsulatum abiit, minitans patriae, hostilesque  
 iam tum spiritus gerens. Venientem Volsci benigne  
 excepere, benigniusque in dies colebant, quo maior  
 ira in suos eminebat, crebraeque nunc querelae, nunc  
 minae percipiebantur. Hospitio utebatur Attii Tulli.  
 Longe is tum princeps Volsci nominis erat, Roma-  
 nisque semper infestus. ita quum alterum vetus odi-  
 um, alterum ira recens stimularet, consilia conferunt  
 de Romano bello. Haud facile credebant, plebem  
 suam inPELLI posse, ut toties infeliciter tentata arma  
 caperent. Multis saepe bellis, pestilentia postremo  
 amissa iuventute, fractos spiritus esse: arte agendum  
 in exoſeto iam vetustate odio, ut recenti aliqua ira  
 exacerbarentur animi.<sup>1</sup>

XXXVI. Ludi forte ex instauratione magni Ro-  
 mae parabantur. instaurandi haec causa fuerat. Lu-  
 dis mane servum quidam paterfamiliae, nondum com-  
 misso spectaculo, sub furca caesum medio egerat circo.  
 coepti inde ludi, velut ea res nihil ad religionem per-  
 tinuisset. Haud ita multo post Ti. Atinio, de plebe  
 homini, somnium fuit. Viſus Iupiter dicere, *Sibi*  
*ludis praesultatorem displicuisse: nisi magnifice instau-*  
*rarentur hi ludi, periculum urbi fore. iret, ea consuli-*  
*bus nunciaret.* Quamquam haud sane liber erat reli-  
 gione animus, verecundia tamen maiestatis magistra-  
 tum timorem vicit, ne in ora hominum pro ludibrio  
 abiret. Magno illi ea cunctatio stetit. filium namque  
 intra paucos dies amisit. cuius repentinae cladis ne  
 caussa dubia esset, aegro animi eadem illa in somnis

U. c. 263. obversata species visa est rogitare, *Satin' magnam  
a. C. 439. sprete numinis haberet mercedem? maiorem instare, ni  
eat propere, ac nunciet consulibus.* Iam praesentior  
res erat: cunctantem tamen ac prolatantem ingens vis  
morbi adorta est debilitate subita. Tum enimvero  
Deorum ira admonuit. fessus igitur malis praeteritis  
instantibusque, consilio propinquorum adhibito quum  
visa atque audita, et obversatum toties somno Iovem,  
minas irasque coelestes, repraesentatas casibus suis,  
exposuisset; consensu inde haud dubio omnium, qui  
aderant, in forum ad consules lectica adfertur. inde  
in curiam iussu consulum delatus, eadem illa quum  
Patribus ingenti omnium admiratione enarrasset; ecce  
aliud miraculum: qui captus omnibus membris dela-  
tus in curiam esset, eum functum officio pedibus suis  
domum rediisse, traditum memoriae est.

XXXVII. Ludi quam amplissimi ut fierent, se-  
natus decrevit <sup>q)</sup>. Ad eos ludos, auctore Attio Tul-  
lo, vis magna Volscorum venit. Priusquam commit-  
terentur ludi, Tullus, ut domi compositum cum Mar-  
cio fuerat, ad consules venit. dicit esse, quae secre-  
to agere de republica velit. Arbitris remotis, *Invi-  
tus*, inquit, *quod sequius sit, de meis civibus loquor.*  
*Non tamen admissum quidquam ab iis criminatum ve-  
nio, sed cautum, ne admittant. Nimio plus, quam  
velim, nostrorum ingenia sunt mobilia. Multis id cla-  
dibus sensimus. Quippe qui non nostro merito, sed  
vestra patientia, incolumes simus. Magna hic nunc  
Volscorum multitudo est. ludi sunt. spectaculo intenta  
civitas erit. Memini, quid per eandem occasionem ab  
Sabinorum iuventute in hac urbe commissum sit. horret  
animus, ne quid inconsulte ac temere fiat. Haec, no-  
stra vestraque caussa, prius dicenda vobis, consules,  
ratus sum. Quod ad me adinet, extemplo hinc domum  
abire in animo est, ne cuius facti dictive contagione  
praesens violer.* Haec locutus abiit. Consules quum

q) decernit Gron. Crev.



ad Patres rem dubiam sub auctore certo detulissent, <sup>U. c. 263.</sup>  
 auctor magis, ut fit, quam res, ad praecavendum vel <sup>a. C. 489.</sup>  
 ex supervacuo movit. factoque senatusconsulto, ut  
 urbem excederent Volsci, praecones dimittuntur, qui  
 omnes eos proficisci ante noctem iuberent. Ingens  
 pavor primo discurrentes ad suas res tollendas in hos-  
 pitia perculit. Proficiscentibus deinde indignatio ob-  
 orta: *Se, ut consceleratos contaminatosque, ab ludis,*  
*festis diebus, coetu quodammodo hominum Deorumque,*  
*abactos esse.*

XXXVIII. Quum prope continuato agmine  
 irent, praegressus Tullus ad caput Ferentinum, ut  
 quisque veniret, primores eorum excipiens, querendo  
 indignandoque, et eos ipsos sedulo audientes secun-  
 da irae verba, et per eos multitudinem aliam in sub-  
 iectum viae campum deduxit. Ibi in concionis mo-  
 dum orationem exorsus, *Veteres populi Romani iniuri-*  
*as, cladesque gentis Volscorum, ut omnia, inquit, ob-*  
*liviscamini alia, hodiernam hanc contumeliam quo tan-*  
*dem animo fertis, qua <sup>r)</sup> per nostram ignominiam ludos*  
*commisere? An non sensistis, triumphatum hodie de vo-*  
*bis esse? vos omnibus, civibus, peregrinis, tot finitimis*  
*populis, spectaculo abeuntes fuisse? vestras coniuges,*  
*vestros liberos traductos per ora hominum? Quid eos,*  
*qui audire vocem praeconis? quid, qui vos videre ab-*  
*euntes? quid eos, qui huic ignominioso agmini fuere ob-*  
*vii, existimasse putatis? nisi aliquod profecto nefas es-*  
*se, quo, si intersimus spectaculo, violaturi simus lu-*  
*dos, piaculumque merituri: ideo nos ab sede piorum,*  
*coetu, concilioque abigi. Quid, deinde? illud non suc-*  
*currit, vivere nos, quod maturarimus proficisci? si*  
*hoc <sup>s)</sup> profectio, et non fuga est. Et hanc urbem vos*  
*non hostium ducitis, ubi, si unum diem morati essetis,*  
*moriendum omnibus fuit? Bellum vobis indictum est;*  
*magno eorum malo, qui indixere, si viri estis. Ita et*

r) qui Gron. Crev.

s) haec Eaed.

U. c. 263. sua sponte irarum pleni, et incitati, domos inde digressi sunt; instigandoque suos quisque populos effecere, ut omne Volscum nomen deficeret.

XXXIX. Imperatores ad id bellum de omnium populorum sententia lecti Attius Tullus et C. Marcius exsul Romanus, in quo aliquanto plus spei repositum. Quam spem nequaquam fefellit: ut facile adpareret, ducibus validiorem, quam exercitu, rem Romanam esse. Circeios profectus, primum colonos inde Romanos expulit, liberamque eam urbem Volscis tradidit. Inde, in Latinam viam transversis tramitibus transgressus, Satricum, Longulam, Poluscam, Coriolos, novella haec Romanis oppida ademit. Inde Lavinium recepit: tunc deinceps Corbionem, Vitelliam, Trebiam, Lavicos, Pedum cepit. Postremum ad urbem a Peto ducit; et, ad fossas Cluilias quinque ab urbe millia passuum castris positus, populatur inde agrum Romanum; custodibus inter populatores missis, qui patriciorum agros intactos servarent: sive infensus plebi magis, sive ut discordia inde inter Patres plebemque oriretur. Quae profecto orta esset, adeo tribuni iam ferocem per se plebem criminando in primores civitatis instigabant. sed externus timor, maximum concordiae vinculum, quamvis suspectos infensosque inter se iungebat animos. Id modo non conveniebat; quod senatus consulesque nusquam alibi spem, quam in armis, ponebant: plebes omnia, quam bellum, malebat. Sp. Nautius iam et Sex. Furius consules erant. Eos, recensentes legiones, praesidia per muros aliaque, in quibus stationes vigiliasque esse placuerat, loca distribuentes, multitudo ingens pacem poscentium primum seditioso clamore conterruit. deinde vocare senatum, referre de legatis ad C. Marcium mittendis coegit. Acceperunt relationem Patres; postquam adparuit, labare plebis animos; missique de pace ad Marcium oratores atrox responsum retulerunt: *Si Volscis ager redderetur, posse agi de*

*pace: si praeda belli per otium frui velint, memorem se* U. c. 266.  
*et civium iniuriae, et hospitum beneficii, adniscurum, ut* a. C. 486.  
*adpareat, exsilio sibi irritatos, non fractos, animos*  
*esse. Iterum deinde iidem missi non recipiuntur in*  
*castra. Sacerdotes quoque, suis insignibus velatos,*  
*isse supplices ad castra hostium, traditum est; nihilo*  
*magis quam legatos flexisse animum.*

XL. Tum matronae ad Veturiam, matrem Coriolani, Volumniamque uxorem frequentes coeunt. id publicum consilium, an muliebris timor fuerit, parum invenio. Pervicere certe, ut et Veturia, magno natu mulier, et Volumnia, duos parvos ex Marcio ferens filios, secum in castra hostium irent: et, quam armis viri defendere urbem non possent, mulieres precibus lacrimisque defenderent. Ubi ad castra ventum est, nunciatumque Coriolano, adesse ingens mulierum agmen, in primo (ut qui nec publica maiestate in legatis, nec in sacerdotibus tantā obfusa oculis animoque religione motus esset) multo obstinatioꝝ adversus lacrimas muliebres erat. Dein familiarium quidam, qui insignem moestitia inter ceteras cognoverat Veturiam, inter nukum nepotesque stantem, *Nisi me frustrantur, inquit, oculi, mater tibi coniuxque et liberi adsunt.* Coriolanus, prope ut amens, consternatus ab sede sua <sup>t)</sup>, quum ferret matri obviae complexum, mulier in iram ex precibus versa, *Sine, priusquam complexum accipio, sciam, inquit, ad hostem, an ad filium, venerim: captiva materne in castris tuis sim? In hoc me longa vita et infelix senecta traxit, ut exulem te, deinde hostem viderem? Potuisti populari hanc terram, quae te genuit atque aluit? Non tibi, quamvis infesto animo et minaci perveneras, ingredienti fines ira cecidit? non, quum iu conspectu Roma fuit, succurrit, intra illa moenia domus ac penates mei sunt, mater, coniux, liberique? Ergo ego nisi peperissem, Ro-*

t) ut amens consternatus, ab sede sua etc. Gron.Crev. c. Drak.

U. c. 266. *ma non obpugnaretur; nisi filium haberem, libera in li-*  
 a. C. 486. *bera patria mortua essem. Sed ego nihil iam pati, nec*  
*tibi turpius quam mihi miserius, possum: nec, ut sim*  
*miserrima, diu futura sum. De his videris: quos, si*  
*pergis, aut immatura mors, aut longa servitus manet.*  
 Uxor deinde ac liberi amplexi: fletusque ab omni tur-  
 ba mulierum ortus, et comploratio sui patriaeque,  
 fregere tandem virum. complexus inde suos dimittit:  
 ipse retro ab urbe castra movit. Abductis deinde le-  
 gionibus ex agro Romano, invidia rei oppressum peri-  
 isse tradunt; alii alio leto. apud Fabium, longe anti-  
 quissimum auctorem, usque ad senectutem vixisse  
 eundem invenio. Refert certe, hanc saepe eum ex-  
 acta aetate usurpasse vocem, *Multo miserius seni exsi-*  
*lium esse.* Non inviderunt laudes suas mulieribus vi-  
 ri Romani. adeo sine obtrectatione gloriae alienae vi-  
 vebatur. Monumento quoque quod esset, templum  
 Fortunae Muliebri aedificatum dedicatumque est. Red-  
 iere deinde Volsci, adiunctis Aequis, in agrum Ro-  
 manum. sed Aequi Attium Tullum haud ultra tulere  
 ducem. Hinc ex certamine, Volsci Aequine impera-  
 torem coniuncto exercitui darent, seditio, deinde atrox  
 proelium ortum. Ibi fortuna populi Romani duos  
 hostiam exercitus, haud minus pernicioso quam per-  
 tinaci certamine, confecit. Consules T. Sicinius et  
 C. Aquillius. Sicinio Volsci, Aquillio Hernici (nam  
 ii quoque in armis erant) provincia evenit. Eo anno  
 Hernici devicti: cum Volscis aequo Marte disces-  
 sum est.

U. c. 263. **XLI.** Sp. Cassius deinde et Proculus Virginius con-  
 a. C. 484. sules facti. cum Hernicis foedus ictum: agri partes  
 duae ademptae. inde dimidium Latinis, dimidium ple-  
 bi divisurus consul Cassius erat. Adiciebat huic mu-  
 neri agri aliquantum, quem publicum possideri a pri-  
 vatis criminabatur. Id multos quidem Patrum, ipsos  
 possessores, periculo rerum suarum terrebat. sed et  
 publica Patribus sollicitudo inerat, largitione consu-



em periculosas libertati opes struere. Tum primum <sup>U. c. 263.</sup>  
 ex agraria promulgata est; numquam deinde usque <sup>a. C. 484.</sup>  
 ad hanc memoriam sine maximis motibus rerum agi-  
 tata. Consul alter largitioni resistebat, auctoribus  
 Patribus, nec omni plebe adversante: quae primo  
 coeperat fastidire, munus vulgatum a civibus isse in  
 socios. saepe deinde et Virginium consulem in conci-  
 onibus velut vaticinantem audiebat, *Pestilens collegae*  
*munus esse. Agros illos servitutem iis, qui acceperint,*  
*laturos. regno viam fieri. Quid ita enim adsumi socios*  
*et nomen Latinum? Quid adtinuisse, Hernicis, paullo*  
*ante hostibus, capti agri partem tertiam* <sup>u)</sup> *reddi, nisi*  
*ut hae gentes pro Coriolano duce Cassium habeant?*  
 Popularis iam esse dissuasor et intercessor legis agra-  
 riae coeperat. uterque deinde consul certatim plebi  
 indulgere. Virginius dicere, passurum se adsignari  
 agros, dum ne cui, nisi civi Romano, adsignentur.  
 Cassius, quia in agraria largitione ambitiosus in soci-  
 os, eoque civibus vilior erat, ut alio munere sibi re-  
 conciliaret civium animos, iubere, pro Siculo fru-  
 mento pecuniam acceptam retribui populo. Id vero  
 haud secus, quam praesentem mercedem regni, ad-  
 spernata plebes. adeo propter suspicionem insitam  
 regni, velut abundarent omnia, munera eius in ani-  
 mis hominum respuebantur. Quem, ubi primum ma-  
 gistratu abiit, damnatum necatumque constat. Sunt,  
 qui patrem auctorem eius supplicii ferant: eum, co-  
 gnita domi caussa, verberasse ac necasse, peculiumque  
 filii Cereri consecravisse. signum inde factum esse,  
 et inscriptum, **EX CASSIA FAMILIA DATUM.** Invenio  
 apud quosdam, idque propius fidem est, a quaestori-  
 bus K. <sup>x)</sup> Fabio et L. Valerio diem dictam perduellio-  
 nis, damnatumque populi iudicio: dirutas publice ae-  
 des. ea est area ante Telluris aedem. Ceterum sive <sup>U. c. 269.</sup>  
<sup>a. C. 433.</sup>

u) *tertiam partem* Gron. x) C. hic et in sqq. Eaed.  
 Crev.

U. c. 269. illud domesticum, sive publicum fuit iudicium, dam-  
 a. C. 483. natur Ser. Cornelio, Q. Fabio consulibus.

XLII. Haud diuturna ira populi in Cassium fuit. Dulcedo agrariae legis ipsa per se, dempto auctore, subibat animos: accensaque ea cupiditas est malignitate Patrum; qui, devictis eo anno Volscis Aequisque, militem praeda fraudavere. quidquid captum ex hostibus est, vendidit Fabius consul, ac redegit in publicum. Invisum erat Fabium nomen plebi propter

U. c. 270. novissimum consulem: tenuere tamen Patres, ut cum  
 a. C. 482. L. Aemilio Q. Fabio consul crearetur. Eo infestior

facta plebes seditione domestica bellum externum excivit: bello deinde civiles discordiae intermissae. uno animo Patres ac plebes rebellantes Volscos et Aequos, duce Aemilio, prospera pugna vicere. Plus tamen hostium fuga, quam proelium, absumsit. adeo pertinaciter fusos insecuti sunt equites. Castoris aedes eodem anno Idibus Quinctilibus dedicata est, vota erat Latino bello, Postumio dictatore. filius eius, dumvir ad id ipsum creatus, dedicavit. Sollicitati et eo anno sunt dulcedine agrariae legis animi plebis. Tribuni plebis popularem potestatem lege populari celebrabant. Patres, satis superque gratuiti furoris in multitudine credentes esse, largitiones temeritatisque invitamenta horrebant. acerrimi Patribus duces ad resistendum consules fuere. Ea igitur pars reipublicae vicit. nec in praesens modo, sed in venientem

U. c. 271. etiam annum M. Fabium Kaesonis fratrem, et magis  
 a. C. 431. invisum alterum plebi, accusatione Sp. Cassii, L.

Valerium consules y) dedit. Certatum eo quoque anno cum tribunis est. vana lex, vanique legis auctores, iactando irritum munus, facti. Fabium inde nomen ingens post tres continuos consulatus, unoque velut tenore omnes expertos tribuniciis certaminibus habitum. itaque, ut bene locatus, mansit in ea familia aliquamdiu honos. Bellum inde Veiens initum

y) consulem Gron. Crev.

et Volsci rebellarunt. sed ad bella externa prope su- U. c. 271.  
pererant vires: abutebanturque iis inter semetipsos a. C. 481.  
pertando. Accessere ad aegras iam omnium mentes  
prodigia coelestia, prope quotidianas in urbe agrisque  
stentantia minas. motique ira numinis caussam nul-  
lam aliam vates canebant, publice privatimque, nunc  
extis, nunc per aves, consulti, quam haud rite sacra  
ieri. qui terrores tamen eo evasere, ut Oppia, vir-  
go Vestalis, damnata incesti poenas dederit.

XLIII. Q. Fabius inde et C. Iulius consules fac- U. c. 272.  
ti. Eo anno non segnior discordia domi, et bellum a. C. 480.  
oris atrocius fuit. Ab Aequis arma sumta. Veien-  
tes agrum quoque Romanorum populantes inierunt.  
quorum bellorum crescente cura, K. Fabius et Sp. U. c. 273.  
Furius consules fiunt. Ortonam, Latinam urbem, a. C. 479.  
Aequi obpugnabant. Veientes, pleni iam populatio-  
num, Romam ipsam se obpugnatos minabantur<sup>2)</sup>.  
Qui terrores, quum compescere deberent, auxere in-  
super animos plebis: redibatque non sua sponte plebi  
mos detrectandi militiam. sed Sp. Licinius tribunus  
plebis, venisse tempus ratus per ultimam necessita-  
tem legis agrariae Patribus iniungendae, suscepit  
rem militarem impediendam. Ceterum tota invidia  
tribuniciae potestatis versa in auctorem est: nec in  
eum consules acrius, quam ipsi<sup>a)</sup> eius collegae, coorti  
sunt: auxilioque eorum delectum consules habent.  
Ad duo simul bella exercitus scribitur. ducendus Fa-  
bio in Aequos, in Veientes Furio datur. Et in Ve-  
ientibus quidem nihil dignum memoria gestum est.  
Fabio aliquanto plus negotii cum civibus, quam cum  
hostibus, fuit. unus ille vir ipse consul rempublicam  
sustinuit, quam exercitus odio consulis, quantum in  
se fuit, prodebat. Nam quum consul, praeter ceteras  
imperatorias artes, quas parando gerendoque bello  
edidit plurimas, ita instruxisset aciem, ut, solo equi-

2) *minitabantur* Gron. Crev.

a) *ipsius* Eaed. c. Drak.

U. c. 273. **tatu emisso, exercitum hostium funderet, insequifus**  
 a. C. 479. **sos pedes noluit. nec illos, et si non adhortatio invisi-**  
**ducis, suum saltem flagitium et publicum in praesen-**  
**tia dedecus, postmodo periculum, si animus hosti**  
**redisset, cogere potuit gradum adcelerare; aut, si ali-**  
**ud nihil, instare instructos. Iniussu signa referunt,**  
**moestique, (crederes victos) exsecrantes nunc impe-**  
**ratores, nunc navatam ab equite operam, redeunt**  
**in castra. Nec huic tam pestilenti exemplo remedia**  
**ulla ab imperatore quaesita sunt. adeo excellentibus**  
**ingeniis citius defuerit ars, qua civem regant, quam**  
**qua hostem superent. Consul Romam rediit, nontam**  
**belli gloria aucta, quam irritato exacerbatoque in se**  
**militum odio. Obtinere tamen Patres, ut in Fabia**  
**gente consulatus maneret. M. Fabium consulem cre-**  
**ant: Fabio collega Cn. Manlius datur.**

U. c. 274. **XLIV. Et hic annus tribunum auctorem legis**  
 a. C. 478. **agrariae habuit. Ti. Pontificius fuit. is, eandem vi-**  
**am, velut processisset Sp. Licinio, ingressus, delec-**  
**tum paullisper inpediit. Perturbatis iterum Patribus**  
**Ap. Claudius, *Victam tribuniciam potestatem, dicere***  
*priori anno; in praesentia re ipsa, exemplo in perpetu-*  
*um: quando inventum sit, suis ipsam viribus dissolvi*  
*Neque enim unquam defuturum, qui et ex collega vic-*  
*toriam sibi, et gratiam melioris partis bono publico ve-*  
*lit quaesitam. Et plures, si pluribus opus sit, tribu-*  
*nos ad auxilium consulum paratos fore; et unum vel ad*  
*versus omnes satis esse. Darent modo et consules et pri-*  
*mores Patrum operam, ut, si minus omnes, aliquos ta-*  
*men ex tribunis reipublicae ac senatui conciliarent*  
**Praeceptis Appii moniti Patres, et universi comite**  
**ac benigne tribunos adpellare; et consulares, ut cui**  
**que privatim aliquid iuris adversus singulos erat, par-**  
**tim gratia, partim auctoritate, obtinere, ut tribuni**  
**ciae potestatis vires salubres vellent reipublicae esse**  
**quatuorque tribunorum adversus unum moratores**  
**publici commodi auxilio delectum consules haben**



Inde ad Veiens bellum profecti; quo undique ex Etru-<sup>U. c. 274.</sup>  
ria auxilia convenerant, non tam Veientium gratia<sup>a. C. 478.</sup>  
concitata, quam quod in spem ventum erat, discordia  
intestina dissolvi rem Romanam posse. Principesque  
in omnium Etruriae populorum conciliis fremebant,  
*Aeternas opes esse Romanas, nisi inter semet ipsi edi-*  
*tionibus saeviant. id unum venenum, eam labem civi-*  
*tatibus opulentis repertam, ut magna imperia mortalia*  
*essent. Diu sustentatum id malum, partim Patrum*  
*consiliis, partim patientia plebis, iam ad extrema ve-*  
*nisse. Duas civitates ex una factas: suos cuique parti*  
*magistratus, suas leges esse. Primum in delectibus sae-*  
*vire solitos; eosdem in bello tamen paruisse ducibus. qua-*  
*licumque urbis statu, manente disciplina militari, si-*  
*sti potuisse: iam non parendi magistratibus morem in*  
*castra quoque Romanum militem sequi. Proximo bello*  
*in ipsa acie, in ipso certamine, consensu exercitus tra-*  
*ditam ultro victoriam victis Aequis: signa deserta, im-*  
*peratorem in acie relictum, iniussu in castra reditum.*  
*Profecto, si instetur, suo milite vinci Romam posse.*  
*Nihil aliud opus esse, quam indici ostendique bellum:*  
*cetera sua sponte fata et Deos gesturos. Ea spes Etrus-*  
*cos armaverat*<sup>b)</sup>, multis in vicem casibus victos vic-  
toresque.

XLV. Consules quoque Romani nihil praeterea  
aliud, quam suas vires, sua arma, horrebant: memo-  
ria pessimi proximo bello exempli terrebat<sup>c)</sup>, ne rem  
committerent eo, ubi duae simul acies timendae es-  
sent. Itaque castris se tenebant, tam ancipiti peri-  
culo aversi. diem tempusque forsitan ipsum leniturum  
iras, sanitatemque animis adlaturum. Veiens hostis  
Etruscique eo magis praepropere agere; lacescere  
ad pugnam: primo obequitando castris provocando-  
que; postremo, ut nihil movebant, qua consules ip-  
sos, qua exercitum increpando: *Simulationem intesti-*

b) *Hae spes Etruscos arma-*  
*verant* Gron. Crev.

c) *terrebantur* Eaed.

U. c. 274. *nae discordiae remedium timoris inventum: et consules*  
 a. C. 478. *magis non confidere, quam non credere, suis militibus.*

*Novum seditionis genus, silentium otiumque inter armatos. ad haec in novitatem generis originisque, qua falsa, qua vera, iacere. Haec, quum sub ipso vallo portisque streperent, haud aegre consules pati. at imperitae multitudinis <sup>d)</sup> nunc indignatio, nunc pudor, pectora versare, et ab intestinis avertere malis: nolle inultos hostes, nolle successum, non Patribus, non consulibus: externa et domestica odia certare in animis. Tandem superant externa. adeo superbe insolenterque hostis eludebat. frequentes in praetorium conveniunt, poscunt pugnam, postulant, ut signum detur. Consules, velut deliberabundi, capita conferunt, diu conloquuntur. pugnare cupiebant; sed retro revocanda et abdenda cupiditas erat, ut adversando remorandoque incitato semel militi adderent inpetum. Redditur responsum, in maturam rem agi, nondum tempus pugnae esse: castris se tenerent. Edicunt inde, ut abstineant pugna. si quis iniussu pugnaverit, ut in hostem animadversuros. Ita dimissis, quo minus consules velle credunt, crescit ardor pugnandi. accedunt insuper hostes ferocius multo, ut statuisse non pugnare consules cognitum est. Quippe inpune se insultaturos, non credi militi arma. rem ad ultimum seditionis erupturam, finemque venisse Romano imperio. His freti obcursant portis, ingerunt probra, aegre abstinere, quin castra obpugnent. Enimvero non ultra contumeliam pati Romanus posse: totis castris undique ad consules curritur. non iam sensim, ut ante, per centurionum principes postulant; sed passim omnes clamoribus agunt. Matura res erat; tergiversantur tamen. Fabius deinde, ad crescentem tumultu iam metum seditionis collega concedente, quum silentium classico fecisset; *Ego istos, Cn. Manli, posse vincere scio; velle ne scirem, ipsi fecerunt. Ita-**

d) *multitudini Gron. Crev.*

que certum atque decretum est, non dare signum, nisi, U. c. 274.  
 victores se redituros ex hac pugna, iurant <sup>e</sup>). Consu-<sup>a</sup>. C. 478.  
 lem Romanum miles semel in acie sefellit; Deos num-  
 quam fallit. Centurio erat M. Flavoleius, inter pri-  
 mores pugnae flagitator. Victor, inquit, M. Fabi,  
 revertar ex acie. Si fallat, Iovem patrem, Gradivum-  
 que Martem, aliosque iratos invocat Deos. Idem de-  
 inceptis omnis exercitus in se quisque iurat. Iuratis  
 datur signum, arma capiunt; eunt in pugnam, irarum  
 speique pleni. Nunc iubent Etruscos probra iacere,  
 nunc armatis sibi quisque lingua promptum hostem ob-  
 ferri. Omnium illo die, qua plebis, qua Patrum,  
 eximia virtus fuit. Fabium nomen, Fabia gens, ma-  
 xime enituit. multis civilibus certaminibus infensos  
 plebis animos illa pugna sibi reconciliare statuunt. In-  
 struitur acies: nec Veiens hostis Etruscaeque legiones  
 detrectant.

XLVI. Prope certa spes erat, non magis secum  
 pugnatos, quam pugnaverint cum Aequis. maius  
 quoque aliquod, in tam irritatis animis et occasione  
 ancipiti, laud desperandum esse facinus. Res aliter  
 longe evenit. nam non alio ante bello infestior Roma-  
 nus (adeo hinc contumeliis hostes, hinc consules mora  
 exacerbaverant) proelium iniit. Vix explicandi ordi-  
 nis spatium Etruscis fuit, quum, pilis inter primam  
 trepidationem abiectis temere magis, quam emissis;  
 pugna iam in manus, iam ad gladios, ubi Mars est  
 atrocissimus, venerat. Inter primos genus Fabium  
 insigne spectaculo exemploque civibus erat. ex his  
 Q. Fabium, (tertio hic anno ante consul fuerat) prin-  
 cipem in confertos Veientes euntem, ferox viribus  
 et armorum arte Tuscus, incautum inter multas ver-  
 santem hostium manus, gladio per pectus transfigit.  
 telo extracto, praeceps Fabius in vulnus abiit. Sen-  
 sit utraque acies unius viri casum, cedebatque inde  
 Romanus: quum M. Fabius consul transiluit iacentis

e) iurent Gron. Grev.

U. c. 274. corpus, obiectaque parma, *Hoc iurastis, inquit, milites, fugientes vos in castra redituros? adeo ignavissimos hostes magis timetis, quam Iovem Martemque, per quos iurastis? At ego iniuratus aut victor revertar, aut prope te hic, Q. Fabi, dimicans cadam.* Consuli tum K. Fabius prioris anni consul, *Verbisne istis, frater, ut pugnent, te inpetraturum credis? Dii inpetrabunt, per quos iuravere. Et nos, ut decet procures, ut Fabio nomine est dignum, pugnando potius, quam adhortando, accendamus militum animos.* Sic in primum infestis hastis provolant duo Fabii, totamque moverunt secum aciem.

XLVII. Proelio ex parte una restituto, nihilo segnius in altero cornu Cn. Manlius consul pugnam ciebat: ubi prope similis fortuna est versata. nam ut altero in cornu Q. Fabium, sic in hoc ipsum consulem Manlium, iam velut fusos agentem hostes, et inpigre milites secuti sunt; et, ut ille gravi vulnere ictus ex acie cessit, interfectum rati, gradum retulere. cessissentque loco, ni consul alter, cum aliquot turmis equitum in eam partem citato equo advectus, vivere clamitans collegam, se victorem fuso altero cornu adesse, rem inclinatam sustinisset. Manlius quoque ad restituendam aciem se ipse coram offert. Duorum consulum cognita ora accendunt militum animos. simul et vanior iam erat hostium acies, dum, abundante multitudine freti, subtracta subsidia mittunt ad castra obpugnanda. In quae haud magno certamine inpetu facto, dum praedae magis, quam pugnae, memores terunt<sup>f)</sup> tempus; triarii Romani, qui primam inruptionem sustinere non potuerant, missis ad consules nunciis, quo loco res essent, conglobati ad praetorium redeunt, et sua sponte ipsi proelium<sup>g)</sup> renovant: et Manlius consul, revector in castra, ad omnes portas milite obposito, hostibus viam clauserat. Ea desperatio Tuscis rabiem magis, quam audaciam,

f) tererent Gron. Crev.

g) proelium ipsi Eaed.



accendit. nam quum incursantes, quacumque exitum <sup>U. c. 274.</sup> ostenderet spes, vano aliquoties inpetu issent; glo- <sup>a. C. 478.</sup> bus iuvenum unus in ipsum consulem insignem armis invadit. Prima excepta a circumstantibus tela. sustineri deinde vis nequit <sup>h)</sup>). Consul mortifero vulnere ictus cadit, fusique circa omnes. Tuscis crescit audacia. Romanos terror per tota castra trepidos agit. et ad extrema ventum foret, ni legati, raptò consulis corpore, patefecissent una porta hostibus viam. Ea erumpunt; consternatoque agmine abeuntes in victorem alterum incidunt consulem. ibi iterum caesi fusique passim. Victoria egregia parta, tristis tamen duobus tam clavis funeribus. Itaque consul, decernente senatu triumphum, *Si exercitus sine imperatore triumphare possit, pro eximia eo bello opera facile passurum*, respondit: *se, familia funesta Q. Fabii fratris morte, republica ex parte orba consule altero amisso, publico privatoque deformem luctu lauream non accepturum*. Omni acto triumpho depositus triumphus clarior fuit. adeo spreta in tempore gloria interdum cumulatior reddit. Funera deinde duo deinceps collegae fratrisque ducit. idem in utroque laudator, quum, concedendo illis suas laudes, ipse maximam partem earum ferret. Neque inmemor eius, quod initio consulatus inbiberat, reconciliandi animos plebis, saucios milites curandos dividit Patribus. Fabiis plurimi dati: nec alibi maiore cura habiti. Inde populares iam esse Fabii: nec hoc ulla, nisi salubri reipublicae, arte.

XLVIII. Igitur non Patrum magis, quam plebis, <sup>U. c. 275.</sup> studiis K. Fabius cum T. Virginio consul factus, ne- <sup>a. C. 477.</sup> que bella, neque delectus, neque ullam aliam priorem curam agere, quam ut, iam aliqua ex parte inchoata concordiae spe, primo quoque tempore cum Patribus coalescerent animi plebis. Itaque principio anni censuit, priusquam quisquam agrariae legis auctor tri-

<sup>h)</sup> nequit Crev.

U. c. 275. bonus exsisteret, occuparent Patres ipsi suum munus  
 a. C. 477. facere: captivum agrum plebi quam maxime aequali-  
 ter darent. verum esse, habere eos, quorum san-  
 guine ac sudore partus sit. Adspersati Patres sunt:  
 questi quoque quidam, nimia gloria luxuriare et eva-  
 nescere vividum quondam illud Kaesonis ingenium.  
 Nullae deinde urbanae factiones fuere. Vexabantur  
 incursionibus Aequorum Latini. eo cum exercitu Kaeso  
 missus, in ipsorum Aequorum agrum depopulandum  
 transit. Aequi se in oppida receperunt, murisque se  
 tenebant: eo nulla pugna memorabilis fuit. At a Ve-  
 iente hoste clades accepta temeritate alterius consulis.  
 actumque de exercitu foret, ni K. Fabius in tempo-  
 re subsidio venisset. Ex eo tempore neque pax ne-  
 que bellum cum Veientibus fuit; res proxime formam  
 latrocinii venerat. Legionibus Romanis cedebant in  
 urbem. ubi abductas senserant legiones, agros incur-  
 sabant; bellum quiete, quietem bello in vicem elu-  
 dentes. Ita neque omitti tota res, nec <sup>i)</sup> perfici  
 poterat. et alia bella aut praesentia instabant, ut ab  
 Aequis Volscisque, non diutius, quam recens dolor  
 proximae cladis transiret, quiescentibus: aut mox  
 moturos se adparebat Sabinos semper infestos, Etru-  
 riamque omnem. sed Veiens hostis, adsiduus magis,  
 quam gravis, contumeliis saepius, quam periculo,  
 animos agitabat: quod nullo tempore neglegi poterat,  
 aut averti alio sinebat. Tum Fabia gens senatum ad-  
 iit <sup>k)</sup>. consul pro gente loquitur: *Adsiduo magis, quam  
 magno, praesidio, ut scitis, Patres conscripti, bellum  
 Veiens eget. Vos alia bella curate: Fabios hostes Ve-  
 ientibus date. Auctores sumus, tutam ibi maiestatem  
 Romani nominis fore. Nostrum id nobis velut familiare  
 bellum, privato sumtu gerere in animo est. Respublica  
 et milite illic et pecunia vacet. Gratiae ingentes actae.*  
 Consul e curia egressus, comitante Fabiorum agmine,  
 qui in vestibulo curiae, senatusconsultum exspectan-

i) neque Gron. Crev.

k) adit Eaed.

tes, steterant, domum rediit. Iussi armati postero U. c. 275.  
die ad limen consulis adesse, domos inde discedunt. a. C. 477.

XLIX. Manat tota urbe rumor: Fabios ad coelum laudibus ferunt. Familiam unam subisse <sup>1)</sup> civitatis onus: Veiens bellum in privatam curam, in privata arma versum. Si sint duae roboris eiusdem in urbe gentes; deponant, haec Volscos sibi, illa Aequos: populo Romano tranquillam pacem agente, omnes finitimos subigi populos posse. Fabii postero <sup>m)</sup> die arma capiunt. quo iussi erant, conveniunt. Consul, paludatus egrediens, in vestibulo gentem omnem suam instructo agmine videt. acceptus in medium, signa ferri iubet. Numquam exercitus neque minor numero, neque clarior fama et admiratione hominum, per urbem incessit. Sex et trecenti milites, omnes patricii, omnes unius gentis, quorum neminem ducem sperneret egregius quibuslibet temporibus senatus, ibant, unius familiae viribus Veienti populo pestem minitantes. Sequebatur turba, propria alia cognatorum sodaliumque, nihil medium, nec spem, nec curam, sed immensa omnia volventium animo; alia publica, sollicitudine excitata, favore et admiratione stupens; *ire fortes, ire felices* iubent, *inceptis eventus pares reddere: consulatus inde ac triumphos, omnia praemia ab se, omnes honores sperare.* Praetereuntibus Capitolium arcemque et alia templa, quidquid Deorum oculis, quidquid animo obcurrit, precantur, ut illud agmen faustum atque felix mittant, sospites brevi in patriam ad parentes restituant. Incassum missae preces. Infelici via dextro Iano portae Carmentalis profecti, ad Cremeram flumen perveniunt. is opportunus visus locus communiendo praesidio. L. Aemilius inde et C. Ser- U. c. 276.  
vilius consules facti. et, donec nihil aliud quam in a. C. 476.  
populationibus res fuit, non ad praesidium modo tutandum Fabii satis erant, sed tota regione, qua Tu-

1) subisse Gron. Crev. m) postera Eaed.

U. c. 276. scus ager Romano adiacet, sua tuta omnia, infesta  
 a. C. 476. hostium, vagantes per utrumque finem, fecere. Intervallum deinde haud magnum populationibus fuit: dum et Veientes, adcito ex Etruria exercitu, praesidium Cremerae obpugnant; et Romanae legiones, ab L. Aemilio consule adductae, cominus cum Etruscis dimicant acie. quamquam vix dirigendi aciem spatium Veientibus fuit. adeo inter primam trepidationem, dum post signa ordines introeunt, subsidiaque locant, invecta subito ab latere Romana equitum ala, non pugnae modo incipiendae, sed consistendi, ademit locum. Ita, fusi retro ad saxa Rubra, (ibi castra habebant) pacem supplices petunt. cuius inpetratae, ab insita animis levitate, ante deductum Cremera Romanum praesidium, poenituit.

L. Rursus cum Fabiis erat Veienti populo, sine ullo maioris belli adparatu, certamen: nec erant incursiones modo in agros, aut subiti inpetus incursantium, sed aliquoties aequo campo conlatisque signis certatum. gensque una populi Romani saepe ex opulentissima, ut tum res erant, Etrusca civitate victoriam tulit. Id primo acerbum indignumque Veientibus visum. inde consilium ex re natum insidiis ferocem hostem captandi: gaudere etiam, multo successu Fabiis audaciam crescere. Itaque et pecora praedantibus aliquoties, velut casu incidissent, obviam acta: et agrestium fuga vasti relictis agri: et subsidia armatorum, ad arcendas populationes missa, saepius simulato, quam vero, pavore refugerunt. Iamque Fabii adeo contemserant hostem, ut sua invicta arma neque loco neque tempore ullo crederent sustineri posse. haec spes provexit, ut ad conspecta procul a Cremera magno campi intervallo pecora (quamquam rara hostium adparebant arma) decurrerent. et quum improvidi effuso cursu insidias circa ipsum iter locatas superassent, palatique passim vaga, ut fit pavore iniecto, raperent pecora; subito ex insidiis consurgitur,



et adversi et undique hostes erant. Primo clamor cir- U. c. 276.  
 cumlatus exterruit, deintellā ab omni parte accidebant. a. C. 476.  
 coeuntibusque Etruscis, iam continenti agmine arma-  
 torum septi, quo magis se hostis inferebat, cogeban-  
 tur breviori spatio et ipsi orbem conligere. quae res  
 et paucitatem eorum insignem et multitudinem Etrus-  
 corum, multiplicatis in arto ordinibus, faciebat. Tum,  
 omissa pugna, quam in omnes partes parem intende-  
 rant, in unum locum se omnes inclinant. eo nisi cor-  
 poribus armisque, rupere cuneo viam. Duxit via in  
 editum leniter collem. inde primo restitere. mox, ut  
 respirandi superior locus spatium dedit, recipiendique  
 a pavore tanto animum, pepulere etiam subeuntes:  
 vincebatque auxilio loci paucitas, ni iugo circummis-  
 sus Veiens in verticem collis evasisset. ita superior  
 rursus hostis factus. Fabii caesi ad unum omnes,  
 praesidiumque expugnatum. trecentos sex perisse sa-  
 tis convenit: unum prope puberem aetate relictum,  
 stirpem genti Fabiae, dubiisque rebus populi Romani  
 saepe domi bellicue vel maximum futurum auxilium.

LI. Quum haec accepta clades esset, iam C. Ho- U. c. 277.  
 ratius et T. Menenius consules erant. Menenius ad- a. C. 475.  
 versus Tuscos victoria elatos confestim missus. Tum  
 quoque male pugnatum est, et Ianiculum hostes oc-  
 cupavere: obsessaque urbs foret, super bellum anno-  
 na premente, (transierant enim Etrusci Tiberim) ni  
 Horatius consul ex Volscis esset revocatus: adeoque  
 id bellum ipsis institit moenibus, ut primo pugnatum  
 ad Spei sit aequo Marte, iterum ad portam Collinam.  
 Ibi quamquam parvo momento superior Romana res  
 fuit, meliorem tamen militem, recepto pristino animo,  
 in futura proelia id certamen fecit. A. Virginius et Sp.  
 Servilius consules fiunt. post acceptam proximam pug- U. c. 278.  
 nae cladem Veientes abstinuere acie. populationes a. C. 474.  
 erant, et velut ab arce Ianiculi passim in Romanum  
 agrum inpetus dabant. non usquam pecora tuta, non  
 agrestes erant. Capti deinde eadem arte sunt, qua

U. c. 278. ceperant Fabios. secuti dedita opera passim ad inle-  
 a. C. 474. cebras propulsa pecora, praecipitavere in insidias. quo  
 plures erant, maior caedes fuit. Ex hac clade atrox  
 ira maioris cladis caussa atque initium fuit. traiecto  
 enim nocte Tiberi, castra Servilii consulis adorti sunt  
 obpugnare. inde fusi magna caede in Ianiculum se ae-  
 gre recepere <sup>n</sup>). Confestim consul et ipse transit Ti-  
 berim, castra sub Ianiculo communit. postero die, lu-  
 ce orta, nonnihil et hesternae felicitate pugnae ferox,  
 magis tamen, quod inopia frumenti, quamvis in prae-  
 cipitia, dum celeriora essent, agebat consilia, teme-  
 re adverso Ianiculo ad castra hostium aciem erexit,  
 foediusque inde pulsus, quam pridie pepulerat, in-  
 teruentu collegae ipse exercitusque eius est servatus.  
 inter duas acies Etrusci, quum in vicem his atque illis  
 terga darent, occidione occisi. Ita obpressum teme-  
 ritate felici Veiens bellum.

LII. Urbi cum pace laxior etiam annona rediit,  
 et advecto ex Campania frumento, et, postquam ti-  
 mor sibi cuique futurae inopiae abiit, eo, quod abdi-  
 tum fuerat, prolato. Ex copia deinde otioque lasci-  
 vire rursus animi; et pristina mala, postquam foris  
 deerant, domi quaerere. tribuni plebem agitare suo  
 veneno, agraria lege; in resistentes incitare Patres,  
 nec in universos modo, sed in singulos. Q. Consi-  
 dius et T. Genucius, auctores agrariae legis, T. Me-  
 nenio diem dicunt. invidiae erat amissum Cremerae  
 praesidium, quum haud procul inde stativa consul ha-  
 buisset. Eum obpresserunt <sup>o</sup>). Quum et Patres haud  
 minus, quam pro Coriolano, adnisi essent, et patris  
 Agrippae favor haud dum exolevisset; in multa tem-  
 perarunt tribuni. quum capitis anquisissent, duo mil-  
 lia aeris damnato multam dixerunt <sup>p</sup>). ea in caput ver-  
 tit. Negant tulisse ignominiam aegritudinemque: in-  
 de morbo absumtum esse. Alius deinde reus Sp. Ser-

<sup>n</sup>) *receperunt* Gron. Crev.

<sup>p</sup>) *edixerunt* Eaed.

<sup>o</sup>) *oppressere* Eaed.

vilius, ut consulatu abiit, C. Nautio et P. Valerio U. c. 279.  
 consulibus, initio statim anni, ab L. Caedicio et T. a. C. 473.  
 Statio tribunis die dicta, non, ut Menenius, precibus  
 suis aut Patrum, sed cum multa fiducia innocentiae  
 gratiaeque, tribunicios inpetus tulit. Et huic proeli-  
 um cum Tuscis ad Ianiculum erat crimini, sed servi-  
 di animi vir, ut in publico periculo ante, sic tum in  
 suo, non tribunos modo, sed plebem, oratione feroci  
 refutando, exprobrandoque T. Menenii damnationem  
 mortemque, (cuius patris munere restituta quondam  
 plebs eos ipsos, quibus tum saeviret, magistratus,  
 eas leges haberet) periculum audacia discussit. iuvit  
 et Virginius collega, testis productus, participando  
 laudes: magis tamen Menenianum (adeo mutaverant  
 animum) profuit iudicium.

LIII. Certamina domi finita. Veiens bellum ex-  
 ortum; quibus Sabini arma coniunxerant. P. Valerius  
 consul, aditis Latinorum Hernicorumque auxiliis,  
 cum exercitu Veios missus, castra Sabina, quae pro  
 moenibus sociorum locata erant, confestim adgreditur;  
 tantamque trepidationem iniecit, ut, dum dispersi  
 alii alia manipulatim excurrunt ad arcendam hostium  
 vim, ea porta, cui signa primum intulerat, capere-  
 tur. intra vallum deinde caedes magis, quam proe-  
 lium, esse. tumultus e castris et in urbem penetrat;  
 tamquam Veiis captis, ita pavidi Veientes ad arma  
 currunt. pars Sabinis eunt subsidio; pars Romanos,  
 toto inpetu intentos in castra, adoriuntur. Paullisper  
 aversi turbatique sunt. deinde et ipsi utroque versis  
 signis resistunt: et eques, ab consule inmissus, Tus-  
 cos fundit fugatque. eademque hora duo exercitus,  
 duae potentissimae et maximae finitimae gentes supe-  
 ratae sunt. Dum haec ad Veios geruntur, Volsci  
 Aequique in Latino agro posuerant castra, populati-  
 que fines erant. eos per se ipsi Latini, adsumtis Her-  
 nicis, sine Romano aut duce aut auxilio, castris ex-  
 uerunt. Ingenti praeda, praeter suas recuperatas res,

U. c. 279. potiti sunt. missus tamen ab Roma consul in Volscos  
 a. C. 473. C. Nautius. Mos, credo, non placebat, sine Roma-  
 no duce exercituque socios propriis viribus consiliis-  
 que bella gerere. nullum genus calamitatis contume-  
 liaeque non editum in Volscos est: nec tamen perPELLI  
 potuere, ut acie dimicarent.

U. c. 280. LIV. L. Furius inde et C. Manlius consules.  
 a. C. 472. Manlio Veientes provincia evenit. non tamen bella-  
 tum. induciae in annos quadraginta petentibus datae,  
 frumento stipendioque imperato. Paci externae con-  
 festim continuatur discordia domi. agrariae legis tri-  
 buniciiis stimulis plebs furebat. Consules, nihil Me-  
 nenii damnatione, nihil periculo deterriti Servilii,  
 summa vi resistunt. abeuntes magistratu Cn. <sup>q)</sup> Genu-

U. c. 281. cius tribunus plebis adripuit. L. Aemilius et Opiter  
 a. C. 471. Virginius consulatum ineunt. Vopiscum Iulium pro  
 Virginio in quibusdam annalibus <sup>r)</sup> consulem invenio.  
 Hoc anno (quoscunque consules habuit) rei ad popu-  
 lum Furius et Manlius circumeunt sordidati non ple-  
 bem magis, quam iuniores Patrum. suadent, monent,  
*Honoribus et administratione reipublicae abstineant;  
 consulares vero fascēs, praetextam, curulemque sellam,  
 nihil aliud, quam pompam funeris, putent. claris in-  
 signibus velut infulis velatos ad mortem destinari. Quod  
 si consulatus tanta dulcedo sit, iam nunc ita in animum  
 inducant, consulatum captum et obpressum ab tribuni-  
 cia potestate esse; consuli, velut adparitori tribunicio,  
 omnia ad nutum imperiumque tribuni agenda esse. Si  
 se commoverit, si respexerit Patres, si aliud, quam  
 plebem, esse in republica crediderit, exsilium C. Mar-  
 cii, Menenii damnationem et mortem, sibi proponat an-  
 te oculos.* His accensi vocibus Patres consilia inde,  
 non publica, sed in privato, seductaque a plurium  
 conscientia, habere. ubi quum id modo constaret, iu-  
 re an iniuria eripiendos esse reos, atrocissima quae-

q) consules Gron. Crev.

r) in quibusdam pro Virgi-  
 nio annalibus Eaed.



que maxime placebat sententia. nec auctor quamvis <sup>U. c. 281.</sup>  
 audaci facinori deerat. Igitur iudicii die, quum plebs <sup>a. C. 471.</sup>  
 in foro erecta exspectatione staret, mirari primo,  
 quod non descenderet tribunus: deinde, quum iam  
 mora suspectior fieret, deterritum a primoribus cre-  
 dere, et desertam ac proditam caussam publicam que-  
 ri. Tandem, qui obversati vestibulo tribuni fuerant,  
 nunciant, domi mortuum esse inventum. quod ubi in  
 totam concionem pertulit rumor; sicut acies funditur  
 duce occiso, ita dilapsi passim alii alio. Praecipuus  
 pavor tribunos invaserat, quam nihil auxilii sacratae  
 leges haberent, morte collegae monitos. Nec Patres  
 satis moderate ferre laetitiam. adeoque neminem noxi-  
 ae <sup>s</sup>) poenitebat, ut etiam insontes fecisse videri vel-  
 lent, palamque ferretur, malo domandam tribuniciam  
 potestatem.

LV. Sub hac pessimi exempli victoria delectus  
 edicitur: paventibusque tribunis, sine intercessione  
 ulla consules rem peragunt. Tum vero irasci plebes,  
 tribunorum magis silentio, quam consulum imperio,  
 et dicere, *Actum esse de libertate sua; rursus ad an-  
 tiqua reditum; cum Genucio una mortuam ac sepultam  
 tribuniciam potestatem. aliud agendum, ac cogitandum,  
 quomodo resistatur Patribus. Id autem unum consili-  
 um esse, ut se ipsa plebs, quando aliud nihil auxilii  
 habeat, defendat. Quatuor et viginti lictores adparere  
 consulibus, et eos ipsos plebis homines. Nihil contem-  
 tius, neque infirmius, si sint, qui contemnant. Sibi  
 quemque ea magna atque horrenda facere. His vocibus  
 alii alios quum incitassent, ad Voleronem Publilium,  
 de plebe hominem, quia, quod ordines duxisset, ne-  
 garet, se militem fieri debere, lictor missus est a  
 consulibus. Volero adpellat tribunos. Quum auxilio  
 nemo esset, consules spoliari hominem, et virgas ex-  
 pediri iubent. *Provoco, inquit, ad populum, Volero,  
 quoniam tribunus civem Romanum in conspectu suo vir-**

s) noxae Gron. Grev.

U. c. 281. *gis caedi malunt, quam ipsi in lecto suo a vobis truci-*  
 a. C. 471. *dari.* quo ferocius clamitabat, eo infestius circumscin-  
 dere et spoliare lictor. Tum Volero, et praevalens  
 ipse, et adiuvantibus advocatis, repulso lictore, ubi  
 indignantium pro se acerrimus erat clamor, eo se in  
 turbam confertissimam recipit, clamitans, *Provoco,*  
*et fidem plebis inploro. adeste cives! adeste commilito-*  
*nes! nihil est, quod expectetis tribunos, quibus ipsis*  
*vestro auxilio opus est.* Concitati homines, veluti ad  
 proelium, se expediunt: adparebatque, omne discrimen adesse; nihil cuiquam sanctum, non publici fore, non privati iuris. Huic tantae tempestati quum se consules obtulissent, facile experti sunt, parum tutam maiestatem sine viribus esse. violatis lictoribus, fascibus fractis, e foro in curiam compelluntur; incerti, quatenus Volero exerceret victoriam. Conticescente deinde tumultu, quum in senatum vocari iussissent, queruntur iniurias suas, vim plebis, Voleronis audaciam. Multis ferociter dictis sententiis, vicere seniores, quibus, ira Patrum adversus temeritatem plebis certari, non placuit.

U. c. 282. LVI. Voleronem amplexa favore plebs proxi-  
 a. C. 470. mis comitiis tribunum plebi <sup>t)</sup> creat in eum annum, qui L. Pinarium, P. Furium consules habuit. contraque omnium opinionem, qui eum vexandis prioris anni consulibus permissurum tribunatum credebant, post publicam caussam privato dolore habito, ne verbo quidem violatis consulibus, rogationem tulit ad populum, ut plebei magistratus tributis comitiis fierent. Haud parva res sub titulo prima specie minime atroci ferebatur; sed quae patriciis omnem potestatem per clientium suffragia creandi, quos vellent, tribunos auferret. Huic actioni, gratissimae plebi, quum summa vi resisterent Patres; nec, quae una vis ad resistendum erat, ut intercederet, aliquis ex collegio auctoritate aut consulum aut principum adduci

<sup>t)</sup> plebei Crev.

posset; res tamen, suo ipsa molimine gravis, certaminibus in annum extrahitur. Plebs Voleronem tribunum reficit. Patres, ad ultimum dimicationis ratum venturam, Ap. Claudium, Appii filium, iam inde a paternis certaminibus invisum infestumque plebi, consulem faciunt. Collega ei T. Quinctius datur. Principio statim anni nihil prius, quam de lege, agebatur. sed ut inventor legis Volero, sic Laetorius, collega eius, auctor quum recentior, tum acrior erat. Ferocem faciebat belli gloria ingens; quod aetatis eius haud quisquam manu promptior erat. Is, quum Volero nihil, praeterquam de lege, loqueretur, insectatione abstinens consulum, ipse in accusationem Appii, familiaeque superbissimae ac crudelissimae in plebem Romanam, exorsus, quum a Patribus non consulem, sed carnificem ad vexandam et lacerandam plebem, creatum esse contenderet; rudis in militari homine lingua non subpetebat libertati animoque. Itaque, deficiente oratione, *Quandoquidem non* <sup>n)</sup> *facile loquor, inquit, Quirites, quam, quod locutus sum, praesto, crastino die adeste. Ego hic aut in conspectu vestro moriar, aut perferam legem.* Occupant tribuni templum postero die. consules nobilitasque ad impediendam legem in concione consistunt. Submoveri Laetorius iubet, praeterquam qui suffragium ineant. Adolescentes nobiles stabant, nihil cedentes viatori. tum ex his prehendi quosdam Laetorius iubet. Consul Appius negare, ius esse tribuno in quemquam, nisi in plebeium. Non enim populi, sed plebis, eum magistratum esse. nec illum ipsum submovere pro imperio posse more maiorum; quia ita dicatur: *Si vobis videtur, discedite, Quirites.* Facile et contemtim de iure disserendo perturbare Laetorium poterat. Ardens igitur ira tribunus viatorem mittit ad consulem: consul lictorem ad tribunum, privatum esse clamitans, sine imperio, sine magistratu; violatusque es-

n) add. tam Gron. Crev.

U. c. 285. set tribunus, ni et concio omnis atrox coorta pro tribuno in consulem esset; et concursus hominum in forum ex tota urbe concitatae multitudinis fieret. Sustinebat tamen Appius pertinacia tantam tempestatem: certatumque haud incruento proelio foret, ni Quinctius, consul alter, consularibus negotio dato, ut collegam vi, si aliter non possent, de foro abducerent, ipse nunc plebem saevientem precibus lenisset, nunc orasset tribunos, ut concilium dimitterent. *Darent irae spatium. non vim suam illis tempus adempturum; sed consilium viribus additurum. et Patres in populi, et consulem in Patrum fore potestate.*

LVII. Aegre sedata ab Quinctio plebs, multo aegrius consul alter a Patribus. Dimisso tandem concilio plebis, senatum consules habent. ubi quum timor atque ira in vicem sententias variassent; quo magis, spatio interposito, ab inpetu ad consultandum advocabantur, eo plus abhorrebant a certatione animi. adeo ut Quinctio gratias agerent, quod eius opera mitigata discordia esset. Ab Appio petitur, *Ut tantam consularem maiestatem esse vellet, quanta esse in concordi civitate posset* <sup>x)</sup>. *Dum tribuni consulesque ad se quisque omnia trahunt* <sup>y)</sup>, *nihil relictum esse virium in medio: distractam laceratamque rempublicam magis, quorum in manu sit, quam ut incolumis sit, quaeri.* Appius contra, *testari Deos atque homines, rempublicam prodi per metum ac deserì. non consulem senatui, sed senatum consuli deesse. graviores accipi leges, quam in Sacro monte acceptae sint.* Victus tamen Patrum consensu quievit. lex silentio perfertur.

LVIII. Tum primum tributis comitiis creati tribuni sunt: numero etiam additos tres <sup>z)</sup>, perinde ac duo antea <sup>a)</sup> fuerint, Piso auctor est. Nominat quoque tribunos, C. Sicinium, L. Numitorium, M. Dui-

x) *quanta in concordi civitate esse posset* Gron. Crev.

y) *trahant* Eaed.

z) *addito, tres*, Gron. c. Drak.

a) *ante* Gron. Crev.



lium, Sp. Icilium, L. Maecilius. Volscum Aequi-<sup>U. c. 283.</sup>  
cumque inter seditionem Romanam est bellum coor-<sup>a. C. 469.</sup>  
tum. vastaverant agros, ut, si qua secessio plebis fie-  
ret, ad se receptum haberet. Compositis deinde re-  
bus, castra retro movere. Ap. Claudius in Volscos  
missus. Quintio Aequi provincia evenit. Eadem in  
militia saevitia Appii, quae domi, esse <sup>b)</sup> liberior,  
quod sine tribuniciis vinculis erat. Odisse plebem plus  
quam paterno odio: se victum ab ea: se unico consule  
obiecto adversus tribuniciam potestatem, perlatam  
legem esse; quam minore conatu, nequaquam tanta  
Patrum spe, priores impedierint consules. Haec ira  
indignatioque ferocem animum ad vexandum saevo  
imperio exercitum stimulabat. nec ulla vi domari pot-  
erat. tantum certamen animis inbiberant. Segniter,  
otiose, neglegenter, contumaciter omnia agere. nec  
pudor, nec metus coercebat. Si citius agi vellet ag-  
men, tardius sedulo incedere: si adhortator operis  
adesset, omnes sua sponte motam remittere industriam.  
praesenti vultus demittere, tacite praetereuntem ex-  
secrari: ut invictus ille odio plebeio animus interdum  
moveretur. Omni nequidquam acerbitate prompta,  
nihil iam cum militibus agere: a centurionibus corru-  
ptum exercitum dicere: *tribunos plebei* cavillans inter-  
dum et *Volerones* vocare.

LIX. Nihil eorum Volsci nesciebant, instabant-  
que eo magis, sperantes, idem certamen animorum  
adversus Appium habiturum exercitum Romanum,  
quod adversus Fabium consulem habuisset. Ceterum  
multo Appio, quam Fabio, violentior fuit. Non enim  
vincere tantum noluit, ut Fabianus exercitus, sed  
vinci voluit. Productus in aciem turpi fuga petit ca-  
stra; nec ante restitit, quam signa inferentem Vol-  
scum munimentis vidit foedamque extremi agninis  
caedem. Tum expressa vis ad pugnandum, ut victor  
iam a vallo submoveretur hostis: satis tamen adpare-

b) *esse; eo liberior* Gron. Crev.

U. c. 283. ret, capi tantum castra militem Romanum noluisse.  
 a. C. 469. alii gaudere sua clade atque ignominia. Quibus nihil infractus ferox Appii animus, quum insuper saevire vellet, concionemque advocaret, concurrunt ad eum legati tribunisque, monentes, ne utique experiri vellet imperium, cuius vis omnis in consensu obedientium esset. Negare vulgo milites, se ad concionem ituros; passimque exaudiri voces postulantium, ut castra ex Volsco agro moveantur. Hostem victorem paullo ante prope in portis ac vallo fuisse; ingentisque mali non suspicionem modo, sed apertam speciem obversari ante oculos. Victus tandem, (quandoquidem nihil praeter tempus noxae lucrarentur) remissa concione, iter in insequentem diem pronunciari quum iussisset, prima luce classico signum profectionis dedit. Quum maxime agmen e castris explicaretur, Volsci, ut eodem signo excitati, novissimos adoriuntur. A quibus perlatus ad primos tumultus, eo pavore signaque et ordines turbavit, ut neque imperia exaudiri, neque instrui acies possent. nemo ullius, nisi fugae, memor. Ita effuso agmine per stragem corporum armorumque evasere, ut prius hostis desisteret sequi, quam Romanus fugere. Tandem, conlectis ex dissipato cursu militibus, consul, quum revocando nequidquam suos persecutus esset, in pacato agro castra posuit; advocataque concione, invectus haud falso in proditorem exercitum militaris disciplinae, desertorem signorum; ubi signa, ubi arma essent, singulos rogitans, inermes milites, signo amisso signiferos; ad hoc centuriones duplicariosque, qui reliquerant ordines, virgis caesos securi percussit. cetera multitudo forte decimus quisque ad supplicium lecti.

U. c. 284. LX. Contra ea in Aequis inter consulem ac militem comitate ac beneficiis certatum est. et natura  
 a. C. 468. Quinctius erat lenior, et saevitia infelix collegae, quo is magis gauderet ingenio suo, effecerat. Huic tantae concordiae ducis exercitusque non ausi obferre

se, Aequi vagari <sup>c)</sup> populabundum hostem per agros U. c. 285. passi. Nec ullo ante bello latius inde actae praedae. <sup>a.</sup> C. 469. omnis militi data est. Addebantur et laudes, quibus, haud minus quam praemio, gaudent militum animi. Tum duci, tum propter ducem Patribus quoque placatior exercitus rediit; sibi parentem, alteri exercitui dominum datum ab senatu, memorans. Varia fortuna belli, atroci discordia domi forisque annum exactum, insignem maxime comitia tributa efficiunt; res maior victoria suscepti certaminis, quam usu. plus enim dignitatis comitiis ipsis detractum est, Patribus ex concilio submovendis, quam virium aut plebi additum est <sup>d)</sup> aut demtum <sup>e)</sup> Patribus.

LXI. Turbulentior inde annus excepit, L. Va- <sup>U. c. 284.</sup> <sup>a.</sup> C. 468. lerio, Ti. Aemilio consulibus, quum <sup>f)</sup> propter certamina ordinum de lege agraria, tum propter iudicium Ap. Claudii: cui, acerrimo adversario legis, causamque possessorum publici agri, tamquam tertio consuli, sustinenti, M. Duilius et C. Sicinius diem dixere. Numquam ante tam invisus plebi reus ad iudicium vocatus populi est, plenus suarum, plenus paternarum irarum. Patres quoque non temere pro ullo aequae adnisi sunt: propugnatorem senatus, maiestatisque vindicem suae, ad omnes tribunicios plebeiosque obpositum tumultus, modum dumtaxat in certamine egressum, iratae obiici plebi <sup>g)</sup>. Unus e Patribus, ipse Ap. Claudius, et tribunos, et plebem, et suum iudicium pro nihilo habebat. Illum non minae plebis, non senatus preces percellere umquam potuere, non modo ut vestem mutaret, aut supplex prensaret homines; sed ne ut ex consueta quidem asperitate orationis (quum ad populum agenda causa esset) aliquid leniret atque submitteret. Idem habitus oris, eadem contumacia in vultu, idem in oratione spiritus erat:

c) *se Aequi; vagari* etc.

e) *ademptum* Eaed.

Gron. Crev. *est del.* Eaed.

f) *tum* Eaed.

d) *est del.* Eaed.

g) *obiici iratae plebi* Eaed.

U. c. 234. adeo ut magna pars plebis Appium non minus reum  
 a. C. 468. timeret, quam consulem timuerat. Semel caussam dixit, quo semper agere omnia solitus erat, accusatorio spiritu: adeoque constantia sua et tribunos obstupescit et plebem, ut diem ipsi sua voluntate prodicerent: trahi deinde rem sinerent. Haud ita multum interim temporis fuit. ante tamen, quam prodicta dies veniret, morbo moritur. cuius quum laudationem tribuni plebis impedire conarentur, plebs fraudari sollemni honore supremum diem tanti viri noluit; et laudationem tam aequis auribus mortui audivit, quam vivi accusationem audierat; et exsequias frequens celebravit.

LXII. Eodem anno Valerius consul, cum exercitu in Aequos profectus, quum hostem ad proelium elicere non posset, castra obpugnare est adortus. Prohibuit foeda tempestas, cum grandine ac tonitribus coelo deiecta. Admirationem deinde auxit, signo receptui dato, adeo tranquilla serenitas reddita: ut, velut numine aliquo defensa castra obpugnare iterum, religio fuerit. omnis ira belli ad populationem agri vertit. Alter consul Aemilius in Sabinis bellum gessit. et ibi, quia hostis moenibus se tenebat, vastati agri sunt. Incendiis deinde, non villarum modo, sed etiam vicorum, quibus frequenter habitabatur, Sabini exciti, quum praedatoribus obcurrissent, ancipiti proelio digressi, postero die retulere castra in tutiora loca. Id satis consuli visum, cur pro victo relinqueret hostem, integro inde decedens bello.

U. c. 285. LXIII. Inter haec bella, manente discordia do-  
 a. C. 467. mi, T. Numicius Priscus, A. Virginius consules facti. Non ultra videbatur latura plebes dilationem agrariae legis, ultimaque vis parabatur, quum, Volscos adesse, fumo ex incendiis villarum fugaque agrestium cognitum est. ea res maturam iam seditionem ac <sup>h)</sup> prope erumpentem repressit. Consules, coacti ex-  
<sup>h)</sup> ac del. Gron.



templo ab senatu ad bellum, educta ex urbe iuven-<sup>U. c. 285.</sup>  
tute, tranquillio-rem ceteram plebem fecerunt. Et<sup>a. C. 467.</sup>  
hostes quidem, nihil aliud quam perfusis vano timore  
Romanis, citato agmine abeunt. Numicius Antium  
adversus Volscos, Virginius contra Aequos profectus.  
ibi ex insidiis prope magna accepta clade, virtus mi-  
litum rem, prolapsam negligentia consulis, restituit.  
Melius in Volscis imperatum est. Fusi primo proe-  
lio hostes, fuga-que in urbem Antium, ut tum res  
erant, opulentissimam acti. quam consul obpugnare  
non ausus, Cenonem, aliud oppidum, nequaquam  
tam opulentum, ab Antiatibus cepit. Dum Aequi  
Volscique Romanos exercitus tenent, Sabini usque ad  
portas urbis populantes incessere. deinde ipsi paucis  
post diebus ab duobus exercitibus, utroque per iram  
consule ingresso in fines, plus cladum, quam intule-  
rant, acceperunt.

LXIV. Extremo anno pacis aliquid fuit; sed, ut  
semper alias, sollicitae certamine Patrum et plebis.  
Irata plebs interesse consularibus comitiis noluit. Per<sup>U. c. 286.</sup>  
Patres clientesque Patrum consules creati T. Quin-<sup>a. C. 466.</sup>  
ctius, Q. Servilius. similem annum priori consules  
habent, seditiosa initia, bello deinde externo tran-  
quilla. Sabini, Crustumino-  
s campos citato agmine  
transgressi, quum caedes et incendia circum Anienem  
flumen fecissent, a porta prope Collina moenibusque  
puls-  
i, ingentes tamen praedas hominum pecorumque  
egere. quos Servilius consul infesto exercitu insecu-  
tus, ipsum quidem agmen adipisci aequis locis non  
potuit; populationem adeo effuse fecit, ut nihil bello  
intactum relinqueret, multiplicique capta praeda red-  
iret. Et in Volscis respublica egregie gesta, quum<sup>i)</sup>  
ducis, tum militum opera. Primum aequo campo  
signis conlatis pugnatum, ingenti caede utrinque,  
plurimo sanguine. et Romani, quia paucitas damno  
sentiendo propior erat, gradum retulissent; ni salu-

i) tum Gron. Crev.

U. c. 286. bri mendacio consul, fugere hostes ab cornu altero  
 a. C. 466. clamitans, concitasset aciem. inpetu facto, dum se  
 putant vincere, vicere. Consul, metuens ne nimis  
 instando renovaret certamen, signum receptui dedit.  
 Intercessere pauci dies, velut tacitis induciis utrimque  
 quiete sumta; per quos ingens vis hominum ex om-  
 nibus Volscis Aequisque populis in castra venit, haud  
 dubitans, si senserint, Romanos nocte abituros. Ita-  
 que tertia fere vigilia ad castra obpugnanda veniunt.  
 Quinctius, sedato tumultu, quem terror subitus ex-  
 civerat, quum manere in tentoriis quietum militem  
 iussisset, Hernicorum cohortem in stationem educit;  
 cornicines tubicinesque, in equos <sup>k)</sup> inpositos, canere  
 ante vallum iubet, sollicitumque hostem ad lucem te-  
 nere. reliquum noctis adeo tranquilla omnia in castris  
 fuere, ut somni quoque Romanis copia esset. Vol-  
 scos species armatorum peditum, quos et plures esse,  
 et Romanos putabant, fremitus hinnitusque equorum,  
 qui, et insueto sedente equite, et insuper aures agi-  
 tante sonitu, saeviebant, intentos velut ad inpetum  
 hostium tenuit.

LXV. Ubi inluxit, Romanus, integer satiatumque  
 somno productus in aciem, fessum stando et vigiliis  
 Volscum primo inpetu perculit. quamquam cessere  
 magis, quam pulsi hostes sunt: quia ab tergo erant  
 clivi, in quos post principia integris ordinibus tutus  
 receptus fuit. Consul, ubi ad iniquum locum ventum  
 est, sistit aciem. miles aegre teneri, clamare et po-  
 scere, ut percussis instare liceat. Ferocius agunt  
 equites: circumfusi duci vociferantur <sup>l)</sup> se ante signa  
 ituros. Dum cunctatur consul, virtute militum fre-  
 tus, loco parum fidens, conclamant, se ituros: cla-  
 moremque res est secuta. Fixis in terram pilis, quo  
 leviores ardua evaderent, cursu subeunt. Volscus,  
 effusis ad primum inpetum missilibus telis, saxa ob-

k) in equis Gron.

l) equites circumfusi duci:  
 vociferantur etc. Gron. Crev.

iacentia pedibus ingerit in subeuntes, turbatosque U. c. 286.  
ictibus crebris urget ex superiore loco. sic prope one- a. C. 466.  
ratum est sinistrum Romanis cornu, ni referentibus  
iam gradum consul, increpando simul temeritatem,  
simul ignaviam, pudore metum excussisset. Resti-  
tere primo obstinatis animis: deinde, ut in obtinen-  
tes locum vires ferebant, audent ultro gradum inferre;  
et, clamore renovato, commovent aciem. tum rursus,  
inpetu capto, enituntur, atque exsuperant iniquita-  
tem loci. Iam prope erat, ut in summum clivi iugum  
evaderent, quum terga hostes dedere: effusoque cursu  
pene agmine uno fugientes sequentesque castris inci-  
dere. In eo pavore castra capiuntur. qui Volscorum  
effugere potuerunt, Antium petunt. Antium et Ro-  
manus exercitus ductus: paucos circumsessum dies  
deditur, nulla obpugnantium nova vi; sed quod iam  
inde ab infelici pugna castrisque amissis ceciderant  
animi.

---

## EPITOME LIBRI III.

Seditiones de agrariis legibus factae. Capitolium, ab exsulis et servis occupatum, caesis iis receptum est. Census his actus est 1). priore lustro censa sunt 2) civium capita centum quatuor millia 3) ducenta quatuordecim, praeter orbos orbisque. sequenti, centum septemdecim millia ducenta novemdecim 4). Quum adversus Aequos res male gesta esset, L. Quintius Cincinnatus dictator factus, quum rure intentus rustico operi esset, ad id bellum gerendum arcessitus est. Is victos hostes sub iugum misit. Tribunorum plebis numerus ampliatum est, ut essent decem, trigesimo sexto anno a primis tribunis plebis. Petitis per legatos, et adlatis Atticis legibus, ad constituendas eas proponendasque decemviri pro consulibus sine ullis aliis magistratibus creati, altero et trecentesimo anno, quam Roma condita erat: et, ut a regibus ad consules, ita a consulibus ad decemviros translatum imperium. Hi, decem 5) tabulis legum positis, quum modeste se in eo honore gessissent, et ob id in alterum quoque annum eundem esse magistratum placuisset, duabus tabulis ad decem adiectis, quum complura inpotenter fecissent, magistratum noluerunt deponere, et in tertium annum retinuerunt: donec inviso 6) eorum imperio finem adtulit libido Ap. Claudii. Qui, quum in amorem virginis incidisset, submisso, qui eam in servitutem peteret, necessitatem patri eius Virginio inposuit, rapto ex taberna proxima cultro, ut filiam interimeret; quum aliter eam tueri non posset, ne in potestatem stuprum inlaturi veniret. Hoc tam magnae luxuriae exemplo plebs incitata montem Aventinum occupavit, coegitque decemviros abdicare se magistratu. ex quibus Appius et unus collegarum, qui praecipue poenam meruerant, in carcerem coniecti; ceteri in exsilium acti. Res praeterea contra Sabinos, et Volscos, et Aequos prospere gestas continet, et parum honestum populi Romani iudicium: qui, iudex inter Ardeates et Aricinos sumtus, agrum, de quo ambigebatur, sibi adiudicavit.

1) *est* del. Gron. Crev.2) *del. sunt* Eaed.3) *quatuor et viginti millia*  
Eaed.4) *centum triginta duo mil-*  
*lia quadringenta novem* Eaed.5) *Ii decem* Eaed.6) *invicto* Eaed.



## T. LIVII PATAVINI

## LIBER III.

Antio capto, Ti. Aemilius et Q. Fabius consules <sup>U. c. 287.</sup>  
fiunt. Hic erat Fabius Quintus, qui unus exstinctae <sup>a. C. 465.</sup>  
ad Cremeram genti superfuerat. Iam priore consu-  
latu Aemilius dandi agri plebi fuerat auctor. Itaque  
secundo quoque consulatu eius et agrarii se in spem  
legis erexerant, et tribuni rem, contra consules saepe  
tentatam, adiutore utique consule, obtineri posse  
rati, suscipiunt; et consul manebat in sententia sua.  
Possessores et magna pars Patrum, tribuniciis se iac-  
tare actionibus principem civitatis, et largiendo de  
alieno popularem fieri querentes, totius invidiam rei  
a tribunis in consulem averterant. Atrox certamen  
aderat, ni Fabius consilio neutri parti acerbo rem ex-  
pedisset. T. Quinctii ductu et auspicio agri capti priore  
anno aliquantum a Volscis esse: Antium, propinquam,  
opportunam, et maritimam urbem, coloniam deduci  
posse: ita sine querelis possessorum plebem in agros  
ituram, civitatem in concordia fore. Haec sententia  
accepta est. Triumviros agro dando creat T. Quin-  
ctium, A. Virginium, P. Furium. iussi nomina dare,  
qui agrum accipere vellent. Fecit statim, ut sit, fa-  
stidium copia; adeoque pauci nomina dedere, ut ad  
explendum numerum coloni Volsci adderentur: cetera  
multitudo poscere Romae agrum malle, quam alibi  
accipere. Aequi a Q. Fabio (is eo cum exercitu vene-  
rat) pacem petiere, irritamque eam ipsi subita incur-  
sione in agrum Latinum fecere.

U. c. 288. II. Q. Servilius, insequenti anno (is enim cum  
a. C. 464. Sp. Postumio consul fuit) in Aequos missus, in Latino agro stativa habuit. intra castra quies necessaria morbo implicatum exercitum tenuit. Extractum inter-  
U. c. 289. tium annum bellum est, Q. Fabio et T. Quinctio consulibus. Fabio extra ordinem, quia is victor pacem Aequis dederat, ea provincia data. qui, haud dubia spe profectus, famam nominis sui pacaturam Aequos, legatos in concilium gentis missos nunciare iussit; Q. *Fabium consulem dicere, se ex Aequis pacem Romam tulisse, ab Roma Aequis bellum adferre, eadem dextra armata, quam pacatam illis antea dederat. quorum id perfidia et periurio fiat, Deos nunc testes esse, mox fore ultiores. Se tamen, utcumque sit, etiam nunc, poenitere sua sponte Aequos, quam pati hostilia, malle. Si poeniteat, tutum receptum ad expertam clementiam fore: sin periurio gaudeant, Diis magis iratis, quam hostibus, gesturos bellum.* Haec dicta adeo nihil moverunt quemquam, ut legati prope violati sint, exercitusque in Algidum adversus Romanos missus. Quae ubi Romam sunt nunciata, indignitas rei, magis quam periculum, consulem alterum ab urbe excivit. ita duo consulares exercitus ad hostem accessere acie instructa, ut confestim dimicarent. Sed quum forte haud multum diei superesset, unus ab statione hostium exclamat: *Ostentare hoc est, Romani, non gerere bellum. in noctem imminens aciem instruitis. longiore luce ad id certamen, quod instat, nobis opus est. Crastino die oriente sole redite in aciem: erit copia pugnandi, ne timete.* His vocibus irritatus miles in diem posterum in castra reducitur, longam venire noctem ratus, quae moram certamini faceret. Tum quidem corpora cibo somnoque curant. ubi iuluxit postero die, prior aliquanto constitit Romana acies; tandem et Aequi processere. Proelium fuit utrimque vehemens; quod et Romanus ira odioque pugnabat, et Aequos conscientia contracti culpa periculi, et desperatio fu-

turae sibi postea fidei, ultima audere et experiri coge-  
 bat. Non tamen sustinuerunt aciem Romanam Aequi:  
 pulsique quum in fines suos se recepissent, nihilo in-  
 clinatioribus ad pacem animis ferox multitudo incre-  
 pare duces, quod in aciem, qua pugnandi arte Roma-  
 nus excellat, commissa res sit. Aequos populationi-  
 bus incursionibusque meliores esse; et multas passim  
 manus, quam magnam molem unius exercitus, rectius  
 bella gerere.

III. Relicto itaque castris praesidio, egressi tan-  
 to cum tumultu invasere fines Romanos, ut ad urbem  
 quoque terrorem pertulerint. necopinata etiam res  
 plus trepidationis fecit, quod nihil minus, quam ne  
 victus ac prope in castris obsessus hostis memor po-  
 pulationis esset, timeri poterat; agrestesque, pavidi  
 incidentes portis, non populationem, nec praedonum  
 parvas manus, sed, omnia vano augentes timore, exer-  
 citus et legiones adesse hostium, et infesto agmine  
 ruere ad urbem, clamabant. Ab his proximi audita  
 incerta, leoque vaniora, ferre ad alios. cursus cla-  
 morque vocantium ad arma haud multum a pavore  
 captae urbis abesse. Forte ab Algido Quinctius con-  
 sul redierat Romam, (id remedium timori fuit) tu-  
 multuque sedato, victos timeri increpans hostes, prae-  
 sidia portis inposuit. Vocato dein<sup>a)</sup> senatu, quum,  
 ex auctoritate Patrum iustitio indicto, profectus ad  
 tutandos fines esset, Q. Servilio praefecto urbis re-  
 licto, hostem in agris<sup>b)</sup> non invenit. Ab altero con-  
 sule res gesta egregie est. qui, qua venturum hostem  
 sciebat, gravem praeda, eoque inpeditiore agmine  
 incedentem adgressus, funestam ei populationem fe-  
 cit. Pauci hostium evasere ex insidiis: praeda omnis  
 recepta est. sic finem iustitio, quod quatrimum fuit,  
 reditus Quinctii consulis in urbem fecit. Census de-  
 inde actus, et conditum ab<sup>c)</sup> Quinctio lustrum. cen-

a) *deinde* Gron. Crev.c) *a* Eaed.b) *agro* Eaed.

U. c. 239. sa civium capita centum quatuor millia et ducenta  
 a. C. 463. quatuordecim <sup>d)</sup> dicuntur, praeter orbos orbasque. In  
 I Aequis nihil deinde memorabile actum. in oppida sua  
 se recepere, uri sua popularique passi. Consul, quum  
 aliquoties per omnem hostium agrum infesto agmine  
 populabundus isset, cum ingenti laude praedaque Ro-  
 mam rediit.

U. c. 200. IV. Consules inde A. Postumius Albus, Sp. Fu-  
 a. C. 462. rius Fusus. Furios Fusios scripsere quidam. id ad-  
 moneo, ne quis inmutationem virorum ipsorum esse,  
 quae nominum est, putet. Haud dubium erat, quin  
 cum Aequis alter consulum bellum gereret. Itaque  
 Aequi ab Ecetranis Volscis praesidium petiere. quo  
 cupide oblato, (adeo civitates hae perpetuo in Ro-  
 manos odio certavere) bellum summa vi parabatur.  
 Sentiant Hernici, et praedicunt Romanis, Ecetranum  
 ad Aequos descisse. suspecta et colonia Antium fuit,  
 quod magna vis hominum inde, quum oppidum cap-  
 tum esset, confugisset ad Aequos. isque miles per  
 bellum Aequicum vel acerrimus fuit. Compulsis de-  
 inde in oppida Aequis, ea multitudo dilapsa quum  
 Antium redisset, sua sponte iam infidos colonos Ro-  
 manis abalienavit. Necdum matura re, quum defec-  
 tionem parari delatum ad senatum esset, datum ne-  
 gōtium est consulibus, ut, principibus coloniae Ro-  
 manae excitis, quaererent, quidnam rei esset. qui quum  
 haud gravati <sup>e)</sup> venissent, introducti a consulibus ad  
 senatum ita responderunt ad interrogata, ut magis  
 suspecti, quam venerant, dimitterentur. Bellum in-  
 de haud dubium haberi. Sp. Furius, consulum alter,  
 cui ea provincia evenerat, profectus in Aequos, Her-  
 nicorum in agro populabundum hostem invenit; ig-  
 narusque multitudinis, quia nusquam universa con-  
 specta fuerat, inparem copiis exercitum temere pug-

<sup>d)</sup> centum quatuor et viginti Crev. Sed pro quindecim Crev.  
 millia ducenta quindecim Gron. habet quatuordecim.

<sup>e)</sup> gravate Gron. Crev.



nae commisit. primo concursu pulsus se in castra re-<sup>U. c. 290.</sup>  
cepit. neque is finis periculi fuit. namque et proxima<sup>a. U. 462.</sup>  
nocte et postero die tanta vi castra sunt circumsessa  
atque obpugnata, ut ne nuncius quidem inde mitti  
Romam posset. Hernici, et male pugnatum, et con-  
sulem exercitumque obsideri, nunciaverunt. tantum-  
que terrorem incussere Patribus, ut (quae forma se-  
natus consulti ultimae semper necessitatis habita est)  
Postumio alteri consulum negotium daretur, *Videre*<sup>f)</sup>  
*ne quid respublica detrimenti caperet*. Ipsum consulem  
Romae manere ad conscribendos omnes, qui arma  
ferre possent, optimum visum est; pro consule T.  
Quinctium subsidio castris cum sociali exercitu mitti.  
ad eum explendum Latini, Hernicique, et colonia  
Antium dare Quinctio subitarios milites (ita tum re-  
pentina auxilia adpellabant) iussi.

V. Multi per eos dies motus multique inpetus  
hinc atque illinc facti, quia, superante multitudine,  
hostes carpere multifariam vires Romanas, ut non  
subfecturas ad omnia, adgressi sunt. simul castra ob-  
pugnabantur, simul pars exercitus ad populandum  
agrum Romanum missa, urbemque ipsam, si qua  
fortuna daret, tentandam. L. Valerius ad praesi-  
dium urbis relictus; consul Postumius ad arcendas  
populationes finium missus. Nihil remissum ab ulla  
parte curae aut laboris. vigiliae in urbe, stationes  
ante portas, praesidiaque in muris disposita, et, quod  
necesse erat in tanto tumultu, iustitium per aliquot  
dies servatum. Interim in castris Furius consul,  
quum primo quietus obsidionem passus esset, in in-  
cautum hostem decumana porta erupit, et, quum  
persequi posset, metu substitit<sup>g)</sup>, ne qua, ex parte  
altera, in castra vis fieret. Furium legatum (frater  
idem consulis erat) longius extulit cursus: nec suos  
ille redeuntes, persequendi studio, neque hostium ab

f) *videret* Gron. Crev.g) *subsistit* Gron.

U. c. 290. tergo incursum vidit. ita exclusus, multis saepe frustra conatibus captis, ut viam sibi ad castra faceret, acriter dimicans cecidit. Et consul, nuncio circumventi fratris conversus ad pugnam, dum se temere magis, quam satis caute, in mediam dimicationem infert, vulnere accepto, aegre ab circumstantibus ereptus, et suorum animos turbavit, et ferociores hostes fecit. qui, caede legati et consulis vulnere accensi, nulla deinde vi sustineri potuere, quum<sup>h)</sup> compulsi in castra Romani rursus obsiderentur nec spe, nec viribus pares. venissetque in periculum summa rerum, ni T. Quinctius peregrinis copiis cum Latino Hernicoque exercitu subvenisset. Is, intentos in castra Romana Aequos legatique caput ferociter ostentantes ab tergo adortus, simul ad signum a se procul editum ex castris eruptione facta, magnam vim hostium circumvenit. Minor caedes, fuga effusior Aequorum in agro fuit Romano. in quos palatos, praedam agentes, Postumius aliquot locis, quibus opportuna inposuerat praesidia, inpetum dedit. ii vagi, dissipato agmine fugientes, in Quinctium victorem, cum saucio consule revertentem, incidere. Tum consularis exercitus egregia pugna consulis vulnus, legati et cohortium ultus est caedem. magnae clades ultro citroque illis diebus et inlatae et acceptae. Difficile ad fidem est in tam antiqua re, quot pugnaverint ceciderintve, exacto adfirmare numero. audet tamen Antias Valerius concipere summas. Romanos cecidisse in Hernico agro quinque millia ac trecentos; ex praedatoribus Aequorum, qui populabundi in finibus Romanis vagabantur, ab A. Postumio consule duo millia et<sup>i)</sup> quadringentos caesos: ceteram multitudinem, praedam agentem, quae inciderit in Quinctium, nequaquam pari defunctam esse caede. interfecta inde quatuor millia, et, exsequendo subti-

h) *quin* Grev.i) *et* del. Gron. Grev.

liter numerum, ducentos, ait, et triginta. Ut<sup>k)</sup> Ro-U. c. 290.  
mam reditum et iustitium remissum est<sup>1)</sup>, coelum vi-a. G. 462.  
sum est ardere plurimo igni; portentaque alia aut ob-  
versata oculis, aut vanas exterritis ostentavere spe-  
cies. His avertendis terroribus in triduum feriae in-  
dictae, per quas omnia delubra pacem Deum expos-  
centium virorum mulierumque turba inplebantur. Co-  
hortes inde Latinae Hernicaeque ab senatu, gratiis  
ob inpigram militiam actis, remissae domos. Antia-  
tes, mille milites, quia serum auxilium post proelium  
venerant<sup>m)</sup>, prope cum ignominia dimissi.

VI. Comititia inde habita. creati consules L. Ae-U. c. 291.  
butius, P. Servilius Kalendis Sextilibus, ut tunc a. G. 461.  
principium anni agebatur, consulatum ineunt. Grave  
tempus et forte annus pestilens erat urbi agrisque,  
nec hominibus magis, quam pecori; et auxere vim  
morbi, terrore populationis pecoribus agrestibusque  
in urbem acceptis. Ea conludio mixtorum omnis ge-  
neris animantium et odore iusolito urbanos, et agre-  
stem, confertum in arta tecta, aestu ac vigiliis ange-  
bat, ministeriaque in vicem ac contagio ipsa vulga-  
bant morbos. Vix instantes sustinentibus clades repen-  
te legati Hernici nunciant, in agro suo Aequos Volscos-  
que coniunctis copiis castra posuisse. inde exercitu  
ingenti<sup>n)</sup> fines suos depopulari. Praeterquam quod  
infrequens senatus indicio erat sociis, afflictam civi-  
tatem pestilentia esse, moestum etiam responsum tu-  
lere: *ut per se ipsi Hernici cum Latinis res suas tuta-*  
*rentur. Urbem Romanam subita Deum ira morbo po-*  
*pulari. Si qua eius mali quies veniat, ut anno ante,*  
*ut semper alias, sociis opem laturos.* Discessere socii,  
pro tristi nuncio tristiore domum referentes; quippe  
quibus per se sustinendum bellum erat, quod vix Ro-  
manis fulti viribus sustinuissent. Non diutius se in

k) *Inde* Gron. Crev.m) *venerat* Gron.1) *reditum est: iustitium remissum. Coelum etc.* Eaed.n) *ingenti exercitu* Gron. Crev.

U. c. 291. Hernico hostis continuit. pergīt inde infestus in agrōs  
 a. C. 461. Romanos, etiā sine belli iniuria vastatos. Ubi quum  
 obviu8 nemo, ne inermis quidem, fieret, perque om-  
 nia, non praesidiis modo deserta, sed etiā cultu  
 āgresti, transirent; pervenere ad tertium lapidem  
 Gabina via. Mortuus Aebutius erat Romanus consul.  
 collega eius Servilius exigua in spe trahebat animam.  
 adfecti plerique principum, Patrum maior pars, mi-  
 litaris fere aetas omnis: ut non modo ad expeditio-  
 nes, quas in tanto tumultu res poscebat, sed vix ad  
 quietas stationes viribus subficerent. Munus vigilia-  
 rum senatores, qui per aetatem ac valetudinem pote-  
 rant, per se ipsi obibant: circuitio ac cura aedilium  
 plebei erat. ad eos summa rerum ac majestas consu-  
 laris imperii venerat.

VII. Deserta omnia, sine capite, sine viribus,  
 Dii praesides ac fortuna urbis tutata est, quae Vol-  
 scis Aequisque, praedonum potius mentem, quam  
 hostium, dedit. adeo enim nulla spes non potiundi  
 modo, sed ne adeundi quidem Romana moenia, ani-  
 mos eorum cepit, tectaque procul visa atque imminen-  
 tes tumuli avertere mentes eorum; ut, totis passim  
 castris fremitu orto, *quid in vasto ac deserto agro in-  
 ter tabem pecorum hominumque desides sine praeda tem-  
 pus tererent, quum integra loca, Tusculanum agrum,  
 opimum copiis, petere possent?* signa repente convel-  
 lerent, transversisque itineribus per Lavicanos agros  
 in Tusculanos colles transirent. eo vis omnis tempe-  
 stasque belli conversa est. Interim Hernici Latini-  
 que, pudore etiā, non misericordia solum, moti,  
 si nec obstitissent communibus hostibus, infesto āg-  
 mine Romanam urbem petentibus, nec opem ullam  
 obsessis sociis ferrent, coniuncto exercitu Romam  
 pergunt. Ubi quum hostes non invenissent, secuti  
 famam ac vestigia, obvii fiunt descendentibus ab Tu-  
 sculano in Albanam vallem. ibi haudquaquam aequo  
 proelio pugnatum est, fidesque sua sociis parum felix



in praesentia fuit. Haud minor Romae fit morbo <sup>U. c. 291.</sup>  
 strages, quam quanta ferro sociorum facta erat. con- <sup>a. C. 461.</sup>  
 sul, qui unus supererat, moritur. mortui et alii clari  
 viri, M. Valerius, T. Virginus Rutilus, augures;  
 Ser. Sulpicius, curio maximus. et per ignota capita  
 late evagata est vis morbi: inopsque senatus auxilii  
 humani, ad Deos populum ac vota vertit. iussi cum  
 coniugibus ac liberis supplicatum ire, pacemque ex-  
 poscere Deum. Ad id, quod sua quemque mala coge-  
 bant, auctoritate publica evocati, omnia delubra in-  
 plent. stratae passim matres, crinibus templa verren-  
 tes, veniam irarum coelestium, finemque pesti ex-  
 poscunt.

VIII. Inde paullatim, seu pace Deum inpetra-  
 ta, seu graviore tempore anni iam circumacto, de-  
 functa morbis corpora salubriora esse incipere: ver-  
 sisque animis iam ad publicam curam, quum aliquot  
 interregna exissent, P. Valerius Publicola tertio die,  
 quam interregnum inierat, consules creat L. Lucre- <sup>U. c. 292.</sup>  
 tium Tricipitinum et T. Veturium Geminum; sive <sup>a. C. 460.</sup>  
 ille Vetusius fuit. Ante diem tertium idus Sextiles  
 consulatum ineunt, iam satis valida civitate, ut non  
 solum arcere bellum, sed ultro etiam inferre posset.  
 Igitur nunciantibus Hernicis, in fines suos transcen-  
 disse hostes, inpigre promissum auxilium. duo con-  
 sulares exercitus scripti. Veturius missus in Volscos  
 ad bellum ultro inferendum. Tricipitinus, popula-  
 tionibus arcendis sociorum agro obpositus, non ultra,  
 quam iu Hernicos, procedit. Veturius primo proe-  
 lio hostes fundit fugatque. Lucretium, dum in Her-  
 nicis sedet, praedonum agmen fefellit, supra montes  
 Praenestinos ductum, inde demissum in campos. Va-  
 stavere agros Praenestinum Gabinumque: ex Gabino  
 in Tusculanos flexere colles. urbi quoque Romae in-  
 gens praebitus terror, magis in re subita, quam quod  
 ad arcendam vim parum virium esset. Q. Fabius  
 praeerat urbi. is, armata iuventute, dispositisque

U. c. 292. praesidiis, tuta omnia ac tranquilla fecit. Itaque ho-  
 a. C. 400. stes, praeda ex proximis locis rapta, adpropinquare  
 urbi non ausi, quum circumactio agmine redirent,  
 quanto longius ab urbe hostium abscederent, eo so-  
 lutiore cura in Lucretium incidunt consulem, iam  
 ante exploratis itineribus suis instructum, et ad cer-  
 tamen intentum. Igitur, praeparatis animis, repen-  
 tino pavore percussos adorti, aliquanto pauciores mul-  
 titudinem ingentem fundunt fugantque; et compulsos  
 in cavas valles, quum exitus haud in facili essent,  
 circumveniunt. Ibi Volscum nomen prope deletum  
 est. tredecim millia quadringentos septuaginta ceci-  
 disse in acie ac fuga, mille ducentos quinquaginta vi-  
 vos captos, signa viginti septem militaria relata, in  
 quibusdam annalibus invenio. ubi etsi adiectum ali-  
 quid numero sit, magna certe caedes fuit. Victor con-  
 sul, ingenti praeda potitus, eadem in stativa rediit.  
 Tum °) consules castra coniungunt: et Volsci Aequi-  
 que adflictas vires suas in unum contulere. Tertia  
 illa pugna eo anno fuit. eadem fortuna victoriam dedit:  
 fusis hostibus, etiam castra capta.

IX. Sic res Romana in antiquum statum rediit:  
 secundaeque belli res extemplo urbanos motus exci-  
 taverunt. C. Terentillus Arsa tribunus plebis eo anno  
 fuit. is, consulibus absentibus, ratus locum tribuni-  
 ciis actionibus datum, per aliquot dies Patrum super-  
 biam ad plebem criminatus, maxime in consulare im-  
 perium, tamquam nimium, nec tolerabile liberae ci-  
 vitati, invehebatur: *nomine enim tantum minus invi-  
 diosum, re ipsa prope atrocius, quam regium, esse.*  
*Quippe duos pro uno domino p) acceptos, inmoderata,*  
*infinita potestate: qui, soluti atque effrenati ipsi, om-  
 nes metus legum omniaque supplicia verterent in plebem.*  
*Quae ne aeterna illis licentia sit, legem se promulgatu-  
 rum, ut quinque viri creentur legibus de imperio consu-  
 lari scribendis. Quod populus in se ius dederit, eo con-*

o) Tunc Gron. Crev.

p) dominos Eaed.

*sulem usurum: non ipsos libidinem ac licentiam suam* <sup>U. c. 292.</sup>  
*pro lege habituros.* Qua promulgata lege, quum ti- <sup>a. C. 460.</sup>  
merent Patres, ne, absentibus consulibus, iugum ac-  
ciperent, senatus a praefecto urbis Q. Fabio vocatur:  
qui adeo atrociter in rogationem latoremque ipsum est  
invectus, ut nihil, si ambo consules infesti circum-  
starent tribunum, relictum minarum atque terroris  
sit: *insidiatum eum, et tempore capto adortum rempu-*  
*blicam.* Si quem similem eius priore anno, inter mor-  
bum bellumque, irati Dii tribunum dedissent, non po-  
tuisse sisti. Mortuis duobus consulibus, iacente aegra  
civitate in conlutione omnium rerum, ad tollendum e  
republica consulare imperium laturum leges fuisse; du-  
cem Volscis Aequisque ad obpugnandam urbem futurum.  
Quid tandem? illi <sup>q)</sup> non licere, si quid consules super-  
be in aliquem civium aut crudeliter fecerint, diem dice-  
re? accusare his ipsis iudicibus, quorum in aliquem  
saevitum sit? Non illud <sup>r)</sup> consulare imperium, sed  
tribuniciam potestatem invisam intolerandamque facere:  
quam placatam <sup>s)</sup> reconciliatamque Patribus de integro  
in antiqua redigi mala. neque illum se deprecari, quo  
minus pergat, ut coeperit. Vos, inquit Fabius, ceteri  
tribuni, oramus, ut primum omnium cogitetis, pote-  
statem istam ad singulorum auxilium, non ad perni-  
ciem universorum, comparatam esse. tribunos plebis vos  
creatos, non hostes Patribus. Nobis miserum, invi-  
diosum vobis est, desertam rempublicam invadi. non  
ius vestrum, sed invidiam, minueritis. Agite cum col-  
lega, ut rem integram in adventum consulum differat.  
ne Aequi quidem ac Volsci, morbo absumentis priore an-  
no consulibus, crudeli superboque nobis bello institere.  
Agunt cum Terentillo tribuni: dilataque in speciem  
actione, re ipsa sublata, consules extemplo arcessiti.

X. Lucretius cum ingenti praeda, maiore multo  
gloria rediit. et auget gloriam adveniens, exposita

q) Quid? tandem illi etc.  
Gron.

r) illūm Gron. Crev.

s) pacatam Eaed. c. Drak.

U. c. 292. <sup>a. C. 460.</sup> omni in campo Martio praeda, ut suum quisque per triduum cognitum abduceret. reliqua vendita, quibus domini non exstiteret. Debebatur omnium consensu consuli triumphus: sed dilata res est, tribuno de lege agente. id antiquius consuli fuit. Iactata per aliquot dies quum <sup>t)</sup> in senatu res, tum ad populum est. cessit ad ultimum maiestati consulis tribunus, et destitit. tum imperatori exercituique honos suus redditus. Triumphavit de Volscis Aequisque: triumphantem secutae suae legiones. alteri consuli datum, ut ovans sine militibus urbem iniret. Anno deinde insequenti <sup>u)</sup> lex Terentilla, ab toto relata collegio, no-

U. c. 293. <sup>a. C. 459.</sup> vos adgressa consules est. erant consules P. Volumnius, Ser. Sulpicius. Eo anno coelum ardere visum; terra ingenti concussa motu est. bovem locutam, cui rei priore anno fides non fuerat, creditum. Inter alia prodigia et carnem <sup>x)</sup> pluit: quem imbrem ingens numerus avium intervolutando rapuisse fertur. quod intercidit, sparsum ita iacuisse per aliquot dies, ut nihil odor mutaret. Libri per duumviros sacrorum aditi: pericula a conventu alienigenarum praedicta, ne qui in loca summa urbis inpetus, caedesque inde fierent. inter cetera monitum, ut seditionibus abstereretur. Id factum ad inpediendam legem, tribuni criminabantur, ingensque aderat certamen. Ecce (ut idem in singulos annos orbis volveretur) Hernici nunciant, Volscos et Aequos, etsi adcisae res sint, reficere exercitus; Antii summam rei positam; Ece-trae Antiates colonos palam concilia facere. id caput, eas vires belli esse. Ut haec dicta in senatu sunt, delectus edicatur <sup>y)</sup>: consules belli administrationem inter se dispartiri iussi, alteri ut Volsci, alteri ut Aequi provincia esset. Tribuni coram in foro personare, *Fabulam compositam Volsci belli, Hernicos ad partes paratos. iam ne virtute quidem premi libertatem populi*

t) tum Gron. Crev.

u) sequenti Eaed.

x) carne Eaed.

y) indigitur Eaed.



*Romani, sed arte eludi. quia, occidione prope occisos* U. c. 293.  
*Volscos et Aequos movere sua sponte arma posse, iam* <sup>2)</sup> a. G. 459  
*fides abierit, novos hostes quaeri. coloniam fidam, pro-*  
*pinquam, infamem fieri. bellum innoxiiis Antiatis*  
*indici, geri cum plebe Romana. quam, oneratam armis,*  
*ex urbe praecipiti agmine acturi essent, exsilio et rele-*  
*gatione civium ulciscentes tribunos. Sic, ne quid aliud*  
*actum putent, victam legem esse; nisi, dum in integro*  
*res sit, dum domi, dum togati sint, caveant, ne pos-*  
*sessione urbis pellantur, ne iugum accipiant. Si ani-*  
*mus sit, non defore auxilium. consentire omnes tribu-*  
*nos. nullum terrorem externum, nullum periculum esse.*  
*Cavisse Deos priore anno, ut tuto libertas defendi pos-*  
*set. Haec tribuni.*

XI. At ex parte altera consules in conspectu eo-  
rum, positis sellis, delectum habebant. eo decurrunt  
tribuni, concionemque secum trahunt. citati pauci,  
velut rei experiundae caussa: et statim vis coorta.  
Quemcumque lictor iussu consulisprehendisset, tri-  
bunus mitti iubebat. neque suum cuique ius modum  
faciebat, sed virium spe et manu obtinendum erat,  
quod intenderes. Quemadmodum se tribuni gessis-  
sent in prohibendo delectu, sic Patres in lege, quae  
per omnes comitiales dies ferebatur, inpedienda ge-  
rebant. Initium erat rixae, quum discedere populum  
iussissent tribuni, quod Patres se submoveri haud si-  
nebant. nec fere seniores rei intererant; quippe quae  
non consilio regenda, sed permissa temeritati auda-  
ciaeque esset. Multum et consules se abstinebant,  
ne cui in conluvione rerum maiestatem suam contu-  
meliae offerrent. Kaeso erat Quinctius, ferox iu-  
venis, qua nobilitate gentis, qua corporis magnitu-  
dine et <sup>a)</sup> viribus. ad ea munera, data a Diis, et ipse  
addiderat multa belli decora, facundiamque in foro;  
ut nemo, non lingua, non manu, promptior, in civi-

2) id fides Gron. Crev.

a) ac Eaed.

U. c. 293. tate haberetur. Hic, quum in medio Patrum agmine  
 a. C. 459. constitisset, eminens inter alios, velut omnes dicta-  
 turas consulatusque gerens in voce ac viribus suis,  
 unus inpetus tribunicios popularesque procellas susti-  
 nebat. Hoc duce, saepe pulsi foro tribuni, fusa ac  
 fugata plebs est. quî obvius fuerat, mulcatus nudatus-  
 que abibat: ut satis adpareret, si sic agi liceret, vic-  
 tam legem esse. Tum, prope iam percussis aliis tri-  
 bunis, A. Virginius, ex collegio unus, Kaesoni ca-  
 pitis diem dicit. atrox ingenium accenderat eo facto  
 magis, quam conterruerat: eo acrius obstare legi, agi-  
 tare plebem, tribunos veluti iusto persequi bello. Ac-  
 cusator pati reum ruere, invidiaeque flammam ac  
 materiam criminibus suis subgerere: legem interim,  
 non tam ad spem perferendi, quam ad lacessendam  
 Kaesonis temeritatem, ferre. Ibi multa, saepe ab  
 iuventute inconsulte dicta factaque, in unius Kaeso-  
 nis suspectum incidunt ingenium: tamen legi resiste-  
 batur. Et A. Virginius idemtidem plebi: *Ecquid<sup>b)</sup>*  
*sentitis iam, vos, Quirites, Kaesonem simul civem et*  
*legem, quam cupitis, habere non posse? Quamquam*  
*quid ego legem loquor? libertati obstat, omnes Tarqui-*  
*nios superbia exsuperat. Expectate, dum consul aut*  
*dictator fiat, quem privatum viribus et audacia reg-*  
*nantem videtis.* Adsentiebantur multi, pulsatos se-  
 quentes, et tribunum ad rem peragendam ultro in-  
 citabant.

XII. Iam aderat iudicio dies, adparebatque,  
 vulgo homines in damnatione Kaesonis libertatem agi  
 credere. tum demum coactus cum multa indignitate  
 prensabat singulos. sequebantur necessarii, princi-  
 pes civitatis. T. Quinctius Capitolinus, qui ter con-  
 sul fuerat, quum multa referret sua familiaeque de-  
 cora, adfirmabat: *Neque in Quinctia gente, neque in*  
*civitate Romana tantam indolem tam maturae virtutis*

b) add. inquit Gron. Crev.

*umquam exstitisse. Suum primum militem fuisse, se* U. c. 293.  
*saepe vidente pugnas in hostem. Sp. Furius, mis-* a. C. 459.  
*sum ab Quinctio Capitolino sibi eum in dubiis suis re-*  
*bus venisse subsidio. neminem unum esse, cuius magis*  
*opera putet rem <sup>c)</sup> restitutam. L. Lucretius, consul*  
*anni prioris, recenti gloria nitens, suas laudes parti-*  
*cipare cum Kaesone, memorare pugnas, referre egre-*  
*gia facinora, nunc in expeditionibus, nunc in acie: sua-*  
*dere et monere, iuvenem egregium, instructum naturae*  
*fortunaque omnibus bonis, maximum momentum rerum*  
*eius civitatis, in quamcunque venisset, suum, quam alie-*  
*num, mallent civem esse. Quod obfendat in eo, fervorem*  
*et audaciam aetatem quotidie auferre; quod desideretur*  
*consilium, id in dies crescere. Senescentibus vitiis, matu-*  
*rescente virtute, sinerent tantum virum senem in civi-*  
*tate fieri. Pater inter hos L. Quinctius, cui Cincin-*  
*nato cognomen erat, non iterando laudes, ne cumu-*  
*laret invidiam, sed veniam errori atque adolescentiae*  
*petendo, sibi, qui non dicto, non facto quemquam*  
*obfendisset, ut condonarent filium, orabat. Sed alii*  
*aversabantur preces, aut verecundia, aut metu: alii,*  
*se suosque mulcatos querentes, atroci responso iudi-*  
*cium suum praeferebant.*

XIII. Premebat reum; praeter vulgatam invi-  
 diam, crimen unum; quod M. Volscius Fictor, qui  
 ante aliquot annos tribunus plebis fuerat, testis ex-  
 stiterat, *Se haud multo post, quam pestilentia in urbe*  
*fuerat, in iuventutem, grassantem in Subura, inci-*  
*disse. ibi rixam natam esse, fratremque suum maiorem*  
*natu, necdum ex morbo satis validum, pugno ictum*  
*ab <sup>d)</sup> Kaesone cecidisse semianimem. Inter manus do-*  
*mm ablatum, mortuumque inde arbitrari, nec sibi rem*  
*exsequi tam atrocem per consules superiorum annorum*  
*licuisse. Haec Volscio clamitante, adeo concitati*  
*homines sunt, ut haud multum absuerit, quin inpe-*

c) rempublicam Gron. Crev. d) a Eaed.

U. c. 293. tu populi Kaeso interiret. Virginius adripi iubet  
 a. C. 459. hominem, et in vincula duci. patricii contra vi <sup>e)</sup> re-  
 sistunt. T. Quinctius clamat, *Cui rei capitalis dies*  
*dicta sit, et de quo futurum prope diem iudicium, eum*  
*indemnatum indicta caussa non debere violari.* Tribu-  
 nus supplicium negat sumturum se de indemnato; ser-  
 vaturum tamen in vinculis esse ad iudicii diem. ut, qui  
 hominem necaverit, de eo supplicii sumendi copia po-  
 pulo Romano fiat. Adpellati tribuni medio decreto  
 ius auxilii sui expediunt: in vincula coniici vetant:  
 sisti reum, pecuniamque, nisi sistatur, populo pro-  
 mitti, placere pronunciant. Summam pecuniae  
 quantam aequum esset promitti, veniebat in dubium:  
 id ad senatum reiicitur. Reus, dum consulerentur  
 Patres, retentus in publico est. vades dare placuit.  
 unum vadem tribus millibus aeris obligarunt. quot  
 darentur, permissum tribunis est. decem finierunt.  
 tot vadibus accusator vadatus est reum. Hic primus  
 vades publicos dedit. dimissus, e foro nocte proxima  
 in Tuscos in exsilium abiit. Iudicii die quum excu-  
 saretur solum vertisse exsilii caussa, nihilominus  
 Virgino comitia habente, collegae adpellati dimise-  
 re concilium: pecunia a patre exacta crudeliter, ut,  
 divenditis omnibus bonis, aliquamdiu trans Tiberim,  
 veluti relegatus, devio <sup>f)</sup> quodam tugurio viveret.

XIV. Hoc iudicium et promulgata lex exercuit  
 civitatem: ab externis armis otium fuit. Quum, velut  
 victores, tribuni, percussis Patribus Kaesonis exsi-  
 lio, prope perlatam esse crederent legem, et, quod  
 ad seniores Patrum pertineret, cessissent possessione  
 reipublicae; iuniores, id maxime quod Kaesonis so-  
 dalium fuit, auxere iras in plebem, non minuerunt  
 animos. sed ibi plurimum profectum est, quod modo  
 quodam temperavere inpetus suos. Quum primo post  
 Kaesonis exsilium lex coepta ferri est, instructi para-

e) vi contra vim Gron. Crev. f) in devio Eaed.



tique cum ingenti clientium exercitu sic tribunos, ubi U. c. 293.  
 primum submoventes praebuere caussam, adorti sunt, a. C. 459.  
 ut nemo unus inde praecipuum quidquam gloriae do-  
 mum invidiaeve ferret; mille pro uno Kaesones ex-  
 stitisse, plebes quereretur. Mediis diebus, quibus  
 tribuni de lege non agerent, nihil eisdem illis placi-  
 dius aut quietius erat. benigne salutare, adloqui ple-  
 bis homines, domum invitare, adesse in foro, tribu-  
 nos ipsos cetera pati sine interpellatione concilia ha-  
 bere: numquam ulli, neque publice, neque privatim,  
 truces esse, nisi quum de lege agi coeptum esset.  
 Alibi popularis iuventus erat. nec cetera modo tribunū  
 tranquillo<sup>g)</sup> peregere; sed refecti quoque in insequen-  
 tem annum. ne voce quidem incommoda, nedum ut  
 ulla vis fieret, paullatim<sup>h)</sup> permulcendo tractando-  
 que mansuefecerant plebem. His per totum annum  
 artibus lex elusa est.

XV. Accipiunt civitatem placidiorem consules  
 C. Claudius, Appii filius, et P. Valerius Publicola. U. c. 294.  
 Nihil novi novus annus adtulerat. legis ferendae aut a. C. 458.  
 accipiendae cura civitatem tenebat. Quantum iunio-  
 res Patrum plebi se magis insinuabant, eo acrius con-  
 tra tribuni tendebant, ut plebi suspectos eos crimi-  
 nando facerent. *Coniurationem factam, Kaesonem Ro-  
 mae esse: interficiendorum tribunorum, trucidandae  
 plebis consilia inita. Id negotii datum ab senioribus  
 Patrum, ut iuventus tribuniciam potestatem e republica  
 tolleret, formaque eadem civitatis esset, quae ante Sa-  
 crum montem occupatum fuerat.* Et ab Volscis et Ae-  
 quis statum iam ac prope sollemne in singulos annos  
 bellum timebatur: propiusque aliud novum malum,  
 necopinato exortum. Exsules servique, ad quatuor  
 millia hominum et quingenti, duce Ap. Herdonio Sa-  
 bino, nocte Capitolium atque arcem occupavere. Con-  
 festim in arce facta caedes eorum, qui coniurare et

g) tranquille Gron. Crev. h) fieret. Paullatim etc. Crev.

U. c. 294. simul capere arma noluerant. alii inter tumultum praecipites pavore in forum devolant. alternae voces, *Ad arma*, et *Hostes in urbe sunt*, audiebantur. Consules et armare plebem, et inermem pati timebant. Incerti, quod malum repentinum, externum an intestinum, ab odio plebis, an ab servili fraude, urbem invasisset, sedabant tumultus, sedando interdum movebant. nec enim poterat pavida et consternata multitudo regi imperio. Dant tamen arma, non vulgo; tantum ut, incerto hoste, praesidium satis fidum ad omnia esset. Solliciti reliquum noctis, incertique, qui homines, quantus numerus hostium esset, in stationibus disponendis ad opportuna omnis urbis loca, egere. Lux deinde aperuit bellum ducemque belli. Servos ad libertatem Ap. Herdonius ex Capitolio vocabat, *Se misserrimi cuiusque suscepisse caussam, ut exsules iniuria pulsos in patriam reduceret, et servitiis grave iugum demeret. id malle populo Romano auctore fieri. Si ibi spes non sit, se Volscos, et Aequos, et omnia extrema tentaturum et concitaturum.*

XVI. Dilucere res magis Patribus atque consilibus. praeter ea tamen, quae denunciabantur, ne Veientium, neu Sabinorum id consilium esset, timere: et, quum tantum in urbe hostium esset, mox Sabinae Etruscaeque legiones ex composito adessent; tum aeterni hostes Volsci et Aequi, non ad populandos, ut ante, fines, sed ad urbem, ut ex parte captam, venirent. Multi et varii timores. inter ceteros eminebat terror servilis, ne suus cuique domi hostis esset. cui nec credere, nec, non credendo, ne infestior fieret, fidem abrogare, satis erat tutum. Vixque concordia sisti videbatur posse. tantum superantibus aliis ac emergentibus malis, nemo tribunos aut plebem timebat. mansuetum id malum, et per aliorum quietem malorum semper exoriens, tumque esse peregrino terrore sopitum videbatur. At id prope unum maxime inclinatis rebus incubuit. tantus enim tribu-

nos furor tenuit, ut non bellum, sed vanam imagi- U. c. 294.  
nem belli, ad avertendos ab legis cura plebis animos, a. C. 458.  
Capitolium insedissem contenderent: patriciorum ho-  
spites clientesque, si perlata lege frustra tumultuatos  
esse se sentiant, maiore, quam venerint, silentio  
abitu-ros. Concilium inde legi perferendae habere,  
avocato populo ab armis. Senatum interim consules  
habent, alio se maiore ab tribunis metu ostendente,  
quam quem nocturnus hostis intulerat.

XVII. Postquam arma poni, et discedere homi-  
nes ab stationibus nunciatum est, P. Valerius, col-  
lega senatum retinente, se ex curia proripit, inde in  
templum ad tribunos venit: *Quid hoc rei est, inquit,*  
*tribuni? Ap. Herdonii ductu et auspicio rempublicam*  
*eversuri estis? Tam felix vobis conrumpendis fuit, qui*  
*servitia vestra non commovit auctor? Quum hostes su-*  
*pra caput sint, discedi ab armis, legesque ferri placet?*  
Inde ad multitudinem oratione versa: *Si vos urbis,*  
*Quirites, si vestri nulla cura tangit; at vos veremini*  
*Deos vestros* <sup>i)</sup>, *ab hostibus captos. Iupiter optimus*  
*maximus, Iuno regina, et Minerva, alii Dii Deaeque*  
*obsidentur. castra servorum publicos vestros penates te-*  
*nent. Haec vobis forma sanae civitatis videtur? Tan-*  
*tum hostium non solum intra muros est, sed in arce su-*  
*pra forum curiamque: comitia interim in foro sunt:*  
*senatus in curia est: velut quum otium superat, sena-*  
*tor sententiam dicit: alii Quirites suffragium ineunt.*  
*Non, quidquid Patrum plebisque est, consules, tribu-*  
*nos, Deos, hominesque omnes armatos opem ferre, in*  
*Capitolium currere, liberare ac pacare augustissimam*  
*illam domum Iovis optimi maximi decuit? Romule pa-*  
*ter, tu mentem tuam, qua quondam arcem, ab his iis-*  
*dem Sabinis auro captam, recepisti, da stirpi tuae.*  
*iube hanc ingredi viam, quam tu dux, quam tuus in-*  
*gressus exercitus est. Primus, en, ego consul, quan-*

i) patrios Gron. Crev.

U. c. 294. *tum mortalis Deum possum, te, ac tua vestigia sequar.*  
 a. C. 458. Ultimum orationis fuit, *Se arma capere, vocare omnes Quirites ad arma. si quis inpediat, iam se consularis imperii, iam tribuniciae potestatis sacratarumque legum oblitum, quisquis ille sit, ubicumque sit, in Capitolio, in foro, pro hoste habiturum. Iuberent tribuni, quoniam in Ap. Herdonium vetarent, in P. Valerium consulem sumi arma. ausurum se in tribunis, quod princeps familiae suae ausus in regibus esset. Vim ultimam adparebat futuram, spectaculoque seditionem Romanam hostibus fore. nec lex tamen ferri, nec ire in Capitolium consul potuit. nox certamina coepta oppressit: tribuni cessere nocti, timentes consulum arma. Amotis inde seditionis auctoribus, Patres circumire plebem, inferentesque se in circulos, sermones temporis aptos serere: admonere, *Ut viderent, in quod discrimen rempublicam adducerent. Non inter Patres ac plebem certamen esse, sed simul Patres plebemque, arcem urbis, templa Deorum, penates publicos privatosque hostibus dedi. Dum haec in foro sedandae discordiae causa aguntur, consules interim, ne Sabini, ne Veiens hostis moveretur, circa portas murosque discesserant.**

XVIII. Eadem nocte et Tusculum de arce capta Capitolioque occupato, et alio turbatae urbis statu nuncii veniunt. L. Mamilius Tusculi tum dictator erat. is, confestim convocato senatu, atque introductis nunciis, magno opere censet, *Ne expectent, dum ab Roma legati, auxilium petentes, veniant: periculum ipsum, discrimenque, ac sociales Deos, fidemque foederum id poscere. Demerendi beneficio tam potentem, tam propinquam civitatem, numquam parem occasionem datures Deos. Placet ferri auxilium; iuventus conscribitur, arma dantur. Romam prima luce venientes, procul speciem hostium praebuere. Aequi aut Volsci venire visi sunt. deinde, ubi vanus terror abiit, accepti in urbem, agmine in forum de-*



scendunt. ibi iam P. Valerius, relicto ad portarum U. c. 294.  
 praesidia collega, instruebat aciem. Auctoritas viri<sup>a</sup>. G. 458.  
 moverat, adfirmantis, *Capitolio recuperato, et urbe*  
*pacata, si edoceri se sissent, quae fraus ab<sup>k</sup>) tribunis*  
*occulta in lege ferretur, memorem se maiorum suorum,*  
*memorem cognominis, quod<sup>l</sup>) populi colendi velut he-*  
*reditaria cura sibi a maioribus tradita esset, concilium*  
*plebis non inediturum.* Hunc ducem secuti, nequid-  
 quam reclamantibus tribunis, in clivum Capitolinum  
 erigunt aciem. adiungitur et Tusculana legio. certare  
 socii civesque, utri recuperatae arcis suum decus fa-  
 cerent. dux uterque suos adhortatur. Trepidare tum  
 hostes: nec ulli satis rei, praeterquam loco, fidere.  
 trepidantibus inferunt signa Romani sociique. Iam  
 in vestibulum perruperant templi, quum P. Valerius,  
 inter primores pugnam ciens, interficitur. P. Vo-  
 lumnius consularis vidit cadentem. is, dato negotio  
 suis, ut corpus obtegerent, ipse in locum vicemque  
 consulis provolat. Prae ardore inpetuque tantae rei  
 sensus non pervenit ad militem: prius vicit, quam se  
 pugnare sine duce sentiret. Multi exsulum caede  
 sua foedavere templum; multi vivi capti; Herdonius  
 interfectus. Ita Capitolium recuperatum. De capti-  
 vis, ut quisque liber aut servus esset, suae fortunae  
 a quoque sumtum supplicium est. Tusculanis gratiae  
 actae: Capitolium purgatum atque lustratum. In con-  
 sulis domum plebes quadrantes, ut funere ampliore  
 efferretur, iactasse fertur.

**XIX.** Pace parta, instare tum tribuni Patribus,  
*ut P. Valerii fidem exsolverent: instare Claudio, ut*  
*collegae Deos Manes fraude liberaret, agi de lege sine-*  
*ret.* Consul, *antequam collegam sibi subrogasset, ne-*  
*gare, passurum agi de lege.* Hae tenuere contentio-  
 nes usque ad comitia consulis subrogandi. Decembri  
 mense, summo Patrum studio, L. Quinctius Cincin-  
 natus, pater Kaesonis, consul creatur, qui iudicis

<sup>k</sup>) a Gron. Crev.

<sup>l</sup>) quo Eaed.

U. c. 294. tum statim occiperet. Perculsa erat plebes, consulem  
 a. C. 458. habitura iratum, potentem favore Patrum, virtute  
 sua, tribus liberis, quorum nemo Kaesoni cedebat  
 magnitudine animi; consilium et modum adhibendo,  
 ubi res posceret, priores erant. Is, ut magistratum  
 iniit, adsiduis concionibus pro tribunali, non in plebe  
 coercenda, quam senatu castigando, vehementior fuit:  
*cuius ordinis languore perpetui iam tribuni plebis, non  
 ut in republica populi Romani, sed ut in perdita domo,  
 lingua criminibusque regnarent. Cum Kaesone filio  
 suo virtutem, constantiam, omnia iuventutis belli do-  
 minique decora pulsa ex urbe Romana et fugata esse. lo-  
 quaces, seditiosos, semina discordiarum, iterum ac <sup>m</sup>)  
 tertium tribunos pessimis artibus regia licentia vivere.*  
*A. inquit, ille Virginius, quia in Capitolio non fuit,  
 minus supplicii, quam Ap. Herdonius, meruit? plus  
 hercule aliquanto, qui vere rem aestimare velit. Her-  
 donius, si nihil aliud, hostem se fatendo prope denuncia-  
 vit, ut arma caperetis: hic, negando bella esse, arma  
 vobis ademit, nudosque servis vestris et exsulibus obie-  
 cit. Et vos (C. Claudii pace, et P. Valerii mortui lo-  
 quar) prius in clivum Capitolinum signa intulistis, quam  
 hos hostes de foro tolleretis? Pudet Deorum hominum-  
 que. quum hostes in arce, in Capitolio essent, exsulum  
 et servorum dux, profanatis omnibus, in cella Iovis  
 optimi maximi habitaret, Tusculi ante, quam Romae,  
 sumta sunt arma. In dubio fuit, utrum L. Mamilius  
 Tusculanus dux, an P. Valerius et C. Claudius consu-  
 les Romanam arcem liberarent: et qui ante Latinos, ne  
 pro se quidem ipsis, quum in finibus hostem haberent,  
 adtingere arma passi sumus; nunc, nisi Latini sua  
 sponte arma sumsissent, capti et deleti eramus. Hoc  
 est, tribuni, auxilium plebi ferri, inermem eam hosti  
 trucidandam obiicere? Scilicet, si quis vobis humilli-  
 mus homo de vestra plebe, (quam partem, velut <sup>n</sup>) ab-  
 ruptam a cetero populo, vestram patriam peculiarem-  
 m) atque Gron. Crev. n) veluti Eaed.*

*que rempublicam fecistis) si quis ex his domum suam* <sup>U. c. 294.</sup>  
*obsessam a familia armata nunciaret, ferendum auxi-* <sup>a. C. 458.</sup>  
*lium putaretis. Iupiter optimus maximus, exsulum at-*  
*que servorum septus armis, nulla humana ope dignus*  
*erat? et hi postulant, ut sacrosancti habeantur, qui-*  
*bus ipsi Dii neque sacri, neque sancti sunt? At enim,*  
*divinis humanisque obruti sceleribus, legem vos hoc anno*  
*perlaturus dictitatis? Tum hercule illo die, quo ego con-*  
*sul sum creatus, male gesta respublica est, peius mul-*  
*to, quam quum P. o) Valerius consul periit, si tuleri-*  
*tis. Iam primum omnium, inquit, Quirites, in Vol-*  
*scos et Aequos mihi atque collegae legiones ducere in*  
*animo est. Nescio quo fato magis bellantes, quam pa-*  
*cati, propitios habemus Deos. quantum periculum ab*  
*illis populis fuerit, si Capitolium ab exsulibus obsessum*  
*scissent, suspicari de praeterito, quam re ipsa experiri,*  
*est melius.*

XX. Moverat plebem oratio consulis: erecti Pa-  
 tres restitutam credebant rempublicam: consul alter,  
 comes animosior, quam auctor, suscepisse collegam  
 priorem actionem tam gravis rei facile passus, inper-  
 agendis consularis officii partem ad se vindicabat.  
 Tum tribuni, eludentes velut vana dicta, persequi  
 quaerendo, quonam modo exercitum educturi consules  
 essent, quos delectum habere nemo passurus esset? No-  
 bis vero, inquit Quinctius, nihil delectu opus est; quum,  
 quo tempore P. Valerius ad recipiendum Capitolium ar-  
 ma plebi dedit, omnes in verba iuraverint, conventuros  
 se iussu consulis, nec iniussu abituros. Edicimus ita-  
 que, omnes, qui in verba iurastis, crastina die armati  
 ad lacum Regillum adsitis. Cavillari tum tribuni, et  
 populum exsolvere religione velle: privatum eo tem-  
 pore Quinctium fuisse, quum sacramento adacti sint.  
 Sed nondum haec, quae nunc tenet seculum, negle-  
 gentia Deum venerat: nec interpretando sibi quisque

o) P. del. Gron. Crev.

U. c. 294. iusiurandum et leges aptas faciebat, sed suos potius  
 a. C. 458. mores ad ea adcommodabat. Igitur tribuni, ut inpe-  
 diendae rei nulla spes erat, de proferendo exercitu  
 agere. eo magis, quod, *et augures iussos adesse ad  
 Regillum lacum*, fama exierat, *locumque inaugurari,  
 ubi auspicato cum populo agi posset; ut, quidquid Ro-  
 mae vi tribunicia rogatum esset, id comitiis ibi abro-  
 garetur. Omnes id iussuros, quod consules vellent.  
 neque enim provocationem esse longius ab urbe mille  
 passuum: et tribunos, si eo adveniant, in alia turba  
 Quiritium subiectos fore consulari imperio. Terrebant  
 haec: sed ille maximus terror animos agitabat, quod  
 saepius Quinctius dictitabat <sup>p)</sup>, *Se consulum comitia  
 non habiturum. Non ita civitatem aegram esse, ut con-  
 suetis remediis sisti possit. dictatore opus esse reipubli-  
 cae, ut, qui se moverit ad sollicitandum statum civi-  
 tatis, sentiat, sine provocatione dictaturam esse.**

XXI. Senatus in Capitolio erat. eo tribuni cum  
 perturbata plebe veniunt. multitudo clamore ingenti,  
 nunc consulum, nunc Patrum, fidem inplorant. nec  
 ante moverunt de sententia consulem, quam tribuni,  
 se in auctoritate Patrum futuros esse, polliciti sunt.  
 Tunc, referente consule de tribunorum et plebis po-  
 stulatis, senatusconsulta fiunt, *Neque tribuni legem  
 eo anno ferrent, neque consules ab urbe exercitum  
 educerent. In reliquum magistratus continuari, et eos-  
 dem tribunos refici, iudicare senatum contra rempubli-  
 cam esse. Consules fuere in Patrum potestate: tri-  
 buni, reclamantibus consulibus, refecti. Patres quo-  
 que, ne quid cederent plebi, et ipsi L. Quinctium  
 consulem reficiebant. Nulla toto anno vehementior  
 actio consulis fuit. Mirer, inquit, si vana vestra,  
 Patres conscripti, auctoritas ad plebem est <sup>q)</sup>? Vos ele-  
 vatis eam. quippe, quia plebs senatusconsultum in con-  
 tinuandis magistratibus solvit, ipsi quoque solutum*

p) dictabat Gron. Crev.

q) ad plebem auctoritas est?  
 Eaed.



*vultis, ne temeritati multitudinis cedatis: tamquam id sit plus posse in civitate, plus levitatis ac licentiae habere. levius enim vaniusque profecto est, sua decreta et consulta tollere, quam aliorum. Imitamini, Patres conscripti, turbam inconsultam: et, qui exemplo aliis esse debetis, aliorum exemplo peccetis potius, quam alii vestro recte faciant; dum ego ne imiter tribunos, nec me contra senatusconsultum consulem renunciari patiar. Te vero, C. Claudii, adhortor, ut et ipse populum Romanum hac licentia arceas: et de me hoc tibi persuadeas, me ita accepturum, ut non honorem meum a te impeditum, sed gloriam sprete honoris auctam, invidiamque, quae ex <sup>r)</sup> continuato eo inpenderet, levitam putem. Communiter inde edicunt, Ne quis L. Quinctium consulem faceret. si quis fecisset, se id suffragium non observaturos.*

**XXII.** Consules creati Q. Fabius Vibulanus tertium et L. Cornelius Maluginensis. Census actus eo anno. lustrum, propter Capitolium captum, consulem occisum, condi religiosum fuit. Q. Fabio, L. Cornelio consulibus, principio anni statim res turbulenta. Instigabant plebem tribuni. bellum ingens a Volscis et Aequis Latini atque Hernici nunciabant. iam Antii Volscorum legiones esse: et ipsam coloniam ingens metus erat defecturam. aegreque inpetratum a tribunis, ut bellum praeverti sinerent. Consules inde partiti provincias. Fabio, ut Antium legiones duceret, datum: Cornelio, ut Romae praesidio esset; ne qua pars hostium, qui Aequis mos erat, ad populandum veniret. Hernici et Latini iussi milites dare ex foedere: duaeque partes sociorum in exercitu, tertia civium fuit. Postquam ad diem praestitutum venerunt socii, consul extra portam Capenam castra locat. inde, lustrato exercitu, Antium profectus, haud procul oppido stativisque hostium

r) ex del. Gron.

U. c. 265. consedit. Ubi quum Volsci, quia nondum ab Aequis  
 a. C. 457. venisset exercitus, dimicare non ausi, quemadmo-  
 dum quieti vallo se tutarentur, pararent; postero die  
 Fabius, non permixtam unam sociorum civiumque,  
 sed trium populorum tres separatim acies circa val-  
 lum hostium instruxit. Ipse erat medius cum legio-  
 nibus Romanis. inde signum observare iussit, ut pa-  
 riter et socii rem inciperent, referrentque pedem;  
 si receptui cecinisset. equites item suae cuique parti  
 post principia conlocat. Ita trifariam adortus castra  
 circumvenit: et, quum undique instaret, non susti-  
 nentes inpetum Volscos vallo deturbat. Transgres-  
 sus inde munitiones, pavidam turbam inclinatumque  
 in partem unam castris expellit. Inde effuse fugien-  
 tes eques, cui superare vallum haud facile fuerat;  
 quum ad id spectator pugnae adstitisset, libero cam-  
 po adeptus, parte victoriae fruitur, territos caedendo.  
 Magna et in castris et extra munimenta caedes fugi-  
 entium fuit: sed praeda maior; quia vix arma secum  
 efferre hostis potuit. deletusque exercitus foret, ni  
 fugientes silvae texissent.

XXIII. Dum ad Antium haec geruntur, interim  
 Aequi, robore iuventutis praemisso, arcem Tuscula-  
 nam inproviso nocte capiunt: reliquo exercitu haud  
 procul moenibus Tusculi considunt, ut distenderent  
 hostium copias. Haec celeriter Romam, ab Roma  
 in castra Antium perlata, movent Romanos haud se-  
 cus, quam si Capitolium captum nunciaretur. adeo  
 et recens erat Tusculanorum meritum, et similitudo  
 ipsa periculi reposcere datum auxilium videbatur.  
 Fabius, omissis omnibus, praedam ex castris raptim  
 Antium convehit. Ibi modico praesidio relicto, ci-  
 tatum agmen Tusculum rapit. nihil praeter arma, et  
 quod cocti ad manum fuit cibi, ferre militi licuit.  
 Commeatum ab Roma consul Cornelius subvehit. ali-  
 quot menses Tusculi bellatum. parte exercitus consul  
 castra Aequorum obpugnabat: partem Tusculanis de-

derat ad arcem recuperandam. Vi numquam eo sub-<sup>U. c. 295.</sup>  
 iri potuit. fames postremo inde detraxit hostem. Quo<sup>a. C. 457.</sup>  
 postquam ventum ad extremum est, inermes nudique  
 omnes sub iugum ab Tusculanis missi. hos, ignomi-  
 niosa fuga domum se recipientes, Romanus consul in  
 Algido consecutus, ad unum omnes occidit. Victor  
 ad Columen (id loco nomen est) exercitu relicto castra  
 locat. Et alter consul, postquam moenibus iam Ro-  
 manis s), pulso hoste, periculum esse desierat, et  
 ipse ab Roma profectus. Ita bifariam consules in-  
 gressi hostium fines, ingenti certamine hinc Volscos,  
 hinc Aequos populantur. Eodem anno descisse An-  
 tiates, apud plerosque auctores invenio. L. Corne-  
 lium consulem id bellum gessisse, oppidumque ce-  
 pisse, certum adfirmare, quia nulla apud vetustiores  
 scriptores eius rei mentio est, non ausim.

XXIV. Hoc bello perfecto, tribunicium domi  
 bellum Patres territat. Clamant, *fraude fieri, quod*  
*foris teneatur exercitus: frustrationem eam legis tollen-*  
*dae esse. se nihilominus rem susceptam peracturos.* Ob-  
 tinuit tamen P. Lucretius praefectus urbis, ut actio-  
 nes tribuniciae in adventum consulum differrentur.  
 Erat et nova exorta caussa motus. A. Cornelius et  
 Q. Servilius quaestores M. Volscio, quod falsus haud  
 dubie testis in Kaesonem exstitisset, diem dixerant.  
 multis enim emanabat indiciis, neque fratrem Vols-  
 cii, ex quo semel fuerit aeger, umquam non modo  
 visum in publico, sed ne adsurrexisse quidem ex  
 morbo, multorumque tabe mensium mortuum: nec  
 his temporibus, in quae testis crimen coniecisset,  
 Kaesonem Romae visum: adfirmantibus, qui una  
 meruerant, secum eum tum frequentem ad signa sine  
 ullo commeatu fuisse. ni ita esset, multi privatim  
 ferebant Volscio iudices t). Quum ad iudicium ire  
 non auderet, omnes eae res, in unum congruentes,

s) Romanis iam Gron. Crev.

t) iudicem Eaed.

U. c. 295. haud magis dubiam damnationem Volscii, quam Kae-  
 a. C. 457. sonis Volscio teste fuerat, faciebant. In mora tribuni erant, qui comitia quaestores habere de reo, nisi prius habita de lege essent, passuros negabant. ita extracta utraque res in consulum adventum est. Qui ubi triumphantes victore cum exercitu urbem inierunt, quia silentium de lege erat, percussos magna pars credebant tribunos. At illi, (etenim extremum anni iam erat) quartum adfectantes tribunatum, in comitiorum disceptationem ab lege certamen avertent. et quum consules nihilo minus adversus continuationem tribunatus, quam si lex minuendae suae maiestatis causa promulgata ferretur, tetendissent, victoria certaminis penes tribunos fuit. Eodem anno Aequis pax est petentibus data. Census, res priore anno inchoata, perficitur: idque lustrum ab origine urbis decimum conditum. Fuerunt censa civium capita centum septemdecim millia trecenta novemdecim<sup>u</sup>). Consulum magna domi bellicae eo anno gloria fuit: quod et foris pacem peperere, et domi, etsi non concors, minus tamen, quam alias, infesta civitas fuit.

U. c. 296. XXV. L. Minucius inde et C. Nautius consules  
 a. C. 456. facti duas residuas anni prioris causas exceperunt. Eodem modo consules legem, tribuni iudicium de Volscio inpediebant: sed in quaestoribus novis maior vis, maior auctoritas erat. Cum M. Valerio, Valerii filio, Volesi nepote, quaestor erat T. Quinctius Capitolinus, qui ter consul fuerat. Is, quoniam neque Quinctiae familiae Kaeso, neque reipublicae maximus iuvenum restitui posset, falsum testem, qui dicendae causae innoxio potestatem ademisset, iusto ac pio bello persequabatur. Quum Virginius maxime et tribuni de lege agerent, duum mensium spatium consulibus datum est ad inspiciendam legem: ut,

u) *centum triginta duo mil- lia quadringenta novem* Gron.  
 Grev.



quum edocuissent populum, quid fraudis occultae ferretur, sinerent deinde suffragium inire. hoc inter-<sup>U. c. 296.  
a. C. 456.</sup> valli datum res tranquillas in urbe fecit. Nec diuturnam quietem Aequi dederunt: qui, rupto foedere, quod ictum erat priore anno cum Romanis, imperium ad Gracchum Cloelium deferunt. is tum longe princeps in Aequis erat. Graccho duce in Lavicanum agrum, inde in Tusculanum, hostili populatione veniunt, plenique praedae <sup>x)</sup> in Algido castra locant. In ea castra Q. Fabius, P. Volumnius, A. Postumius, legati ab Roma, venerunt questum iniurias, et ex foedere res repetitum. eos Aequorum imperator, *quae mandata habeant ab senatu Romano, ad quercum iubet dicere: se alia interim acturum.* quercus ingens arbor praetorio iuminebat, cuius umbra opaca sedes erat. Tum ex legatis unus abiens, et haec, inquit, *sacrata quercus, et quidquid Deorum est, audiant foedus a vobis ruptum. nostrisque et nunc querelis adsint, et mox armis; quum Deorum hominumque simul violata iura exsequemur.* Romam ut rediere legati, senatus iussit, alterum consulem contra Gracchum in Algidum exercitum ducere: alteri populationem finium Aequorum provinciam dedit. Tribuni suo more inpedire delectum. et forsitan ad ultimum inpedissent; sed novus subito additus terror est.

XXVI. Vis Sabinorum ingens prope ad moenia urbis infesta populatione venit. foedati agri, terror iniectus urbi est. Tum plebs benigne arma cepit. reclamantibus frustra tribunis, magni duo exercitus scripti. alterum Nautius contra Sabinos duxit: castrisque ad Eretum positis, per expeditiones parvas, ple-  
rumque nocturnis incursionibus, tantam vastitatem in Sabino agro reddidit, ut, comparati ad eam, prope intacti bello fines Romani viderentur. Minucio neque fortuna nec vis animi eadem in gerendo nego-

x) *praeda* Gron. Grev.

U. c. 296. tio fuit. nam, quum haud procul ab hoste castra po-  
 a. C. 456. suisset, nulla magnopere clade accepta, castris se  
 pavidus tenebat. Quod ubi senserant <sup>y)</sup> hostes, cre-  
 vit ex metu alieno, ut fit, audacia: et, nocte ador-  
 ti castra, postquam parum vis aperta profecerat, mu-  
 nitiones postero die circumdant. quae priusquam, un-  
 dique vallo obiecto, clauderent exitus, quinque equi-  
 tes, inter stationes hostium emissi, Romam pertulere,  
 consulem exercitumque obsideri. Nihil nec tam <sup>z)</sup>  
 inopinatum, nec tam <sup>a)</sup> insperatum accidere potuit.  
 Itaque tantus pavor, tanta trepidatio fuit, quanta, si  
 urbem, non castra, hostes obsiderent. Nautium con-  
 sulem arcessunt. in quo quum parum praesidii vide-  
 retur, dictatoremque dici placeret, qui rem perculsam  
 restitueret, L. Quinctius Cincinnatus consensu om-  
 nium dicitur. Operae pretium est audire, qui omnia  
 prae divitiis humana spernunt, neque honori magno  
 locum, neque virtuti putant esse, nisi ubi effuse ad-  
 fluant opes. Spes unica imperii populi Romani L.  
 Quinctius trans Tiberim, contra eum ipsum locum,  
 ubi nunc navalia sunt, quatuor iugerum colebat  
 agrum, quae prata Quinctia vocantur. Ibi ab legatis,  
 seu fossam fodiens palae innisus, seu quum araret;  
 operi certe, id quod constat, agresti intentus; salute  
 data in vicem redditaque, rogatus, *ut, quod bene ver-*  
*teret ipsi rei que publicae, togatus mandata senatus au-*  
*diret*, admiratus, rogitansque, *satin' salva essent om-*  
*nia?* togam propere e tugurio proferre uxorem Raci-  
 liam iubet. Qua simul, absterso pulvere ac sudore,  
 velatus processit, dictatorem eum legati gratulantes  
 consalutant: in urbem vocant: qui terror sit in exer-  
 citu, exponunt. Navis Quinctio publice parata fuit.  
 transvectumque tres obviam egressi filii excipiunt;  
 inde alii propinqui atque amici; tum Patrum maior  
 pars. Ea frequentia stipatus, antecedentibus lictori-

y) senserunt Gron. Crev.

a) tam del. Eaed.

z) tam nec Eaed.

bus, deductus est domum: et plebis concursus ingens <sup>U. c. 296.</sup>  
fuit. sed ea nequaquam tam laeta Quinctium vidit; <sup>a. G. 456.</sup>  
et imperii nimium, et virum in ipso imperio vehem-  
entio rem rata. Et illa quidem nocte nihil praeter-  
quam vigilatum est in urbe.

XXVII. Postero die dictator, quum ante lucem  
in forum venisset, magistrum equitum dicit L. Tar-  
quitium patriciae gentis, sed qui, quum stipendia pe-  
dibus propter paupertatem fecisset, bello tamen pri-  
mus longe Romanae iuventutis habitus esset. Cum  
magistro equitum in concionem venit, iustitium edi-  
cit, claudi tabernas tota urbe iubet, vetat quemquam  
privatae quidquam rei agere. Tum, quicumque ae-  
tate militari essent, armati, cum cibariis in dies quin-  
que coctis vallisque duodenis, ante solis occasum  
Martio in campo adessent: quibus aetas ad militandum  
gravior esset, vicino militi, dum is arma pararet, val-  
lumque peteret, cibaria coquere iussit. Sic iuventus  
discurrit ad vallum petendum. summere, unde cui-  
que proximum fuit: prohibitus nemo est: inpigre-  
que omnes ad edictum dictatoris praesto fuere. In-  
de composito agmine, non itineri magis apti <sup>b)</sup>,  
quam proelio, si res ita tulisset, legiones ipse dicta-  
tor, magister equitum suos equites ducit. In utro-  
que agmine, quas tempus ipsum poscebat, adhorta-  
tiones erant: *adderent gradum, maturato opus esse,*  
*ut nocte ad hostem pervenire possent. consulem exerci-*  
*tumque Romanum obsideri. tertium diem iam clausos*  
*esse: quid quaeque nox aut dies ferat, incertum esse:*  
*puncto saepe temporis maximarum rerum momenta verti.*  
*Adclera signifer, sequere miles,* inter se quoque, gra-  
tificantes ducibus, clamabant. media nocte in Algi-  
dum perveniunt: et, ut sensere, se iam prope ho-  
stes esse, signa constituunt.

XXVIII. Ibi dictator, quantum nocte prospici

b) *apto* Gron. Crev.

U. c. 296. poterat, equo circumvectus, contemplatusque, qui  
 a. C. 456. tractus castrorum, quaeque forma esset, tribunis  
 militum imperavit, ut sarcinas in unum conici iube-  
 ant, militem cum armis valloque redire in ordines  
 suos. facta, quae imperavit. Tum, quo fuerant <sup>c)</sup>  
 ordine in via, exercitum omnem longo agmine cir-  
 cundat hostium castris, et, ubi signum datum sit,  
 clamorem omnes tollere iubet. clamore sublato, ante  
 se quemque ducere fossam, et iacere vallum. Edito  
 imperio, signum secutum est. iussa miles exsequitur,  
 clamor hostes circumsonat. Superat inde castra hosti-  
 um, et in castra consulis venit: alibi pavorem, alibi gau-  
 dium ingens facit. Romani, *civilem esse clamorem, atque  
 auxilium adesse*, inter se gratulantes, ultro ex stationi-  
 bus ac vigiliis territant hostem. Consul differendum  
 negat: *Illo clamore non adventum modo significari, sed  
 rem ab suis coeptam: mirumque esse, ni iam exextiore  
 parte castra hostium obpugnentur. Itaque arma suos  
 capere, et se subsequi iubet.* Nocte initum proelium  
 est a legionibus: dictatori <sup>d)</sup> clamore significant, ab  
 ea quoque parte rem in discrimine esse. Iam se ad  
 prohibenda circumdari opera Aequi parabant, quum,  
 ab interiore hoste proelio coepto, ne per media sua  
 castra fieret eruptio, a munientibus ad pugnantes in-  
 trorsum versi, vacuum noctem operi dedere. pugna-  
 tumque cum consule ad lucem est. Luce prima iam  
 circumvallati ab dictatore erant, et vix adversus  
 unum exercitum pugnam sustinebant. tum a Quinc-  
 tiano exercitu, qui confestim a perfecto opere ad ar-  
 ma rediit, invaditur vallum. hic instabat nova pugna:  
 illa <sup>e)</sup> nihil remiserat prior. Tum, ancipiti malo ur-  
 gente, a proelio ad preces versi, hinc dictatorem, hinc  
 consulem orare, ne in occidione victoriam ponerent,  
 ut inermes se inde abire sinerent. Ab consule ad  
 dictatorem ire iussis ignominiam infensus addidit.

c) fuerat Gron.

etc. Crev.

d) est: legionibus dictatoris

e) illa del. Gron. Crev.



Gracchum Cloelium ducem principesque alios vinc- U. c. 295.  
 tos ad se adduci iubet, oppido Corbione decedi; San- a. C. 456.  
*guinis se Aequorum non egere: licere abire: sed, ut ex-  
 primatur tandem confessio, subactam domitamque esse  
 gentem, sub iugum abituros. Tribus hastis iugum fit,  
 humi fixis duabus, superque eas transversa una deli-  
 gata. sub hoc iugo dictator Aequos misit.*

XXIX. Castris hostium receptis, plenis omnium  
 rerum, (nudos enim emiserat) praedam omnem suo  
 tantum militi dedit: consularem exercitum ipsumque  
 consulem increpans, *Carebis, inquit, praedae parte,  
 miles, ex eo hoste, cui prope praedae fuisti. et tu, L.  
 Minuci, donec consularem animum incipias habere, le-  
 gatus his legionibus praeeris.* Ita se Minucius abdicat  
 consulatu, iussusque ad exercitum manet. Sed adeo  
 tum imperio meliori animus mansuete obediens erat,  
 ut beneficii magis, quam ignominiae, hic exercitus  
 memor, et coronam auream dictatori libram pondo  
 decreverit, et proficiscentem eum patronum salutave-  
 rit. Romae a Q. Fabio praefecto urbis senatus habi-  
 tus triumphantem Quinctium, quo veniebat agmine,  
 urbem ingredi iussit. ducti ante currum hostium du-  
 ces: militaria signa praelata: secutus exercitus praeda  
 onustus. Epulae instructae dicuntur fuisse ante om-  
 nium domus: epulantesque cum carmine triumphali  
 et sollemnibus iocis, comissantium modo, currum se-  
 cuti sunt. Eo die L. Mamilio Tusculano, adproban-  
 tibus cunctis, civitas data est. Confestim se dictator  
 magistratu abdicasset, niconitja M. Volscii falsi te-  
 stis tenuissent: ea ne impedirent tribuni, dictatoris  
 obstitit metus. Volscius damnatus Lanuvium in ex-  
 silium abiit. Quinctius sexto decimo die dictatura,  
 in sex menses accepta, se abdicavit. Per eos dies  
 consul Nautius ad Eretum cum Sabinis egregie pugnat.  
 ad vastatos agros ea quoque clades accessit Sabinis.  
 Minucio Fabius Quintus successor in Algidum mis-  
 sus. Extremo anno agitatum de lege ab tribunis est.

U. c. 296. sed, quia duo exercitus aberant, ne quid ferretur ad  
a. C. 456. populum, Patres tenuere. plebes vicit, ut quintum  
eosdem tribunos crearent. Lupos visos in Capitolio  
ferunt a canibus fugatos; ob id prodigium lustratum  
Capitolium esse. Haec eo anno gesta.

U. c. 297. XXX. Sequuntur consules Q. Minucius, C. Ho-  
a. C. 455. ratius Pulvillus. Cuius initio anni quum foris otium  
esset, domi seditiones iidem tribuni, eadem lex fa-  
ciebat. ulteriusque ventum foret, (adeo exarserant  
animis) <sup>f)</sup> ni, velut dedita opera, nocturno inpetu  
Aequorum Corbione amissum praesidium nunciatum  
esset. Senatum consules vocant, iubentur subitarium  
scribere exercitum, atque in Algidum ducere. Inde,  
posito legis certamine, nova de delectu contentio  
orta <sup>g)</sup>. Vincebaturque consulare imperium tribunicio  
auxilio, quum alius additur terror: Sabinum exerci-  
tum praedatum descendisse in agros Romanos, inde  
ad urbem venire. Is metus perpulit <sup>h)</sup>, ut scribi mi-  
litem tribuni sinerent; non sine pactione tamen, ut,  
quoniam ipsi quinquennium elusi essent, parvumque  
id plebi praesidium foret, decem deinde tribuni ple-  
bis crearentur. Expressit hoc necessitas Patribus. id  
modo excepere, ne postea eosdem tribunos iuberent.  
Tribunicia comitia (ne id quoque post bellum, ut ce-  
tera, vanum esset) extemplo habita. Tricesimo sexto  
anno a primis tribunis plebis, decem creati sunt. bini  
ex singulis classibus. itaque cautum est, ut postea  
crearentur. Delectu deinde habito, Minucius, con-  
tra Sabinos profectus, non invenit hostem. Horatius,  
quum iam Aequi, Corbione interfecto praesidio, Or-  
tonam etiam cepissent, in Algido pugnat: multos  
mortales occidit: fugat hostem non ex Algido modo,  
sed a Corbione Ortonaque. Corbionem etiam diruit  
propter proditum praesidium.

U. c. 293. XXXI. Deinde M. Valerius, Sp. Virginus con-  
a. C. 454.

f) *animi* Gron. Crev.

h) *perculit* Eaed.

g) *exorta* Eaed.

sules facti. Domi forisque otium fuit. annona propter aquarum intemperiem laboratum est. De Aventino publicando lata lex est. Tribuni plebis iidem re-<sup>U. c. 298.</sup>  
fecti <sup>a. C. 454.</sup> <sup>1)</sup> sequente anno, T. Romilio, C. Veturio consulibus, legem omnibus concionibus suis celebrabant.<sup>U. c. 299.</sup>  
<sup>a. C. 453.</sup> *Pudere se numeri sui nequidquam aucti, si ea res aequae suo biennio iaceret, ac toto superiore lustro iacuisset.*  
Quum maxime haec agerent, trepidi nuntii ab Tusculo veniunt, Aequos in agro Tusculano esse. Fecit pudorem recens eius populi meritum morandi auxilii: ambo consules, cum exercitu missi, hostem in sua sede in Algido inveniunt. Ibi pugnatum. supra septem millia hostium caesa: alii fugati: praeda parta ingens. Eam propter inopiam aerarii consules vendiderunt. Invidiae tamen res ad exercitum fuit. ea denique <sup>k)</sup> tribunis materiam criminandi ad plebem consules praebuit. Itaque ergo, ut magistratu abire, Sp. Tarpeio, A. Aterio consulibus, dies dicta est Romilio ab C. Claudio Cicerone, tribuno plebis; Veturio ab L. Alieno, aedile plebis. Uterque magna Patrum indignatione damnatus, Romilius decem mil-<sup>U. c. 300.</sup>  
libus aeris, Veturius quindecim <sup>a. C. 452.</sup> <sup>l)</sup>. Nec haec priorum calamitas consulum segniores novos fecerat consules. *et se damnari posse aiebant: et plebem, et tribunos legem ferre non posse.* Tum, abiecta lege, quae promulgata consenuerat, tribuni lenius agere cum Patribus. *Finem tandem certaminum facerent, si plebeiae leges displicerent, at illi communiter legum latores, et ex plebe, et ex Patribus, qui utrisque utilia ferrent, quaeque aequandae libertatis essent, sinerent creari.* Rem non adspernabantur Patres: *daturum leges neminem, nisi ex Patribus, aiebant.* Quum de legibus conveniret, de latore tantum discreparet; missi legati Athenas Sp. Postumius Albus, A. Manlius, P. <sup>m)</sup>

i) refectioni. Hi sequente — l) quindecim millibus Gron.  
celebrant. Gron. Crev. Crev.

k) eademque Crev.

m) Ser. Crev.

U. c. 300. Sulpicius Camerinus; iussique inclitas leges Solonis  
a. C. 452. describere, et aliarum Graeciae civitatum instituta,  
mores, iuraque noscere.

U. c. 301. XXXII. Ab externis bellis quietus annus fuit;  
a. C. 451. quietior insequens, P. Curiatio <sup>n)</sup> et Sex. Quincti-  
lio consulibus, perpetuo silentio tribunorum: quod  
primo legatorum, qui Athenas ierant, legumque pere-  
grinarum exspectatio praebuit; dein <sup>o)</sup> duo simul mala  
ingentia exorta, fames pestilentiaque, foeda homini,  
foeda pecori. Vastati agri sunt: urbs adsiduis ex-  
hausta funeribus; multae et clarae lugubres domus.  
Flamen Quirinalis Ser. Cornelius mortuus; augur C.  
Horatius Pulvillus: in cuius locum C. Veturium eo  
cupidius, quia damnatus a plebe erat, augures legere.  
Mortuus consul Quinctilius, quatuor tribuni plebis.  
Multiplici clade foedatus annus. ab hoste otium fuit.  
inde consules C. Menenius, P. Sestius Capitolinus.

U. c. 302. Neque eo anno quidquam belli externi fuit. domi mo-  
a. C. 450. tus orti. Iam redierant legati cum Atticis legibus. eo  
intentius instabant tribuni, ut tandem scribendarum  
legum initium fieret. Placet creari decemviros sine  
provocatione, et ne quis eo anno alius magistratus  
esset. Admicerentur ne plebei, <sup>a</sup> controversia ali-  
quamdiu fuit. postremo concessum Patribus, modo  
ne lex Icilia de Aventino, aliaeque sacrae leges  
abrogarentur.

XXXIII. Anno trecentesimo altero, quam con-  
dita Roma erat, iterum mutatur forma civitatis, ab  
consulibus ad decemviros, quemadmodum ab regibus  
ante ad consules venerat, translato imperio. Minus  
insignis, quia non diuturna, mutatio fuit. laeta enim  
principia magistratus eius nimis luxuriavere. eo ci-  
tius lapsa res est, repetitumque, duobus uti manda-  
retur consulum nomen imperiumque. Decemviri creati  
Ap. Claudius, T. Genucius, P. Sestius, L. Veturius,

n) *Curatio Gron.*

o) *deinde Gron. Crev.*



C. Iulius, A. Manlius, Ser. Sulpicius, P. Curiatius, V. c. 302.  
 T. Romilius, Sp. Postumius. Claudio et Genucio, <sup>a. C. 450.</sup>  
 quia designati consules in eum annum fuerant, pro honore honos <sup>p)</sup> redditus: et Sestio alteri consulum prioris anni, quod eam rem collega invito ad Patres retulerat. His proximi habiti legati tres <sup>q)</sup>, qui Athe- <sup>V. c. 303.</sup>  
 nas ierant. simul ut pro legatione tam longinqua prae- <sup>a. C. 449.</sup>  
 mio esset honos: simul peritos legum peregrinarum ad condenda nova iura usui fore credebant. Supplere ceteri numerum. Graves quoque aetate electos novissimis suffragiis ferunt, quo minus ferociter aliorum scitis adversarentur. Regimen totius magistratus penes Appium erat favore plebis. adeoque novum sibi ingenium induerat, ut plebicola repente omnisque aurae popularis captator evaderet, pro truci saevoque insectatore plebis. Decimo die ius populo singuli reddebant. eo die penes praefectum iuris fascis duodecim erant: collegis novem singuli accensi adparebant. et in unica concordia inter ipsos (qui consensus privatis interdum inutilis esset) summa adversus alios aequitas erat. Moderationis eorum argumentum exemplo unius rei notasse, satis erit. Quum sine provocatione creati essent, defosso cadavere, domi apud P. Sestium, patriciae gentis virum, invento, prolatoque in concionem, in re iuxta manifesta atque atroci, C. Iulius decemvir diem Sestio dixit, et accusator ad populum exstitit, cuius rei iudex legitimus erat: decessitque iure suo, ut dentum de vi magistratus populi libertati adiiceret.

XXXIV. Quum promptum hoc ius velut ex oraculo incorruptum pariter ab his summi infumique ferrent, tum legibus condendis opera dabatur: ingenti-que hominum exspectatione propositis decem tabulis, populum ad concionem advocaverunt: et, *quod bonum, faustum, felixque reipublicae, ipsis, liberisque eorum*

p) honor Gron. Crev.

q) legati tres habiti Eaed.

V. c. 303. *esset, ire, et legere leges propositas iussere. Se, quantum decem hominum ingeniis provideri potuerit, omnibus summis infimisque iura aequasse. plus pollere multorum ingenia consiliaque. Versarent in animis secum unamquamque rem, agitarent deinde sermonibus: atque in medium, quid in quaque re plus minusve esset, conferrent. Eas leges habiturum populum Romanum, quas consensus omnium non iussisse latas magis, quam tulisse, videri posset. Quum ad rumores hominum de unoquoque legum capite edito satis correctae viderentur, centuriatis comitiis decem tabularum leges perlatæ sunt: qui nunc quoque, in hoc inmenso aliarum super alias acervatarum legum cumulo, fons omnis publici privati que est iuris. Vulgatur deinde rumor, duas deesse tabulas; quibus adiectis, absolvi posse velut corpus omnis Romani iuris. Ea exspectatio, quum dies comitiorum adpropinquaret, desiderium decemvirosum iterum creandi fecit. Iam plebs, præterquam quod consulum nomen, haud secus quam regum, perosa erat, ne tribuniciū quidem auxilium, cedentibus in vicem adpellationi <sup>r)</sup> decemviris, quaerebat.*

XXXV. Postquam vero comitia decemviris creandis in trinum nundinum indicta sunt; tanta exarsit ambitio, ut primores quoque civitatis (metu credo, ne tanti possessio imperii, vacuo ab se relicto loco, haud satis dignis pateret) prensarent homines; honorem, summa ope <sup>s)</sup> se inpugnatum, ab ea plebe, cum qua contenderant, suppliciter petentes. Demissa iam in discrimen dignitas, ea ætate, iisque honoribus actis, stimulabat Ap. Claudium. nescires, utrum inter decemviros, an inter candidatos, numerares. Propior interdum petendo, quam gerendo, magistratui erat. criminari optimates, extollere candidatorum levissimum quemque humillimumque. ipse medius inter tribunicios Duilios Iciliosque in foro volitare, per

<sup>r)</sup> *appellatione* Gron. Crev. <sup>s)</sup> *ab* Gron. Crev.  
c. Drak.

illos se plebi venditare: donec collegae quoque, qui V. c. 305.  
 unice illi dediti fuerant ad id tempus, coniecere in eum<sup>a. C. 449.</sup>  
 oculos, mirantes quid sibi vellet. Adparere, nihil  
 sinceri esse; *Profecto haud gratuitam in tanta super-*  
*bia comitatem fore. nimium in ordinem se ipsum cogere,*  
*et vulgari cum privatis, non tam properantis abire ma-*  
*gistratu, quam viam ad continuandum magistratum*  
*quaerentis, esse.* Propalam obviam ire cupiditati pa-  
 rum ausi obsecundando mollire inpetum adgrediuntur.  
 comitiorum illi habendorum, quando minimus natu  
 sit, munus consensu iniungunt. Ars haec erat, ne  
 semet ipse creare posset; quod praeter tribunos plebis  
 (et id ipsum pessimo exemplo) nemo umquam fecis-  
 set. ille enimvero, quod bene vertat, habiturum se co-  
 mitia professus, impedimentum pro occasione arripuit.  
 deiectisque honore per coitionem duobus Quinctiis,  
 Capitolino et Cincinnato, et patruo suo C. Claudio,  
 constantissimo viro in optimatum caussa, et aliis eius-  
 dem fastigii civibus, nequaquam splendore vitae pares  
 decemviros creat: se in primis, quod haud secus fac-  
 tum inprobabant boni, quam nemo facere ausurum cre-  
 diderat. Creati cum eo M. Cornelius Maluginensis, M.  
 Sergius, L. Minucius, Q. Fabius Vibulanus, Q. Poe-  
 telius<sup>t)</sup>, T. Antonius Merenda, K. Duilius, Sp. Oppius  
 Cornicen, M'. Rabuleius.

XXXVI. Ille finis Appio alienae personae fe-  
 rendae fuit. suo iam inde vivere ingenio coepit, no-  
 vosque collegas iam prius, quam inirent magistratum,  
 in suos mores formare. Quotidie coibant remotis ar-  
 bitris: inde inpotentibus instructi consiliis, quae se-  
 creto ab aliis coquebant, iam haud dissimulando su-  
 perbiam, rari aditus, conloquentibus difficiles, ad  
 Idus Maias rem perduxere. Idus tum Maias sollem-V. c. 504.  
 nes ineundis magistratibus erant. Initio igitur magi-a. C. 448.  
 stratus primum honoris diem denunciatione ingentis  
 terroris insignem fecere. nam quum ita priores decem-  
 t) *Poetilius* Gron. Grev.

U. c. 504. viri servassent, ut unus fascis haberet, et hoc insigne  
 a. C. 448. regium in orbem, suam cuiusque vicem, per omnes  
 iret, subito omnes cum duodenis fascibus prodire.  
 Centum viginti lictores forum inpleverant, et fascibus  
 secures inligatas praeferēbant. nec adinuissē demi  
 securim, quum sine provocatione creati essent, in-  
 terpretabantur. Decem regum species erat, multi-  
 plicatusque terror non infimis solum, sed primoribus  
 Patrum, ratis caedis causam ac principium quaeri.  
 ut, si quis memorem libertatis vocem aut in senatu  
 aut in populo misisset, statim virgae securesque etiam  
 ad ceterorum metum expedirentur. Nam, praeter-  
 quam quod in populo nihil erat praesidii, sublata pro-  
 vocatione, intercessionem quoque consensu sustule-  
 rant: quum priores decemviri adpellatione collegae  
 corrigi reddita ab se iura tulissent; et quaedam, quae  
 sui iudicii videri possent, ad populum reiecissent.  
 Aliquamdiu aequatus inter omnes terror fuit: paul-  
 latim totus vertere in plebem coepit. Abstinebatur  
 a Patribus: in humiliores libidinose crudeliterque con-  
 sulebatur: hominum, non causarum; toti erant: ut  
 apud quos gratia vim aequi haberet. Iudicia domi  
 conflabant, pronunciabant in foro. Si quis collegam ad-  
 pelleret, ab eo, ad quem venerat, ita discedebat<sup>u)</sup>,  
 ut poeniteret, non prioris decreto stetisse. Opinio  
 etiam sine auctore exierat, non in praesentis modo  
 temporis eos iniuriam conspirasse, sed foedus clan-  
 destinum inter ipsos iureiurando ictum, ne comitia  
 haberent, perpetuoque decemviratu possessum semel  
 obtinerent imperium.

XXXVII. Circumspectare tum patriciorum vul-  
 tus plebei, et inde libertatis captare auram, unde  
 servitutem timendo in eum statum rempublicam ad-  
 duxerant. Primores Patrum odisse decemviros, odisse  
 plebem: nec probare, quae fierent; et credere,

u) *discedebat* Gron.



haud indignis accidere. avidè ruendo ad libertatem in <sup>U. c. 304.</sup> servitutem elapsos <sup>a. C. 448.</sup> x) iuvare nolle: cumulare quoque iniurias, ut taedio praesentium consules duo tandem et status pristinus rerum in desiderium veniant. Iam et processerat pars maior anni, et duae tabulae legum ad prioris anni decem tabulas erant adiectae: nec quidquam iam supererat, si hae quoque leges centuriatis comitiis perlatae essent, cur eo magistratu reipublicae opus esset. Expectabant, quam mox consulibus creandis comitia edicerentur. Id modo plebes agitabat, quonam modo tribuniciam potestatem, munimentum libertati, rem intermissam repararent. Quum interim mentio comitiorum nulla fieri, et decemviri, qui primo tribunicios homines, quia id populare habebatur, circum se ostentaverant plebei y), patriciis iuvenibus sepserant latera. eorum catervae tribunalia obsederant. Hi ferre, agere plebem plebisque res; quum fortuna, qua quidquid cupitum foret, potentioris esset. Et iam ne tergo quidem abstinebatur: virgis caedi, alii securi subici; et, ne gratuita crudelitas esset, bonorum donatio sequi domini supplicium. Hac mercede iuventus nobilis corrupta non modo non ire obviam iniuriae, sed propalam licentiam suam malle, quam omnium libertatem.

XXXVIII. Idus Maiæ venere. Nullis subrogatis magistratibus, privati pro decemviris, neque animis ad imperium inhibendum inminutis, neque ad speciem honoris insignibus, prodeunt, id vero regnum haud dubie videri. Deploratur in perpetuum libertas; nec vindex quisquam existit, aut futurus videtur. nec ipsi solum desponderant animos, sed contemni coepti erant a finitimis populis: imperiumque ibi esse, ubi non esset libertas, indignabantur. Sabini magna manu incursionem in agrum Romanum

x) lapsos Crev.

y) plebi Gron. Crev.

U. c. 305. fecere. lateque populati, quum hominum atque pec-  
 a. C. 447. cundum inulti praedas egissent, recepto ad Eretum,  
 quod passim vagatum erat, agmine, castra locant,  
 spem in discordia Romana ponentes, eam inpedi-  
 mentum delectui fore. Non nuncii solum, sed per  
 urbem agrestium fuga trepidationem iniecit. Decem-  
 viri consultant, quid opus facto sit. destitutis inter  
 Patrum et plebis odia addidit <sup>z)</sup> terrorem insuper  
 alium fortuna. Aequi alia ex parte castra in Algido  
 locant: depopulatumque inde excursionibus Tuscu-  
 lanum agrum legati ab Tusculo, praesidium orantes,  
 nunciant. Is pavor perpulit <sup>a)</sup> decemviros, ut sena-  
 tum, simul duobus circumstantibus urbem bellis, con-  
 sulerent. citari iubent in curiam Patres, haud ignari,  
 quanta invidiae inmineret tempestas: omnes vastati  
 agri periculorumque imminentium causas in se con-  
 gesturos, tentationemque eam fore abolendi sibi ma-  
 gistratus, ni consensu resisterent, imperioque inhi-  
 bendo acriter in paucos praeferocis animi conatus ali-  
 orum comprimerent. Postquam audita vox in foro  
 est praeconis, Patres in curiam ad decemviros vocan-  
 tis; velut nova res, quia intermiserant iamdiu mo-  
 rem consulendi senatus, mirabundam plebem conver-  
 tit, *quidnam incidisset, cur ex tanto intervallo rem de-  
 suetam usurparent. Hostibus belloque gratiam habenden-*  
*dam, quod solitum quidquam liberae civitatis fieret.*  
 Circumspectare omnibus fori partibus senatorem, ra-  
 roque usquam noscitare: curiam inde ac solitudinem  
 circa decemviros intueri; quum et ipsi invisum con-  
 sensu <sup>b)</sup> imperium, et plebs, quia privatis ius non  
 esset vocandi senatum, non convenire Patres inter-  
 pretarentur; iam caput fieri libertatem repetentium,  
 si se plebs comitem senatui det, et, quemadmodum  
 Patres vocati non coeant in senatum, sic plebs ab-  
 nuat delectum. Haec fremunt <sup>c)</sup> plebes. Patrum

z) addit Gron. Crev.

a) percudit Eaed.

b) consensu invisum Eaed.

c) fremebat Eaed.

haud fere quisquam in foro, in urbe rari erant. indig-<sup>U. c. 505.</sup>  
 nitate rerum cesserant in agros; suarumque rerum<sup>a. C. 417.</sup>  
 erant, amissa publica: tantum ab iniuria se abesse  
 rati, quantum a<sup>d)</sup> coetu congressuque inpotentium  
 dominorum se amovissent. Postquam citati non con-  
 veniebant, dimissi circa domos adparitores, simul ad  
 pignora capienda, sciscitandumque, num consulto de-  
 trectarent? referunt, senatum in agris esse. Lae-  
 tius id decemviris accidit, quam si praesentes detrec-  
 tare imperium referrent. Iubent adcirci omnes, sena-  
 tumque in diem posterum edicunt; qui aliquanto spe  
 ipsorum frequentior convenit. quo facto proditam a  
 Patribus plebs libertatem rata, quod iis, qui iam ma-  
 gistratu abissent, privatisque, si vis abesset, tam-  
 quam iure cogentibus, senatus paruisset.

XXXIX. Sed magis obedienter ventum in cu-  
 riam est<sup>e)</sup>, quam obnoxie dictas sententias accepi-  
 mus. L. Valerium Potitum, proditum memoriae  
 est, post relationem Ap. Claudii, priusquam ordine  
 sententiae rogarentur, postulando ut de republica li-  
 ceret dicere, prohibentibus minaciter decemviris, prod-  
 iturum se ad plebem denunciarent, tumultum ex-  
 civisse. Nec minus ferociter M. Horatium Barbatum  
 isse in certamen, *Decem Tarquinius* adpellantem, ad-  
 monentemque, *Valeriis et Horatiis ducibus pulsos re-*  
*ges. Nec nominis homines tum pertaesum esse; quippe*  
*quo Iovem adpellari fas sit, quo Romulum conditorem*  
*urbis, deincepsque reges adpellatos, quod sacris etiam,*  
*ut sollemne, retentum sit. Superbiam violentiamque*  
*tum perosos regis. quae si in rege tum eodem, aut in*  
*filio regis, ferenda non fuerint, quem laturum in tot*  
*privatis? Viderent, ne, vetando in curia libere homi-*  
*nes loqui, extra curiam etiam moverent vocem. neque*  
*se videre, qui sibi minus privato ad concionem populum*  
*vocare, quam illis senatum cogere, liceat. Ubi vel-*

d) e Gron. Crev.

e) est del. Eaed

U. c. 305. *lent, experirentur, quanto ferocior dolor <sup>f)</sup> libertate sua*  
 a. C. 447. *vindicanda, quam cupiditas <sup>g)</sup> iniusta dominatione, es-*  
*set <sup>h)</sup>. De bello Sabino eos referre; tamquam maius*  
*ullum populo Romano bellum sit, quam cum iis, qui,*  
*legum ferendarum caussa creati, nihil iuris in civitate*  
*reliquerint; qui comitia, qui annuos magistratus, qui*  
*vicissitudinem imperitandi (quod unum exaequandae sit*  
*libertatis) sustulerint; qui privati fascēs et regium im-*  
*perium habeant. Fuisse, regibus exactis, patricios*  
*magistratus creatos <sup>i)</sup>; postea, post secessionem plebis,*  
*plebeios. Cuius illi partis essent, rogitare? Populares?*  
*quid enim eos per populum egisse? Optimates? qui an-*  
*no iam prope senatum non habuerint; tunc ita habeant,*  
*ut de republica loqui prohibeant? Ne nimium in metu*  
*alieno spei ponerent. graviora, quae patiantur, videri*  
*iam hominibus, quam quae metuant.*

XL. Haec vociferante Horatio, quum decemviri  
 nec irae nec ignoscendi modum reperirent, nec, quo  
 evasura res esset, cernerent; C. Claudii, qui pa-  
 truius Appii decemviri erat, oratio fuit precibus, quam  
 iurgio, similis, orantis per sui fratris parentisque  
 eius Manes; *Ut civilis potius societatis, in qua natus*  
*esset, quam foederis, nefarie icti cum collegis, memi-*  
*nisset. multo id magis se illius caussa orare, quam rei-*  
*publicae. Quippe rempublicam, si a volentibus nequeat,*  
*ab invitis ius expetituram. Sed ex magno certamine*  
*magnas excitari ferme iras; earum eventum se horrere.*  
 Quum aliud, praeterquam de quo retulissent, de-  
 cemviri dicere prohiberent, Claudium interpellandi  
 verecundia fuit. Sententiam igitur peregit, nullum  
 placere senatusconsultum fieri. Omnesque ita acci-  
 piebant, privatos eos a Claudio iudicatos: multique  
 ex consularibus verbo adsensi sunt. Alia sententia,  
 asperior in speciem, vim minorem aliquanto habuit,

f) add. in Gron. Crev.

g) add. in Eaed.

h) retinenda esset Eaed.

i) magistratus, creatos Gron.  
 magistratus: creatos Crev.



quae patricios coire ad prodendum interregem iubebat. U. c. 705. censendo enim, quoscumque magistratus esse, qui<sup>a</sup> C. 447. senatum haberent, iudicabat; quos privatos fecerat auctor nullius senatusconsulti faciendi. Ita labante iam caussa decemvirorum, L. Cornelius Maluginensis, M. Cornelii decemviri frater, quum ex consularibus ad ultimum dicendi locum consulto servatus esset, simulando curam belli, fratrem collegasque eius tuebatur: *quonam fato incidisset, mirari se dictitans, ut decemviros, qui decemviratum petissent, aut socii, aut hi maxime obpugnarent? aut quid ita, quum per tot menses vacua civitate nemo, iustine magistratus summae rerum praessent, controversiam fecerit; nunc demum, quum hostes prope ad portas sint, civiles discordias serant: nisi quod in turbido minus perspicuum fore putent, quid agatur. Ceterum neminem, maiore cura occupatis animis, verum esse, praeiudicium rei tantae adferre. Sibi placere, de eo, quod Valerius Horatiusque ante Idus Maias decemviros abisse magistratu insimulent, bellis, quae immineant, perfectis, republica in tranquillum redacta, senatu disceptante, agi: et iam nunc ita se parare Ap. Claudium, ut comitiorum, quae decemviris creandis decemvir ipse haberet, sciat sibi rationem reddendam esse, utrum in unum annum creati sint, an donec leges, quae deessent, perferrentur. In praesentia omnia praeter bellum omitti placere: cuius si falso famam vulgatam, vanaque non nuncios solum, sed Tusculanorum etiam legatos, adtulisse putent, speculatores mittendos censere, qui certius explorata referant. Sin fides et nunciis et legatis habeatur, delectum primo quoque tempore haberi; decemviros, quo cuique eorum videatur, exercitus ducere; nec rem aliam praeverti.*

XLI. In hanc sententiam ut discederetur, iuniores Patrum evincebant. Ferociores iterum coorti Valerius Horatiusque vociferari, *ut de republica liceret dicere. dicturos ad populum, si in senatu per factio-*

U. c. 595. *nem non liceat. Neque enim sibi privatos, aut in ci-*  
a. C. 447. *ria, aut in concione, posse obstare; neque se imagina-*  
*riis fascibus eorum cessuros esse. Tum Appius, iam*  
*prope esse ratus, ut, ni violentiae eorum pari re-*  
*sisteretur audacia, victum imperium esset: Non erit*  
*melius, inquit, nisi de quo consulimus, vocem mi-*  
*sisse. et ad Valerium, negantem se privato reticere,*  
*lictorem accedere iussit. Iam Quiritium fidem inplo-*  
*rante Valerio a curiae limine, L. Cornelius comple-*  
*xus Appium, non cui simulabat consulendo, diremit*  
*certamen. factaque per Cornelium Valerio dicendi*  
*gratia, quae vellet, quum libertas non ultra vocem*  
*excessisset, decemviri propositum tenuere. Consula-*  
*res quoque ac seniores ab residuo tribuniciae pote-*  
*statis odio, cuius desiderium plebi multo acrius,*  
*quam consularis imperii, rebantur esse, prope ma-*  
*lebant, postmodo <sup>k)</sup> ipsos decemviros voluntate abire*  
*magistratu, quam invidia eorum exsurgere rursus*  
*plebem. si leniter ducta res sine populari strepitu ad*  
*consules redisset, aut bellis interpositis, aut mode-*  
*ratione consulum in imperiis exercendis, posse in ob-*  
*livionem tribunorum plebem adduci. Silentio Patrum*  
*edicitur delectus. iuniores, quum sine provocatione*  
*imperium esset, ad nomina respondent. legionibus*  
*scriptis, inter se decemviri comparabant, quos ire ad*  
*bellum, quos praeesse exercitibus oporteret. Prin-*  
*cipes inter decemviros erant Q. Fabius et Ap. Clau-*  
*dius. bellum domi maius, quam foris, adparebat.*  
*Appii violentiam aptiorem rati ad comprimendos ur-*  
*banos motus: in Fabio minus in bono constans, quam*  
*navum <sup>l)</sup> in malitia, ingenium esse. Hunc enim vi-*  
*rum, egregium olim domi militiaeque, decemviratus*  
*collegaeque ita mutaverant, ut Appii, quam sui, si-*  
*milis mallet esse. huic bellum in Sabinis, M'. Rabu-*  
*leio et Q. Poetelio <sup>m)</sup> additis collegis, mandatum.*

k) *postmodum* Gron. Crev. m) *Postilio* Eaed.

l) *gnavum* Eaed.

M. Cornelius in Algidum missus cum L. Minucio et T. Antonio et K. Duilio et M. Sergio: Sp. Oppium Ap. Claudio adiutorem ad urbem tuendam, aequo omnium decemvirorum imperio, decernunt.

U. c. 305.  
a. C. 447.

XLII. Nihilo militiae, quam domi, melius respublica administrata est. Illa modo in ducibus culpa, quod, ut odio essent civibus, fecerant. alia omnis penes milites noxa erat: qui, ne quid ductu atque auspicio decemvirorum prospere usquam gereretur, vinci se per suum atque illorum dedecus patiebantur. Fusi et ab Sabinis ad Eretum, et in Algido ab Aequis, exercitus erant. ab Ereto per silentium noctis profugi, propius urbem, inter Fidenas Crustumeriamque, loco edito castra communierant. persecutis hostibus nusquam se aequo certamine committentes, natura loci ac vallo, non virtute aut armis, tutabantur. Maius flagitium in Algido, maior etiam clades accepta: castra quoque amissa erant; exutusque omnibus utensilibus miles, Tusculum se, fide misericordiaque victurus hospitum, (quae tamen <sup>n</sup>) non fefellerunt) contulerat. Romam tanti erant <sup>o</sup>) terrores adlati, ut, posito iam decemvirali odio, Patres vigilias in urbe habendas censerent: omnes, qui per aetatem arma ferre possent, custodire moenia, ac pro portis stationes agere iuberent: arma Tusculum ad supplementum decernerent, decemvirosque, ab arce Tusculi degressos, in castris militem habere: castra alia a Fidenis in Sabinum agrum transferri: belloque ultro inferendo deterreri hostes a consilio urbis obpugnandae.

XLIII. Ad clades ab hostibus acceptas duo nefanda facinora decemviri belli domique adiiciunt. L. Siccium in Sabinis, per invidiam decemviralem tribunorum creandorum secessionisque mentiones ad vulgus militum sermonibus occultis serentem, prospectatum ad locum castris capiendum mittunt. datur neg-

n) qui tum Gron. Crev.

o) erant del. Eaed.

U. c. 305. otium militibus, quos miserant expeditionis eius comites, ut eum opportuno adorti loco interficerent. Haud inultum interfecere. nam circa repugnantem aliquot insidiatores cecidere, quum ipse se praevalidus, pari viribus animo, circumventus tutaretur. Nunciant in castra ceteri, praecipitatum in insidias esse Siccium egregie pugnans, militesque quosdam cum eo amissos. Primo fides nunciantibus fuit. Profecta deinde cohors ad sepeliendos, qui ceciderant, decemvirorum permissu, postquam nullum spoliatum ibi corpus, Sicciumque in medio iacentem armatumque, omnibus in eum versis corporibus, videre; hostium neque corpus ullum, nec vestigia abeuntium; profecto ab suis interfectum memorantes, retulere corpus. Invidiaeque plena castra erant, et Romam ferri protinus Siccium placebat, ni decemviri funus militare ei publica impensa facere maturassent. Sepultus ingenti militum moestitia, pessima decemvirorum in vulgus fama, est.

XLIV. Sequitur aliud in urbe nefas, ab libidine ortum, haud minus foedo eventu, quam quod per stuprum caedemque Lucretiae urbe regnoque Tarquinius expulerat: ut non finis solum idem decemviris, qui regibus, sed causa etiam eadem imperii amittendi esset. Ap. Claudium virginis plebeiae stuprandae libido cepit. Pater virginis L. Virginius honestum ordinem in Algido ducebat, vir exempli recti domi militiaeque. Perinde uxor instituta fuerat, liberique instituebantur. Desponderat filiam L. Icilio tribunicio, viro acri, et pro causa plebis expertae virtutis. Hanc virginem adultam, forma excellentem, Appius, amore ardens, pretio ac spe perlicere adortus, postquam omnia pudore septa animadverterat, ad crudelem superbamque vim animum convertit. M. Claudio clienti negotium dedit, ut virginem in servitutem adsereret, neque cederet secundum libertatem postulantibus vindicias: quod pater puellae abesset, locum iniuriae esse ratus. Virgini, venienti in forum, (ibi namque



in tabernis literarum ludi erant) minister decemviri<sup>U. c. 305.</sup>  
 libidinis manuminiecit; serva sua natam, servamque<sup>a. C. 447.</sup>  
 adpellans, sequi se iubebat; cunctantem vi abstrac-  
 turum<sup>p)</sup>. Pavida puella stupente, ad clamorem nu-  
 tricis, fidem Quiritium inplorantis, fit concursus. Vir-  
 ginii patris sponsique Iciliii populare nomen celebra-  
 tur. notos gratia eorum, turbam indignitas rei virgini  
 conciliat. Iam a vi tuta erat; quum adsertor nihil  
 opus esse multitudine concitata ait, se iure grassari,  
 non vi. Vocat puellam in ius; auctoribus, qui ade-  
 rant, ut sequeretur. Ad tribunal Appii perventum  
 est. notam iudici fabulam petitor, quippe apud ipsum  
 auctorem argumenti, peragit; puellam, domi suae  
 natam, furtoque inde in domum Virginii translatam,  
 subpositam ei<sup>q)</sup> esse. Id se indicio compertum ad-  
 ferre, probaturumque vel ipso Virginio indice, ad  
 quem maior pars iniuriae eius pertineat. Interim do-  
 minum sequi ancillam, aequum esse. Advocati puel-  
 lae, quum Virginium reipublicae caussa dixissent  
 abesse, biduo adfuturum, si nunciatum ei sit; iniquum  
 esse, absentem de liberis dimicare; postulant, ut rem  
 integram in patris adventum differat; lege ab ipso la-  
 ta vindicias det secundum libertatem; neu patiatur,  
 virginem adultam famae prius, quam libertatis, peri-  
 culum adire.

XLV. Appius decreto praefatus, *quam libertati  
 faverit, eam ipsam legem declarare, quam Virginii amici  
 postulationi suae praetendant. Ceterum ita in ea fir-  
 mum libertati fore praesidium, si nec caussis, nec per-  
 sonis pariet. In his enim, quae adserantur in liberta-  
 tem, quia quivis lege agere possit, id iuris esse: in ea,  
 quae in patris manu sit, neminem esse alium, cui domi-  
 nus possessione cedat. Placere itaque patrem arcessi.  
 interea iuris sui iacturam adsertorem non facere, quin*

p) serva sua natam (servam- tracturum Gron. Crev. c.  
 que adpellans) esse, sequique Drak.  
 se iubebat, cunctantem vi abs- q) ei del. Gron. Crev.

Ū. c. 305. *ducat puellam sistendamque in adventum eius, qui pater dicatur, promittat.* Adversus iniuriam decreti quum multi magis fremerent, quam quisquam unus reclamare<sup>r)</sup> auderet; P. Numitorius, puellae avunculus, et sponsus Icilius interveniunt. dataque inter turbam via, quum multitudo Icili maxime interventu resisti posse Appio crederet, lictor *decesse* ait: vociferantemque Icilium submovet. Placidum quoque ingenium tamatrox iniuria accendisset. *Ferro hinc tibi submovendus sum, Appi,* inquit, *ut tacitum feras, quod celari vis. Virginem ego hanc sum ducturus, nuptam pudicamque habiturus. Proinde omnes collegarum quoque lictores convoca, expediti virgas et secures iube: non manebit extra domum patris sponsa Icili.* Non, *si tribunicium auxilium et provocationem, plebi Romanae duas arces libertatis tuendae, ademistis, ideo in liberos quoque nostros coniugesque regnum vestrae libidini datum est. Saevite in tergum et in cervices nostras, pudicitia saltem in tuto sit. Huic si vis adferetur, ego praesentium Quiritium pro sponsa, Virginus militum pro unica filia, omnes Deorum hominumque inplorabimus si dem. neque tu istud umquam decretum sine caede nostra referes. Postulo, Appi, etiam atque etiam consideres, quo progrediare. Virginus viderit, de filia, ubi venerit, quid agat. Hoc tantum sciat, sibi, si huius vindictis cesserit, conditionem filiae quaerendam esse. me, vindicantem sponsam in libertatem, vita citius deseret, quam fides.*

XLVI. Concitata multitudo erat, certamenque instare videbatur. lictores Icilium circumsteterant: nec ultra minas tamen processum est. Quum Appius, *Non Virginiam defendi ab Icilio, sed inquietum hominem, et tribunatum etiam nunc spirantem, locum seditionis quaerere, diceret; non praebiturum se illi eo die materiam: sed ut iam sciret, non id petulantiae suae, sed Virginio absenti et patrio nomini et libertati, datum, ius eo die se non non dicturum, neque decretum in-*  
<sup>r)</sup> recusare Gron. Crev. c. Drak.

*terpositurum: a M. Claudio petiturum, decederet iure suo*, U. c. 305.  
*vindicarique puellam in posterum diem pateretur. Quod* <sup>a. C. 417.</sup>  
*nisi pater postero die adfuisset, denunciare se Icilio*  
*similibusque Icilio, neque legi suae latorem, neque de-*  
*cemviro constantiam de fore: nec se utique collegarum*  
*lictos convocaturum ad coercendos seditionis auctores,*  
*contentum se suis lictoribus fore.* Quum dilatum tem-  
 pus iniuriae esset, secessissentque advocati puellae,  
 placuit omnium primum, fratrem Icilio filiumque Nu-  
 mitorii, inpigros iuvenes, pergere inde recta ad portam,  
 et, quantum adcelerari posset, Virginium adiri e ca-  
 stris. In eo verti puellae salutem, si postero die vin-  
 dex iniuriae ad tempus praesto esset. Iussi pergunt,  
 citatisque equis nuncium ad patrem perferunt. Quum  
 instaret adsertor puellae, ut vindicaret, sponsoresque  
 daret; atque id ipsum agi diceret Icilius, sedulo tem-  
 pus terens, dum praeciperent iter nuncii missi in ca-  
 stra, manus tollere undique multitudo, et se quisque  
 paratum ad spondendum Icilio ostendere. Atque ille  
 lacrimabundus, *Gratum est*, inquit; *crastina die vestra*  
*opera utar, sponsorum nunc satis est.* Ita vindicatur  
 Virginia, spondentibus propinquis. Appius, paullis-  
 per moratus, ne eius rei caussa sedisse videretur, post-  
 quam, omissis rebus aliis prae cura unius, nemo adi-  
 bat, domum se recepit; collegisque in castra scribit,  
*ne Virginio commeatum dent, atque etiam in custodia*  
*habeant.* Inprobum consilium serum, ut debuit, fuit;  
 et iam commeatu sumto profectus Virginus prima vi-  
 gilia erat, quum postero die mane de retinendo eo ne-  
 quidquam literae redduntur.

XLVII. At in urbe prima luce, quum civitas in  
 foro expectatione erecta staret, Virginus sordidatus  
 filiam suam obsoleta veste, comitantibus aliquot ma-  
 tronis, cum ingenti advocatione in forum deducit. Cir-  
 cumire ibi et prensare homines coepit; et non orare  
 solum precariam opem, sed pro debita petere, *Se pro*  
*liberis eorum ac coniugibus quotidie in acie stare: nec*

U. c. 395. *alium virum esse, cuius strenue ac ferociter facta in bello*  
 a. C. 447. *lo plura memorari possent. Quid prodesse, si, incolumi*  
*urbe, quae, capta, ultima timeantur, liberis suis sint*  
*patienda?* Haec prope concionabundus circumibat homines. Similia his ab Icilio iactabantur. comitatus muliebris plus tacito fletu, quam ulla vox, movebat. Adversus quae omnia obstinato animo Appius (tanta vis amentiae verius, quam amoris, mentem turbaverat) in tribunal escendit<sup>s)</sup>: et, ultro querente paucis petitor, *quod ius sibi pridie per ambitionem dictum non esset*, priusquam aut ille postulatum perageret, aut Virginio respondendi daretur locus, Appius interfatur. Quem decreto sermonem praetenderit, forsitan aliquem verum auctores antiqui tradiderint. quia nusquam ullum in tanta foeditate decreti verisimilem invenio; id, quod constat, nudum videtur proponendum, decrescere vindicias secundum servitutem. Primo stupor omnes admiratione rei tam atrocis defixit. silentium inde aliquamdiu tenuit. Dein<sup>t)</sup> quum M. Claudius, circumstantibus matronis, iret ad prehendam virginem, lamentabilisque eum mulierum comploratio excepisset; Virginus, intentans in Appium manus, Icilio, inquit, *Appi, non tibi, filiam despondi: et ad nuptias, non ad stuprum, educavi. Placet pecudum ferarumque ritu promiscue in concubitus ruere? Passurine haec isti sint, nescio. non spero esse passuros illos, qui arma habent.* Quum repelleretur adsertor virginis a globo mulierum circumstantiumque advocatorum, silentium factum per praeconem.

XLVIII. Decemvir, alienatus<sup>u)</sup> ad libidinem animo, negat, *hesterno tantum convicio Icilio violentiaque Virginii, cuius testem populum Romanum habeat, sed certis quoque indiciis compertum se habere, nocte tota coetus in urbe factos esse ad movendam seditionem. Itaque se, haud inscium eius dimicationis, cum armatis descen-*

s) ascendit Gron. Crev.

t) Deinde Eaed.

u) alienato Eaed.



*disse; non ut quemquam quietum violaret, sed ut turbantes civitatis otium pro maiestate imperii coerceret.* U. e. 305. a. C. 447.

*Proinde quiescere erit melius. I,* inquit, *lictor, submove turbam; et da viam domino adprehendendum mancipium.* Quum haec intonuisset plenus irae, multitudo ipsa se sua sponte dimovit, desertaque praeda iniuriae puella stabat. Tum Virginus, ubi nihil usquam auxilii vidit, *Quaeso,* inquit, *Appi, primum ignosce patrio dolori, si quid inclementius in te sum invecus: deinde sinas hic coram virgine nutricem percontari, quid hoc rei sit? ut, si falso pater dictus sum, aequiore hinc animo discedam.* Data venia, seducit filiam ac nutricem prope Cloacinae ad tabernas, quibus nunc Novis est nomen. atque ibi ab Ianio cultro arrepto, *Hoc te uno, quo possum,* ait, *modo, filia, in libertatem vindico.* Pectus deinde puellae transfigit; respectansque ad tribunal, *Te,* inquit, *Appi, tuumque caput sanguine hoc consecro.* Clamore ad tam atrox facinus orto excitus Appius, comprehendi Virginium iubet. ille ferro, quacumque ibat, viam facere: donec, multitudine etiam prosequentium <sup>x)</sup> tuente, ad portam perrexit. Icilius Numitoriusque exsanguis corpus sublatum ostentant populo: scelus Appii, puellae infelicem formam, necessitatem patris deplorant. Sequentes clamitant matronae, *Eamne liberorum procreandorum conditionem? ea pudicitiae praemia esse?* ceteraque, quae in tali re muliebris dolor, quo est moestior imbecillo animo, eo miseraabilia magis querentibus subiicit. Virorum et maxime Icilius vox tota, tribuniciae potestatis ac provocationis ad populum ereptae, publicarumque indignationum, erat.

**XLIX.** Concitatur multitudo partim atrocitate sceleris, partim spe per occasionem repetendae libertatis. Appius nunc vocari Icilium, nunc retractantem <sup>y)</sup> arripi; postremo, quum locus adeundi adparitoribus

<sup>x)</sup> add. *iuvenum* Grev.

<sup>y)</sup> *detrectantem* Gron.

U. c. 305. non daretur, ipse, cum agmine patriciorum iuvenum  
 a. C. 447. per turbam vadens, in vincula duci iubet. Iam circa  
 Icilium non solum multitudo, sed duces quoque mul-  
 titudinis erant L. Valerius et M. Horatius. qui, re-  
 pulso lictore, si iure ageret, vindicare se a privato  
 Icilio aiebant; si vim adferre conaretur, ibi quoque  
 se haud inpares fore. Hinc atrox rixa oritur. Valerium  
 Horatiumque lictor decemviri invadit. franguntur a  
 multitudine fascēs. In concionem Appius adscendit.  
 Sequuntur Horatius Valeriusque. eos concio audit:  
 decemviro obstrepitur. Iam pro imperio Valerius dis-  
 cedere a privato lictores iubebat: quum, fractis animis,  
 Appius, vitae metuens, in domum se propinquam foro,  
 insciis adversariis, capite obvoluto, recepit. Sp. Op-  
 pius, ut auxilio collegae esset, in forum ex altera parte  
 inrumpit. videt imperium vi victum. Agitatus <sup>z)</sup> dein-  
 de consiliis, ad quae ex omni parte adsentiendo mul-  
 tis auctoribus trepidaverat <sup>a)</sup>, senatum postremo vo-  
 cari iussit. ea res, quod magnae parti Patrum displi-  
 cere acta decemvirorum videbantur, spe per senatum  
 finiendae potestatis eius multitudinem sedavit. Se-  
 natus nec plebem irritandam censuit; et multo magis  
 providendum, ne quid Virginii adventus in exercitu  
 motus faceret.

L. Itaque missi iuniores Patrum in castra, quae  
 tum in monte Vecilio erant, nunciant decemviris, *ut  
 omni ope ab* <sup>b)</sup> *seditione milites contineant*: ubi Virgi-  
 nius maiorem, quam reliquerat in urbe, motum exci-  
 vit. Nam, praeterquam quod agmine prope quadrin-  
 gentorum hominum veniens, qui ab urbe indignitate  
 rei accensi comites ei se dederant, conspectus est;  
 strictum etiam telum, respersusque ipse cruore, tota  
 in se castra convertit. et togae, multifariam iu castris  
 visae, maioris aliquanto, quam erat, speciem urbanae  
 multitudinis fecerant. Quaerentibus, *quid rei esset,*

z) *Agitatis* Gron. Crev.

c. Drak.

a) *atque ex — trepidus* Eaed.

b) *a* Gron. Crev.

flens diu vocem non misit: tandem, ut iam ex trepi-<sup>U. c. 305.</sup>  
datione concurrentium turba constitit, ac silentium fuit,<sup>a. C. 447.</sup>  
ordine cuncta, ut gesta erant, exposuit. Supinas dein-  
detendens manus, commilitones adpellans, orabat, *Ne,*  
*quod scelus Ap. Claudii esset, sibi adtribuerent: neu*  
*se, ut parricidam liberum, aversarentur. Sibi vitam*  
*filiae suae cariorem fuisse, si liberae ac pudicae vivere*  
*licitum fuisset. quum, velut servam, ad stuprum rapi*  
*videret, morte amitti melius ratum, quam contumelia,*  
*liberos, misericordia se in speciem crudelitatis lapsum.*  
*Nec se superstitem filiae futurum fuisse, nisi spem ul-*  
*ciscendae mortis eius in auxilio commilitonum habuisset.*  
*Illis quoque enim filias, sorores, coniugesque esse. nec*  
*cum filia sua libidinem Ap. Claudii extinctam esse;*  
*sed, quo inpunitior sit, eo effrenatiorem fore. Aliena*  
*calamitate documentum datum illis cavendae similis in-*  
*iuriae. quod ad se adtineat, uxorem sibi fato ereptam:*  
*filiam, quia non ultra pudica victura fuerit, miseram,*  
*sed honestam, mortem<sup>c)</sup> obcubuisse. Non esse iam*  
*Appii libidini locum in domo sua. ab alia violentia eius*  
*eodem se animo suum corpus vindicaturum, quo vindi-*  
*caverit filiae. Ceteri sibi ac liberis suis consulerent.*  
Haec Virginio vociferanti subclamabat multitudo, *nec*  
*illius dolori, nec suae libertati se defuturos.* Et inmixti  
turbae militum togati, quum eadem illa querendo, do-  
cendoque, quanto visa, quam audita, indigniora po-  
tuerint videri, simul profligatam iam rem nunciando  
Romae esse; insecutique<sup>d)</sup>, qui Appium prope inter-  
emptum in exsilium abisse dicerent, perpulerunt, ut  
ad arma conclamaretur, vellerentque signa, et Ro-  
mam proficiscerentur. Decemviri simul his<sup>e)</sup>, quae  
videbant, simul his, quae acta Romae audierant, per-  
turbati, alius in aliam partem castrorum, ad sedandos  
motus discurrunt: et leniter agentibus responsum non

c) *miseram, sed honesta morte* d) *insecutosque* Gron.  
Gron. Crev. e) *iis* Gron. Crev.

U. c. 305. redditur: imperium si quis inhiheret, *et viros et arma-*  
 a. C. 447. *tosse esse*, respondetur. Eunt agmine ad urbem, et Aventinum insidunt; ut quisque obcurrerat, plebem ad repetendam libertatem creandosque tribunos plebis adhortantes. alia vox nulla violenta audita est. Senatum Sp. Oppius habet: nihil placet aspere agi: quippe ab ipsis datum locum seditionis esse. Mittuntur tres legati consulares, Sp. Tarpeius, C. Iulius, P. f) Sulpicius, qui quaererent senatus verbis, *cui us iussu castra deseruissent? aut quid sibi vellent, qui armati Aventinum obsedissent? belloque averso ab hostibus patriam suam cepissent?* Non defuit, quid responderetur: deerat, qui daret responsum, nullodum certo duce, nec satis audentibus singulis invidiae se obferre. id modo a multitudine conclamatum est, *ut L. Valerium et M. Horatium ad se mitterent. his se daturos responsum.*

LI. Dimissis legatis, admonet milites Virginus, *in re non maxima paullo ante trepidatum esse, quia si ne capite multitudo fuerit: responsumque, quamquam non inutiliter, fortuito tamen magis consensu, quam communi consilio esse. Placere decem creari, qui summae rei praeessent, militarique honore tribunos militum adpellari.* Quum ad eum ipsum primum is honos deferretur, *Melioribus meis vestrisque rebus reservate, inquit, ista de me iudicia. Nec mihi filia inulta honorem ullum iucundum esse patitur; nec in perturbata republica eos utile est praeesse vobis, qui proximi invidiae sint. Si quis usus mei est, nihilo minor ex privato capietur.* Ita decem numero tribunos militares creant. Neque in Sabinis quievit exercitus. ibi quoque, auctore Icilio Numitorioque, secessio ab decemviris facta est, non minore motu animorum Sicci caedis memoria revocata, quam quem nova fama de virgine g) adeo foede ad libidinem petita accenderat. Icilius ubi audivit, tribunos militum in Aventino crea-

f) Ser. Crev.

g) Virginia Gron. Crev.



tos; ne comitiorum militarium praerogativam urbana<sup>U. c. 305.</sup> comitia iisdem tribunis plebis creandis sequerentur,<sup>a. C. 447.</sup> peritus rerum popularium imminensque ei potestati, et ipse prius, quam iretur ad urbem, pari potestate eundem numerum ab suis creandum curat. Porta Collina urbem intravere sub signis, mediaque urbe agmine in Aventinum pergunt. ibi, coniuncti alteri exercitui, viginti tribunis militum negotium dederunt, ut ex suo numero duos crearent, qui summae rerum praeessent. M. Oppium, Sex. Manilium creant. Patres, solliciti de summa rerum, quum senatus quotidie esset, iurgiis saepius terunt tempus, quam consiliis. Siccii caedes decemviris, et Appiana libido, et dedecora militiae obiciebantur. Placebat, Valerium Horatiumque ire in Aventinum. illi negabant se aliter ituros, quam si decemviri deponerent insignia magistratus eius, quo anno iam ante abissent. Decemviri, querentes se in ordinem cogi, non ante, quam perlatis legibus, quarum caussa creati essent, deposituros imperium se aiebant.

LII. Per M. Duilium, qui tribunus plebis fuerat, certior facta plebs, contentionibus adsiduis nihil transigi, in Sacrum montem ex Aventino transit; adfirmante Duilio, *non prius, quam deseri urbem videant, curam in animos Patrum descensuram. admoniturum Sacrum montem constantiae plebis. scituros, quod sine restituta potestate redigi in concordiam res nequeant.* Via Nomentana, cui tum Ficulensi<sup>h)</sup> nomen fuit, profecti, castra in monte Sacro locavere; modestiam patrum suorum nihil violando imitati. Secuta exercitum plebs, nullo, qui per aetatem ire posset, retractante. Prosequuntur coniuges liberique, *cuinam se relinquerent in ea urbe, in qua nec pudicitia, nec libertas sancta esset*, miserabiliter rogitantes. Quum vasta Romae omnia insueta solitudo fecisset, in foro

h) *Ficulnensi* Gron. Crov.

U. c. 305. praeter paucos seniorum nemo esset; vocatis utique  
 a. C. 447. in senatum Patribus, desertum adparuisset forum;  
 plures iam, quam Horatius et Valerius, vociferabantur, *Quid expectabitis, Patres conscripti? Si decemviri finem pertinaciae non faciunt, ruere ac deflagrare omnia passuri estis? Quod autem istud imperium est, decemviri, quod amplexi tenetis? Tectis ac parietibus iura dicturi estis? Non pudet, lictorum vestrorum maiorem prope numerum in foro conspici, quam togatorum aliorumque*<sup>i)</sup> *Quid, si hostes ad urbem veniant, facituri estis? quid, si plebs mox, ubi parum secessione moveamur, armata veniat? Occasune urbis vultis finire imperium? Atqui aut plebs non est habenda, aut habendi sunt tribuni plebis. Nos citius caruerimus patri-  
 ciis magistratibus, quam illi plebeiis. Novam inexpertamque eam potestatem eripere patribus nostris, ne nunc, dulcedine semel capti, ferant desiderium. quum praesertim nec nos temperemus imperiis, quo minus illi auxilii egeant. Quum haec ex omni parte iactarentur, victi consensu decemviri, futuros se, quando ita videatur, in potestate Patrum adfirmant. Id modo simul orant ac monent, ut ipsis ab invidia caveatur: nec suo sanguine ad supplicia Patrum plebem adsuefaciant.*

LIII. Tum Valerius Horatiusque, missi ad plebem conditionibus, quibus videretur, revocandam componendasque res, decemviris quoque ab ira et impetu multitudinis praecavere iubentur. Profectigaudio ingenti plebis in castra accipiuntur; quippe liberatores haud dubie et motus initio, et exitu rei. Ob haec<sup>k)</sup> advenientibus gratiae actae. Icilius pro multitudine verba facit. Idem, quum de conditionibus ageretur, quaerentibus legatis, quae postulata plebis essent, composito iam ante adventum legatorum consilio, ea postulavit, ut adpareret, in aequitate rerum

i) *aliorum* Crev.

k) add. *iis* Gron. Crev.

plus, quam in armis, reponi spei. Potestatem enim <sup>U. c. 305.</sup> tribuniciam, provocationemque repetebant, quae an- <sup>a. C. 447.</sup> te decemviros creatos auxilia plebis fuerant, et ne cui fraudi esset, concisise milites aut plebem ad repetendam per secessionem libertatem. De decemviro- rum modo supplicio atrox postulatum fuit. Dedi quippe eos aequum censebant, vivosque igni concre- maturos minabantur. Legati ad ea: *Quae consilii fuerunt, adeo aequa postulastis, ut ultro vobis dese- renda fuerint. libertati enim ea praesidia petitis, non licentiae ad inpugnandos alios. Irae vestrae magis ig- noscendum, quam indulgendum est. quippe qui crudeli- tatis odio in crudelitatem ruitis, et prius pene, quam ipsi liberi sitis, dominari iam in adversarios vultis. Numquamne quiescet civitas nostra a suppliciis, aut Patrum in plebem Romanam, aut plebis in Patres? Scuto vobis magis, quam gladio, opus est. Satis su- perque humilis est, qui iure aequo in civitate vivit, nec inferendo iniuriam, nec patiendo. Etiam, si quando metuendos vos praebituri estis, quum, recuperatis ma- gistratibus legibusque vestris, iudicia penes vos erunt de capite nostro fortunisque; tunc, ut quaeque caussa erit, statuetis. nunc libertatem repeti satis est.*

LIV. Facerent, ut vellent, permittentibus cunc- tis, mox redituros se legati rebus perfectis adfirmant. Profecti quum mandata plebis Patribus exposuissent, alii decemviri, quandoquidem praeter spem ipsorum supplicii sui nulla mentio fieret, haud quidquam ab- nuere. Appius, truci ingenio et invidia praecipua, odium in se aliorum suo in eos metiens odio, *Haud ignaro, inquit, imminet fortuna. Video, donec arma adversariis tradantur, differri adversus nos certamen. dandus invidiae est sanguis. Nihil ne ego quidem mo- ror, quo minus decemviratu abeam. Factum senatus- consultum, Ut decemviri se primo quoque tempore ma- gistratu abdicarent. Q. Furius pontifex maximus tri- bunos plebis crearet. et ne cui fraudi esset secessio mili-*

U. c. 305. *tum plebisque.* His senatusconsultis perfectis, dimisso senatu, decemviri prodeunt in concionem, abdicantque se magistratu, ingenti hominum laetitia. Nunciantur haec plebi. legatos, quidquid in urbe hominum supererat, prosequitur. Huic multitudini laeta alia turba ex castris obcurrit. congratulantur libertatem concordiamque civitati restitutam. Legati pro concione: *Quod bonum, faustum, felixque sit vobis, reique publicae, redite in patriam ad penates, coniuges, liberosque vestros: sed, qua hic modestia fuistis, ubi nullius ager in tot rerum usu*<sup>1)</sup> *necessario tantae multitudini est violatus, eam modestiam ferte in urbem. in Aventinum ite, unde profecti estis. Ibi felici loco, ubi prima initia inchoastis libertatis vestrae, tribunos plebi*<sup>m)</sup> *creabitis. praesto erit pontifex maximus, qui comitia habeat.* Ingens adsensus alacritasque cuncta adprobantium fuit. Convellunt<sup>n)</sup> inde signa, profectique Romam certant cum obviis gaudio. armati per urbem silentio in Aventinum perveniunt. ibi ex templo, pontifice maximo comitia habente, tribunos plebis creaverunt, omnium primum A. <sup>o)</sup> Virginium, inde L. Icilium, et P. Numitorium avunculum Virginiae, auctores secessionis. Tum C. Sicinium, progeniem eius, quem primum tribunum plebis creatum in Sacro monte, proditum memoriae est; et M. Duilium, qui tribunatum insignem ante decemviros creatos gesserat, nec in decemviralibus certaminibus plebi defuerat. Spe deinde magis, quam meritis, electi, M. Titinius <sup>p)</sup>, M. Pomponius, C. Apronius, P. Villius, C. Oppius. Tribunatu inito, L. Icilius ex templo plebem rogavit, et plebs scivit, ne cui fraudi esset secessio ab decemviris facta. Confestim de consulibus creandis cum provocatione M. Duilius rogationem pertulit. ea omnia in pratis Flaminiis con-

1) *usu rerum* Gron. Crev.

m) *plebis* Crev.

n) *convertunt* Gron.

o) *L.* Crev.

p) *Titinnius* Gron. Crev.



cilio plebis acta, quem nunc circum Flaminium ad-<sup>U. c. 305.</sup>  
pellant.<sup>a. C. 447.</sup>

LV. Per interregem deinde consules creati, L.<sup>U. c. 305.</sup>  
Valerius, M. Horatius; qui extemplo magistratum<sup>a. C. 446.</sup>  
occeperunt. quorum consulatus popularis sine offen-  
sione fuit. quidquid enim libertati plebis caveretur,  
id suis decedere opibus credebant. Omnium primum,  
quum veluti in controverso iure esset, tenerentur ne  
Patres plebiscitis, legem centuriatis comitiis tulere,  
*Ut, quod tributum plebes iussisset, populum teneret.*  
qua lege tribuniciiis rogationibus telum acerrimum da-  
tum est. Aliam deinde consularem legem de provo-  
catione, unicum praesidium libertatis, decemvirali  
potestate eversam, non restituunt modo, sed etiam  
in posterum muniunt, sanciendo novam legem, *Ne  
quis ullum magistratum sine provocatione crearet. qui  
creasset, eum ius fasque esset occidi: neve ea caedes  
capitalis noxae haberetur.* Et quum plebem hinc pro-  
vocatione, hinc tribunicio auxilio satis firmassent,  
ipsis quoque tribunis, ut sacrosancti viderentur, (cu-  
ius rei prope iam memoria aboleverat) relatis quibus-  
dam ex magno intervallo ceremoniis, renovarunt; et  
quum religione inviolatos eos, tum lege etiam fece-  
runt, sanciendo, *Ut, qui tribunis plebis, aedilibus,  
iudicibus, decemviris nocuisset, eius caput Iovi sacrum  
esset. familia ad aedem Cereris, Liberi, Liberaeque  
venum iret.* Hac lege iuris interpretes negant quem-  
quam sacrosanctum esse: sed eum, qui eorum cui-  
quam nocuerit, sacrum sanciri. Itaque aedilem pre-  
hendi ducique a maioribus magistratibus: quod etsi  
non iure fiat, (noceri enim ei, cui hac lege non li-  
ceat) tamen argumentum esse, non haberi pro sacro-  
sancto aedilem: tribunos veteri iureiurando plebis,  
quum primum eam potestatem creavit, sacrosanctos  
esse. Fuere, qui interpretarentur, eadem hac Hora-  
tia lege consulibus quoque et praetoribus, quia iisdem  
auspiciis, quibus consules, crearentur, cautum esse:

V. c. 506. iudicem enim consulem adpellari. Quae refellitur  
 a. C. 446. interpretatio, quod his temporibus nondum consulem  
 iudicem, sed praetorem, adpellari mos fuerit. Hae  
 consulares leges fuere. Institutum etiam ab iisdem  
 consulibus, ut senatusconsulta in aedem Cereris ad  
 aediles plebis deferrentur; quae antea <sup>q)</sup> arbitrio con-  
 sulum suppressiebantur vitiabanturque. M. Duilius  
 deinde tribunus plebis plebem rogavit, plebesque sci-  
 vit; *qui plebem sine tribunis reliquisset, quique magi-*  
*stratum sine provocatione creasset, tergo ac capite pu-*  
*niretur.* Haec omnia ut invitis, ita non adversanti-  
 bus, patriciis transacta; quia nondum in quemquam  
 unum saeviebatur.

LVI. Fundata deinde et potestate tribunicia, et  
 plebis libertate, tum tribuni adgredi singulos tutum  
 maturumque iam rati, accusatorem primum Virgi-  
 nium et Appium reum deligunt. Quum diem Appio  
 Virginius dixisset, et Appius, stipatus patriciis iuve-  
 nibus, in forum descendisset; redintegrata extemplo  
 est omnibus memoria foedissimae potestatis, quum  
 ipsum satellitesque eius vidissent. Tum Virginius,  
*Oratio, inquit, rebus dubiis inventa est. Itaque ne-*  
*que ego accusando apud vos eum tempus teram, a cu-*  
*ius crudelitate vosmet ipsi armis vindicastis: nec istum*  
*ad cetera scelera inpudentiam in defendendo se adiciere*  
*patiar. Omnium igitur tibi, Ap. Claudii, quae in pie*  
*nefarieque per biennium alia super alia es ausus, gra-*  
*tiam facio. unius tantum criminis, ni iudicem dices,*  
*te ab libertate in servitutem contra leges vindicias non*  
*dedisse, in vincula te duci iubeo.* Nec in tribunicio  
 auxilio Appius, nec in iudicio populi ullam spem  
 habebat. attamen et tribunos adpellavit: et, nullo  
 morante, arreptus a viatore, *Provoco, inquit.* Au-  
 dita vox una vindex libertatis, ex eo missa ore, quo  
 vindiciae nuper ab libertate dictae erant, silentium  
 fecit. Et, dum pro se quisque, *Deos tandem esse,*

q) ante Gron. Crev.

*et non neglegere humana, fremunt, et superbiae crudelitateque, etsi seras, non leves tamen venire poenas; provocare, qui provocationem sustulisset; et inplorare praesidium populi, qui omnia iura populi obtrisset; rapique in vincula egentem iure libertatis, qui liberum corpus in servitutem addixisset; ipsius Appii, inter concionis murmur fidem populi Romani inplorantis, vox audiebatur. Maiorum merita in rempublicam domi militiaeque commemorabat: suum infelix erga plebem Romanam studium, quod aequandarum legum causa cum maxima offensione Patrum consulatu abisset: suas leges, quibus manentibus lator earum in vincula ducatur. Ceterum sua propria bona malaque, quum causae dicendae data facultas sit, tum se experiturum. In praesentia se communi iure civitatis civem Romanum die dicta postulare, ut dicere liceat, ut iudicium populi Romani experiri. non ita se invidiam pertimuisse, ut nihil in aequitate et misericordia civium suorum spei habeat. Quod si indicta causa in vincula ducatur, iterum se tribunos plebei adpellare, et monere, ne imitentur, quos oderint. Quod si tribuni eodem foedere obligatos se fateantur tollendae adpellationis causa, in quam conspirasse decemviros criminati sint; at <sup>r)</sup> se provocare ad populum: inplorare leges de provocatione et consulares, et tribunicias, eo ipso anno latas. Quem enim provocaturum, si hoc indemnato indicta causa non liceat? cui plebeio et humili praesidium in legibus fore, si Ap. Claudio non sit? se documento futurum, utrum novis legibus dominatio, an libertas firmata sit: et adpellatio provocatioque adversus iniuriam magistratuum ostentata tantum inanibus literis, an vere data sit.*

LVII. Contra ea <sup>s)</sup> Virginius, unum Ap. Claudium et legum expertem et civilis et humani foederis esse, aiebat. *Respicerent tribunal homines, castellum*

r) ait Gron. Crev. c. Drañ.

s) ea del. Gron. Crev.

U. c. 306. *omnium scelerum: ubi decemvir ille perpetuus, bonis,*  
 a. C. 446. *tergo, sanguini civium infestus, virgas securesque*  
*omnibus minitans, Deorum hominumque contemtor;*  
*carnificibus, non lictoribus, stipatus, iam ab rapinis*  
*et caedibus animo ad libidinem verso, virginem inge-*  
*nuam in oculis populi Romani, velut bello captam,*  
*ab <sup>t)</sup> complexu patris abreptam, ministro cubiculi sui*  
*clienti dono dederit. Ubi crudeli decreto nefandisque*  
*vindictis dexteram patris in filiam armaverit: ubi, tol-*  
*lentes corpus semianime virginis, sponsum avunculum-*  
*que in carcerem duci iusserit; stupro interpellato ma-*  
*gis, quam caede, motus. et illi carcerem aedificatum*  
*esse, quod domicilium plebis Romanae vocare sit soli-*  
*tus. Proinde, ut ille iterum ac saepius provocet, sic*  
*se iterum ac saepius iudicem illi ferre, ni vindicias ab*  
*libertate in servitutem dederit. si ad iudicem non eat,*  
*pro damnato in vincula duci iubere. Ut haud quo-*  
*quam improbante, sic magno motu animorum, quum*  
*tanti viri supplicio suamet plebi iam nimia libertas*  
*videretur, in carcerem est coniectus. tribunus ei diem*  
*prodixit. Inter haec ab Latinis et Hernicis legati gra-*  
*tulatum de concordia Patrum ac plebis Romam vene-*  
*runt; donumque ob eam Iovi optimo maximo coro-*  
*nam auream in Capitolium tuere parvi ponderis,*  
*prout res haud opulentae erant, colebanturque reli-*  
*giones pie magis, quam magnifice. Iisdem auctori-*  
*bus cognitum est, Aequos Volscosque summa vi bel-*  
*lum adparare. Itaque partiri provincias consules*  
*iussi. Horatio Sabini, Valerio Aequi Volscique eve-*  
*nere. Quum ad ad ea bella delectum edixissent, fa-*  
*vore plebis non iuniores modo, sed emeritis etiam*  
*stipendiis, pars magna voluntariorum, ad nomina*  
*danda praesto fuere. eoque non copia modo, sed ge-*  
*nere etiam militum, veteranis admixtis, firnior ex-*  
*ercitus fuit. Priusquam urbem egrederentur, leges*  
*decemvirales, quibus tabulis duodecim est nomen, in*

t) a Gron. Crev.



aes incisas in publico proposuerunt. Sunt, qui iussu tribunorum aediles functos eo ministerio scribant.

U. c. 306.  
a. C. 446.

LVIII. C. Claudius, (qui, perosus decemvirorum scelera, et ante omnes fratris filii superbiae infestus, Regillum, antiquam in patriam, se contulerat) is magno iam natu, quum ad pericula eius deprecanda redisset, cuius vitia fugerat, sordidatus cum gentilibus clientibusque in foro prensabat singulos; orabatque, *Ne Claudiae genti eam inustam maculam vellent, ut carcere et vinculis viderentur digni: virum, honoratissimae imaginis futurum ad posteros, legum latorem conditoremque Romani iuris, iacere vinctum inter fures nocturnos ac latrones. Averterent ab ira parumper ad cognitionem cogitationemque animos: et potius unum tot Claudis deprecantibus condonarent, quam propter unius odium multorum preces adspernarentur. Se quoque id generi ac nomini dare nec cum eo in gratiam redisse, cuius adversae fortunae velit subcursum. Virtute libertatem recuperatam esse: clementia concordiam ordinum stabiliri posse.* Erant, quos moveret sua magis pietate, quam eius, pro quo agebat, caussa. sed Virginius, sui potius ut misererentur, orabat, filiaeque: nec gentis Claudiae, regnum in plebem sortitae, sed necessariorum Virginiae et \*) trium tribunorum preces audirent; qui, ad auxilium plebis creati, ipsi plebis fidem atque auxilium implorarent. Iustiores hae lacrimae videbantur. itaque, spe incisa, priusquam producta dies adesset, Appius sibi mortem conscivit. Subinde arreptus a P. Numitorio Sp. Oppius, proximus invidiae x), quod in urbe fuerat, quum iniustae vindiciae a collega dicerentur. Plus tamen facta iniuria Oppio, quam non prohibita, invidiae fecit. testis productus, qui, septem et viginti enumeratis stipendiis, octies extra ordinem donatus, donaque ea gerens in conspectu populi, scissa veste tergum laceratum virgis ostendit,

u) et del. Crev.

x) invidiae proximus Gron. Crev.

U. c. 306. nihilum deprecans, *quin, si quam suam noxam reus*  
 a. C. 446. *dicere posset, privatus iterum in se y) saeviret.* Oppius  
 quoque ductus in vincula est, et ante iudicii diem finem  
 ibi vitae fecit. Bona Claudii Oppiique tribuni publica-  
 vere. collegae eorum exsilii caussa solum verterunt:  
 bona publicata sunt. et M. Claudius, adsertor Virgi-  
 niae, die dicta damnatus, ipso remittente Virginio ul-  
 timam poenam, dimissus Tibur exsulatum abiit: Ma-  
 nesque Virginiae, mortuae quam vivae felicioris, per  
 tot domos ad petendas poenas vagati, nullo relicto sonte  
 tandem quieverunt.

LIX. Ingens metus incesserat Patres, vultusque  
 iam iidem tribunorum erant, qui decemvirorum fue-  
 rant, quum M. Duilius tribunus plebis, inhibito sa-  
 lubriter modo nimiae potestatis, *Et libertatis*, inquit,  
*nostrae et poenarum ex inimicis satis est. itaque hoc anno*  
*nec diem dici cuiquam, nec in vincula duci quemquam*  
*sum passurus.* Nam neque vetera peccata repeti iam  
 obliterata placet, quum nova expiata sint decemvirorum  
 suppliciiis; et nihil admissum iri, quod vim tribuniciam  
 desideret, spondet perpetua consulum amborum in liber-  
 tate vestra tuenda cura. Ea primum moderatio tri-  
 buni metum Patribus demsit, eademque auxit consu-  
 lum invidiam; quod adeo toti plebis fuissent, ut Pa-  
 trum salutis libertatisque prior plebeio magistratui,  
 quam patricio, cura fuisset; et ante inimicos satietas  
 poenarum suarum cepisset, quam obviam ituros licen-  
 tia eorum consules adpareret. Multique erant, qui  
 mollius consultum dicerent, quod legum ab iis latarum  
 Patres auctores fuissent. neque erat dubium, quin,  
 turbato reipublicae statu, tempori subcubuissent.

LX. Consules, rebus urbanis compositis, funda-  
 toque plebis statu, in provincias diversi abire. Va-  
 lerius adversus coniunctos iam in Algido exercitus  
 Aequorum Volscorumque sustinuit consilio bellum.

y) *in se iterum* Gron. Crev.

Quod si extemplo rem fortunae commisisset, haud U. c. 306.  
 scio, an (qui tum animi ab decemvirorum infelicibus a. C. 446.  
 auspiciis Romanis hostibusque erant) magno detri-  
 mento certamen staturum fuerit. Castris, mille pas-  
 suum ab hoste positis, copias continebat. hostes me-  
 dium inter bina castra spatium acie instructa comple-  
 bant. provocantibusque ad proelium responsum Ro-  
 manus nemo reddebat. tandem fatigati stando, ac  
 nequidquam exspectando certamen, Aequi Volscique,  
 postquam concessum propemodum de victoria crede-  
 rant, pars in Hernicos, pars in Latinos praedatum  
 abeunt. relinquitur magis castris praesidium, quam  
 satis virium ad certamen. quod ubi consul sensit <sup>z)</sup>,  
 reddit inlatum antea terrorem: instructaque acie  
 ultro hostem lacessit. Ubi illi, conscientia quid ab-  
 esset virium, detractavere pugnam, crevit extemplo  
 Romanis animus, et pro victis habebant paventes in-  
 tra vallum. Quum per totum diem stetissent intenti  
 ad certamen, nocti <sup>a)</sup> cessere: et Romani quidem pleni  
 spei corpora curabant. Haudquaquam pari hostes  
 animo nuncios passim trepidi ad revocandos praedato-  
 res dimittunt. recurritur ex proximis locis; ulterio-  
 res non inventi. Ubi inluxit, egreditur castris Ro-  
 manus, vallum invasurus, ni copia pugnae fieret. et,  
 postquam multa iam dies erat, neque movebatur quid-  
 quam ab hoste, iubet signa inferri consul. motaque  
 acie, indignatio Aequos et Volscos incessit, si victo-  
 res exercitus vallum potius, quam virtus et arma te-  
 gerent <sup>b)</sup>. Igitur et ipsi efflagitatum ab ducibus  
 signum pugnae acceperunt. Iamque pars egressa por-  
 tis erat, deincepsque alii servabant ordinem, in  
 suum quisque locum descendentes, quum consul Ro-  
 manus prius, quam totis viribus fulta constaret hosti-  
 um acies, intulit signa: adortusque nec omnes dum  
 eductos, nec, qui erant, satis explicatis ordinibus, prope

z) sensit consul Gron. Grev.    b) contegerent Gron.

a) nocte Gron.

U. c. 306. fluctuantem turbam trepidantium huc atque illuc, circa. C. 446. cum spectantiumque se ac suos, addito turbatis mentibus clamore atque inpetu, invadit. Retulere primo pedem hostes. deinde, quum animos conlegissent, et undique duces, *victisne cessuri essent*, increparent, restituitur pugna.

LXI. Consul ex altera parte Romanos *meminisse* iubebat, *illo die primum liberos pro libera urbe Romana pugnare. Sibimet ipsis victuros, non ut decemviro- rum victores praemium essent. Non Appio duce rem- geri, sed consule Valerio, a liberatoribus populi Roma- ni orto, liberatore ipso. Ostenderent, prioribus prece- liis per duces, non per milites, stetisse, ne vincerent. Turpe esse, contra cives plus animi habuisse, quam contra hostes: et domi, quam foris. servitutem magis timuisse. Unam Virginiam fuisse, cuius pudicitiae in pace periculum esset: unum Appium civem pericu- losae libidinis. at, si fortuna belli inclinaret, omnium liberis ab tot millibus hostium periculum fore. Nolle ominari, quae nec Iupiter, nec Mars pater passuri sint iis auspiciis conditae urbi accidere. Aventini Sacrique montis admonebat, ut, ubi libertas parta esset paucis ante mensibus, eo imperium inlibatum referrent: osten- derentque, eandem indolem militibus Romanis post ex- actos decem viros esse, quae ante creatos fuerit: nec, ae- quatis legibus, inminutam virtutem populi Romani esse. Haec ubi inter signa peditum dicta dedit; avolat <sup>c)</sup> deinde ad equites, Agite, iuvenes, inquit, praestate virtute peditem, ut honoretur et ordine praestatis. Pri- mo concursu pedes movit hostem. pulsum vos, inmissis equis, exigit e campo. Non sustinebunt inpetum. et nunc cunctantur magis, quam resistunt. Concitant equos, permittuntque in hostem, pedestri iam turba- tum pugna: et, perruptis ordinibus, elati ad novis- simam aciem, pars libero spatio circumvecti, iam fu-*

c) *advolat* Gron. Crev.



gam undique capessentes plerosque a castris avertunt, U. c. 306. praeterequitan-<sup>a</sup>tesque absterrent, Peditum acies, et <sup>a</sup>. C. 446, consul ipse, visque omnis belli fertur in castra: captisque cum ingenti caede, maiore praeda potitur. Huius pugnae fama perlata non in urbem modo, sed in Sabinos ad alterum exercitum. In urbe laetitia modo celebrata est; in castris animos militum ad aemulandum decus accendit. Iam Horatius eos, excursionibus sufficiendo, proeliisque levibus experiundo adsuefecerat sibi potius fidere, quam meminisse ignominiae decemviro-<sup>rum</sup> ductu acceptae; parvaque certamina in summam totius profecerant spei. Nec cessabant Sabini, feroces ab re prioris anno bene gesta, lacessere atque instare, rogitantes, *Quid latrocinii modo procursantes pauci recurrentesque tererent tempus, et in multa proelia parvaque carperent summam unius belli? Quin illi congregarentur acie, inclinandamque semel fortunae rem darent?*

LXII. Ad id, quod sua sponte satis conlectum animorum erat, indignitate etiam Romani accendebantur. *Iam alterum exercitum victorem in urbem reditum; sibi ultro per contumelias hostem insultare, quando autem se, si tum non sint, pares hostibus fore?* Ubi haec fremere militem in castris consul sensit, concione advocata, *Quemadmodum, inquit, in Algido res gesta sit, arbitror vos, milites, audisse. qualem liberi populi exercitum decuit esse, talis fuit.* consulto <sup>d</sup>) col-  
legae, *virtute militum victoria parta est. Quod ad me adtinet, id consilii animique habiturus sum, quod vos <sup>e</sup>) mihi effeceritis. et trahi bellum salubriter, et mature perfici potest. Si trahendum est, ego, ut in dies spes virtusque vestra crescat, eadem, qua institui, disciplina efficiam. Si iam satis animi est, decernique placet, agitedum, clamorem, qualem in acie sublaturi estis, tollite hic, indicem voluntatis virtutisque vestrae.* Postquam

d) consultu Gron. Crev. c. e) add, milites Gron. Crev. Drak.

U. c. 306. ingenti alacritate clamor est sublatus, *Quod bene ver-*  
 a. C. 446. *tat, gesturum se illis morem, posteroque die in aciem de-*  
*ducturum*, adfirmat. Reliquum diei adparandis armis  
 consumtum est. Postero die simul instrui Romanam  
 aciem Sabini videre, et ipsi, iam pridem avidi  
 certaminis, procedunt. Proelium fuit, quale inter  
 fidentes sibimet ambo <sup>f)</sup> exercitus, veteris perpetuae-  
 que victoriae alterum gloria <sup>g)</sup>, alterum nuper nova vic-  
 toria elatum. Consilio etiam Sabini vires adiuvere.  
 nam quum aequasent aciem, duo extra ordinem millia,  
 quae in sinistrum cornu Romanorum in ipso certamine  
 inpressionem facerent, tenuere. quae ubi, inlatis ex  
 transverso signis, degravabant prope circumventum  
 cornu; equites duarum legionum sexcenti fere ex equis  
 desiliunt, cedentibusque iam suis provolant in primum;  
 simulque et hosti se obponunt, et, aequato primum peri-  
 culo, pudore deinde animos peditum accendunt. Vere-  
 cundiae erat, equitem suo alienoque Marte pugnare: pe-  
 ditem ne ad pedes quidem degresso equiti parem esse.

LXIII. Vadunt igitur in proelium ab sua parte  
 omissum; et locum, ex quo cesserant, repetunt: mo-  
 mentoque non restituta modo pugna, sed inclinatur  
 etiam Sabinis cornu. Eques inter ordines peditum  
 tectus se ad equos recipit. transvolat inde in partem  
 alteram, suis victoriae nuncius; simul et in hostes  
 iam pavidos, quippe fuso suae partis validiore cornu,  
 inpetum facit: non aliorum eo proelio virtus magis  
 enituit. Consul providere omnia, laudare fortes, in-  
 crepare, sicubi segnior pugna esset. Castigati fortium  
 statim virorum operam edebant: tantumque hos pu-  
 dor, quantum alios laudes excitabant. Redintegrato  
 clamore, undique omnes connisi hostem avertunt, nec  
 deinde Romana vis sustineri potuit. Sabini, fusi  
 passim per agros, castra hosti ad praedam relinquunt,  
 ibi non sociorum, sicut in Algido, res, sed suas Ro-

f) *ambos Gron. Crev.*      *riae Eaed. c. Drak.*

g) *perpetuaeque alterum glo-*

manus, populationibus agrorum amissas, recipit. Ge-U. c. 306.  
 mina victoria duobus bifariam proeliis parta, maligne<sup>a</sup>. C. 446.  
 senatus in unum diem supplicationes consulum nomine decrevit. Populus iniussu et altero die frequens iit supplicatum. et haec vaga popularisque supplicatio studiis prope celebratior fuit. Consules ex composito eodem biduo ad urbem accessere, senatumque in Martium campum evocavere. ubi quum de rebus ab se gestis agerent, questi primores Patrum, senatum inter milites dedita opera terroris causa haberi. itaque inde consules, ne criminationi locus esset, in prata Flaminia, ubi nunc aedes Apollinis est, (iam<sup>h</sup>) tum Apollinarem adpellabant) avocavere senatum. Ubi quum ingenti consensu Patrum negaretur triumphus, L. Icilius tribunus plebis tulit ad populum de triumpho consulum. multis dissuasum prodeuntibus, maxime C. Claudio vociferante, *De Patribus, non de hostibus, consules triumphare velle; gratiamque pro privato merito in tribunum, non pro virtute honorem, peti. numquam ante de triumpho per populum actum, semper aestimationem arbitriumque eius honoris penes senatum fuisse. ne reges quidem maiestatem summi ordinis imminuisse. ne ita omnia tribuni potestatis suae implerent, ut nullum publicum consilium sinerent esse. Ita demum liberam civitatem fore, ita aequatas leges, si sua quisque iura ordo, suam maiestatem teneat.* In eandem sententiam multa et a ceteris senioribus Patrum quum essent dicta, omnes tribus eam rogationem acceperunt. Tum primum, sine auctoritate senatus, populi iussu triumphatum est.

LXIV. Haec victoria tribunorum plebisque prope in haud salubrem luxuriam vertit, conspiratione inter tribunos facta, ut iidem tribuni reficerentur, et, quo sua minus cupiditas emineret, consulibus quoque continuarent magistratum. Consensum Patrum causabantur, quo per contumeliam consulum iura plebis

<sup>h</sup>) circum iam tum Gron. Crev.

U. c. 306. labefacta essent. *Quid futurum, nondum firmatis legibus, si novos tribunos per factiones suas consules adorti essent? non enim semper Valerios Horatiosque consules fore, qui libertati plebis suas opes postferrent.* Forte quadam utili ad tempus, ut comitiis praeesset, potissimum M. Duilio sorte evenit, viro prudenti, et ex continuatione magistratus invidiam imminentem cernenti. qui quum ex veteribus tribunis negaret ullius se rationem habiturum, pugnarentque collegae, ut liberas tribus in suffragium mitteret, aut concederet sortem comitiorum collegis, habituris e lege potius comitia, quam ex voluntate Patrum; iniecta contentione, Duilius, consules ad subsellia aditos quum interrogasset, quid de comitiis consularibus in animo haberent, respondissentque, se novos consules creaturos, auctores populares sententiae haud popularis <sup>i)</sup> nactus, in concionem cum iis processit. Ubi quum consules, producti ad populum, interrogatique, si eos populus Romanus, memor libertatis per illos receptae domi, memor militiae rerumque gestarum, consules iterum faceret, quidnam facturi essent, nihil sententiae suae mutassent; conlaudatis consulibus, quod perseverarent ad ultimum dissimiles decemvirorum esse, comitia habuit: et, quinque tribunis plebis creatis, quum prae studiis aperte petentium novem tribunorum alii candidati tribus non explerent, concilium dimisit; nec deinde comitiorum causa habuit. Satisfactum legi aiebat, quae, numero nusquam praefinito tribunis, modo ut relinquerentur, sanciret; et ab iis, qui creati essent, cooptari collegas iuberet. Recitabatque rogationis carmen, in quo, *Si tribunos plebei decem rogabo, si qui vos minus hodie decem tribunos plebei feceritis* <sup>k)</sup>: *hi tum uti, quos sibi collegas cooptassint, ut illi legitimi eadem lege tribuni plebei sint, ut illi, quos hodie tribunos ple-*

i) popularis sententiae haud      k) si quos minus — fecerint  
populares Gron. Crev. c. Drak.      Gron. Crev.



*lei feceritis.* Duilius, quum ad ultimum perseve- U. c. 306.  
rasset, negando quindecim tribunos plebei<sup>1)</sup> rem-<sup>a.</sup> C. 446.  
publicam habere posse, victa collegarum cupiditate,  
pariter Patribus plebique acceptus, magistratu abiit.

LXV. Novi tribuni plebis in cooptandis colle- U. c. 307.  
gis Patrum voluntatem foverunt. duos etiam patricios<sup>a.</sup> C. 445.  
consularesque, Sp. Tarpeium et A. Aterium, coop-  
tavere. Consules creati, Lar Herminius, T. Virgi-  
nius Caelimontanus<sup>m)</sup>, nihil magnopere ad Patrum  
aut plebis caussam inclinati, otium domi ac foris ha-  
buere. L. Trebonius tribunus plebis, infestus Patri-  
bus, quod se ab iis in cooptandis tribunis fraude cap-  
tum, proditum a collegis, aiebat, rogationem tulit,  
*ut qui plebem Romanam tribunos plebi<sup>n)</sup> rogaret, is us-  
qus eo rogaret, dum decem tribunos plebi<sup>o)</sup> faceret*; in-  
sectandisque Patribus, unde Aspero etiam inditumest  
cognomen, tribunatum gessit. Inde M. Geganius Mace- U. c. 308.  
rinus et C. Julius, consules facti, coitiones tribunorum,<sup>a.</sup> C. 444.  
adversus nobilium inventutem ortas, sine insectatione  
potestatis eius, conservata maiestate Patrum, sedavere.  
plebem, decreto ad bellum Volscorum et Aequorum  
delectu, sustinendo rem, ab seditionibus continuere:  
urbano quoque otio foris omnia tranquilla esse adfir-  
mantes, per discordias civiles externos tollere ani-  
mos. Cura pacis concordiae quoque intestinae caus-  
sa fuit. Sed alter semper ordo gravis alterius mode-  
stiae erat. quiescenti plebi ab iunioribus Patrum in-  
iuriae fieri coeptae. ubi tribuni auxilio humilioribus  
essent, in primis parum proderat: deinde ne ipsi  
quidem inviolati erant, utique postremis mensibus,  
quum et per coitiones potentiorum iniuria fieret, et  
vis potestatis omnis aliquanto posteriore anni parte  
languidior ferme esset: iamque plebs ita in tribuna-  
tu ponere aliquid spei, si similes Icilio tribunos ha-

1) *plebi* Gron.m) *Coelimontanus* Crev.n) *plebei* Crev.o) *plebei* Gron. Crev.

U. c. 508. beret: nomina<sup>p)</sup> tantum se biennio habuisse. Se-  
a. C. 414. niores contra Patrum, ut nimis feroces suos credere  
iuvenes esse; ita malle, si modus excedendus esset,  
suis, quam adversariis, superesse animos. adeo mo-  
deratio tuendae libertatis, dum aequari velle simu-  
lando ita se quisque extollit, ut deprimat alium, in  
difficili est: cavendoque ne metuant homines, me-  
tuendos ultro se efficiunt: et iniuriam a nobis repul-  
sam, tamquam aut facere aut pati necesse sit, in-  
iungimus aliis.

U. c. 509. LXVI. T. Quinctius Capitolinus quartum et  
a. C. 413. Agrippa Furius, consules inde facti, nec seditionem  
domi, nec foris bellum, acceperunt: sed imminebat  
utrumque. Iam non ultra discordia civium reprimi  
poterat, et tribunis et plebe incitata in Patres, quum  
dies alicui nobilium dicta novis semper certaminibus  
conciones turbaret. ad quarum primum strepitum,  
velut signo accepto, arma cepere Aequi ac Volsci:  
simul quod persuaserant iis duces, cupidi praedarum,  
biennio ante delectum indictum haberi non potuisse,  
abnuente iam plebe imperium. *eo adversus se non esse  
missos exercitus. dissolvi licentia militandi morem. nec  
pro communi iam patria Romam esse. quidquid irarum  
simultatumque cum externis fuerit, in ipsos verti. ob-  
caecatos lupos intestina rabie opprimendi occasionem  
esse.* Coniunctis exercitibus Latinum primum agrum  
perpopulati<sup>q)</sup> sunt: deinde postquam ibi nemo vin-  
dex obcurrerat, tum vero, exsultantibus belli aucto-  
ribus, ad moenia ipsa Romae populabundi regione  
portae Esquilinae accessere, vastationem agrorum  
per contumeliam urbi<sup>r)</sup> ostentantes. unde postquam  
inulti, praedam prae se agentes, retro ad Corbionem  
agmine iere, Quinctius consul ad concionem popu-  
lum vocavit.

LXVII. Ibi in hanc sententiam locutum accipio;

p) nomine Gron. Crev.

q) populati Eaed.

r) urbi per contumeliam

Eaed.

*Et si mihi nullius noxae conscius, Quirites, sum, ta-* U. c. 309.  
*men cum pudore summo in concionem vestram processi.* a. C. 443.  
*Hoc vos scire, hoc posteris memoriae traditum iri, Ae-*  
*quos et Volscos, vix Hernicis modo pares, T. Quinctio*  
*quartum consule, ad moenia urbis Romae impune arma-*  
*tos venisse. Hanc ego ignominiam, (quamquam iam*  
*diu ita vivitur, is status rerum est, ut nihil boni divinet*  
*animus) si huic potissimum imminere anno scissem, vel*  
*exsilio, vel morte, si alia fuga honoris non esset, vitas-*  
*sem. Ergo, si viri arma illa habuissent, quae in portis*  
*fuere nostris, capi Roma me consule potuit? satis hono-*  
*rum, satis superque vitae erat: mori consulem tertium*  
*oportuit. Quem tandem ignavissimi hostium contem-*  
*sere? nos consules; an vos Quirites? Si culpa in nobis*  
*est, auferte imperium indignis; et, si id parum est, in-*  
*super poenas expetite. Si in vobis, nemo Deorum nec*  
*hominum sit, qui vestra puniat peccata, Quirites; vos-*  
*met tantum eorum poeniteat. Non illi vestram igna-*  
*viam contempsere, nec suae virtuti confisi sunt; quippe*  
*oties fusi Fugatique, castris exuti, agro multati, sub*  
*iugum missi, et se et vos novere. Discordia ordinum*  
*est venenum urbis huius; Patrum ac plebis certamina:*  
*dum nec nobis imperii, nec vobis libertatis est modus,*  
*dum taelet vos patriciorum, hos s) plebeiorum magi-*  
*stratum, sustulere illi animos. Pro Deum fidem, quid*  
*vobis vultis? Tribunos plebis concupistis. concordiae*  
*caussa concessimus. Decemviros desiderastis, creati*  
*passi sumus. Decemvirorum vos pertaesum est. coegi-*  
*mus abire magistratu. Manente in eosdem privatos ira*  
*vestra, mori atque exulare nobilissimos viros honora-*  
*tissimosque passi sumus. Tribunos plebis creare t) ite-*  
*rum voluistis. creastis. Consules facerestrarum*  
*partium, etsi Patribus videbamus iniquum; patricium*  
*quoque magistratum plebi donum fieri vidimus. auxi-*  
*lium tribunicium, provocationem ad populum, scita ple-*

s) nos Gron. Crev.

t) creati Gron.

U. c. 309. *bis iniuncta Patribus. sub titulo aequandarum legum,*  
 a. C. 443. *nostra iura oppressa tulimus et ferimus. Qui finis erit discordiarum? Ecquando unam urbem habere, ecquando communem hanc esse patriam licebit? Victi nos aequiore animo quiescimus, quam vos victores. Satisne est, nobis vos metuendos esse? Adversus nos Aventinum capitur. adversus nos Sacer occupatur mons. Esquilias quidem ab hoste prope captas, et scandentem in aggerem Volscum hostem nemo submovit. in nos viri, in nos armati estis.*

LXVIII. *Agitedum, ubi hic curiam circumsederitis, et forum infestum feceritis, et carcerem inpleveritis principibus; iisdemistis ferocibus animis egredimini extra portam Esquilinam: aut, si ne hoc quidem audetis, ex muris visite agros vestros ferro ignique vastatos, praedam abigi, fumare incensa passim tecta. At enim communis res per haec loco est peiore: ager uritur, urbs obsidetur, belli gloria penes hostes est. Quid tandem? privatae res vestrae in <sup>u)</sup> quo statu sunt? Iam unicuique ex agris sua damna nunciabuntur. quid est tandem domi, unde ea expleatis? Tribuni vobis amissa reddent ac restituent? vocis verborumque quantum voletis, ingerent, et criminum in principes, et legum aliarum super alias, et concionum. Sed ex illis concionibus numquam vestrum quisquam re, fortuna, domum auctior rediit. Ecquis retulit aliquid ad coniugem ac <sup>x)</sup> liberos praeter odia, offensiones, simultates publicas privatasque? a quibus semper non vestra virtute innocentiaque, sed auxilio alieno tuti sitis. At, Hercules, quum stipendia, nobis consulibus, non tribunis ducibus, et in castris, non in foro, faciebatis, et in acie vestrum clamo-rem hostes, non in concione Patres Romani horrebant, praeda parta, agro ex hoste capto, pleni fortunarum gloriaeque, simul publicae, simul privatae, triumphantes domum ad Penates redibatis. nunc oneratum vestris fortunis hostem abire sinitis. Haerete adfixi con-*

u) in del. Gron. Crev.

x) et Eaed.



cionibus et in foro vivite: sequitur vos necessitas militandi, quam fugitis. Grave erat in Aequos et Volscos proficisci? Ante portas est bellum. si inde non pellitur, iam intra moenia erit, et arcem et Capitolium scandet, et in domos vestras vos persequetur. Biennio ante senatus delectum haberi, et educi exercitum in Algidum iussit. sedemus desides domi, mulierum ritu inter nos altercantes; praesenti pace laeti, nec cernentes, ex otio illo brevi multiplex bellum rediturum. His ego gratiora dictu alia esse scio; sed me vera pro gratis loqui, et si meum ingenium non moneret, necessitas cogit. Vellem equidem vobis placere, Quirites; sed multo malo vos salvos esse, qualicumque erga me animo futuri estis. Natura hoc ita comparatum est, ut, qui apud multitudinem sua causa loquitur, gratior eo sit, cuius mens nihil, praeter publicum commodum, videt. nisi forte adsentatores publicos, plebicolae istos, qui vos nec in armis nec in otio esse sinunt, vestra vos causa incitare et stimulare putatis. Concitati, aut honori, aut quaestui illis estis: et quia in concordia ordinum nullos se usquam esse vident, malae rei se, quam nullius, turbarum ac seditionum, duces esse volunt. Quarum rerum si vos taedium tandem capere potest, et patrum vestrosque antiquos mores vultis pro his novis sumere, nulla supplicia recuso; nisi paucis diebus hos populatores agrorum nostrorum fusos fugatosque castris nostris moenibusque ad illorum urbes hunc belli terrorem, quo nunc vos adtoniti estis, transtulero.

LXIX. Raro alias tribuni popularis oratio acceptior plebi, quam tunc severissimi consulis, fuit. Inventus quoque, quae inter tales metus detrectationem militum telum acerrimum adversus Patres habere solita erat, arma et bellum <sup>y)</sup> spectabat: et agrestium fuga spoliisque in agris et vulnerati, foediora iis, quae subiiciebantur oculis, nunciantes, totam urbem ira

y) bellum et arma Gron. Crev.

U. c. 309. inplevere. In senatum ubi ventum est, ibi vero in  
 a. C. 443. Quinctium omnes versi, ut unum vindicem maiestatis  
 Romanae intueri; et primores Patrum *dignam dicere  
 concionem imperio consulari, dignam tot consulatibus  
 anteactis, dignam vita omni, plena honorum saepe ge-  
 storum, saepius meritorum. Alios consules aut per pro-  
 ditionem dignitatis Patrum plebi adulatos, aut acerbe  
 tuendo iura ordinis asperiores domando multitudinem  
 fecisse: T. Quinctium orationem memorem maiestatis  
 Patrum, concordiaeque ordinum, et temporum in primis  
 habuisse. Orare eum collegamque, ut capesseren rem-  
 publicam: orare tribunos, ut uno animo cum consulibus  
 bellum ab urbe ac moenibus propulsari vellent, plebemque  
 obedientem in re tam trepida Patribus praeberent: ad-  
 pellare tribunos communem patriam, auxiliumque eorum  
 implorare, vastatis agris, urbe prope obpugnata. Con-  
 sensu omnium delectus decernitur habeturque.  
 Quum consules in concione pronunciassent, *Tempus  
 non esse causas cognoscendi; omnes iuniores postero  
 die prima luce in campo Martio adessent; cognoscendis  
 causis eorum, qui nomina non dedissent, bello perfecto  
 se daturos tempus; pro desertore futurum; cuius non  
 probassent causam; omnis iuventus adfuit postero  
 die. Cohortes sibi quaeque centuriones legerunt:  
 bini senatores singulis cohortibus praepositi. Haec  
 omnia adeo mature perfecta accepimus, ut signa, eo  
 ipso die a quaestoribus ex aerario prompta delataque  
 in campum, quarta diei hora mota ex campo sint: ex-  
 ercitusque novus, paucis cohortibus veterum militum  
 voluntate sequentibus, manserit ad decimum lapidem.  
 Insequens dies hostem in conspectum dedit, castraque  
 ad Corbionem castris sunt coniuncta. Tertio die, quum  
 ira Romanos, illos, quum toties rebellassent, con-  
 scientia culpa ac desperatio irritaret, mora dimican-  
 di nulla est facta.**

LXX. In exercitu Romano quum duo consules  
 essent potestate pari; quod saluberrimum in admini-

stratione magnarum rerum est, summa imperii, con-<sup>U c. 309.</sup>  
cedente Agrippa, penes collegam erat: et praelatus<sup>a. C. 443.</sup>  
ille facilitate submittentis se comiter respondebat, com-  
municando consilia laudesque, et aequando inparem  
sibi. In acie Quinctius dextrum cornu, Agrippa si-  
nistrum tenuit: Sp. Postumio Albo legato datur me-  
dia acies tuenda; legatum alterum Ser. Sulpicium  
equitibus praeficiunt. Pedites ab dextro cornu egre-  
gie pugnare, haud segniter resistentibus Volscis.  
Ser. Sulpicius per mediam hostium aciem cum equi-  
tatu perrupit. unde quum eadem reverti posset ad  
suos, priusquam hostis turbatos ordines reficeret,  
terga inpugnare hostium satius visum est. momento-  
que temporis, in aversam incursando aciem, ancipiti  
terrore dissipasset hostes, ni suo proprio eum proelio  
equites Volscorum et Aequorum exceptum aliquam-  
diu tenuissent. Ibi vero Sulpicius negare, *cunctandi  
tempus esse, circumventos interclusosque ab suis vocife-  
rans, ni equestre proelium connisi omni vi perficerent.*  
*Nec fugare equitem integrum satis esse, conficerent equos  
virosque, ne quis reveheretur inde ad proelium, aut integra-  
ret pugnam. non posse illos resistere sibi, quibus conferta  
peditum acies cessisset.* Haud surdis auribus dicta: in-  
pressionem una totum equitatum fudere, magnam vim  
ex equis praecipitavere, ipsos equosque spiculis con-  
fodere. is finis pugnae equestris fuit. Tunc, adorti  
peditum aciem, nuncios ad consules rei gestae mit-  
tunt, ubi iam inclinabatur hostium acies. nuncius  
deinde et vincentibus Romanis animos auxit, et re-  
ferentes gradum perculit Aequos. In media primum  
acie vinci coepti, qua permissus equitatus turbaverat  
ordines. Sinistrum deinde cornu ab Quinctio consule  
pelli coeptum; in dextro plurimum laboris fuit. Ibi  
Agrippa, aetate viribusque ferox, quum omni parte  
pugnae melius res <sup>2)</sup> geri, quam apud se, videret, ac-

2) rem Gron. Crev.

U. e. 509. cepta signa ab signiferis ipse inferre, quaedam iacere  
 a. C. 443. etiam in consertos hostes coepit. Cuius ignominiae  
 metu concitati milites, invasere hos om. ita aequata  
 ex omni parte victoria est. Nuncius tum a Quinctio  
 venit, victorem iam se inminere hostium castris; nolle  
 inrumpere, antequam sciat debellatum et in sinistro  
 cornu esse. Si iam fudisset hostes, conferret ad se  
 signa, ut simul omnis exercitus praeda potiretur.  
 Victor Agrippa cum mutua gratulatione ad victorem  
 collegam castraque hostium venit; ibi paucis defen-  
 dentibus, momentoque fuis, sine certamine in mu-  
 nitiones iurumpunt: praedaeque ingenti compotem ex-  
 ercitus, suis etiam rebus recuperatis, quae populatio-  
 ne agrorum amissae erant, reducunt. Triumphum  
 nec ipsos postulasse, nec delatum iis ab senatu, ac-  
 cipio: nec traditur causa spreti aut non sperati ho-  
 noris. Ego quantum in tanto intervallo temporum  
 conicio, quum Valerio atque Horatio consulibus, qui  
 praeter Volscos et Aequos Sabini etiam belli perfecti  
 gloriam pepererant, negatus ab senatu triumphus es-  
 set, verecundiae fuit pro parte dimidia rerum con-  
 sulibus petere triumphum. ne etiam, si inpetrassent,  
 magis hominum ratio, quam meritorum, habita vide-  
 retur.

LXXI. Victoriā honestam, ex hostibus par-  
 tam, turpe domi de finibus sociorum iudicium populi  
 deformavit. Aricini atque Ardeates de ambiguo agro  
 quum saepe bello certassent, multis in vicem cladibus  
 fessi, iudicem populum Romanum cepere. Quum  
 ad causam orandam venissent, concilio populi a ma-  
 gistratibus dato, magna contentione actum. iamque  
 editis testibus, quum tribus vocari, et populum inire  
 suffragium oporteret, consurgit P. Scaptius de plebe  
 magno natu: et, *Si licet, inquit, consules, de repub-  
 lica dicere, errare ego populum in hac causa non pa-  
 tior.* Quum, ut vanum, eum negarent consules au-  
 diendum esse, vociferantemque, *prodi publicam causam*



*sam*; submoventi iussissent, tribunos appellat. Tri-<sup>U. c. 309.</sup>  
buni, ut fere semper reguntur a multitudine magis,<sup>a. C. 413.</sup>  
quam regunt, dedere cupidae audiendi plebi, ut, quae  
vellet, Scaptius diceret. Ibi inquit, *Annum se tertium  
et octogesimum agere, et in eo agro, de quo agitur, mi-  
litasse, non iuvenem, vicesima iam stipendia merentem,  
quum ad Coriolos sit bellatum. Eo rem se*<sup>a)</sup> *vetustate  
obliteratam, ceterum suae memoriae infixam, adferre;  
agrum, de quo ambigitur, finium Coriolanorum fuisse,  
captisque Coriolis, iure belli publicum populi Romani  
factum. Mirari se, quonam more Ardeates Aricinique,  
cuius agri ius numquam usurpaverint incolumi Corio-  
lana re, eum se a populo Romano, quem pro domino  
iudicem fecerint, intercepturos sperent. Sibi exiguum  
vitae tempus superesse: non potuisse se tamen inducere  
in animum, quin, quem agrum miles pro parte virili*<sup>b)</sup>  
*manu cepisset, eum senex quoque voce, qua una posset,  
vindicaret. Magnopere se suadere populo, ne inutili  
pudore suam ipse caussam damnaret.*

LXXII. Consules quum Scaptium non silentio  
modo, sed cum adsensu etiam, audiri animadvertis-  
sent, Deos hominesque testantes flagitium ingens fieri,  
Patrum primores arcessunt. cum his circumire  
tribunos, orare, *Ne pessimum facinus peiore exemplo  
admitterent iudices, in suam rem litem vertendo, quum  
praesertim, etiamsi fas sit, curam emolumenti sui iu-  
dici esse, nequaquam tantum agro intercipiendo adqui-  
ratur, quantum amittatur alienandis iniuria sociorum  
animis. Nam famae quidem ac fidei damna maiora  
esse, quam quae aestimari possent. Hoc legatos referre  
domum: hoc vulgari: hoc socios audire: hoc hostes.  
quo cum dolore hos? quo cum gaudio illos? Scaptione  
hoc, concionali seni, adsignaturos putarent finitimos  
populos? Clarum hac fore imagine Scaptium*<sup>c)</sup> *popu-  
lum Romanum quadruplatoris et interceptoris litis alie-*

a) se rem Gron. Crev.

c) add. nomen Eaed.

b) pro virili parte Eaed.

U. c. 309. *nae personam laturum. quem enim hoc privatae rei*  
 a. C. 443. *iudicem fecisse, ut sibi controversiosam adiudicaret*  
*rem? Scaptium ipsum id quidem, etsi praemortui iam sit*  
*pudoris, non facturum.* Haec consules, haec Patres vo-  
 ciferantur. sed plus cupiditas et auctor cupiditatis Scap-  
 tius valet. Vocatae tribus iudicaverunt, agrum publicum  
 populi Romani esse. Nec abnuitur ita fuisse, si ad iudices  
 alios itum foret: nunc haud sane quidquam bono  
 caussae <sup>d)</sup> lavatur <sup>e)</sup> dedecus iudicii. idque non  
 Aricinis Ardeatibusque, quam Patribus Romanis, foe-  
 dius atque acerbius visum. Reliquum anni quietum  
 ab urbanis motibus et ab externis mansit.

d) *bona causa* Gron.

e) *elevatur* Gron. Crev.

---

## EPITOME LIBRI IV.

**L**ex de connubio Patrum et plebis a tribunis plebis contentione magna, Patribus repugnantibus, perlata est. Tribuni militares. Aliquot annis res populi Romani domi militiaeque per hoc genus magistratus administratae sunt 1). Item Censores tunc primum creati sunt 2). Ager Ardeatibus 3) populi Romani iudicio ablati, missis in eum colonis, restitutus est. Quum fame populus Romanus laboraret, Sp. Maelius, eques Romanus, frumentum populo sua impensa largitus est: et, ob id factum conciliata sibi plebe, regnum adfectans a C. Servilio Ahala, magistro equitum, iussu Quinctii Cincinnati dictatoris occisus est: L. Minucius index bove aurata donatus est. Legatis Romanis a Fidenatibus occisis, quoniam ob rempublicam occubuerant, statuæ in Rostris positæ sunt. Cossus Cornelius 4) tribunus militum, occiso Tolumnio rege Veientium, opima spolia secunda 5) retulit. Mam. Aemilius dictator, censuræ honore, qui antea per quinquennium gerebatur, anni et sex mensium spatio finito, ob eam rem a censoribus notatus est. Fidenæ in potestatem redactæ, eoque coloni missi sunt. quibus occisis, Fidenates, quum defecissent 6), a Mam. Aemilio dictatore victi sunt, et Fidenæ captæ. Coniunctio servorum oppressa est 7). Postumius, tribunus militum, propter crudelitatem ab exercitu occisus est. Stipendium ex aerario tum primum militibus datum est. Res præterea gestas adversus 8) Volscos, et 9) Fidenates, et Faliscos continet.

1) sunt del. Gron. Crev.

2) sunt del. Eaed.

3) Ardeatinus Eaed.

4) Cornelius Cossus Eaed.

5) add. Feretrio Eaed.

6) a populo Romano Eaed.

7) est del. Eaed.

8) adversum Eaed.

9) Volscos et Veientes Eaed.

## T. LIVII PATAVINI

## LIBER IV.

U. c. 510. **H**os secuti M. Genucius et C. Curtius consules. Fuit  
 a. C. 442. annus domi forisque infestus. nam anni principio et de  
 connubio Patrum et plebis C. Canuleius tribunus plebis  
 rogationem promulgavit; qua contaminari sanguinem  
 suum Patres, confundique iura gentium rebantur: et  
 mentio, primo sensim inlata a tribunis, ut alterum ex ple-  
 be consulem liceret fieri, eo processit deinde, ut rogatio-  
 nem novem tribuni promulgarent, *ut populo potestas es-*  
*set, seu de plebe, seu de Patribus vellet, consules faciendi.*  
 Id vero si fieret, non vulgari modo cum infimis, sed  
 prorsus auferri a primoribus ad plebem, summum im-  
 perium credebant. Laeti ergo audiere Patres, Arde-  
 atium populum ob iniuriam agri abiudicati descisse,  
 et Veientes depopulatos extrema agri Romani, et Vol-  
 scos Aequosque ob communitam Verruginem fremere.  
 adeo vel infelix bellum ignominiosae paci praefere-  
 bant. His itaque in maius etiam acceptis, ut inter  
 strepitum tot bellorum conticescerent actiones tribu-  
 niciae, delectus haberi, bellum armaque vi summa ad-  
 parari iubent; si quo intentius possit, quam T. Quin-  
 ctio consule adparatum sit. Tum C. Canuleius pauca  
 in senatu vociferatus, *nequidquam territando consules*  
*avertere plebem a cura novarum legum; numquam eos*  
*se vivo delectum habituros, antequam ea, quae promul-*  
*gata ab se collegisque essent, plebes scivisset; et* <sup>a)</sup> *con-*  
 festim ad concionem advocavit.

a) et del. Gron. Crev.



II. Eodem tempore et consules senatum in tri-  
 bunum, et tribunus populum in consules incitabat. U. c. 510.  
a. C. 442.  
 Negabant consules, iam ultra ferri posse furores tribu-  
 nicios. ventum iam ad finem esse; domi plus belli con-  
 citari, quam foris. Id adeo non plebis, quam Patrum;  
 neque tribunorum magis, quam consulum, culpa acci-  
 dere. cuius rei praemium sit in civitate, eam maximis  
 semper auctibus crescere: sic pace bonos, sic bello fieri.  
 Maximum Romae praemium seditionum esse: id et sin-  
 gulis universisque semper honori fuisse. Reminisceren-  
 tur, quam maiestatem senatus ipsi a patribus accepissent,  
 quam liberis tradituri essent; ut, quemadmodum plebs,  
 gloriari possent <sup>b)</sup>, auctiorem amplioremque esse. Fi-  
 nem ergo non fieri, nec futuram, donec, quam feli-  
 seditiones, tam honorati seditionum auctores es-  
 sent. Quas quantasque res C. Canuleium adgres-  
 sum? conlusionem gentium, perturbationem auspicio-  
 rum publicorum privatorumque adferre, ne quid sinceri,  
 ne quid incontaminati sit: ut, discrimine omni sub-  
 lato, nec se quisquam, nec suos noverit. Quam enim  
 aliam vim connubia promiscua habere, nisi ut ferarum  
 prope ritu vulgentur concubitus plebis Patrumque? ut,  
 qui natus sit, ignoret, cuius sanguinis, quorum sacro-  
 rum sit; dimidius Patrum sit, dimidius plebis, ne secum  
 quidem ipse concors. Parum id videri, quod omnia  
 divina humanaque turbentur: iam ad consulatum vul-  
 gi turbatores adcingi; et primo, ut alter consul ex plebe fie-  
 ret, id modo sermonibus tentasse: nunc rogari, ut, seu ex Pa-  
 trius, seu ex plebe velit, populus consules creet: et creaturos  
 haud dubie ex plebe seditiosissimum quemque. Canuleios  
 igitur Iciliosque consules fore. ne id Iupiter optimus ma-  
 ximus sineret, regiae maiestatis imperium eo recidere: et se  
 millies morituros potius, quam ut tantum dedecoris ad-  
 mitti patiantur. Certum habere, maiores quoque, si di-

b) ut, quemadmodum plebs Eaed. c. Drak.  
 gloriari posset, auctiorem etc.

U. c. 310. *vinassent, concedendo omnia non mitiorem in se plebem,*  
 a. C. 442. *sed asperiores alia ex aliis iniquiora postulando, quum*  
*prima inpetrassent, futuram, primo quamlibet dimica-*  
*tionem subituros fuisse potius, quam eas leges sibi in-*  
*poni paterentur. quia tum concessum sit de tribunis,*  
*iterum concessum esse. Finem non fieri. non posse<sup>c)</sup>*  
*in eadem civitate tribunos plebis et Patres esse; aut*  
*hunc ordinem, aut illum magistratum tollendum esse:*  
*potiusque sero, quam numquam obviam eundum au-*  
*daciae temeritatique. Illine ut inpune primo discordias*  
*serentes concitent finitima bella, deinde adversus ea, quae*  
*concitaverint, armari civitatem defendique prohibeant?*  
*et, quum hostes tantum non arcessierint, exercitus con-*  
*scribi adversus hostes non patiantur? Sed audeat Ca-*  
*nuleius in senatu proloqui, se, nisi suas leges tamquam*  
*victoris Patres accipi sinant, delectum haberi prohibi-*  
*turum. quid esse aliud, quam minari, se proditurum*  
*patriam? obpugnari atque capi passurum? quid eam*  
*vocem animorum, non plebi Romanae, sed Volscis et*  
*Aequis et Veientibus adlaturam? Nonne, Canuleio duce,*  
*se speraturos Capitolium atque arcem scandere posse,*  
*si Patribus tribuni, cum iure ac maiestate adempta, ani-*  
*mos etiam eripuerint? Consules paratos esse duces prius*  
*adversus scelus civium, quam adversus hostium arma.*

III. Quum maxime haec in senatu agerentur,  
 Canuleius pro legibus suis et adversus consules ita  
 disseruit: *Quantopere vos, Quirites, contemnerent Pa-*  
*tres, quam indignos ducerent, qui una secum urbe in-*  
*tra eadem moenia viveretis, saepe equidem et ante vide-*  
*or animadvertisse; nunc tamen maxime, quod adeo atro-*  
*ces in has rogationes nostras coorti sunt: quibus quid*  
*aliud quam admonemus, cives nos eorum esse, et, si*  
*non easdem opes habere, eandem tamen patriam inco-*  
*lere? Altera connubium petimus, quod finitimis externis-*  
*que dari solet. nos quidem civitatem, quae plus quam*  
*connubium est, hostibus etiam victis dedimus. Altera*  
 c) *finem non fieri posse. in eadem etc. Gron. Crev. c. Drak.*

*nihil novi ferimus; sed id, quod populi est, repetimus* U. c. 310.  
*atque usurpamus ut, quibus velit, populus Romanus* a. C. 442.  
*honores mandet. Quid tandem est, cur coelum ac terras misceant? cur in me inpetus modo pene in senatu sit factus? negent se manibus temperaturos, violaturosque denuncient sacrosanctam potestatem? Si populo Romano liberum suffragium datur, ut, quibus velit, consulatum mandet, et non praeciditur spes plebeio quoque, si dignus summo honore erit, apiscendi summi honoris, stare urbs haec non poterit? de imperio actum est? et perinde hoc valet, plebeiusne<sup>d)</sup> consul fiat, tamquam servum aut libertinum aliquis consulem futurum dicat? Ecquid sentitis, in quanto contemptu vivatis? Lucis vobis huius partem, si liceat, adimant. quod spiratis, quod vocem mittitis, quod formas hominum habetis, indignantur. Quin etiam (si Diis placet) nefas aiunt esse, consulem plebeium fieri. Obsecro vos, si non ad fastos, non ad commentarios pontificum admittimur; ne ea quidem scimus, quae omnes peregrini etiam sciunt? consules in locum regum successisse? nec aut iuris, aut maiestatis quidquam habere, quod non in regibus ante fuerit? En umquam creditis fando auditum esse, Numam Pompili-um, non modo non patricium, sed ne civem quidem Romanum, ex Sabino agro adcitum, populi iussu, Patribus auctoribus, Romae regnasse? L. deinde Tarquinius, non Romanae modo<sup>e)</sup>, sed ne Italicae quidem gentis, Damarati<sup>f)</sup> Corinthii filium, incolam ab Tarquiniis, vivis liberis Anci, regem factum? Ser. Tullium post hunc, captiva Corniculana natum, patre nullo, matre serva, ingenio, virtute regnum tenuisse? Quid enim de T. Tatius Sabino dicam, quem ipse Romulus, parens urbis, in societatem regni accepit? Ergo, dum nullum fastiditur genus, in quo eniteret virtus, crevit imperium Romanum. Poeniteat nunc vos plebei consulis, quum maiores nostri advenas reges non fastidierint, et*

d) plebeius ne Gron. c. Drak. Crev.

e) non modo Romanae Cron. f) Demarati Crev.

U. c. 310. *ne regibus quidem exactis clausa urbs fuerit peregrinae*  
 a. C. 442. *virtuti. Claudiam certe gentem post reges exactos ex*  
*Sabinis non in civitatem modo accepimus, sed etiam in*  
*patriciorum numerum? Ex peregrinone patricius, dein-*  
*de consul fiat? civis Romanus si sit ex plebe, praecisa*  
*consulatus spes erit? Utrum tandem non credimus fieri*  
*posse, ut vir fortis ac strenuus, pace belloque bonus, ex*  
*plebe, sit Numae, L. Tarquinio, Ser. Tullio similis?*  
*An ne, si sit, quidem ad gubernacula reipublicae acce-*  
*dere eum patiemur? potiusque decemviris, teterrimis*<sup>s)</sup>  
*mortalium, qui tum omnes ex Patribus erant, quam optimis*  
*regum novis hominibus, similes consules sumus habituri?*

IV. *At enim nemo post reges exactos de plebe con-*  
*sul fuit. Quid postea? Nullane res nova institui de-*  
*bet? et, quod nondum est factum (multa enim nondum*  
*sunt facta in novo populo) ea, ne si utilia quidem sint,*  
*fieri oportet? Pontifices, augures, Romulo regnante,*  
*nulli erant: ab Numa Pompilio creati sunt. census*  
*in civitate et descriptio centuriarum classiumque non*  
*erat: ab Ser. Tullio est facta. Consules numquam fu-*  
*erant: regibus exactis creati sunt. Dictatoris nec im-*  
*perium nec nomen fuerat: apud patres esse coepit. Tri-*  
*buni plebis, aediles, quaestores, nullierant: institutum*  
*est, ut fierent. Decemviros legibus scribendis intra de-*  
*cem hos annos et creavimus, et e republica sustulimus.*  
*Quis dubitat, quin, in aeternum urbe condita, in*<sup>h)</sup>  
*imensum crescente, nova imperia, sacerdotia, iura gen-*  
*tium hominumque instituantur? Hoc ipsum, ne connu-*  
*bium Patribus cum plebe esset, non decemviri tulerunt*  
*paucis his annis pessimo exemplo publico, cum summa*  
*iniuria plebis? An esse ulla maior aut insignitior*<sup>i)</sup>  
*contumelia potest, quam partem civitatis, velut con-*  
*taminatam, indignam connubio haberi? Quid est ali-*  
*ud, quam exsilium intra eadem moenia, quam relegatio-*  
*nem pati? Ne adfinitatibus, ne propinquitatibus inmi-*

g) deterrimis Gron. Crev.

i) insignior. Gron. Crev.

h) et in Crev.



*sceamur, cavent; ne societur sanguis. Quid? hoc si* U. c. 310.  
*polluit nobilitatem istam vestram, quam plerique ori-* a. C. 442.  
*undi ex Albanis et Sabinis, non genere nec sanguine,*  
*sed per cooptationem in Patres habetis, aut ab regibus*  
*lecti, aut post reges exactos iussu populi; sinceram ser-*  
*vare privatis consiliis non poteratís, nec ducendo ex plebe,*  
*neque vestras filias sororesque enubere sinendo e Patri-*  
*bus? Nemo plebeius patriciae virgini vim adferret: pa-*  
*tricioꝝ ista libido est. nemo invitum pactionem*  
*nuptialem quemquam facere coegisset. Verum enim*  
*vero lege id prohiberi, et connubium tolli Patrum ac*  
*plebis, id demum contumeliosum plebi est. cur enim non*  
*consertis, ne sit connubium divitibus ac pauperibus?*  
*Quod privatorum consiliorum ubique semper fuit, ut, in*  
*quam cuique feminae convenisset domum, nuberet; ex qua*  
*pactus esset vir domo, in matrimonium duceret; id vos*  
*sub legis superbissimae vincula conicitis, qua dirimatis*  
*societatem civilem duasque ex una civitate faciatis. Cur*  
*non sancitis, ne vicinus patricio sit plebeius? ne eodem*  
*itinere eat? ne idem convivium ineat? ne in foro eodem*  
*consistat? Quid enim in re est aliud, si plebeiam patri-*  
*cium duxerit, si patriciam plebeius? quid iuris tandem*  
*mutatur? nempe patrem sequuntur liberi. nec, quod nos*  
*ex connubio vestro petamus, quidquam est, praeterquam*  
*ut hominum, ut civium numero simus. nec, vos (nisi in*  
*contumeliam ignominiamque nostram certare iuvat) quod*  
*contendatis, quidquam est.*

V. Denique utrum tandem populi Romani, an ve-  
 strum summum imperium est? Regibus exactis, utrum  
 vobis dominatio, an omnibus aequa libertas parta est?  
 Oportet licere populo Romano, si velit, iubere legem. an,  
 ut quaeque rogatio promulgata erit, vos delectum pro  
 poena decernetis? et, simul ego tribunus vocare tribus  
 in suffragium coepero; tu statim consul sacramento iu-  
 niores adiges, et in castra educes? et minaberis plebi,  
 minaberis tribuno? Quid, si non, quantum istae mi-  
 nae adversus plebis consensum valerent, bis iam experti

U. c. 310. *essetis? scilicet, quia nobis consultum volebatis, scerta-*  
 a. C. 442. *mine abstinuistis. an ideo non est dimicatum, quo<sup>l</sup>,  
 quae pars firmior, eadem modestior fui? Nec nunc  
 erit certamen, Quirites. animos vestros illi tentabunt  
 semper, vires non experientur. Itaque ad bella ista,  
 seu falsa, seu vera sunt, consules, parata vobis plebes  
 est, si, connubiis redditis, unam hanc civitatem tan-  
 dem facitis; si coalescere, si iungi miscerique vobis  
 privatis necessitudinibus possunt; si spes, si aditus ad  
 honores viris strenuis et fortibus datur; si in consortio,  
 si in societate reipublicae esse, si, quod aequae liberta-  
 tis est, in vicem annuis magistratibus parere atque im-  
 peritare licet. Si haec impedit aliquis, ferte sermonibus,  
 et multiplicata fama bella; nemo est nomen daturus, nemo  
 arma capturus, nemo dimicaturus pro superbis dominis,  
 cum quibus nec in re publica honorum, neque in privata  
 connubii societas est.*

VI. Quum in concionem et consules processis-  
 sent, et res a perpetuis orationibus in altercationem  
 vertisset; interroganti tribuno, *cur plebeium consu-*  
*lem fieri non oporteret?* ut fortasse vere, sic parum  
 utiliter in praesens certamen respondit, *quod nemo*  
*plebeius auspicia haberet. ideoque decemviros connu-*  
*bium diremisse, ne incerta prole auspicia turbarentur.*  
 Plebes ad id maxime indignatione exarsit, quod au-  
 spicari, tamquam invisi Diis immortalibus, negaren-  
 tur posse. nec ante finis contentionum fuit, (quum et  
 tribunum acerrimum auctorem plebes<sup>k</sup>) nacta esset,  
 et ipsa cum eo pertinacia certaret) quam victi tandem  
 Patres, ut de connubio ferretur, consensere: ita  
 maxime rati contentionem de plebeiis consulibus tri-  
 bunos aut totam deposituros, aut post bellum dilatu-  
 ros esse; contentamque interim connubio plebem pa-  
 ratam delectui fore. Quum Canuleius victoria de  
 Patribus et plebis favore ingens esset, accensi alii  
 tribuni ad certamen pro rogatione sua summa vi pug-  
<sup>k</sup>) plebs Gron. Crev.

nant, et, crescente in dies fama belli, delectum in-<sup>U. c. 310.</sup>  
pediunt. Consules, quum per senatum, interceden-<sup>a. C. 412.</sup>  
tibus tribunis, nihil agi posset, consilia principum  
domi habebant. adparebat, aut hostibus, aut civibus  
de victoria concedendum esse. Soli ex consularibus  
Valerius atque Horatius non intererant consiliis. C.  
Claudii sententia consules armabat in tribunos:  
Quinctiorum, Cincinnatique et Capitolini, sententiae  
abhorrebant a caede violandisque, quos, foedere  
icto cum plebe, sacrosantos accepissent. Per haec  
consilia eo deducta res est, ut tribunos militum con-  
sulari potestate promiscue ex Patribus ac plebe creari  
sinerent; de consulibus creandis nihil mutaretur.  
eoque contenti tribuni, contenta plebs fuit. Comi-  
tia tribunis consulari potestate tribus creandis indi-  
cuntur. quibus indictis, extemplo, quicumque aliquid  
seditiose dixerat, aut fecerat, quam maxime tribu-  
nicii, et prensare homines, et concursare toto foro  
candidati coepere: ut patricos desperatio primo, ir-  
ritata plebe, adipiscendi honoris, deinde indignatio,  
si cum his gerendus esset honos, deterreret. postre-  
mo coacti tamen a primoribus petiere, ne cessasse  
possessione reipublicae viderentur. Eventus eorum  
comitiorum docuit, alios animos in contentione li-  
bertatis dignitatisque, alios, secundum deposita cer-  
tamina, incorrupto iudicio esse: tribunos enim omnes  
patricos creavit populus, contentus eo, quod ratio  
habita plebeiorum esset. Hanc modestiam aequita-  
temque et altitudinem animi ubi nunc in uno inve-  
neris, quae tum <sup>1)</sup> populi universi fuit?

VII. Anno trecentesimo decimo, quam urbs Ro-<sup>U. c. 311.</sup>  
ma condita erat, primum tribuni militum pro con-<sup>a. C. 411.</sup>  
sularibus magistratum ineunt, A. Sempronius Atrati-  
nus, L. Atilius, T. Cloelius <sup>m)</sup>; quorum in magi-  
stratu concordia domi pacem etiam foris praebuit.  
Sunt, qui propter adiectum Aequorum Volscorumque

1) tunc Gron. Crev.

m) Caecilius Eaed. c. Drak.

U. c. 511. bello et Ardeatium defectioni Veiens bellum, quia  
 a. C. 441. duo consules obire tot simul bella nequirent, tribunos militum tres creatos dicant, sine mentione promulgatae legis de consulibus creandis ex plebe, et imperio et insignibus consularibus usos. Non tamen pro firmato iam stetit magistratus eius ius; quia tertio mense, quam inierunt, augurum decreto, perinde ac vitio creati, honore abiere; quod C. Curtius, qui comitiis eorum praefuerat, parum recte tabernaculum cepisset. Legati ab Ardea Romam venerunt, ita de iniuria querentes, ut, si demeretur ea, in foedere atque amicitia mansuros, restituto agro, adpareret. Ab senatu responsum est, *iudicium populi rescindi ab senatu non posse, praeterquam quod nullo nec exemplo nec iure fieret, concordiae etiam ordinum caussa. Si Ardeates sua tempora expectare velint, arbitriumque senatui levandae iniuriae suae permittant, fore, ut postmodo<sup>n)</sup> gaudeant, se irae moderatos; sciantque, Patribus aequae curae fuisse, ne qua iniuria in eos oriretur, ac ne orta diuturna esset.* Ita legati, quum se rem integram relatueros dixissent, comiter dimissi. Patricii, quum sine curuli magistratu publica esset, coire, et interregem creavere. contentio, consulesne, an tribuni militum crearentur, in interregno rem dies complures tenuit. Interrex ac senatus, consulum comitia; tribuni plebis et plebs, tribunorum militum ut habeantur, tendunt. Vicerunt Patres, quia et plebs, patriciis seu hunc seu illum delatura honorem, frustra certare supersedit: et principes plebis ea comitia malebant, quibus non haberetur ratio sui, quam quibus ut indigni praeterirentur. tribuni quoque plebis certamen sine effectu in beneficio apud primores Patrum reliquere. T. Quinctius Barbatus interrex consules creat L. Papirium Mugillanum, L. Sempronium Atratinum. His consulibus cum Ardeatibus foedus renovatum est. id-

<sup>n)</sup> *postmodum* Gron. Crev.



que monumenti est, consules eos illo anno fuisse, qui U. c. 311.  
neque in annalibus priscis, neque in libris magistra- a. C. 441.  
tuum inveniuntur. credo, quod tribuni militum in-  
itio anni fuerunt, eo, perinde ac si totum annum in  
imperio fuerint, subfectis his consulibus, praeter-  
missa nomina consulum horum. Licinius Macer auc-  
tor est, et in foedere Ardeatino, et in linteis libris  
ad Monetae inventa. Et foris, quum tot terrores a  
finitimis ostentati essent, et domi otium fuit.

VIII. Hunc annum (seu tribunos modo, seu tri- U. c. 312.  
bunis subfectos consules quoque habuit) sequitur an- a. C. 440.  
nus haud dubiis consulibus, M. Geganio Macerino  
iterum, T. Quinctio Capitolino quintum consulibus.  
Idem hic annus censurae initium fuit, rei a parva  
origine ortae: quae deinde tanto incremento aucta  
est, ut morum disciplinaeque Romanae penes eam  
regimen, senatus, equitumque centuriae, decoris de-  
decorisque discrimen sub ditione eius magistratus,  
publicorum ius privatorumque locorum °), vectigalia  
populi Romani sub nutu atque arbitrio essent. Or-  
tum autem initium rei est, quod in populo, per mul-  
tos annos incenso, neque differri census poterat, ne-  
que consulibus, quum tot populorum bella immine-  
rent, operae erat id negotium agere. Mentio inlata  
ab senatu est, *Rem operosam ac minime consularem suo  
proprio magistratu egere: cui scribarum ministerium,  
custodiaeque et tabularum cura, cui arbitrium formu-  
lae censendi subiiceretur.* Et Patres, quamquam rem  
parvam, tamen, quo plures patricii magistratus in  
republica essent, laeti acceperunt: id, quod evenit,  
futurum credo etiam rati, ut mox opes eorum, qui  
praessent, ipsi honori ius maiestatemque adicerent.  
Et tribuni, (id quod tunc erat) magis necessariam,  
quam speciosi ministerii procuracionem intuentes, ne  
in parvis quoque rebus incommode adversarentur,

o) add. et Gron.

U. c. 312. haud sane tetendere. Quum a primoribus civitatis  
 a. C. 440. spretus honor esset, Papirium Semproniumque, quorum de consulatu dubitatur <sup>q)</sup>, ut eo magistratu parum solidum consulatum explerent, censui agendo populus suffragiis praefecit. Censores ab re adpelati sunt.

IX. Dum haec Romae geruntur, legati ab Ardea veniunt, pro veterrima societate renovatoque foedere recenti, auxilium prope eversae urbi implorantes. Frui namque pace, optimo consilio cum populo Romano servata, per intestina arma non licuit; quorum caussa atque initium traditur ex certamine factionum ortum: quae fuere eruntque pluribus populis magis exitio, quam bella externa, quam fames morbive, quaeque alia in Deum iras, velut ultima publicorum malorum, vertunt. Virginem plebei generis, maxime forma notam, petiere iuvenes: alter virgini genere par, tutoribus fretus, qui et ipsi eiusdem corporis erant; nobilis alter, nulla re, praeterquam forma, captus. adiuvabant eum optimatium studia, per quae in domum quoque puellae certamen partium penetravit. nobilis superior iudicio matris esse, quae quam splendidissimis nuptiis iungi puellam volebat. tutores, in ea quoque re partium memores, ad suum tendere. Quum res peragi intra parietes nequisset, ventum in ius est. postulatu audito matris tutorumque, magistratus secundum parentis arbitrium dant ius nuptiarum. sed vis potentior fuit. namque tutores, inter suae partis homines de iniuria decreti palam in foro concionati, manu facta virginem ex domo matris rapiunt. adversus quos infestior coorta optimatium acies sequitur accensum iniuria iuvenem. fit proelium atrox. Pulsa plebs, nihil Romanae plebi similis, armata ex urbe profecta, colle quodam capto, in agros optimatium cum ferro

ignique excursions facit. urbem quoque, omnis etiam expertem ante certaminis, multitudine opificum ad spem praedae evocata, obsidere parat. nec ulla species cladesque belli abest; velut contacta civitate rabie duorum iuvenum, funestas nuptias ex occasu patriae petentium. Parum parti utrique domi armorum bellicae est visum. optimates Romanos ad auxilium urbis obsessae, plebs ad expugnandam secum Ardeam Volscos excivere <sup>q)</sup>. Priores Volsci, duce Aequo Cloelio <sup>r)</sup>, Ardeam venerunt <sup>s)</sup>, et moenibus hostium vallum obiecere. Quod ubi Romam est nuntiatum, extemplo M. Geganus consul, cum exercitu profectus, tria millia passuum ab hoste locum castris cepit, praecipitque iam die curare corpora milites iubet. quarta deinde vigilia signa profert: coeptumque opus adeo adproperatum est, ut, sole orto, Volsci firmiore se munimento ab Romanis circumvallatos, quam a se urbem, viderent. et alia parte consul muro Ardae brachium iniunxerat; qua ex oppido sui commeare possent.

X. Volscus imperator, qui ad eam diem, non commeatu praeparato, sed ex populatione agrorum rapto in diem frumento aluisset militem, postquam septus vallo repente inopem omnium rerum videt, ad colloquium consule evocato, *si solvendae obsidionis causa venerit Romanus, abducturum se inde Volscos*, ait. Adversus ea consul, *victis conditiones accipiendas esse, non ferendas*, respondit; *neque, ut venerint ad obpugnandos socios populi Romani suo arbitrio, ita abituros Volscos esse. Dedi imperatorem, arma poni*, iubet, *fatentes victos se esse, et <sup>t)</sup> imperio parere. aliter, tam abeuntibus, quam manentibus, se hostem infensum, victoriam potius ex Volscis, quam pacem infidam, Romam relaturum*. Volsci exiguum spem in ar-

q) excitare Gron.

r) Cluilio Gron. Crev.

s) venerant Gron. venerunt Crev.

t) et del. Crev.

U. c. 312. mis, alia undique abscissa, quum tentassent, prae-  
 a. C. 442. ter cetera adversa loco quoque iniquo ad pugnam con-  
 gressi, iniquiore ad fugam, quum ab omni parte cae-  
 derentur, ad preces a certamine versi, dedito impe-  
 ratore traditisque armis, sub iugum missi, cum sin-  
 gulis vestimentis ignominiae cladisque pleni dimit-  
 tuntur. et, quum haud procul urbe Tusculo conse-  
 dissent, vetere Tusculanorum odio inermes oppressi  
 dederunt poenas, vix nunciis caedis relictis. Roma-  
 nus <sup>u)</sup> Ardeae turbatas seditione res, principibus eius  
 motus securi percussis, bonisque eorum in publicum  
 Ardeatium redactis, composuit: demtamque iniuriam  
 iudicii tanto beneficio populi Romani Ardeates crede-  
 bant; senatui superesse aliquid ad delendum publicae  
 avaritiae monumentum videbatur. Consul trium-  
 phans in urbem redit, Cloelio duce Volscorum <sup>x)</sup> an-  
 te currum ducto, praelatisque spoliis, quibus dear-  
 matum exercitum hostium sub iugum miserat. Ae-  
 quavit, quod haud facile est, Quinctius consul toga-  
 tus armati gloriam collegae: quia <sup>y)</sup> concordiae pa-  
 cisque domesticam curam, iura infimis summisque  
 moderando, ita tenuit, ut eum et Patres severum  
 consulem, et plebs satis comem crediderint. Et ad-  
 versus tribunos auctoritate plura, quam certamine,  
 tenuit. quinque consulatus, eodem tenore gesti, vi-  
 taque omnis, consulariter acta, verendum pene ipsum  
 magis, quam honorem, faciebant. eo tribunorum mi-  
 litarium nulla mentio his consulibus fuit.

U. c. 313. XI. Consules creant M. Fabium Vibulanum,  
 a. C. 439. Postumum Aebutium Cornicinem. Fabius et Aebu-  
 tius consules, quo maiori gloriae rerum domi foris-  
 que gestarum, succedere se cernebant, (maxime au-  
 tem memorabilem annum apud finitimos socios hos-  
 tesque esse, quod Ardeatibus in re praecipiti tanta  
 foret cura subventum) eo impensius, ut delerent pror-

u) add. Consul Gron.

duce Gron. Crev.

x) rediit, Cloelio Volscorum

y) qui Crev.



sus ex animis hominum infamiam iudicii, senatus-U. c. 313.  
consultum fecerunt; ut, quoniam civitas Ardeatium<sup>a</sup> C. 439.  
intestino tumultu redacta ad paucos esset, coloni eo  
praesidii caussa adversus Volscos scriberentur. Hoc  
palam relatum in tabulas, ut plebem tribunosque fal-  
leret iudicii rescindendi consilium initum. Consen-  
serant autem, ut, multo maiore parte Rutulorum co-  
lonorum, quam Romanorum, scripta, nec ager ullus  
divideretur, nisi is, qui interceptus iudicio infami  
erat; nec ulli prius Romano ibi, quam omnibus Ru-  
tulis divisus esset, gleba ulla agri adsignaretur. Sic  
ager ad Ardeates rediit. Triumviri ad coloniam Ar-  
deam deducendam creati Agrippa Menenius, T.  
Cloelius Siculus, M. Aebutius Elva. qui, per mini-  
me populare ministerium agro adsignando sociis, quem  
populus Romanus suum iudicasset, quum plebem of-  
fendissent, ne primoribus quidem Patrum satis ac-  
cepti, quod nihil gratiae cuiusquam dederant; vexa-  
tiones, ad populum iam die dicta ab tribunis, colo-  
ni<sup>z</sup>) adscripti remanendo in colonia, quam testem  
integritatis iustitiaeque habebant, vitavere.

XII. Pax domi forisque fuit et hoc et insequente<sup>a</sup>) U. c. 314.  
anno, C. Furio Pacilo et M. Papirio Crasso consuli-<sup>a</sup> C. 438.  
bus. Ludi, ab decemviris per secessionem plebis a  
Patribus ex senatusconsulto voti, eo anno facti sunt.  
Causa seditionum nequidquam a Poetelio<sup>b</sup>) quaesi-  
ta. qui, tribunus plebis iterum ea ipsa denunciando  
factus, neque, ut de agris dividendis plebi referrent  
consules ad senatum, pervincere potuit: et, quum  
magno certamine obtinuisset, ut consulerentur Patres,  
consulum an tribunorum placeret comitia haberi, con-  
sules creari iussi sunt. ludibrioque erant minae tribu-  
ni, denunciantis se delectum inpediturum; quum,  
quietis finitimis, neque bello, neque belli adparatu  
opus esset. Sequitur hanc tranquillitatem rerum an-

z) colonis Gron.

b) Petillio Gron. Petilio

a) insequenti Gron. Crev.

Crev.

U. c. 315. nus, Proculo Geganio Macerino, L. Menenio Lana-  
 a. C. 437. to consulibus, multiplici clade ac periculo insignis,  
 seditionibus, fame, regno prope per largitionis dul-  
 cedinem in cervices accepto. Unum afuit bellum ex-  
 ternum: quo si adgravatae res essent, vix ope Deo-  
 rum omnium resisti <sup>c)</sup> potuisset. Coepere a fame  
 mala, seu adversus annus frugibus fuit, seu dulce-  
 dine concionum et urbis deserto agrorum cultu. nam  
 utrumque traditur. et Patres plebem desidem, et tri-  
 buni plebis nunc fraudem nunc negligentiam consu-  
 lum accusabant. Postremo perpulere plebei, haud  
 adversante senatu, ut L. Minucius praefectus anno-  
 nae crearetur; felicius in eo magistratu ad custodiam  
 libertatis futurus, quam ad curationem ministerii sui:  
 quamquam postremo annonae quoque levatae haud  
 inmeritam et gratiam et gloriam tulit. Qui quum,  
 multis circa finitimos populos legationibus terra ma-  
 rique nequidquam missis, (nisi quod ex Etruria haud  
 ita multum frumenti advectum est) nullum momen-  
 tum annonae fecisset; et, revolutus ad dispensatio-  
 nem inopiae, profiteri cogendo frumentum, et ven-  
 dere, quod usu <sup>d)</sup> menstruo superesset, fraudando-  
 que parte diurni cibi servitia, criminando inde et ob-  
 iiciendo irae populi frumentarios, acerba inquisitione  
 aperiret magis, quam levaret, inopiam; multi ex  
 plebe, spe amissa, potius quam ut cruciarentur tra-  
 hendo animam, capitibus obvolutis se in Tiberim  
 praecipitaverunt.

XIII. Tum Sp. Maelius ex equestri ordine, ut  
 illis temporibus, praedives, rem utilem, pessimo ex-  
 emplo, peiore consilio, est adgressus. Frumento  
 namque ex Etruria privata pecunia per hospitem clien-  
 tiumque ministeria coempto, (quae, credo, ipsa res  
 ad levandam publica cura annonam impedimento fue-  
 rat) largitiones frumenti facere instituit: plebemque,

c) *sisti* Gron. Crev.

d) *usui* Eaed.

hoc munere delinitam, quacumque incederet, con-<sup>U. c. 315.</sup>  
 spectus elatusque supra modum hominis privati, se-<sup>a. C. 437.</sup>  
 cum trahere; haud dubium consulatum favore ac spe  
 despondentem. Ipse, ut est humanus animus insa-  
 tiabilis eo, quod fortuna spondet, ad altiora et non  
 concessa tendere. et, quoniam consulatus quoque  
 eripiendus invitis Patribus esset, de regno agitare:  
 id unum dignum tanto adparatu consiliorum et certa-  
 mine, quod ingens exsudandum esset, praemium fo-  
 re. Iam comitia consularia instabant. quae res eum,  
 necdum compositis maturisve satis consiliis, obpres-  
 sit. Consul sextum creatus T. Quinctius Capitolinus,<sup>U. c. 316.</sup>  
 minime opportunus vir novanti res: collega additur<sup>a. C. 436.</sup>  
 ei Agrippa Menenius, cui Lanato erat cognomen. et  
 L. Minucius praefectus annonae, seu refectus, seu,  
 quoad res posceret, in incertum creatus. nihil enim  
 constat, nisi in libros linteos utroque anno relatum  
 inter magistratus praefecti nomen. Hic Minucius,  
 eandem publice curationem agens, quam Maelius  
 privatim agendam susceperat, quum in utraque domo  
 genus idem hominum versaretur, rem compertam ad  
 senatum refert, *Tela in domum Maelii conferri, eum-  
 que conciones domi habere: ac non dubia regni consilia  
 esse. tempus agenda rei nondum stare; cetera iam con-  
 venisse; et tribunos mercede emptos ad prodendam liber-  
 tatem, et partita ducibus multitudinis ministeria esse.  
 Serius se pene, quam tutum fuerit, ne cuius incerti va-  
 nique auctor esset, ea deferre.* Quae postquam sunt  
 audita, et undique primores Patrum et prioris anni  
 consules increpant, quod eas largitiones coetusque  
 plebis in privata domo passi essent fieri, et novos  
 consules, quod exspectassent, donec a praefecto an-  
 nonae tanta res ad senatum deferretur, quae consu-  
 lem non auctorem solum desideraret, sed etiam vin-  
 dicem; tum T. Quinctius, *consules inmerito increpa-  
 ri, ait, qui, constricti legibus de provocatione ad dis-  
 solvendum imperium latis, nequaquam tantum virum*

U. c. 316. *in magistratu ad eam rem pro atrocitate vindicandam;*  
 a. C. 456. *quantum animi, haberent. opus esse non forti solum viro, sed etiam libero exsolutoque legum vinculis. Itaque se dictatorem L. Quinctium dicturum. ibi animum parem tantae potestati esse. Adprobantibus cunctis, primo Quinctius abnuere: et, quid sibi vellent, rogitare, qui se aetate exacta tantae dimicationi obicerent. Dein, quum undique plus in illo senili animo non consilii modo, sed etiam virtutis esse, quam in omnibus aliis dicerent, laudibusque haud inmeritis onerarent, et consul nihil remitteret; precatus tandem Deos immortales Cincinnatus, ne senectus sua in tam trepidis rebus damno dedecorive reipublicae esset, dictator a consule dicitur. ipse deinde C. Servilium Ahalam magistrum equitum dicit.*

XIV. Postero die, dispositis praesidiis, quum in forum descendisset, conversaque in eum plebs novitate rei ac miraculo esset, et Maeliani atque ipse dux eorum in se intentam vim tanti imperii cernebant; expertes consiliorum regni, *qui tumultus, quod bellum repens, aut dictatoriam maiestatem, aut Quinctium post octogesimum annum rectorem reipublicae quaesisset*, rogarent; missus ab dictatore Servilius magister equitum ad Maelium, *Vocat te*, inquit, *dictator.* Quum pavidus ille, *quid vellet*, quaereret; Serviliusque *causam dicendam esse* proponeret, *crimenque, a Minucio delatum ad senatum, diluendum;* tunc Maelius recipere se in catervam suorum, et primum circumspectans tergiversari: postremo, quum adparitor iussu magistri equitum duceret, ereptus a circumstantibus, fugiensque, fidem plebis Romanae implorare: et obprimi se consensu Patrum dicere, quod plebi benigne fecisset: orare, ut opem sibi ultimo in discrimine ferrent, neve ante oculos suos trucidari sinerent. Haec eum vociferantem adsecutus Ahala Servilius obtruncat: respersusque cruore obtruncati, stipatus caterva patriciorum iuvenum, di-



ctatori renunciat, vocatum ad eum Maelium, repul-<sup>U. c. 316.</sup>  
so adparitore concitantem multitudinem, poenam<sup>a. C. 436.</sup>  
meritam habere. Tum dictator, *Macte virtute*, in-  
quit, *C. Servili, esto, liberata republica.*

XV. Tumultuantem deinde multitudinem incerta  
existimatione facti ad concionem vocari iussit; et,  
*Maelium iure caesum*, pronunciavit, *etiam si regni*  
*crimine insons fuerit; qui vocatus a magistro equitum*  
*ad dictatorem non venisset. Se ad caussam cognoscen-*  
*dam consedissee; qua cognita, habiturum fuisse Mae-*  
*lium similem caussae fortunam. Vimparantem, ne iu-*  
*dicio se committeret, vi coercitum esse. nec cum eo,*  
*tamquam cum cive, agendum fuisse; qui natus in li-*  
*bero populo inter iura legesque, ex qua urbe reges exa-*  
*ctos sciret, eodemque anno sororis filios regis, et liberos*  
*consulis liberatoris patriae, propter pactionem indica-*  
*tam recipiendorum in urbem regum, a patre securi esse*  
*percussos; ex qua Collatinum Tarquinium consulem no-*  
*minis odio abdicare se magistratu atque exulare ius-*  
*sum; in qua de Sp. Cassio, post aliquot annos, pro-*  
*pter consilia inita de regno supplicium sumtum; in qua*  
*nuper decemviros bonis, exsilio, capite multatos, ob*  
*superbiam regiam, in ea Sp. Maelius spem regni con-*  
*ceperit. Et quis homo? quamquam nullam nobilita-*  
*tem, nullos honores, nulla merita cuiquam ad domina-*  
*tionem pandere viam; sed tamen Claudios, Cassios,*  
*consulatibus, decemviratibus, suis maiorumque hono-*  
*ribus, splendore familiarum sustulisse animos, quo ne-*  
*fas fuerit: Sp. Maelium, cui tribunatus plebis magis*  
*optandus, quam sperandus, fuerit, frumentarium di-*  
*vitem, bilibris farris sperasse libertatem se civium suo-*  
*rum emissee, ciboque obiciendo ratum victorem finitimo-*  
*rum omnium populum in servitutem perlici posse: ut,*  
*quem senatorem concoquere civitas vix posset, regem*  
*ferret, Romuli conditoris, ab Diis orti, recepti ad*  
*Deos, insignia atque imperium habentem. Non pro sce-*  
*lere id magis, quam pro monstro, habendum. Nec satis*

U. c. 316. *esse sanguine eius expiatum, nisi tecta parietesque, intra quae tantum amentiae conceptum esset, dissiparentur; bonaque, contacta pretiis regni mercandi, publicarentur. iubere itaque, quaestores vendere ea bona, atque in publicum redigere.*

XVI. Domum deinde, ut monumento area esset oppressae nefariae spei, dirui extemplo iussit. id Aequimaelium adpellatum est. L. Minucius bove aurato extra portam Trigeminam est donatus, ne plebe quidem invita, quia frumentum Maelianum, assibus in modios aestimatum, plebi divisit. Hunc Minucium, apud quosdam auctores, transisse a Patribus ad plebem, undecimumque tribunum plebis cooptatum seditionem, motam ex Maeliana caede, sedasse, invenio. Ceterum vix credibile est, numerum tribunorum Patres augeri passos, idque potissimum exemplum a patricio homine introductum; nec deinde id plebem concessum semel oblinuisse, aut certe tentasse. sed ante omnia refellit falsum imaginis titulum paucis ante annis lege cautum, ne tribunis collegam cooptare liceret. Q. Caecilius, Q. Iunius, Sext. Titinius <sup>e)</sup>, soli ex collegio tribunorum neque tulerant de honoribus Minucii legem; et criminari nunc Minucium, nunc Servilium apud plebem, querique indignam necem Maelii non destiterant. Pervicerunt igitur, ut tribunorum militum potius, quam consulum, comitia haberentur; haud dubii, quin sex locis (tot enim iam creari licebat) et plebei aliqui, profitendo se ultores fore Maelianae caedis, crearentur. Plebs, quamquam agitata multis eo anno et variis motibus erat, nec plures, quam tres, tribunos consulari potestate creavit, et in iis L. Quinctium Cincinnati filium: ex cuius dictaturae invidia tumultus quaerebatur. Praelatus suffragiis Quinctio Mam. Aemilius, vir summae dignitatis, L. Iulium tertium creant.

e) *Titinnius* Gron. Crev. [In Crev. min. *Titinius* legitur.]

XVII. In horum magistratu Fidenae; colonia <sup>U. c. 317.</sup>  
 Romana, ad Lartem Tolumnium Veientium regem <sup>a. C. 435.</sup>  
 ac Veientes defecere. Maius additum defectioni sce-  
 lus. C. Fulcinium, Cloelium Tullum, Sp. Antium,  
 L. Roscium, legatos Romanos, causam novi consilii  
 quaerentes, iussu Tolumnii interfecerunt. Levant  
 quidam regis facinus. in tesserarum prospero iactu  
 vocem eius ambiguum, ut occidi iussisse videretur,  
 ab Fidenatibus exceptam, causam mortis legatis  
 fuisse. Rem incredibilem; interventu Fidenatium,  
 novorum sociorum, consulentium de caede ruptura  
 ius gentium, non aversum ab intentione lusus animum:  
 nec deinde in horrorem versum facinus. propius est  
 fidem, obstringi Fidenatium populum, ne respicere  
 spem ullam ab Romanis posset, conscientia tanti sce-  
 leris voluisse. Legatorum, qui Fidenis caesi erant,  
 statuæ publice in Rostris positæ sunt. Cum Veien-  
 tibus Fidenatibusque, præterquam finitimis populis,  
 ab causa etiam tam nefanda bellum exorsis, atrox  
 dimicatio instabat. Itaque ad curam summae rerum,  
 quieta plebe tribunisque eius, nihil controversiæ fuit,  
 quin consules crearentur M. Geganius Macerinus ter- <sup>U. c. 318.</sup>  
 tium et L. Sergius Fidenas: a bello credo, quod deinde <sup>a. C. 434.</sup>  
 gessit, appellatum <sup>f</sup>). Hic enim primus cis Anienem  
 cum rege Veientium secundo proelio conflixit, nec  
 incruentam victoriam retulit. Maior itaque ex civibus  
 amissis dolor, quam lætitia fuis hostibus fuit. et  
 senatus, ut in trepidis rebus, dictatorem dici Mam.  
 Aemilium iussit. Is magistrum equitum ex collegio  
 prioris anni, quo simul tribuni militum consulari  
 potestate fuerant, L. Quinctium Cincinnatum, di-  
 gnum parente iuvenem, dixit. Ad delectum a con-  
 sulibus habitum centuriones veteres belli periti adie-  
 cti, et numerus amissorum proxima pugna expletus.  
 Legatos Quinctium Capitolinum et M. Fabium Vibula-  
 num sequi se dictator iussit. Quum potestas maior,

f) appellatus Gron. Crev.

U. c. 318. tum vir quoque potestati par, hostes ex agro Romano  
 a. C. 454. trans Anienem submovere, collesque inter Fidenas  
 atque Anienem ceperunt, referentes castra: nec ante  
 in campos degressi sunt, quam legiones auxilio Fali-  
 scorum venerunt. Tum demum castra Etruscorum  
 pro moenibus Fidenarum posita. et dictator Romanus  
 haud procul inde ad confluentes consedit in utriusque  
 ripis amnis, qua sequi munimento poterat, vallo in-  
 terposito: postero die in aciem eduxit.

XVIII. Inter hostes variae fuere <sup>e)</sup> sententiae. Faliscus, procul ab domo militiam aegre patiens, sa-  
 tisque fidens sibi, poscere pugnam: Veienti Fidenas-  
 que plus spei in trahendo bello esse. Tolumnius,  
 quamquam suorum magis placebant consilia, ne lon-  
 ginquam militiam non paterentur Falisci, postero die  
 se pugnaturum edicit. Dictatori ac Romanis, quod  
 detrectasset pugnam hostis, animi accessere: postero-  
 que die, iam militibus castra urbemque se obpugna-  
 turos frementibus, ni copia pugnae fiat, utrimque  
 acies inter bina castra in medium campi procedunt.  
 Veiens, multitudine abundans, qui inter dimicatio-  
 nem castra Romana adgrederentur, post montes cir-  
 cummisit. Trium populorum exercitus ita stetit in-  
 structus, ut dextrum cornu Veientes, sinistrum Fa-  
 lisci tenerent, medii Fidenates essent. Dictator dex-  
 tro cornu adversus Faliscos, sinistro contra Veientem  
 Capitolinus Quinctius intulit signa. ante mediam  
 aciem cum equitatu magister equitum processit. Pa-  
 rumper silentium et quies fuit, nec Etruscis, nisi  
 cogerentur, pugnam inituris, et dictatore arcem Ro-  
 manam respectante, ut ab auguribus, simul aves rite  
 admisissent, ex composito tolleretur signum. Quod  
 simul <sup>h)</sup> conspexit, prius equites clamore sublato  
 in hostem emisit. secuta peditum acies ingenti vi con-  
 fluxit. Nulla parte legiones Etruscae sustinuerunt in-  
 petum Romanorum. eques maxime resistebat: equi-

g) *fuere variae* Gron. Crev.

h) *ubi* Eaed.



tumque longe fortissimus ipse rex, ab omni parte ef-  
fuse sequentibus obequitans Romanis, trahebat cer-  
tamen.

XIX. Erat tum inter equites tribunus militum  
A. Cornelius Cossus, eximia pulchritudine corporis,  
animo ac viribus par, memorque generis, quod, am-  
plissimum acceptum, maius auctiusque reliquit poste-  
ris. is quum ad inpetum Tolumnii, quacumque se  
intendisset, trepidantes Romanas videret turmas, in-  
signemque eum regio habitu volitantem tota acie co-  
gnosset, *Hiccine est*, inquit, *ruptor foederis humani,*  
*violatorque gentium iuris?* *Iam ego hanc mactatam vi-*  
*ctimam*, (si modo sancti quidquam in terris esse *Dii*  
*volunt*) *legatorum Manibus dabo.* Calcaribus subditis,  
infesta cuspide in unum fertur hostem. quem quum  
ictum equo deiecisset, confestim et ipse hasta inni-  
sus se in pedes excepit. Adsurgentem ibi regem um-  
bone resupinat, repetitumque saepius cuspide ad ter-  
ram adfixit. tum exsanguis detracta spolia; caputque  
abscisum <sup>i)</sup> victor spiculo gerens, terrore caesi regis  
hostes fundit. Ita equitum quoque fusa acies, quae  
una fecerat anceps certamen. Dictator legionibus  
fugatis <sup>k)</sup> instat, et ad castra compulso caedit. Fi-  
denatium plurimi locorum notitia effugere in montes.  
Cossus, Tiberim cum equitatu transvectus, ex agro  
Veientano ingentem detulit praedam ad urbem. In-  
ter proelium et ad castra Romana pugnatum est ad-  
versus partem copiarum, ab Tolumnio, ut ante di-  
ctum est, ad castra missam. Fabius Vibulanus corona  
primum vallum defendit: intentos deinde hostes in  
vallum, egressus dextra principali, cum triariis re-  
pente invadit. quo pavore iniecto, caedes minor, quia  
pauciores erant; fuga non minus trepida, quam in  
acie, fuit.

XX. Omnibus locis re bene gesta, dictator se-  
natusconsulto iussuque populi triumphans in urbem

i) abscissum Gron. Crev.

k) fugatis legionibus Eaed.

U. c. 318. rediit. Longe maximum triumphi spectaculum fuit  
 a. C. 434. Cossus, spolia opima regis interfecti gerens. in eum  
 milites carmina incondita, aequantes eum Romulo,  
 canere. Spolia in aede Iovis Feretrii prope Romuli  
 spolia, quae, prima Opima adpellata, sola ea tem-  
 pestate erant, cum solemni dedicatione dono fixit.  
 averteratque in se a curru dictatoris civium ora, et  
 celebritatis eius dieifructum prope solus tulerat. Di-  
 ctator coronam auream libram pondo ex publica pe-  
 cunia, populi iussu, in Capitolio Iovi donum posuit.  
 Omnes ante me auctores secutus, A. Cornelium Cos-  
 sum tribunum militum secunda spolia opima Iovis  
 Feretrii templo intulissè, exposui. ceterum, praeter-  
 quam quod ea rite opima spolia habentur, quae dux  
 duci detraxit; nec ducem novimus, nisi cuius auspi-  
 cio bellum geritur; titulus ipse, spoliis inscriptus, il-  
 los meque arguit, consulem ea Cossus cepisse. Hoc  
 ego quum Augustum Caesarem, templorum omnium  
 conditorem aut restitutorem, ingressum aedem Fe-  
 retrii Iovis, quam vetustate dilapsam refecit, se  
 ipsum in thorace linteo scriptum legisse audissem;  
 prope sacrilegium ratus sum, Cosso spoliolum suorum  
 Caesarem, ipsius templi auctorem, subtrahere te-  
 stem. qui si ea in re sit error, quod tam veteres an-  
 nales, quodque magistratuum libri, quos linteos in  
 aede repositos Monetae Macer Licinius citat idemti-  
 dem auctores, nono post demum anno cum T. Quin-  
 ctio Penno A. Cornelium Cossus consulem habeant,  
 existimatio communis omnibus est. nam etiam illud ac-  
 cedit, ne tam clara pugna in eum annum transferri  
 posset, quod inbelle triennium ferne pestilentia ino-  
 piaque frugum circa A. Cornelium consulem fuit: adeo  
 ut quidam annales, velut funesti, nihil praeter no-  
 mina consulum subgerant. Tertius ab consulatu Cossi  
 annus tribunum eum militum consulari potestate ha-  
 bet; eodem anno magistrum equitum: quo in impe-  
 rio alteram insignem edidit pugnam equestrem. ea

libera coniectura est. Sed (ut ego arbitror) vana U. c. 518.  
versare in omnes opiniones licet: quum auctor pu-<sup>a.</sup> C. 434.  
gnae, recentibus spoliis in sacra sede positis, Iovem  
prope ipsum, cui vota erant, Romulumque intuens,  
haud spernendos falsi tituli testes, se <sup>1)</sup> A. Corne-  
lium Cossuin consulem scripserit.

XXI. M. Cornelio Maluginense, L. Papirio Crasso U. c. 519.  
consulibus, exercitus in agrum Veientem ac Fali-<sup>a.</sup> C. 433-  
scum ducti: praedae abactae hominum pecorumque:  
hostis in agris nusquam inventus, neque pugnandi  
copia facta. urbes tamen non obpugnatae, quia pe-  
stilentia populum invasit. Et seditiones domi quae-  
sitae sunt, nec motae tamen, ab Sp. Maelio tribuno  
plebis; qui, favore nominis moturum se aliquid ra-  
tus, et Minucio diem dixerat, et rogationem de pub-  
licandis bonis Servilii Ahalae tulerat: falsis crimini-  
bus a Minucio circumventum Maelium arguens, Ser-  
vilio caedem civis indemnati obiiciens. quae vaniora  
ad populum ipso auctore fuere. Ceterum magis vis  
morbi ingravescens curae erat, terroresque ac pro-  
digia; maxime quod crebris motibus terrae ruere in  
agris nunciabantur tecta. Obsecratio itaque a populo,  
duumviris praeceuntibus, est facta. Pestilentior inde U. c. 320.  
annus, C. Iulio iterum et L. Virginio consulibus, tan-<sup>a.</sup> C. 432.  
tum metum vastitatis in urbe agrisque fecit, ut non  
modo praedandi caussa quisquam ex agro Romano  
non exiret, bellive inferendi memoria Patribus aut  
plebi esset; sed ultro Fidenates, qui se primo aut  
oppido, aut montibus, aut muris tenuerant, popula-  
bundi descenderent in agrum Romanum. deinde, Ve-  
ientium exercitu adcito, (nam Falisci perPELLI ad in-  
staurandum bellum, neque clade Romanorum, neque  
sociorum precibus, potuere) duo populi transiere  
Anienem; atque haud procul Collina porta signa ha-  
buere. Trepidatum itaque, non in agris magis, quam  
in urbe, est. Iulius consul in aggere murisque ex-

1) sese Gron. Crev.

U. c. 320. plicat copias. a Virginio senatus in aede Quirini con-  
 a. C. 432. sulitur. Dictatorem dici A. <sup>m)</sup> Servilium placet, cui  
 Prisco alii, alii Structo fuisse cognomen tradunt. Vir-  
 ginius, dum collegam consuleret, moratus, permit-  
 tente eo, nocte dictatorem dixit. is sibi magistrum  
 equitum Postumum Aebutium Elvam dicit.

XXII. Dictator omnes luce prima extra portam  
 Collinam adesse iubet. quibuscumque vires subpete-  
 bant ad arma ferenda, praesto fuere: signa ex aera-  
 rio prompta feruntur ad dictatorem. Quae quum age-  
 rentur, hostes in loca altiora concessere. eo dictator  
 agnune infesto subit: nec procul Nomento signis con-  
 latis, fudit Etruscas legiones. compulit inde in urbem  
 Fidenas, valloque circumdedit. Sed neque scalis  
 capi poterat urbs alta et munita, neque in obsidione  
 vis ulla erat, quia frumentum non necessitati modo  
 satis, sed copiae quoque, abunde ex ante convecto  
 subiciebat. Ita, expugnandi pariter cogendique ad  
 deditionem spe amissa, dictator in locis, propter pro-  
 pinquitatem notis, ab aversa parte urbis maxime ne-  
 glecta, quia suapte natura tutissima erat, agere in  
 arcem cuniculum instituit. ipse, diversissimis locis  
 subeundo ad moenia quadrifariam diviso exercitu, qui  
 alii aliis succederent ad pugnam, continenti die ac  
 nocte proelio ab sensu operis hostes avertebat: do-  
 nec, perfosso a castris monte, erecta in arcem via  
 est; intentisque Etruscis ad vanas a certo periculo  
 minas, clamor supra caput hostilis captam urbem os-  
 tendit. Eo anno C. Furius Pacilus et M. Geganius Ma-  
 cerinus censores villam publicam in campo Martio  
 probaverunt: ibique primum census populi est actus.

U. c. 321. XXIII. Eosdem consules insequenti anno refe-  
 a. C. 431. ctos, Iulium tertium, Virginium iterum, apud Ma-  
 crum Licinium invenio. Valerius Antias et Q. Tu-  
 bero M. Manlium et Q. Sulpicium consules in eum

m) Q. Crev.



annum edunt. ceterum in tam discrepante <sup>n)</sup> editio- U. c. 321.  
 ne et Tubero et Macer libros linteos auctores profiten- <sup>a.</sup> C. 431.  
 tur: neuter, tribunos militum eo anno fuisse, tradi-  
 tum a scriptoribus antiquis dissimulat. Licinio libros  
 haud dubie sequi linteos placet: et Tubero incertus  
 veri est. sed inter cetera, vetustate incomperta, hoc  
 quoque in incerto positum. Trepidatum in Etruria  
 est post Fidenas captas, non Veientibus solum exter-  
 ritis metu similis excidii, sed etiam Faliscis memo-  
 ria initi primo cum iis belli, quamquam rebellantibus  
 non adfuerant. Igitur quum duae civitates, legatis  
 circa duodecim populos missis, inpetrassent, ut ad  
 Voltumnae fanum indiceretur omni Etruriae conci-  
 lium: velut magno inde tumultu imminente, senatus  
 Mam. Aemilium dictatorem iterum dici iussit. ab eo  
 A. Postumius Tubertus magister equitum est dictus;  
 bellumque tanto maiore, quam proximo, conatu ad-  
 paratum est, quanto plus erat ab omni Etruria peri-  
 culi, quam ab duobus populis fuerat.

XXIV. Ea res aliquanto exspectatione omnium  
 tranquillior fuit. Itaque quum renunciatum a mer-  
 catoribus esset, negata Veientibus auxilia, iussosque  
 suo consilio bellum initum suis viribus exsequi, nec  
 adversarum rerum quaerere socios, cum quibus spem  
 integram communicati non sint: tum dictator, ne  
 nequidquam creatus esset, materia quaerendae bello  
 gloriae adempta, in pace aliquid operis edere, quod  
 monumentum esset dictaturae, cupiens, censuram  
 minuere parat: seu nimiam potestatem ratus, seu  
 non tam magnitudine honoris, quam diuturnitate,  
 offensus. Concione itaque advocata, *republicam*  
*foris gerendam*, ait, *tutaque omnia praestanda*, *Deos*  
*immortales suscepisse: se, quod intra muros agendum*  
*esset, libertati populi Romani consulturum. maximam*  
*autem eius custodiam esse, si magna imperia diuturna*

n) discrepanti Gron. Crev.

U. c. 321. *non essent; et temporis modus inponeretur, quibus iu-*  
 a. C. 431. *ris inponi non posset. Alios magistratus annuos esse,*  
*quinquennalem censuram; grave esse, iisdem per tot*  
*annos magna parte vitae obnoxios vivere. se legem la-*  
*turum, ne plus, quam annua ac semestris, censura*  
*esset. Consensu ingenti populi legem postero die per-*  
*tulit, et, ut re ipsa, inquit, sciatis, Quirites, quam*  
*mihi diuturna non placeant imperia, dictatura me ab-*  
*dico. Deposito suo magistratu, modo magistratui inpo-*  
*sito, sine alteri, cum gratulatione ac favore ingenti po-*  
*puli domum est reductus. Censores, aegre passi, Ma-*  
*mercum, quod magistratum populi Romani minuisset,*  
*tribu moverunt, octuplicatoque censu aerarium fece-*  
*runt. quam rem ipsum ingenti animo tulisse ferunt,*  
*causam potius ignominiae intuentem, quam ignomi-*  
*am; primores Patrum, quamquam deminutum censurae*  
*ius noluisent, exemplo acerbitatis censoriae obfensos:*  
*quippe quum se quisque diutius ac saepius subiectum*  
*censoribus fore cerneret, quam censuram gesturum. Po-*  
*puli certe tanta indignatio coorta dicitur, ut vis a cen-*  
*soribus nullius auctoritate, praeterquam ipsius Ma-*  
*merci, deterreretur quiverit.*

XXV. Tribuni plebis, adsiduis concionibus pro-  
 hibendo consularia comitia, quum res prope ad inter-  
 regnum perducta esset, evicere tandem, ut tribuni  
 militum consulari potestate crearentur: victoriae  
 praemium, quod petebatur, ut plebeius crearetur,  
 nullum fuit. omnes patricii creati sunt, M. Fabius  
 U. c. 322. Vibulanus, M. Foslius, L. Sergius Fidenas. Pesti-  
 a. C. 430. lentia eo anno aliarum rerum otium praebuit. aedis<sup>o</sup>)  
 Apollini pro valetudine populi vota est. multa duum-  
 viri ex libris, placandae Deum irae, avertendaeque  
 a populo pestis caussa, fecere: magna tamen clades  
 in urbe agrisque, promiscue hominum pecorumque  
 perniciem, accepta. famen cultoribus agrorum timen-

<sup>o</sup>) aedes Gron. Crev.

tes in Etruriam, Pomptinumque agrum, et Cumas, U. c. 322.  
 postremo in Siciliam quoque frumenti caussa misere. <sup>a. C. 430.</sup>  
 Consularium comitiorum nulla mentio habita est. Tri-  
 buni militum consulari potestate omnes patricii creati  
 sunt, L. Pinarius Mamercinus, L. Furius Medulli- U. c. 323.  
 nus, Sp. Postumius Albus. Eo anno vis morbi le- <sup>a. C. 429.</sup>  
 vata, neque a penuria frumenti, quia ante provisum  
 erat, periculum fuit. Consilia ad movenda bella in  
 Volscorum, Aequorumque conciliis, et in Etruria ad  
 fanum Voltumnae, agitata. Ibi prolatae in annum  
 res, decretoque cautum, ne quod ante concilium fie-  
 ret; nequidquam Veiente populo querente, eandem,  
 qua Fidenae deletae sint, imminere Veiis fortunam.  
 Interim Romae principes plebis, iam diu nequidquam  
 imminentes spei maioris honoris, dum foris otium  
 esset, coetus indicare in domos tribunorum plebei <sup>p)</sup>;  
 ibi secreta consilia agitare: queri, *se a plebe adeo*  
*spretos, ut, quum per tot annos tribuni militum con-*  
*sulari potestate creentur, nulli umquam plebeio ad eum*  
*honorem aditus fuerit. multum providisse suos maiores;*  
*qui caverint, ne cui patricio plebeii magistratus pate-*  
*rent; aut patricos habendos fuisse tribunos plebei. adeo*  
*se suis etiam sordere, nec a plebe minus, quam a Pa-*  
*tribus contemni.* Alii purgare plebem, culpam in Pa-  
 tres vertere: *eorum ambitione artibusque fieri, ut ob-*  
*septum plebi sit ad honorem iter. si plebi respirare ab*  
*eorum mixtis precibus minisque liceat, memorem eam*  
*suorum inituram suffragia esse, et parto auxilio impe-*  
*rium quoque adscituram.* Placet, tollendae ambitio-  
 nis caussa tribunos legem promulgare, ne cui album  
 investimentum addere petitionis liceret caussa <sup>q)</sup>. Par-  
 va nunc res, et vix serio agenda videri possit, quae  
 tunc ingenti certamine Patres ac plebem accendit.  
 Vicere tamen tribuni, ut legem perferrent: adpare-  
 batque, irritatis animis, plebem ad suos studia in-

p) plebi Gron.

q) caussa liceret Gron. Crev.

U. c. 323. clinaturam. quae ne libera essent, senatusconsultum  
a. C. 429. factum est, ut consularia comitia haberentur.

U. c. 324. XXVI. Tumultus caussa fuit; quem ab Aequi  
a. C. 428. et Volscis Latini atque Hernici nunciant. T. Quinctius L. F. Cincinnatus (eidem et Penno cognomen additur) et C. Iulius Mento, consules facti: nec ultra terror belli est dilatus. Lege sacrata, quae maxima apud eos vis cogendae militiae erat, delectu habito, utrimque validi exercitus profecti in Algidum convenere, ibique, seorsum Aequi, seorsum Volsci castra communivere; intentiorque, quam umquam ante, muniendi exercendique militem cura ducibus erat. eo plus nuntii terroris Romam adtulere. Senatui dictatorem dici placuit: quia, etsi saepe victi populi, maiore tamen conatu, quam alias umquam rebellarent: et aliquantum Romanae iuventutis morbo absumtum erat. ante omnia pravitas consulum discordiaque inter ipsos, et certamina in consiliis omnibus terrebant. Sunt, qui male pugnatum ab his consulibus in Algido auctores sint, eamque causam dictatoris creandi fuisse. Illud satis constat, ad alii discordes in uno adversus Patrum voluntatem consensisse, ne dicerent dictatorem: donec, quum aliis terribiliora adferrentur, nec in auctoritate senatus consules essent, Q. Servilius Priscus, summi honoribus egregie usus, *Vos, inquit, tribuni plebi, quoniam ad extrema ventum est, senatus adpellat, et in tanto discrimine reipublicae dictatorem dicere consules pro potestate vestra cogatis.* Qua voce audita, occasionem oblatam rati tribuni augendae potestatis secedunt, proque collegio pronunciant, *placere, consules senatui dicto audientes esse: si adversus consensum amplissimi ordinis ultra tendant, in vincula seducere eos iussuros.* Consules ab tribunis, quam ab senatu vinci maluerunt; proditum a Patribus summi imperii, datumque sub iugum tribuniciae potestati consulatum memorantes, siquidem cogi aliquid pro pot



estate ab tribuno consules, et (quo quid ulterius pri-<sup>U. c. 324.</sup>  
vato timendum foret?) in vincula etiam duci possent.<sup>a. C. 428.</sup>  
Sors, ut dictatorem diceret, (nam ne id quidem in-  
ter collegas convenerat) T. Quinctio evenit. is A.  
Postumium Tubertum, socerum suum, severissimi  
imperii virum, dictatorem dixit; ab eo L. Iulius ma-  
gister equitum est dictus. Simul edicatur et iustitium:  
neque aliud tota urbe agi, quam bellum adparari:  
cognitio vacantium militiae munere post bellum dif-  
fertur. Ita dubii quoque inclinant ad nomina danda.  
et Hernicis Latinisque milites imperati. utrumque  
enixe obeditum dictatori est.

XXVII. Haec omnia celeritate ingenti acta reli-  
ctoque C. Iulio consule ad praesidium urbis, et L.  
Iulio magistro equitum ad subita belli ministeria, ne  
qua res, qua eguissent in castris, moraretur, dictator,  
praeunte A. Cornelio pontifice maximo, Ludos mag-  
nos tumultus caussa vovit: profectusque ab urbe, di-  
viso cum Quinctio consule exercitu, ad hostes per-  
venit. Sicut bina castra hostium, parvo inter se spa-  
tio distantia, viderant, ipsi quoque mille ferme pas-  
sus ab hoste, dictator Tusculo, consul Lanuvio, pro-  
piorem locum castris ceperunt. Ita quatuor exercitus,  
totidem munimenta planitiem in medio, non parvis  
modo excursionibus ad proelia, sed vel ad explican-  
das utrumque acies satis patentem, habebant. nec,  
ex quo castris castra conlata sunt, cessatum a levibus  
proeliis est; facile patiente dictatore, conferendo vi-  
res spem universae victoriae, tentato paullatim eventu  
certaminum, suos praecipere. Itaque hostes, nulla  
in praelio iusto relicta spe, noctu adorti castra consu-  
lis, rem in casum ancipitis eventus committunt. Cla-  
mor subito ortus, non consulis modo vigiles, exerci-  
tum deinde omnem, sed dictatorem quoque ex somno  
excivit. Ubi praesenti ope res egebant, consul nec  
animo defecit<sup>r)</sup>), nec consilio: pars militum portarum

r) defecit Gron. Crev.

U. c. 324. stationes firmant: pars corona vallum cingunt. In  
 a. G. 428. alteris apud dictatorem castris, quo minus tumultus  
 est, eo plus animadvertitur, quid opus facto sit. misso  
 extemplo ad castra subsidio, cui Sp. Postumius Albus  
 legatus praeficitur, ipse parte copiarum parvo circuitu  
 locum maxime secretum ab tumultu petit, unde ex  
 necopinato aversum hostem invadat. Q. Sulpicium  
 legatum praeficit castris: M. Fabio legato adsignat  
 equites. nec ante lucem movere iubet manum, inter  
 nocturnos tumultus moderatu difficilem. Omnia,  
 quae vel alius imperator prudens et inpiger in tali re  
 praeciperet ageretque, praecipit ordine atque agit.  
 illud eximium consilii animique specimen, et neuti-  
 quam vulgatae laudis, quod ultro ad obpugnanda castra  
 hostium, unde maiore agmine profectos exploratum  
 fuerat, M. Geganium cum cohortibus delectis misit.  
 qui, postquam intentos homines in eventum periculi  
 alieni, pro se incautos neglectis vigiliis stationibus-  
 que, est adortus, prius pene cepit castra, quam ob-  
 pugnari hostes satis scirent. inde, fumo, ut convene-  
 rat, datum signum ubi conspectum ab dictatore est,  
 exclamat, capta hostium castra, nunciarique passim  
 iubet.

XXVIII. Et iam lucescebat, omniaque sub ocu-  
 lis erant: et Fabius cum equitatu inpetum dederat,  
 et consul eruptionem e castris in trepidos iam hostes  
 fecerat. Dictator autem, parte altera subsidia et se-  
 cundam aciem adortus, circumagenti se ad dissonos  
 clamores ac subitos tumultus hosti undique obie-  
 cerat victorem peditem equitemque. Circumventi  
 igitur iam in medio ad unum omnes poenas rebellio-  
 nis dedissent, ni Vectius Messius ex Volscis, nobilior  
 vir factis, quam genere, iam orbem volventes suos  
 increpans clara voce, *Hic praebituri, inquit, vos te-  
 lis hostium estis indefensi, inulti? Quid igitur arma  
 habetis? aut quid ultro bellum intulistis; in otio tumul-  
 tuosi, in bello segnes? Quid hic stantibus spei est? an*

*Deum aliquem protecturum vos, rapturumque hinc pu-* U. c. 324.  
*tatis? Ferro via facienda est. Hac, qua me praegres-* a. C. 423.  
*sum videritis, agite, qui visuri domos, parentes, con-*  
*iuges, liberos estis, ite mecum. Non murus, nec val-*  
*lum; sed armati armatis obstant. virtute pares, neces-*  
*sitate, quae ultimum ac maximum telum est, superiores*  
*estis.* Haec locutum exsequentemque dicta redinte-  
 grato clamore secuti, dant inpressionem, qua Postu-  
 mius Albus cohortes obiecerat: et moverunt victorem,  
 donec dictator, pedem iam referentibus suis, advenit:  
 eoque omne proelium versum est. Uni viro Messio  
 fortuna hostium innititur. multa utrimque vulnera,  
 multa passim caedes est. Iam ne duces quidem Ro-  
 mani incruenti pignant. Unus Postumius, ictus saxo,  
 perfracto capite, acie excessit. non dictatorem hu-  
 merus vulneratus, non Fabium prope adfixum equo  
 femur, non brachium abscisum <sup>s)</sup> consulem ex tam  
 ancipiti proelio submovit.

XXIX. Messium inpetus per stratos caede ho-  
 stes cum globo fortissimorum iuvenum extulit ad castra  
 Volscorum, quae nondum capta erant. eodem omnis  
 acies inclinatur. Consul, effusos usque ad vallum per-  
 secutus, ipsa castra vallumque adgreditur: eodem et di-  
 ctator alia parte copias admovet. non segnior obpugna-  
 tio est, quam pugna fuerat. Consulem signum quoque  
 intra vallum iniecisse ferunt, quo milites acrius subi-  
 rent; repetendoque signo primam inpressionem fa-  
 ctam. Et dictator, proruto vallo, iam in castra proelium  
 intulerat. Tum abiici passim arma <sup>t)</sup>, ac dedi hostes coe-  
 pti. castrisque et his captis, hostes praeter senatores  
 omnes venundati sunt. Praedae pars sua cognoscenti-  
 bus Latinis atque Hernicis reddita; parten sub hasta di-  
 ctator vendidit: praepositoque consule castris, ipse,  
 triumphans invectus urbem, dictatura se abdicavit.  
 Egregiae dictaturae tristem memoriam faciunt, qui

s) abscisum Gron. Crev.

t) arma passim Eaed.

U. c. 325 filium ab A. Postumio, quod, occasione bene pugnandi  
 a. C. 427. di captus, iniussu decesserit praesidio, victorem securi percussum tradunt. Nec libet credere; et licet in variis opinionibus. et argumento est, quod *imperia Manliana*, non *Postumiana*, adpellata sint: quum, qui prior auctor tam saevi exempli foret, occupaturus insignem titulum crudelitatis fuerit. *Imperioso* quoque Manlio cognomen inditum: Postumius nulla tristi nota est insignitus. C. Iulius consul aedem Apollinis, absente collega, sine sorte dedicavit: aegre id passus Quinctius, quum, dimisso exercitu, in urbem redisset, nequidquam in senatu est conquestus. Insigni magnis rebus anno additur, nihil tum ad rem Romanam pertinere visum, quod Karthaginienses, tanti hostes futuri, tum primum per seditiones Siculorum ad partis alterius auxilium in Siciliam exercitum traiecere.

XXX. Agitatum in urbe ab tribunis plebis, ut tribuni militum consulari potestate crearentur; nec obtineri potuit. Consules fiunt L. Papirius Crassus, L. Iulius. Aequorum legati foedus ab senatu cum petissent, et pro foedere deditio ostentaretur, inducias annorum octo inpetraverunt. Volscorum res, super acceptam in Algido cladem, pertinaci certamine inter pacis bellicque auctores in iurgia et seditiones

U. c. 326. versa. Undique otium fuit Romanis. Legem de mul-  
 a. C. 426. tarum aestimatione pergratam populo, quum ab tribunis parari consules unius ex collegio proditione excepissent, ipsi praeoccupaverunt ferre. Consules L. Sergius Fidenas iterum, Hostus Lucretius Tricipitinus. Nihil dignum dictu actum his consulibus.

U. c. 327. Secuti eos consules A. Cornelius Cossus, T. Quin-  
 a. C. 425. ctius Pennus iterum. Veientes in agrum Romanum excursiones fecerunt. Fama fuit, quosdam ex Fidenatum iuventute participes eius populationis fuisse: cognitioque eius rei L. Sergio, et Q. Servilio, et Mam. Aemilio permissa. Quidam Ostiam relegati,



quod, cur per eos dies a Fidenis afuissent, parumU. c. 328. constabat. colonorum additus numerus, agerque iis<sup>1</sup>. C. 424. bello interemtorum adsignatus. Siccitate eo anno plurimum laboratum est: nec coelestes modo defuerunt aquae, sed terra quoque, ingenito humore egens, vix ad perennes subfecit amnes. defectus alibi aquarum circa torridos fontes rivosque stragem siti pecorum morientium dedit: scabie alia absunta: vulgatique<sup>u)</sup> contactu in homines morbi, et primo in agrestes ingruerant servitiaque. urbs deinde inpletur. Nec corpora modo adfecta tabo, sed animos quoque multiplex religio et pleraque externa, invasit; novos ritus sacrificandi<sup>x)</sup> vaticinando inferentibus in domos, quibus quaestui sunt capti superstitione animi: donec publicus iam pudor ad primores civitatis pervenit, cernentes in omnibus vicis sacellisque peregrina atque insolita piacula pacis Deum exposcendae. Datum inde negotium aedilibus, ut animadverterent, ne qui, nisi Romani Dii, neu quo alio more, quam patrio, colerentur. Irae adversus Veientes in insequentem annum, C. Servilium Ahalam, L. Papirium Mugillanum consules, dilatae sunt. Tunc quoque, ne confestim bellum indiceretur, neve exercitus mitterentur, religio obstitit. feciales prius mittendos ad res repetendas censuere. Cum Veientibus nuper acie dimicatum ad Nomentum et Fidenas fuerat: induciaeque inde, non pax, facta: quarum et dies exierat, et antediem rebellaverant. Missi tamen feciales: nec eorum, quum more patrum iurati repeterent res, verba sunt audita. Controversia inde fuit, utrum populi iussu indiceretur bellum, an satis esset senatusconsultum. Pervicere tribuni, denunciando inpedituros se delectum, ut consules de bello ad populum ferrent, omnes centuriae iussere. In eo quoque plebs superior fuit, quod tenuit, ne consules in proximum annum crearentur.

u) vulgarique, Gron. Crev.

x) sacrificando Gron.

U. c. 329.

a. C. 423.

**XXXI.** Tribuni militum consulari potestate quatuor creati sunt, T. Quinctus Pennus ex consulatu, C. Furius, M. Postumius, A. Cornelius Cossus. ex iis Cossus praefuit urbi. tres, delectu habito, profecti sunt Veios, documentoque fuere, quam plurimum imperium bello inutile esset. Tendendo ad sua quisque consilia, quum aliud alii videretur, aperuerunt ad occasionem locum hosti. incertam namque aciem, signum aliis dari, receptui aliis cani iubentibus <sup>y)</sup>, invasere opportune Veientes: castra propinqua turbatos ac terga dantes accepere. Moesta civitas fuit <sup>z)</sup> vinci insueta: odisse tribunos, poscere dictatorem, in eo verti spes civitatis. et quum ibi quoque religio obstaret, ne non posset nisi ab consule dici dictator, augures consulti eam religionem exemere. A. Cornelius dictatorem Mam. Aemilium dixit: et ipse ab eo magister equitum est dictus. Adeo, simul fortuna civitatis virtute vera eguit, nihil censoria animadversio effecit, quo minus regimen rerum ex notata indigne domo peteretur. Veientes, re secunda elati, missis circum Etruriae populos legatis, iactando tres duces Romanos ab se uno proelio fusos, quum tamen nullam publici consilii societatem movissent, voluntarios undique ad spem praedae adsciverunt. Uni Fidenatium populo rebellare placuit: et, tamquam nisi ab scelere bellum ordiri nefas esset, sicut legatorum antea, ita tum novorum colonorum caede imbutis armis, Veientibus sese coniungunt. Consultare inde principes duorum populorum, Veios an Fidenas sedem belli caperent. Fidenae visae opportuniore. itaque, traiecto Tiberi, Veientes Fidenas transtulerunt bellum. Romae terror ingens erat. adcito exercitu ab Veiiis, eoque ipso ab re male gesta perculso; castra locantur ante portam Collinam, et in muris armati

<sup>y)</sup> *signum aliis dari receptui, aliis cani iubentibus* Gron. <sup>z)</sup> *fuit del.* Gron. Crev.

Crev. c. Drak.

dispositi, et iustitium in foro, tabernaeque clausae: U. c. 329.  
fiuntque omnia castris, quam urbi, similia. a. C. 423.

XXXII. Tum trepidam civitatem, praeconibus per vicos dimissis, dictator ad concionem advocatam increpuit, *quod animos ex tam levibus fortunae momentis suspensos gererent, ut, parva iactura accepta, quae ipsa non virtute hostium, nec ignavia Romani exercitus, sed discordia imperatorum, accepta sit, Veientem hostem sexies victum, pertimescant, Fidenasque prope saepius captas quam obpugnatas. Eosdem et Romanos et hostes esse, qui per tot secula fuerint: eosdem animos, easdem corporis vires, eadem arma gerere. se quoque eundem dictatorem Mam. Aemilium esse, qui ante <sup>a)</sup> Veientium Fidenatumque, adiunctis Faliscis, ad Nomentum exercitus fuderit: et magistrum equitum A. Cornelium eundem in acie fore, qui priore bello tribunus militum, Larte Tolumnio rege Veientium in conspectu duorum exercituum occiso, spolia opima Iovis Feretrii templo intulerit. Proin memores secum triumphos, secum spolia, secum victoriam esse; cum hostibus scelus legatorum contra ius gentium intersectorum, caedem in pace Fidenatum colonorum, inducias ruptas, septimam infelicem defectionem, arma caperent. Simul castra castris coniunxissent, satis confidere, nec sceleratissimis hostibus diuturnum ex ignominia exercitus Romani gaudium fore; et populum Romanum intellecturum, quanto melius de republica meriti sint, qui se dictatorem tertium dixerint; quam <sup>b)</sup> qui, ob ereptum censurae regnum, labem secundae dictaturae suae inposuerint. Votis deinde nuncupatis profectus, mille et quingentos passus citra Fidenas castra locat: dextra montibus, laeva Tiberi amne septus. T. Quinctium Pennum legatum occupare montes iubet, occultumque id iugum capere, quod ab tergo hostibus foret. Ipse postero die, quum Etrusci pleni animorum ab*

a) antea Gron. Crev.

b) add. eos Faed. c. Drak.

U. c. 529. pristini diei meliore occasione, quam pugna, in aciem  
 a. C. 425. processissent, cunctatus parumper, dum speculatores  
 referrent, Quinctium evasisse in iugum propinquum  
 arcu Fidenarum, signa profert: peditumque aciem in-  
 structam pleno gradu in hostem inducit: magistro  
 equitum praecipit, ne iniussu pugnam incipiat: se,  
 quum opus sit, equestri auxilio signum daturum. tum  
 ut memor regiae pugnae, memor opimi doni, Romu-  
 lique ac Iovis Feretrii, rem gereret. Legiones inpetu  
 ingenti confligunt. Romanus odio accensus, inpium  
 Fidenatem, praedonem Veientem, ruptores induci-  
 arum, cruentos legatorum infanda caede, respersos  
 sanguine colonorum suorum, perfidos socios, inbelles  
 hostes compellans, factis simul dictisque odium ex-  
 plet.

XXXIII. Concusserat primo statim congressu  
 hostem: quum repente, patefactis Fidenarum portis  
 nova erumpit acies, inaudita ante id tempus inveni-  
 tataque °). ignibus armata ingens multitudo, facibus-  
 que ardentibus tota conlucens, velut fanatico instin-  
 cta cursu, in hostem ruit: formaque insolitae pugnae  
 Romanos parumper exterruit. Tum dictator, magi-  
 stro equitum equitibusque, tum ex montibus Quin-  
 ctio adcito, proelium ciens, ipse in sinistrum cornu,  
 quod, incendio similis quam proelio, territum ces-  
 serat flammis, adcurrit: claraque voce, *Fumone victi,*  
*inquit, velut examen apum loco vestro exacti, inermi*  
*cedetis hosti? Non ferro exstinguetis ignes? non faces*  
*has ipsas pro se quisque, si igni, non telis, pugnan-*  
*dum est, ereptas ultro inferetis? Agite, nominis Roma-*  
*ni ac virtutis patrum vestraeque memores, vertite in-*  
*conditum hoc in hostium urbem; et suis flammis delete*  
*Fidenas, quas vestris beneficiis placare non potuistis.*  
*Legatorum hoc vos vestrorum colonorumque sanguis,*  
*vastatique fines monent. Ad imperium dictatoris mo-*

e) inusitataque Gron. Crev.



ta cuncta acies: faces partim emissae excipiuntur,<sup>U. c. 329.</sup>  
 partim vi eripiuntur: utraque acies armatur igni.<sup>a. C. 423.</sup>  
 Magister equitum et ipse novat pugnam equestrem:  
 frenos ut detrahant equis, imperat: et ipse princeps,  
 calcaribus subditis evectus, effreno equo in medios  
 ignes infertur: et alii concitati equi libero cursu fe-  
 runt equitem in hostem. Pulvis elatus, mixtusque  
 fumo, lucem ex oculis virorum equorumque aufert.  
 ea, quae militem terruerat, species nihil terruit equos.  
 ruinae igitur similem stragem eques, quacumque per-  
 vaserat, dedit. Clamor deinde accidit novus: qui  
 quum utramque mirabundam in se aciem vertisset, di-  
 ctator exclamat, *Quinctium legatum et suos ab tergo*  
*hostem adortos*: ipse, redintegrato clamore, infert  
 acrius signa. Quum duae acies, duo diversa proelia,  
 circumventos Etruscos et a fronte et ab tergo urge-  
 rent, neque in castra retro, neque in montes, unde  
 se novus hostis obiecerat, iter fugae esset, et equi-  
 tem passim liberi frenis distulissent<sup>d)</sup> equi, Veien-  
 tium maxima pars Tiberim effusi petunt. Fidenatium  
 qui supersunt, ad urbem Fidenas tendunt. Infert  
 pavidos fuga in mediam caedem: obtruncantur in ri-  
 pis: alios, in aquam compulsos, gurgites ferunt: et-  
 iam peritos nandi lassitudo et vulnera et pavor degra-  
 vant; pauci ex multis tranant. alterum agmen fertur  
 per castra in urbem. eadem<sup>e)</sup> et Romanos sequentes  
 inpetus rapit. Quinctium maxime, et cum eo degres-  
 sos modo de montibus, recentissimum ad laborem  
 militem, quia ultimo proelio advenerat.

XXXIV. Hi, postquam mixti hostibus portam  
 intravere, in muros evadunt; suisque capti oppidi si-  
 gnum ex muro tollunt. Quod ubi dictator conspexit,  
 (iam enim et ipse in deserta hostium castra penetra-  
 verat) cupientem militem discurrere ad praedam, spe  
 iniecta maioris in urbe praedae, ad portam ducit; re-

d) *dispulissent* Gron. Crev. e) *eodem* Gron. Crev.  
 c. Drak.

U. c. 329. ceptusque intra muros, in arcem, quo ruere fugien-  
 a. C. 423. tium turbam videbat, pergit. Nec minor caedes in  
 urbe, quam in proelio, fuit; donec, abiectis armis,  
 nihil praeter vitam petentes, dictatori deduntur.  
 Urbs castraque diripiuntur. Postero die singulis cap-  
 tivis ab equite ad centurionem sorte ductis, et, quo-  
 rum eximia virtus fuerat, binis, aliis sub corona ve-  
 nundatis, exercitum victorem opulentumque praeda  
 triumphans dictator Romam reduxit: iussoque magi-  
 stro equitum abdicare se magistratu, ipse deinde ab-  
 dicat die sextodecimo, reddito in pace imperio, quod  
 in bello trepidisque rebus acceperat. Classi<sup>f)</sup> quo-  
 que ad Fidenas pugnatum cum Veientibus, quidam  
 annales retulere: rem aequae difficilem atque incredi-  
 bilem, nec nunc lato satis ad hoc amne; et tum ali-  
 quanto, ut a veteribus accepimus, artiore: nisi in  
 traiectu forte fluminis prohibendo, aliquarum navium  
 concursum in maius, ut fit, celebrantes, navalis vi-  
 ctoriae vanum titulum adpetivere.

U. c. 330. XXXV. Insequens annus tribunos militares  
 a. C. 422. consulari potestate habuit A. Sempronium Atratinum,  
 L. Quinctium Cincinnatum, L. Furium Medullinum,  
 L. Horatium Barbatum. Veientibus annorum viginti  
 induciae datae, et Aequis triennii, quum plurium  
 annorum petissent. Et ab seditionibus urbanis otium

U. c. 331. fuit. Annum insequentem, neque bello foris, neque  
 a. C. 421. domi seditione insignem, ludi bello voti celebrem, et  
 tribunorum militum adparatu, et finitimorum concur-  
 su, fecere. Tribuni consulari potestate erant Ap.  
 Claudius Crassus, Sp. Nautius Rutilus, L. Sergius  
 Fidenas, Sex Iulius Iulus. spectaculum comitate et-  
 iam hospitum, ad quod publico consensu venerant,  
 advenis gratius fuit. Post ludos conciones seditiosae  
 tribunorum plebi fuerunt, obiurgantium multitudinem,  
 quod, admiratione eorum, quos odisset, stupens, in  
 aeterno se ipsa teneret servitio: et non modo ad spem

f) classibus Gron. Grev.

*consulatus in partem revocandam adspirare non aude-* U. c. 331.  
*ret, sed ne in tribunis quidem militum creandis (quae* a. C. 421.  
*communia essent comitia Patrum ac plebis) aut sui aut*  
*suorum meminisset. Desineret ergo mirari, cur nemo*  
*de commodis plebis ageret; eo inpendi laborem ac peri-*  
*culum, unde emolumentum atque honos speretur. Nihil*  
*non adgressuros homines, si magna conatis magna*  
*praemia proponantur. Ut quidem aliquis tribunus ple-*  
*bis ruat caecus in certamina periculo ingenti, fructu*  
*nullo; ex quibus pro certo habeat, Patres, adversus*  
*quos tenderet, bello inexpiabili se persecuturos; apud*  
*plebem, pro qua dimicaverit, nihilo se honoratiorem*  
*fore, neque sperandum, neque postulandum esse.*  
*Magnos animos magnis honoribus fieri. neminem*  
*se plebeium contemturum, ubi contemni desissent. Ex-*  
*periendam rem denique in uno aut altero esse, sitne*  
*aliquis plebeius ferendo magno honori; an portento si-*  
*mile miraculoque sit, fortem ac strenuum virum ali-*  
*quem exsistere ortum ex plebe. Summa vi expugna-*  
*tum esse, ut tribuni militum consulari potestate et ex*  
*plebe crearentur. Petisse viros domi militiaeque spe-*  
*ctatos: primis annis sugillatos, repulsos, risui Patri-*  
*buis fuisse: desisse postremo praebere ad contumeliam os.*  
*Nec se videre, cur non lex quoque abrogetur, qua id li-*  
*ceat, quod numquam futurum sit. minorem quippe ru-*  
*borem fore in iuris iniquitate, quam si per indignitatem*  
*ipsorum praetereantur.*

XXXVI. Huius generis orationes, cum adsensu auditaе, incitavere quosdam ad petendum tribunatum militum, alium alia de commodis plebis laturum se in magistratu profitentem. Agri publici dividendi coloniarumque deducendarum ostentatae spes; et vectigali possessoribus agrorum inposito, in stipendium militum erogandi aeris. Captatum deinde tempus ab tribunis militum, quo per discessum hominum ab urbe, quum Patres clandestina denunciatione revocati ad diem certam essent, senatusconsultum fieret, ab-

U. c. 331. sentibus tribunis plebi <sup>a)</sup>): ut, quoniam Volscos in  
 a. C. 421. Hernicorum agros praedatum exisse fama esset, ad  
 rem inspiciendam tribuni militum proficiscerentur,  
 consulariaque comitia haberentur. Profecti Ap. Clau-  
 dium, filium decemviri, praefectum urbis relinquunt,  
 inpigrum iuvenem, et iam inde ab incunabilis imbu-  
 tum odio tribunorum plebisque. tribunis plebi nec  
 cum absentibus iis, qui senatusconsultum fecerant,  
 nec cum Appio, transacta re, quod contenderent,  
 fuit.

U. c. 332. XXXVII. Creati consules sunt <sup>b)</sup>) C. Sempro-  
 a. C. 420. nius Atratinus, Q. Fabius Vibulanus. Peregrina  
 res, sed memoria digna, traditur eo anno facta: Vul-  
 turnum, Etruscorum urbem, quae nunc Capua est, ab  
 Samnitibus captam; Capuamque ab duce eorum Ca-  
 pye, vel (quod propius vero est) a campestri agro ad-  
 pellatam. Cepere autem, prius bello fatigatis Etrus-  
 cis, in societatem urbis agrorumque accepti: deinde fe-  
 sto die graves somno epulisque incolas veteres novi co-  
 loni nocturna caede adorti. His rebus actis, consules ii,  
 quos diximus, Idibus Decembribus magistratum oc-  
 cepere. Iam non solum, qui ad id missi erant, re-  
 tulerant, imminere Volscum bellum; sed legati quo-  
 que ab Latinis et Hernicis nunciabant, *Non ante um-*  
*quam Volscos nec ducibus legendis, nec exercitui scri-*  
*bendo, intentiores fuisse. vulgo fremere, aut in perpe-*  
*tuum arma bellumque oblivioni danda, iugumque acci-*  
*piendum; aut iis, cum quibus de imperio certetur, nec*  
*virtute, nec patientia, nec disciplina rei militaris ce-*  
*dendum esse.* Haud vana adtulere: sed nec perinde  
 Patres moti sunt; et C. Sempronius, cui ea provincia  
 sorti <sup>i)</sup>) evenit, tamquam constantissimae rei, fortu-  
 nae fretus <sup>k)</sup>), quod victoris populi adversus victos  
 dux esset <sup>l)</sup>), omnia temere ac neglegenter egit. adeo

g) plebis Gron. Crev. it.  
 mox: tribunis plebis.

h) sunt del. Eaed.

i) sorte Eaed.

k) constantissima re, fortu-  
 na fretus Eaed. c. Drak.

l) populi exercitum adversum  
 victos duxisset Gron. Crev.



ut disciplinae Romanae plus in Volscis exercitu, quam U. c. 352.  
 in Romano, esset. Ergo fortuna, ut saepe alias, a. C. 420.  
 virtutem est secuta. Primo proelio, quod ab Sempronio incaute inconsulteque commissum est, non subsidiis firmata acie, non equite apte locato, concursus est. clamor indicium primum fuit, quo res inclinatura esset. excitatior crebriorque ab hoste sublatu; ab Romanis dissonus, impar, segnius <sup>m)</sup> saepe iteratus <sup>n)</sup> prodidit pavorem animorum. Eo ferocior inlatus hostis, urgere scutis, micare gladiis: altera ex parte nutant circumspectantibus galeae, et incerti trepidant, adplicantque se turbae. Signa nunc resistentia deseruntur ab antesignanis, nunc inter suos manipulos recipiuntur. nondum fuga certa, nondum victoria erat. tegi magis Romanus, quam pugnare. Volscus inferre signa, urgere aciem, plus caedis hostium videre, quam fugae.

XXXVIII. Iam omnibus locis ceditur. nequidquam Sempronio consule obiurgante atque hortante, nihil nec imperium, nec maiestas valebat: dataque mox terga hostibus forent, ni Sex. Tempanius, decurio equitum, labente iam re, praesenti animo subvenisset. qui quum magna voce exclamasset, *ut equites, qui salvam rempublicam vellent esse, ex equis desilirent*; omnium turmarum equitibus, velut ad consulis imperium motis: *Nisi haec, inquit, parmata <sup>o)</sup> cohors sistat inpetum hostium, actum de imperio est. Sequimini pro vexillo cuspidem meam. ostendite Romanis Volscisque, neque equitibus vobis ullos equites, nec peditibus esse pedites pares.* Quum clamore comprobata adhortatio esset, vadit alte cuspidem gerens. quacumque incedunt, vi viam faciunt: se inferunt obiectis parmis, ubi suorum plurimum laborem vident. restituitur omnibus locis pugna, in quae eos inpetus tulit: nec dubium erat, quin, si tam pau-

m) *segnis* Gron. Crev. c. Drak.

n) add. *incerto clamore* Eaed. o) *armata* Eaed. c. Drak.

U. c. 332. ci simul obire omnia possent, terga daturi hostes  
 a. C. 420. fuerint.

XXXIX. Et quum iam parte nulla sustinerentur, dat signum Volscus <sup>p)</sup> imperator, ut parnatis, novae cohorti hostium, locus detur: donec inpetu inlati ab suis excludantur. Quod ubi est factum, interclusi equites: nec perrumpere eadem, qua transierant, posse; ibi maxime confertis hostibus, qua viam fecerant: et consul legionesque Romanae, quum quod tegumen modo omnis exercitus fuerat, nusquam viderent, ne tot fortissimos viros interclusos obprimeret hostis, tendunt in quemcumque casum. Diversi Volsci, hinc consulem ac legiones sustinere, altera fronte instare Tempanio atque equitibus. qui quum saepe conati nequissent perrumpere ad suos, tumulto quodam occupato, in orbem se tutabantur, nequaquam inulti. Nec pugnae finis ante noctem fuit. consul quoque, nusquam remisso certamine, dum quidquam superfuit lucis, hostem tenuit: nox incertos diremit: tantusque ab imprudentia eventus utraque castra tenuit pavor, ut, relictis sauciis et magna parte inpedimentorum, ambo pro victis exercitus se in montes proximos recipere. Tumulus tamen circumsessus ultra mediam noctem est. quo <sup>q)</sup> quum circumsedentibus nunciatum esset, castra deserta esse, victos rati suos, et ipsi, qua quemque in tenebris pavor tulit, fugerunt. Tempanius metu insidiarum suos ad lucem tenuit. degressus <sup>r)</sup> deinde ipse cum paucis speculatum, quum ab sauciis hostibus sciscitando comperisset, castra Volscorum deserta esse, laetus ab tumulto suos devocat, et in castra Romana penetrat. ubi quum vasta desertaque omnia, atque eandem, quam apud hostes, foeditatem invenisset, priusquam Volscos cognitus error reduceret, quibus poterat sauciis ductis secum, ignarus quam regionem

p) *Volscis* Gron.  
 q) *quo* del. Gron.

r) *digressus* Gron. Crev. c.  
 Drak.

consul petisset, ad urbem proximis itineribus pergit. U. c. 332.  
a. C. 420.

**XL.** Iam eo fama pugnae adversae castrorumque desertorum perlata erat: et ante omnia deplorati erant equites, non privato magis, quam publico luctu: Fabiusque consul, terrore urbi quoque iniecto, stationem ante portas agebat: quum equites, procul visi non sine terrore ab dubiis, quinam essent, mox cogniti, tantam ex metu laetiliam fecere, ut clamor urbem pervaderet gratulantium, salvos victoresque redisse equites: et ex moestis paulo ante domibus, quae conclamaverant suos, procurreretur in vias; pavidaeque matres ac coniuges, oblitae prae gaudio decoris, obviam agmini obcurrerent, in suos quaeque, simul corpore atque animo vix prae gaudio compotes, effusae. Tribunis plebi <sup>s)</sup>, qui M. Postumio et T. Quinctio diem dixerant, quod ad Veios eorum opera male pugnatum esset, occasio visa est per recens odium Sempronii consulis renovandae in eos invidiae. Itaque, advocata concione, quum proditam Veis rempublicam esse ab ducibus, proditum deinde, quia illis impune fuerit, in Volscis ab consule exercitum, traditos ad caedem fortissimos equites, deserta foede castra vociferati essent; C. Iulius, unus ex tribunis, Tempanium equitem vocari iussit; coramque eis, *Sexte Tempani, inquit, quaero de te, arbitrerisne C. Sempronium consulem aut in tempore pugnam inisse, aut firmasse subsidiis aciem, aut ullo boni consulis functum officio? et, tunc ipse, victis legionibus Romanis, tuo consilio equitem ad pedes deduxeris, restituerisque pugnam? excluso deinde ab acie nostra tibi atque equitibus num aut consul ipse subvenit, aut miserit praesidium? postero denique die ecquid praesidii usquam habueris? an tu cohorsque in castra vestra virtute perruperitis? ecquem in castris consulem, ecquem exercitum inveneritis? an deserta castra, relictos saucios milites?*

<sup>s)</sup> plebis Crev.

U. c. 352. *Haec pro virtute tua fideque, qua una hoc bello respublica*  
 a. C. 420. *stetit, dicenda tibi sunt hodie. Denique, ubi C. Sempronius,*  
*ubi legiones nostrae sint? desertus sis, an deserueris consu-*  
*tem exercitumque? victi denique simus, an vicerimus?*

XLI. Adversus haec Tempanii oratio incompta fuisse dicitur; ceterum militariter gravis, non suis vana laudibus, non crimine alieno laeta: *Quanta prudentia rei bellirae in C. Sempronio esset, non militis de imperatore existimationem* <sup>t)</sup> *esse, sed populi Romani fuisse, quum eum comitiis consulem legeret. Itaque ne ab se imperatoria consilia, neu consulares artes exquirere, quae pensitanda quoque magnis animis atque ingentiis essent; sed, quod viderit, referre posse. Vidisse autem se prius, quam ab acie intercluderetur, consulem in prima acie pugnantem, adhortantem, inter signa Romana telaque hostium versantem: postea se* <sup>u)</sup> *, ab conspectu suorum ablatum, ex strepitu tamen et clamore sensisse, usque ad noctem extractum certamen: nec ad tumultum, quem ipse tenuerat, praemultitudine hostium credere perrumpi potuisse. Exercitus ubi esset, se nescire: arbitrari, velut ipse in re trepida loci praesidio se suosque sit tutatus, sic consulem servandi exercitus causa loca tutiora castris cepisse. Nec Volscorum meliores res esse credere: quam populi Romani. Fortunam* <sup>x)</sup> *noctemque omnia erroris mutui in- plesse. precantemque deinde, ne se fessum labore ac vulneribus tenerent, cum ingenti laude, non virtutis magis, quam moderationis, dimissum. Quum haec agerentur, iam consul via Lavicana ad fanum Quietis erat. eo missa plaustra iumentaue alia ab urbe exercitum, adfectum proelio ac via nocturna, excepere. Paullo post in urbem est ingressus consul, non ab se magis enixe amovens culpam, quam Tempanium meritis laudibus ferens. Moestae civitati ab re male gesta et iratae ducibus M. Postumius reus ob-*

t) aestimationem Gron. Crev.

u) se del. Eacd.

x) Maiorem interpunctionem post fortunam habet Gron.



iectus, qui tribunus militum pro consule ad Veios fue-<sup>U. c. 332.</sup>  
 rat, decem millibus aeris gravis damnatur. T. Quin-<sup>a. C. 420.</sup>  
 ctium collegam eius, quia et in Volscis consul au-  
 spicio dictatoris Postunii Tuberti, et ad Fidenas le-  
 gatus dictatoris alterius Mam. Aemilii, res prospere  
 gesserat, totam culpam eius temporis in praedamnā-  
 tum collegam transferentem, omnes tribus absolve-  
 runt. profuisse ei Cincinnati patris memoria dicitur,  
 venerabilis viri, et exactae iam aetatis Capitolinus  
 Quinctius, suppliciter orans, ne se, brevi reliquo  
 vitae spatio, tam tristem nuncium ferre ad Cincinna-  
 tum paterentur.

XLII. Plebs tribunos plebi <sup>y)</sup> absentes, Sex.  
 Tempanium, A. Sellium, Sex. <sup>z)</sup> Antistium, et Sp.  
 Icilium <sup>a)</sup>, fecit; quos et pro centurionibus sibi prae-  
 fecerant, Tempanio auctore, equites. Senatus, quum  
 odio Sempronii consulare nomen offenderet, tribu-  
 nos militum consulari potestate creari iussit. creati <sup>U. c. 333.</sup>  
 sunt L. Manlius Capitolinus, Q. Antonius Merenda, <sup>a. C. 419.</sup>  
 L. Papirius Mugillanus. Principio statim anni L.  
 Hortensius tribunus plebis C. Sempronio consuli anni  
 prioris diem dixit. quem quum quatuor collegae, in-  
 spectante populo Romano, orarent, ne imperatorem  
 suum innoxium, in quo nihil praeter fortunam repre-  
 hendi posset, vexaret: aegre Hortensius pati, ten-  
 tationem eam credens esse perseverantiae suae; nec  
 precibus tribunorum, quae in speciem modo iactentur,  
 sed auxilio confidere reum. itaque modo ad eum con-  
 versus, *Ubi illi patricii spiritus, ubi subnisi et fidens*  
*innocentiae animus esset? quaerebat. sub tribunicia*  
*umbra consularem virum delituisse. modo ad collegas,*  
*Vos autem, si reum perago, quid acturi estis? an ere-*  
*pturi ius populo et eversuri tribuniciam potestatem?*  
 Quum illi, et de Sempronio et de omnibus summam po-  
 puli Romani potestatem esse, dicerent, nec se iudicium

y) plebis Gron. Crev.

z) L. Eaed.

a) Sex. Pompilius Eaed.

U. c. 535. *populi tollere aut velle, aut posse; sed, si preces suae*  
 a. C. 419. *pro imperatore, qui sibi parentis esset loco, non valuis-*  
*sent, se vestem cum eo mulaturos: tum Hortensius,*  
*Non videbit, inquit, plebs Romana sordidatos tribunos*  
*suos. C. Sempronium nihil moror, quando hoc est in*  
*imperio consecutus, ut tam carus esset militibus. Nec*  
*pietas quatuor tribunorum, quam Hortensii tam pla-*  
*cabile ad iustas preces ingenium, pariter plebi Patri-*  
*busque gratior fuit. Non diutius fortuna Aequis in-*  
*dulsit, qui ambiguam victoriam Volscorum pro sua*  
*amplexi fuerant.*

U. c. 554. XLIII. Proximo anno N. Fabio Vibulano, T.  
 a. C. 418. Quinctio, Capitolini filio, Capitolino consulibus, du-  
 ctu Fabii, cui sorte ea provincia evenerat, nihil dignum  
 memoratu actum. Quum trepidam tantum ostendis-  
 sent aciem Aequi, turpi fuga funduntur, haud ma-  
 gno consulis decore. itaque triumphus negatur. Ce-  
 terum ob Sempronianae cladis levatam ignominiam,  
 ut ovans urbem intraret, concessum est. Quemad-  
 modum bellum minore, quam timuerant, dimicatione  
 erat perfectum, sic in urbe ex tranquillo necopinata  
 moles discordiarum inter plebem ac Patres exorta est,  
 coepta ab duplicando quaestorum numero. quam rem,  
 (ut, praeter duos urbanos quaestores, duo consulibus  
 ad ministeria belli praesto essent) a consulibus rela-  
 tam, quum et Patres summa ope adprobassent, con-  
 sulibus tribuni plebis certamen intulerunt, ut pars  
 quaestorum (nam ad id tempus patricii creati erant)  
 ex plebe fieret. Adversus quam actionem primo et  
 consules et Patres summa ope adnisi sunt: conceden-  
 do deinde, ut, quemadmodum in <sup>b)</sup> tribunis consulari  
 potestate creandis usi sunt, adaeque in quaestoribus  
 liberum esset arbitrium populi, quum parum profice-  
 rent, totam rem de augendo quaestorum numero  
 omittunt. Excipiunt omissam tribuni, aliaeque sub-  
 inde, inter quas et agrariae legis, seditiosae actiones

b) in del. Gron. Crev.

exsistunt: propter quos motus quum senatus consu-<sup>U. c. 334.</sup>  
les, quam tribunos, creati mallet, neque posset per<sup>a. C. 418.</sup>  
intercessionem tribunicias senatusconsultum fieri; res-  
publica a consulibus ad interregnum, neque id ipsum  
(nam coire patricios tribuni prohibebant) sine certa-  
mine ingenti, redit. Quum pars maior insequentis  
anni per novos tribunos plebi<sup>c)</sup> et aliquot interreges  
certaminibus extracta esset, modo prohibentibus tri-  
bunis patricios coire ad prodendum interregem, mo-  
do interregem interpellantibus, ne senatusconsultum  
de comitiis consularibus faceret; postremo L. Papi-  
rius Mugillanus, proditus interrex, castigando nunc  
Patres, nunc tribunos plebi, *desertam omissamque ab*  
*hominibus rempublicam, Deorum providentia curaue*  
*exceptam*, memorabat, *Veientibus induciis et cuncta-*  
*tione Aequorum stare. Unde si quid increpet terroris,*  
*sine patricio magistratu placere rempublicam obprimi?*  
*non exercitum, non ducem scribendo exercitui esse? an*  
*bello intestino bellum externum propulsaturos? Quae si*  
*in unum conveniant, vix Deorum opibus, quin obrua-*  
*tur Romana res, resisti posse. quin illi, remittendo de*  
*summa quisque iuris, mediis copularent concordiam:*  
*Patres, patiendo tribunos militum pro consulibus fieri:*  
*tribuni plebis, non intercedendo, quo minus quatuor*  
*quaestores promiscue de plebe ac Patribus libero suffra-*  
*gio populi fierent.*

XLIV. Tribunicia primum comitia sunt habita.<sup>U. c. 335.</sup>  
creati tribuni consulari potestate omnes patricii, L.<sup>a. C. 417.</sup>  
Quinctius Cincinnatus tertium, L. Furius Medullinus  
iterum, M. Manlius, A. Sempronius Atratinus. Hoc  
tribuno comitia quaestorum habente, petentibusque  
inter aliquot plebeios filio Antistii tribuni plebis et fratre  
alterius tribuni plebis Sex. Pompilii, nec potestas, nec  
suffragatio horum valuit, quin, quorum patres avosque  
consules viderant, eos nobilitate praeferrent. Furere  
omnes tribuni plebis, ante omnes Pompilius Antistius-  
<sup>c)</sup> plebis Gron. Crev. it. paullo post: tribunos plebis.

U. c. 335. que, repulsa suorum accensi, *Quidnam id rei esset? non*  
 a. C. 417. *suis beneficiis, non Patrum iniuriis, non denique usur-*  
*pandi libidine, quum liceat, quod ante non licuerit, si*  
*non tribunum militarem, ne quaestorem quidem quem-*  
*quam ex plebe factum. non valuisse patris pro filio, fra-*  
*tris pro fratre preces, tribunorum plebis, potestatis sacro-*  
*sanctae, ad auxilium libertatis creatae. Fraudem pro-*  
*fecto in re esse, et A. Sempronium comitiis plus artis*  
*adhibuisse, quam fidei. Eius iniuria queri suos honore*  
*deiectos. Itaque quum in ipsum, et innocentia tutum*  
*et magistratu, in quo tunc erat, inpetus fieri non*  
*posset, flexere iras in C. Sempronium, patruelem*  
*Atratinum: eique ob ignominiam Volsci belli, adiutore*  
*collega M. Canuleio, diem dixere. Subinde ab iis-*  
*dem tribunis mentio in senatu de agris dividendis in-*  
*lata est, (cui actioni semper acerrime C. Sempronius*  
*restiterat) ratis, id quod erat, aut deposita caussa*  
*leviorem futurum apud Patres reum, aut perseve-*  
*rantem sub iudicii tempus plebem offensurum. Ad-*  
*versae invidiae obici maluit, et suae nocere caussae,*  
*quam publicae deesse; stetitque in eadem sententia,*  
*Ne qua largitio, cessura in trium gratiam tribunorum,*  
*fieret. nec tum agrum plebi, sed sibi invidiam, quae-*  
*ri. Se quoque subiturum eam tempestatem forti animo.*  
*nec senatui tanti se civem, aut quemquam alium debere*  
*esse, ut in parcendo uni malum publicum fiat. Nihilo*  
*demissiore animo, quum dies venit, caussa ipse pro*  
*se dicta, nequidquam omnia expertis Patribus, ut*  
*mitigarent plebem, quindecim millibus aeris damna-*  
*tur. Eodem anno Postumia, virgo Vestalis, de in-*  
*cestu caussam dixit, crimine innoxia; ob suspicionem*  
*propter cultum amoeniorem ingeniumque liberius,*  
*quam virginem decet, parum abhorrens famam. Am-*  
*pliatam, deinde absolutam, pro collegii sententia*  
*pontifex maximus abstinere iocis, colique sancte po-*  
*tius, quam scite, iussit. Eodem anno a Campanis*  
*Cumae, quam Graeci tum urbem tenebant, capiuntur.*



Insequens annus tribunos militum consulari potestate U. c. 336. habuit, Agrippam Menenium Lanatum, P. Lucre-<sup>a. C. 416.</sup> tium Tricipitinum, Sp. Nautium Rutilum<sup>d)</sup>.

XLV. Annus, felicitate populi Romani, periculo potius ingenti, quam clade, insignis. Servitia, urbem ut incenderent distantibus locis, coniurarunt; populoque ad opem passim ferendam tectis intento, ut arcem Capitoliumque armati occuparent. Avertit nefanda consilia Iupiter: indicioque duorum comprehensi soutes poenas dederunt. indicibus dena millia gravis aeris, quae tum divitiae habebantur, ex aenario numerata, et libertas praemium fuit. Bellum inde ab Aequis reparari coeptum: et, novos hostes Lavicanos consilia cum veteribus iungere, haud incertis auctoribus Romam est adlatum. Aequorum iam velut anniversariis armis adsuerat civitas. Lavicos legati missi quum responsa inde retulissent dubia, quibus, nec tum bellum parari, nec diuturnam pacem fore, adpareret: Tusculanis negotium datum, *adverterent animos, ne quid novi tumultus Lavicis ori-* U. c. 337.  
*retur.* Ad insequentis anni tribunos militum consu-<sup>a. C. 415.</sup> lari potestate, inito magistratu, legati ab Tusculo venerunt, L. Sergium Fidenatem, M. Papirium Mugillanum, C. Servilium, Prisci filium, quo dictatore Fidenae captae fuerant. Nunciabant legati, Lavicanos arma cepisse, et cum Aequorum exercitu depopulatos agrum Tusculanum castra in Algido posuisse. Tum Lavicanis bellum indictum: factoque senatusconsulto, ut duo ex tribunis ad bellum proficiscerentur, unus res Romae curaret, certamen subita inter tribunos exortum. se quisque belli ducem potiorrem ferre, curam urbis, ut ingratam ignobilemque, adspernari. Quum parum decorum inter collegas certamen mirabundi Patres conspicerent, Q. Servilius, *Quando nec ordinis huius ulla, inquit, nec reipublicae est verecundia, patria maiestas altercationem*

d) Sp. Nautium, C. Servilium Gron. Crev.

U. c. 537. *istam dirimet. filius meus extra sortem urbi praeerit.*  
 a. C. 415. *Bellum utinam, qui adpetunt, consideratius concordi-  
 diusque, quam cupiunt, gerant.*

XLVI. Delectum haberi non ex toto passim populo placuit. decem tribus sorte ductae sunt; ex his scriptos iuniores duo tribuni ad bellum duxere. Coepta inter eos in urbe certamina cupiditate eadem imperii multo inpeusius in castris accendi: nihil sentire idem, pro sententia pugnare: sua consilia velle, sua imperia sola rata esse: contemnere in vicem, et contemni. donec, castigantibus legatis, tandem ita comparatum est, ut alternis diebus summam imperii haberent. Quae quum adlata Romam essent, dicitur Q. Servilius, aetate et usu doctus, precatus ab Diis immortalibus, ne discordia tribunorum damnosior reipublicae esset, quam ad Veios fuisset: et, velut haud dubia clade imminente, institisse filio, ut milites scriberet, et arma pararet. Nec falsus vates fuit. nam ductu L. Sergii, cuius dies imperii erat, loco iniquo sub hostium castris, quum, quia simulato metu receperat se hostis ad vallum, spes vana expugnandi castra eo traxisset, repentino impetu Aequorum per supinam vallem fusi sunt, multique in ruina maiore quam fuga obpressi obtruncatique: castraque, eo die aegre retenta, postero die, circumfusus iam magna ex parte hostibus, per aversam portam fuga turpi deseruntur. duces legatique, et quod circa signa roboris de exercitu fuit, Tusculum petiere. Palati alii per agros passim multis itineribus, maioris, quam accepta erat, cladis nuncii Romam contenderunt. Minus trepidationis fuit, quod eventus timori hominum congruens fuerat; et quod subsidia, quae respicerent in re trepida, praeparata erant ab tribuno militum: iussuque eiusdem, per minores magistratus sedato in urbe tumultu, speculatores propere missi nunciavere, Tusculi duces exercitumque esse; hostem castra loco non movisse. et, quod plu-

rimum animorum fecit, dictator ex senatusconsulto dictus Q. Servilius Priscus; vir, cuius providentiam in republica quum multis aliis tempestatibus ante experta civitas erat, tum eventu eius belli, quod unicertamen tribunorum suspectum ante rem male gestam fuerat; magistro equitum creato, a quo ipse tribuno militum dictator erat dictus, filio suo, ut tradidere quidam, (nam alii Ahalam Servilium magistrum equitum eo anno fuisse scribunt) novo exercitu profectus ad bellum, aditis qui Tusculi erant, duo milia passuum ab hoste locum castris cepit.

XLVII. Transierat ex re bene gesta superbia negligentiaque ad Aequos, quae in Romanis ducibus fuerat. itaque primo statim proelio quum dictator equitatu inmisso antesignanos hostium turbasset, legionum inde signa inferri propere iussit, signiferumque ex suis unum cunctantem occidit. Tantus ardor ad dimicandum fuit, ut inpetum Aequi non tulerint: victique acie quum fuga effusa petissent castra, brevior tempore et certamine minor castrorum obpugnatio fuit, quam proelium fuerat. Captis direptisque castris, quum praedam dictator militi concessisset, ecutique fugientem ex castris hostem equites renuntiassent, omnes Lavicanos victos, magnam partem Aequorum Lavicos confugisse; postero die ad Lavicos ductus exercitus: oppidumque, corona circumdatum, scalis captum ac direptum est. Dictator, exercitu victore Romam reducto, die octavo, quam creatus erat, magistratu se abdicavit; et opportune senatus, priusquam ab tribunis plebi<sup>e</sup>) agrariae seditioes, mentione inlata de agro Lavicano dividendo, erent, censuit frequens, coloniam Lavicos deducendam. coloni ab urbe mille et quingenti missi bina iura acceperunt. Captis Lavicis, ac deinde tribunis militum consulari potestate, Agrippa Menenio Lato, et L. Servilio Structo, et P. Lucretio Tricipite) plebis Crev.

U. c. 357.

a. C. 415.

U. c. 373.

a. C. 414.

U. c. 538. tino, iterum omnibus his, et Sp. Rutilio Crasso, et  
 a. C. 414. insequente <sup>f)</sup> anno A. Sempronio Atratinum tertium,  
 et duobus iterum M. Papirio Mugillano, et Sp. Nau-  
 tio Rutilo, biennium tranquillae externae res, dis-  
 cordia domi ex agrariis legibus fuit.

XLVIII. Turbatores vulgi erant Spurii Maeci-  
 lius quartum et Metilius tertium tribuni plebis, ambo  
 absentes creati. et quum rogationem promulgassent,  
 ut ager ex hostibus captus viritum divideretur, ma-  
 gnaeque partis nobilium eo plebiscito publicarentur  
 fortunae; (nec enim ferne quidquam agri, ut in urbe  
 alieno solo posita, non armis partum erat; nec, quod  
 venisset adsignatumve publice esset, praeterquam  
 plebs habebat) atrox plebi Patribusque propositum vi-  
 debatur certamen: nec tribuni militum, nunc in se-  
 natu, nunc in conciliis privatis principum cogendis  
 viam consilii inveniebant; quum Ap. Claudius  
 nepos eius qui decemvir legibus scribendis fue-  
 rat, minimus natus ex Patrum concilio <sup>g)</sup> dicitur di-  
 xisse, *Vetus se ac familiare consilium domo adferre. proa-  
 rum enim suum Ap. Claudium ostendisse Patribus via-  
 unam dissolvendae tribuniciae potestatis per collegarum  
 intercessionem. Facile homines novos auctoritate prin-  
 cipum de sententia deduci, si temporum interdum po-  
 tius, quam maiestatis, memor adhibeatur oratio. Pri-  
 fortune illis animos esse. ubi videant, collegas prin-  
 cipes agenda rei gratiam omnem ad plebem praeocci-  
 passe, nec locum in ea relictum sibi; haud gravate ac-  
 clinaturos se ad causam senatus, per quam univer-  
 ordine cum primoribus se Patrum concilient. Adpro-  
 bantibus cunctis, et ante omnes Q. Servilio Prisco  
 quod non degenerasset ab stirpe Claudia, conlaudando  
 iuvenem, negotium datur, ut, quos quisque posset ex co-  
 legio tribunorum, ad intercessionem perlicerent. Mis-  
 senatu, prensantur ab principibus tribuni: suadend*

f) insequenti Gron. Crev.

g) consilio Crev



monendo, pollicendoque gratum id singulis privatim gra- U. c. 339.  
tum universo senatui fore, sex ad intercessionem com- a. C. 413.  
paravere. Posteroque die quum ex composito relatum  
ad senatum esset de seditione, quam Maecilius Metilius-  
que largitione pessimi exempli concirent; eae orationes  
a primoribus Patrum habitae sunt, ut pro se quisque  
iam nec consilium sibi subpetere diceret, nec se ul-  
lam opem cernere aliam usquam, praeterquam in tri-  
bunicio auxilio. in eius potestatis fidem circumven-  
tam rempublicam, tamquam privatum in opem, confu-  
gere. Praeclarum ipsis potestatique esse, non ad ve-  
xandum senatum discordiamque ordinum movendam  
plus in tribunatu virium esse, quam ad resistendum  
in probis collegis. Fremitus deinde universi sena-  
tus ortus, quum ex omnibus partibus curiae tribuni  
adpellarentur: tum, silentio facto, ii, qui praeparati  
erant gratia principum, quam rogationem a collegis  
promulgatam senatus censeat dissolvendae reipublicae  
esse, ei se intercessuros ostendunt. Gratiae interces-  
soribus ab senatu actae. Latores rogationis, concio-  
ne advocata, proditores plebis commodorum ac servos  
consularium adpellantes, aliaque truci oratione in col-  
legas invecti, actionem deposuere.

XLIX. Duo adsidua bella insequens annus ha- U. c. 340.  
buisset, quo P. Cornelius Cossus, C. Valerius Potitus, a. C. 412.  
Q. <sup>h)</sup> Quinctius Cincinnatus, N. Fabius Vibulanus,  
tribuni militum consulari potestate fuerunt; ni Ve-  
iens bellum religio principum distulisset, quorum  
agros Tiberis super ripas effusus, maxime ruinis vil-  
larum vastavit. Simul Aequos triennio ante accepta  
clades prohibuit Bolanis <sup>i)</sup>, suae gentis populo, prae-  
sidium ferre. Excursiones inde in confinem agrum  
Lavicanum factae erant, novisque colonis bellum in-  
latum. quam noxam quum se consensu omnium Ae-  
quorum defensuros sperassent, deserti ab suis, ne

h) Q. del. Gron. Crev. [tu i) Volanis Eaed.  
Crev. min. Q. legitur.]

U. c. 510. memorabili quidem bello, per obsidionem levemque

a. C. 412. unam pugnam et oppidum et fines amisere. Tentatum ab L. Sextio tribuno plebis, ut rogationem ferret, qua Bolas<sup>k)</sup> quoque, sicut Lavicos, coloni mitterentur, per intercessionem collegarum, qui nullum plebiscitum, nisi ex auctoritate senatus, passuros se perferri ostenderunt, discussum est. Bolis insequente anno receptis, Aequi, coloniaque eo deducta, novis viribus oppidum firmarunt, tribunis militum Ro-

U. c. 511. mae consulari potestate Cn. Cornelio Cosso, L. Vallerio Potito, Q. Fabio Vibulano iterum, M. Postumio

a. C. 411. Regillensi. Huic bellum adversus Aequos permissum est, pravae mentis homini; quam tamen victoria magis, quam bellum, ostendit. Nam exercitu in pigre scripto ductoque ad Bolas, quum levibus proeliis Aequorum animos fregisset, postremo in oppidum inrupit. deinde ab hostibus in cives certamen vertit: et, quum inter obpugnationem praedam militis fore edixisset, capto oppido, fidem mutavit. Eam, magis adducor, ut credam irae causam exercitui fuisse, quam quod in urbe nuper direpta coloniaque nova minus praedicatione tribuni praedae fuerit. Auxit eam iram, postquam, ab collegis arcessitus, propter seditiones tribunicias in urbem revertit, audita vox eius in concione stolidi ac prope vecors; qua Sextio tribuno plebis, legem agrariam ferenti, simul, Bolas quoque ut mitterentur coloni, laturum se dicenti, dignos enim esse qui armis cepissent, eorum urbem agrumque Bolarum esse; *Malum quidem militibus meis*, inquit, *nisi quieverint*. quod auditum non concionem magis, quam mox Patres, obfendit. et tribunus plebis, vir acer nec infacundus, nactus inter adversarios superbum ingenium inmodicamque linguam, quam irritando agitandoque in eas inpelleret voces, quae invidiae, non ipsi tantum, sed cassae atque universo ordini,

k) *Volas* Gron. Crev. et sic semper deinceps.

essent, neminem ex collegio tribunorum militum sae-<sup>U. c. 341.</sup>  
pius, quam Postumium, in disceputationem trahebat.<sup>a. C. 411.</sup>  
Tum vero secundum tam saevum atque inhumanum  
dictum, *Auditis, inquit, Quirites, sicut servis malum*  
*minantem militibus? tamen haec bellua dignior vobis*  
*tanto honore videbitur, quam qui vos, urbe agrisque do-*  
*natos, in colonias mittunt; qui sedem senectuti vestrae*  
*prospiciunt; qui pro vestris commodis adversus tam cru-*  
*deles superbosque adversarios depugnant. Incipite dein-*  
*de mirari, cur pauci iam vestram suscipiant causam.*  
*quid ut a vobis sperent? an honores, quos adversariis*  
*vestris potius, quam populi Romani propugnatoribus,*  
*datis? Ingemuistis modo, voce huius audita quid*  
*id refert? Iam, si suffragium detur, hunc, qui malum*  
*vobis minatur, iis, qui agros sedesque ac fortunas sta-*  
*bilire volunt, praeferetis.*

L. Perlata haec vox Postumii ad milites multo  
in castris maiorem indignationem movit. *Praedaene*  
*interceptorem fraudatoremque etiam malum minari*<sup>1)</sup>  
*militibus?* Itaque quum fremitus aperte esset, et quae-  
stor P. Sestius eadem violentia coerceri putaret se-  
ditionem posse, qua mota erat; misso ad vociferan-  
tem quemdam militem lictore, quum inde clamor et  
iurgium oriretur, saxo ictus turba excedit; insuper  
increpante, qui vulneraverat, *habere quaestorem, quod*  
*imperator esset militibus minatus.* Ad hunc tumultum  
adcitus Postumius asperiora omnia fecit acerbis quae-  
stionibus, crudelibus suppliciis. postremo quum modum  
irae nullum faceret, ad vociferationem eorum, quos  
necari sub crate iusserat, concursu facto, ipse ad in-  
terpellantes poenam vecors de tribunali decurrit. Ibi  
quum submoventes passim lictores centurionesque  
vexarent turbam, eo indignatio erupit, ut tribunus  
militum ab exercitu suo lapidibus cooperiretur. Quod  
tam atrox facinus postquam est Romam nunciatum,

1) minitari Gron. Cray.

U. c. 541. tribunis militum de morte collegae per senatum quæ-  
 a. C. 411. stiones decernentibus, tribuni plebis intercedebant.  
 sed ea contentio ex certamine alio pendebat; quod  
 cura inceseras Patres, ne metu quaestionum plebs  
 iraque <sup>m)</sup> tribunos militum ex plebe crearet: tende-  
 bantque summa ope, ut consules crearentur. Quum  
 senatusconsultum fieri tribuni plebis non paterentur,  
 iidem intercederent consularibus comitiis, res ad in-  
 terregnum rediit. victoria deinde penes Patres fuit.

U. c. 542. LI. Q. Fabio Vibulano interrege comitia ha-  
 a. C. 410. bente, consules creati sunt A. <sup>n)</sup> Cornelius Cossus,  
 L. Furius Medullinus. His consulibus principio an-  
 ni senatusconsultum factum est, ut de quaestione Po-  
 stumianae caedis tribuni primo quoque tempore ad  
 plebem ferrent; plebesque praeficeret quaestioni, quem  
 vellet. A plebe consensu populi consulibus negoti-  
 um mandatur. qui, summa moderatione ac lenitate  
 per paucorum supplicium, quos sibimet ipsos conscis-  
 se mortem satis creditum est, transacta re, nequi-  
 vere tamen consequi, ut non aegerrime id plebs fer-  
 ret. *iacere tamdiu irritas sanctiones, quæ de suis  
 commodis ferrentur: quum interim de sanguine et sup-  
 plicio suo latam legem confestim exerceri, et tantam vim  
 habere.* Aptissimum tempus erat, vindicatis seditio-  
 nibus, delinimentum <sup>o)</sup> animis Bolani agri divisionem  
 obiiici: quo facto minuissent desiderium agrariae le-  
 gis, quæ possesso per iniuriam agro publico Patres  
 pellebat. Tunc <sup>p)</sup> haec ipsa indignitas angebat ani-  
 mos, non in retinendis modo publicis agris, quos vi  
 teneret, pertinacem nobilitatem esse; sed ne vacu-  
 um quidem agrum, nuper ex hostibus captum, plebi  
 dividere; mox paucis, ut cetera, futurum praedae.  
 Eodem anno adversus Volscos, populantes Hernico-  
 rum fines, legiones ductae a Furio consule, quum  
 hostem ibi non invenissent, Ferentinum, quo magna

<sup>m)</sup> irata Gron.

<sup>n)</sup> M. Gron. Crev.

<sup>o)</sup> delinimentum Eaed.

<sup>p)</sup> tum Eaed.



multitudo Volscorum se contulerat, cepere. Minus <sup>U. c. 342.</sup>  
 praedae, quam speraverant, fuit: quod Volsci, post-<sup>a. C. 410.</sup>  
 quam spes tuendi exigua erat, sublatis rebus, nocte  
 oppidum reliquerunt. postero die prope desertum  
 capitur. Hernicis ipse ager dono datus. <sup>U. c. 343.</sup>

LII. Annum modestia tribunorum quietum ex-<sup>a. C. 409.</sup>  
 cepit tribunus plebis L. Icilius, Q. Fabio Ambusto,  
 C. Furio Pacilo consulibus. Is quum <sup>q)</sup> principio  
 statim anni, velut pensum nominis familiaeque, se-  
 ditiones agrariis legibus promulgandis cieret; pesti-  
 lentia coorta, minacior tamen quam perniciosior, co-  
 gitationes hominum a foro certaminibusque publicis  
 ad domum curamque corporum nutriendorum aver-  
 tit. minusque eam damnosam fuisse, quam seditio  
 futura fuerit, credunt. Defuncta civitate plurimorum  
 morbis, perpaucis funeribus, pestilentem annum in-  
 opiafrugum, neglecto cultu agrorum, (ut plerumque <sup>U. a. 344.</sup>  
 fit) excepit, M. Papirio Atratino, C. Nautio Rutilo <sup>a. C. 408.</sup>  
 consulibus. Iam fames, quam pestilentia, tristior  
 erat: ni, dimissis circa omnes populos legatis, qui  
 Etruscum mare, quique Tiberim adcolunt, ad fru-  
 mentum mercandum, annonae foret subventum. Su-  
 perbe ab Samnitibus, qui Capuam habebant Cumas-  
 que, legati prohibiti commercio sunt: contra ea be-  
 nigne ab Siculorum tyrannis adiuti. maximos com-  
 meatus summo Etruriae studio Tiberis devexit. Soli-  
 tudinem in civitate aegra experti consules sunt: quum,  
 in legationes non plus singulis senatoribus invenien-  
 tes, coacti sunt binos equites adiicere. Praeterquam  
 ab morbo annonaeque nihil eo biennio intestini exter-  
 nive incommodi fuit. at ubi hae sollicitudines dis-  
 cessere, omnia, quibus turbari solita erat civitas, do-  
 mi discordia, foris bellum exortum.

LIII. M<sup>r</sup>. <sup>r)</sup> Aemilio, C. Valerio Potito consu-<sup>U. c. 345.</sup>  
 libus, bellum Aequi parabant: Volscis, quamquam <sup>a. C. 407.</sup>

q) tum Gron.

Crev. min. Manio legitur.]

r) Mamercio Gron. Crev. [In

U. c. 545. non publico consilio, capessentibus arma, voluntariis  
 a. C. 407. mercede secutis militiam. Ad quorum famam hosti-  
 um (iam enim in Latinum Hernicumque transcenderant  
 agrum) delectum habentem Valerium consulem M.  
 Maenius tribunus plebis, legis agrariae lator, quum  
 impediret, auxilioque tribunum nemo invitus sacramen-  
 to diceret; repente nunciatur, arcem Carventanam  
 ab hostibus occupatam esse. Ea ignominia accepta  
 quum apud Patres invidiae Maenio fuit, tum ceteris  
 tribunis, iam ante praeparatis intercessoribus legis  
 agrariae, praeiuit iustiore causam resistendi col-  
 legae. Itaque quum res diu ducta per altercationem  
 esset, consulibus Deos hominesque testantibus, *quid-  
 quid ab hostibus cladis ignominiaeque aut iam accep-  
 tum esset, aut immineret, culpam penes Maenium fore,  
 qui delectum impediret; Maenio contra vociferante,  
 si iniusti domini possessione agri publici cederent, se mo-  
 ram delectui non facere; decreto interposito, novem  
 tribuni sustulerunt certamen; pronunciaveruntque ex  
 collegii sententia, C. Valerio consuli se, damnum ali-  
 amque coercionem, adversus intercessionem collegae,  
 delectus causa detrectantibus militiam inhibenti, au-  
 xilio futuros esse.* Hoc decreto consul armatus quum  
 paucis, adpellantibus tribunum, collum torsisset, me-  
 tu ceteri sacramento dixere. Ductus exercitus ad  
 Carventanam arcem, quamquam invisus infestusque  
 consuli erat, in pigre primo statim adventu, deiectis  
 qui in praesidio erant, arcem recipit. praedatores,  
 ex praesidio per negligentiam dilapsi, occasionem  
 apernere ad invadendum. Praedae ex adsiduis po-  
 pulationibus, quod omnia in locum tutum congesta  
 erant, fuit aliquantum. venditum sub hasta consul  
 in aerarium redigere quaestores iussit; tum praedicans  
 participem praedae fore exercitum, quum militiam non  
 abnuisset. Auctae inde plebis ac militum in consulem  
 irae. itaque, quum ex senatusconsulto urbem ovans in-  
 troiret, alternis inconditi versus militari licentia iacta-

ti: quibus consul increpitus, Maenii celebre nomen laudibus fuit, quum ad omnem mentionem tribuni favor circumstantis populi plausuque et adsensu cum vocibus militum certaret. Plusque ea res, quam prope sollemnem militum lascivia in consulem, curae Patribus iniecit. et tamquam haud dubius inter tribunos militum honos Maenii, si peteret, consularibus comitiis est exclusus.

LIV. Creati consules sunt Cn. Cornelius Cossus, L. Furius Medullinus iterum. Non alias aegrius plebs tulit, tribunicia sibi comitia non commissa. eum dolorem quaestoriis comitiis simul ostendit, et ulta est, tunc primum plebeiis quaestoribus creatis: ita ut, in quatuor creandis, uni patricio K. Fabio Ambusto relinqueretur locus; tres plebei, Q. Silius, P. Aelius, P. Pupius clarissimarum familiarum iuvenibus praferrentur. Auctores fuisse tam liberi populo suffragii Icilius accipio, ex familia infestissima Patribus tres in eum annum tribunos plebis creatos, multarum magnarumque rerum molem avidissimo adeo populo ostentantes: quum adfirmassent, nihil se moturos, si ne quaestoriis quidem comitiis, quae sola promiscua plebi Patribusque reliquisset senatus, satis animi populo esset ad id, quod tamdiu vellent, et per leges liceret. Pro ingenti itaque victoria id fuit plebi: quaesturamque eam non honoris ipsius fine aestimabant; sed patefactus ad consulatum ac triumphos locus novis hominibus videbatur. Patres contra, non pro communicatis, sed pro amissis honoribus, fremere: negare, *Si ea ita sint, liberos tollendos esse; qui pulsi maiorum loco, cernentesque alios in possessione dignitatis suae, Salii Flaminesque nusquam alio, quam ad sacrificandum pro populo, sine imperiis ac potestatibus relinquuntur.* Irritatis utriusque partis animis, quum et spiritus plebes sumsisset, et tres ad popularem causam celeberrimi nominis haberet duces; Patres omnia quaestoriis comitiis, ubi

U. c. 346. utrumque plebi liceret, similia fore cernentes, tendere ad consulum comitia, quae nondum promiscua essent. Icilio contra tribunos militum creandos dicere, et tandem aliquando inpartiendos plebi honores.

LV. Sed nulla erat consularis actio, quam impediendo id, quod petebant, exprimerent; quum mira opportunitate, Volscos et Aequos praedatum extra fines exisse in agrum Latinum Hernicumque, adferretur. ad quod bellum ubi ex senatusconsulto consules delectum habere occipiunt; obstare tunc enixe tribuni, sibi plebique eam fortunam oblatam memorantes. Tres erant, et omnes acerrimi viri, generosique iam <sup>s)</sup> ut inter plebeios. duo, singuli singulos, sibi consules adservandos adsidua opera desumunt: uni concionibus data nunc detinenda, nunc concienda plebs. Nec delectum consules, nec comitia, quae petebant, tribuni expetiebant. inclinante deinde se <sup>t)</sup> fortuna ad causam plebis, nuncii veniunt, arcem Carventanam, dilapsis ad praedam militibus, qui in praesidio erant, Aequos, interfectis paucis custotibus arcis, invasisse. alios recurrentes in arcem, alios palantes in agris caesos. Ea adversa civitati res vires tribuniciae actioni adiecit. nequidquam enim tentati, ut tum denique desisterent impediendo bello, postquam non cessere nec publicae tempestati, nec suae invidiae, pervincunt, ut senatusconsultum fiat de tribunis militum creandis: certo tamen pacto, ne cuius ratio haberetur, qui eo anno tribunus plebis esset: neve quis reficeretur in annum tribunus plebis; haud dubie Icilio denotante senatu, quos mercedem seditiosi tribunatus petere consulatum insimulabant. Tum delectus haberi, bellumque omnium ordinum consensu adparari coeptum. Consules ambo profecti sint ad arcem Carventanam, an alter ad comitia habenda

s) *etiam* Grön.

t) *se* del. Grön. Crev.



substituterit, incertum diversi auctores faciunt: illa pro U. c. 346. certo habenda, in quibus non dissentiunt, ab arce<sup>a. C. 406.</sup> Carventana, quum diu nequidquam obpugnata esset, recessum: Verruginem in Volscis eodem exercitu receptam, populationesque et praedas et in Aequis et in Volseo agro ingentes factas.

LVI. Romae sicut plebis victoria fuit in eo, ut, quae mallent, comitia haberent: ita eventu comitio-U. c. 347. rum Patres vicere. namque tribuni militum consulari<sup>a. C. 405.</sup> potestate contra spem omnium tres patricii creati sunt, C. Iulius Iulus, P. Cornelius Cossus, C. Servilius Ahala. Artem adhibitam ferunt a patriciis, (cuius eos Icilius tum quoque insimulabant) quod turbam indignorum candidatorum intermiscendo dignis, taedio sordium in quibusdam insignium, populum a plebeiis avertissent. Volscos deinde et Aequos, seu Carventana arx retenta in spem, seu Verrugine amissum praesidium ad iram compulisset, fama adfertur summa vi ad bellum coortos: caput rerum Antiates esse: eorum legatos utriusque gentis populos circumnisse, castigantes ignaviam, quod, abditi intra muros, populabundos in agris vagari Romanos priore anno, et obprimi Verruginis praesidium, passi essent. iam non exercitus modo armatos, sed colonias etiam, in suos fines mitti: nec ipsos modo Romanos sua divisa habere, sed Ferentinum etiam de se captum Hernicis donasse. Ad haec quum inflammarentur animi, ut ad quosque ventum erat, numerus iuniorum conscribebatur. Ita omnium populorum iuventus Antium contracta, ibi castris positus hostem opperiebantur. Quae ubi tumultu maiore etiam, quam res erat, nunciantur Romam, senatus extemplo (quod in rebus trepidis ultimum consilium erat) dictatorem dici iussit. quam rem aegre passos Iulium Corneliumque ferunt; magnoque certamine animorum rem actam: quum primores Patrum, nequidquam conquesti, non esse in auctoritate senatus tribunos militum, postremo etiam

U. c. 347. tribunos plebei <sup>u)</sup> adpellarent, et consulibus quoque  
 a. C. 405. ab ea potestate vim super tali re inhibitam referrent:  
 tribuni plebei, laeti discordia Patrum, nihil esse in  
 his auxilii dicerent, qui non civium, non denique  
 hominum numero essent; si quando promiscui ho-  
 nores, communicata respublica esset, tum se animad-  
 versuros, ne qua, superbia magistratuum, irrita sena-  
 tusconsulta essent; interim patricii, soluti legum ma-  
 gistratuumque verecundia, per se quoque tribunici-  
 am potestatem agerent.

LVII. Haec contentio minime idoneo tempore,  
 quum tantum belli in manibus esset, occupaverat co-  
 gitationes hominum: donec, ubi diu alternis Julius  
 Corneliusque, *quum ad id bellum ipsi satis idonei du-  
 ces essent, non esse aequum, mandatum sibi a populo  
 eripi honorem*, disseruere; tum Ahala Servilius tribu-  
 nus militum, *Tacuisse se tamdiu*, ait, *non quia incer-  
 tus sententiae fuerit; (quem enim bonum civem secerne-  
 re sua a publicis consilia?) sed quia maluerit, collegas  
 sua sponte cedere auctoritati senatus, quam tribuni-  
 ciam potestatem adversus se inplorari paterentur. Tum  
 quoque, si res sineret, libenter se daturum tempus iis  
 fuisse ad receptum nimis pertinacis sententiae, sed,  
 quum belli necessitates non expectent humana consilia,  
 potiore sibi collegarum gratia rempublicam fore: et,  
 si maneat in sententia senatus, dictatorem nocte proxi-  
 ma dicturum; ac, si quis intercedat senatusconsulto,  
 auctoritate se fore contentum.* Quo facto quum haud  
 inmeritam laudem gratiamque apud omnes tulisset,  
 dictatore P. Cornelio dicto, ipse ab eo magister equi-  
 tum creatus exemplo fuit collegas eumque intuenti-  
 bus, quam gratia atque honos opportuniora interdum  
 non cupientibus essent. Bellum haud memorabile  
 fuit. uno atque eo facili proelio caesi ad Antium ho-

u) plebi Gron. sic et paullo post: tribuni plebi.

stes. victor exercitus depopulatus Volscum agrum. U. c. 347.  
 castellum ad lacum Fucinum vi expugnatum: atque<sup>a. C. 405.</sup>  
 in eo tria millia hominum capta, ceteris Volscis in-  
 tra moenia compulsis, nec defendentibus agros. Di-  
 ctator, bello ita gesto, ut tantum non defuisse fortu-  
 nae videretur, felicitate, quam gloria, maior in ur-  
 bem rediit, magistratuque se abdicavit. Tribuni mi-  
 litum, mentione nulla comitiorum consularium ha-  
 bita, (credo ob iram dictatoris creati) tribunorum  
 militum comitia edixerunt. Tum vero gravior cura  
 Patribus incessit; quippe quum prodi causam ab suis  
 cernerent. Itaque sicut priore anno per indignissi-  
 mos ex plebeiis candidatos omnium, etiam dignorum,  
 taedium fecerant; sic tum, Primoribus Patrum splen-  
 dore gratiaque ad petendum praeparatis, omnia loca  
 obtinere; ne cui plebeio aditus esset. Quatuor<sup>U. c. 343.</sup>  
 creati sunt, omnes iam functi eo honore, L. Furius<sup>a. C. 404.</sup>  
 Medullinus, C. Valerius Potitus, N. Fabius Vibula-  
 nus, C. Servilius Ahala. hic reffectus continuato ho-  
 nore, quum ob alias virtutes, tum ob recentem favo-  
 rem unica moderatione partum,

LVIII. Eo anno, quia tempus induciarum cum  
 Veienti populo exierat, per legatos fecialesque res  
 repeti coeptae. quibus venientibus ad finem legatio  
 Veientium obviam fuit. Petiere, ne prius, quam  
 ipsi senatum Romanum adissent, Veios iretur. Ab  
 senatu inpetratum, quia discordia intestina laborarent  
 Veientes, ne res ab iis repeterentur. tantum afuit, ut  
 ex incommodo alieno sua occasio peteretur. Et in  
 Volscis accepta clades, amisso Verrugine praesidio.  
 ubi tantum in tempore fuit momenti, ut, quum pre-  
 cantibus opem militibus, qui ibi a Volscis obsideban-  
 tur, succurri, si maturatum esset, potuisset, ad id  
 venerit exercitus subsidio missus, ut ab recenti cae-  
 de palati ad praedandum hostes obprimerentur. Tar-  
 ditatis causa in senatu magis fuit, quam in tribunis:

U. c. 348. qui, quia summa vi restare nunciabantur, parum co-  
 a. C. 404. gitaverunt, nulla virtute superari humanarum virium  
 modum. Fortissimi milites non tamen, nec vivi,  
 nec post mortem, inulti fuere. Insequenti anno, P.  
 U. c. 349. et Cn. Corneliis Cossis, N. Fabio Ambusto, L. Va-  
 a. C. 403. lerio Potito, tribunis militum consulari potestate,  
 Veiens bellum motum ob superbum responsum Ve-  
 ientis senatus; qui legatis repetentibus res, ni faces-  
 serent propere urbe finibusque, daturus, quod Lars  
 Tolumnius dedisset, responderi iussit. Id Patres  
 aegre passi decrevere, ut tribuni militum de bello in-  
 dicendo Veientibus primo quoque die ad populum  
 ferrent. Quod ubi primo promulgatum est, fremere  
 iuventus, *Nondum debellatum cum Volscis esse: modo  
 duo praesidia occisione occisa, et cum periculo retineri.  
 Nullum annum esse, quo non acie dimicetur: et, tam-  
 quam poeniteat laboris, novum bellum cum finitimo po-  
 pulo et potentissimo parari, qui omnem Etruriam sit  
 concitaturus.* Haec sua sponte agitata. insuper tribu-  
 ni plebis accendunt: *Maximum bellum Patribus cum  
 plebe esse dictitant: eam de industria vexandam militia  
 trucidandamque hostibus obiici: eam procul urbe ha-  
 beri atque ablegari, ne domi per otium memor liberta-  
 tis coloniarumque, aut agri publici, aut suffragii libe-  
 re ferendi consilia agitet: prensantesque veteranos,  
 stipendia cuiusque et vulnera ac cicatrices numera-  
 bant: quid iam integri esse in corpore loci ad nova vul-  
 nera accipienda? quid super sanguinis, qui dari pro  
 republica posset? rogantes.* Haec quum in sermo-  
 nibus concionibusque interdum agitantes avertissent  
 plebem ab suscipiendo bello, profertur tempus ferun-  
 dae x) legis: quam, si subiecta invidiae esset, anti-  
 quari adparebat.

### LIX. Interim tribunos militum in Volscum agrum

x) ferendae Crev. Gron.



ducere exercitum placuit. Cn. Cornelius unus Romae relictus. Tres tribuni, postquam nullo loco castra Volscorum esse, nec commissuros se proelio adparuit, tripartito ad devastandos fines discessere. Valerius Antium petit, Cornelius Ecetras: quacumque incessere, late populati sunt tecta agrosque, ut distinerent Volscos: Fabius, quod maxime petebatur, ad Anxur obpugnandum sine ulla populatione accessit. Anxur fuit, quae nunc Tarracinae sunt; urbs prona in paludes. ab ea parte Fabius obpugnationem ostendit. Circummissae quatuor cohortes cum C. Servilio Ahala quum imminentem urbi collem cepissent; ex loco altiore, qua nullum erat praesidium, ingenti clamore ac tumultu moenia invasere. ad quem tumultum obstupefacti, qui adversus Fabium urbem infirmam tuebantur, locum dedere scalas admovendi, pleneque hostium cuncta erant, et inmitis <sup>y)</sup> diu caedes pariter fugientium ac resistentium armatorum atque inermium fuit. Cogebantur itaque victi, quia cedentibus spei nihil erat, pugnam inire: quum pronuntiatum repente, ne quis praeter armatos violaretur; reliquam omnem multitudinem voluntariam exuit armis: quorum ad duo millia et quingenti vivi capiuntur. a cetera praeda Fabius militem abstinuit; donec collegae venirent: ab illis quoque exercitibus captum Anxur dictitans esse, qui ceteros Volscos a praesidio eius loci avertissent. Qui ubi venerunt, oppidum vetere fortuna opulentum tres exercitus diripuerunt. eaque primum benignitas imperatorum plebem Patribus conciliavit. Additum deinde omnium maxime tempestivo principum in multitudinem munere, ut ante mentionem ullam plebis tribunorumve decerneret senatus, ut stipendium miles de publico acciperet, quum ante id tempus de suo quisque functus eo munere esset.

y) in muris Gron.

U. c. 349. LX. Nihil acceptum umquam a plebe tanto gau-  
 a. C. 405. dio traditur. Concursum itaque ad curiam esse, pren-  
 satasque exeuntium manus, et Patres vere adpella-  
 tos; effectum esse fatentibus, ut nemo pro tam mu-  
 nifica patria, donec quidquam virium superesset, cor-  
 pori aut sanguini suo parceret. Quum commoditas  
 iuvaret, rem familiarem saltem adquiescere eo tem-  
 pore, quo corpus addictum atque operatum reipubli-  
 cae esset; tum, quod ultro sibi oblatum esset, non  
 a tribunis plebis umquam agitatum, non suis sermo-  
 nibus efflagitatum, id efficiebat multiplex gaudium  
 cumulationemque gratiam rei. Tribuni plebis, com-  
 muni ordinum laetitiae concordiaeque soli exper-  
 tes, negare, *Tam id laetum Patribus universis nec  
 prosperum fore, quam ipsi crederent. consilium specie  
 prima melius fuisse, quam usu adpariturum. Unde  
 enim eam pecuniam confici posse, nisi tributo populo in-  
 dicto? ex alieno igitur aliis largitos. neque, id etiamsi  
 ceteri ferant, passuros eos, quibus iam emerita stipen-  
 dia essent, meliore conditione alios militare, quam ip-  
 si militassent; et eosdem in sua stipendia inpensas fe-  
 cisse, et in aliorum facere.* His vocibus moverunt  
 partem plebis. postremo, indicto iam tributo, edi-  
 xerunt etiam tribuni, auxilio se futuros, si quis in  
 militare stipendium tributum non contulisset. Patres  
 bene coeptam rem perseveranter tueri: conferre ipsi  
 primi: et, quia nondum argentum signatum erat, aes  
 grave plaustis quidam ad aerarium convehentes, spe-  
 ciosam etiam conlationem faciebant. Quum senatus  
 summa fide ex censu contulisset, primores plebis,  
 nobilium amici, ex composito conferre incipiunt.  
 quos quum et a Patribus conlaudari, et a militari ae-  
 tate tamquam bonos cives conspici vulgus hominum  
 vidit, repente, spreto tribunicio auxilio, certamen  
 conferendi est ortum. et, lege perlata de indicendo  
 Veientibus bello, exercitum magna ex parte volun-

tarium novi tribuni militum consulari potestate <sup>U. c. 349.</sup>  
Veios duxere. <sup>a. C. 403.</sup>

LXI. Fuere autem tribuni T. Quinctius Capito- <sup>U. c. 350.</sup>  
linus, Q. <sup>2)</sup> Quinctius Cincinnatus, C. Iulius Iulus <sup>a. C. 402.</sup>  
iterum, A. Manlius, L. Furius Medullinus tertium <sup>a)</sup>,  
M'. Aemilius Mamercinus. Ab his primum circum-  
sessi Veii sunt; sub cuius initium obsidionis quum  
Etruscorum concilium ad fanum Voltumnae frequen-  
ter habitum esset, parum constitit, bellone publico <sup>U. c. 351.</sup>  
gentis universae tuendi Veientes essent. Ea obpu- <sup>a. C. 401.</sup>  
gnatio segnior insequenti anno fuit, parte tribuno-  
rum exercitusque ad Volscum advocata bellum. Tri-  
bunos militum consulari potestate is annus habuit C.  
Valerium Potitum tertium, M'. Sergium Fidenatem,  
P. Cornelium Maluginensem, Cn. Cornelium Cossum,  
K. Fabium Ambustum, Sp. Nautium Rutilum ite-  
rum. Cum Volscis inter Ferentinum atque Ecetram  
signis conlatis dimicatum. Romanis secunda fortuna  
pugnae fuit. Artena inde, Volscorum oppidum, ab  
tribunis obsideri coepta. inde inter eruptionem tenta-  
tam, compulso in urbem hoste, occasio data est Ro-  
manis inrumpendi. praeterque arcem cetera capta. in  
arcem munitam natura globus armatorum concessit.  
Infra arcem caesi captique multi mortales. arx dein-  
de obsidebatur: nec aut vi capi poterat, quia pro  
spatio loci satis praesidii habebat; aut spem dabat  
deditionis, omni publico frumento, priusquam urbs  
caperetur, in arcem convecto. taedioque recessum  
inde foret, ni servus arcem Romanis prodidisset. ab  
eo milites por locum arduum accepti cepere. a quibus  
quum custodes trucidarentur, cetera multitudo, re-  
pentino pavore obpressa, in deditionem venit. Di-  
ruta et arce et urbe Artena, reductae legiones ex  
Volscis omnisque vis Romana Veios conversa est.

2) P. Gron. Crev.

a) iterum Eaed.

U. c. 351. Proditori, praeter libertatem, duarum familiarum  
a. C. 401. bona in praemium data. Servius Romanus vocitatus.  
Sunt, qui Artenam Veientium, non Volscorum, fuisse credant. Praebet errorem, quod eiusdem nominis urbs inter Caere atque Veios fuit: sed eam reges Romani delevere, Caeretumque, non Veientium, fuerat. Altera haec nomine eodem in Volsco agro fuit, cuius excidium est dictum.

---



## EPITOME LIBRI V.

In obsidione Veiorum hibernacula militibus facta sunt. ea res quum esset nova, indignationem tribunorum plebis movit, querentium non dari plebi nec per hiemem militiae requiem. Equites tum primum equis suis merere coeperunt. Quum inundatio ex lacu Albano facta esset, vates, qui eam rem interpretaretur, de hostibus captus est. Furius Camillus dictator decem annos obsessos Veios cepit: simulacrum Iunonis Romanam transtulit: decimam partem praedae Delphos Apollini misit. Idem tribunus militum, quum Faliscos obsideret, proditos hostium filios parentibus remisit: statimque deditione facta, Faliscorum victoriam iustitia consecutus est. Quum alter ex censoribus C. Iulius decessisset, in locum eius M. Cornelius subfectus est. nec id postea factum est: quoniam eo lustro a Gallis Roma capta est. Furius Camillus, quum ei dies a L. Appuleio tribuno plebis dicta esset, in exilium abiit. Quum Senones Galli Clusium obsiderent, et legati, a senatu missi ad componendam inter eos et Clusinos pacem, pugnantes contra Gallos in acie Clusinorum stetissent; hoc facto eorum concitati Senones urbem infesto exercitu petierunt, fusisque ad Alliam flumen Romanis, cepere urbem praeter Capitolium, in quod se iuventus contulerat: maiores natu, cum insignibus honorum, quos quisque gesserat, in vestibulis aedium sedentes, occiderunt. et quum per aversam partem Capitolii iam in summum evasissent, proditi clangore anserum, M. Manlii praecipue opera deiecti sunt. coactis deinde propter famem Romanis descendere, ut mille pondo auri darent, et hoc pretio finem obsidionis emerent; Furius Camillus, dictator absens creatus, inter pendendum aurum cum exercitu venit, et Gallos post sextum mensem urbe expulit, ceciditque. Aedes Aio Locutio facta, quo loco ante urbem captam vox audita erat, adventare Gallos. Dictum est, ad Veios migrandum esse propter incensam et dirutam urbem. quod consilium Camillo auctore discussum est. Movit populum vocis quoque omen ex centurione audita, qui, quum in forum venisset, manipulariis suis dixerat: Sta miles; hic optime manebimus:

## T. LIVII PATAVINI

## LIBER V.

U. c. 352.  
a. C. 400. **P**ace alibi parta, Romani Veiique in armis erant tanta ira odioque, ut victis finem adesse adpareret. Comitia utriusque populi longe diversa ratione facta sunt. Romani auxere tribunorum militum consulari potestate numerum. octo, quot numquam antea, creati, M'. Aemilius Mamercinus iterum, L. Valerius Potitus tertium, Ap. Claudius Crassus, M. Quinctilius Varus, L. Iulius Iulus, M. Postumius, M. Furius Camillus, M. Postumius Albinus. Veientes contra taedio annuae ambitionis, quae interdum discordiarum caussa erat, regem creavere. Obfendit ea res populorum Etruriae animos, non maiore odio regni, quam ipsius regis. gravis iam is antea genti fuerat opibus superbiaque, quia sollemnia ludorum, quos intermitteri nefas est, violenter diremisset: quum ob iram repulsae, quod suffragio duodecim populorum alius sacerdos ei praelatus esset, artifices, quorum magna pars ipsius servi erant, ex medio ludicro repente abduxit. Gens itaque, ante omnes alias eo magis dedita religionibus, quod excelleret arte colendi eas, auxilium Veientibus negandum, donec sub rege essent, decrevit. cuius decreti subpressa fama est <sup>a)</sup> Veiiis propter metum regis; qui, a quo tale quid dictum referretur, pro seditionis eum principe, non vani sermonis auctorem <sup>b)</sup>, habebat. Romanis

a) est del. Gron.

b) auctore Crev.

etsi quietae res ex Etruria nunciabantur, tamen, quia<sup>U. c. 352.</sup> omnibus conciliis eam rem agitari adferebatur, ita<sup>a. C. 400.</sup> muniebant, ut ancipitia munimenta essent: alia in urbem et contra oppidanorum eruptiones versa: aliis frons in Etruriam spectans auxiliis, si qua forte inde venirent, obstruebatur.

II. Quum spes maior imperatoribus Romanis in obsidione, quam in obpugnatione, esset; hibernacula etiam, res nova militi Romano, aedificari coepta: consiliumque erat, hiemando continuare bellum. quod postquam tribunis plebis, iam diu nullam novandi res causam invenientibus, Romam est adlatum, in concionem prosiliunt, sollicitant plebis animos, *Hoc illud esse dictitantes, quod aera militibus sint constituta. nec se fefellisse, id donum inimicorum veneno inlitum fore. Venisse libertatem plebis: remotam in perpetuum et ablegatam ab urbe et ab republica iuventutem, iam ne hiemi quidem aut tempori anni cedere, ac domos et res invisere suas. Quam putarent continuatae militiae causam esse? nullam profecto aliam inventuros, quam ne quid per frequentiam iuvenum eorum, in quibus vires omnes plebis essent, agi de commodis eorum posset. Vexari praeterea et subigi multo acrius, quam Veientes. quippe illos hiemem sub tectis suis agere, egregiis muris situque naturali urbem tutantes; militem Romanum in opere ac labore, nivibus pruiniisque obrutum, sub pellibus durare, ne hiemis quidem spatium, quae omnium bellorum terra marique sit quies, arma deponentem. Hoc neque reges, neque ante tribuniciam potestatem creatam superbos illos consules, neque triste dictatoris imperium, neque inportunos decemviros iniunxisse servitutis, ut perennem militiam facerent, quod tribuni militum in plebe Romana regnum exercerent. Quidnam illi consules dictatoresve facturi essent, qui proconsularem imaginem tam saevam ac trucem fecerint? Sed id accidere haud inmerito. non fuisse ne in octo quidem tribunis militum locum ulli*

U. c. 352. *plebeio: Antea trina loca cum contentione summa patricios explere solitos: nunc iam octoiuges ad imperia obtinenda ire: et ne in turba quidem haerere plebeium quemquam: qui, si nihil aliud, admoneat collegas; liberos, et cives eorum, non servos, militare, quos hie me saltem in domos ac tecta reduci oporteat: et aliquo tempore anni parentes liberosque ac coniuges invisere, et usurpare libertatem, et creare magistratus. Haec taliaque vociferantes adversarium haud inparem nacti sunt Ap. Claudium, relictum a collegis ad tribunicias seditiones comprimendas; virum inbutum iam ab iuventura certaminibus plebeiis: quem auctorem aliquot annis ante fuisse memoratum est, per collegarum intercessionem, tribuniciae potestatis dissolvendae.*

III. Is tum iam, non promptus ingenio tantum, sed usu etiam exercitatus, talem orationem habuit: *Si umquam dubitatum est, Quirites, utrum tribuni plebis vestra, an sua, caussa seditionum semper auctores fuerint, id ego hoc anno desisse dubitari certum habeo. et quum laetor, tandem longi erroris vobis finem factum esse, tum, quod secundis potissimum vestris rebus hic error est sublatus, et vobis, et propter vos rei publicae gratulor. An est quisquam, qui dubitet, nullis iniuriis vestris, si quae forte aliquando fuerunt, umquam aequae, quam munere Patrum in plebem, quum aera militantibus constituta sunt, tribunos plebis offensos ac concitados esse? quid illos aliud aut tum timuisse creditis, aut hodie turbare velle, quam dissolvendae maxime tribuniciae potestatis rentur esse? Sic, hercule, tamquam artifices improbi, opus quaerunt: qui et semper aegri aliquid esse in republica volunt, ut sit, ad cuius curationem a vobis adhibeantur. Utrum enim defenditis, an impugnatis plebem? utrum militantium adversarii estis, an causam agitis? Nisi forte hoc dicitis, Quidquid Patres faciunt, displicet; sive illud pro plebe, sive contra plebem est. Et, quemadmodum*



*servis suis vetant domini quidquam rei cum alienis ho-* U. c. 352.  
*minibus esse, pariterque in iis beneficio ac maleficio ab-* a. C. 400.  
*stineri aequum censeant: sic vos interdicitis Patribus*  
*commercio plebis; ne nos comitate ac munificentia no-*  
*stra provocemus plebem, nec plebs nobis dicto audiens*  
*atque obediens sit. Quanto tandem, si quidnam in vo-*  
*bis, non dico civilis, sed humani esset, favere vos ma-*  
*gis, et, quantum in vobis esset, indulgere potius comi-*  
*tati Patrum atque obsequio plebis oportuit? quae si per-*  
*petua concordia sit, quis non spondere ausit, maximum*  
*hoc imperium inter finitimos brevi futurum esse?*

IV. *Atque ego, quam hoc consilium collegarum*  
*meorum, quo abducere infecta re a Veis exercitum no-*  
*luerunt, non utile solum, sed etiam necessarium fuerit,*  
*postea disseram<sup>c)</sup>; nunc de ipsa conditione dicere mili-*  
*tantium libet. Quam orationem, non apud vos solum,*  
*sed etiam in castris, si habeatur, ipso exercitu dis-*  
*ceptante, aequam arbitror videri posse. in qua si mihi*  
*ipsi nihil, quod dicerem, in mentem venire posset, ad-*  
*versariorum certe orationibus contentus essem. Nega-*  
*bant nuper, danda esse aera militibus, quia numquam*  
*data essent. quonam modo igitur nunc indignari pos-*  
*sunt, quibus aliquid novi adiectum commodi sit, eis*  
*laborem etiam novum pro portione iniungi? Nusquam nec*  
*opera sine emolumento, nec emolumentum ferme sine inpen-*  
*sata opera est. labor voluptasque, dissimillima natura, societa-*  
*te quadam inter se naturali sunt iuncta. Molestè antea fe-*  
*rebat miles, se suo sumtu operam reipublicae praebere:*  
*gaudebat idem, partem anni se agrum suum colere;*  
*quaerere, unde domi militiaeque se ac suos tueri posset.*  
*Gaudet nunc, fructui sibi rempublicam esse, et laetus*  
*stipendium accipit. aequo igitur animo patiatur, se ab*  
*domo, ab re familiari, cui gravis inpena non est, paul-*  
*lo diutius abesse. An, si ad calculos eum respublica*  
*vocet, non merito dicat? annua aera habes, annuam*

c) edisseram Gron. Crev.

U. c. 352. *operam ede. An tu aequum censes, militia semestri*  
 a. C. 400. *solidum te stipendium accipere? Invitus in hac parte*  
*orationis, Quirites, moror: sic enim agere debent, qui*  
*mercenario milite utuntur. at nos tamquam cum civibus*  
*agere volumus, agique tamquam cum patria nobiscum*  
*aequum censemus. Aut non suscipi bellum oportuit;*  
*aut geri pro dignitate populi Romani, et perfici quam*  
*primum oportet. Perficietur autem, si urgemus obses-*  
*sos: si non ante abscedimus, quam spei nostrae finem*  
*captis Veiis inposuerimus. Si, Hercules<sup>d)</sup>, nulla alia*  
*caussa, ipsa indignitas perseverantiam inponere debuit.*  
*Decem quondam annos urbs obpugnata est ob unam mu-*  
*lierem ab universa Graecia: quam procul ab domo?*  
*quot terras, quot maria distans? Nos intra vicesimum*  
*lapidem, in conspectu prope urbis nostrae, annuam ob-*  
*pugnationem perferre piget: scilicet, quia levis caussa*  
*belli est, nec satis quidquam iusti doloris est, quod nos*  
*ad perseverandum stimulet. Septies rebellant, in pa-*  
*ce numquam fida<sup>e)</sup> fuerunt: agros nostros millies depo-*  
*pulati sunt: Fidenates deficere a nobis coegerunt: colo-*  
*nos nostros ibi interfecerunt: auctores fuere contra ius*  
*gentium caedis inopiae legatorum nostrorum: Etruriam*  
*omnem adversus nos concitare voluerunt, hodieque id*  
*moliuntur: res repetentes legatos nostros, haud procul*  
*afuit<sup>f)</sup>, quin violarent.*

V. *Cum his molliter et per dilationes bellum geri*  
*oportet? Si nos tam iustum odium nihil movet, ne illa*  
*quidem, oro vos, movent? Operibus ingentibus septa*  
*urbs est, quibus intra muros coercetur hostis. agrum*  
*non coluit, et culta evastata sunt bello. Si reducimus*  
*exercitum, quis est, qui dubitet, illos, non a cupidi-*  
*tate solum ulciscendi, sed etiam necessitate inposita ex*  
*alieno praedandi, quum sua amiserint, agrum nostrum*  
*invasuros? non differimus igitur bellum isto consilio,*  
*sed intra fines nostros accipimus. Quid? illud, quod*

d) hercule Gron. Crev.

e) fidi Eaed.

f) absuit Eaed.

proprie ad milites pertinet, quibus boni tribuni plebis U. c. 352  
 quum stipendium extorquere voluerint, nunc consultum<sup>a</sup>. C. 400  
 repente volunt, quale est? Vallum fossamque, ingentis  
 utramque rem operis, per tantum spatii duxerunt: ca-  
 stella primo pauca, postea, exercitu aucto, creberrima  
 fecerunt: munitiones non in urbem modo, sed in Etru-  
 riam etiam spectantes, si qua inde auxilia veniant, ob-  
 posuere. Quid turres, quid vineas testudinesque et alium  
 obpugnandarum urbium adparatum loquar? Quum tan-  
 tum laboris exhaustum sit, et ad finem iam operis tan-  
 dem perventum; relinquendane haec censetis, ut ad ae-  
 statem rursus novus de integro his instituendis exsude-  
 tur labor? Quanto est minus opera tueri facta, et in-  
 stare, et perseverare, defungique cura? Brevis enim  
 profecto res est, si uno tenore peragitur, nec ipsi per  
 intermissiones has intervallaque lentiolem spem nostram  
 facimus. loquor de opere, et de temporis iactura. Quid?  
 periculi, quod differendo bello adimus, num oblivisci  
 nos haec tam crebra Etruriae concilia de mittendis Ve-  
 ios auxiliis patiuntur? Ut nunc res se habet, irati  
 sunt, oderunt, negant missuros: quantum in illis est,  
 capere Veios licet. quis est, qui spondeat, eundem,  
 si differtur bellum, animum postea fore? quum, si la-  
 xamentum dederis, maior frequentiorque legatio itura  
 sit: quum id, quod nunc offendit Etruscos, rex creatus  
 Veis, spatio interposito mutari<sup>g</sup>) possit, vel consen-  
 su civitatis, ut eo reconcilient Etruriae animos, vel  
 ipsius voluntate regis, qui obstare regnum suum saluti  
 civium nolit. Videte, quot res, quam inutiles, sequan-  
 tur illam viam consilii: iactura operum tanto labore  
 factorum, vastatio imminens finium nostrorum, Etru-  
 scum bellum pro Veiente concitatum. Haec sunt, tri-  
 buni, consilia vestra, non, hercule, dissimilia, ac si  
 quis aegro, qui, curari se fortiter passus, extemplo  
 convalescere possit, cibi gratia praesentis aut potionis  
 longinquum et forsitan insanabilem morbum efficiat.

g) spatio mutari interposito Gron. Crev.

U. c. 352.

a. C. 400.

VI. Si, me *Dius fidius*, ad hoc bellum nihil per-  
 rat, insuescere militem nostrum, non solum parata<sup>h)</sup>  
 victoria frui; sed, si res etiam lentior sit, pati taedium  
 et quamvis serae spei exitum exspectare, et, si non sit  
 aestate perfectum bellum, hiemen opperiri, nec, sicut  
 aestivas aves, statim autumnio tecta ac recessum circum-  
 spicere. Obsecro vos, venandi studium ac voluptas ho-  
 mines per nives ac pruinas in montes silvasque rapit;  
 belli necessitatibus eam patientiam non adhibebimus,  
 quam vel lusus ac voluptas elicere solet? Adeone effe-  
 minata corpora militum nostrorum esse putamus, adeo  
 molles animos, ut hiemem unam durare in castris, ab-  
 esse ab domo non possint? ut, tamquam navale bellum,  
 tempestatibus captandis et observando tempore anni,  
 gerant, non aestus, non frigora pati possint? Erube-  
 scant profecto, si quis eis haec obiiciat; contendantque,  
 et animis et corporibus suis virilem patientiam inesse,  
 et se iuxta hieme atque aestate bella gerere posse: nec  
 se patrocinium molliitiae inertiaeque mandasse tribunis,  
 et meminisse, hanc ipsam potestatem non in umbra nec  
 in tectis maiores suos creasse. Haec virtute militum  
 vestrorum, haec Romano nomine sunt digna, non Veios  
 tantum, nec hoc bellum intueri, quod instat; sed famam  
 et ad alia bella et ad ceteros populos in posterum quae-  
 rere. An mediocre discrimen opinionis secuturum ex  
 hac re putatis? utrum tandem finitimi populum<sup>i)</sup> Ro-  
 manum eum esse putent, cuius si qua urbs primum il-  
 lum brevissimi temporis sustinuerit inpetum, nihil dein-  
 de timeat? an hic sit terror nominis nostri, ut exerci-  
 tum Romanum non taedium longinquae obpugnationis,  
 non vis hiemis ab urbe circumscissa semel amovere possit,  
 nec finem ullum alium belli, quam victoriam, noverit;  
 nec inpetu potius bella, quam perseverantia, gerat?  
 quae in omni quidem genere militiae, maxime tamen in  
 obsidendis urbibus, necessaria est; quarum plerasque,

h) parta Gron. Crev.

i) populi Eaed.



*munitionibus ac naturali situ inexpugnabiles, fame* U. c. 352.  
*sitique tempus ipsum vincit atque expugnat: sicut Ve-* a. C. 400.  
*ios expugnabit; nisi auxilio hostibus tribuni plebis fue-*  
*rint, et Romae invenerint praesidia Veientes, quae ne-*  
*quidquam in Etruria quaerunt. An est quidquam, quod*  
*Veientibus optatum aequae contingere possit, quam ut*  
*seditionibus primum urbs Romana, deinde velut ex con-*  
*tagione castra inpleantur? At, hercule, apud hostes*  
*tanta modestia est, ut non obsidionis taedio, non deni-*  
*que regni, quidquam apud eos novatum sit; non nega-*  
*ta auxilia ab Etruscis irritaverint animos. morietur*  
*enim extemplo, quicumque erit seditionis auctor. nec*  
*cuiquam dicere ea licebit, quae apud vos inpune dicun-*  
*tur. Fustuarium meretur, qui signa relinquit, aut*  
*praesidio decedit. Auctores signa relinquendi, et dese-*  
*rendi castra, non uni aut alteri militi, sed universis*  
*exercitibus, palam in concione audiuntur. adeo quid-*  
*quid tribunus plebi<sup>k)</sup> loquitur, etsi prodendae patriae*  
*dissolvendaeque reipublicae est, adsuetsis aequi audire;*  
*et, dulcedine potestatis eius capti, quaelibet sub ea*  
*scelera latere sinitis. Reliquum est, ut, quae hic vo-*  
*ciferantur, eadem in castris et apud milites agant, et*  
*exercitus conrumpant ducibusque parere non patiantur:*  
*quoniam ea demum Romae libertas est, non senatum,*  
*non magistratus, non leges, non mores maiorum, non*  
*instituta patrum, non disciplinam vereri militiae.*

VII. Par iam etiam in concionibus erat Appius tribunus plebis; quum subito, unde minime quis crederet, accepta calamitas apud Veios et superiorem Appium in caussa, et concordiam ordinum maiorem ardoremque ad obsidendos pertinacius Veios fecit. Nam quum agger promotus ad urbem, vineaeque tantum non iam iniunctae moenibus essent, dum opera interdiu fiunt intentius, quam nocte custodiuntur, patefacta repente porta, ingens multitudo, facibus

k) plebei Crev.

U. c. 352. maxime armata, ignes coniecit; horaeque momento  
 a. C. 400. simul aggerem ac vineas, tam longi temporis opus,  
 incendium hausit: multique ibi mortales, nequidquam  
 opem ferentes, ferro ignique absunti sunt. Quod ubi  
 Romam est nunciatum, moestitiam omnibus, senatui  
 curam metumque iniecit, ne tum vero sustineri nec  
 in urbe seditio, nec in castris posset, et tribuni ple-  
 bis velut ab se victae reipublicae insultarent; quum  
 repente, quibus census equester erat, equi publici  
 non erant adsignati, consilio prius inter sese habito,  
 senatum adeunt; factaque dicendi potestate, equis se  
 suis stipendia facturos promittunt. Quibus quum  
 amplissimis verbis gratiae ab senatu actae essent, fa-  
 maque ea forum atque urbem pervasisset, subito ad  
 curiam concursus fit plebis. *Pedestris ordinis se,*  
*aiunt, nunc esse, operamque, reipublicae extra or-*  
*dinem polliceri, seu Veios, seu quo alio ducere velint.*  
*si Veios ducti sint, negant, se inde prius, quam capta*  
*urbe hostium, redituros esse.* Tum vero iam superfun-  
 denti selactitiae vix temperatum est. non enim, sicut  
 equites, dato magistratibus negotio, laudari iussi;  
 neque aut in curiam vocati, quibus responsum daretur,  
 aut limine curiae continebatur senatus: sed pro  
 se quisque ex superiore loco, ad multitudinem, in com-  
 mitio stantem, voce manibusque significare publicam  
 laetitiam. Beatam urbem Romanam, et invictam,  
 et aeternam illa concordia dicere: laudare equites,  
 laudare plebem, diem ipsum laudibus ferre: victam  
 esse fateri comitatem benignitatemque senatus. Cer-  
 tatim Patribus plebique manare gaudio lacrimae; do-  
 nec, revocatis in curiam Patribus, senatusconsultum  
 factum est, *Ut tribuni militares, concione advocata,*  
*peditibus equitibusque gratias agerent: memorem pieta-*  
*tis eorum erga patriam dicerent senatum fore. placere*  
*autem, omnibus his voluntariam extra ordinem profes-*  
*sis militiam aera procedere.* et equiti certus numerus

aeris est adsignatus. Tum primum equis suis <sup>1)</sup> me- U. c. 352.  
rere equites coeperunt. Voluntarius ductus exerci- a. C. 400.  
tus Veios non amissa modo restituit opera, sed nova  
etiam instituit. ab urbe commeatus intentiore, quam  
antea, subvehi cura; ne quid tam bene merito exer-  
citui ad usum deesset.

VIII. Insequens annus tribunos militum consu- U. c. 353.  
lari potestate habuit C. Servilium Ahalam tertium, a. C. 399.  
Q. Servilium, L. Virginium, Q. Sulpicium, A. Man-  
lium iterum, M. Sergium iterum. his tribunis, dum  
cura omnium in Veiens bellum intenta est, negle-  
ctum Anxuri praesidium vacationibus militum, et  
Volscos mercatores vulgo receptando, proditis repente  
portarum custotibus, obpressum est. minus militum  
periit, quia praeter aegros lixarum in modum omnes  
per agros vicinasque urbes negotiabantur. Nec Ve-  
iis melius gesta res, quod tum caput omnium curarum  
publicarum erat. nam et duces Romani plus inter se  
irarum, quam adversus hostes animi, habuerunt: et  
auctum est bellum adventu repentino Capenatium at-  
que Faliscorum. Hi duo Etruriae populi, quia pro-  
ximi regione erant, devictis Veiiis, bello quoque Ro-  
mano se proximos fore credentes; Falisci propria et-  
iam caussa infesti, quod Fidenati bello se iam antea  
inmiscuerant, per legatos ultro citroque missos iure-  
iurando inter se obligati, cum exercitibus necopina-  
to ad Veios accessere. Forte ea regione, qua M.  
Sergius tribunus militum praeerat, castra adorti sunt,  
ingentemque terrorem intulere; quia Etruriam omnem  
excitam sedibus magna mole adessee Romani credide-  
rant. eadem opinio Veientes in urbe concitavit. Ita  
incipiti proelio castra Romana <sup>m)</sup> obpugnabantur;  
concursantesque, quum huc atque illuc signa trans-  
ferrent, nec Veientem satis cohibere intra munitio-  
nes, nec suis munimentis arcere vim, ac tueri se ab

1) *suis* del. Gron. Crev. c. Drak.

m) *Romana* del. Gron. Crev.

U. c. 355. exteriore poterant hoste. una spes erat, si ex maioribus castris subveniretur, ut diversae legiones aliae adversus Capenatem ac Faliscum, aliae contra eruptionem oppidanorum pugnarent. Sed castris praeeerat Virginius, privatim Sergio invisus infestusque. is, quum pleraque castella obpugnata, superatas munitiones, utrimque invehi hostem nunciaretur, in armis milites tenuit: si opus foret auxilio, collegam dictitans ad se missurum. Huius adrogantiam pertinacia alterius aequabat; qui, ne quam opem ab inimico videretur petisse, vinci ab hoste, quam vincere per civem, maluit. Diu in medio caesi milites; postremo, desertis munitionibus, perpauci in maiora castra, pars maxima atque ipse Sergius Romam per-tenderunt. ubi quum omnem culpam in collegam inclinaret, adcirci Virginium ex castris, interea praeesse legatos placuit. Acta deinde in senatu res est, certatumque inter collegas maledictis. pauci reipublicae, huic atque illi, ut quosque studium privatim aut gratia occupaverunt, adsunt.

IX. Primores Patrum, sive culpa sive infelicitate imperatorum tam ignominiosa clades accepta esset, censuere, *Non expectandum iustum tempus committorum, sed extemplo novos tribunos militum creandos esse, qui Kalendis Octobribus* <sup>n)</sup> *magistratum occiperent.* In quam sententiam quum pedibus iretur, ceteri tribuni militum nihil contradicere. at enimvero Sergius Virginiusque, propter quos poenitere magistratum eius anni senatum adparebat, primo deprecari ignominiam, deinde intercedere senatusconsulto: negare, se ante Idus Decembres, sollemnem ineundis magistratibus diem, honore abituros esse. Inter haec tribuni plebis, quum in concordia hominum secundisque rebus civitatis inviti silentium tenuissent, feroces repente minari tribunis militum, nisi in au-

n) Octobris Crev.



toritate senatus essent, se in vincula eos duci iussu—U. c. 353.  
ros esse. Tum C. Servilius Ahala tribunus militum: a. C. 399.

*Quod ad vos adtinet, tribuni plebis, minasque vestras, nae ego libenter experirer, quam non plus in his iuris, quam in vobis animi, esset. Sed nefas est tendere adversus auctoritatem senatus, proinde et vos desinite inter nostra certamina locum iniuriae quaerere: et collegae aut facient, quod censet senatus, aut, si pertinacius tendent, dictatorem extemplo dicam, qui eos abire magistratu cogat.* Quum omnium adsensu comprobata oratio esset, gauderentque Patres, sine tribuniciae potestatis terriculis inventam esse aliam vim maiorem ad coercendos magistratus; victi consensu omnium comitia tribunorum militum habuere, qui Kalendis Octobribus <sup>o</sup>) magistratum occiperent: seque ante eam <sup>p</sup>) diem magistratu abdicavere.

X. L. Valerio Potito quartum, M. Furio Camillo U. c. 354.  
iterum <sup>q</sup>), M. Aemilio Mamercino tertium, Cn. Cor— a. C. 398.  
nelio Cosso iterum, K. Fabio Ambusto, L. Iulio Iulo, tribunis militum consulari potestate, multa domi militiaeque gesta. nam et bellum multiplex fuit eodem tempore, ad <sup>r</sup>) Veios, et ad Capenam, et ad Falerios, et in Volscis, ut Anxur ab hostibus recuperaretur: et Romae simul delectu, simul tributo conferendo, laboratum est: et de tribunis plebei <sup>s</sup>) cooptandis contentio fuit: et haud parvum motum duo iudicia eorum, qui paullo ante consulari potestate fuerant, excivere. Omnium primum tribunis militum fuit, delectum haberi; nec iuniores modo conscripti, sed seniores etiam coacti nomina dare, ut urbis custodiam agerent. Quantum autem augebatur militum numerus, tanto maiore pecunia in stipendium opus erat: eaque tributo conferebatur, invitis conferentibus, qui domi remanebant, quia

o) Octobris Crev.

p) eam ante Gron. Crev.

q) iterum del. Gron.

r) et ad Gron.

s) plebi Gron.

U. c. 354. tuentibus urbem opera quoque militari laborandum;  
 a. C. 398. serviendumque reipublicae erat. Haec per se gravia, indigniora ut viderentur, tribuni plebis seditiosis concionibus faciebant; *ideo aera militibus constituta esse arguendo, ut plebis partem militia, partem tributo conficerent. Unum bellum annum iam tertium trahi, et consulto male geri, ut diutius gerant. in quatuor deinde bella uno delectu exercitus scriptos, et pueros quoque ac senes extractos. Iam non aestatis nec hiemis discrimen esse, ne ulla quies umquam miserae plebi sit: quae nunc etiam vectigalis ad ultimum facta sit; ut, quum confecta labore, vulneribus, postremo aetate corpora retulerint, incultaque omnia diutino dominorum desiderio domi invenerint, tributum ex adfecta re familiarium pendant; aeraque militaria, velut foenore accepta, multiplicia reipublicae reddant. Inter delectum tributumque, et occupatos animos maiorum rerum curis, comitiis tribunorum plebis numerus expleri nequii<sup>t)</sup>. Pugnatum inde, in loca vacua ut patricii cooptarentur. postquam obtineri non poterat, tamen labefactandae legis Treboniae causa effectum est, ut cooptarentur tribuni plebis C. Lacerius et M. Acutius, haud dubie patriciorum opibus.*

XI. Fors ita tulit, ut eo anno tribunus plebis Cn. <sup>u)</sup> Trebonius esset, qui nomini ac familiae debitum praestare videretur Treboniae legis patrociniū. is, quod petissent Patres quidam, primo incepto repulsi, tamen tribunos militum expugnasse, vociferans, legem Treboniam sublatam, et cooptatos tribunos plebis non suffragiis populi, sed imperio patriciorum; et eo revoluti<sup>x)</sup> rem, ut aut patricii, aut patriciorum adseclae habendi tribuni plebis sint: eripi sacratas leges, extorqueri tribuniciam potestatem; id fraude patriciorum, scelere ac proditione collegarum factum arguere. Quum ar-

t) nequivit Gron. Crev,

u) C. Eaed.

x) devolvi Eaed.

derent invidia non Patres modo, sed etiam tribuni<sup>U. c. 354.</sup>  
 plebis, cooptati pariter, et qui cooptaverant; tum ex<sup>a. C. 398.</sup>  
 collegio tres, P. Curiatius <sup>y)</sup>, M. Metilius, et M. Mi-  
 nucius, trepidi rerum suarum, in Sergium Virginium-  
 que, prioris anni tribunos militares, incurrunt: in  
 eos ab se iram plebis invidiamque, die dicta, aver-  
 tunt. *Quibus delectus, quibus tributum, quibus*  
*diutina militia longinquitasque belli sit gravis, qui*  
*clade accepta ad Veios doleant, qui amissis liberis, fra-*  
*tribus, propinquis, adfinibus, lugubres domos habeant;*  
*iis publici privatique doloris exsequendi ius potesta-*  
*temque ex duobus noxiis capitibus datam ab se, me-*  
*morant. Omnium namque malorum in Sergio Virginio-*  
*que causas esse: nec id accusatorem magis arguere,*  
*quam fateri reos: qui, noxii ambo, alter in alterum*  
*causam conferant, fugam Sergii Virginii, Sergius*  
*proditionem increpans Virginii. Quorum adeo incredi-*  
*bilem amentiam fuisse, ut multo verisimilius sit, com-*  
*pacto eam rem et communi fraude patriciorum actam.*  
*Ab his et prius datum locum Veientibus ad incendenda*  
*opera, belli trahendi causa; et nunc proditum exer-*  
*citum, tradita Faliscis Romana castra. Omnia fieri,*  
*ut consenescat ad Veios iuventus; nec de agris nec de*  
*aliis commodis plebis ferre ad populum tribuni, frequen-*  
*tiaque urbana celebrare actiones, et resistere conspiratio-*  
*ni patriciorum possint. Praeiudicium iam de reis et ab*  
*senatu, et ab <sup>z)</sup> populo Romano, et ab ipsorum colle-*  
*gis factum esse. nam et senatusconsulto eos ab repub-*  
*lica remotos esse, et recusantes abdicare se magistratu,*  
*dictatoris metu ab collegis coercitos esse: et populum*  
*Romanum tribunos creasse, qui non Idibus Decembribus*  
*die sollemni, sed extemplo Kalendis Octobribus magistra-*  
*tum occiperent, quia stare diutius respublica, his ma-*  
*nentibus in magistratu, non posset. Et tamen eos, tot*  
*iudiciis confossos praedamnatosque, venire ad populi*

y) Curatius Gron. Crev.

z) a Eaed.

U. c. 354. *iudicium; et existimare, defunctos se esse, satisque*  
 a. C. 398. *poenarum dedisse, quod duobus mensibus citius privati*  
*facti sint: neque intelligere, nocendi sibi diutius tum*  
*potestatem ereptam esse, non poenam inrogatam; quip-*  
*pe et collegis abrogatum imperium, qui certe nihil de-*  
*liquissent. Illos repeterent animos Quirites, quos re-*  
*centi clade accepta habuissent, quum fuga trepitum,*  
*plenum vulnere ac pavore incidentem portis exercidum*  
*viderint, non fortunam aut quemquam Deorum, sed hos*  
*duces accusantem. Pro certo se habere, neminem in*  
*concione stare, qui illo die non caput, domum fortun-*  
*asque L. Virginii ac M'. Sergii sit execratus dete-*  
*statusque. Minime convenire, quibus iratos quisque*  
*Deos praecatus sit, in iis sua potestate, quum liceat*  
*et oporteat, non uti. Numquam Deos ipsos admove-*  
*re nocentibus manus. satis esse, si occasione ulciscendi*  
*laesos arment.*

XII. His orationibus incitata plebs denis milli-  
 bus aeris gravis reos condemnat, nequidquam Ser-  
 gio Martem communem belli fortunamque accusante,  
 Virginio deprecante, ne infelicius domi, quam mi-  
 litiae, esset. In hos versa ira populi coopta-  
 tionis tribunorum fraudisque, contra legem Treboni-  
 am factae, memoriam obscuram fecit. Victores tribu-  
 ni, ut praesentem mercedem iudicii plebes haberet,  
 legem agrariam promulgant, tributumque conferri  
 prohibent: quum tot exercitibus stipendio opus esset,  
 resque militiae ita prospere gererentur, ut nullo bello  
 veniretur ab exitum spei. namque Veiis castra, quae  
 amissa erant, recuperata castellis praesidiisque fir-  
 mantur. Praeerant tribuni militum M'. Aemilius et  
 K. Fabius. M. <sup>a)</sup> Furio in Faliscis, et Cn. Cornelio  
 in Capenate agro hostes nulli extra moenia inven-  
 ti praedae actae, incendiisque villarum ac frugum  
 vastati fines: oppida nec <sup>b)</sup> obpugnata, nec ob-

a) a M. Gron. Crev.

b) nec del. c. Drak.



sessa sunt. At in Volscis, depopulato agro, An-<sup>U. c. 354.</sup>  
 xur nequidquam obpugnatum, loco alto situm; et,<sup>a. C. 398.</sup>  
 postquam vis irrita erat, vallo fossaque obsideri coep-  
 tum. Valerio Potito Volsci provincia evenerat. Hoc  
 statu militarium rerum, seditio intestina maiore mole  
 coorta, quam bella tractabantur. et, quum tributum  
 conferri per tribunos non posset, nec stipendium im-  
 peratoribus mitteretur, aeraque militaria flagitaret  
 miles, haud procul erat, quin castra quoque urbanae  
 seditionis contagione turbarentur. Inter has iras ple-  
 bis in Patres, quum tribuni plebis nunc illud tempus  
 esse dicerent stabiliendae libertatis, et ab Sergiis  
 Virginiisque ad plebeios viros fortes ac strenuos trans-  
 ferendi summi honoris; non tamen ultra processum  
 est, quam ut unus ex plebe, usurpandi iuris causa, P.  
 Licinius Calvus tribunus militum consulari potestate<sup>U. c. 355.</sup>  
 crearetur. ceteri patricii creati P. Maenius, L. Titinius,<sup>a. C. 397.</sup>  
 P. Maelius, L. Furius Medullinus, L. Publilius Volscus.  
 Ipsa plebes mirabatur, se tantam rem obtinuisse; non is  
 modo, qui creatus erat, vir nullis ante honoribus usus,  
 vetus tantum senator, et aetate iam gravis. Nec sa-  
 tis constat, cur primus ac potissimus ad novum deli-  
 bandum honorem sit habitus. Alii Cn. Cornelii fra-  
 tris, qui tribunus militum priore anno fuerat, triplex-  
 que stipendium equitibus dederat, gratia extractum  
 ad tantum honorem credunt. alii orationem ipsum  
 tempestivam de concordia ordinum, Patribus plebi-  
 que gratam, habuisse. Hac victoria comitiorum ex-  
 sultantes tribuni plebis, quod maxime rempublicam  
 inpediebat, de tributo remiserunt. conlatum obe-  
 dienter, missumque ad exercitum est.

XIII. Anxur in Volscis brevi receptum est, neg-  
 lectis die festo custodiis urbis. Insignis annus hie-  
 me gelida ac nivosa fuit, adeo ut viae clausae, Tibe-  
 ris innavigabilis fuerit. annona ex ante convecta co-  
 pia nihil mutavit. Et quia P. Licinius, ut ceperat  
 haud tumultuose magistratum, maiore gaudio ple-

U. c. 355. bis, quam indignatione Patrum, ita etiam gessit; dul-  
 a. C. 397. cedo invasit proximis comitiis tribunorum militum  
 U. c. 356. plebeios creandi. Unus M. Veturius ex patriciis can-  
 a. C. 396. didatis locum tenuit: plebeios alios tribunos militum  
 consulari potestate omnes fere centuriae dixere, M.  
 Pomponium, C. Duilium, Voleronem Publilium, Cn.  
 Genucium, L. Atilium. Tristem hiemem, sive ex  
 intemperie coeli, raptim mutatione in contrarium  
 facta, sive alia qua de causa, gravis pestilensque  
 omnibus animalibus aestas excepit. cuius insanabili  
 perniciē quando nec causa nec finis inveniebatur,  
 libri Sibyllini ex senatusconsulto aditi sunt. Duum-  
 viri sacris faciundis, lectisternio tunc primum in urbe  
 Romana facto, per dies octo Apollinem, Latonamque  
 et Dianam, Herculem, Mercurium atque Neptunum  
 tribus, quam amplissime tum adparari poterat, stratis  
 lectis placavere. Privatim quoque id sacrum cele-  
 bratum est. tota urbe patentibus ianuis, promiscuo-  
 que usu rerum omnium in propatulo posito, notos  
 ignotosque passim advenas in hospitium ductos ferunt;  
 et cum inimicis quoque benigne ac comiter sermones  
 habitos, iurgiis ac litibus temperatum; vinctis quoque  
 demta in eos dies vincula; religioni deinde fuisse, qui-  
 bus eam opem Dii tulissent, vinciri. Interim ad Veios  
 terror multiplex fuit; tribus in unum bellis conlatis.  
 namque eodem, quo antea modo circa munimenta,  
 quum repente Capenates Faliscique subsidio venissent,  
 adversus tres exercitus ancipiti proelio pugnatum est.  
 Ante omnia adiuvit memoria damnationis Sergii ac  
 Virginii. itaque e<sup>c)</sup>) maioribus castris, unde antea  
 cessatum fuerat, brevi spatio circumductae copiae  
 Capenates, in vallum Romanum versos, ab tergo ad-  
 grediuntur. Inde pugna coepta et Faliscis intulit ter-  
 rorem trepidantesque eruptio ex castris opportune  
 facta avertit. repulsos deinde insecuti victores ingen-

c) e del. Gron. Crev. c. Drak.

tem ediderunt caedem. Nec ita multo post iam palan-<sup>U. c. 356.</sup>  
 tes, veluti forte oblati, populatores Capenatis agri re-<sup>a. C. 396.</sup>  
 liquias pugnae absunsere: et Veientium refugientes  
 in urbem multi ante portas caesi, tum prae metu, ne  
 simul Romanus inrumperet, obiectis foribus extre-  
 mos suorum excludere.

XIV. Haec eo anno acta. Et iam comitia tribu-  
 norum militum aderant, quorum prope maior Patri-  
 bus, quam belli, cura erat; quippe non communica-  
 tum modo cum plebe, sed prope amissum, cernenti-  
 bus summum imperium. Itaque clarissimis viris ex  
 composito praeparatis ad petendum, quos praetereun-  
 di verecundiam crederent fore, nihilominus ipsi, pe-  
 rinde ac si omnes candidati essent, cuncta experien-  
 tes, non homines modo, sed Deos etiam, excipiebant;  
 in religionem vertentes comitia biennio habita: prio-  
 re anno intolerandam hiemen prodigiisque divinis si-  
 milem coortam: proximo non prodigia, sed iam even-  
 tus, pestilentiam agris ubique inlatam haud dubia  
 ira Deum: quos pestis eius arcendae causa placan-  
 dos esse, in libris fatalibus inventum sit. Comitibus,  
 auspicato quae fierent, indignum Diis visum honores  
 vulgari, discriminaque gentium confundi. Praeterquam  
 maiestate petentium, religione etiam adtoniti homi-  
 nes patricos omnes, partem magnam honoratissimum  
 quemque, tribunos militum consulari potestate crea-<sup>U. c. 357.</sup>  
 vere, L. Valerium Potitum quintum, M. Valerium<sup>a. C. 395.</sup>  
 Maximum, M. Furium Camillum tertium<sup>d)</sup>, L. Fu-  
 rium Medullinum tertium, Q. Servilium Fidenatem  
 iterum, Q. Sulpicium Camerinum iterum. His tri-  
 bunis ad Veios nihil admodum memorabile actum est.  
 tota vis in populationibus fuit. Duo summi impera-  
 tores, Potitus a Faleriis, Camillus a Capena, praedas  
 ingentes egere, nulla incolumi relictā re, cui ferro  
 aut igni noceri posset.

d) iterum Gron.

U. c. 357.

a. C. 395.

XV. Prodigia interim multa nunciari; quorum pleraque, et quia singuli auctores erant, parum credita spretaque, et quia, hostibus Etruscis, per quos ea procurarent, aruspices non erant. in unum omnium curae versae sunt, quod lacus in Albano nemore sine ullis coelestibus aquis, caussave qua alia, quae rem miraculo eximeret, in altitudinem insolitam crevit. Quidnam eo Dii portenderent prodigio, missi sciscitatum oratores ad Delphicum oraculum; sed propior interpretis fatis oblati senior quidam Veiens, qui, inter cavillantes in stationibus ac custodiis milites Romanos Etruscosque, vaticinantis in modum cecinit, *Priusquam ex lacu Albano aqua emissa foret, numquam potiturum Veis Romanum.* Quod primo, velut temere iactum, sperni, agitari deinde sermonibus coeptum est; donec unus ex statione Romana percunctatus proximum oppidanorum, (iam per longinquitatem belli commercio sermonum facto) quisnam is esset, qui per ampages de lacu Albano iaceret? postquam audivit aruspicem esse, vir haud intacti religione animi, causatus de privati portentis procuratione, si operae illi esset, consulere velle, ad conloquium vatem elicit. Quumque progressi ambo a suis longius essent inerme, sine ullo metu: praevalens iuvenis Romanus senem infirmum, in conspectu omnium raptum, nequidquam tumultuantibus Etruscis, ad suos transtulit. qui quum perductus ad imperatorem, inde Romam ad senatum missus esset, sciscitantibus quidnam id esset, quod de lacu Albano docuisset, respondit: *Profecto iratos Deos Veienti populo illo fuisse die, quo sibi eam mentem obiecissent, ut excidium patriae fatale proderet. Itaque, quae tum cecinerit divino spiritu instinctus, ea se nec, ut indicta sint, revocare posse: et tacendo forsitan, quae Dii immortales vulgari velint, haud minus, quam celanda effando, nefas contrahi.* Sic igitur libris fatalibus, sic disciplina Etrusca traditum esse, ut quando aqua Albana abun-



*dasset, tum, si eam Romanus rite emisisset, victoriam de Veientibus dari. antequam id fiat, Deos moenia Veientium deserturos non esse.* Exsequebatur inde, quae sollemnis derivatio esset. Sed auctorem levem, nec satis fidum super tanta re Patres rati, decrevere legatos sortesque oraculi Pythici exspectandas.

U. c. 557.  
a. C. 395.

XVI. Priusquam a Delphis oratores redirent, Albanive prodigii piacula invenirentur, novi tribuni militum consulari potestate, L. Iulius Iulus, L. Fu-  
U. c. 558.  
a. C. 394.  
rius Medullinus quartum, L. Sergius Fidenas, A. Postumius Regillensis, P. Cornelius Maluginensis, A. Manlius, magistratum inierunt. Eo anno Tarquinienses novi hostes exorti. quia simul multis <sup>e)</sup> bel-  
lis, Volscorum ad Anxur, ubi praesidium obsidebatur, Aequorum ad Lavicos, qui Romanam ibi coloniam obpugnabant, ad hoc Veienti quoque et Falisco et Capenati bello occupatos videbant Romanos, nec intra muros quietiora negotia esse certaminibus Patrum ac plebis; inter haec locum iniuriae rati esse, praedatum in agrum Romanum cohortes expeditas mittunt. aut enim passuros inultam eam iniuriam Romanos, ne novo bello se onerarent: aut exiguo, eoque parum valido, exercitu persecuturos. Romanis indignitas maior, quam cura, populationis Tarquiniensium fuit. eo nec magno conatu suscepta, nec in longum dilata res est. A. Postumius et L. Iulius non iusto delectu, (etenim ab tribunis plebis impediebantur) sed prope voluntariorum, quos adhortando incitaverant, coacta manu, per agrum Caeretem obliquis tramitibus egressi, redeuntes a populationibus gravesque praeda Tarquinienses obpressere. multos mortales obtruncant, omnes exuunt impedimentis; et, receptis agrorum suorum spoliis, Romam revertuntur. Biduum ad recognoscendas res datum dominis: tertio incognita (erant autem ea pleraque

e) multis simul Gron. Crev,

U. c. 358. hostium ipsorum) sub hasta venire; quodque inde  
 a. C. 594. redactum, militibus est divisum. Cetera bella, maximeque Veiens, incerti exitus erant. Iamque Romani, desperata ope humana, fata et Deos spectabant, quum legati ab Delphis venerunt, sortem oraculi adferentes, congruentem responso captivi vatis. *Romane, aquam Albanam cave lacu contineri, cave in mare manare suo flumine sinas. emissam per agros rigabis, dissipatamque rivis exstingues. Tum tu insiste audax hostium muris; memor, quam per tot annos obsides urbem, ex ea tibi his, quae nunc panduntur, fatis victoriam datam. Bello perfecto, donum amplum victor ad mea templa portato: sacraque patria, quorum omissa cura est, instaurata, ut adsolet, facito.*

XVII. Ingens inde haberi captivus vates coepit, eumque adhibere tribuni militum Cornelius Postumiusque ad prodigii Albani procurationem ac Deos rite placandos coepere. Inventumque tandem est, ubi neglectas ceremonias intermissumve sollemne Dii arguerent; nihil profecto aliud esse, quam magistratus, vitio creatos, Latinas sacrumque in Albano monte non rite concepisse. Unam expiationem eorum esse, ut tribuni militum abdicarent se magistratu, auspicia de integro repeterentur, et interregnum iniretur. Ea ita facta sunt ex senatusconsulto. Interreges tres deinceps fuere, L. Valerius, Q. Servilius Fidenas, M. Furius Camillus. Numquam desitum interim turbari, comitia interpellantibus tribunis plebis, donec convenisset prius, *ut maior pars tribunorum militum ex plebe crearetur.* Quae dum aguntur, concilia Etruriae ad fanum Voltumnae habita, postulantisque Capenatibus ac Faliscis, ut Veios communi animo consilioque omnes Etruriae populi ex obsidione eriperent, responsum est: *antea se id Veientibus negasse, quia, unde consilium non petissent super tanta re, auxilium petere non deberent. nunc iam*

*pro se fortunam suam illis negare; maxime in ea parte* U. c. 358.  
*Etruriae. Gentem inuisitatam*<sup>f)</sup>, *novos adcolas Gal-* a. C. 324.  
*los esse, cum quibus nec pax satis fida. nec bellum pro*  
*certo sit: sanguini tamen nominique et praesentibus pe-*  
*riculis consanguineorum id dari, ut, si qui iuventutis*  
*suae voluntate ad id bellum eant, non impediant. Eum*  
*magnum advenisse hostium numerum, fama Romae*  
*erat. eoque mitescere discordiae intestinae metu*  
*communi, ut sit, coeptae.*

XVIII. Haud invitis Patribus P. Licinium Cal-  
 vum praerogativa tribunum militum non petentem  
 creant, moderationis expertae in priore magistratu  
 virum, ceterum iam tum exactae aetatis: omnesque  
 deinceps ex collegio eiusdem anni refici adparebat, L.  
 Titinium, P. Maenium, P. Maelium, Cn. Genucium,  
 L. Atilium: qui priusquam renunciarentur, iure vo-  
 catis tribubus permissu interregis P. Licinius Calvus  
 ita verba fecit: *Omen concordiae, Quirites, rei maxi-*  
*me in hoc tempus utili, memoria nostri magistratus vos*  
*his comitiis petere in insequentem annum video. Si col-*  
*legas eosdem rescitis, etiam usu meliores factos, me*  
*iam non eundem, sed umbram nomenque P. Licinii re-*  
*lictum videtis. vires corporis adfectae, sensus oculorum*  
*atque aurium hebetes, memoria labat, vigor animi ob-*  
*tusus. En vobis, inquit, iuvenem, filium tenens,*  
*effigiem atque imaginem eius, quem vos antea tribunum*  
*militum ex plebe primum fecistis. Hunc ego, institu-*  
*tum disciplina mea, vicarium pro me reipublicae do di-*  
*coque. Vosque quaeso, Quirites, delatum mihi ultro*  
*honorem huic petenti, meisque pro eo adiectis precibus,*  
*mandetis. Datum id petenti patri; filiusque eius* U. c. 359.  
 Licinius tribunus militum consulari potestate cum iis, a. C. 325.  
 quos supra scripsimus, declaratus. Titinius Genu-  
 ciusque tribuni militum, profecti adversus Faliscos  
 Capenatesque, dum bellum maiore animo gerunt,

f) maxime in ea parte Etru- Gron. Crev.  
 riae; gentem inusitatam etc.

U. c. 550. quam consilio, praecipitavere in insidias. Genucius,  
 a. C. 590. morte honesta temeritatem luens, ante signa inter  
 primores cecidit. Titinius, in editum tumulum ex  
 multa trepidatione militibus conlectis, aciem resti-  
 tuit; nec se tamen aequo loco hosti commisit. Plus  
 ignominiae erat, quam cladis, acceptum; quae pro-  
 pe in cladem ingentem vertit; tantum inde terroris  
 non Romae modo, quo multiplex fama pervenerat,  
 sed in castris quoque fuit ad Veios. Aegre ibi miles  
 retentus a fuga est, quum pervasisset castra rumor,  
 ducibus exercituque caeso, victorem Capenatem ac  
 Faliscum Etruriaeque omnem iuventutem haud pro-  
 cul inde abesse. His tumultuosiora Romae, iam ca-  
 stra ad Veios obpugnari, iam partem hostium tende-  
 re ad urbem agmine infesto, crediderant: concursum-  
 que in muros est, et matronarum, quas ex domo con-  
 civerat publicus pavor, obsecrationes in templis fa-  
 ctæ: precibusque ab Diis petitum, ut exitium ab ur-  
 bis tectis templisque ac moenibus Romanis §) arce-  
 rent, Veiosque eum averterent terrorem, si sacra re-  
 novata rite, si procurata prodigia essent.

XIX. Iam ludi Latinaeque instauratae erant:  
 iam ex lacu Albano aqua emissa in agros, Veiosque  
 fata adpetebant. Igitur, fatalis dux ad excidium il-  
 lius urbis servandaeque patriae, M. Furius Camillus  
 dictator dictus magistrum equitum P. Cornelium Sci-  
 pionem dixit. Omnia repente mutaverat imperator  
 mutatus. alia spes, alius animus hominum, fortuna  
 quoque alia urbis videri. Omnium primum in eos,  
 qui a Veis in illo pavore fugerant, more militari  
 animadvertit, effecitque, ne hostis maxime timendus  
 militi esset. deinde, indicto delectu in diem certam,  
 ipse interim Veios ad confirmandos militum animos  
 intercurrit: inde Romam ad scribendum novum ex-  
 ercitus redit, nullo detrectante militiam. Peregri-

§) *Romanis moenibus Gron. Crev.*



na etiam iuventus, Latini Hernicique, operam suam U. C. 559. pollicentes ad id bellum, venire: quibus cum gratias a. C. 565. in senatu egisset dictator, satis iam omnibus ad id bellum paratis, ludos magnos ex senatusconsulto vocavit Veiiis captis se facturum; aedemque Matutae matris refectam dedicaturum, iam ante ab rege Ser. Tullio dedicatam. Profectus cum exercitu ab urbe exspectatione hominum maiore, quam spe, in agro primum Nepesino cum Faliscis et Capenatibus signa confert. Omnia ibi summa ratione consilioque acta fortuna etiam, ut fit, secuta est. non proelio tantum fudit hostes, sed castris quoque exiit, ingentique praeda est potitus; cuius pars maxima ad quaestorem redacta est: haud ita multum militi datum. Inde ad Veios exercitus ductus, densioraque castella facta; et a procursationibus, quae multae temere inter murum ac vallum fiebant, edicto, ne quis iniussu pugnaret, ad opus milites traducti. Operum fuit omnium longe maximum ac laboriosissimum, cuniculus in arcem hostium agi coeptus. quod ne intermitteretur opus, neu sub terra continuus labor eosdem conficeret, in partes sex munitorum numerum divisit: senae horae in orbem operi adtributae sunt: nocte ac die numquam ante omissum, quam in arcem viam facerent.

XX. Dictator, quum iam in manibus videret victoriam esse, urbem opulentissimam capi, tantumque praedae fore, quantum non omnibus in unum conlatis ante bellis fuisset; ne quam inde aut militum iram ex malignitate praedae partitae, aut invidiam apud Patres ex prodiga largitione caperet, literas ad senatum misit: *Deum immortalium benignitate, suis consiliis, patientia militum, Veios iam fore in potestate populi Romani. quid de praeda faciendum censerent?* Duae senatum distinebant sententiae: senis P. Licinii, quem primum dixisse a filio interrogatum ferunt, *edici palam placere populo, ut, qui particeps*

U. c. 359. *esse praedae vellet, in castra Veios iret: altera Ap. Clau-*  
 a. C. 395 *dii, qui, largitionem novam, prodigam, inaequalem,*  
*inconsultam arguens, si semel nefas ducerent, ca-*  
*ptam ex hostibus in aerario exhausto bellis pecuniam*  
*esse, auctor erat stipendii ex ea pecunia militi nu-*  
*merandi, ut eo minus tributis plebes conferret: Eius*  
*enim doni societatem sensuras aequaliter omnium do-*  
*mos: non avidas in direptiones manus otiosorum urba-*  
*norum praerepturas fortium bellatorum praemia esse:*  
*quum ita ferme eveniat, ut segnior sit praedator, ut*  
*quisque laboris periculique praecipuam petere partem so-*  
*leat. Licinius contra, suspectam et invisam semper*  
*eam pecuniam fore, aiebat; causasque criminum ad*  
*plebem, seditionum inde ac legum novarum, praebitu-*  
*ram. Satius igitur esse, reconciliari eo dono plebis*  
*animos: exhaustis atque exinanitis tributo tot annorum*  
*subcurri: et sentire praedae fructum ex eo bello, in quo*  
*prope consenuerint. gratius id fore laetiusque, quod*  
*quisque sua manu ex hoste captum domum retulerit,*  
*quam si multiplex alterius arbitrio accipiat. Ipsum di-*  
*ctatorem fugere invidiam ex eo criminaque, eo delegas-*  
*se ad senatum. Senatum quoque, debere reiectam rem*  
*ad se permittere plebi, ac pati habere, quod cuique fors*  
*belli dederit. Haec tutior visa sententia est, quae po-*  
*pularem senatum faceret. Edictum itaque est, ad*  
*praedam Veientem, quibus videretur, in castra ad*  
*dictatorem proficiscerentur.*

XXI. Ingens profecta multitudo replevit castra.  
 Tum dictator, auspicato egressus, quum edixisset,  
 ut arma milites caperent, *Tuo ductu, inquit, Pythi-*  
*As ollo, tuoque numine instinctus pergo ad delendam*  
*urbem Veios: tibi hinc decumam<sup>h)</sup> partem praedae*  
*rogo. Te simul, Iuno Regina, quae nunc Veios colis,*  
*precor, ut nos victores in nostram, tuamque mox futu-*  
*ram, urbem sequare: ubi te dignum amplitudine tua*

h) decimam Gron. Crev.

*templum accipiat.* Haec precatus, superante multi-<sup>U. c. 359.</sup>  
tudine, ab omnibus locis urbem adgreditur, quo mi-<sup>a. C. 593.</sup>  
nor ab cuniculo ingruentis periculi sensus esset.  
Veientes, ignari se iam ab suis vatibus, iam ab ex-  
ternis oraculis proditos, iam in partem praedae suae  
vocatos Deos, alios, votis ex urbe sua evocatos, ho-  
stium templa novasque sedes spectare, seque ultimum  
illum diem agere; nihil minus timentes, quam sub-  
rutis cuniculo moenibus arcem iam plenam hostium  
esse, in muros pro se quisque armati discurrunt; mi-  
rantes quidnam id esset, quod, quum tot per dies  
nemo se ab stationibus Romanis movisset, tum, ve-  
lut repentino icti furore, inprovidi currerent ad mu-  
ros. Inseritur huic loco fabula: immolante rege  
Veientium, vocem aruspiciis dicentis, *qui eius ho-*  
*stiae exta prosecuisset, ei victoriam dari*, exauditam  
in cuniculo, movisse Romanos milites, ut, adaperto  
cuniculo, exta raperent, et ad dictatorem ferrent.  
Sed in rebus tam antiquis, si, quae similia veri sint,  
pro veris accipiantur, satis habeam. Haec, ad osten-  
tationem scenae, gaudentis miraculis, aptiora, quam  
ad fidem, neque adfirmare, neque refellere est ope-  
rae pretium<sup>i)</sup>. Cuniculus, delectis militibus eo tem-  
pore plenus, in aede Iunonis, quae in Veientana ar-  
ce erat, armatos repente edidit. et pars aversos in  
muris invadunt hostes: pars claustra portarum revel-  
lunt: pars, quum ex tectis saxa tegulaeque a mulie-  
ribus ac servitiis iacerentur, inferunt ignes. Clamor  
omnia variis terrentium ac paventium vocibus, mix-  
to mulierum ac puerorum ploratu, complet. Mo-  
mento temporis delectis ex muro undique armatis,  
patefactisque portis, quum alii agmine irruerent,  
alii desertos scanderent muros, urbs hostibus inple-  
tur, omnibus locis pugnatur. Deinde, multa iam  
edita caede, senescit pugna: et dictator praecones

i) operae pretium est Gron. Crev.

U. c. 359. edicere iubet, ut ab inermi abstinence. is finis san-  
 a. C. 393. guinis fuit. Dedi inde inermes coepti: et ad prae-  
 dam miles permissu dictatoris discurret, quae quum  
 ante oculos eius aliquantum spe atque opinione ma-  
 ior, maiorisque pretii rerum ferretur, dicitur manus  
 ad coelum tollens precatus esse: *ut, si cui Deorum*  
*hominumque nimia sua fortuna populique Romani vi-*  
*deretur, ut eam invidiam lenire, quam minimo suo pri-*  
*vato incommodo publicoque, populo Romano liceret*<sup>k</sup>).  
 Convertentem se inter hanc venerationem, traditur  
 memoriae, prolapsus cecidisse: idque omen perti-  
 nuisse postea eventu rem coniectantibus visum ad  
 damnationem ipsius Camilli, captae deinde urbis Ro-  
 manae, quod post paucos accidit annos, cladem. At-  
 que ille dies caede hostium ac direptione urbis opu-  
 lentissimae est consumtus.

XXII. Postero die libera corpora dictator sub  
 corona vendidit. ea sola pecunia in publicum redigi-  
 tur, haud sine ira plebis. et quod retulere secum  
 praedae, nec duci, qui ad senatum, malignitatis au-  
 ctores quaerendo, rem arbitrii sui reiecerat; nec se-  
 natui, sed Liciniae familiae, ex qua filius ad sena-  
 tum retulisset, pater tam popularis sententiae auctor  
 fuisset, acceptum referebant. Quum iam humanae  
 opes egestae a Veis essent, amoliri tum Deum dona  
 ipsosque Deos, sed colentium magis, quam rapien-  
 tium, modo, coepere; namque delecti ex omni ex-  
 ercitu iuvenes, pure lautis<sup>l</sup>) corporibus, candida ve-  
 ste, quibus deportanda Romam Regina Iuno adsi-  
 gnata erat, venerabundi templum iniere, primo re-  
 ligiose admoventes manus: quod id signum more  
 Etrusco, nisi certae gentis sacerdos, adtrectare non esset  
 solitus. dein quum quidam, seu spiritu divino tactus,  
 seu iuvenali<sup>m</sup>) ioco, *Visne Romam ire Iuno?* dixit.

k) *lenire suo privato incom-*  
*modo, quam minimo publico po-*  
*puli Romani liceret.* Gron. Crev.

l) *lotis* Eaed.

m) *iuvenili* Eaed.



set, adnuisse ceteri Deam conclamaverunt: inde fa-<sup>U. c. 359.</sup>  
bulae adiectum est, vocem quoque dicentis, *Velle*,<sup>a. C. 393.</sup>  
auditam. motam certe sede sua parvi molimenti ad-  
miniculis, sequentis modo accepimus levem ac faci-  
lem translatu fuisse: integramque in Aventinum,  
aeternam sedem suam, quo vota Romani dictatoris  
vocaverant, perlatam, ubi templum ei postea idem,  
qui voverat, Camillus dedicavit. Hic Veiorum oc-  
casus fuit, urbis opulentissimae Etrusci nominis, ma-  
gnitudinem suam vel ultima clade indicantis: quod  
decem aestates hiemesque continuas circumsessa,  
quum plus aliquanto cladium intulisset, quam acce-  
pisset, postremo, iam fato tum denique urgente, ope-  
ribus tamen, non vi, expugnata est.

XXIII. Romam ut nunciatum est, Veios captos,  
quamquam et prodigia procurata fuerant, et vatum  
responsa, et Pythicae sortes notae; et, quantum hu-  
manis adiuvari consiliis potuerat res, ducem M. Fu-  
rium, maximum imperatorum omnium, legerant;  
tamen, quia tot annis varie ibi bellatum erat, mul-  
taeque clades acceptae, velut ex insperato immensum  
gaudium fuit: et, priusquam senatus decerneret,  
plena omnia templa Romanarum matrum, grates Diis  
agentium, erant. Senatus in quadriduum, quot die-  
rum nullo ante bello, supplicationes decernit. Ad-  
ventus quoque dictatoris, omnibus ordinibus obviam  
effusis, celebrator, quam ullius umquam antea fuit:  
triumphusque omnem consuetum honorandi diei il-  
lius <sup>n)</sup> modum aliquantum excessit. Maxime conspe-  
ctus ipse est, curru equis albis iuncto urbem inve-  
ctus: parumque id non civile modo, sed humanum  
etiam, visum. Iovis Solisque equis aequiparari di-  
ctatorem, in religionem etiam trahebant: triumphus-  
que ob eam unam maxime rem clarior, quam gratior,  
fuit. Tum Iunoni Reginae templum in Aventino lo-

n) *illius diei* Gron. Crev.

U. c. 359. cavit, dedicavitque Matutae Matri °). atque, his di-  
 a. C. 393. vinis humanisque rebus gestis, dictatura se abdicavit.  
 Agi deinde de Apollinis dono coeptum. cui se decumam <sup>p)</sup> vovisse praedae partem quum diceret Camillus, pontifices solvendum religione populum censerent; haud facile inibatur ratio iubendi referre praedam populum, ut ex ea pars debita in sacrum secerneretur. tandem eo, quod levissimum videbatur, decursum est, ut, qui se domumque religione exsolvere vellet, quum sibimet ipse praedam aestimasset suam, decumae pretium partis in publicum deferret: ut ex eo donum aureum, dignum amplitudine templi ac numine Dei, ex dignitate populi Romani fieret. Ea quoque conlatio plebis animos a Camillo alienavit. Inter haec pacificatum legati a Volscis et Aequis venerunt: inpetrataque pax, magis ut fessa tam diutino bello adquiesceret civitas, quam quod digni peterent.

U. c. 360. XXIV. Veis captis, sex tribunos militum consulari potestate insequens annus habuit, duos P. Cornelios, Cossum et Scipionem, M. Valerium Maximum iterum, K. Fabium Ambustum tertium, L. Furium Medullinum quintum, Q. Servilium tertium. Corneliis Faliscum bellum, Valerio ac Servilio Capenas sorte evenit. ab iis non urbes vi aut operibus tentatae, sed ager est depopulatus, praedaeque rerum agrestium actae. nulla felix arbor, nihil frugiferum in agro relictum. Ea clades Capenatem populum subegit. pax petentibus data. In Faliscis bellum restabat. Romae interim multiplex seditio erat: cuius leniendae caussa coloniam in Volscos, quo tria milia civium Romanorum scriberentur, deducendam censuerant: triumvirique ad id creati terna iugera et septunces viritim dividerant. Ea largitio sperni coepta; quia spei maioris avertendae solatium obiectum

o) *matris* Crev.

*decimae* Gron. Crev.

p) *decimam* et paullo post

censebant. Cur enim relegari plebem in Volscos, U. c. 360. quum pulcherrima urbs Veii agerque Veientanus in a. C. 392. conspectu sit, uberior ampliorque Romano agro? Urbem quoque urbi Romae, vel situ, vel magnificentia publicorum privatorumque tectorum ac locorum, praeponerent. quin illa quoque actio movebatur, quae post captam utique Romam a Gallis celebratior fuit, transmigrandi Veios. Ceterum, partim plebi, partim senatui destinabant habitandos Veios; duasque urbes communis reipublicae incolae a populo Romano posse. Adversus quae quum optimates ita tenderent, ut morituros se citius dicerent in conspectu populi Romani, quam quidquam earum rerum rogaretur. quippe nunc in una urbe tantum dissensionum esse, quid in duabus fore? Victamne ut quisquam victricis patriae praeferret? sineretque, maiorem fortunam captis esse Veiiis, quam incolumibus fuerit? Postremo, se relinqui a civibus in patria posse: ut relinquant patriam atque cives, nullam vim unquam subacturam; et T. Sicinium (is enim ex tribunis plebis rogationis eius lator erat) conditorem Veios sequantur, relicto Deo Romulo, Dei filio, parente et auctore urbis Romae.

XXV. Haec quum foedis certaminibus agerentur, (nam partem tribunorum plebis patres in suam sententiam traxerant) nulla res alia manibus temperare plebem cogebat, quam quod, ubi rixae committendae causa clamor ortus esset, principes senatus, primi turbae obferentes se, peti, feriri, atque occidi iubebant. ab horum aetatibus dignitatibusque et honoribus violandis dum abstinerebatur, et ad reliquos similes conatus verecundia irae obstabat; Camillus idemtidem omnibus locis concionabatur: *Haud mirum id quidem esse, furere civitatem, quae, damnata voti, omnium rerum potiore<sup>q)</sup> curam, quam religione se exsolvendi, habeat. Nihil de conlatione dicere, stipis*

q) priorem Gron. Crev.

U. c. 360. *verius, quam decumae* <sup>r)</sup>); quando ea se quisque priva-  
 a. C. 392. *tim obligaverit, liberatus sit populus. Enimvero, illud*  
*se tacere, suam conscientiam non pati: quod ex ea tan-*  
*tum praeda, quae rerum moventium sit, decuma desi-*  
*gnetur: urbis atque agri capti, quae et ipsa voto con-*  
*teineatur* <sup>s)</sup>), mentionem nullam fieri. Quum ea discepta-  
 tio, anceps senatui visa, delegata ad pontifices es-  
 set; adhibito Camillo, visum collegio, quod eius an-  
 te conceptum votum Veientium fuisset, et post vo-  
 tum in potestatem populi Romani venisset, eius partem  
 decumam Apollini sacram esse. Ita in aestimationem  
 urbs agerque venit: pecunia ex aerario prompta, et  
 tribunis militum consularibus, ut aurum ex ea coe-  
 merent, negotium datum. cuius quum [copia non es-  
 set, matronae, coetibus ad eam rem consultandam  
 habitis, et communi decreto pollicitae tribunis mili-  
 tum aurum et omnia ornamenta sua, in aerarium de-  
 tulerunt. Grata ea res, ut quae maxime senatui um-  
 quam, fuit: honoremque ob eam munificentiam  
 ferunt matronis habitum, ut pileto ad sacra ludos-  
 que, carpentis festo profestoque uterentur. Ponde-  
 re ab singulis auri accepto aestimatoque, ut pecuniae  
 solverentur, crateram auream fieri placuit, quae do-  
 num Apollini Delphos portaretur. Simul ab religio-  
 ne animos remiserunt, integrant seditionem tribuni  
 plebis: incitatur multitudo in omnes principes, ante  
 alios in Camillum. Eum praedam Veientanam pu-  
 blicando sacrandoque ad nihilum redegissee. absentes  
 ferociter increpant: praesentium, quum se ultro ira-  
 tis obferrent, verecundiam habent. Simul extrahi  
 rem ex <sup>t)</sup> eo anno viderunt, tribunos plebis latores  
 legis in annum eosdem reficiunt. et Patres hoc idem  
 de intercessoribus legis adnisi. ita tribuni plebis magna  
 ex parte iidem refecti.

XXVI. Comitiiis tribunorum militum Patres

r) *decimae* atque paullo post  
*decima et decimam* Gron. Crev.

s) *contineantur* Crev.  
 t) *ex del.* Gron. Crev.



summa ope evicerunt, ut M. Furius Camillus creare—U. c. 361.  
 tur. propter bella simulabant parari ducem, sed lar—<sup>a.</sup> C. 391.  
 gitioni tribuniciae adversarius quaerebatur. Cum  
 Camillo creati tribuni militum consulari potestate  
 L. Furius Medullinus sextum C. Aemilius, L. Va-  
 lerus Publicola, Sp. Postumius, P. Cornelius iterum.  
 Principio anni tribuni plebis nihil moverunt, donec  
 M. Furius Camillus in Faliscos, cui id bellum man-  
 datum erat, proficisceretur. differendo deinde elan-  
 guit res: et Camillo, quem adversarium maxime me-  
 tuebant <sup>u)</sup>, gloria in Faliscis crevit. Nam, quum  
 primo moenibus se hostes tenerent, tutissimum id  
 rati, populatione agrorum atque incendiis villarum  
 coegit eos egredi urbe; sed timor longius progredi  
 prohibuit. Mille fere passuum ab oppido castra lo-  
 cant; nulla re alia fidentes ea satis tuta esse, quam  
 difficultate aditus, asperis confragosisque circa, et  
 partim artis, partim arduis viis. Ceterum Camillus,  
 captivum indicem ex agris secutus ducem, castris  
 multa nocte motis, prima luce aliquanto superioribus  
 locis se ostendit. Trifariam Romani muniebant. alius  
 exercitus proelio intentus stabat. Ibi inpedire opus  
 conatos hostes fundit fugatque; tantumque inde pa-  
 voris Faliscis iniectum est, ut, effusa fuga castra sua,  
 quae propiora erant, praelati, urbem peterent. Mul-  
 ti caesi vulneratique, priusquam paventes portis in-  
 ciderent. castra capta; praeda ad quaestores redacta  
 cum magna militum ira: sed, severitate imperii vi-  
 cti, eandem virtutem et oderant, et mirabantur. Ob-  
 sidio inde urbis, et munitiones, et interdum per oc-  
 casionem inpetus oppidanorum in Romanas stationes,  
 proeliaque parva fieri; et teri tempus, neutro incli-  
 nata spe; quum frumentum copiaeque aliae ex ante  
 convecto largius obsessis, quam obsidentibus, subpe-  
 terent. Videbaturque aequae diuturnus futurus labor,

<sup>u)</sup> metuerant Gron. Crev.

U. c. 361. ac Veiiis fuisset; ni fortuna imperatori Romano simul  
 a. C. 391. et cognitae rebus bellicis virtutis specimen et x) maturam victoriam dedisset.

XXVII. Mos erat Faliscis, eodem magistro liberorum et comite uti: simulque plures pueri, quod hodie quoque in Graecia manet, unius curae demandabantur. principum liberos, sicut fere fit, qui scientia videbatur praecellere, erudiebat. Is quum in pace instituisset pueros ante urbem lusus exercendique caussa producere; nihil eo more per belli tempus intermisso, tum, modo brevioribus, modo longioribus spatiis, trahendo eos a porta, lusu sermonibusque variatis, longius solito, ubi res dedit, progressus, inter stationes eos hostium castraque inde Romana in praetorium ad Camillum perduxit. ibi scelesto facinori scelestiorem sermonem addidit: *Falerios se in manus Romanis tradidisse; quando eos pueros, quorum parentes capita ibi rerum sint, in potestatem dediderit. Quae ubi Camillus audivit, Non ad similem, inquit, tui nec populum, nec imperatorem, scelestus ipse cum scelesto munere venisti. Nobis cum Faliscis, quae pacto fit humano, societas non est. quam ingeneravit natura, utrisque est, eritque. Sunt et belli, sicut pacis, iura: iusteque ea, non minus quam fortiter, didicimus gerere. Arma habemus, non adversus eam aetatem, cui etiam captis urbibus parcitur: sed adversus armatos, et ipsos, qui, nec laesi, nec lacessiti a nobis, castra Romana ad Veios obpugnarunt. Eos tu, quantum in te fuit, novo scelere vicisti: ego Romanis artibus; virtute, opere, armis, sicut Veios, vincam.* Denudatum deinde eum, manibus post tergum inligatis, reducendum Falerios pueris tradidit: virgasque eis, quibus proditorem agerent in urbem verberantes, dedit. Ad quod spectaculum concursu populi primum facto, deinde a magistratibus de re nova vocato se-

x) et del. Crev.

natu, tanta mutatio animis est iniecta, ut, qui mo-<sup>U. c. 361.</sup>  
do, esserati odio iraque, Veientium exitum pene,<sup>a. C. 391.</sup>  
quam Capenatium pacem, mallent, apud eos pacem  
universa posceret civitas. Fides Romana, iustitia  
imperatoris, in foro et curia celebrantur: consensu-  
que omnium legati ad Camillum in castra, atque inde  
permissu Camilli Romam ad senatum, qui dederent  
Falerios, proficiscuntur. Introducti ad senatum ita  
locuti traduntur: *Patres conscripti, victoria, cui nec  
Deus, nec homo quisquam invidet, victi a vobis et  
imperatore, dedimus nos vobis; rati, quo nihil victori  
pulchrius est, melius nos sub imperio vestro, quam le-  
gibus nostris, victuros. Eventu huius belli duo salu-  
taria exempla prodita humano generi sunt. Vos fidem  
in bello, quam praesentem victoriam, maluistis: nos,  
fide provocati, victoriam ultro detulimus. Sub ditione  
vestra sumus. Mittite, qui arma, qui obsides, qui  
urbem patentibus portis accipiant. Nec vos fidei no-  
strae, nec nos imperii vestri poenitebit.* Camillo et ab  
hostibus et a civibus gratiae actae. Faliscis in stipen-  
dium militum eius anni, ut populus Romanus tributo  
vacaret, pecunia imperata. Pace data, exercitus  
Romam reductus.

XXVIII. Camillus meliore multo laude, quam  
quum triumphantem albi per urbem vexerant equi,  
insignis iustitia fideque, hostibus victis, quum in ur-  
bem redisset, tacite eius verecundiam non tulit sena-  
tus, quin sine mora voti liberaretur: crateramque  
auream donum Appollini Delphos legati qui ferrent,  
L. Valerius, L. Sergius, A. Manlius, missi longa  
una nave, haud procul freto Siculo a piratis Liparen-  
sium excepti, devehuntur Liparas. Mos erat civi-  
tatis, velut publico latrocinio partam praedam divi-  
dere. forte eo anno in summo magistratu erat Tima-  
sitheus quidam, Romanis vir similior, quam suis. qui,  
legatorum nomen, donumque, et Deum, cui mittere-  
tur, et doni causam veritus ipse, multitudinem quo-

U. c. 361. que, quae semper ferme regenti est similis, religio-  
 a. C. 391. nis iustae inplevit: adductosque in publicum hospiti-  
 um legatos, cum praesidio etiam navium Delphos  
 prosecutus, Romam inde sospites restituit. Hospitium  
 cum eo senatusconsulto est factum, donaque publice  
 data. Eodem anno in Aequis varie bellatum: adeo  
 ut in incerto fuerit et apud ipsos exercitus et Romae,  
 vicissent, victine essent. Imperatores Romani fuere  
 ex tribunis militum C. Aemilius, Sp. Postunius. Pri-  
 mo rem communiter gesserunt: fuis inde acie hosti-  
 bus, Aemilium praesidio Verruginem obtinere pla-  
 cuit, Postunium fines vastare. Ibi eum, incomposi-  
 to agmine negligentius ab re bene gesta euntem, ador-  
 ti Aequi, terrore iniecto, in proximos compulere tu-  
 mulos: pavorque inde Verruginem etiam ad praesi-  
 dium alterum est perlatus. Postunius, suis in tutum  
 receptis, quum concione advocata terrorem increpa-  
 ret ac fugam; fusos esse ab ignavissimo et fugacissi-  
 mo hoste; conclamat universus exercitus, merito se  
 ea audire, et fateri admissum flagitium: sed eosdem  
 conrecturos esse, neque diuturnum id gaudium hosti-  
 bus fore. Poscentes, ut confestim inde ad castra  
 hostium duceret, (in conspectu erant posita in pla-  
 no) nihil poenae recusabant, ni ea ante noctem ex-  
 pugnassent. Conlaudatos corpora curare, paratosque  
 esse quarta vigilia iubet. et hostes, nocturnam fu-  
 gam ex tumulo Romanorum ut ab ea via, quae fe-  
 rebat Verruginem, excluderent, fuere obvii: proe-  
 liumque ante lucem (sed luna pernox erat) commis-  
 sum est: et haud incertius diurno proelio fuit. Sed  
 clamor Verruginem perlatus, quum castra Romana  
 crederent obpugnari, tantum iniecit pavoris, ut, ne-  
 quidquam retinente atque obsecrante Aemilio, Tu-  
 sculum palati fugerent. Inde fama Romam perlata  
 est, Postunium exercitumque occisum. Qui, ubi pri-  
 ma lux metum insidiarum effuse sequentibus sustu-  
 lit, quum perequitasset aciem, promissa repetens,



tantum iniecit ardoris, ut non ultra sustinuerint in-<sup>U. c. 561.</sup>  
petum Aequi. caedes inde fugientium, qualis ubi<sup>a. C. 391.</sup>  
ira magis, quam virtute, res geritur, ad perniciem  
hostium facta est; tristemque ab Tusculo nuncium,  
nequidquam exterrita civitate, literae a Postumio lau-  
reatae sequuntur: victoriam populi Romani esse;  
Aequorum exercitum deletum.

XXIX. Tribunorum plebis actiones quia non-  
dum invenerant finem, et plebs continuare latoribus  
legis tribunatum, et Patres reficere intercessores le-  
gis adnisi sunt. sed plus suis comitiis plebs valuit.  
quem dolorem ulti Patres sunt, senatusconsulto facto,  
ut consules, invisus plebi magistratus, crearentur.  
Annum post quintum decimum creati consules L.<sup>U. c. 562.</sup>  
Lucretius Flavius, Ser. Sulpicius Camerinus. Prin-<sup>a. C. 390.</sup>  
cipio huius anni, ferociter, quia nemo ex collegio in-  
tercessurus erat, coortis ad perferendam legem tri-  
bunis plebis, nec segnius ob id ipsum consulibus  
resistentibus, omnique civitate in unam eam cu-  
ram conversa, Vitelliam coloniam Romanam in suo  
agro Aequi expugnant. colonorum pars maxima  
incolumis, quia nocte proditione oppidum captum  
liberam per aversa urbis fugam dederat, Romam per-  
fugere. L. Lucretio consuli ea provincia evenit. is,  
cum exercitu profectus, acie hostes vicit; victorque  
Romam ad maius aliquanto certamen redit<sup>y)</sup>. Dies  
dicta erat tribunis plebis biennii superioris A. Vir-  
ginio et Q. Pomponio: quos defendi Patrum consensu  
ad fidem senatus pertinebat. neque enim eos aut  
vitae ullo crimine alio aut gesti magistratus quisquam  
arguebat, praeterquam quod, gratificantes Patribus,  
rogationi tribuniciae intercessissent. Vicit tamen  
gratiam senatus plebis ira; et pessimo exemplo in-  
noxii denis millibus gravis aeris condemnati sunt. id  
aegre passi Patres. Camillus palam sceleris plebem

y) rediit Gron. Crev.

U. c. 362. arguere: quae, iam in suos versa, non intelligeret, se  
 a. C. 390. pravo iudicio de tribunis intercessionem sustulisse; intercessionem sublata, tribuniciam potestatem evertisse. Nam, quod illi sperarent, effrenatam licentiam eius magistratus Patres laturos, falli eos. Si tribunicia vis tribunicio auxilio repelli nequeat, aliud telum Patres inventuros esse. Consulesque increpabat, quod fide publica decipi tribunos eos taciti tulissent, qui senatus auctoritatem secuti essent. Haec propalam concionabundus in dies magis augebat iras hominum.

XXX. Senatum vero incitare adversus legem haud desistebat: ne aliter descenderent in forum, quam dies ferendae legis venisset, quam ut qui meminissent, sibi pro aris focisque et Deum templis ac solo, in quo nati essent, dimicandum fore. Nam quod ad se privatim adtineat, si suae gloriae sibi inter dimicationem patriae meminisse sit fas, sibi amplum quoque esse, urbem ab se captam frequentari, quotidie se frui monumento gloriae suae, et ante oculos habere urbem latam in triumpho suo, insistere omnes vestigiis laudum suarum. sed nefas ducere, desertam ac relictam ab Diis immortalibus incoli urbem; et in captivo solo habitare populum Romanum, et victricem patriam victam mutari. His adhortationibus principis concitati Patres, senes iuvenesque, quum ferretur lex, agmine facto in forum venerunt: dissipatique per tribus, suos quisque tribules prensantes, orare cum lacrimis coepere, Ne eam patriam, pro qua fortissime felicissimeque ipsi ac patres eorum dimicassent, desererent, Capitolium, aedem Vestae, cetera circa templa Deorum ostentantes. Ne exsulem, extorrem populum Romanum ab solo patrio ac Diis penatibus in hostium urbem agerent; eoque rem adducerent, ut melius fuerit, non capi Veios, ne Roma desereretur. Quia non vi agebant, sed precibus, et inter preces multa Deorum mentio erat, religiosum parti maximae fuit. et legem una plures tribus anti-  
 quarunt, quam iusserunt. Adeoque ea victoria laeta

Patribus fuit, ut postero die, referentibus consulibus, U. c. 362.  
senatusconsultum fieret, ut agri Veientani septena<sup>a</sup> C. 390.  
iugera plebi dividerentur; nec patribus familiae tantum, sed ut omnium in domo liberorum capitum ratio haberetur; vellentque in eam spem liberos tollere.

XXXI. Eo munere delenita plebe, nihil certatim est, quo minus consularia comitia haberentur.<sup>U. c. 365.</sup>  
<sup>a</sup> C. 389.  
creati consules L. Valerius Potitus, M. Manlius, cui Capitolino postea etiam<sup>z</sup>) fuit cognomen. Hi consules magnos ludos fecere, quos M. Furius dictator voverat Veienti bello. Eodem anno aedes Iunonis Reginae, ab eodem dictatore eodemque bello vota, dedicatur: celebratamque dedicationem ingenti matronarum studio tradunt. Bellum haud memorabile in Algido cum Aequis gestum est, fuis hostibus prius pene, quam manus consererent. Valerio, quod perseverantior caedendis in fuga fuit, triumphus; Manlio, ut ovans ingrederetur urbem decretum est. Eodem anno novum bellum cum Volsiniensibus exortum: quo propter famem pestilentiamque in agro Romano, ex siccitate caloribusque nimis ortam, exercitus duci nequivit. ob quae Volsinienses, Salpinatibus adiunctis superbia elati, ultro agros Romanos incursumus. Bellum inde duobus populis indictum. C. Iulius censor decessit: in eius locum M. Cornelius subfectus, quae res postea religioni fuit; quia eo lustro Roma est capta. Nec deinde umquam in demortui locum censor subficitur. consulibusque morbo implicitis placuit, per interregnum renovari auspicia. Itaque, quum ex senatusconsulto consules magistratu se abdicassent, interrex creatur M. Furius Camillus; qui P. Cornelium Scipionem, is deinde L. Valerium Potitum interregem prodidit. ab eo creati sex tribuni militum consulari potestate; ut, etiamsi cui eorum incommoda valetudo fuisset, copia magistratuum reipublicae esset.

z) etiam del. Crev.

U. c. 364.  
a. C. 388.

XXXII. Kalendis Quinctilibus magistratum occupare L. Lucretius, Ser. Sulpicius, M. Aemilius, L. Furius Medullinus septimum, Agrippa Furius, C. Aemilius iterum. Ex his L. Lucretio et C. Aemilio Volsiniensis <sup>a)</sup> provincia evenit: Salpinates Agrippae Furio et Ser. Sulpicio. Prius cum Volsiniensibus pugnatum est: bellum numero hostium ingens, certamine haud sane asperum fuit. Fusa concursu primo acies in fugam: millia octo armatorum ab equitibus interclusa, positis armis, in deditionem venerunt. Eius belli fama effecit, ne se pugnae committerent Salpinates. moenibus armati se tutabantur. Romani praedas passim et ex Salpinati agro, et ex Volsiniensi, nullo eam vim arcente, egerunt: donec Volsiniensibus fessis bello ea conditione, ut res populo Romano redderent, stipendiumque eius anni exercitui praestarent, in viginti annos induciae datae. Eodem anno M. Caedicius de plebe nunciavit tribunis, se in nova via, ubi nunc sacellum est, supra aedem Vestae, vocem noctis silentio audisse clariorem humana, quae magistratibus dici iuberet, Gallos adventare. Id, ut fit, propter auctoris humilitatem sprellum, et quod longinqua, eoque ignotior, gens erat. Neque Deorum modo monita, ingruente fato, spreta; sed humanam quoque opem, quae una erat, M. Furium ab urbe amovere. qui, die dicta ab L. Appuleio tribuno plebis propter praedam Veientanam, filio quoque adolescente per idem tempus orbatus, quum, aditis domum tribulibus clientibusque, <sup>b)</sup> (magna pars plebis erat) percunctatus animos eorum, responsum tulisset, *se conlaturus, quanti damnatus esset, absolvere eum non posse*, in exilium abiit: precatus ab Diis immortalibus, *si innoxio sibi ea iniuria fieret, primo quoque tempore desiderium sui civitati ingratae facerent*, absens quindecim millibus gravis aeris damnatur.

a) *Volsinienses* Gron. Crev.

b) *et clientibus, quae magna* Eaed.



XXXIII. Expulso cive, quo manente, si quid- U. c. 364.  
 quam humanorum certi est, capi Roma non potuerat; a. C. 388  
 adventante fatali urbi clade, legati ab Clusinis veni-  
 unt, auxilium adversus Gallos petentes. Eam gen-  
 tem traditur fama, dulcedine frugum maximeque vini,  
 nova tum voluptate, captam, Alpes transisse, agros-  
 que ab Etruscis ante cultos possedissee: et invexisse in  
 Galliam vinum inliciendae gentis caussa Aruntem Clu-  
 sinum, ira corruptae uxoris ab Lucumone, cui tutor  
 is fuerat ipse, praepotente iuvene, et a quo expeti  
 poenae, nisi externa vis quaesita esset, nequirent.  
 hunc transeuntibus Alpes ducem, auctoremque Clu-  
 sium obpugnandi fuisse. Equidem haud abnuerim,  
 Clusium Gallos ab Arunte, seu quo alio Clusino, ad-  
 ductos: sed eos, qui obpugnaverint Clusium, non fu-  
 isse, qui primi Alpes transierint, satis constat. du-  
 centis quippe annis ante, quam Clusium obpugnarent,  
 urbemque Romam caperent, in Italiam Galli transcen-  
 derunt: nec cum his primum Etruscorum, sed multo  
 ante cum iis, qui inter Apenninum Alpesque incoler-  
 bant, saepe exercitus Gallici pugnare. Tuscorum  
 ante Romanum imperium late terra marique opes pa-  
 tuere. mari supero inferoque, quibus Italia insulae  
 modo cingitur, quantum potuerint, nomina sunt ar-  
 gumento; quod alterum Tuscum communi vocabulo  
 gentis, alterum Hadriaticum mare, ab Hadria Tuscorum  
 colonia, vocare Italicae gentes. Graeci eadem Tyr-  
 rhenum atque Hadriaticum vocant. Ii in utrumque mare  
 vergentes incoluere urbibus duodenis terras: prius cis  
 Apenninum ad inferum mare, postea trans Apen-  
 ninum, totidem, quod capita originis erant, coloniis  
 missis: quae trans Padum omnia loca, excepto Vene-  
 torum angulo, qui sinum circumcolunt maris, usque  
 ad Alpes tenere. Alpinis quoque ea gentibus haud  
 dubie origo est, maxime Raetis: quos loca ipsa effe-  
 rarunt, ne quid ex antiquo, praeter sonum linguae,  
 nec eum inconruptum, retinerent.

U. c. 364.  
a. C. 383.

XXXIV. De transitu in Italiam Gallorum haec accepimus. Prisco Tarquinio Romae regnante, Celtarum, quae pars Galliae tertia est, penes Bituriges summa imperii fuit. ii regem Celtico dabant. Ambigatus is fuit, virtute fortunaque quum sua, tum publica, praepollens, quod imperio eius Gallia adeo frugum hominumque fertilis fuit, ut abundans multitudo vix regi videretur posse. Hic magno natu ipse iam, exonerare praegravante turba regnum cupiens, Bellovesum ac Sigovesum, sororis filios, inpigros iuvenes, missurum se esse, in quas Dii dedissent auguriis sedes, ostendit. Quantum ipsi vellent numerum hominum excirent, ne qua gens arcere advenientes posset. Tum Sigoveso sortibus dati Hercynii <sup>e)</sup> saltus: Belloveso haud paullo laetiozem in Italiam viam Dii dabant. Is, quod eius <sup>d)</sup> ex populis abundabat, Bituriges, Arvernos, Senones, Aeduos, Ambarros, Carnutes, Aulercos, excivit. Profectus ingentibus peditum equitumque copiis, in Tricastinos venit. Alpes inde obpositae erant: quas in exsuperabiles visas haud equidem miror, nulla dum via (quod quidem continens memoria sit, nisi de Hercule fabulis credere libet) superatas. Ibi quum velut septos montium altitudo teneret Gallos, circumspectarentque, quam per iuncta coelo iuga in alium orbem terrarum transirent, religio etiam tenuit, quod adlatum est, advenas quaeerentes agrum ab Salyum gente obpugnari. Massilienses erant hi, navibus a Phocaea profecti. Id Galli fortunae suae omen rati adiuvare, ut, quem primum in terram egressi occupaverant, locum patentibus silvis communirent. ipsi per Taurinos saltusque invios Alpes transcenderunt <sup>e)</sup>: fuisque acie Tuscis haud procul Ticino flumine, quum, in quo consederant, agrum Insubrium adpellari audissent, cognomine In-

c) *Hercynii* Gron. Crev.

d) *eis* Eaed.

e) *ipsi Taurino saltu invias*

*Alpes transcenderunt* Eaed.

[In Crev. *Alpes* legitur.]

subribus pago Aeduorum <sup>f)</sup>): ibi, omen sequentes loci, U. c. 364.  
condidere urbem: Mediolanum adpellarunt. a. C. 388.

XXXV. Alia subinde manus Cenomanorum, Eli-  
tovio duce vestigia priorum secuta, eodem saltu, fa-  
vente Belloveso, quum transcendisset Alpes, ubi nunc  
Brixia ac Verona urbes sunt, (locos tenuere Libui)  
considunt. post hos Salluvii, prope antiquam gentem  
Laevos Ligures, incolentes circa Ticinum amnem.  
Penino deinde Boii Lingonesque transgressi, quum  
iam inter Padum atque Alpes omnia tenerentur, Pa-  
do ratibus traiecto, non Etruscos modo, sed etiam  
Umbros, agro pellunt: intra Apenninum tamen sese  
tenuere. Tum Senones, recentissimi advenarum, ab  
Utente flumine usque ad Aesim fines habuere. Hanc  
gentem Clusium, Romamque inde, venisse compe-  
rio. id parum certum est, solamne, an ab omnibus  
Cisalpinorum Gallorum populis adiutam. Clusini,  
novo bello exterriti, quum multitudinem, quum for-  
mas hominum invisitas <sup>g)</sup> cernerent et genus armo-  
rum, audirentque, saepe ab iis, cis Padum ultraque,  
legiones Etruscorum fusas, quamquam adversus Ro-  
manos nullum eis ius societatis amicitiaeve erat, ni-  
si quod Veientes consanguineos adversus populum  
Romanum non defendissent, legatos Roman, qui  
auxilium ab senatu peterent, misere. De auxilio  
nihil inpetratum. legati tres M. Fabii Ambusti filii  
missi, qui senatus populique Romani nomine agerent  
cum Gallis, ne, a quibus nullam iniuriam adcepissent,  
socios populi Romani atque amicos obpugnarent. Ro-  
manis eos bello quoque, si res cogat, tuendos esse. sed  
melius visum, bellum ipsum amoveri, si posset: et  
Gallos, novam gentem, pace potius cognosci, quam  
armis.

XXXVI. Mitis legatio, ni praeferoces legatos,  
Gallisque magis quam Romanis similes, habuisset.  
quibus, postquam mandata ediderunt in concilio Gal-

f) *Heduorum Gron.*

g) *invisitas Gron. Crev.*

U. c. 364. lorum, datur responsum: *Etsi novum nomen audiant*  
 a. C. 388. *Romanorum, tamen credere viros fortes esse, quorum*  
*auxilium a Clusinis in re trepida sit inploratum. et,*  
*quoniam legatione adversus se maluerint, quam armis,*  
*tueri socios, ne se quidem pacem, quam illi adferant,*  
*adspernari, si Gallis, egentibus agro, quem latius*  
*possideant, quam colant, Clusini, partem finium con-*  
*cedant: aliter pacem inpetrari non posse. Et respon-*  
*sum coram Romanis accipere<sup>h)</sup> velle: et, si negetur*  
*ager, coram iisdem Romanis dimicatu-ros, ut nunciare*  
*domum possent, quantum Galli virtute ceteros mortales*  
*praestarent. Quodnam id ius esset, agrum a possessor-*  
*ibus petere, aut minari arma? Romanis quaerenti-*  
*bus, et, quid in Etruria rei Gallis esset? quum illi*  
*se in armis ius ferre: et omnia fortium virorum esse,*  
*ferociter dicerent, accensis utrimque animis ad arma*  
*discurritur, et proelium conseritur. Ibi, iam urgen-*  
*tibus Romanam urbem fatis, legati contra ius gentium*  
*arma capiunt. nec id clam esse potuit, quum ante*  
*signa Etruscorum tres nobilissimi fortissimique Ro-*  
*manae iuventutis pugnarent. tantum eminebat pere-*  
*grina virtus. Quin etiam Q. Fabius, evectus extra*  
*aciem equo, ducem Gallorum, ferociter in ipsa si-*  
*gna Etruscorum incursantem, per<sup>i)</sup> latus transfixum*  
*hasta, occidit: spoliaque eius legentem Galli agno-*  
*vere, perque totam aciem, Romanum legatum esse,*  
*signum datum est. Omissa inde in Clusinos ira, re-*  
*ceptui canunt, minantes Romanis. Erant, qui ex-*  
*templo Romam eundum censerent. vicere seniores,*  
*ut legati prius mitterentur questum iniurias postula-*  
*tumque, ut pro iure gentium violato Fabii dederen-*  
*tur. Legati Gallorum quum ea, sicut erant mandata,*  
*exposuissent, senatui nec factum placebat Fabiorum,*  
*et ius postulare barbari videbantur. sed, ne id, quod*  
*placebat, decerneret<sup>k)</sup> in tantae nobilitatis viris,*

h) *se accipere* Gron Crev,

k) *decernerent* Crev.

i) *per del.* Gron.



ambitio obstabat. Itaque, ne penes ipsos culpa es- U. c. 364.  
 set cladis forte Gallico bello acceptae, cognitionem<sup>a</sup> C. 388.  
 de postulatis Gallorum ad populum reiciunt. ubi tan-  
 to plus gratia atque opes valere, ut, quorum de  
 poena agebatur, tribuni militum consulari potestate  
 in insequentem annum crearentur. Quo facto, haud  
 secus quam dignum erat, infensi Galli bellum propa-  
 lam minantes, ad suos redeunt. Tribuni militum<sup>U. c. 365.</sup>  
 cum tribus Fabiis creati Q. Sulpicius Longus, Q. Ser-<sup>a. C. 387.</sup>  
 vilius quartum, Ser. Cornelius Maluginensis.

XXXVII. Quum tanta moles mali instaret,  
 (adeo obcaecat animos fortuna, ubi vim suam in-  
 gruentem refringi non vult) civitas, quae adversus  
 Fidenatem ac<sup>1)</sup> Veientem hostem aliosque finitimos  
 populos, ultima experiens auxilia, dictatorem mul-  
 tis tempestatibus dixisset; ea tunc, inuisitato<sup>m)</sup> at-  
 que inaudito hoste ab Oceano terrarumque ultimis  
 oris bellum ciente, nihil extraordinarii imperii aut  
 auxilii quaesivit. Tribuni, quorum temeritate bel-  
 lum contractum erat, summae rerum praeerant: de-  
 lectumque nihilo adcuratiorem, quam ad media bel-  
 la haberi solitus erat, (extenuantes etiam famam bel-  
 li) habebant. Interim Galli, postquam accepere,  
 ultro honorem habitum violatoribus iuris humani,  
 elusamque legationem suam<sup>n)</sup> esse, flagrantes ira,  
 cuius inpotens est gens, confestim signis convulsis,  
 citato agmine iter ingrediuntur. Ad quorum praeter-  
 euntium raptim tumultum quum exterritae urbes ad  
 arma concurrerent, fugaque agrestium fieret, Romam  
 se ire, magno clamore significabant; quacumque  
 ibant, equis virisque longe ac late fuso agmine in-  
 mensum obtinentes loci. Sed, antecedente fama  
 nunciisque Clusinorum, deinceps inde aliorum popu-  
 lorum, plurimum terroris Romam celeritas hostium

1) et Gron. Crev.  
 m) inuisitato Eaed.

n) suam legationem Eaed.

U. c. 565. tulit. quippe quibus, velut tumultuario exercitu ra-  
 a. C. 387. ptim ducto, aegre ad undecimum lapidem obcursum  
 est, qua flumen Allia, Crustumini montibus prae-  
 alto defluens alveo, haud multum infra viam Tibe-  
 rino amni miscetur. Iam omnia contra circaque ho-  
 stium plena erant. et nata in vanos tumultus gens,  
 truci cantu clamoribusque variis, horrendo cuncta  
 compleverant sono.

XXXVIII. Ibi tribuni militum, non loco ca-  
 stris ante capto, non praemunito vallo, quo receptus  
 esset, non Deorum saltem, si non hominum, me-  
 mores, nec auspicato, nec litato, instruunt aciem de-  
 ductam <sup>o)</sup> in cornua, ne circumveniri multitudine  
 hostium possent. nec tamen aequari frontes poterant,  
 quum extenuando infirmam et vix cohaerentem me-  
 diam aciem haberent. Paullum erat ab dextera editi  
 loci, quem subsidiariis repleti placuit; eaque res, ut  
 initium pavoris ac fugae, sic una salus fugientibus  
 fuit. Nam Brennus, regulus Gallorum, in paucitate  
 hostium artem maxime timens, ratus ad id captum  
 superiorem locum, ut, ubi Galli cum acie legionum  
 recia fronte concurrissent <sup>p)</sup>, subsidia in aversos  
 transversosque inpetum darent, ad subsidiarios signa  
 convertit: si eos loco depulisset, haud dubius, faci-  
 lem in aequo campi tantum superanti multitudini <sup>q)</sup>  
 victoriam fore. adeo non fortuna modo, sed ratio  
 etiam, cum barbaris stabat. In altera acie nihil si-  
 mile Romanis, non apud duces, non apud milites  
 erat. pavor fugaque occupaverat animos, et tanta  
 omnium <sup>r)</sup> oblivio, ut multo maior pars Veios, in  
 hostium urbem, quum Tiberis arceret, quam recto  
 itinere Romam ad coniuges ac liberos fugerent. Pa-  
 rumper subsidiarios tutatus est locus. in reliqua acie

o) *deductam* Gron. Crev. *dine legitur.*

p) *concurrissent* Eaed.

r) *hominum* Eaed. c. Drak.

q) *multitudine* Eaed. [In. In Crev. min. *omnium* exstat.  
 Crev. min. *superante multitu-*

simul est clamor, proximis ab latere, ultimis ab ter- U. c. 365.  
go, auditus, ignotum hostem prius pene quam vide- a. C. 387.  
rent, non modo non tentato certamine, sed ne cla-  
more quidem reddito, integri intactique fugerunt.  
Nec ulla caedes pugnantium fuit. terga caesa suomet  
ipsorum certamine in turba inpedientium fugam.  
Circa ripam Tiberis, quo armis abiectis totum sini-  
strum cornu defugit, magna strages facta est: multos-  
que, inperitos nandi aut invalidos, graves lorice teg-  
minibus hausere gurgites. maxima tamen pars inco-  
lumis Veios perfugit; unde non modo praesidii quid-  
quam, sed ne nuncius quidem cladis, Romam est  
missus. Ab dextro cornu, quod procul a flumine et  
magis sub monte steterat, Romam omnes petiere,  
et, ne clausis quidem portis urbis, in arcem confu-  
gerunt.

XXXIX. Gallos quoque velut obstupefactos mi-  
raculum victoriae tam repentinae tenuit. et ipsi pa-  
vore defixi primum steterunt, velut ignari, quid ac-  
cidisset. deinde insidias vereri; postremo caesorum  
spolia legere, armorumque cumulos, ut mos eis est,  
coacervare. Tum demum, postquam nihil usquam  
hostile cernebatur, viam ingressi, haud multo ante  
solis occasum ad urbem Romam perveniunt. ubi quum  
praegressi equites, non portas clausas, non stationem  
pro portis excubare, non armatos esse in muris, re-  
tulissent; aliud priori simile miraculum eos sustinuit;  
noctemque veriti et ignotae situm urbis, inter Romam  
atque Anienem consedere, exploratoribus missis cir-  
ca moenia aliasque portas, quaenam hostibus in per-  
dita re consilia essent. Romani, quum pars maior  
ex acie Veios petisset s), nemo superesse quemquam  
praeter eos, qui Romam refugerant, crederet, com-  
plorati omnes, pariter vivi mortuique, totam prope  
urbem lamentis inpleverunt. Privatos deinde luctus

s) *petiisset* Gron. Crev.

U. c. 365. stupefecit publicus pavor, postquam hostes adesse  
 a. C. 367. nuntiatus est. mox ululatus cantusque dissonos, vagantibus circa moenia turmatim barbaris, audiebant. Omne inde tempus suspensos ita tenuit animos usque ad lucem alteram, ut identidem iam in urbem futurus videretur inpetus primo adventu, quo accesserant ad urbem. mansuros enim ad Alliam fuisse, nisi hoc consilii foret. Deinde sub occasum solis, quia haud multum diei supererat, ante noctem rati se invasuros; tum in noctem dilatum consilium esse, quo plus pavoris inferrent. Postremo lux adpropinquans exanimare: timorique perpetuo ipsum malum continens fuit, quum signa infesta portis sunt inlata. Nequaquam tamen ea nocte, neque insequenti die similis illi, quae ad Alliam tam pavidè fugerat, civitas fuit. Nam quum defendi urbem posse, tam parva relicta manu, spes nulla esset, placuit, cum coniugibus ac liberis iuventutem militarem senatusque robur in arcem Capitoliumque concedere <sup>t)</sup> armisque et frumento conlatis, ex loco inde munito Deos hominesque et Romanum nomen defendere. Flaminem sacerdotesque Vestales sacra publica a caede, ab incendiis procul auferre: nec ante deseri cultum eorum, quam non superessent, qui colerent. Si arx Capitoliumque, sedes Deorum, si senatus, caput publici consilii, si militaris iuventus superfuerit inminente ruinae urbis, facilem iacturam esse seniorum, relictæ in urbe utique periturae turbae. et, quo id aequiore animo de plebe multitudo ferret, senes triumphales consularesque simul se cum illis palam dicere obituros; nec his corporibus, quibus non arma ferre, non tueri patriam possent, oneratuos inopiam armatorum.

XL. Haec inter seniores morti destinatos iactata solatia. Versae inde adhortationes ad agmen iuve-

t) *conscendere* Gron. Crev.



num, quos in Capitolium atque in arcem prosequerentur, committentes virtuti eorum iuventutis aequaeque U. c. 365. a. C. 337. urbis per trecentos sexaginta annos omnibus bellis victricis, quaecumque reliqua esset, fortunam. Digredientibus, qui spem omnem atque opem secum ferebant, ab iis, qui captae urbis non superesse statuerant exitio; quum ipsa res speciesque miserabilis erat, tum muliebris fletus et concursatio incerta, nunc hos nunc illos sequentium, rogantiumque viros natosque, cui se fato darent, nihil, quod humanis superesset malis, relinquebant. magna pars tamen earum in arcem suos prosecutae sunt, nec prohibente ullo, nec vocante: quia, quod utile obsessis ad minuendam inbellem multitudinem, id parum humanum erat. Alia maxime plebis turba, quam nec capere tam exiguus collis, nec alere in tanta inopia frumenti poterat, ex urbe effusa velut agmine iam uno petiit Ianiculum. inde pars per agros dilapsi, pars urbes petunt finitimas, sine ullo duce aut consensu, suam quisque spem, sua consilia, communibus deploratis, exsequentes. Flamen interim Quirinalis virginesque Vestales, omissa rerum suarum cura, quae sacrorum secum ferenda, quae (quia vires ad omnia ferenda deerant) relinquenda essent, consultantes, quisve ea locus fideli adservaturus custodia esset; optimum ducunt, condita in doliolis sacello proximo aedibus flaminis Quirinalis, ubi nunc desui religio est, defodere: cetera inter se onere partito ferunt via, quae sublicio ponte ducit ad Ianiculum. In eo clivo eas quum L. Albinus, de plebe Romana homo, conspexisset, plastro coniugem ac liberos vehens inter ceteram turbam, quae inutilis bello urbe excedebat: salvo etiam tum discrimine divinarum humanarumque rerum, inreligiosum ratus, sacerdotes publicos sacraque populi Romani pedibus ire, ferrique; se ac suos in vehiculo conspici; descendere uxorem ac pue-

U. c. 365. ros iussit, virgines sacraque in plastrum inposuit:  
 a. C. 387. et Caere, quo iter sacerdotibus erat, pervexit.

**XLI.** Romae interim, satis iam omnibus, ut in tali re, ad tuendam arcem compositis, turba seniorum, domos regressa, adventum hostium obstinato ad mortem animo exspectabat. qui eorum curules gesserant magistratus, ut in fortunae pristinae honorumque aut virtutis insignibus morerentur, quae augustissima vestis est tensas ducentibus triumphantibusve, ea vestiti medio aedium eburneissellis sedere. Sunt, qui, M. Fabio pontifice maximo praefante carmen, devovisse eos se pro patria Quiritibusque Romanis, tradant. Galli, et quia interposita nocte a contentione pugnae remiserant animos, et quod nec in acie ancipiti usquam certaverant proelio, nec tum inpetu aut vi capiebant urbem, sine ira, sine ardore animorum ingressi postero die urbem patente Collina porta, in forum perveniunt, circumferentes oculos ad templa Deum arcemque, solam belli speciem tementem. Inde, modico relicto praesidio, (ne quis in dissipatos ex arce aut Capitolio inpetus fieret) dilapsi ad praedam vacuis obscursu hominum viis, pars in proxima quaeque tectorum agmine ruunt; pars ultima, velut ea demum intacta et referta praeda, petunt. inde rursus ipsa solitudine absteriti, ne qua fraus hostilis vagos exciperet, in forum ac propinqua foro loca conglobati redibant: ubi eos, plebis aedificiis obseratis, patentibus atriis principum, maior prope cunctatio tenebat aperta, quam clausa, invadendi. adeo haud secus quam venerabundi intuebantur in aedium vestibulis sedentes viros, praeter ornatum habitumque humano augustiorem, maiestate etiam, quam vultus gravitasque oris prae se ferebat, simillimos Diis. Ad eos velut simulacra versi quum starent, M. Papirius unus ex his dicitur Gallo, barbam suam, ut tum omnibus promissa erat, permulcenti, scipione eburneo in caput incusso iram movisse; at-

que ab eo initium caedis ortum, ceteros in sedibus <sup>U. c. 365.</sup> suis trucidatos. Post principum caedem nulli deinde <sup>a. C. 387.</sup> mortalium parci, diripi tecta, exhaustis iniici ignes.

XLII. Ceterum, seu non omnibus delendae urbis libido erat, seu ita placuerat principibus Gallorum, et ostentari quaedam incendia terroris caussa, si compelli ad deditionem caritate sedium suarum obsessi possent; et non omnia concremari tecta, ut, quodcumque superesset urbis, id pignus ad flectendos hostium animos haberent; nequaquam perinde atque in capta urbe prima die aut passim aut late vagatus est ignis. Romani, ex arce plenam hostium urbem cernentes, vagosque per vias omnes cursus, quum alia atque alia parte nova aliqua clades oriretur, non mentibus solum consipere, sed ne auribus quidem atque oculis satis constare poterant. Quocumque clamor hostium, mulierum puerorumque ploratus, sonitus flammae, et fragor ruentium tectorum advertisset <sup>u)</sup>, paventes ad omnia, animos oraque et oculos flectebant, velut ad spectaculum a fortuna positi occidentis patriae, nec ullius rerum suarum relictis, praeterquam corporum, vindices. tanto ante alios miserandi magis, qui unquam obsessi sunt, quod interclusi a patria obsidebantur, omnia sua cernentes in hostium potestate. Nec tranquillior nox diem tam foede actum excepit: lux deinde noctem inquietam insecuta est. nec ullum erat tempus, quod a novae semper cladis alicuius spectaculo cessaret. Nihil tamen, tot onerati atque obruti malis, flexerunt animos, quin, etsi omnia flammis ac ruinis aequata viderissent, quamvis inopem parvumque, quem tenebant, collem, libertati relictum, virtute defenderent; et iam, quum eadem quotidie acciderent, velut adsueti malis, abalienaverant ab sensu rerum suarum ani-

u) *advertisset* Gron. Crev. c. Drak. In Crev. min. *advertisset* legitur.

U. c. 365. mos; arma tantum ferrumque in dextris, velut solas  
 a. C. 387. reliquias spei suae, intuentes.

XLIII. Galli quoque, per aliquot dies in tecta modo urbis nequidquam bello gesto, quum inter incendia ac ruinas captae urbis nihil superesse, praeter armatos hostes, viderent, nequidquam tot cladibus territos, nec flexuros ad deditionem animos, ni vis adhiberetur; experiri ultima, et inpetum facere in arcem statuunt. Prima luce, signo dato multitudo omnis in foro instruitur. inde, clamore sublato ac testudine facta, subeunt. adversus quos Romani nihil temere nec trepide, ad omnes aditus stationibus firmatis, qua signa ferri videbant, ea robore virorum obposito scandere hostem sinunt: quo successerit magis in arduum, eo pelli posse per proclive facilius rati. Medio fere clivo restitere: atque inde ex loco superiore, qui prope sua sponte in hostem inferebat, impetu facto, strage ac ruina fudere Gallos: ut numquam postea nec pars, nec universi tentaverint tale pugnae genus. Omissa itaque spe per vim atque arma subeundi, obsidionem parant: cuius ad id tempus inmemores, et, quod in urbe fuerat, frumentum incendiis urbis absumserant, et ex agris per ipsos dies raptum omne Veios erat. Igitur, exercitu diviso, partim per finitimos populos praedari placuit, partim obsideri arcem: ut obsidentibus frumentum populatorum agrorum praeberent. Proficiscentes Gallos ab urbe ad Romanam experiendam virtutem fortuna ipsa Ardeam, ubi Camillus exsulabat, duxit: qui moestior ibi fortuna publica, quam sua, quum Diis hominibusque accusandis senesceret, indignando mirandoque, ubi illi viri essent, qui secum Veios Falteriosque cepissent, qui alia bella fortius semper, quam felicius, gessissent; repente audit, Gallorum exercitum adventare, atque de eo pavidos Ardeates consultare. nec secus quam divino spiritu tactus,



quum se in mediam concionem intulisset, abstinere <sup>U. c. 565.</sup>  
suetus ante talibus conciliis; <sup>a. C. 537.</sup>

XLIV. *Ardeates, inquit, veteres amici, novi etiam cives mei, quando et vestrum beneficium ita tulit, et fortuna hoc egit mea, nemo vestrum conditionis meae oblitum me huc processisse putet, sed res ac periculum commune cogit, quod quisque possit in re trepida praesidii, in medium conferre. Et quando ego vobis pro tantis vestris in me meritis gratiam referam, si nunc cessavero? aut ubi usus erit mei vobis, si in bello non fuerit? Hac arte in patria steti; et, invictus bello, in pace ab ingratis civibus pulsus sum. Vobis autem, Ardeates, fortuna oblata est, et pro tantis pristinis populi Romani beneficiis; quanta ipsi meministis, (nec enim exprobranda apud memores sunt) gratiae referendae, et huic urbi decus ingens belli ex hoste communi pariendi. Quae effuso agmine adventat, gens est, cui natura corpora animosque magna magis, quam firma, dedit. eo in certamen omne plus terroris, quam virium, ferunt. Argumento sit clades Romana. patentem cepere urbem; ex arce Capitolioque his exigua resistitur manu. Iam obsidionis taedio victi abscedunt, vagique per agros palantur. Cibo vinoque raptim hausto repleti, ubi nox adpetit <sup>x</sup>), prope rivos aquarum, sine munimento, sine stationibus ac custodiis, passim ferarum ritu sternuntur, nunc ab secundis rebus magis etiam solito incauti. Si vobis in animo est tueri moenia vestra, nec pati haec omnia Galliam fieri, prima vigilia capite arma frequentes: me sequimini ad caedem, non ad pugnam. nisi vinctos <sup>y</sup>) somno, velut <sup>z</sup>) pecudes, trucidandos tradidero, non recuso eundem Ardeae rerum mearum exitum, quem Romae habui.*

XLV. Aequis iniquisque persuasum erat, tan-

<sup>x</sup>) palantur, cibo vinoque raptim hausto repleti. Ubi nox adpetit etc. Gron. Crev. c. Drak. <sup>y</sup>) victos Gron. Crev. <sup>z</sup>) veluti Eaed.  
In Crev. min. oratio rectius est

U. c. 365. tum bello virum neminem usquam ea tempestate es-  
 a. C. 387. se. Concione dimissa, corpora curant, intenti, quam  
 mox signum daretur. quo dato, primae silentio noctis <sup>a)</sup> ad portas Camillo praesto fuere. Egressi, haud procul urbe, sicut <sup>b)</sup> praedictum erat, castra Gallorum, intuta neglectaque ab omni parte nacti, clamore invadunt. Nusquam proelium, omnibus locis caedes est: nuda corpora et soluta somno trucidantur. extremos tamen pavor cubilibus suis excitos, quae aut unde vis esset, ignaros, in fugam, et quosdam in hostem ipsum improvidos tulit. magna pars in agrum Antiatem delati, incursione ab oppidanis in palatos facta, circumveniuntur. Similis in agro Veienti Tuscorum facta strages est: qui urbis, iam prope quadringentesimum annum vicinae, obpressae ab hoste invisitato <sup>c)</sup> inauditoque, adeo nihil miseriti <sup>d)</sup> sunt, ut in agrum Romanum eo tempore incursiones facerent, plenique praedae Veios etiam, praesidiumque et spem ultimam Romani nominis, in animo habuerint obpugnare. Viderant eos milites Romani, vagantes per agros et congregatos agmine, praedam prae se agentes, et castra cernebant haud procul Veiiis posita. inde primum miseratio sui, deinde indignitas, atque ex ea ira animos cepit, *Etruscisne etiam, a quibus bellum Gallicum in se avertissent, ludibrio esse clades suas?* Vix temperavere animis, quin extemplo inpetum facerent: compressique a Caedicio centurione, quem sibimet ipsi praefecerant, rem in noctem sustinuerunt. Tantum par Camillo defuit auctor, cetera eodem ordine eodemque fortunae eventu gesta. quin etiam, ducibus captivis, qui caedi nocturnae superfuerant, ad aliam manum Tuscorum ad Salinas profecti, nocte insequenti ex improviso maiorem caedem edidere, duplicique victoria ovantes Veios redeunt.

a) *noctis silentio* Gron. Crev.

b) *sicuti* Eaed.

c) *invisitato* Eaed.

d) *miseriti* Eaed.

XLVI. Romae interim plerumque obsidio segnis <sup>U. c. 365.</sup>  
et utrimque silentium esse, ad id tantum intentis <sup>a. C. 387.</sup>  
Gallis, ne quis hostium evadere inter stationes pos-  
set: quum repente iuvenis Romanus admiratione in  
se cives hostesque convertit. Sacrificium erat statum  
in Quirinale colle genti Fabiae. ad id faciendum C.  
Fabius Dorso, Gabino cinctu, sacra manibus gerens,  
quum de Capitolio descendisset, per medias hostium  
stationes egressus, nihil ad vocem cuiusquam terro-  
remve motus, in Quirinalem collem pervenit. ibique  
omnibus sollempniter peractis, eadem revertens simi-  
liter constanti vultu graduque, satis sperans propitios  
esse Deos, quorum cultum ne mortis quidem metu  
prohibitus deseruisset, in Capitolium ad suos rediit,  
seu adtonitis Gallis miraculo audaciae, seu religione  
etiam motis, cuius haudquaquam neglegens est gens.  
Veiis interim non animi tantum in dies, sed etiam  
vires, crescebant: nec Romanis solum eo convenien-  
tibus ex agris, qui a <sup>e)</sup> proelio adverso aut clade ca-  
ptae urbis palati fuerant, sed etiam ex Latio volun-  
tariis confluentibus, ut in parte praedae essent. Ma-  
tutum iam videbatur, repeti patriam eripique ex ho-  
stium manibus: sed corpori valido caput deerat. Lo-  
cus ipse admonebat Camilli, et magna pars militum  
erat, qui ductu auspicioque eius res prospere gesse-  
rant: et Caedicius negare, se commissurum, cur si-  
bi aut Deorum aut hominum quisquam imperium fini-  
ret potius, quam ipse memor ordinis sui posceret  
imperatorem. Consensu omnium placuit, ab Ardea  
Camillum adiri; sed antea consulto senatu, qui Ro-  
mae esset. adeo regebat omnia pudor, discriminaque  
rerum prope perditis rebus servabant. Ingenti peri-  
culo transeundum per hostium custodias erat. ad eam  
rem Pontius Cominius, inpiger iuvenis, operam pol-  
licitus, incubans cortici, secundo Tiberi ad urbem

e) aut Gron. Grev.

U. c. 587. defertur. inde, qua proximum fuit a rîpa, per prae-  
 a. C. 587. ruptum, eoque neglectum hostium custodiae, saxum  
 in Capitolium evadit: et, ad magistratus ductus, man-  
 data exercitus edit. Accepto inde senatus decreto,  
 ut et, comitiis curiatis revocatus de exsilio, iussu po-  
 puli Camillus dictator extemplo diceretur, militesque  
 haberent imperatorem, quem vellent, eadem degres-  
 sus nuncius Veios contendit: missique Ardeam lega-  
 ti ad Camillum, Veios eum perduxere: seu (quod  
 magis credere libet, non prius profectum ab Ardea,  
 quam comperit legem latam; quod nec iniussu populi  
 mutari finibus posset, nec, nisi dictator dictus, au-  
 spicia in exercitu habere) lex curiata lata est, dicta-  
 torque absens dictus.

XLVII. Dum haec Veiiis agebantur, interim arx  
 Romae Capitoliumque in ingenti periculo fuit. namque  
 Galli, seu vestigio notato humano, qua nuncius a  
 Veiiis pervenerat, seu sua sponte animadverso ad  
 Carmentis saxorum <sup>f)</sup>) adscensu aequo, nocte sublu-  
 stri, quum primo inermem, qui tentaret viam, prae-  
 misissent, tradentes inde arma, ubi quid iniqui esset,  
 alterni innisi, sublevantesque in vicem et trahentes  
 alii alios, prout postularet locus; tanto silentio in  
 summum evasere, ut non custodes solum fallerent,  
 sed ne canes quidem, sollicitum animal ad nocturnos  
 strepitus, excitarent. Anseres non fefellere, quibus  
 sacris Iunoni in summa inopia cibi tamen abstineba-  
 tur. quae res saluti fuit. Namque clangore eorum  
 alarumque crepitu excitus M. Manlius, qui triennio  
 ante consul fuerat, vir bello egregius, armis adre-  
 ptis, simul ad arma ceteros ciens, vadit; et, dum  
 ceteri trepidant, Gallum, qui iam in summo constite-  
 rat, umbone ictum deturbat. Cuius casus prolapsi  
 quum proximos sterneret, trepidantes alios, armis-  
 que omissis saxa, quibus adhaerebant, manibus am-

f) saxum Gron. Crev.



plexos, trucidat. iamque et alii congregati telis mis- U. c. 365.  
 silibusque saxis proturbare hostes, ruinaque tota pro- a. C. 387.  
 lapsa acies in praeceps deferri. Sedato deinde tumultu, reliquum noctis (quantum in turba is mentibus poterat, quum praeteritum quoque periculum sollicitaret) quieti datum est. Luce orta, vocatis classico ad concilium militibus ad tribunos, quum et recte et perperam facto pretium deberetur; Manlius primum ob virtutem laudatus donatusque, non ab tribunis solum militum, sed consensu etiam militari: cui universi selibras farris et quartarios vini ad aedes eius, quae in arce erant, contulerunt. rem dictu parvam, ceterum inopia fecerat eam argumentum ingens caritatis, quum, se quisque victu suo fraudans, detractum corpori atque usibus necessariis ad honorem unius viri conferret. Tum vigiles eius loci, qua fefellerat adscendens hostis, citati: et quum in omnes more militari se animadversurum Q. Sulpicius tribunus militum pronunciasset; consentiente clamore militum, in unum vigilem coniicientium culpam, deteritus, a ceteris abstinuit: reum haud dubium eius noxae, adprobantibus cunctis, de saxo deiecit. Inde intentiones utrimque custodiae esse; et apud Gallos, quia vulgatum erat, inter Veios Romanque nuncios commeare; et apud Romanos, ab nocturni periculi memoria,

**XLVIII.** Sed ante omnia obsidionis bellique mala fames utrumque <sup>g)</sup> exercitum urgebat: Gallos pestilentia etiam, quum loco iacente inter tumulos castra habentes, tum ab incendiis torrido et vaporis pleno, cineremque, non pulverem modo, ferente, quum quid venti motum esset. quorum intolerantissima gens, humorique ac frigori adsueta, quum aestu et angore vexata <sup>h)</sup>, vulgatis velut in pecua

g) *utrumque* Gron. Crev. c. exstat.

Drak. in Crev. min. *utrumque* h) *vexati* Gron. Crev.

U. c. 365. morbis moreretur <sup>1)</sup>), iam pigritia singulos sepeliendi  
 a. C. 387. promiscue acervatos cumulos hominum urebant: bu-  
 storumque inde Gallicorum nomine insignem locum  
 fecere. Induciae deinde cum Romanis factae, et  
 conloquia permissu imperatorum habita: in quibus  
 quum identidem Galli famem obiicerent, eaque ne-  
 cessitate ad deditionem vocarent, dicitur avertendae  
 eius opinionis caussa multis locis panis de Capitolio  
 iactatus esse in hostium stationes. Sed iam neque  
 dissimulari, neque ferri ultra fames poterat. Itaque,  
 dum dictator delectum per se Ardeae habet, magistrum  
 equitum L. Valerium a Veiis abducere exercitum iu-  
 bet, parat, instruitque, quibus haud inpar adoriatur  
 hostes: interim Capitolinus exercitus, stationibus vi-  
 giliisque fessus, superatis tamen humanis omnibus ma-  
 lis, quum famem unam natura vinci non sineret, diem  
 de die prospectans, ecquod auxilium ab dictatore ad-  
 pareret; postremo spe quoque iam, non solum cibo,  
 deficiente, et, quum stationes procederent, prope  
 obruentibus infirmum corpus armis, vel dedi, vel re-  
 dimi se, quacumque pactione possent, iussit; iac-  
 tantibus non obscure Gallis, haud magna mercede se  
 adduci posse, ut obsidionem relinquant. Tum sena-  
 tus habitus, tribunisque militum negotium datum, ut  
 paciscerentur. Inde inter Q. Sulpicium tribunum mi-  
 litum et Brennum regulum Gallorum conloquio trans-  
 acta res est, et mille pondo auri pretium populi gen-  
 tibus mox imperaturi factum. Rei, foedissimae per  
 se, adiecta indignitas est. pondera ab Gallis adlata  
 iniqua, et, tribuno recusante, additus ab insolente  
 Gallo ponderi gladius: auditaque intoleranda Roma-  
 nis vox, *Vae victis esse.*

XLIX. Sed Diique et homines prohibuere redem-  
 tos vivere Romanos. nam forte quadam, prius quam  
 infanda merces perficeretur, per altercationem non-

i) *morerentur* Gron. Crev.

dum omni auro adpenso, dictator intervenit; aufer-<sup>U. c. 365.</sup>  
rique aurum de medio, et Gallos submoveri iubet.<sup>a. C. 387.</sup>

Quum illi renitentes pactos dicerent sese, negat eam  
pactionem ratam esse, quae, postquam ipse dictator  
creatus esset, iniussu suo ab inferioris iuris magistratu  
facta esset: denunciaturque Gallis, ut se ad proelium  
expediant. Suos in acervum conicere sarcinas, et  
arma aptare, ferroque, non auro, recuperare patriam  
iubet, in conspectu habentes fana Deum, et coniuges  
et liberos, et solum patriae deforme belli malis, et  
omnia, quae defendi repetique et ulcisci fas sit. In-  
struit deinde aciem, ut loci natura patiebatur, in  
semirutae solo urbis et natura inaequali; et omnia,  
quae arte belli secunda suis eligi praepararive pote-  
rant, providit. Galli, nova re trepidi, arma capiunt,  
iraque magis, quam consilio, in Romanos incurrunt.  
Iam verterat fortuna, iam Deorum opes humanaque  
consilia rem Romanam adiuvant. igitur primo con-  
cursu haud maiore momento fusi Galli sunt, quam  
ad Alliam vicerant. Iustiore altero deinde proelio ad  
octavum lapidem Gabina via, quo se ex fuga contu-  
lerant, eiusdem ductu auspicioque Camilli vincuntur.  
Ibi caedes omnia obtinuit. castra capiuntur, et ne  
nuncius quidem cladis relictus. Dictator, recuperata  
ex hostibus patria, triumphans in urbem redit: in-  
terque iocos militares, quos inconditos iaciunt, Ro-  
mulus ac parens patriae conditorque alter urbis haud  
vanis laudibus appellatur. Servatam deinde bello pa-  
triam iterum in pace haud dubie servavit, quum pro-  
hibuit migrari Veios, et tribunis rem intentius agen-  
tibus post incensam urbem, et per se inclinata magis  
plebe ad id consilium. eaque caussa fuit non abdi-  
candae post triumphum dictaturae, senatu obsecrante,  
ne rempublicam in incerto relinqueret statu.

L. Omnium primum, ut erat diligentissimus re-  
ligionum cultor, quae ad Deos immortales pertinebant,  
retulit; et senatusconsultum facit, *Fana omnia, quod*

U. c. 365. *ea hostis possedisset* <sup>k)</sup>, *restituerentur, terminarentur*,  
 a. C. 387. *expiarenturque, expiatioque eorum in libris per duum-  
 viros quaereretur* <sup>l)</sup>: *cum Caeretibus hospitium publice* <sup>m)</sup>  
*fieret, quod sacra populi Romani ac sacerdotes recepis-*  
*sent, beneficioque eius populi non intermissus honos De-*  
*um immortalium esset: ludi Capitolini fierent, quod Iu-*  
*piter optimus maximus suam sedem atque arcem populi*  
*Romani in re trepida tutatus esset: collegiumque ad eam*  
*rem M. Furius dictator constitueret ex iis, qui in Ca-*  
*pitolio atque arce habitarent.* Expiandae etiam vocis  
 nocturnae, quae nuncia cladis ante bellum Gallicum  
 audita neglectaque esset, mentio inlata, iussumque  
 templum in Nova via Aio Locutio fieri. Aurum, quod  
 Gallis ereptum erat, quodque ex aliis templis inter  
 trepidationem in Iovis cellam conlatum, quum, in  
 quae referri oporteret, confusa memoria esset, sacrum  
 omne iudicatum, et sub Iovis sella poni iussum. Iam  
 ante in eo religio civitatis adparuerat, quod, quum  
 in publico deesset aurum, ex quo summa pactae mer-  
 cedis Gallis confieret, a matronis conlatum acceperant,  
 ut sacro auro abstineretur. Matronis gratiae actae,  
 honosque additus, ut earum, sicut virorum, post mor-  
 tem sollemnis laudatio esset. Iis peractis, quae ad  
 Deos pertinebant, quaeque per senatum agi poterant;  
 tum demum, agitantibus tribunis plebem adsiduis  
 concionibus, ut, relictis ruinis, in urbem paratam  
 Veios transmigrarent, in concionem, universo senatu  
 prosequente, ascendit <sup>n)</sup>, atque ita verba fecit:

LI. *Adeo mihi acerbae sunt, Quirites, contentio-*  
*nes cum tribunis plebis, ut nec tristissimi exsilii sola-*  
*tium aliud habuerim, quoad Ardeae vixi, quam quod*  
*procul ab his certaminibus eram: et ob eadem haec, non,*  
*si* <sup>o)</sup> *me senatusconsulto populique iussu revocaretis, re-*

k) *hostes possedissent* Gron.  
 Crev.

l) *quaereretur, cum etc.* Eaed.  
 c. Drak.

m) *publice hospitium* Gron.  
 Crev.

n) *ascendit* Eaed.

o) *nisi* Gron.



*diturus umquam fuerim. Nec nuno me, ut redirem, mea* U. c. 365.  
*voluntas mutata, sed vestra fortuna perpulit. quippe,* a. C. 387.  
*ut in sua sede maneret patria, id agebatur; non ut ego*  
*utique in patria essem. et nunc quiescerem ac tacerem*  
*libenter, nisi haec quoque pro patria dimicatio esset:*  
*cui deesse, quoad vita subpetat, aliis turpe, Camillo*  
*etiam nefas est. Quid enim repetimus? quid obsessam*  
*ex hostium manibus eripuimus, si recuperatam ipsi de-*  
*serimus? et quum, victoribus Gallis, capta tota urbe,*  
*Capitolium tamen atque arcem Diique et homines Ro-*  
*mani tenuerint, habitaverint: victoribus Romanis, re-*  
*cuperata urbe, arx quoque et Capitolium deseretur* p)  
*et plus vastitatis huic urbi secunda nostra fortuna fa-*  
*ciet, quam adversa fecit? Equidem, si nobis cum urbe*  
*simul positae traditaeque per manus religiones nullae*  
*essent, tamen tam evidens numen hac tempestate rebus*  
*adfuit Romanis, ut omnem negligentiam divini cultus*  
*exemtam hominibus putem. Intuemini enim horum dein-*  
*ceps annorum vel secundas res, vel adversas; invenietis*  
*omnia prospere evenisse sequentibus Deos, adversa sper-*  
*nentibus. Iam omnium primum Veiens bellum (per quot*  
*annos, quanto labore gestum!) non ante cepit finem,*  
*quam monitu Deorum aqua ex lacu Albano emissa est.*  
*Quid haec tandem urbis nostrae clades nova? num ante*  
*exorta est, quam spreta vox coelo emissa de adventu*  
*Gallorum? quam gentium ius ab legatis nostris viola-*  
*tum? quam a nobis, quum vindicari deberet, eadem*  
*neglegentia Deorum praetermissum? Igitur victi capti-*  
*que ac redempti tantum poenarum Diis hominibusque de-*  
*dimus, ut terrarum orbi documento essemus. Adversae*  
*deinde res admonuerunt religionum. Confugimus in Ca-*  
*pitolium ad Deos, ad sedem Iovis optimi maximi: sacra*  
*in ruina rerum nostrarum alia terrae celavimus, alia,*  
*avecta in finitimas urbes, amovimus ab hostium oculis.*  
*Deorum cultum, deserti ab Diis hominibusque, tamen*

p) deseritur Gron. Crev.

U. c. 365 *non intermisimus. Reddidere igitur patriam, et victo-*  
 a. C. 387 *riam, et antiquum belli decus amissum: et in hostes,*  
*qui caeci avaritia in pondere auri foedus ac fidem fe-*  
*sellerunt, verterunt terrorem fugamque et caedem.*

LII. *Haec culti neglectique numinis tanta monu-*  
*menta in rebus humanis cernentes, ecquid sentitis, Qui-*  
*rites, quantum vixdum e<sup>q</sup>) naufragiis prioris culpa*  
*cladisque emergentes paremus nefas? Urbem auspicato*  
*inauguratoque conditam habemus: nullus locus in ea*  
*non religionum Deorumque est plenus: sacrificiis sol-*  
*lemnibus non dies magis stati, quam loca sunt, in qui-*  
*bus fiant. Hos omnes Deos, publicos privatosque, Qui-*  
*rites, deserturi estis? Quam par vestrum factum est, quod*  
*in obsidione nuper in egregio adolescente C. Fabio, non*  
*minore hostium admiratione, quam vestra, conspectum*  
*est; quum inter Gallica tela degressus ex arce sollemne*  
*Fabiae gentis in colle Quirinali obiit? An gentilicia*  
*sacra ne in bello quidem intermitti, publica sacra et Ro-*  
*manos Deos etiam in pace deseri placet? et pontifices*  
*flaminesque neglegentiores publicarum religionum esse,*  
*quam privatus in sollemni gentis fuerit? Forsitan ali-*  
*quis dicat, aut Veiis ea nos facturos, aut huc inde*  
*missuros sacerdotes nostros, qui faciant: quorum neu-*  
*trum fieri salvis ceremoniis potest. et ne omnia gene-*  
*ratim sacra omnesque percenseam Deos; in Iovis epulo*  
*num alibi, quam in Capitolio, pulvinar suscipi potest?*  
*Quid de aeternis Vestae ignibus signoque, quod imperii*  
*pignus custodia eius templi tenetur, loquar? quid de*  
*ancilibus vestris, Mars Gradive, tuque Quirine pater?*  
*haec omnia in profano diseri placet sacra, aequalia*  
*urbi, quaedam vetustiora origine urbis? Et videte, quid*  
*inter nos ac maiores intersit. illi sacra quaedam in*  
*monte Albano Lavinioque<sup>r</sup>) nobis facienda tradiderunt.*  
*An ex hostium urbibus Romam ad nos transfer-*  
*ri sacra religiosum fuit: hinc sine piaculo in hostium*

q) ex Gron. Crev.

r) Lavinoque Crev.

*urbem Veios transferemus? Recordamini, agitedum, U. c. 365. quoties sacra instaurentur, quia aliquid ex patrio ritu<sup>a</sup>. C. 387. negligentia casuve praetermissum est. Modo quae res, post prodigium Albani lacus, nisi instauratio sacrorum auspiciorumque renovatio, adfectae Veienti bello reipublicae remedio fuit? At etiam, tamquam veterum religionum memores, et peregrinos Deos transtulimus Romam, et instituimus novos. Iuno Regina, transpecta a Veis, nuper in Aventino quam insigni ob excellens matronarum studium celebrique dedicata est die? Aio Locutio templum, propter coelestem vocem exauditam in Nova via, iussimus fieri; Capitolinos ludos sollemnibus aliis addidimus; collegiumque ad id novum, auctore senatu, condidimus. Quid horum opus fuit suscipi, si una cum Gallis urbem Romanam relicturi fuimus? si non voluntate mansimus in Capitolio per tot menses obsidionis? si ab hostibus metu retenti sumus? De sacris loquimur et de templis, quid tandem de sacerdotibus? Nonne in mentem venit, quantum piaculi committatur? Vestalibus nempe una illa sedes est, ex qua eas nihil umquam, praeterquam urbs capta, movit. Flamini Diali noctem unam manere extra urbem nefas est. Hos Veientes pro Romanis facturi estis sacerdotes, et Vestales tuae te deserent, Vesta? et flamen peregre habitando in singulas noctes tantum sibi reique publicae piaculi contrahet? Quid alia, quae auspicato agimus omnia fere intra pomoerium, cui oblivioni, aut cui negligentiae damus? Comititia curiata, quae rem militarem continent; comitia centuriata, quibus consules tribunosque militares creatis, ubi auspicato, nisi ubi adsolent, fieri possunt? Veiosne haec transferemus? an comitiorum caussa populus tanto incommodo in desertam hanc ab Diis hominibusque urbem conveniet?*

**LIII.** *Sed res ipsa cogit vastam incendiis ruinisque relinquere urbem, et ad integra omnia Veios migrare, nec hic aedificando inopem plebem vexare. Hanc autem iactari magis caussam, quam peram esse, ut ego non di-*

U. c. 365. *cam, adparere vobis, Quirites, puto; qui meministis,*  
 a. C. 387. *ante Gallorum adventum, salvis tectis publicis privatis-*  
*que, stante incolumi urbe, hanc eandem rem actam esse,*  
*ut Veios transmigraremus. Et videte, quantum inter*  
*meam sententiam vestramque intersit, tribuni. Vos, et-*  
*iamsi tunc faciendum non fuerit, nunc utique facien-*  
*dum putatis: ego contra, (nec id mirati sitis prius, quam,*  
*quale sit, audieritis) etiamsi tunc migrandum fuisset,*  
*incolumi tota urbe, nunc has ruinas relinquendas non*  
*censerem. Quippe tum caussa nobis in urbem captam*  
*migrandi victoria esset, gloriosa nobis ac posteris no-*  
*stris; nunc haec migratio nobis misera ac turpis, Gal-*  
*lis gloriosa est. non enim reliquisse victores, sed amisisse*  
*victi, patriam videbimur. hoc ad Alliam fuga, hoc*  
*capta urbs, hoc circumsessum Capitolium necessitatis*  
*inposuisse, ut desereremus penates nostros, exsiliumque*  
*ac fugam nobis ex eo loco conscisceremus, quem tueri*  
*non possemus. et Galli evertere potuerunt Romam, quam*  
*Romani restituere non videbuntur potuisse? Quid restat,*  
*nisi ut, si<sup>s</sup>) iam novis copiis veniant, (constat enim*  
*vix credibilem multitudinem esse) et habitare in capta*  
*ab se, deserta a vobis, hac urbe velint, sinatis? Quid?*  
*si non Galli hoc, sed veteres hostes vestri, Aequi Volscive,*  
*faciant, ut<sup>t</sup>) commigrent Romam, velitisne illos Ro-*  
*manos, vos Veientes esse? an malitis hanc solitudinem*  
*vestram, quam urbem hostium, esse? non equidem vi-*  
*deo, quid magis nefas sit. Haec scelera, quia piget*  
*aedificare<sup>u</sup>), haec dedecora pati parati estis? Si tota*  
*urbe nullum melius ampliusve tectum fieri possit, quam*  
*casa illa conditoris est nostri, non in casis, ritu pa-*  
*storum agrestiumque, habitare est satius inter sacra pe-*  
*natesque vestros, quam exsulatum publice ire? Maiores*  
*nostri, convenae pastoresque, quum in his locis nihil,*  
*praeter silvas paludesque, esset, novam urbem tam brevi*  
*aedificaverunt<sup>x</sup>): nos, Capitolio, arce incolumi, stan-*

s) si del. Gron. Crev.

t) uti Eaed.

u) reaedificare Eaed.

x) aedificaverunt Eaed.



*tibus templis Deorum, aedificare incensa* <sup>y)</sup> *piget? et,* <sup>U. c. 365.</sup>  
*quod singuli facturi fuimus, si aedes nostrae deflagras-* <sup>a. C. 587.</sup>  
*sent, hoc in publico incendio universi recusamus facere?*

LIV. Quid tandem? si fraude, si casu *Veis* incendium ortum sit, ventoque (ut fieri potest) diffusa flamma magnam partem urbis absumat; *Fidenas* inde, aut *Gabios*, aliamve quam urbem quaesituri sumus, quo transmigemus? Adeo nihil tenet solum patriae, nec haec terra, quam matrem adpellamus; sed in superficie tignisque caritas nobis patriae pendet? Equidem, fatebor vobis, etsi minus iniuriae vestrae, quam meae calamitatis, meminisse iuvat, quum abessem, quotiescumque patria in mentem veniret, haec omnia obcurrerant, colles, campique, et *Tiberis*, et adsueta oculis regio, et hoc coelum, sub quo natus educatusque essem. quae vos, *Quirites*, nunc moveant potius caritate sua, ut maneatis in sede vestra, quam postea, quum reliqueritis ea, macerent desiderio. Non sine caussa *Dii* hominesque hunc urbi condendae locum elegerunt, saluberrimos colles flumen opportunum, quo ex mediterraneis locis fruges devehantur, quo maritimi commeatus accipiantur; mare vicinum ad commoditates, nec expositum nimia propinquitate ad pericula classium externarum: regionum *Italiae* medium, ad incrementum urbis natum unice locum. Argumento est ipsa magnitudo tam novae urbis. trecentessimus sexagesimus quintus annus urbis, *Quirites*, agitur: inter tot veterrimos populos tamdiu bella geritis; quum interea, ne singulas loquar urbes, non coniuncti cum *Aequis Volsci*, tot tam valida oppida, non universa *Etruria*, tantum terra marique pollens, atque inter duo maria latitudinem obtinens *Italiae*, bello vobis par est. Quod quum ita sit, quae (malum) ratio est, expertis experiri, quum iam, ut virtus vestra transire alio possit, fortuna certe loci huius transferri non possit? Hic *Capitolium* est, ubi quondam capite humano invento re-

U. c. 565. *sponsum est, eo loco caput rerum summamque imperii*  
 a. C. 587. *fore. hic, quum augurato liberaretur Capitolium, Iu-*  
*ventas Terminusque maximo gaudio patrum nostrorum*  
*moveri se non passi. hic Vestae ignes, hic ancilia coelo*  
*demissa, hic omnes propitii manentibus vobis Dii.*

LV. Movisse eos Camillus quum <sup>z)</sup> alia oratione, tum ea, quae ad religiones pertinebat, maxime dicitur. sed rem dubiam decrevit vox opportuna <sup>a)</sup>emissa; quod, quum senatus post paullo de his rebus in curia Hostilia haberetur, cohortesque, ex praesidiis revertentes, forte agmine forum transirent, centurio in comitio exclamavit: *Signifer, statue signum: hic manebimus optime.* qua voce audita, et senatus, *accipere se omen*, ex curia egressus, conclamavit, et plebs circumfusa adprobavit. Antiquata deinde lege, promissae urbs aedificari coepta. Tegula publice praebita est: saxi materiaeque caedendae, unde quisque vellet, ius factum: praedibus acceptis, eo anno aedificia perfecturos. Festinatio curam exemit vicos dirigendi, dum, omisso sui alienique discrimine, in vacuo aedificant. Ea est caussa, ut veteres cloacae, primo per publicum ductae, nunc privata passim subeant tecta; formaque urbis sit occupatae magis, quam divisae, similis.

z) tum Gron. Crev.

a) *opportune vox emissa* Eaed.

## EPITOME LIBRI VI.

**R**es adversus Volscos et Aequos 1) et Praenestinos prospere gestas continet. Quatuor tribus additae sunt 2), Stellatina, Sabatina, Tromentina, Arniensis 3). M. Manlius, qui Capitolium a Gallis defenderat, quum obstrictos aere aliena liberaret, nexos exsolveret, crimine adfectati regni damnatus, de saxo Tarpeio delectus est: in cuius notam senatusconsultum factum est 4), ne cui de Manlia gente Marco cognomen esset. C. Licinius et L. Sextius 5) tribuni plebis legem promulgarunt, ut consules etiam ex plebe fierent, qui ex Patribus creabantur. eamque legem cum magna contentione, repugnantibus Patribus, quum iidem 6) tribuni plebis per quinquennium soli magistratus fuissent, pertulerunt; et primus ex plebe consul L. Sextius creatus est. Lata est et 7) altera lex, ne cui plus quingentis iugeribus agri liceret possidere.

- |                                   |                             |
|-----------------------------------|-----------------------------|
| 1) <i>Aequos et Volscos</i> Gron. | 4) <i>est</i> del. Eaed.    |
| Crev.                             | 5) <i>Sextius</i> Gron.     |
| 2) <i>sunt</i> del. Eaed.         | 6) <i>eidem</i> Gron. Crev. |
| 3) <i>Narniensis</i> Eaed.        | 7) <i>et</i> del. Eaed.     |

## T. LIVII PATAVINI

## LIBER VI.

U. c. 365. Quae ab condita urbe Roma ad captam eandem ur-  
 a. C. 387. bem Romani sub regibus primum, consulibus deinde  
 ac dictatoribus, decemvirisque ac tribunis consulari-  
 bus gessere, foris bella, domi seditiones, quinque li-  
 bris exposui; res quum vetustate nimia obscuras, ve-  
 lut <sup>a)</sup> quae magno ex intervallo loci vix cernuntur;  
 tum quod parvae <sup>b)</sup> et rarae per eadem tempora lite-  
 rae fuere, una custodia fidelis memoriae rerum ge-  
 starum: et quod, etiamsi quae in commentariis pon-  
 tificum aliisque publicis privatisque erant monumen-  
 tis, incensa urbe pleraeque interierê. Clariora dein-  
 ceptioraque ab secunda origine, velut ab stirpi-  
 bus laetius feraciusque renatae urbis, gesta domi mi-  
 litiaeque exponuntur. Ceterum quo primo admini-  
 culo erecta erat, eodem innisa M. Furio principe ste-  
 tit. neque eum abdicare se dictatura, nisi anno cir-  
 cumacto, passi sunt. Comitia in insequentem an-  
 num tribunos habere, quorum in magistratu capta  
 urbs esset, non placuit: res ad interregnum rediit.  
 Quum civitas in opere ac labore adsiduo reficiendae  
 urbis teneretur, interim Q. Fabio, simul primum ma-  
 gistratu abiit, ab C. Marcio tribuno plebis dicta dies  
 est, quod legatus in Gallos, ad quos missus erat ora-  
 tor, contra ius gentium pugnasset. cui iudicio eum  
 mors, adeo opportuna, ut voluntariam magna pars

a) *veluti* Gron. Crev.b) *parvae* del. Eaed.



crederet, subtraxit. Interregnum iniiit tum P. Corne-<sup>U. c. 366.</sup>  
lius Scipio interrex, et post eum M. Furius Camillus.<sup>a. C. 336.</sup>  
Iterum is tribunos <sup>c)</sup> militum consulari potestate creat,  
L. Valerium Publicolam <sup>d)</sup> iterum, L. Virginium, P.  
Cornelium, A. Manlium, L. Aemilium, L. Postu-  
mum. Hi ex interregno quum extemplo magistrat-  
tum inissent, nulla de re prius, quam de religionibus,  
senatum consuluere. In primis foedera ac leges (erant  
autem eae duodecim tabulae et quaedam regiae leges)  
conquiri, quae comparerent, iusserunt: alia ex eis  
edita etiam in vulgus: quae autem ad sacra pertine-  
bant, a pontificibus maxime, ut religione obstrictos  
haberent multitudinis animos, subpressa. Tum de  
diebus religiosis agitari coeptum, diemque ante diem  
xv Kalendas Sextiles, duplici clade insignem, (quo  
die ad Cremeram Fabii caesi, quo deinde ad Alliam  
cum exitio urbis foede pugnatum) a posteriore clade  
Alliensem adpellarunt, insignemque rei nulli publice  
privatimque agenda fecerunt. Quidam, quod post-  
ridie Idus Quinctiles non litasset Sulpicius tribunus  
militum, neque inventa pace Deum post diem tertium  
obiectus hosti exercitus Romanus esset, etiam post-  
ridie Idus rebus divinis supersederi iussum: inde, ut  
postridie Kalendas quoque ac Nonas eadem religio  
esset, traditum putant.

II. Nec diu licuit quietis consilia erigendae ex  
tam gravi casu reipublicae secum agitare. Hinc Vol-  
sci, veteres hostes, ad exstinguendum nomen Ro-  
manum arma ceperant, hinc Etruriae principum ex  
omnibus populis coniurationem de bello, ad fanum  
Voltumnae factam, mercatores adferebant. novus  
quoque terror accesserat defectione Latinorum Her-  
nicorumque, qui, post pugnam ad lacum Regillum  
factam, per annos prope centum numquam ambigua

c) *Interregnum initum. P. nos etc.* Crev. Gron. c. Drak.  
Cornelius — iterum. Is tribu- d) *Poplicolam* Gron. Crev.

U. c. 366. fide in amicitiam <sup>e)</sup>) populi Romani fuerant. Itaque  
 a. C. 386. quum tanti undique terrores circumstarent, adpare-  
 retque omnibus, non odio solum apud hostes, sed  
 contemptu etiam intersocios nomen Romanum labora-  
 re; placuit eisdem auspiciis defendi rempublicam,  
 quibus recuperata esset, dictatoremque dici M. Fu-  
 rium Camillum. Is dictator C. Servilium Aham  
 magistrum equitum dixit: iustitioque indicto, dele-  
 ctum iuniorum habuit, ita ut seniores quoque, qui-  
 bus aliquid roboris superesset, in verba sua iuratos  
 centuriaret. Exercitum conscriptum armatumque tri-  
 fariam divisit. partem unam in agro Veiente Etruriae  
 obposuit: alteram ante urbem castra locare iussit.  
 tribunus militum his A. Manlius, illis, qui adversus  
 Etruscos mittebantur, L. Aemilius praepositus: ter-  
 tiam partem ipse ad Volscos duxit, nec procul ab La-  
 nuvio (*ad Maecium* <sup>f)</sup>) is locus dicitur) castra obpu-  
 gnare est adortus. Quibus, ab contemptu (quod prope  
 omnem deletam a Gallis Romanam iuventutem  
 crederent) ad bellum profectis, tantum Camillus au-  
 ditus imperator terroris intulerat, ut vallo se ipsi,  
 vallum congestis arboribus sepirent, ne qua intrare  
 ad munimenta hostis posset. Quod ubi animadver-  
 tit Camillus, ignem in obiectam sepem coniici iussit.  
 et forte erat vis magna venti versa in hostem. itaque  
 non aperuit solum incendio viam, sed, flammis in  
 castra tendentibus, vapore etiam ac fumo crepituque  
 viridis materiae flagrantis, ita consternavit hostes;  
 ut minor moles superantibus vallum in castra Vol-  
 scorum Romanis fuerit, quam transcendentibus se-  
 pem incendio absumam fuerat. Fuis hostibus cae-  
 sisque, quum castra inpetu cepisset dictator, prae-  
 dam militi dedit, quo minus speratam, minime <sup>g)</sup>) lar-  
 gitore duce, eo militi gratiorem. persecutus deinde  
 fugientes, quum omnem Volscum agrum depopula-

e) *amicitia* Gron. Crev.

g) *a minime* Eaed.

f) *ad Marcium* Eaed.

tus esset, ad deditionem Volscos septuagesimo de-<sup>U. c. 366.</sup>  
 mum anno subegit. Victor ex Volscis in Aequos<sup>a. C. 336.</sup>  
 transiit, et ipsos bellum molientes: exercitum eorum  
 ad Bolas obpressit; nec castra modo, sed urbem etiam  
 adgressus, inpetu primo cepit.

III. Quum in ea parte, in qua caput rei Roma-  
 nae Camillus erat, ea fortuna esset, aliam in partem  
 terror ingens ingruerat. Etruria prope omnis armata  
 Sutrium, socios populi Romani, obsidebat: quorum  
 legati, opem rebus adfectis orantes, quum senatum  
 adissent, decretum tulere, ut dictator priuo quoque  
 tempore auxilium Sutrinis ferret. Cuius spei moram  
 quum pati fortuna obsessorum non potuisset, confe-  
 ctique paucitas oppidanorum, opere, vigiliis, vul-  
 neribus, quae semper eosdem urgebant, per pactio-  
 nem urbe hostibus tradita, inermes cum singulis  
 emissi vestimentis, miserabili agmine penates relin-  
 querent; eo forte tempore Camillus cum exercitu Ro-  
 mano intervenit. cui quum se moesta turba ad pedes  
 provolvisset, principumque orationem, necessitate  
 ultima expressam, fletus mulierum ac puerorum, qui  
 exsili comites trahebantur, excepisset; parcere la-  
 mentis Sutrinis iussit: Etruscis se luctum lacrimas-  
 que ferre. Sarcinas inde deponi, Sutrinisque ibi  
 considerare, modico praesidio relicto, arma secum mi-  
 litem ferre iubet. Ita expedito exercitu profectus ad  
 Sutrium, id quod rebatur, soluta omnia rebus, ut  
 fit, secundis invenit: nullam stationem ante moenia,  
 patentes portas; victorem vagum praedam ex hostium  
 tectis egerentem. Iterum igitur eodem die Sutrium  
 capitur: victores Etrusci passim trucidantur ab novo  
 hoste, neque se conglobandi, coeundique in unum,  
 aut arma capiendi datur spatium. quum pro se quis-  
 que tenderent ad portas, si qua forte se in agros eiicere  
 possent, clausas (id enim primum dictator imperaverat)  
 portas inveniunt. Inde alii arma capere, alii, quos  
 forte armatos tumultus occupaverat, convocare suos,

U. c. 566. ut proelium inirent. quod accensum ab desperatione  
 a. C. 586. hostium fuisset; ni praecones, per urbem dimissi,  
 poni arma, et parci inermi iussissent, nec praeter armatos quemquam violari. Tum etiam, quibus animi in spe ultima obstinati ad decertandum fuerant, postquam data spes vitae est, iactare passim arma, inermesque, quod tutius fortuna fecerat, se hosti obferre. Magna multitudo in custodias divisa: oppidum ante noctem redditum Sutrinis inviolatum integrumque ab omni clade belli, quia non vi captum, sed traditum per conditiones fuerat.

IV. Camillus in urbem triumphans rediit, triumphum simul bellorum victor. Longe plurimos captivos ex Etruscis ante currum duxit. quibus sub hasta venundatis, tantum aeris redactum est, ut, pretio pro auro matronis persoluto, ex eo, quod supererat, tres paterae aureae factae sint: quas, cum titulo nominis Camilli, ante Capitolium incensum in Iovis cella constat ante pedes Iunonis positas fuisse. Eo anno in civitatem accepti, qui Veientium Capenatiumque ac Faliscorum per ea bella transfugerant ad Romanos, agerque iis novis civibus adsignatus. revocati quoque in urbem senatusconsulto a Veiiis, qui aedificandi Romae pigritia, occupatis ibi vacuis tectis, Veios se contulerant. et primo fremitus fuit adspersantium imperium: dies deinde praestituta capitalisque poena, qui non remigrasset Romam, ex ferocibus universis singulos, metu suo quemque, obedientes fecit. Et Roma quum frequentia crescere, tum tota simul exurgere aedificiis, et republica inpensas adiuvante, et aedilibus velut publicum exigentibus opus, et ipsis privatis (admonebat enim desiderium usus) festinantibus ad effectum operis. intraque annum nova urbs stetit. Exitu anni comitia tribunorum militum consulari potestate habita. creati T. Quinctius Cincinnatus, Q. Servilius Fidenas quintum, L. Iulius



Iulus, L. Aquillius <sup>h)</sup> Corvus, L. Lucretius Tricipitinus, Ser. Sulpicius Rufus. Exercitum alterum <sup>U. c. 367.</sup>  
<sup>a. C. 385.</sup> in Aequos, non ad bellum, (victos namque se fatebantur) sed ab odio ad pervastandos fines, ne quid ad nova consilia relinquerent virium, duxere: alterum in agrum Tarquiniensem. Ibi oppida Etruscorum Cortuosa et Contenebra vi capta dirutaque. Ad Cortuosam nihil certaminis fuit. inproviso adorti, primo clamore atque inpetu cepere: direptum oppidum atque incensum est. Contenebra paucos dies obpugnationem sustinuit; laborque continuus, non die non nocte remissus, subegit eos. quum in sex partes divisus exercitus Romanus senis horis in orbem succederet proelio, oppidanos eosdem integro semper certamini paucitas fessos obiceret; cessere tandem, locusque invadendi urbem Romanis datus est. Publicari praedam tribunis placebat: sed imperium, quam consilium, segnius fuit. dum cunctantur, iam militum praeda erat; nec, nisi per invidiam, adimi poterat. Eodem anno, ne privatis tantum operibus cresceret urbs, Capitolium quoque saxo quadrato substructum est: opus vel in hac magnificentia urbis conspiciendum.

V. Iam et tribuni plebis, civitate aedificando occupata, conciones suas frequentare legibus agrariis conabantur. ostentabatur in spem Pomptinus ager, tum primum, post accisas a Camillo Volscorum res, possessionis haud ambiguae. Criminabantur, *multo eum infestiores agrum ab nobilitate esse, quam a Volscis fuerit; ab illis enim tantum, quoad vires et arma habuerunt, incursiones eo factas. nobiles homines in possessionem agri publici grassari: nec, nisi, antequam omnia praecipiant, divisus sit, locum ibi plebi fore.* Haud magno opere <sup>i)</sup> plebem moverant, et infrequentem in foro propter aedificandi curam, et eodem

h) Aquilius Gron. Crev.

i) magnopere Eaed.

U. c. 367. exhaustam impensis, eoque agri inmemorem, ad quem  
 a. C. 385. instruendum vires non essent. In civitate plena religionum, tum etiam ab recenti clade superstitiosis principibus, ut renovarentur auspicia, res ad interregnum rediit. interreges deinceps M. Manlius Capitolinus, Ser. Sulpicius Camerinus, L. Valerius Potitus. Hic demum tribunorum militum consulari potestate comitia habuit. L. Papirium, C. Cornelium, U. c. 363. C. Sergium, L. Aemilium iterum, L. Menenium,  
 a. C. 384. L. Valerium Publicolam<sup>k)</sup> tertium creat. hi ex interregno magistratum occeperunt. Eo anno aedes Martis, Gallico bello vota, dedicata est a T. Quinctio duumviro sacris faciundis. Tribus quatuor ex novis civibus additae, Stellatina, Tromentina, Sabatina, Arniensis<sup>l)</sup>: eaeque viginti quinque tribuum numerum explevere.

VI. De agro Pomptino ab L. Sicinio tribuno plebis actum ad frequentiore iam populum, mobilio-remque ad cupiditatem agri, quam fuerat. Et de Latino Hernicoque bello mentio facta in senatu, maioris belli cura, quod Etruria in armis erat, dilata  
 U. c. 369. est. Res ad Camillum tribunum militum consulari  
 a. C. 383. potestate rediit. collegae additi quinque, Ser. Cornelius Maluginensis, Q. Servilius Fidenas sextum, L. Quinctius Cincinnatus, L. Horatius Pulvillus, P. Valerius. Principio anni aversae curae hominum sunt a bello Etrusco, quod fugientium ex agro Pomptino agmen repente inlatum in urbem adtulit, Antiates in armis esse, Latinorumque populos iuventutem submisisse ad id bellum; eo abnuentes publicum fuisse consilium, quod non prohibitos tantummodo voluntarios dicerent militare, ubi vellent. Desierant iam ulla contemni bella. itaque senatus Diis agere gratias, quod Camillus in magistratu esset: dictatorem quippe dicendum eum fuisse, si privatus

k) *Publicolam* Gron. Crev.

l) *Narniensis* Eaed.

esset. et collegae fateri, *regimen omnium rerum, ubi* <sup>U. c. 369.</sup>  
*quid bellici terroris ingruat, in viro uno esse: sibi* <sup>a. C. 383.</sup>  
*destinatum in animo esse, Camillo submittere imperium.*  
*nec quidquam de maiestate sua detractum credere, quod*  
*maiestati eius viri concessissent.* Conlaudatis ab se-  
 natu tribunis, et ipse Camillus, confusus animo, gra-  
 tias egit. *Ingens, inde ait, onus a populo Romano sibi,*  
*qui se dictatorem iam quartum creasset, magnum a se-*  
*natu talibus de se iudiciis eius ordinis, maximum tam*  
*honoratrum collegarum obsequio iniungi.* Itaque si  
*quid laboris vigiliarumque adiici possit, certantem se-*  
*cum ipsum adnissurum, ut tanto de se consensu civita-*  
*tis opinionem, quae maxima sit, etiam constantem effi-*  
*ciat.* Quod ad bellum atque Antiates adtineat, plus  
*ibi minarum, quam periculi, esse. se tamen, ut nihil*  
*timendi, sic nihil contemnendi auctorem esse.* Circum-  
*sederi urbem Romanam ab invidia et odio finitimorum:*  
*itaque et ducibus pluribus et exercitibus administrandam*  
*republicam esse.* Te, inquit, P. Valeri, socium  
*imperii consilii*que, legiones mecum adversus Antiatem  
*hostem ducere placet: te, Q. Servili, altero exercitu*  
*instructo paratoque, in urbe castra habere; intentum*  
*sive Etruria se interim, ut nuper, sive nova haec cu-*  
*ra, Latini atque Hernici, moverint.* Pro certo habeo,  
*ita rem gesturum, ut patre, avo, teque ipso ac sex tri-*  
*bunatibus dignum est.* Tertius exercitus ex caussariis  
*senioribusque a L. Quinctio scribatur, qui urbi moeni-*  
*busque praesidio sit.* L. Horatius arma, tela, fru-  
*mentum, quaeque belli alia tempora poscent, provideat.*  
*Te, Ser. Corneli, praesidem huius publici consilii, cu-*  
*stodem religionum, comitiorum, legum, rerum omnium*  
*urbanarum, collegae facimus.* Cunctis in partes mu-  
 neris sui benigne pollicentibus operam, Valerius,  
 socius imperii lectus, adiecit; M. Furium sibi pro di-  
 ctatore, seque ei pro magistro equitum futurum. Pro-  
 inde, quam opinionem de unico imperatore, eam spem  
 de bello haberent. Se vero bene sperare, Patres, et de

U. c. 369. *bello, et de pace universaque republica, erecti gaudio,*  
 a. C. 383. *fremunt: nec dictatore umquam opus fore reipublicae,*  
*si tales viros in magistratu habeat, tam concordibus*  
*iunctos animis, parere atque imperare iuxta paratos,*  
*laudemque conferentes potius in medium; quam ex com-*  
*muni ad se trahentes.*

VII. Iustitio indicto, delectuque habito, Furius ac Valerius ad Satricum profecti: quo non Volscorum modo iuventutem Antiates ex nova subole lectam, sed ingentem Latinorum Hernicorumque conciverant ex integerrimis diutina pace populis. itaque novus hostis veteri adiunctus commovit animos militis Romani. Quod ubi aciem iam instruenti Camillo centuriones renunciaverunt, *turbatas militum mentes esse, se-*  
*gniter arma capta, cunctabundosque et resistentes egres-*  
*sos castris esse; quin voces quoque auditas, cum cente-*  
*nis hostibus singulos pugnatuos; et aegre inermem tan-*  
*tam multitudinem, nedum armatum, sustineri posse; in*  
*equum insilit, et, ante signa obversus in aciem, or-*  
*dines interequitans, Quae tristitia, milites, haec,*  
*quae insolita cunctatio est? Hostem, an me, an vos*  
*ignoratis? Hostis est quid aliud, quam perpetua ma-*  
*teria virtutis gloriaeque vestrae? Vos contra, me duce,*  
*(ut Falerios Veiosque captos, et in capta patria Gallo-*  
*rum legiones caesas taceam) modo trigeminae victoriae*  
*triplicem triumphum ex his ipsis Volscis, et Aequis, et*  
*ex Etruria egistis. An me, quod non dictator vobis,*  
*sed tribunus, signum dedi, non agnoscitis ducem? ne-*  
*que ego maxima imperia in vos desidero: et vos in me*  
*nihil, praeter me ipsum, intueri decet. neque enim di-*  
*ctatura mihi umquam animos fecit, ut ne exsiliium qui-*  
*dem ademit. Iidem igitur omnes sumus: et, quum ea-*  
*dem omnia in hoc bellum adferamus, quae in priora ad-*  
*tulimus, eundem eventum belli expectemus. Simul con-*  
*curreritis, quod quisque didicit ac consuevit, faciet,*  
*Vos vincetis, illi fugient.*



VIII. Dato deinde signo, ex equo desilit, et <sup>U. c. 569.</sup> proximum signiferum, manu adreptum, secum in <sup>a. C. 383.</sup> hostem rapit; *infer, miles*, clamitans, *signum*. quod ubi videre ipsum Camillum, iam ad munera corporis senecta invalidum, vadentem in hostes, procurrunt pariter omnes, clamore sublato, *Sequere imperatorem*, pro se quisque clamantes. Emissum etiam signum Camilli iussu in hostium aciem ferunt; idque ut repeteretur, concitatos antesignanos. Ibi primum pulsum Antiatem, terroremque non in primam tantum aciem, sed etiam ad subsidiarios perlatum. nec vis tantum militum movebat, excitata praesentia ducis, sed quod Volscorum animis nihil terribilius erat, quam ipsius Camilli forte oblata species. Ita, quocumque se intulisset, victoriam secum haud dubiam trahebat. maxime id evidens fuit, quum, in laevum cornu, prope iam pulsum, adrepto repente equo cum scuto pedestri, advectus, conspectu suo proelium restituit, ostentans vincentem ceteram aciem. Iam inclinata res erat, sed turba hostium et fuga inpediebatur, et longa caede conficienda multitudo tanta fesso militi erat: quum repente ingentibus procellis fusus imber certam magis victoriam, quam proelium, dirimit. Signo deinde receptui dato, nox insecuta, quietis Romanis, perfecit bellum. Latini namque et Hernici, relictis Volscis, domos profecti sunt, malis consiliis pares adepti eventus. Volsci, ubi se desertos ab eis videre, quorum fiducia rebellaverant, relictis castris, moenibus Satrici se includunt, quos primo Camillus vallo circumdare, et aggere atque operibus obpugnare est adortus. Quae postquam nulla eruptione inpediri videt; minus esse animi ratus in hoste, quam ut in eo tam lentae spei victoriam exspectaret, cohortatus milites, ne, tamquam Veios obpugnantes, in opere longinquo sese tererent, victoriam in manibus esse; ingenti militum alacritate

U. c. 359. moenia undique adgressus, scalis oppidum cepit.  
 a. C. 383. Volsci abiectis armis sese dediderunt.

IX. Ceterum animus ducis rei maiori, Antio, imminebat. id caput Volscorum, eam fuisse originem proximi belli. Sed quia nisi magno adparatu, tormentis machinisque, tam valida urbs capi non poterat; relicto ad exercitum collega, Romam est profectus, ut senatum ad excidendum Antium hortaretur. Inter sermonem eius (credo, rem Antiatem diuturniorem manere, Diis cordi fuisse) legati ab Nepete ac Sutrio, auxilium adversus Etruscos petentes, veniunt, brevem occasionem esse ferendi auxilii memorantes. eo vim Camilli ab Antio fortuna avertit. Namque quum ea loca obposita Etruriae, et velut claustra inde portaeque essent; et illis occupandi ea, quum quid novi molirentur, et Romanis recuperandi tuendique cura erat. Igitur senatui cum Camillo agi placuit, ut, omisso Antio, bellum Etruscum susciperet. Legiones urbanae, quibus Quinctius praefuerat, ei decernuntur. quamquam expertum exercitum adsuetumque imperio, qui in Volscis erat, mallet, nihil recusavit: Valerium tantummodo imperii socium depoposcit. Quinctius Horatiusque successores Valerio in Volscos <sup>m)</sup> missi. Profecti ab urbe Sutrium Furius et Valerius partem oppidi iam captam ab Etruscis invenere; ex parte altera, interseptis itineribus, aegre oppidanos vim hostium ab se arcentes. Quum Romani auxilii adventus, tum Camilli nomen celeberrimum apud hostes sociosque, et in praesentia rem inclinatam sustinuit, et spatium ad opem ferendam dedit. Itaque diviso exercitu, Camillus collegam, eam in partem circumductis copiis, quam hostes tenebant, moenia adgredi iubet, non tanta spe scalis capi urbem posse, quam ut, aversis eo hostibus, et oppidanis iam pugnando fessis laxa-

<sup>m)</sup> *Volscis* Gron. Crev. c. Drak.

retur labor, et ipse spatium intrandi sine certamine U. c. 369.  
 moenia haberet. Quod quum simul utrimque factum <sup>a.</sup> G. 383.  
 esset, ancepsque terror Etruscos circumstaret, et  
 moenia summa vi obpugnari, et intra moenia esse  
 hostem viderent; porta se, quae una forte non obsi-  
 debatur, trepidi uno agmine eiecere. Magna caedes  
 fugientium et in urbe et per agros est facta. plures a  
 Furianis intra moenia caesi: Valeriani expeditiores  
 ad persequendos fuere; nec ante noctem, quae con-  
 spectum ademit, finem caedendi fecere. Sutrio re-  
 cepto restitutoque sociis, Nepete exercitus ductus,  
 quod per deditionem acceptum iam totum Etrusci  
 habebant.

X. Videbatur plus in ea urbe recipienda laboris  
 fore; non in eo solum, quod tota hostium erat, sed  
 etiam quod, parte Nepesinorum prodente civitatem,  
 facta erat deditio. Mitti tamen ad principes eorum  
 placuit, ut secernerent se ab Etruscis, fidemque,  
 quam inplorassent ab Romanis, ipsi praestarent. Un-  
 de quum responsum adlatum esset, *nihil suae pote-*  
*statis esse, Etruscos moenia custodiasque portarum te-*  
*nere*; primo populationibus agri terror est oppidanis  
 admotus: deinde, postquam deditionis, quam socie-  
 tatis, fides sanctior erat, fascibus sarmentorum ex  
 agro conlatis, ductus ad moenia exercitus, comple-  
 tisque fossis scalae admotae, et clamore primo inpe-  
 tuque oppidum capitur. Nepesinis inde edictum, ut  
 arma ponant; parciue iussum inermi. Etrusci pari-  
 ter armati atque inermes caesi. Nepesinorum quoque  
 auctores deditionis securi percussi: innoxiae multi-  
 tudini redditae res, oppidumque cum praesidio reli-  
 ctum. Ita, duabus sociis urbibus ex hoste receptis,  
 victorem exercitum tribuni cum magna gloria Romam  
 reducerunt. Eodem anno ab Latinis Hernicisque res  
 repetitae, quaesitumque, cur per eos annos militem  
 ex instituto non dedissent? Responsum frequenti  
 utriusque gentis concilio est, *nec culpam in eo publi-*

U. c. 369. *cam, nec consilium fuisse, quod suae iuventutis aliqui*  
 a. C. 383. *apud Volscos militaverint. eos tamen ipsos pravi consilii poenam habere, nec quemquam ex his reducem esse. Militis autem non dati causam, terrorem adsidium a Volscis fuisse, quam pestem adhaerentem lateri suo tot super alia aliis bellis exhauriri nequisse. Quae relata Patribus magis tempus, quam causam, non visa belli habere.*

U. c. 370. **XI.** Insequenti anno, A. Manlio, P. Cornelio,  
 a. C. 382. **T.** et **L.** Quinctiis Capitolinis, **L.** Papirio Cursore iterum, **C.** Sergio iterum tribunis consulari potestate, grave bellum foris, gravior domi seditio exorta: bellum a Volscis, adiuncta Latinorum atque Hernicorum defectione; seditio, unde minime timeri potuit, a patriciae gentis viro et inclitae famae, M. Manlio Capitolino: qui nimius animi, quum alios principes sperneret; uni invideret, eximio simul honoribus atque virtutibus, M. Furio; aegre ferebat, *solum eum in magistratibus, solum apud exercitus esse; tantum iam eminere, ut iisdem auspiciis creatos, non pro collegis, sed pro ministris habeat: quum interim, si quis vere aestimare velit, a M. Furio recuperari patria ex obsidione hostium non potuerit, nisi a se prius Capitolium atque arx servata esset: et ille, inter aurum accipiendum et spem pacis solutis animis, Gallos adgressus sit; ipse armatos capientesque arcem depulerit: illius gloriae pars virilis apud omnes milites sit, qui simul vicerint; suae victoriae neminem omnium mortalium socium esse.* His opinionibus inflato animo, ad hoc vitio quoque ingenii vehemens et inpotens, postquam inter Patres non, quantum aequum censebat, excellere suas opes animadvertit; primus <sup>n)</sup> omnium ex Patribus popularis factus, cum plebeiis <sup>o)</sup> magistratibus consilia communicare; criminando Patres, adliciendo ad se plebem, iam aura, non consilio, fer-

<sup>n)</sup> *primum* Gron. Crev. c.    <sup>o)</sup> *plebis* Gron. Crev. Drak.



ri, famaеque magnae malle, quam bonae esse: et, U. c. 370.  
 non contentus agrariis legibus, quae materia semper a. C. 382.  
 tribunis plebi seditionum fuisset, fidem moliri coepit.  
*acriores quippe aeris alieni stimulos esse, qui non ege-*  
*statem modo atque ignominiam minentur, sed nervo ac*  
*vinculis corpus liberum territent.* et erat aeris alieni  
 magna vis, re damnosissima etiam divitibus, aedifi-  
 cando contracta. Bellum itaque Volscum, grave per  
 se, oneratum Latinorum atque Hernicorum defectio-  
 ne, in speciem caussae iactatum, ut maior potestas  
 quaereretur. Sed nova consilia Manlii magis com-  
 pulere senatum ad dictatorem creandum. Creatus A.  
 Cornelius Cossus magistrum equitum dixit T. Quin-  
 ctium Capitolinum.

XII. Dictator, etsi maiorem dimicationem pro-  
 positam domi, quam foris, cernebat; tamen, seu quia  
 celeritate ad bellum opus erat, seu victoria triumpho-  
 que dictaturae ipsi vires se additurum ratus, delectu  
 habito in agrum Pomptinum, quo a Volscis exercitum  
 indictum audierat, pergit. Non dubito, praeter satie-  
 tatem, tot iam libris adsidua bella cum Volscis gesta  
 legentibus illud quoque subcursurum, (quod mihi per-  
 censi propiores temporibus harum rerum auctores  
 miraculo fuit) unde toties victis Volscis et Aequis  
 subfecerint milites. quod quum ab antiquis tacitum  
 praetermissumque sit; cuius tandem ego rei praeter  
 opinionem, quae sua cuique coniectanti esse potest,  
 auctor sim? Simile veri est, aut intervallis bellorum,  
 sicut nunc in delectibus fit Romanis, alia atque alia  
 subole iuniorum ad bella instauranda toties usos esse:  
 aut non ex iisdem semper populis exercitus scriptos,  
 quamquam eadem semper gens bellum intulerit: aut  
 innumerabilem multitudinem liberorum capitum in eis  
 fuisse locis, quae nunc, vix seminario exiguu militum  
 relicto, servitia Romana ab solitudine vindicant. In-  
 gens certe, (quod inter omnes auctores convenit)  
 quamquam nuper Camilli ductu atque auspicio accisae

U. c. 370. res erant, Volscorum exercitus fuit. ad hoc Latini  
 a. C. 382. Hernicique accesserant, et Circeiensium quidam, et  
 colonietiam a Velitris Romani. Dictator <sup>p)</sup> castris eo  
 die positis, postero cum auspicato prodisset, hostiaque  
 caesa pacem Deum adorasset, laetus ad milites, iam  
 arma ad propositum pugnae signum, sicut edictum  
 erat, luce prima capientes, processit: *Nostra victoria  
 est, milites, inquit, si quid Dii vatesque eorum in fu-  
 turum vident. itaque, ut decet certae spei plenos, et cum  
 imparibus manus conserturos, pilis ante pedes positis,  
 gladiis tantum dextras armemus: ne procurri quidem  
 ab acie velim, sed obnisos vos stabili gradu inpetum  
 hostium excipere. Ubi illi vana iniecerint missilia, et  
 effusi stantibus vobis se intulerint, tum micent gladii, et  
 veniat in mentem unicuique, Deos esse, qui Romanum  
 adiuvant; Deos, qui secundis avibus in proelium mise-  
 rint. Tu, T. Quincti, equitem intentus ad primum ini-  
 tium moti certaminis teneas: ubi haerere iam aciem con-  
 lato pede videris, tum terrorem equestrem occupatis alio  
 pavore infer: invectusque ordines pugnantium dissipa.*  
 Sic eques, sic pedes, ut praeceperat, pugnant: nec  
 dux legiones, nec fortuna fefellit ducem.

XIII. Multitudo hostium, nulli rei, praeterquam  
 numero, freta, et oculis utramque metiens aciem, te-  
 mere proelium iniit, temere omisit: clamore tantum  
 missilibusque telis et primo pugnae inpetu ferox, gla-  
 dios et conlatum pedem et vultum hostis, ardore ani-  
 mi micantem, ferre non potuit. Impulsa frons prima,  
 et trepidatio subsidiis inlata, et suum terrorem intu-  
 lit eques: rupti inde multis locis ordines, motaque  
 omnia, et fluctuanti similis acies erat. deinde, post-  
 quam, cadentibus primis, iam ad se quisque perven-  
 turam caedem cernebat, terga vertunt. Instare Ro-  
 manus; et, donec armati confertique abibant, pedi-  
 tum labor in persequendo fuit. postquam iactari ar-

p) Velitris. Romanus dictator Gron. Crev.

ma passim, fugaque per agros spargi aciem hostium U. c. 370.  
animadversum est; tum equitum turmae emissae, a. C. 382.  
dato signo, ne, in singulorum morando caede, spatium ad evadendum interim multitudini darent. satis esse, missilibus ac terrore inpediri <sup>q)</sup> cursum, obequitandoque agmen teneri, dum adsequi pedes et iusta caede conficere hostem posset. Fugae sequendique non ante noctem finis fuit: capta quoque ac direpta eodem die castra Volscorum, praedaque omnis, praeter libera corpora, militi concessa est. Pars maxina captivorum ex Latinis atque Hernicis fuit: nec hominum de plebe, ut credi posset mercede militasse, sed principes quidam iuventutis inventi, manifesta fides, publica ope Volscos hostes adiutos. Circiensium quoque quidam cogniti, et coloni a Velitris: Romanque omnes missi percunctantibus primoribus Patrum eadem, quae dictatori, defectionem sui quisque populi, haud perplexe indicavere.

XIV. Dictator exercitum in stativis tenebat, minime dubius, bellum cum his populis Patres iussuros; quum maior domi exorta moles coegit adiri Romanum, gliscente in dies seditione, quam solito magis metuendam auctor faciebat. non enim iam orationes modo M <sup>r)</sup> Manlii, sed facta, popularia in speciem, tumultuosa eadem, qua mente fierent, intuenda erant. Centurionem, nobilem militaribus factis, iudicatum pecuniae quum duci vidisset, medio foro cum caterva sua adcurrit, et manum iniecit: vociferatusque de superbia Patrum, ac crudelitate foeneratorum, et miseris plebis, virtutibus eius viri fortunaque; *Tum vero ego, inquit, nequidquam hac dextra Capitolium arcemque servaverim, si civem commilitonemque meum, tamquam Gallis victoribus captum, in servitutem ac vincula duci videam.* Inde rem creditori palam populo solvit, libraque et aere liberatum emittit, Deos atque homines obtestantem, *ut M. Manlio, liberatori*

q) inpedire Drak.

r) M. del. Gron. Crev.

U. c. 370. *suo, parenti plebis Romanae, gratiam referant.* Ac-  
 a. C. 382. ceptus extemplo in tumultuosam turbam et ipse tu-  
 multum augebat, cicatrices acceptas Veienti, Gallico,  
 aliisque deinceps bellis ostentans. *Se militantem, se*  
*restituentem eversos penates, multiplici iam sorte exso-*  
*luta, mergentibus semper sortem usuris, obrutum foenore*  
*esse: videre lucem, forum, civium ora, M. Manlii ope-*  
*ra: omnia parentum beneficia ab illo se habere: illi de-*  
*vovere corporis vitaeque ac sanguinis quod supersit. quod-*  
*cumque sibi cum patria, penatibus publicis ac privatis*  
*iuris fuerit, id cum uno homine esse.* His vocibus in-  
 stincta plebes quum iam unius hominis esset, ad-  
 dita alia commotioris ad omnia turbanda consilii res.  
 Fundum in Veienti, caput patrimonii, subiecit prae-  
 con: *Ne quem vestrum, inquit, Quirites, donec quid-*  
*quam in re mea supererit, iudicatum addictumve duci*  
*patiar.* Id vero ita accendit animos, ut per omne fas  
 ac nefas secuturi vindicem libertatis viderentur. Ad  
 hoc domi, concionantis in modum, sermones pleni  
 criminum in Patres: inter quos, quum omisso dis-  
 crimine, vera an vana iaceret, *thesauros Gallici auri*  
*occultari a Patribus iecit: nec iam possidendis publicis*  
*agris contentos esse, nisi pecuniam quoque publicam*  
*avertant: ea res si palam fiat, exsolvi plebem aere alieno*  
*posse.* Quae ubi obiecta spes est, enimvero indignum  
 facinus videri, quum conferendum ad redimendam  
 civitatem a Gallis aurum fuerit, tributo conlationem  
 factam: idem aurum, ex hostibus captum, in pau-  
 corum praedam cessisse. Itaque exsequebantur quae-  
 rendo, ubi tantae rei furtum occultaretur; diferente-  
 que, et tempore suo se indicaturum dicente, ceteris  
 omissis, eo versae erant omnium curae: adparebatque,  
 nec veri indicii gratiam mediam, nec falsi obfensionem  
 fore.

XV. Ita suspensis rebus dictator, aditus ab ex-  
 ercitu, in urbem venit. postero die senatu habito,  
 quum, satis periclitatus voluntates hominum, disce-



dere senatum ab se vetuisset, stipatus ea multitudine, U. c. 370.  
 sella in comitio posita, viatorem ad M. Manlium mi-<sup>a. C. 382.</sup>  
 sit: qui, dictatoris iussu vocatus, quum signum suis  
 dedisset, adesse certamen, agmine ingenti ad tribunal  
 venit. Hinc senatus, hinc plebs, suum quisque in-  
 tuentes ducem, velut in acie constiterant. Tum dic-  
 tator, silentio facto, *Utinam, inquit, mihi Patribus-*  
*que Romanis ita de ceteris rebus cum plebe conveniat,*  
*quemadmodum, quod ad te adtinet eamque rem, quam*  
*de te sum quaesiturus, conventurum satis confido. Spem*  
*factam a te civitati video, fide incolumi ex thesauris*  
*Gallieis, quos primores Patrum occultent, creditum sol-*  
*vi posse. Cui ego rei tantum abest ut impedimento sim,*  
*ut contra te, M. Manli, adhorter, liberes foenore ple-*  
*bem Romanam: et istos, incubantes publicis thesauris,*  
*ex praeda clandestina evolvas. Quod nisi facis, sive*  
*quod s) et ipse in parte praedae sis, sive quia vanum*  
*indicium est, in vincula te duci iubebo, nec diutius pa-*  
*tiar, a te multitudinem fallaci spe concitari. Ad ea*  
*Manlius, nec se fefellisse, ait, non adversus Volscos*  
*toties hostes, quoties Patribus expediat, nec adversus*  
*Latinos Hernicosque, quos falsis criminibus in arma*  
*agant, sed adversus se ac plebem Romanam, dictatorem*  
*creatum esse. Iam, omisso bello, quod simulatum sit,*  
*in se inpetum fieri; iam dictatorem profiteri patrocini-*  
*um foeneratorum adversus plebem: iam sibi ex favore*  
*multitudinis crimen et perniciem quaeri. Obsendit, in-*  
*quit, te, A. Corneli, vosque, Patres conscripti, circum-*  
*fusa turba lateri meo? Quin eam diducitis a me singuli*  
*vestris beneficiis, intercedendo, eximendo de nervo ci-*  
*ves vestros, prohibendo iudicatos addictosque duci, ex*  
*eo, quod adfluit opibus vestris, sustinendo necessitates*  
*aliorum? Sed quid ego vos, de vestro inpendatis, hor-*  
*tor? Sortem aliquam t) ferte. de capite deducite, quod*  
*usuris pernumeratum est: iam nihilo mea turba, quam*

s) ut Gron. Crev.

t) aliam Gron. Crev. c. Drak.

U. c. 370. ullius, conspectior erit. *At enim, quid ita solus ego*  
 a. C. 382. *civium curam ago? nihilo magis, quod respondeam, habeo, quam si quaeras, quid ita solus Capitolium arcemque servaverim. Et tum universis, quam potui, opem tuli, et nunc singulis feram. Nam quod ad thesauros Gallicos adinet, rem, suapte natura facilem, difficilem interrogatio facit, cur enim quaeritis, quod scitis? cur, quod in sinu vestro est, excuti iubetis potius, quam ponatis, nisi aliqua fraus subest? Quo magis argui praestigias iubetis vestras, eo plus vereor, ne abstuleritis observantibus etiam oculos. Itaque non ego, vobis ut indicem praedas vestras, sed vos id cogendi estis, ut in medium proferatis.*

XVI. Quum mittere ambages dictator iuberet, et aut peragere verum indicium cogeret, aut fateri facinus insinulati falso crimine senatus, oblataeque vani furti invidiae; negantem, arbitrio inimicorum se locuturum, in vincula duci iussit. Adreptus a viatore, *Iupiter, inquit, optime maxime, Iunoque Regina, ac Minerva, ceterique Dii Deaeque, qui Capitolium arcemque incolitis, siccine vestrum militem ac praesidem sinitis vexari ab inimicis? Haec dextra, qua Gallos fudi a delubris vestris, iam in vinculis et catenis erit?* Nullius nec aures indignitatem ferebant: sed invicta sibi quaedam patientissima iusti imperii civitas fecerat. nec adversus dictatoriam vim aut tribuni plebis, aut ipsa plebs, adtollere oculos aut hiscere audebant. Coniecto in carcerem Manlio, satis constat, magnam partem plebis vestem mutasse, multos mortales capillum ac barbam promisisse, obversatamque vestibulo carceris moestam turbam. Dictator de Volscis triumphavit: invidiaeque magis triumphus, quam gloriae, fuit. Quippe domi, non militiae, partum eum; actumque de cive, non de hoste, fremebant: unum defuisse tantum superbiae, quod non M. Manlius ante currum sit ductus. Iamque haud procul seditione res erat: cuius leniendae caussa, postulante nullo, largitor voluntarius repente senatus factus, Satricum co-

loniam duo millia civium Romanorum deduci iussit. U. c. 370.  
 bina iugera et semisses agri adsignati. Quod quum a. C. 382.  
 et parvum et paucis datum, et mercedem esse proden-  
 di M. Manlii interpretarentur; remedio irritatur se-  
 ditio. et iam magis insignis et <sup>u)</sup> sordibus et facie re-  
 orum turba Manliana erat, amotusque post triumphum  
 abdicatione dictaturae terror et linguam et animos li-  
 beraverat hominum.

XVII. Audiebantur itaque propalam voces ex-  
 probrantium multitudini, *quod defensores suos semper  
 in praecipitem locum <sup>x)</sup> favore tollat, deinde in ipso  
 discrimine periculi destituat. Sic Sp. Cassium, in agros  
 plebem vocantem, sic Sp. Maelium, ab ore civium fa-  
 mem suis inpensis propulsantem, obpressos; sic M. Man-  
 lium, mersam et obrutam foenore partem civitatis in li-  
 bertatem ac lucem extrahentem, proditum inimicis. Sa-  
 ginare plebem populares suos, ut iugulentur. Hoccine  
 patiendum fuisse, si ad nutum dictatoris non responde-  
 rit <sup>y)</sup> vir consularis? Fingerent mentitum ante, atque  
 ideo non habuisse, quod tum responderet: cui servo um-  
 quam mendacii poenam vincula fuisse? Non observatam  
 esse memoriam noctis illius, quae pene ultima atque  
 aeterna nomini Romano fuerit? non speciem agminis Gal-  
 lorum, per Tarpeiam rupem scandentis? non ipsius M.  
 Manlii, qualem eum armatum, plenum sudoris ac san-  
 guinis, ipso pene Iove erepto ex hostium manibus, vidis-  
 sent? Selibrisne farris gratiam servatori patriae rela-  
 tam? et quem prope coelestem, cognomine certe Capito-  
 lino Iovi parem, fecerint, eum pati vinctum in carcere,  
 in tenebris, obnoxiam carnificis arbitrio ducere animam?  
 Adeo in uno omnibus satis auxilii fuisse, nullam opem  
 in tam multis uni esse? Iam ne nocte quidem turba ex  
 eo loco dilabebatur, refracturosque carcerem minaban-  
 tur: quum remisso, id <sup>z)</sup> quod erepturi erant, ex se-*

u) et del. Gron. Crev.

y) responderet Gron. Crev.

x) in praecipitem semper lo-  
 cum Eaed.

z) remisso eo, quod Crev.

U. c. 370. natus consulto Manlius vinculis liberatur. quo facto  
 a. C. 382. non seditio finita, sed dux seditioni datus est. Per  
 eosdem dies Latinis et Hernicis, simul colonis Circe-  
 iensibus et a Velitris, purgantibus se Volsci crimi-  
 ne belli, captivosque repetentibus, ut suis legibus in  
 eos animadverterent, tristia responsa reddita; tris-  
 tiora colonis, quod cives Romani patriae obpugnandae nefanda consilia inissent <sup>a)</sup>). Non negatum itaque tantum de captivis; sed, in quo ab sociis tamen temperaverant, denunciatum senatus verbis, facerent propere ex urbe, ab ore atque oculis populi Romani, ne nihil eos legationis ius, externo non civi comparatum, tegeret.

U. c. 371. XVIII. Recrudescente Manliana seditione, sub  
 a. C. 381. exitu anni comitia habita, creatique tribuni militum consulari potestate ex Patribus Ser. Cornelius Maluginensis tertium, P. Valerius Potitus iterum, M. Furius Camillus <sup>b)</sup>, Ser. Sulpicius Rufus iterum, C. Papirius Crassus, T. Quinctius Cincinnatus secundum. Cuius principio anni et Patribus et plebi peropportune externa pax data: plebi, quod non advocata delectu spem cepit, dum tam potentem haberet ducem, foenoris expugnandi; Patribus, ne quo externo terrore avocarentur animi ab sanandis domesticis malis. Igitur, quum pars utraque acrior aliquanto coorta esset, in <sup>c)</sup> propinquum certamen aderat et Manlius <sup>d)</sup>). advocata domum plebe, cum principibus novandarum rerum interdiu noctuque consilia agit, plenior aliquanto animorum irarumque, quam antea fuerat. Iram accenderat ignominia recens in animo ad contumeliam inexperto: spiritus dabat, quod nec ausus esset idem in se dictator, quod in Sp. Maelio Cincinnatus Quinctius fecisset; et vinculorum suorum invidiam non dictator modo abdicando dictaturam fugisset, sed ne senatus quidem sustinere potuisset Ilis

a) inissent Gron. Crev.

b) add. quintum Eaed.

c) esset; iam in Eaed.

d) aderat: et Manlius Eaed.



simul inflatus exacerbatusque iam per se accensos U. c. 371. incitabat plebis animos; Quousque tandem ignorabitis<sup>a</sup>. C. 381. vires vestras, quas natura ne belluas quidem ignorare voluit? numerate saltem, quot ipsi sitis, quot adversarios habeatis. Si singuli singulos adgressuri essetis, tamen acrius crederem vos pro libertate, quam illos pro dominatione, certaturos. Quot enim clientes circa singulos fuistis patronos, tot nunc adversus unum hostem eritis. Ostendite modo bellum; pacem habebitis. Videant vos paratos ad vim; ius ipsi remittent. Audendum est aliquid universis, aut omnia singulis patienda. Quousque me circumspectabitis? Ego quidem nulli vestrum deero. ne fortuna mea desit, videte. Ipse vindex vester, ubi visum inimicis est, nullus repente fui: et vidistis in vincula duci universi eum, qui a singulis vobis vincula depuleram. Quid sperem, si plus in me audeant inimici? an exitum Cassii Maelii-que exspectem? Bene facitis, quod abominamini: Dii prohibebunt haec: sed numquam propter me de coelo descendent. Vobis dent mentem, oportet, ut prohibeatis: sicut mihi dederunt armato togatoque, ut vos a barbaris hostibus, a superbis defenderem civibus. Tam parvus animus tanti populi est, ut semper vobis auxilium adversus inimicos satis sit? nec ullum, nisi quatenus imperari vobis sinatis, certamen adversus Patres noritis? Nec hoc natura insitum vobis est, sed usu possidemi. Cur enim adversus externos tantum animorum geritis, ut imperare illis aequum censeatis? quia consue- stis cum eis pro imperio certare, adversus hos tentare magis, quam tueri, libertatem. Tamen qualescumque duces habuistis, qualescumque ipsi fuistis, omnia adhuc, quantacumque petistis, obtinuistis seu vi, seu fortuna vestra. tempus est, etiam<sup>e</sup>) maiora conari. Experimini modo et vestram felicitatem, et me (ut spero) feliciter exper- tum: minore negotio, qui imperet Patribus, inponetis

e) iam Gron. Crev.

U. c. 371. *quam, qui resisterent imperantibus, inposuistis. Solo*  
 a. C. 331. *aequandae sunt dictaturae consulatusque, ut caput ad-*  
*tollere Romana plebes possit. Proinde adeste, prohibete*  
*ius de pecuniis dici. ego me patronum profiteor plebis,*  
*quod mihi cura mea et fides nomen induit. Vos si quo*  
*insigni magis imperii honorisve nomine vestrum adpel-*  
*labitis ducem, eo utemini potentiore ad obtinenda ea,*  
*quae vultis. Inde de regno agendi ortum initium di-*  
*citur: sed nec cum quibus, nec quem ad finem con-*  
*silia pervenerint, sat planum traditur.*

XIX. At in parte altera senatus de secessione, in domum privatam, plebis, forte etiam in arce positam, et imminente mole libertati, agitatur. Magna pars vociferantur, *Servilio Ahala opus esse, qui non in vincula duci iubendo irriter publicum hostem, sed unius iactura civis finiat intestinum bellum.* Decurritur ad leniorem verbis sententiam, vim tamen eandem habentem, *Ut videant magistratus, ne quid ex perniciosis consiliis M. Manlii respublica detrimenti capiat.* Tum tribuni consulari potestate, tribunique plebi <sup>f)</sup> (nam et, quia eundem et suae potestatis, quem libertatis omnium, finem cernebant, Patrum auctoritati se dediderant) hi tum omnes, quid opus facto sit, consultant. Quum praeter vim et caedem nihil cuiquam obcurreret, eam autem ingentis dimicationis fore adpareret; tum M. Maenius et Q. Publilius tribuni plebis, *Quid Patrum et plebis certamen facimus, quod civitatis esse adversus unum pestiferum civem debet? Quid cum plebe adgredimur eum, quem per ipsam plebem tutius adgredi est, ut suis ipse oneratus viribus ruat? Diem dicere ei nobis in animo est. nihil minus populare quam regnum est. Simul multitudo illa non secum certari viderint, et ex advocatis iudices facti erunt, et accusatores de plebe, patricium*

f) plebei Crev.

*reum intuebuntur, et regni crimen in medio; nulli magis, quam libertati, favebunt, suae.* U. c. 371.  
a. C. 381.

XX. Adprobantibus cunctis, diem Manlio dicunt, quod ubi est factum, primo commota plebs est, utique postquam sordidatum reum viderunt; nec cum eo non modo Patrum quemquam, sed ne cognatos quidem aut adfines, postremo ne fratres quidem A. et T. Manlios: quod ad eum diem numquam usu venisset, ut in tanto discrimine non et proximi vestem mutarent. Ap. Claudio in vincula ducto. C. Claudium inimicum Claudiamque omnem gentem sordidatam fuisse. consensu obprimi popularem virum, quod prius a Patribus ad plebem defecisset. Quum dies venit, quae, praeter coetus multitudinis seditiosasque voces, et largitionem et fallax indicium, pertinentia proprie ad regni crimen ab accusatoribus obiecta sint reo, apud neminem auctorem invenio. nec dubito haud parva fuisse, quum damnandi mora plebi non in caussa, sed in loco, fuerit. Illud notandum videtur, ut sciant homines, quae et quanta decora foeda cupiditas regni non ingrata solum, sed invisa etiam, reddiderit. Homines prope quadringentos produxisse dicitur, quibus sine foenore expensas pecunias tulisset, quorum bona venire, quos duci addictos prohibuisset. Ad haec, decora quoque belli non commemorasse tantum, sed protulisse etiam conspicienda; spolia hostium caesorum ad triginta: dona imperatorum ad quadraginta: in quibus insignes duas murales coronas, civicas octo. Ad haec servatos ex hostibus cives produxisse; inter quos C. Servilium magistrum equitum absentem nominatum. et quum ea quoque, quae bello gesta essent, pro fastigio rerum oratione etiam magnifica, facta dictis aequando, memorasset, nudasse pectus insigne cicatricibus bello acceptis; et identidem, Capitolium spectans, Iovem Deosque alios devocasse ad auxilium fortunarum suarum: precatusque esse, ut, quam mentem sibi

U. c. 371. Capitulinam arcem protegenti ad salutem populi Ro-  
 mani dedissent, eam populo Romano in suo discrimine darent: et orasse singulos universosque, ut Capitolium atque arcem intuentes, ut ad Deos immortales versi, de se iudicarent. In Campo Martio quum centuriatim populus citaretur, et reus, ad Capitolium manus tendens, ab hominibus ad Deos preces avertisset; adparuit tribunis, nisi oculos quoque hominum liberassent ab tanti memoria decoris, numquam fore in praeoccupatis beneficio animis vero crimini locum. Ita prodicta die, in Poetelinum <sup>g)</sup> lucum extra portam Nomentanam <sup>h)</sup>, unde conspectus in Capitolium non esset, concilium populi indictum est. ibi crimen valuit, et obstinatis animis triste iudicium, invisumque etiam iudicibus, factum. Sunt qui per duumviros, qui de perduellione anquirerent, creatos, auctores sint damnatum. tribuni <sup>i)</sup> de saxo Tarpeio deiecerunt: locusque idem in uno homine et eximiae gloriae monumentum et poenae ultimae fuit. Adiectae mortuo notae sunt: publica una; quod, quum domus eius fuisset, ubi nunc aedes atque officina Monetae est, latum ad populum est, ne quis patricius in arce aut Capitolio habitaret: gentilicia altera; quod gentis Manliae decreto cautum est, ne quis deinde M. Manlius vocaretur. Hunc exitum habuit vir, nisi in libera civitate natus esset, memorabilis. Populum brevi, postquam periculum ab eo nullum erat, per se ipsas recordantem virtutes, desiderium eius tenuit. pestilentia etiam brevi consecuta, nullis obcurrentibus tantae cladis caussis, ex Manliano supplicio magnae parti videri orta: violatum Capitolium esse sanguine servatoris. nec Diis cordi fuisse poenam eius oblatam prope oculis suis, a quo sua templa erepta e manibus hostium essent.

U. c. 372.  
 a. C. 330.

XXI. Pestilentiam inopia frugum, et vulgatam

g) *Poetelinum* Gron. Crev.  
 h) *Flumentanam* Eaed.

i) *sint. damnatum tribuni* Gron.



utriusque mali famam anno insequente multiplex bel-<sup>U. c. 572.</sup>  
lum excepit, L. Valerio quartum, A. Manlio tertium,<sup>a. C. 350.</sup>  
Ser. Sulpicio tertium, L. Lucretio, L. Aemilio ter-  
tium, M. Trebonio, tribunis militum consulari po-  
testate. Hostes novi, praeter Volscos velut sorte  
quadam prope in aeternum exercendo Romano militi  
datos, Circeiosque et Velitras colonias iamdiu mo-  
lientes defectionem, et suspectum Latium, Lanuvini  
etiam, quae fidelissima urbs fuerat, subito exorti.  
Id Patres rati contemptu accidere, quod Veliternis ci-  
vibus suis tamdiu impunita defectio esset, decreve-  
runt, ut primo quoque tempore ad populum ferretur  
de bello eis indicendo. ad quam militiam quo para-  
tior plebes esset, quinqueviros Pompino agro divi-  
dendo, et triumviros Nepete coloniae deducendae  
creaverunt. Tum, ut bellum iuberent, latum ad po-  
pulum est: et, nequidquam dissuadentibus tribunis  
plebis, omnes tribus bellum iusserunt. Adparatum  
eo anno bellum est; exercitus propter pestilentiam  
non eductus. eaque cunctatio colonis spatium dederat  
deprecandi senatum; et magna hominum pars eo, ut  
legatio supplex Romam mitteretur, inclinabat: ni  
privato, ut sit, periculo publicum implicitum esset,  
auctoresque defectionis ab Romanis, metu ne, soli  
crimini subiecti, piacula irae Romanorum dederen-  
tur, avertissent colonias a consiliis pacis. Neque in  
senatu solum per eos legatio inpedita est, sed ma-  
gna pars plebis incitata, ut praedatum in agrum Ro-  
manum exirent. haec nova iniuria exturbavit omnem  
spem pacis. De Praenestinatorum quoque defectione  
eo anno primum fama exorta: arguentibusque eos  
Tusculanis, et Gabinis, et Lavicanis, quorum in  
fines incursatum erat, ita placide ab senatu respon-  
sum est, ut minus credi de criminibus, quia nollent  
ea vera esse, adpareret.

XXII. Insequenti anno Sp. et L. Papirii, novi<sup>U. c. 573.</sup>  
tribuni militum consulari potestate, Velitras legiones<sup>a. C. 579.</sup>

U. c. 373. duxere; quatuor collegis Ser. Cornelio Maluginense  
 a. C. 379. quartum, Q. Servilio, Ser. Sulpicio, L. Aemilio  
 quartum, tribunis ad praesidium urbis, et si qui ex  
 Etruria novi motus nunciarentur, (omnia enim inde  
 suspecta erant) relictis. Ad Velitrās adversus ma-  
 iora pene auxilia Praenestinatorum, quam ipsam colo-  
 norum multitudinem, secundo proelio pugnatum est;  
 ita ut propinquitas urbis hosti et caussa maturioris  
 fugae, et unum ex fuga receptaculum esset. Oppidi  
 obpugnatione tribuni abstinuere; quia et anceps erat,  
 nec in perniciem coloniae pugnandum censebant. Li-  
 terae Romam ad senatum cum victoriae nunciis, acrio-  
 res in Praenestinum, quam Veliternum hostem, mis-  
 sae. Itaque ex senatusconsulto populi iussu bel-  
 lum Praenestinis indictum: qui, coniuncti Volscis,  
 anno insequente Satricum, coloniam populi Romani  
 pertinaciter a colonis defensam, vi expugnarunt, foe-  
 deque in captis exercuere victoriam. Eam rem aegre  
 passi Romani, M. Furium Camillum septimum tri-  
 bunum militum creavere. additi collegae A. et L.  
 Postumii Regillenses, ac L. Furius, cum L. Lucre-  
 tio et M. Fabio Ambusto. Volscum bellum M. Fu-  
 rio extra ordinem decretum. adiutor ex tribunis sor-  
 te L. Furius datur; non tam e republica, quam ut  
 collegae materia ad omnem laudem esset; et publice,  
 quod rem temeritate eius prolapsam restituit; et pri-  
 vatim, quod ex errore gratiam potius eius sibi, quam  
 suam gloriam, petiit. Exactae iam aetatis Camillus  
 erat, comitiisque iurare parato in verba excusandae  
 valetudini solita consensus populi restiterat: sed ve-  
 getum ingenium in vivido pectore vigeat, virebatque  
 integris sensibus, et civiles iam res haud magnopere  
 obeuntem bella excitabant. Quatuor legionibus quater-  
 num millium scriptis, exercitu indicto ad portam Esqui-  
 linam in posterum <sup>k)</sup> diem, ad Satricum profectus.

k) *posteram* G 10.

Ibi eum expugnatores coloniae haudquaquam perculsi, U. c. 374. fidentes militum numero, quo aliquantum praestabant, a. C. 378. opperiebantur. postquam adpropinquare Romanos senserunt, extemplo in aciem procedunt, nihil dilaturi, quin periculum summae rerum facerent: ita paucitati hostium nihil artes imperatoris unici, quibus solis confiderent, profuturas esse.

XXIII. Idem ardor et in Romano exercitu erat, et in altero duce: nec praesentis dimicationis fortunam ulla res, praeterquam unius viri consilium atque imperium, morabatur: qui occasionem iuvandarum ratione virium trahendo bello quaerebat. Eo magis hostis instare; nec iam pro castris tantum suis explicare aciem, sed procedere in medium campi, et vallo prope hostium signa inferendo, superbam fiduciam virium ostentare. Id aegre patiebatur Romanus miles; multo aegrius alter ex tribunis militum L. Furius, ferox quum aetate et ingenio, tum multitudinis, ex incertissimo sumentis animos, spe inflatus. Hic per se iam milites incitatos insuper instigabat elevando, qua una poterat, aetate auctoritatem collegae: *Iuvenibus bella data, dictitans, et cum corporibus vigere et deflorescere animos; cunctatorem ex acerrimo bellatore factum; et, qui adveniens castra urbesque primo inpetu rapere sit solitus, eum residem intra vallum tempus terere: quid accessurum suis, decessurumve hostium viribus sperantem? quam occasionem, quod tempus, quem insidiis instruendis locum? frigere ac torpere senis consilia. Sed Camillo quum*<sup>1)</sup> *vitae satis, tum gloriae esse. quid adtinere, cum mortali corpore uno, civitatis, quam inmortalem esse deceat, pati consenescere vires?* His sermonibus tota in se averterat castra. et, quum omnibus locis posceretur pugna, *Sustinere, inquit, M. Furi, non possumus inpetum militum*<sup>m)</sup>*: et hostis, cuius animos cunctando*

1) tum Gron. Crev.

m) militum inpetum Eaed.

U. c. 374. *auximus, iam minime toleranda superbia insultat. Ce*  
 a. C. 337. *de unus omnibus, et patere te vinci consilio, ut matu*  
*rius bello vincas. Ad ea Camillus: Quae bella su*  
*unius auspicio gesta ad eam diem essent, negare in ei*  
*neque se, neque populum Romanum, aut consilii sui*  
*aut fortunae poenituisse. nunc scire, se collegam habe*  
*re iure imperioque parem, vigores aetatis praestantem.*  
*Itaque se, quod ad exercitum adtineat, regere consues*  
*se, non regi. collegae imperium se non posse impedire.*  
*Diis bene iuvantibus ageret, quod e republica duceret.*  
*Aetati suae se veniam etiam petere, ne in prima acie*  
*esset. quae senis munia in bello sint, iis se non defutu*  
*rum. Id a Diis immortalibus precari, ne qui casus*  
*suum consilium laudabile efficiat. Nec ab hominibus*  
*salutaris sententia, nec a <sup>n)</sup> Diis tam piaae preces*  
*auditae sunt. primam aciem auctor pugnae instruit,*  
*subsidia Camillus firmat, validamque stationem pro*  
*castris obponit. ipse edito loco spectator intentus in*  
*eventu alieni consilii constitit.*

XXIV. Simul primo concursu concrepuere arma, hostis dolo, non metu, pedem retulit. lenis ab tergo clivus erat inter aciem et castra: et quod multitudo subpeditabat, aliquot validas cohortes in castris armatas instructasque reliquerant, quae inter commissum iam certamen, ubi vallo adpropinquasset hostis, erumperent. Romanus, cedentem hostem effuse sequendo in locum iniquum pertractus, opportunus huic eruptioni fuit. versus itaque in victorem terror, et novo hoste, et supina valle Romanam inclinavit aciem. Instant Volsci recentes, qui e castris inpetum fecerant; integrant et illi pugnam, qui simulata cesserant fuga. Iam non recipiebat se Romanus miles; sed, inmemor recentis ferociae veterisque decoris, terga passim dabat, atque effuso cursu castra repetebat: quum Camillus, subiectus a circumstan-

n) ab Gron. Crev.



tibus in equum, et raptim subsidiis obpositis, *Haec* U. c. 374.  
*est, inquit, milites, pugna, quam poposcistis? Quis* a. C. 337.  
*homo, quis Deus est, quem accusare possitis? vestra illa*  
*temeritas, vestra ignavia haec est. Secuti alium ducem,*  
*sequimini nunc Camillum; et, quod ductu meo soletis,*  
*vincite. Quid vallum et castra spectatis? neminem ve-*  
*strum illa, nisi victorem, receptura sunt. Pudor primo*  
*tenuit effusos: inde, ut circumagi signa, obvertique*  
*aciem viderunt in hostem, et dux, praeterquam quod*  
*tot insignis triumphis, etiam aetate venerabilis, inter*  
*prima signa (ubi plurimus labor periculumque erat)*  
*se obferebat, increpare singuli se quisque et alios, et*  
*adhortatio in vicem totam alacri clamore pervasit aci-*  
*em. Neque alter tribunus rei defuit: sed, missus*  
*a collega restituente peditum aciem ad equites, non*  
*castigando, (ad quam rem leviolem auctorem eum cul-*  
*pae societas fecerat) sed, ab imperio totus ad preces*  
*versus orare singulos universosque, ut se, reum for-*  
*tunae eius diei, crimine eximerent. Abnuente ac pro-*  
*hibente collega, temeritatis me omnium potius socium,*  
*quam unius prudentiae, dedi. Camillus in utraque ve-*  
*stra fortuna suam gloriam videt: ego, ni restituitur*  
*pugna, (quod miserrimum est) fortunam cum omnibus,*  
*infamiam solus sentiam. Optimum visum est, in flu-*  
*ctuantem aciem tradi equos, et pedestri pugna inva-*  
*dere hostem. Eunt insignes armis animisque, qua*  
*premi parte maxime peditum copias vident. nihil,*  
*neque apud duces, neque apud milites, remittitur a sum-*  
*mo certamine, animi. Sensit ergo eventus virtutis eni-*  
*sae opem: et Volsci, qua modo simulato metu cesserant,*  
*ea in veram fugam effusi, magna pars et in ipso certami-*  
*ne, et post in fuga caesi: ceteri in castris, quae capta eo-*  
*dem inpetu sunt, plures tamen capti, quam occisi.*

XXV. Ubi in recensendis captivis quum Tuscu-  
 lani aliquot noscitantur, secreti ab aliis ad tribunos  
 adducuntur, percunctantibusque fassi, publico consi-  
 lio se militasse. cuius tam vicini belli metu Camil-

U. c. 374. *lus motus, exemplo se Romam captivos ducturum, ait,*  
 a. C. 373. *ne Patres ignari sint, Tusculanos ab societate descisse.*  
*castris exercituique interim, si videatur, praesit collega.*  
 Documento unus dies fuerat, ne sua consilia melioribus praeferret. nec tamen aut ipsi, aut in exercitu cuiquam satis placato animo Camillus laturus culpam eius videbatur, qua data in tam praecipitem casum respublica esset; et quum <sup>o)</sup> in exercitu, tum Romae constans omnium fama erat, quum varia fortuna in Volscis gesta res esset, adversae pugnae fugaeque in L. Furio culpam, secundae decus omne penes M. Furium esse. Introductis in senatum captivis, quum bello persequendos Tusculanos Patres censuissent, Camilloque id bellum mandassent; adiutorem sibi ad eam rem unum petit: permissoque, ut ex collegis optaret, quem vellet, contra spem omnium L. Furium optavit. qua moderatione animi quum collegae levavit infamiam, tum sibi gloriam ingentem peperit. Nec fuit cum Tusculanis bellum: pace constanti vim Romanam arcuerunt, quam armis non poterant. Intransantibus fines Romanis non demigratum ex propinquis itineris <sup>p)</sup> locis, non cultus agrorum intermissus: patentibus portis urbis, togati obviam frequentes imperatoribus processere: comneatus exercitui comiter in castra ex urbe et ex agris devehitnr. Camillus, castris ante portas positis, eademne forma pacis, quae in agris ostentaretur, etiam intra moenia esset, scire cupiens; ingressus urbem, ubi patentibus ianuas, et tabernis apertis proposita omnia in medio vidit, intentosque opifices suo quemque operi, et ludos literarum strepere discentium vocibus, ac repletas semitas, inter vulgus aliud, puerorum et mulierum huc atque illuc euntium, qua quemque suorum usum caussae ferrent: nihil usquam, non pavidis modo, sed ne mirantibus quidem simile; circumspiciebat omnia, inquirens oculis, ubinam bellum fuisset. adeo

o) *tum* Gron. Crev.p) *itineri* Eaed.

nec amotae rei usquam, nec oblatae ad tempus vesti—U. c. 578.  
gium ullum erat: sed ita omnia constanti <sup>q)</sup> tranquilla <sup>a. u. 574.</sup>  
pace, ut eo vix fama belli perlata videri posset.

XXVI. Victus igitur patientia hostium, senatum eorum vocari iussit. *Soli adhuc*, inquit, *Tusculani, vera arma verasque vires, quibus ab ira Romanorum vestra tutaremini, invenistis. ite Romam ad senatum. aestimabunt Patres, utrum plus ante poenae, an nunc veniae meriti sitis. non praecipiam gratiam publici beneficii. deprecandi potestatem a me habueritis; precibus eventum vestris senatus, quem videbitur, dabit.* Postquam Romam Tusculani venerunt, senatusque paullo ante fidelium sociorum moestus in vestibulo curiae est conspectus, moti ex templo Patres, vocari eos iam tum hospitaliter, magis, quam hostiliter, iussere. Dictator Tusculanus ita verba fecit: *Quibus bellum indixistis, intulistisque, Patres conscripti, sicut nunc videtis nos stantes in vestibulo curiae vestrae, ita armati paratique obviam imperatoribus legionibusque vestris processimus. Hic noster, hic plebis nostrae habitus fuit, eritque semper, nisi si quando a vobis, proque vobis, arma acceperimus. Gratias agimus et ducibus vestris et exercitibus, quod oculis magis, quam auribus, crediderunt; et, ubi nihil hostile erat, ne ipsi quidem fecerunt. Pacem, quam nos praestitimus, eam a vobis petimus: bellum eo, si cubi est, avertatis, precamur. In nos quid arma polleant vestra, si patiundo experiundum est, inermes experiemur. Haec mens nostra est; Dii immortales faciant <sup>r)</sup>, tam felix, quam pia. Quod ad crimina adtinet, quibus moti bellum indixistis; etsi revicta rebus verbis confutare nihil adtinet; tamen, etiamsi verasint, vel fateri nobis ea, quum tam evidenter poenituerit, tutum censemus. Peccetur in vos, dum digni sitis, quibus ita satisfiat. Tantum fere verborum ab Tuscula-*

q) constante Gron. Crev.

r) faciant Gron.

U. c. 374. nis factum. Pacem in praesentia, nec ita multo post civita-  
 a. C. 378. tem etiam, inpetraverunt. ab Tusculo legiones reductae.

XXVII. Camillus consilio et virtute in Volscis bello, felicitate in Tusculana expeditione, utrobique singulari adversus collegam patientia et moderatione insignis, magistratu abiit; creatis tribunis militaribus in insequentem annum, L. et P. Valerius, Lucio quintum, Publio tertium, et C. Sergio tertium, L. Menenio secundum, Sp. Papirio, Ser. Cornelio Maluginense. Censoribus quoque eguit annus, maxime propter incertam famam aeris alieni; adgravantibus summam etiam invidiae eius tribunis plebis, quum ab iis elevaretur, quibus fide magis, quam fortuna, debentium laborare creditum videri expediebat. Creati censores C. Sulpicius Camerinus, Sp. Postumius Regillensis. coeptaque iam res morte Postumii, quia collegam subfici censori religio erat, interpellata est. Igitur quum Sulpicius abdicasset se magistratum, censores alii, vitio creati, non gesserunt magistratum. tertios creari (velut Diis non accipientibus in eum annum censuram) religiosum fuit. Eam vero ludificationem plebis tribuni ferendam negabant. *Fugere senatum testes, tabulas publicas, census cuiusque, quia nolint conspici summam aeris alieni, quae indicatura sit, demersam partem a parte civitatis: quum interim obaeratam plebem obiectari aliis atque aliis hostibus. Passim iam sine ullo discrimine bella quaeri. ab Antio Satricum, ab Satrico Velitras, inde Tusculum legiones ductas. Latinis, Hernicis, Praenestinis iam intentari arma; civium magis quam hostium odio; ut in armis terant plebem, nec respirare in urbe, aut per otium libertatis meminisse sinant, aut consistere in concione, ubi aliquando audiant vocem tribuniciam, de levando foenore et sine aliarum iniuriarum agentem. Quod si sit animus plebi memor patrum libertatis, se nec adduci quemquam civem Romanum ob creditam pecuniam passuros, neque delectum haberi; donec, inspecto aere*



*alieno, initaque ratione minuendi eius, sciat unusquis-* U. c. 375.  
*que, quid sui, quid alieni sit: supersit sibi liberum cor-* a. C. 377.  
*pus, an id quoque nervo debeat.* Merces seditionis  
 proposita confestim seditionem excitavit. nam et ad-  
 dicebantur multi, et ad Praenestini famam belli no-  
 vas legiones scribendas Patres censuerant. quae utra-  
 que simul auxilio tribunicio et consensu plebis inpe-  
 diri coepta. Nam neque duci addictos tribuni sine-  
 bant, neque iuniores nomina dabant. Quum Patri-  
 bus minor praesens cura creditae pecuniae iuris ex-  
 sequendi, quam delectus, esset; quippe iam a Prae-  
 neste profectos hostes s) in agro Gabino t) consedis-  
 se nunciabatur; interim tribunos plebis fama ea ipsa ir-  
 ritaverat magis ad susceptum certamen, quam deter-  
 ruerat. neque aliud ad seditionem exstinguendam  
 in urbe, quam prope inlatum moenibus ipsis bellum,  
 valuit.

XXVIII. Nam quum esset Praenestinis nuncia-  
 tum, nullum exercitum conscriptum Romae, nullum  
 ducem certum esse, Patres ac plebem in semet ipsos  
 versos: occasionem rati duces eorum, raptim agmine  
 acto, pervastatis protinus agris, ad portam Collinam  
 signa intulere. Ingens in urbe trepidatio fuit. con-  
 clamatum *ad arma*, concursumque in muros atque  
 portas est: tandemque, ab seditione ad bellum versi,  
 dictatorem T. Quinctium Cincinnatum creavere. Is  
 magistrum equitum A. Sempronium Atratinum dixit.  
 Quod ubi auditum est, (tantus eius magistratus ter-  
 ror erat) simul hostes a moenibus recessere, et iuni-  
 ores Romani ad edictum sine retractatione u) conve-  
 nere. Dum conscribitur Romae exercitus, castra in-  
 terim hostium haud procul Allia flumine posita: in-  
 de agrum late populates, *fatalem se urbi Romanae*  
*locum cepisse*, inter se iactabant: *similem pavorem*  
*inde ac fugam fore, ac bello Gallico fuerit.* Etenim,

s) profectus hostis Crev.

t) Sabino Gron. Crev.

u) detractatione Eaed.

U. c. 375. *si diem, contactum religione, insignemque nomine eius*  
 a. C. 577. *loci, timeant Romani, quanto magis Allienti die Alliam ipsam, monumentum tantae cladis reformidaturos? Species profecto his ibi truces Gallorum sonumque vocis in oculis atque in auribus fore. Ilas inanium rerum inanes ipsas volventes cogitationes, fortunae loci delegaverant spes suas. Romani contra, Ubicumque esset Latinus hostis, satis scire, eum esse, quem, ad Regillum lacum devictum, centum annorum pace obnoxia tenuerint. Locum, insignem memoria cladis, irritaturum se potius ad delendam memoriam dedecoris, quam ut timorem faciat, ne qua terra sit nefasta victoriae suae. Quin ipsi sibi<sup>x)</sup> Galli si obferantur illo loco, se ita pugnatos, ut Romae pugnaverint in repetenda patria, ut postero die ad Gabios; tunc, quum effecerint, ne quis hostis, qui moenia Romana intrasset, nuncium secundae adversaeque fortunae domum perferret.*

XXIX. His utrimque animis ad Alliam ventum est. Dictator Romanus, postquam in conspectu hostes erant instructi intentique, *Videsne tu, inquit, A. Semproni, loci fortuna illos fretos ad Alliam constitisse? nec illis Dii immortales certioris quidquam fiduciae, maiorisve quod sit auxilii, dederint. At tu, fretus armis animisque, concitatis equis invade mediam aciem: ego cum legionibus in turbatos trepidantesque inferam signa. Adeste, Dii testes foederis, et expetite poenas, debitas simul vobis violatis, nobisque per vestrum numen deceptis. Non equitem, non peditem sustinere Praenestini. primo inpetu ac clamore dissipati ordines sunt. Dein, postquam nullo loco constabat acies, terga vertunt; consternatique, et praeter castra etiam sua pavore praelati, non prius se ab effuso cursu sistunt, quam in conspectu Praeneste fuit. Ibi ex fuga dissipati, locum, quem tumultuario opere communirent, capiunt: ne, si intra moenia se recepissent, extemplo ureretur ager, depopulatisque omnibus obsidio*

x) *sibi* del. Gron.

urbi inferretur. Sed, postquam, direptis ad Alliam ca-<sup>U. c. 375.</sup>  
stris, victor Romanus aderat, id quoque munimentum<sup>a. C. 377.</sup>  
relictum: et, vix moenia tuta rati, oppido se Prae-  
neste includunt. Octo praeterea oppida erant sub-  
ditione Praenestinarum. ad ea circumlatum bellum:  
deincepsque, haud magno certamine captis, Velitras  
exercitus ductus. Eae quoque expugnatae. tum ad  
caput belli Praeneste ventum. Id non vi, sed per de-  
ditionem, receptum est. T. Quinctius, semel acie vi-  
ctor, binis castris hostium, novem oppidis vi captis,  
Praeneste in deditionem accepto, Romam revertit:  
triumphansque signum, Praeneste devectum, Iovis  
Imperatoris in Capitolium tulit. Dedicatum est in-  
ter cellam Iovis ac Minervae; tabulaque sub eo fixa,  
monumentum rerum gestarum, his ferme incisa lite-  
ris fuit: *Iupiter atque Divi omnes hoc dederunt, ut T.*  
*Quinctius dictator oppida novem caperet.* Die vicesi-  
mo<sup>y</sup>), quam creatus erat, dictatura se abdicavit.

XXX. Comitia inde habita tribunorum militum<sup>U. a. 376</sup>  
consulari potestate; quibus aequatus patriciorum ple-<sup>a. C. 376.</sup>  
beiorumque numerus. Ex Patribus creati P. et C.  
Manlii, cum L. Iulio: plebes C. Sextilium, M. Albi-  
nium, L. Antistium dedit. Manliis, quod genere  
plebeios, gratia Iulium anteibant, Volsci provincia,  
sine sorte, sine comparatione, extra ordinem data:  
cuius et ipsos postmodo et Patres, qui dederant, poe-  
nituit. Inexplorato pabulatum cohortes misere. qui-  
bus velut circumventis, quum id falso nunciatum es-  
set, dum, praesidio ut essent, citati feruntur, ne  
auctore quidem adservato, qui eos, hostis Latinus  
pro milite Romano, frustratus erat, ipsi in insidias  
praecipitavere. Ibi dum iniquo loco sola virtute mi-  
litum restantes caeduntur, caeduntque, castra inte-  
rim Romana, iacentia in campo, ab altera parte ho-  
stes invasere. Ab ducibus utrobique proditae teme-

U. c. 376. ritate atque inscitia res. quidquid superfuit fortunæ  
 a. C. 376. populi Romani, id militum etiam sine rectore stabilis  
 virtus tutata est. Quae ubi Roman sunt relata, pri-  
 mum dictatorem dici placebat: deinde, postquam  
 quietae res ex Volscis adferebantur, et adparuit, ne-  
 scire eos victoria et tempore uti, revocati etiam inde  
 exercitus ac duces: otiumque inde, quantum a Vol-  
 scis, fuit. id modo extremo anno tumultuatum, quod  
 Praenestini concitatis Latinorum populis rebellarunt.  
 Eodem anno Setiam, ipsis querebantibus penuriam ho-  
 minum, novi coloni adscripti. Rebusque haud pro-  
 speris bello, domestica quies, quam tribunorum mi-  
 litum ex plebe gratia maiestasque inter suos obtinuit,  
 solatium fuit.

U. c. 377. XXXI. Insequentis anni principia statim sedi-  
 a. C. 375. tione ingenti arsere, tribunis militum consulari po-  
 testate Sp. Furio, Q. Servilio secundum, C. Licinio,  
 P. Cloelio, M. Horatio, L. Geganio. Erat autem et  
 materia et caussa seditionis aes alienum: cuius no-  
 scendi gratia Sp. Servilius Priscus, Q. Cloelius Si-  
 culus censores facti, ne rem agerent, bello inpediti  
 sunt. namque trepidi nuncii primo, fuga deinde ex  
 agris legiones Volscorum ingressas fines, popularique  
 passim Romanum agrum, adtulere. In qua trepida-  
 tione tantum afuit, ut civilia certamina terror exter-  
 nus cohiberet, ut contra eo violentior potestas tri-  
 bunicia inpediendo delectui esset: donec conditiones  
 inpositae Patribus, ne quis, quoad bellatum esset,  
 tributum daret, aut ius de pecunia credita diceret.  
 Eo laxamento plebi sumto, mora delectui non est fa-  
 cta. Legionibus novis scriptis, placuit, duos exer-  
 citus in agrum Volscum legionibus divisus duci. Sp.  
 Furius, M. Horatius dextrorsus maritimam oram at-  
 que Antium, Q. Servilius et L. Geganius laeva ad  
 montes Ecetram pergunt. Neutra parte hostis obvis  
 fuit. Populatio itaque non illi vagae similis, quam  
 Volscus latrocinii more, discordia hostium fretus, et



virtutem metuens, per trepidationem raptim fecerat; U. c. 377. sed ab iusto exercitu iusta ira facta, spatio quoque<sup>a. C. 375.</sup> temporis gravior. Quippe a Volscis, timentibus, ne interim exercitus ab Roma exiret, incursiones in extrema finium factae erant: Romano contra etiam in hostico morandi caussa erat<sup>z)</sup>, ut hostem ad certamen eliceret. Itaque, omnibus passim tectis agrorum, vicisque etiam quibusdam exustis, non arbore frugifera, non satis in spem frugum relictis, omni, quae extra moenia fuit, hominum pecudumque praeda abacta, Romam utrimque exercitus reducti.

XXXII. Parvo intervallo ad respirandum debitoribus dato, postquam quietae res ab hostibus erant, celebrari de integro iurisdictio; et tantum abesse spes veteris levandi foenoris, ut tributo novum foenus contraheretur in murum, a censoribus locatum saxo quadrato faciundum. cui succumbere oneri coacta plebes; quia, quem delectum inpedirent, non habebant tribuni plebis. Tribunos etiam militares patricios omnes, coacta principum opibus, fecit, L. Aemilium, P. Valerium quartum, C. Veturium, Ser. U. c. 378. Sulpicium, L. et C. Quinctios Cincinnatos. Iisdem<sup>a. C. 374.</sup> opibus obtinere, ut adversus Latinos Volscosque, qui coniunctis legionibus ad Satricum castra habebant, nullo inpediente omnibus iunioribus sacramento adactis, tres exercitus scriberent: unum ad praesidium urbis; alterum, qui, si qui alibi motus exstisset, ad subita belli mitti posset; tertium longe validissimum P. Valerius et L. Aemilius ad Satricum duxere: ubi quum aciem instructam hostium loco aequo invenissent, extemplo pugnatum: et, ut nondum satis claram victoriam, sic prosperae spei pugnam imber ingentibus procellis fusus diremit. Postero die iterata pugna: et aliquamdiu aequa virtute fortunaque Latinae maxime legiones, longa societate militiam Ro-

<sup>z)</sup> erat caussa Gron. Crev.

U. c. 378. manam edoctae, restabant. eques inmissus ordinēs  
 a. C. 374. turbavit; turbatis signa peditum inlata: quantumque  
 Romana se invexit acies, tantum hostes gradu demoti. et ut semel inclinavit pugna, iam intolerabilis Romana vis erat. Fusi hostes quum Satricum, quod duo millia inde aberat, non castra, peterent, ab equitatu maxime caesi. castra capta direptaque. Ab Satrico nocte, quae proelio proxima fuit, fugae simili agmine petunt Antium: et quum Romanus exercitus prope vestigiis sequeretur, plus tamen timor, quam ira, celeritatis habuit. Prius itaque moenia intravere hostes, quam Romanus extrema agminis carpere aut morari posset. inde aliquot dies vastando agro absumti, nec Romanis satis instructis adparatu bellico ad moenia adgredienda, nec illis ad subeundum pugnae casum.

XXXIII. Seditio tum inter Antiates Latinosque coorta; quum Antiates, victi malis subactique bello, in quo et nati erant, et consenuerant, deditio-nem spectarent; Latinos ex diutina pace nova defectio recentibus adhuc animis ferociore ad perseverandum in bello faceret. finis certaminis fuit, postquam utrisque adparuit, nihil per alteros stare, quo minus incepta persequerentur. Latini profecti a societate pacis, ut rebantur. inhonestae sese vindicarunt. Antiates, incommotis arbitris salutarium consiliorum remotis, urbem agrosque Romanis dedunt. Ira et rabies Latinorum, quia nec Romanos bello laedere, nec Volscos in armis retinere potuerant, eo erupit, ut Satricum urbem, quae receptaculum primum eis adversae pugnae fuerat, igni concremarent: nec aliud tectum eius superfuit urbis, (quum faces pariter sacris profanisque iniicerent) quam matris Matutae templum. Inde eos nec sua religio, nec verecundia Deum arcuisse dicitur, sed vox horrenda, edita templo cum tristibus minis, ni nefandos ignes procul delubris amovissent. Incensos

ea rabie inpetus Tusculum tulit, ob iram, quod, de-<sup>U. c. 373.</sup>  
 serto communi concilio Latinorum, non in societa-<sup>a. C. 374.</sup>  
 tem modo Romanam, sed etiam in civitatem, se de-  
 dissent. Patentibus portis quum improvise incidis-  
 sent, primo clamore oppidum praeter arcem captum  
 est. in arcem oppidani refugere cum coniugibus ac li-  
 beris, nunciosque Romam, qui certiores de suo ca-  
 su senatum facerent, misere. Haud segnius, quam  
 fide populi Romani dignum fuit, exercitus Tusculum  
 ductus. L. Quinctius et Ser. Sulpicius tribuni mili-  
 tum duxere. clausas portas Tusculi, Latinosque si-  
 mul obsidentium atque obsessorum animo hinc moe-  
 nia Tusculi <sup>a)</sup> tueri vident, illinc arcem obpugnare;  
 terrere una ac pavere. Adventus Romanorum mu-  
 taverat utriusque partis animos. Tusculanos ex in-  
 genti metu in summam alacritatem, Latinos ex pro-  
 pe certa fiducia mox capiendae arcis, quoniam oppi-  
 do potirentur, in exiguam de se ipsis spem verterat.  
 Tollitur ex arce clamor ab Tusculanis: excipitur ali-  
 quanto maiore ab exercitu Romano. Utrumque ur-  
 gentur Latini: nec inpetus Tusculanorum, decurren-  
 tium ex superiore loco, sustinent: nec Romanos,  
 subeuntes moenia molientesque obices portarum, ar-  
 cere possunt. Scalas prius moenia capta; inde effra-  
 cta claustra portarum. et quum anceps hostis et a  
 fronte et a tergo urgeret; nec ad pugnam ulla vis, nec  
 ad fugam loci quidquam superesset; in medio caesi  
 ad unum omnes. Recuperato ab hostibus Tusculo,  
 exercitus Romam est reductus.

XXXIV. Quanto magis prosperis eo anno bel-  
 lis tranquilla omnia foris erant, tanto in urbe vis  
 Patrum in dies miseriaeque plebis crescebant; quum  
 eo ipso, quod necesse erat solvi, facultas solvendi  
 inpediretur. Itaque, quum iam ex re nihil dari pos-  
 set, fama et corpore, iudicati atque addicti, credi-

a) *Tusculi* del. Gron.

U. c. 373. toribus satisfaciebant, poenaeque in vicem fidei cesse-  
 a. C. 374. rat. Adeo ergo obnoxios submiserant animos non infimi solum, sed principes etiam plebis, ut non modo ad tribunatum militum inter patricos petendum, quod tanta vi, ut liceret, tetenderant; sed ne ad plebeios quidem magistratus capessendos petendosque ulli viro acri experientique animus esset: possessio- nemque honoris, usurpati modo a plebe per paucos annos, recuperasse in perpetuum Patres viderentur. Ne id nimis laetum parti alteri esset, parva (ut ple- rumque solet) rem ingentem moliundi causa inter- venit. M. Fabii Ambusti, potentis viri, quum inter sui corporis homines, tum etiam ad plebem, quod haudquaquam inter id genus contemtor eius habeba- tur, filiae duae nuptae, Ser. Sulpicio maior, minor C. Licinio Stoloni erat, inlustri quidem, viro tamen plebeio: eaque ipsa adfinitas haud spreta gratiam Fa- bio ad vulgum quaesierat. Forte ita incidit, ut, in Ser. Sulpicii tribuni militum domo sorores Fabiae quum inter se, ut sit, sermonibus tempus tererent, lictor Sulpicii, quum is de foro se domum reciperet, forem (ut mos est) virga percuteret. quum ad id, mo- ris eius insueta, expavisset minor Fabia, risui soro- ri fuit, miranti ignorare id sororem. Ceterum is ri- sus stimulos parvis mobili rebus animo muliebri sub- didit: frequentia quoque prosequentium rogantium- que, *numquid vellet?* credo fortunatum matrimonium ei sororis visum; suique ipsam malo arbitrio, quo a proximis quisque minime anteiri vult, poenituisse. Confusam eam ex recenti morsu animi quum pater forte vidisset, percunctatus, *satin' salvae?* averten- tem causam doloris (quippe nec satis piam adversus sororem, nec admodum in virum honorificam) eli- cuit comiter sciscitando, ut fateretur, eam esse caus- sam doloris, quod iuncta inpari esset, nupta in do- mo, quam nec honos nec gratia intrare posset. Con- solans inde filiam Ambustus bonum animum habere



iussit: eosdem prope diem domi visuram honores, U. c. 378.  
 quos apud sororem videat. Inde consilia inire cum<sup>a. C. 374.</sup>  
 genero coepit, adhibito L. Sextio, strenuo adoles-  
 cente, et cuius spei nihil praeter genus patricium  
 deesset.

XXXV. Occasio videbatur rerum novandarum U. c. 379.  
 propter ingentem vim aeris alieni; cuius levamen<sup>a. C. 373.</sup>  
 mali plebes, nisi suis in summo imperio locatis, nul-  
 lum speraret. Adcingendum ad eam cogitationem  
 esse. conando agendoque iam eo gradum fecisse ple-  
 beios, unde, si porro adnitantur, pervenire ad sum-  
 ma<sup>b)</sup>, et Patribus aequari, tam honore, quam vir-  
 tute, possent. In praesentia tribunos plebis fieri  
 placuit, quo in magistratu sibimet ipsi viam ad ce-  
 teros honores aperirent. creatique tribuni C. Licinius  
 et L. Sextius promulgavere leges omnes adversus  
 opes patriciorum, et pro commodis plebis: unam de  
 aere alieno, ut, deducto eo de capite, quod usuris  
 pernumeratum esset, id, quod superesset, triennio  
 aequis portionibus persolveretur: alteram de modo  
 agrorum, ne quis plus quingenta iugera agri possi-  
 deret: tertiam, ne tribunorum militum comitia fie-  
 rent, consulumque utique alter ex plebe crearetur.  
 cuncta ingentia, et quae sine certamine maximo ob-  
 tineri non possent. Omnium igitur simul rerum,  
 quarum inmodica cupido inter mortales est, agri, pe-  
 cuniae, honorum, discrimine proposito, conterriti  
 Patres, quum trepidassent, publicis privatisque con-  
 siliis nullo remedio alio, praeter expertam multis iam  
 ante certaminibus intercessionem, invento, collegas  
 adversus tribunicias rogationes comparaverunt. qui,  
 ubi tribus ad suffragium ineundum citari a Licinio,  
 Sextioque viderunt, stipati Patrum praesidiis, nec re-  
 citari rogationes, nec sollemne quidquam aliud ad  
 sciscendum plebi fieri passi sunt. Iamque frustra

b) *summam* Gron.

U. c. 379. saepe concilio advocato, quum pro antiquatis roga-  
 a. C. 373. tiones essent; *Bene habet*, inquit Sextius. *quando-*  
*quidem tantum intercessionem pollere placet, isto ipso*  
*telo tutabimur plebem. Agitedum, comitia indicite,*  
*Patres, tribunis militum creandis. faxo, ne iuvet vox*  
*ista, VETO, qua nunc concinentes collegas nostros*  
*tam laeti auditis.* Haud irritae cecidere minae: com-  
 itia, praeter aedilium tribunorumque plebis, nulla  
 sunt habita. Licinius Sextiusque, tribuni plebis re-  
 fecti, nullos curules magistratus creari passi sunt.  
 eaque solitudo magistratuum, et plebe reficiente duos  
 tribunos, et his comitia tribunorum militum tollen-  
 tibus, per quinquennium urbem tenuit.

XXXVI. Alia bella opportune quievere: Veli-  
 terni coloni, gestientes otio, quod nullus exercitus  
 Romanus esset, et agrum Romanum aliquoties incur-  
 savenere, et Tusculum obpugnare adorti sunt. eaque  
 res, Tusculanis veteribus sociis, novis civibus, opem  
 orantibus, verecundia maxime non Patres modo,  
 sed etiam plebem, movit. Remittentibus tribunis  
 plebis, comitia per interregem sunt habita; creatique  
 U. c. 385. tribuni militum L. Furius, A. Manlius, Ser. Sulpi-  
 a. C. 387. cius, Ser. Cornelius, P. et C. Valerii, haudquaquam  
 tam obedientem in delectu, quam in comitiis, ple-  
 bem habuere: ingentique contentione exercitu scripto  
 profecti, non ab Tusculo modo subinovere hostem,  
 sed intra suamet ipsum moenia compulere, obside-  
 banturque haud paullo vi maiore Velitrae quam Tus-  
 culum obsessum fuerat: nec tamen ab eis, a quibus  
 obsideri coeptae erant, expugnari potuere. Anteno-  
 U. c. 386. vi creati sunt tribuni militum: Q. Servilius, C. Ve-  
 a. C. 386. turius <sup>c)</sup>, A. et M. Cornelii, Q. Quinctius, M. Fa-  
 bius. nihil ne ab his quidem tribunis ad Velitras me-  
 morabile factum. In maiore discrimine domi res ver-  
 tebantur: nam praeter Sextium Liciniumque latores

c) add. iterum Gron. Grev.

legum, iam octavum tribunos plebis relectos, Fabius<sup>U. c. 386.</sup> quoque tribunus militum, Stolonis socer, quarum le-<sup>a. C. 366.</sup> gum auctor fuerat, earum suasorem se haud dubium ferebat. et, quum octo ex collegio tribunorum plebis primo intercessores legum fuissent, quinque soli erant: et (ut ferme solent, qui a suis desciscunt) capti, et stupentes animi, vocibus alienis id modo, quod domi praeceptum erat, intercessioni suae praetendebant: *Velitris in exercitu plebis magnam partem abesse: in adventum militum comitia differri debere, ut universa plebes de suis commodis suffragium ferret.* Sextius Liciniusque, cum parte collegarum, et uno ex tribunis militum Fabio, artifices iam tot annorum usu tractandi animos plebis, primores Patrum productos interrogando de singulis, quae ferebantur ad populum, fatigabant: *Auderentne postulare, ut, quum bina iugera agri plebi dividerentur, ipsis plus quingenta iugera habere liceret? Ut singuli prope trecentorum civium possiderent agros, plebeio homini vix ad tectum necessarium, aut locum sepulturae, suus pateret ager? An placeret, foenore circumventam plebem potius<sup>d)</sup>, quam sorte<sup>e)</sup> creditum solvat, corpus in nervum ac supplicia dare: et gregatim quotidie de foro addictos duci, et repleri vinctis nobiles domos? et, ubicumque patrius habitet, ibi carcerem privatum esse?*

XXXVII. Haec indigna miserandaque auditu quum apud timentes sibimet ipsos, maiore audientium indignatione, quam sua, increpuissent: atqui nec agros occupandi modum, nec foenore trucidandi plebem alium Patribus umquam fore, adfirmabant, nisi alterum ex plebe consulem, custodem suae libertatis, plebes<sup>f)</sup> fecisset. Contemni iam tribunos plebis<sup>g)</sup>, quippe quae potestas iam suam ipsa vim frangat intercedendo. Non posse aequo iure agi, ubi imperium pe-

d) ni potius Gron. Crev.

e) sortem Eaed.

f) plebs Eaed.

g) plebi Gron. plebei Crev.

U. c. 386. *nes illos, penes se auxilium tantum sit. nisi imperio*  
 a. C. 366. *communicato, numquam plebem in parte pari reipubli-*  
*cae fore: nec esse, quod quisquam satis putet, si ple-*  
*beiorum ratio comitiis consularibus habeatur: nisi al-*  
*terum consulem utique ex plebe fieri necesse sit, nemi-*  
*nem fore. An iam memoria exisse, quum tribunos mi-*  
*litum idcirco potius, quam consules, creari placuisset,*  
*ut et plebeiis pateret summus honos, quatuor et quadra-*  
*ginta annis neminem ex plebe tribunum militum creatum*  
*esse? Qui crederent, duobus nunc<sup>h)</sup> in locis sua vo-*  
*luntate inpartituros<sup>i)</sup> plebi honorem, qui octona loca*  
*tribunis militum creandis occupare soliti sint? et ad*  
*consulatum viam fieri passuros, qui tribunatum septum*  
*tam diu habuerint? Lege obtinendum esse, quod com-*  
*itiis per gratiam nequeat; et seponendum extra certa-*  
*men alterum consulatum, ad quem plebi sit aditus.*  
*quoniam in certamine relictus praemium semper poten-*  
*tioris futurus sit. Nec iam posse dici id, quod antea*  
*iactare soliti sint, non esse in plebeiis idoneos viros ad*  
*curules magistratus. Numquid enim socordius aut se-*  
*gnius rempublicam administrari post P. Licinii Calvi*  
*tribunatum, qui primus ex plebe creatus sit, quam per*  
*eos annos gesta sit, quibus praeter patricios nemo tri-*  
*bunus militum fuerit? quin contra patricios aliquot*  
*damnatos post tribunatum, neminem plebeium. Quae-*  
*stores quoque, sicut tribunos militum, paucis ante an-*  
*nis ex plebe coeptos creari: nec ullius eorum populum*  
*Romanum poenituisse. Consulatum superesse plebeiis:*  
*eam esse arcem libertatis, id columen, si eo perventum*  
*sit, tum populum Romanum vere exactos ex urbe reges,*  
*et stabilem libertatem suam existimaturum. Quippe ex*  
*illa die in plebem ventura omnia, quibus patricii excel-*  
*lant, imperium atque honorem, gloriam belli, genus,*  
*nobilitatem, magna ipsis fruenda, maiora liberis re-*  
*linquenda. Huius generis orationes ubi accipi videre;*

<sup>h)</sup> duobusne Gron. Crev. c.    <sup>i)</sup> impertituros Gron. Crev. Drak.



novam rogationem promulgant, ut pro duumviris U. c. 386.  
sacris faciundis decemviri creentur; ita ut pars ex a. C. 366.  
plebe, pars ex Patribus fiat: omniumque earum ro-  
gationum comitia in adventum eius exercitus diffe-  
runt, qui Velitras obsidebat.

XXXVIII. Prius circumactus est annus, quam  
a Velitris reducerentur legiones. ita suspensa de le-  
gibus res ad novos tribunos militum dilata. nam ple-  
bis tribunos eosdem, duos utique, quia <sup>k)</sup> legum la-  
tores erant, plebes reficiebat. Tribuni militum crea- U. c. 387.  
ti T. Quinctius, Ser. Cornelius, Ser. Sulpicius, Sp. a. C. 365.  
Servilius, L. Papirius, L. Veturius. Principio statim  
anni ad ultimam dimicationem de legibus ventum:  
et, quum tribus vocarentur, nec intercessio collega-  
rum latoribus obstaret, trepidi Patres ad duo ultima  
auxilia, summum imperium summumque ad civem,  
decurrunt. Dictatorem dici placet. dicitur M. Fu-  
rius Camillus, qui magistrum equitum L. Aemilium  
cooptat. Legum quoque latores adversus tantum ad-  
paratum adversariorum et ipsi causam plebis ingen-  
tibus animis armant: concilioque plebis indicto, tri-  
bus ad suffragium vocant. Quum dictator, stipatus  
agmine patriciorum, plenus irae minarumque conse-  
disset, atque ageretur res solito primum certamine  
inter se tribunorum plebi <sup>l)</sup> ferentium legem inter-  
cedentiumque, et, quanto iure potentior intercessio  
erat, tantum vinceretur favore legum ipsarum lato-  
rumque, et, *Uti rogas*, primae tribus dicerent; tum  
Camillus, *Quandoquidem*, inquit, *Quirites*, iam vos  
*tribunicia libido*, non potestas, regit, et intercessionem,  
*secessione quondam plebis partam*, vobis eadem vi fa-  
citis irritam, qua peperistis; non reipublicae ma-  
gis universae, quam vestra causa, dictator inter-  
cessionem adero, eversumque vestrum auxilium imperio  
tutabor. Itaque, si C. Licinius et L. Sextius inter-

k) qui Gron. Crev.

l) plabei Crev.

U. c. 387. *cessioni collegarum cedunt; nihil patricium magistratum inseram concilio plebis. si adversus intercessionem, tamquam captae civitati leges inponere tendent, vim tribuniciam a se ipsa dissolvi non patiar.* Adversus ea quum contentum tribuni plebis rem nihilo segnius peragerent, tum percitus ira Camillus lictores, qui de medio plebem emoverent, misit. et addidit minas, si pergerent, sacramento omnes iuniores adacturum, exercitumque extemplo ex urbe educturum. Terrorem ingentem incusserat plebi; ducibus plebis accendit magis certamine animos, quam minuit. sed, re neutro inclinata, magistratu se abdicavit; seu quia vitio creatus erat, ut scripsere quidam: seu quia tribuni plebis tulerunt ad plebem, idque plebs<sup>m)</sup> scivit, ut, si M. Furius pro dictatore quid egisset, quingentum millium ei multa esset. Sed auspiciis magis, quam novi exempli rogatione, deterritum ut potius credam, quum ipsius viri facit ingenium, tum quod ei subfectus est extemplo P. Manlius dictator: quem quid creari adlinebat ad id certamen, quo M. Furius victus esset? et quod eundem M. Furium dictatorem insequens annus habuit, haud sine pudore certe fractum priore anno in se imperium repetiturum: simul quod eo tempore, quo promulgatum de multa eius traditur, aut et huic rogationi, qua se in ordinem cogi videbat, obsistere potuit; aut ne illas quidem, propter quas et haec lata erat, impedire: et, quoad usque ad memoriam nostram tribuniciiis consularibusque certatum viribus est, dictaturae semper altius fastigium fuit.

XXXIX. Inter priorem dictaturam abdicatam novamque a Manlio initam, ab tribunis velut per interregnum concilio plebis habito, adparuit, quae ex promulgatis plebi, quae latoribus gratiora essent. nam de foenore atque agro rogationes iubebant, de

m) *plebes* Gron. Crev.

plebeio consulatu antiquabant. et perfecta utraque<sup>U. c. 387.</sup>  
 res esset, ni tribuni se in omnia simul consulere<sup>a. C. 365.</sup>  
 plebem dixissent. P. Manlius deinde dictator rem in  
 caussam plebis inclinavit, C. Licinio, qui tribunus  
 militum fuerat, magistro equitum de plebe dicto. Id  
 aegre Patres passos accipio; dictatorem propinqua  
 cognatione Licinii se apud Patres excusare solitum,  
 simul negantem, magistri equitum maius, quam tri-  
 buni consularis, imperium esse. Licinius Sextiusque,  
 quum tribunorum plebi creandorum indicta comitia  
 essent, ita se gerere, ut negando iam sibi velle con-  
 tinuari honorem acerrime accenderent ad id, quod  
 dissimulando petebant, plebem. *Nonum se annum*  
*iam velut n) in a. iem o) adversus optimates maximo*  
*privatim periculo, nullo publice emolumento stare. con-*  
*sensuisse iam secum et rogationes promulgatas, et vim*  
*omnem tribuniciae potestatis. Primo intercessione col-*  
*legarum in leges suas pugnatum esse: deinde ablegatio-*  
*ne iuventutis ad Veliternum bellum: postremo dictato-*  
*rium fulmen in se intentatum. Iam nec collegas, nec*  
*bellum, nec dictatorem obstare; quippe qui etiam omen*  
*plebeio consuli, magistro equitum ex plebe dicendo, de-*  
*derit se ipsam plebem et commoda morari sua. Libe-*  
*ram urbem ac forum a creditoribus, liberos agros ab*  
*iniustis possessoribus extemplo, si velit, habere posse.*  
*Quae munera quando tandem satis grato animo aesti-*  
*maturos, si, inter accipiendas de suis commodis roga-*  
*tiones, spem honoris latoribus earum incidant? non*  
*esse modestiae populi Romani id postulare, ut ipse foe-*  
*nore levetur, et in agrum iniuria possessum a potentibus*  
*inducatur; per quos ea consecutus sit, senes tribuni-*  
*cios non sine honore tantum, sed etiam sine spe honoris,*  
*relinquat. Proinde ipsi primum statuerent apud ani-*  
*mos, quid vellent: deinde comitiis tribuniciiis declara-*  
*rent voluntatem. Si coniunctim ferri ab se promulga-*

n) veluti Crev.

o) acie Gron. Crev.

U. c. 387. *tas rogationes vellent, esse, quod eosdem rescicerent tribunos plebis: perluturos enim, quae promulgaverint. sin, quod cuique privatim opus sit, id modo accipi velint; opus esse nihil invidiosa continuatione honoris; nec se tribunatum, nec illos ea, quae promulgata sint, habituros.*

XL. Adversus tam obstinatam orationem tribunorum quum, prae indignitate rerum, stupor silentiumque inde ceteros Patrum defixisset; Ap. Claudius Crassus, nepos decemviri, dicitur odio magis iraque, quam spe, ad dissuadendum processisse, et locutus in hanc fere sententiam esse: *Neque novum, neque inopinatum mihi sit, Quirites, si, quod unum familiae nostrae semper obiectum est ab seditiosis tribunis, id nunc ego quoque audiam: Claudiae genti iam inde ab initio nil antiquius in republica Patrum maiestate fuisse; semper plebis commodis adversatos esse. Quorum alterum neque nego, neque inficias eo<sup>v</sup>), nos, ex quo adsciti sumus simul in civitatem et Patres, enixe operam dedisse, ut per nos aucta potius, quam inminuta, maiestas earum gentium, inter quas nos esse voluistis, dici vere posset. Illud alterum pro me maioribusque meis contendere ausim, Quirites, (nisi, quae pro universa republica fiant, ea plebi, tamquam aliam incolenti urbem, adversa quis putet) nihil nos, neque privatos, neque in magistratibus, quod incommodum plebi esset, scientes fecisse: nec ullum factum dictumve nostrum contra utilitatem vestram (etsi quaedam contra voluntatem fuerint) vere referri posse. An hoc, si Claudiae familiae non sim, nec ex patricio sanguine ortus, sed unus Quiritium quilibet, qui modo me duobus ingenuis ortum, et vivere in libera civitate sciam, reticere possim? L. illum Sextium et C. Licinium, perpetuos (si Diis placet) tribunos, tantum licentiae novem annis, quibus regnant, sumsisse, ut vobis negent potestatem liberam suffragii, non*

) non ego, non ceteri Claudii inficiamur Crev.



*in comitiis, non in legibus iubendis, se permissuros es-* U. c. 397.  
*se? Sub conditione, inquit, nos reficietis decimum tri-* a. C. 365.  
*bunos. Quid est aliud dicere, quod petunt alii, nos adeo*  
*fastidimus, ut sine mercede magna non accipiamus. Sed*  
*quae tandem ista merces est, qua vos semper tribuno's*  
*plebis habeamus? ut rogationes, inquit, nostras, seu*  
*placent, seu displicent, seu utiles, seu inutiles sunt,*  
*omnes coniunctim accipiatis. Obsecro vos, Tarquinii*  
*tribuni plebis, putate me ex media concione unum civem*  
*subclamare: Bona venia vestra liceat ex his rogatio-*  
*nibus legere, quas salubres nobis censemus esse; anti-*  
*quare alias. Non, inquit, licebit. Tu de foenore atque*  
*agris, quod ad vos omnes pertinet, iubeas; et hoc por-*  
*tenti non fiat in urbe Romana, uti L. Sextium atque*  
*hunc C. Licinium consules, quod indignaris, quod ab-*  
*ominaris, videas? Aut omnia accipe: aut nihil fero.*  
*Ut si quis ei, quem urgeat fames, venenum ponat cum*  
*cibo; et aut abstinere eo, quod vitale sit, iubeat, aut*  
*mortiferum vitali admisceat. Ergo, si esset libera haec*  
*civitas, non tibi frequentes subclamassent? Abi hinc cum*  
*tribunatibus ac rogationibus tuis. quid? si tu <sup>q)</sup> non*  
*tuleris, quod commodum est populo adcipere, nemo erit,*  
*qui ferat illud? Si quis patricius, si quis (quod illi vo-*  
*lunt invidiosius esse) Claudius diceret. Aut omnia ac-*  
*cipite, aut nihil fero; quis vestrum, Quirites, ferret?*  
*Numquamne vos res potius, quam auctores, spectabitis?*  
*sed omnia semper, quae magistratus ille dicet, secundis*  
*auribus, quae ab nostrum quo dicentur, adversis acci-*  
*pietis? At hercule sermo est minime civilis. Quid? Ro-*  
*gatio qualis est, quam a vobis antiquatam indignantur?*  
*sermoni, Quirites, simillima. Consules, inquit, rogo,*  
*ne vobis, quos velitis, facere liceat. An aliter rogat,*  
*qui utique alterum ex plebe fieri consulem iubet; nec*  
*duos patricos creandi potestatem vobis permittit? Si*  
*hodie bella sint, quale Etruscum fuit, quum Porsena*

q) tu del. Gron. Grev.

U. c. 387. *Ianiculum insedit; quale Gallicum modo, quum praeter Capitolium atque arcem omnia haec hostium erant, et consulatum cum hoc M. Furio et <sup>r)</sup> quolibet alio ex Patribus L. ille Sextius peteret: possetisne ferre, Sextium haud pro dubio consulem esse, Camillum de repulsa dimicare? Hoccine est in commune honores vocare, ut duos plebeios fieri consules liceat, duos patricios non liceat? et alterum ex plebe creari necesse sit, utrumque ex Patribus praeterire liceat? Quanam ista societas, quanam consortio est? Parum est, si, cuius pars tua nulla adhuc fuit, in partem eius venis, nisi partem petendo totum traxeris? Timeo, inquit, ne, si duos licebit creari patricios, neminem creetis plebeium. Quid est dicere aliud, quia <sup>s)</sup> indignos vestra voluntate creaturi non estis, necessitatem vobis creandi, quos non vultis, inponam? Quid sequitur, nisi ut ne beneficium quidem debeat populo, si cum duobus patriciis unus petierit plebeius, et lege se, non suffragio, creatum dicat?*

XLI. Quomodo extorqueant, non quomodo petant honores, quaerunt: et ita maxima sunt adepturi, ut nihil ne pro minimis quidem debeant; et occasionibus potius, quam virtutē, petere honores malunt <sup>t)</sup>. Est aliquis, qui se inspici, aestimari fastidiat; qui certos sibi uni honores inter dimicantes competitores aequum censeat esse; qui se arbitrio vestro eximat; qui vestra necessaria suffragia pro voluntariis, et serva pro liberis faciat. Omitto Licinium Sextiumque, quorum annos in perpetua potestate, tamquam regum in Capitolio, numeratis: quis est hodie in civitate tam humilis, cui non via ad consulatum facilior per istius legis occasionem, quam nobis ac liberis nostris, fiat? si quidem nos, ne quum volueritis quidem, creare interdum poteritis; istos, etiam si nolueritis, necesse sit. De indignitate satis dictum est: (etenim dignitas ad homines pertinet)

r) aut Gron.

t) molint Eaed.

s) nisi quia Gron. Crev.

*quid de religionibus atque auspiciis, quae propria Deo-* U. c. 387.  
*rum immortalium contemptio atque iniuria est, loquar?* <sup>3.</sup> C. 365.

*Auspiciis hanc urbem conditam esse, auspiciis bello ac pace, domi militiaeque, omnia geri, quis est, qui ignoret? Penes quos igitur sunt auspicia more maiorum? nempe, penes Patres. nam plebeius quidem magistratus nullus auspicato creatur. Nobis adeo propria sunt auspicia, ut non solum, quos populus creat patricios magistratus, non aliter, quam auspicato, creet; sed nos quoque ipsi sine suffragio populi auspicato interregem prodamus, et privatim auspicia habeamus, quae isti ne in magistratibus quidem habent. Quid igitur aliud, quam tollit ex civitate auspicia, qui, plebeios consulles creando, a Patribus, qui soli ea habere possunt, aufert? Eludant nunc licet religiones. Quid enim est, si pulli non pascentur? si ex cavea tardius exierint? si occinuerit avis? Parva sunt haec: sed parva ista non contemnendo maiores nostri maximam hanc rem fecerunt. Nunc nos, tamquam iam nihil pace Deorum opus sit, omnes ceremonias polluimus. Vulgo ergo pontifices, augures, sacrificuli reges creentur: cuilibet apicem dialem, dummodo homo sit, inponamus: tradamus ancilia, penetralia, Deos, Deorumque curam, quibus nefas est, non leges auspicato ferantur, non magistratus creentur: nec centuriatis neque curiatis <sup>u)</sup> comitiis Patres auctores fiant. Sextius et Licinius, tamquam Romulus ac Tatiush, in urbe Romana regnent, quia pecunias alienas, quia agros dono dant. Tanta dulcedo est ex alienis fortunis praedandi: nec in mentem venit, altera lege solitudines vastas in agris fieri pellendo finibus dominos: altera fidem abrogari, cum qua omnis humana societas tollitur. Omnium rerum causa vobis antiquandas censeo istas rogationes. Quod faxitis, Deos velim fortunare.*

XLII. Oratio Appii ad id modo valuit, ut tem-

u) nec curiatis del. Gron.

U. c. 387. pus rogationum iubendarum proferretur. Refecti de-  
 a. C. 365. cimum iidem tribuni, Sextius et Licinius, de decem-  
 viris sacrorum ex parte de plebe creandis legem per-  
 tulere. creati quinque Patrum, quinque plebis: gra-  
 duque eo iam via facta ad consulatum videbatur. Hac  
 victoria contenta plebes cessit Patribus, ut, in prae-  
 sentia consulum mentione omissa, tribuni militum  
 U. c. 388. crearentur. creati A. et M. Cornelii iterum, M. Ge-  
 a. C. 364. ganius, P. Manlius, L. Veturius, P. Valerius sex-  
 tum. Quum praeter Velitrarum obsidionem, tardi-  
 magis rem exitus, quam dubii, quietae externae res  
 Romanis essent; fama repens belli Gallici adlata,  
 perpulit civitatem, ut M. Furius dictator quintum  
 diceretur. is T. Quinctium Pennum magistrum equi-  
 tum dixit. Bellatum cum Gallis eo anno circa Anie-  
 nem flumen, auctor est Claudius; inclitamque in pon-  
 te pugnam, qua T. Manlius Gallum, cum quo pro-  
 vocatus manus conseruit, in conspectu duorum exer-  
 cituum caesum torque spoliavit, tum pugnatum. Plu-  
 ribus auctoribus magis adducor, ut credam, decem  
 haud minus post annos ea acta: hoc autem anno in  
 Albano agro cum Gallis, dictatore M. Furio, signa  
 collata. Nec dubia, nec difficilis Romanis (quam-  
 quam ingentem Galli terrorem memoria pristinae cla-  
 dis adtulerant) victoria fuit. multa millia barbarorum  
 inacie, multa captis castris caesa; palati alii Apu-  
 liam maxime petentes, quum fuga se longinqua, tum  
 quod passim eos simul pavor terrorque distulerant,  
 ab hoste sese tutati sunt. Dictatori, consensu Pa-  
 trum plebisque, triumphus decretus. Vixdum per-  
 functum eum bello atrocior domi seditio excepit: et  
 per ingentia certamina dictator senatusque victus, ut  
 rogationes tribuniciae acciperentur; et comitia con-  
 sulum adversa nobilitate habita, quibus L. Sextius  
 de plebe primus consul factus. Et ne is quidem finis  
 certaminum fuit. quia patricii se auctores futuros ne-  
 gabant, prope secessionem plebis res terribilesque



alias minas civilium certaminum venit: quum tamen<sup>U. c. 388.</sup>  
per dictatorem conditionibus sedatae discordiae sunt,<sup>a. C. 364.</sup>  
concessumque ab nobilitate plebi de consule plebeio;  
a plebe nobilitati de praetore uno, qui ius in urbe  
diceret, ex Patribus creando. Ita ab diutina ira tan-  
dem in concordiam redactis ordinibus, quum dignam  
eam rem senatus censeret esse, meritoque id, si  
quando umquam alias, Deum immortalium caussa li-  
benter facturos fore, ut ludi mæximi fierent, et dies  
unus ad triduum adiiceretur; recusantibus id munus  
aedilibus plebis, conclamatum a patriciis est iuveni-  
bus, se id honoris Deum immortalium caussa libenter  
acturos, ut aediles fierent. Quibus quum ab univer-  
sis gratiae actae essent, factum senatusconsultum, ut  
duo viros aediles ex Patribus dictator populum ro-  
garet: Patres auctores omnibus eius anni comitiis  
fierent.

---

## EPITOME LIBRI VII.

Duo novi magistratus adiecti sunt, praetura et curulis aedilitas 1). Pestilentia civitas laboravit, eamque insignem fecit mors Furii Camilli, cuius remedium et finis quum per novas religiones quaereretur, ludi scenici tunc primum facti sunt. Quum dies L. Manlio dicta esset a M. Pomponio tribuno plebis propter delectum acerbe actum, et T. Manlium filium rus 2) relegatum sine ullo crimine: adolescens ipse, cuius relegatio patri obiciebatur, venit in cubiculum tribuni, strictoque gladio coegit eum in verba sua iurare, non perseveraturum se in accusatione. Quum telluris hiatu tota ad ultimum territa patria 3) foret, tunc omnia pretiosa missa sunt in praecaltam 4) voraginem urbis Romanae. in eam Curtius armatus, sedens equo, se praecipitavit, eaque explota est. T. Manlius adolescens, qui patrem a tribunicia vexatione vindicaverat, contra Gallum, provocantem aliquem ex militibus Romanis, in singulare certamen descendit, eique occiso torquem aureum detraxit: quem ipse postea tulit, et ex eo Torquatus est nuncupatus. Duae tribus additae, Pomptina et Publilia. Licinius Stolo lege ab ipso lata damnatus est, quod plus quingentis iugeribus agri possideret. M. Valerius tribunus militum Gallum, a quo provocatus erat, insidente galeae corvo, et unguibus rostroque hostem infestante, occidit 5), et ex eo Corvi nomen accepit; consulque proximo anno, quum annos viginti tres haberet, ob virtutem creatus est 6). Amicitia cum Karthaginiensibus iuncta. Campani, quum urgerentur a Samnitibus bello, auxilio adversus eos a senatu petito, quum id non impetrarent, urbem atque agros populo Romano dediderunt, ob quam causam ea, quae populi Romani facta essent, defendi bello adversus Samnites placuit. Quum ab A. Cornelio consule exercitus in iniquum locum deductus in magno discrimine esset, P. Decii Muris tribuni militum opera servatus est, qui, occupato colle super id iugum, in quo Samnites consederant, occasionem consuli in aequiorem locum evadendi dedit: ipse ab hostibus circumsessus erupit. Quum milites Romani, qui Capuae in praesidio erant relict, de ea occupanda 7) urbe conspirassent, et, detecto consilio, metu supplicii a populo Romano defecissent; per M. Valerium Corvum dictatorem, qui consilio suo eos a furore revocaverat, patriae restituti sunt. Res praeterea contra Hernicos, et Gallos, et Tihurtes, et Privernates, et Tarquinienses, et Samnites, et Volscos prospere gestas continet.

1) aedilitas curulis Gron Crev.

2) rus del. Gron.

3) patria territa Gron. Crev.

4) patentem Eaed.

5) interemit Eaed.

6) anno creatus est ob virtu-

tem, quum vigesimum tertium  
ageret annum. Eaed.7) Milites Romani — reli-  
cti, quum de ea occupanda  
Eaed.

## T. LIVII PATAVINI

## LIBER VII.

Annus hic erit insignis novi hominis consulatu, in-<sup>U. c. 389.</sup>  
 signis novis duobus magistratibus, praetura et cu-<sup>a. C. 363.</sup>  
 ruli aedilitate. Hos sibi patricii quaesivere honores  
 pro concesso plebi altero consulatu. Plebes consu-  
 latum L. Sextio, cuius lege partus erat, dedit: Pa-  
 tres praeturam Sp. Furio M. filio Camillo; aedilita-  
 tem Cn. Quinctio Capitolino et P. Cornelio Scipioni,  
 suarum gentium viris, gratia campestri ceperunt. L.  
 Sextio collega ex Patribus datus L. Aemilius Mamercinus.  
 Principio anni et de Gallis, quos primo palatos  
 per Apuliam congregari iam fama erat, et de Her-  
 nicorum defectione agitata mentio. Quum de indu-  
 stria omnia, ne quid per plebeium consulem ageretur,  
 proferrentur, silentium omnium rerum ac iustitio si-  
 mile otium fuit: nisi quod non patientibus tacitum  
 tribunis, quod pro consule uno plebeio tres patricos  
 magistratus curulibus sellis praetextatos tamquam con-  
 sules sedentes, nobilitas sibi sumsisset, praetorem  
 quidem etiam iura reddentem, et collegam consuli-  
 bus, atque iisdem auspiciis creatum, verecundia inde  
 inposita est senatui ex Patribus iubendi aediles cu-  
 rules creari. primo, ut alternis annis ex plebe fie-  
 rent, convenerat: postea promiscuum fuit. Inde, L. <sup>U. c. 390.</sup>  
 Genucio et Q. Servilio consulibus, et ab seditione et <sup>a. C. 362.</sup>  
 a bello quietis rebus, ne quando a metu ac periculis  
 vacarent, pestilentia ingens orta. Censorem, aedi-  
 lem curulem, tres tribunos plebis mortuos ferunt, pro  
 portione et ex multitudine alia multa funera fuisse.  
 maximeque eam pestilentiam insignem mors quam

U. c. 590. matura, tam acerba, M. Furii fecit. Fuit enim vere  
 a. C. 562. vir unicus in omni fortuna: princeps pace belloque  
 prius, quam exsulatum iret; clarior in exsilio vel  
 desiderio civitatis, quae capta absentis inploravit  
 opem, vel felicitate, qua restitutus in patriam secum  
 patriam ipsam restituit. Par deinde per quinque et  
 viginti annos (tot enim postea vixit) titulo tantae glo-  
 riae fuit, dignusque habitus, quem secundum a Ro-  
 mulo conditorem urbis Romanae ferrent.

U. c. 591. II. Et hoc et insequenti anno, C. Sulpicio Petico <sup>a)</sup>,  
 a. C. 561. C. Licinio Stolone consulibus, pestilentia fuit. eo  
 nihil dignum memoria actum, nisi quod pacis Deum  
 exoscendae caussa tertio tum post conditam urbem  
 lectisternium fuit. et quum vis morbi nec humanis  
 consiliis nec ope divina levaretur, victis superstitione  
 animis, ludi quoque scenici, nova res bellicoso popu-  
 lo, (nam circi modo spectaculum fuerat) inter alia coe-  
 lestis irae placamina instituti dicuntur. Ceterum par-  
 va quoque (ut ferme principia omnia) et ea ipsa  
 peregrina res fuit. Sine carmine ullo, sine imi-  
 tandorum carminum actu, ludiones ex Etruria ad-  
 citi, ad tibicinis modos saltantes, haud indecoros  
 motus more Tusco dabant. imitari deinde eos iuven-  
 tus, simul inconditis inter se iocularia fundentes ver-  
 sibus, coepere; nec absoni a voce motus erant. Ac-  
 cepta itaque res saepiusque usurpando excitata. ver-  
 naculis artificibus, quia hister Tusco verbo ludio vo-  
 cabatur, nomen histrionibus inditum; qui non, sicut  
 ante, Fescennino versu similem incompositum temere  
 ac rudem alternis iaciebant; sed inpletas modis sa-  
 turas, descripto iam ad tribicinem cantu, motuque  
 congruenti peragebant. Livius post aliquot annos,  
 qui ab saturis ausus est primus argumento fabulam  
 serere, (idem scilicet, id quod omnes tum erant, suo-  
 rum carminum actor) dicitur, quum saepius revoca-  
 tus vocem obtudisset, venia petita puerum ad canen-

a) *Paglico* Gron. Crev.



dum ante tibicinem quum statuisset, canticum egisse U. c. 391.  
 aliquanto magis vigente <sup>b)</sup> motu, quia nihil vocis a. C. 361.  
 usus impediebat. inde ad manum cantari histrioni-  
 bus coeptum, diverbiaque tantum ipsorum voci reli-  
 cta. Postquam lege hac fabularum ab risu ac soluto  
 ioco res avocabatur, et ludus in artem paullatim ver-  
 terat; inventus, histrionibus fabellarum actu relicto,  
 ipsa inter se more antiquo redicula intexta versibus  
 iactitare coepit: quae inde exodia postea adpellata,  
 consertaque fabellis potissimum Atellanis sunt. Quod  
 genus ludorum ab Oscis acceptum tenuit inventus,  
 nec ab histrionibus pollui passa est. Eo institutum  
 manet, ut actores Atellanarum nec tribu moveantur,  
 et stipendia, tamquam expertes artis ludicrae, faci-  
 ant. Inter aliarum parva principia rerum, ludorum  
 quoque prima origo ponenda visa est: ut adpareret,  
 quam ab sano initio res in hanc vix opulentis regnis  
 tolerabilem insaniam venerit.

III. Nec tamen ludorum primum initium, pro-  
 curandis religionibus datum, aut religione animos, aut  
 corpora morbis levavit. quin etiam, quum medios  
 forte ludos circus Tiberi superfuso inrigatus inpedis-  
 set, id vero, velut aversis iam Diis adspernantibusque  
 placamina irae, terrorem ingentem fecit. Itaque U. c. 592.  
 Genucio, L. Aemilio Mamercino secundum consuli- a. C. 560.  
 bus, quum piaculorum magis conquisitio animos, quam  
 corpora morbi, adficerent, repetitum ex seniorum me-  
 moria dicitur, pestilentiam quondam clavo ab dicta-  
 tore fixo sedatam. Ea religione adductus senatus dicta-  
 torem clavi figendi caussa dici iussit. dictus L. Man-  
 lius Imperiosus, L. Pinarium magistrum equitum dixit.  
 Lex vetusta est, priscis literis verbisque scripta, ut,  
 qui praetor maximus sit, Idibus Septembribus clavum  
 pangat. Fixa <sup>c)</sup> fuit dextro lateri aedis Iovis optimi  
 maximi, ex qua parte <sup>d)</sup> Minervae templum est. Eum

b) *vigenti Gron. Crev.*

d) *fixus Eaed.*

c) *ea ex parte qua Eaed.*

U. c. 392. **clavum**, quia rarae per ea tempora literae erant, no-  
 a. C. 360. tam numeri annorum fuisse ferunt: eoque Minervae  
 templo dicatam legem, quia numerus Minervae in-  
 ventum sit. Volsiniis quoque clavos, indices numeri  
 annorum fixos in templo Nortiae, Etruscae Deae, com-  
 parere, diligens talium monumentorum auctor Cin-  
 cius adfirmat. M. Horatius consul ex lege templum  
 Iovis optimi maximi dedicavit anno post reges exa-  
 ctos: a consulibus postea ad dictatores, quia maius  
 imperium erat, sollemne clavi figendi translatum est.  
 Intermisso deinde more, digna etiam per se visa res<sup>e)</sup>,  
 propter quam dictator crearetur. qua de causa crea-  
 tus L. Manlius, perinde ac reipublicae gerendae, ac  
 non solvendae religione, gratia creatus esset, bellum  
 Hernicum adfectans, delectu acerbo iuventutem agi-  
 tavit; tandemque omnibus in eum tribunis plebis coor-  
 tis, seu vi, seu verecundia victus, dictatura abiit.

U. c. 393. IV. Neque eo minus principio insequentis anni, Q.  
 a. C. 359. Servilio Ahala, L. Genucio consulibus<sup>f)</sup>, dies Manlio  
 dicitur a M. Pomponio tribuno plebis. Acerbitas in de-  
 lectu, non damno modo civium, sed etiam laceratione  
 corporum lata, partim virgis caesis, qui ad nomina non  
 respondissent, partim in vincula ductis, invisae erat: et  
 ante omnia invisum ipsum ingenium atrox, cognomen-  
 que Imperiosi grave liberae civitati, ab ostentatione sae-  
 vitiae adscitum; quam non magis in alienis, quam in  
 proximis, ac sanguine ipse suo exerceret. crimini-  
 que ei tribunus inter cetera dabat, *quod filium iuve-*  
*nem, nullius probri compertum, extorrem urbe, domo,*  
*penatibus, foro, luce, congressu aequalium prohibitum,*  
*in opus servile, prope in carcerem atque in ergastulum,*  
*dederit: ubi summo loco natus dictatorius iuvenis quo-*  
*tidiana miseria disceret, vere imperioso patre se natum*  
*esse. At quam ob noxam? quia infacundior sit, et lin-*  
*gua inpromptus. Quod naturae damnum utrum nutri-*

e) est res Gron. Crev.

f) secundum consulibus Eaed.

*endum patri, (si quidquam in eo humani esset) an castigandum ac vexatione insigne faciendum fuisse? ne mutas quidem bestias minus alere ac fovere, si quid ex progenie sua parum prosperum sit. At, Hercule, L. Manlium, malum malo augere filii, et tarditatem ingenii insuper premere; et, si quid in eo exiguum naturalis vigoris sit, id extinguere vita agresti et rustico cultu, inter pecudes habendo.*

V. Omnium potius his criminationibus, quam ipsius iuvenis, irritatus est animus: quin contra, se quoque parenti caussam invidiae atque criminum esse, aegre passus, (ut omnes Dii hominesque scirent, se parenti opem latam, quam inimicis eius, malle) capit consilium, rudis quidem atque agrestis animi, et quamquam non civilis exempli, tamen pietate laudabile. Inscientibus cunctis, cultro subcinctus, mane in urbem, atque a porta domum confestim ad M. Pomponium tribunum pergit: ianitori, *opus esse sibi domino eius convento extemplo*, ait. *nunciaret, T. Manlium L. filium esse.* Mox introductus, (etenim percitum ira in patrem spes erat aut criminis aliquid novi, aut consilii ad rem agendam, deferre) salute accepta redditaque, *esse*, ait, *quae cum eo agere arbitris remotis velit.* Procul inde omnibus abire iussis, cultrum stringit: et, super lectum stans ferro intento, nisi, in quae ipse concepisset verba, iuraret, *se patris eius accusandi caussa concilium plebis numquam habiturum*, se eum extemplo transfixurum minatur. Pavidus tribunus (quippe qui ferrum ante oculos micare, se solum, inermem; illum praevalidum iuvenem, et, quod haud minus timendum erat, stolide ferocem viribus suis cerneret) adiurat, in quae adactus est verba; et prae se deinde tulit, ea vi subactum se incepto destitisse. Nec perinde, ut maluisset plebes, sibi suffragii ferendi de tam crudeli et superbo reo potestatem fieri; ita aegre habuit, filium id pro parente ausum. eoque id laudabilius erat, quod animum eius

U. c. 393.

a. C. 359.

U. c. 395. tanta acerbitas patria nihil a pietate avertisset. Ita-  
 a. C. 359. que non patri modo remissa caussae dictio est, sed ip-  
 si etiam adolescenti ea res honori fuit. et quum eo  
 anno primum placuisset, tribunos militum ad legiones  
 suffragio fieri, (nam et antea, sicut nunc, quos Rufu-  
 los vocant, imperatores ipsi faciebant) secundum in  
 sex locis tenuit, nullis domi militiaeque ad concilian-  
 dam gratiam meritis; ut qui rure et procul coetu ho-  
 minum iuventam egisset.

VI. Eodem anno, seu motu terrae, seu qua vi  
 alia, forum medium ferme specu vasto conlapsum in  
 immensam altitudinem dicitur: neque eam voraginem  
 coniectu terrae, quum pro se quisque gereret, expleri  
 potuisse prius, quam Deum monitu quaeri coeptum,  
 quo plurimum populus Romanus posset? Id enim  
 illi loco dicandum, vates canebant, si rempublicam  
 Romanam perpetuam esse vellent. Tum M. Curtium,  
 iuvenem bello egregium, castigasse ferunt dubitantes,  
 an ullum magis Romanum bonum, quam arma vir-  
 tusque, esset. Silentio facto, templa Deorum in-  
 mortalium, quae foro inminent, Capitoliumque in-  
 tumentem, et manus nunc in coelum, nunc in patentes  
 terrae hiatus ad Deos Manes porrigentem, se devo-  
 visse: equo deinde, quam poterat, maxime exorna-  
 to insidentem, armatum se in specum innisisse, do-  
 naque ac fruges super eum a multitudine virorum ac  
 mulierum congestas; lacumque Curtium, non ab an-  
 tiquo illo T. Tatii milite Curtio Metto<sup>g</sup>), sed ab hoc  
 adpellatum. Cura non deesset, si qua ad verum via  
 inquirentem ferret: nunc fama rerum standum est,  
 ubi certam derogat vetustas fidem. et lacus nomen  
 ab hac recentiore insignitius fabula est. Post tanti  
 prodigii procurationem, eodem anno de Hernicis con-  
 sultus senatus, quum feciales ad res repetendas ne-  
 quidquam misisset, primo quoque die ferendum ad  
 populum de bello indicendo Hernicis censuit; popu-

g) *Mettio* Gron. Vid. supra ad Lib. I, 12. not. y.



lusque id bellum frequens iussit. L. Genucio con- U. c. 395.  
suli ea provincia sorte evenit. In exspectatione ci- a. C. 359.  
vitas erat, quod primus ille de plebe consul bellum  
suis auspiciis gesturus esset; perinde ut eveniret res,  
ita communicatos honores pro bene aut secus con-  
sulto habitura. Forte ita tulit casus, ut Genucius, ad  
hostes magno conatu profectus, in insidias praecipita-  
ret; <sup>h)</sup> legionibus nec opinato pavore fuis, consul  
circumventus ab insciis, quem interfecissent, occide-  
retur. Quod ubi est Romam nunciatum, nequaquam  
tantum publica calamitate moesti Patres, quantum  
feroces infelici consulis plebeii ductu, fremunt om-  
nibus locis: *Irent, crearent consules ex plebe, trans-*  
*ferrent auspicia, quo nefas esset. Potuisse Patres ple-*  
*biscito pelli honoribus suis: num etiam in Deos in-*  
*mortales inauspicatam legem valuisse? Vindicasse ip-*  
*sos suum numen, sua auspicia. quae ut primum con-*  
*tacta sint ab eo, a quo neq̃ ius nec fas fuerit, deletum*  
*cum duce exercitum documento fuisse, ne deinde, tur-*  
*bato gentium iure, comitia haberentur.* His vocibus  
curia et forum personat. Ap. Claudium, quia dis-  
suaserat legem, maiore nunc auctoritate eventum re-  
prehensi ab se consilii incusantem, dictatorem con-  
sensu patriciorum Servilius consul dicit, delectusque  
et iustitium indictum.

VII. Priusquam dictator legionesque novae in  
Hernicos venirent, ductu C. Sulpicii legati res per  
occasionem gesta egregie est. In Hernicos, morte  
consulis contemptim ad castra Romana cum haud du-  
bia expugnandi spe succedentes, hortante legato, et  
plenis irae atque indignitatis militum animis, eruptio  
est facta. Multum ab spe adeundi valli res Hernicis  
afuit; adeo turbatis inde ordinibus abscessere. Di-  
ctatoris deinde adventu novus veteri exercitus iun-  
gitur, et copiae duplicantur: et pro concione dictator  
laudibus legati militumque, quorum virtute castra de-

h) praecipitaretur Gron. Crev.

U. c. 393. fensa erant, simul audientibus laudes meritas, tollit  
 a. C. 359. animos; simul ceteros ad aemulandas virtutes acuit.

Neque segnius ad hostes bellum adparatur, qui, et parti ante decoris memores, neque ignari auctarum virium hostis, suas quoque vires augment. Omne Hernicum nomen, omnis militaris aetas excitur. quadringenariae octo cohortes, lecta robora virorum, scribuntur. Hunc eximium florem iuventutis eo etiam, quod, ut duplex acciperent stipendium, decreverant, spei animorumque inplevere. Inmunes quoque operum militarium erant, ut, in unum pugnae laborem reservati, plus sibi, quam pro virili parte, adnitendum scirent. Extra ordinem etiam in acie locati, quo conspectior virtus esset. Duum millium planities castra Romana ab Hernicis dirimebat: ibi pari ferme utrimque spatio in medio pugnatum est. Primo stetit ambigua spe pugna; nequidquam saepe conatis equitibus Romanis inpetu turbare hostium aciem. Postquam equestris pugna effectum, quam conatibus, vanior erat; consulto prius dictatore equites, permissu deinde eius, relictis equis, clamore ingenti<sup>i)</sup> provolant ante signa, et novam integrant pugnam. neque sustineri poterant, nisi extraordinariae cohortes pari corporum animorumque robore se obiecissent.

VIII. Tunc inter primores duorum populorum res geritur. quidquid hinc aut illinc communis Mars belli aufert, multiplex, quam pro numero, damnum est: vulgus aliud armatorum, velut delegata primoribus pugna, eventum suum in virtute aliena ponit. multi utrimque cadunt, plures vulnera accipiunt. Tandem equites alius alium increpantes, *quid deinde restaret, quaerendo, si neque ex equis pepulissent hostem, neque pedites quidquam momenti facerent? quam tertiam exspectarent pugnam? quid ante signa feroces prosiluissent, et alieno pugnarent loco?* Illis inter se voci-

i) *ingenti* del. Gron.

bus concitati, clamore renovato, inferunt pedem: et U. c. 395.  
 primum gradu moverunt hostem, deinde pepulerunt; a. C. 359.  
 postremo iam haud dubie avertunt: neque, tam vires  
 pares quae superaverit res, facile dictu est, nisi quod  
 perpetua fortuna utriusque populi et extollere animos,  
 et minuere potuit. Usque ad castra fugientes Her-  
 nicos Romanus sequitur: castrorum obpugnatione,  
 quia serum erat dici, abstinere. Diu non perlitatum  
 tenuerat dictatorem, ne ante meridiem signum dare  
 posset: eo in noctem tractum erat certamen. Po-  
 stero <sup>k)</sup> die deserta fuga castra Hernicorum, et saucii  
 relictis quidam inventi; agmenque fugientium ab Si-  
 gninis <sup>l)</sup>, quum praeter moenia eorum infrequentia  
 conspecta signa <sup>m)</sup> essent, fusum, ac per agros trepi-  
 da fuga palatum est. Nec Romanis incruenta victo-  
 ria fuit. quarta pars militum amissa; et, ubi haud  
 minus iacturae fuit, aliquot equites Romani cecidere.

IX. Insequenti anno, quum C. Sulpicius et C. U. c. 394.  
 Licinius Calvus consules in Hernicos exercitum du- a. C. 358.  
 xissent, neque inventis in agro hostibus, Ferentinum  
 urbem eorum vi cepissent, revertentibus inde eis Ti-  
 burtes portas clausere. Ea ultima fuit causa, quum  
 multae antea querimoniae ultro citroque iactatae es-  
 sent, cur, per faciales rebus repetitis, bellum Tiburti  
 populo indiceretur. Dictatorem T. Quinctium Pen-  
 num eo anno fuisse, satis constat, et magistrum equi-  
 tum Ser. Cornelium Maluginensem. Macer Licinius  
 comitiorum habendorum causa, et ab Licinio consu-  
 le dictum scribit, quia, collega comitia bello praeser-  
 re festinante, ut continuaret consulatum, obviam  
 eundum pravae cupiditati fuerit. Quaesita ea pro-  
 priae familiae laus leviozem auctorem Licinium fa-  
 cit. quum mentionem eius rei in vetustioribus an-  
 nalibus nullam inveniam, magis, ut belli Gallici

k) *postera* Gron. Crev.

m) *signa conspecta* Gron.

l) *signis* Eaed. c. Drak. In Crev.

Crev. min. *signinis* legitur.

U. c. 394. causa dictatorem creatum arbitrer, inclinatur animus.  
 a. C. 358. eo certe anno Galli ad tertium lapidem Salaria via  
 trans pontem Anienis castra habuere. Dictator, quum  
 tumultus Gallici causa iustitium edixisset, omnes  
 iuniores sacramento adigit, ingentique exercitu ab  
 urbe profectus, in citeriore ripa Anienis castra posuit.  
 Pons in medio erat, neutris eum rumpentibus, ne ti-  
 moris indicium esset. Proelia de occupando ponte  
 crebra erant; nec, qui potirentur, incertis viribus,  
 satis discerni poterat. Tum eximia corporis magni-  
 tudine in vacuum pontem Gallus processit; et quan-  
 tum maxima voce potuit, *Quem nunc, inquit, Roma*  
*virum fortissimum*<sup>n)</sup> *habet, procedat, agendum, ad*  
*pugnam, ut noster duorum eventus ostendat, utra gens*  
*bello sit melior.*

X. Diu inter primores iuvenum Romanorum si-  
 lentium fuit, quum et abnuere certamen vererentur,  
 et praecipuam sortem periculi petere nollent. tum T.  
 Manlius, L. filius, qui patrem a vexatione tribuni-  
 cia vindicaverat, ex statione ad dictatorem pergit:  
*Iniussu tuo, inquit, imperator, extra ordinem num-*  
*quam pugnaverim, non si certam victoriam videam. Si*  
*tu permittis, volo ego illi belluae ostendere, quando ad-*  
*eo ferox praesultat hostium signis, me ex ea familia or-*  
*tum, quae Gallorum agmen ex rupe Tarpeia deiecit.*  
 Tum dictator, *Macte virtute, inquit, ac pietate in*  
*patrem, patriamque, T. Manli, esto. Perge, et nomen*  
*Romanum invictum, iuvantibus Diis, praesta.* Ar-  
 mant inde iuvenem aequales. pedestre scutum capit,  
 Hispano cingitur gladio, ad propiorem habili pugnam.  
 Armatum adornatumque adversus Gallum stolide lae-  
 tum, et (quoniam id quoque memoria dignum anti-  
 quis visum est) linguam etiam ab inrisu exserentem,  
 producunt. Recipiunt inde se ad stationem; et duo  
 in medio armati, spectaculi magis more, quam lege

n) *fortissimum virum* Gron. Crev.



belli, destituuntur, nequaquam visu ac specie aesti-<sup>U. c. 324.</sup>  
nantibus pares. Corpus alteri magnitudine eximium,<sup>a. C. 353.</sup>  
versicolori veste pictisque et auro caelatis refulgens  
armis: media in altero militaris statura, modicaque  
in armis habilibus magis quam decoris species. non  
cantus, non exultatio armorumque agitatio vana, sed  
pectus, animorum iraeque tacitae plenum, omnem  
ferociam in discrimen ipsum certaminis distulerat. Ubi  
constitere inter duas acies, tot circa mortalium ani-  
mis spe metuque pendentibus, Gallus, velut moles  
superne inninens, proiecto laeva scuto, in advenien-  
tis arma hostis vanum caesim cum ingenti sonitu en-  
sem deiecit. Romanus, mucrone subrecto, quum  
scuto scutum<sup>o</sup>) inum perculisset, totoque corpore  
interior periculo vulneris factus, insinuasset se inter  
corpus armaque, uno alteroque subinde ictu ventrem  
atque inguina hausit, et in spatium ingens ruentem  
porrexit hostem. iacentis inde corpus, ab omni alia  
vexatione intactum, uno torque spoliavit: quem re-  
persum cruore collo circumdedit suo. Defixerat pa-  
vor cum admiratione Gallos. Romani, alacres ab  
statione obviam militi suo progressi, gratulantes lau-  
dantesque ad dictatorem perducunt. Inter carminum  
prope modum incondita quaedam militariter ioculan-  
tes, Torquati cognomen auditum; celebratum deinde  
posteris etiam familiaeque honori fuit. Dictator co-  
ronam auream addidit donum, mirisque pro concione  
eam pugnam laudibus tulit.

XI. Et, Hercule, tanti ea ad universi belli even-  
tum momenti dimicatio fuit, ut Gallorum exercitus  
proxima nocte, relictis trepide castris, in Tiburtem  
agrum, atque inde, societate belli facta, comneatu-  
que benigne ab Tiburtibus adiutus, mox in Campa-  
niam transierit. Ea fuit caussa, cur proximo anno<sup>U. c. 395.</sup>  
C. Poetelius Balbus consul, quum collegae eius M.<sup>a. C. 357.</sup>

o) *scutum scuto* Gron Crev.<sup>1</sup>

U. c. 395. Fabio Ambusto Hernici provincia evenisset, adversus Tiburtes iussu populi exercitum duceret. ad quorum auxilium quum Galli ex Campania redissent, foedae populationes in Lavicano, Tusculanoque, et Albano agro, haud dubie Tiburtibus ducibus, sunt factae. Et, quum adversus Tiburtem hostem duce consule contenta respublica esset, Gallicus tumultus dictatorem creari coegit. creatus Q. Servilius Ahala T. Quinctium magistrum equitum dixit; et ex auctoritate Patrum, si prospere id bellum evenisset, ludos magnos vovit. Dictator, ad continendos proprio bello Tiburtes consulari exercitu iusso manere, omnes iuniores, nullo detrectante militiam, sacramento adiecit. Pugnatum haud procul porta Collina est totius viribus urbis, in conspectu parentum coniugumque ac liberorum. quae magna, etiam absentibus, hortamenta animi, tum subiecta oculis, simul verecundia misericordiaque militem accendebant. Magna utrimque edita caede, avertitur tandem acies Gallorum. fuga Tibur, sicut arcem belli Gallici, petunt: palati a consule Poetelio haud procul Tibure excepti, egressis ad opem ferendam Tiburtibus, simul cum his intra portas compelluntur. Egregie quum ab dictatore, tum ab consule res gesta est. Et consul alter Fabius proeliis primum parvis, postremo una insigni pugna, quum hostes totis adorti copiis essent, Hernicos devincit <sup>p)</sup>. Dictator, consulibus in senatu et apud populum magnifice conlaudatis, et suarum quoque rerum illis remisso honore, dictatura se abdicavit. Poetelius de Gallis Tiburtibusque geminum triumphum egit. Fabio satis visum, ut ovans urbem iniret. Inridere Poetelii triumphum Tiburtes: *Ubi enim eum secum acie conflixisse? spectatores paucos fugae trepidationisque Gallorum, extra portas egressos, postquam in se quoque fieri inpetum viderint, et sine*

p) devicit Gron. Crev.

*discrimine obvios caedi, recepisse se intra urbem. Eam* U. c. 395.  
*rem triumpho dignam visam Romanis? ne nimis mirum* a. C. 357.  
*magnumque censerent, tumultum exciere in hostium*  
*portis, maiorem ipsos trepidationem ante moenia sua*  
*visuros.*

XII. Itaque insequenti anno, M. Popillio Lae- U. c. 396.  
 nate, Cn. Manlio consulibus, primo silentio noctis a. C. 356.  
 ab Tibure agmine infesto profecti, ad urbem Romam  
 venerunt. terrorem repente ex somno excitatis subi-  
 ta res et nocturnus pavor praebuit: ad hoc multorum  
 inscitia, qui, aut unde, hostes advenissent. Con-  
 clamatum tamen celeriter ad arma est, et portae sta-  
 tionibus, murique praesidiis firmati: et ubi prima lux  
 mediocrem multitudinem ante moenia, neque alium,  
 quam Tiburtem, hostem ostendit, duabus portis  
 egressi consules utrimque aciem subeuntium iam mu-  
 ros adgrediuntur: adparuitque occasione magis, quam  
 virtute, fretos venisse. adeo vix primum inpetum  
 Romanorum sustinere. Quin etiam bono fuisse Ro-  
 manis adventum eorum constabat, orientemque iam  
 seditionem inter Patres et plebem metu tam propin-  
 qui belli compressam. Alius adventus hostium fuit  
 proximo bello, agris, quam urbi, terribilior. Popu-  
 labundi Tarquinienses fines Romanos, maxime qua  
 ex parte Etruriam adiacent, peragrare: rebusque  
 nequidquam repetitis, novi consules C. Fabius et C. U. c. 397.  
 Plautius iussu populi bellum indixere; Fabioque ea a. C. 355.  
 provincia, Plautio Hernici evenere. Gallici quoque  
 belli fama increbrescebat. Sed inter multos terrores  
 solatio fuit pax Latinis petentibus data, et magna vis  
 militum ab iis ex foedere vetusto, quod multis inter-  
 miserant annis, accepta. quo praesidio quum fulta  
 res Romana esset, levius fuit, quod Gallos mox Prae-  
 neste venisse, atque inde circa Pedum consedis-  
 se, auditum est. Dictatorem dici C. Sulpicium placuit.  
 consul ad id aditus C. Plautius dixit. magister equi-  
 tum dictatori additus M. Valerius. Ili robora mili-

U. c. 397. tum, ex duobus consularibus exercitibus electa, ad-  
 a. C. 355. versus Gallos duxerunt. Lentius id aliquanto bellum,  
 quam parti utrique placebat, fuit. quum primo Galli  
 tantum avidi certaminis fuissent, deinde Romanus  
 miles, ruendo in arma ac dimicationem, aliquantum  
 Gallicam ferociam vinceret; dictatori neutiquam pla-  
 cebat, quando nulla cogeret res, fortunae se commit-  
 tere adversus hostem, quem tempus deteriore in  
 dies et locus alienus faceret, sine praeparato commea-  
 tu, sine firmo munimento morantem. ad hoc iis ani-  
 mis corporibusque, quorum omnis in inpetu vis esset,  
 parva eadem languesceret mora. His consiliis dicta-  
 tor bellum trahebat, gravemque edixerat poenam,  
 si quis iniussu in hostem pugnasset. Milites, aegre  
 id patientes, primo in stationibus vigiliisque inter se  
 dictatorem sermonibus carpere; interdum Patres com-  
 muniter increpare, quod non iussissent per consules  
 geri bellum. *Electum esse eximium imperatorem, uni-  
 cum ducem, qui nihil agenti sibi de coelo devolaturam  
 in sinum victoriam censeat.* Eadem deinde haec inter-  
 diu propalam, ac ferociora his, iactare; *se iniussu  
 imperatoris aut dimicatueros, aut agmine Romam itu-  
 ros.* Inmiserique militibus centuriones: nec in cir-  
 culis modo fremere, sed iam in principiis ac praetorio  
 in unum sermones confundi, atque in concionis ma-  
 gnitudinem crescere turba, et vociferari ex omnibus  
 locis, *ut extemplo ad dictatorem iretur: verba pro ex-  
 exercitu faceret Sex. Tullius, ut virtute eius dignum  
 esset.*

XIII. Septimum primum pilum iam Tullius du-  
 cebat; neque erat in exercitu, qui quidem pedestria  
 stipendia fecisset, vir factis nobilior. is, praecedens  
 militum agmen, ad tribunal pergit; mirantique Sul-  
 picio non turbam magis, quam turbae principem Tul-  
 lium, imperiis obedientissimum militem, *Scilicet,  
 dictator, inquit, condemnatum se universus exercitus  
 a te ignaviae ratus, et prope ignominiae caussa desti-*



*tutum sine armis, oravit me, ut suam caussam apud* <sup>U. c. 397.</sup>  
*te agerem. Equidem, sicubi loco cessum, si terga da-* <sup>a. C. 355.</sup>  
*ta hosti, si signa foede amissa obiici nobis possent, ta-*  
*men hoc a te inpetrari aequum censerem, ut nos virtute*  
*culpam nostram corrigere, et abolere flagitii memoriam*  
*nova gloria patereris. Etiam ad Alliam fusae legiones*  
*eandem, quam per pavorem amiserant, patriam, pro-*  
*fectae postea ab Veis, virtute recuperavere. nobis,*  
*Deum benignitate, felicitate tua populique Romani, et*  
*res et gloria est integra. Quamquam de gloria vix di-*  
*cere ausim, si nos et hostes haud secus, quam foeminas,*  
*abditos intra vallum omnibus contumeliis ehidunt; et tu*  
*imperator noster, quod aegrius patimur, exercitum*  
*tuum sine animis, sine armis, sine manibus iudicas*  
*esse; et prius, quam expertus nos esses, de nobis ita*  
*desperasti, ut te mancorum ac debiliū ducem iudica-*  
*res esse. Quid enim aliud esse caussae credemus, cur*  
*veteranus dux, fortissimus bello, compressis, quod*  
*aiunt, manibus sedeas? utcumque enim se habet <sup>q)</sup> res,*  
*te de nostra virtute dubitasse videri, quam nos de tua,*  
*verius est. Sin autem non tuum istuc, sed publicum*  
*est consilium, et consensus aliquis Patrum, non Gal-*  
*licum bellum, nos ab urbe, a penetibus nostris ablega-*  
*tos tenet; quaeso, ut ea, quae dicam, non a militibus*  
*imperatorī dicta censeas, sed a plebe Patribus; quae,*  
*sicut vos vestra habeatis consilia, sic se sua habituram*  
*dicat. Quis tandem succenseat, milites nos esse, non*  
*servos vestros? ad bellum, non in exsilium, missos? si*  
*quis det signum, in aciem educat, ut viris ac Romanis*  
*dignum sit, pugnatu-ros? si nihil armis opus sit, oti-*  
*um Romae potius, quam in castris, acturos? haec di-*  
*cta sint Patribus. Te, imperator, milites tui oramus,*  
*ut nobis pugnandi copiam facias. quum <sup>r)</sup> vincere cu-*  
*pimus, tum te duce <sup>s)</sup> vincere; tibi lauream insignem*

q) habeat Gron. Crev.

s) duce te Eaed.

r) tum Eaed.

U. c. 397. *deferre; tecum triumphantes urbem inire; tuum sequen-*  
 a. C. 355. *tes currum Iovis optimi maximi templum gratantes ovan-*  
*tesque adire.* Orationem Tullii exceperunt preces  
 multitudinis; et undique, ut signum daret, ut capere  
 arma iuberet, clamabant.

XIV. Dictator, quamquam rem bonam exemplo  
 haud probabili actam cernebat, tamen facturum, quod  
 milites vellent, se recepit; Tulliumque secreto, quae-  
 nam haec res sit, aut quo acta more, percunctatur.  
 Tullius magnopere a dictatore petere, *ne se oblitum*  
*disciplinae militaris, ne sui, neve imperatoriae maie-*  
*statis, crederet: multitudini concitatae, quae ferme*  
*auctoribus similis esset, non subtraxisse se ducem; ne*  
*quis alius, quales mota creare multitudo soleret, exsi-*  
*steret. nam se quidem nihil non arbitrio imperatoris*  
*acturum. illi quoque tamen videndum magnopere esse, ut*  
*exercitum in potestate haberet. Differri non posse adeo*  
*concitados animos. ipsos sibi locum ac tempus pugnandi*  
*sumtuos, si ab imperatore non detur.* Dum haec  
 loquuntur, iumenta forte pascentia extra vallum  
 Gallo abigenti duo milites Romani ademerunt. In  
 eos saxa coniecta a Gallis: deinde ab Romana statione  
 clamor ortus, ac procursum utrinque est. Iam-  
 que haud procul iusto proelio res erant, ni celeriter  
 diremtum certamen per centuriones esset. Adfirma-  
 ta certe eo casu Tullii apud dictatorem fides est. nec  
 recipiente iam dilationem re, in posterum diem edi-  
 citur, acie pugnatuos. Dictator tamen, ut qui ma-  
 gis animis, quam viribus, fretus ad certamen descen-  
 deret, omnia circumspicere atque agitare coepit, ut  
 arte aliqua terrorem hostibus incuteret. Solerti ani-  
 mo rem novam excogitat, qua deinde multi nostri  
 atque externi imperatores, nostra quoque quidam ae-  
 tate, usi sunt. Mulis strata detrabi iubet: binisque  
 tantum centunculis relictis, agasones, partim capti-  
 vis, partim agrorum armis ornatos, inponit. His  
 fere mille effectis centum admiscet equites. et nocte

super castra in montes evadere, ac silvis se occultare U. c. 397.  
iubet: neque inde ante moveri <sup>t)</sup>), quam ab se acci- a. C. 355.  
perent signum. Ipse, ubi inluxit, in radicibus mon-  
tium extendere aciem coepit sedulo, ut adversus  
montes consisteret hostis. Instructo <sup>u)</sup> vani terroris  
adparatu, qui quidem terror plus pene veris viribus  
proffit, primo credere duces Gallorum, non descen-  
suros in aequum Romanos; deinde, ubi degressos re-  
pente viderunt, et ipsi avidi certaminis in proelium  
ruunt: priusque pugna coepit, quam signum ab du-  
cibus daretur.

XV. Acrius invasere Galli dextrum cornu: ne-  
que sustineri potuissent, ni forte eo loco dictator  
fuisset, Sex. Tullium nomine increpans rogitansque:  
*Siccine pugnatu-  
ros milites spo-  
pondisset? ubi  
illi clamores  
sint arma pos-  
centium? ubi  
minae iniussu  
imperatoris  
proelium initu-  
ros? en ipsum  
imperatorem  
clara voce vo-  
care ad proelium,  
et ire armatum  
ante prima si-  
gna. ecquis se-  
queretur eorum,  
qui modo ducturi  
fue-  
runt; in castris  
feroces, in acie  
pavidi?* Vera audie-  
bant. itaque tantos pudor stimulos admovit, ut rue-  
rent in hostium tela, alienatis a memoria periculi ani-  
mis. Illic primo inpetus prope vecors turbavit hostes:  
eques deinde emissus turbatos avertit. Ipse dictator,  
postquam labantem una parte vidit aciem, signa in  
laevum cornu confert, quo turbam hostium congre-  
gari cernebat; et iis, qui in monte erant, signum,  
quod convenerat, dedit. Ubi inde quoque novus cla-  
mor ortus, et tendere obliquo monte ad castra Gal-  
lorum visi sunt; tum metu, ne excluderentur, omis-  
sa pugna est, cursuque effuso ad castra ferebantur.  
ubi quum obcurrisset eis M. Valerius, magister equi-  
tum, (qui, profligato dextro cornu, obequitabat ho-  
stium munimentis) ad montes silvasque vertunt fu-  
gam: plurimique ibi a fallaci equitum specie agaso-

t) *movere* Crev.u) *add. iam* Gron.

U. c. 507. nibusque excepti sunt: et eorum, quos pavor pertu-  
 a. C. 355. lerat in silvas, atrox caedes post sedatum proelium  
 fuit. Nec alius post M. Furium, quam C. Sulpicius,  
 iustiore de Gallis egit triumphum. auri quoque ex  
 Gallicis spoliis satis magnum pondus, saxo quadrato  
 septum, in Capitolio sacravit. Eodem anno et a con-  
 sulibus vario eventu bellatum. nam Hernici a C. Plau-  
 tio devicti subactique sunt. Fabius collega eius in-  
 caute atque inconsulte adversus Tarquinienses pugna-  
 vit: nec in acie tantum ibi cladis acceptum, quam  
 quod trecentos septem milites Romanos captos Tar-  
 quinienses inmolarunt. qua foeditate supplicii ali-  
 quanto ignominia populi Romani insignitior fuit. Ac-  
 cessit ad eam cladem et vastatio Romani agri, quam  
 Privernates, Veliterni deinde, incursione repentina  
 fecerunt. Eodem anno duae tribus, Pomptina et  
 Publilia, additae. Ludi votivi, quos M. Furius dic-  
 tator voverat, facti: et de ambitu ab C. Poetelio  
 tribuno plebis, auctoribus Patribus, tum primum ad  
 populum latum est: eaque rogatione novorum maxi-  
 me hominum ambitionem, qui nundinas et concilia-  
 bula obire soliti erant, compressam credebant.

U. a. 508. XVI. Haud aequae laeta Patribus insequenti an-  
 a. C. 354. no, C. Marcio, Cn. Manlio consulibus, de uncia-  
 rio foenore a M. Duilio, L. Maenio tribunis plebis  
 rogatio est perlata: et plebs aliquanto eam cupidius  
 scivit accepitque. Ad bella nova, priore anno desti-  
 nata, Falisci quoque hostes exorti, duplici crimine:  
 quod et cum Tarquiniensibus iuventus eorum milita-  
 verat; et eos, qui Falerios perfugerant, quum male  
 pugnatum est, repetentibus fecialibus Romanis non  
 reddiderant. Ea provincia Cn. Manlio obvenit:  
 Marcius exercitum in agrum Privernatem, integrum  
 pace longinqua, induxit: militemque praeda imple-  
 vit. Ad copiam rerum addidit munificentiam, quod,  
 nihil in publicum secernendo, augenti rem privatam  
 militi favit. Privernates quum ante moenia sua ca-



stris permunitis consedisent; vocatis ad concionem <sup>U. c. 398.</sup>  
 militibus, *Castra nunc*, inquit, *vobis hostium, ur-* <sup>a. C. 354.</sup>  
*bemque praedae do, si mihi pollicemini, vos fortiter*  
*in acie operam navaturos, nec praedae magis, quam*  
*pugnae, paratos esse.* Signum poscunt ingenti clamore:  
 celsique et spe haud dubia feroces in proelium  
 vadunt. Ibi ante signa Sex. Tullius, de quo ante  
 dictum est, exclamat: *Adspice, imperator*, inquit,  
*quemadmodum exercitus tuus tibi promissa praestet:* pi-  
 loque posito, stricto gladio in hostem inpetum facit.  
 Sequuntur Tullium antesignani omnes, primoque in-  
 petu avertere hostem: fusum inde ad oppidum per-  
 secuti, quum iam scalas moenibus admoverent, in  
 deditionem urbem acceperunt. triumphus de Priver-  
 natibus actus. Ab altero consule nihil memorabile  
 gestum: nisi quod legem novo exemplo ad Sutrium  
 in castris tributim de vicesima eorum, qui manumit-  
 terentur, tulit. Patres, quia ea lege haud parvum  
 vectigal inopi aerario additum esset, auctores fue-  
 runt. Ceterum tribuni plebis, non tam lege, quam  
 exemplo, moti, ne quis postea populum sevocaret,  
 capite sanxerunt. nihil enim non per milites, iuratos  
 in consulis verba, quamvis perniciosum populo, si  
 id liceret, ferri posse. Eodem anno C. Licinius Sto-  
 lo a M. Popillio Laenate sua lege decem millibus ae-  
 ris est damnatus, quod mille iugerum agri cum filio  
 possideret, emancipandoque filium fraudem legi fe-  
 cisset.

XVII. Novi consules inde, M. Fabius Ambu- <sup>U. c. 399.</sup>  
 stus secundum et M. Popillius Laenas secundum <sup>a. C. 353.</sup> <sup>x)</sup>,  
 duo bella habuere. Facile alterum cum Tiburtibus,  
 quod Laenas gessit: qui, hoste in urbem compulso,  
 agros vastavit. Falisci Tarquiniensesque alterum con-  
 sulem prima pugna fuderunt, inde terror maximus  
 fuit, quod sacerdotes eorum, facibus ardentibus au-  
 guibusque praelatis, incessu furiali militem Ro-

x) iterum Gron. Crev.

U. c. 399. manum insueta turbaverunt specie: et tunc quidem  
 a. C. 353. velut lymphati et adtoniti munimentis suis trepido  
 agmine inciderunt; deinde, ubi consul <sup>y)</sup> legatique  
 ac tribuni puerorum ritu vana miracula paventes in-  
 ridebant increpabantque, vertit animos repente pu-  
 dor; et in ea ipsa, quae fugerant, velut caeci ruebant.  
 Discusso itaque vano adparatu hostium, quum in ip-  
 sos armatos se intulissent, averterunt totam aciem:  
 castrisque etiam eo die potiti, praeda ingenti parta,  
 victores reverterunt, militaribus iocis quum adpara-  
 tum hostium, tum suum increpantes pavorem. Con-  
 citatur deinde omne nomen Etruscum, et, Tarquini-  
 ensibus Faliscisque ducibus, ad Salinas perveniunt.  
 Adversus eum terrorem dictator C. Marcius Rutilus  
 primus de plebe dictus, magistrum equitum item  
 de plebe C. Plautium dixit. Id vero Patribus indi-  
 gnum videri, etiam dictaturam iam in promiscuo es-  
 se: omnique ope inpediebant, ne quid dictatori ad  
 id bellum decerneretur, parareturve. eo promptius  
 cuncta, ferente dictatore, populus iussit. Profec-  
 tus ab urbe, utraque parte Tiberis, ratibus exerci-  
 tu, quocumque fama hostium ducebat, traiecto, mul-  
 tos populatores agrorum vagos palantes obpressit. Ca-  
 stra quoque necopinato adgressus, cepit. et, octo  
 millibus hostium captis, ceteris aut caesis, aut ex agro  
 Romano fugatis, sine auctoritate Patrum, populi ius-  
 su, triumphavit. Quia nec per dictatorem plebeium,  
 nec per consulem, comitia consularia haberi vole-  
 bant, et alter consul Fabius bello retinebatur, res ad  
 interregnum redit. Interreges deinceps Q. Servi-  
 lius Ahala, M. Fabius, Cn. Manlius, C. Fabius, C.  
 Sulpicius, L. Aemilius, Q. Servilius, M. Fabius Am-  
 bustus. In secundo interregno orta contentio est, quod  
 duo patricii consules creabantur: intercedentibus-  
 que tribunis, interrex Fabius aiebat, *in duodecim ta-*  
*bulis legem esse, ut, quodcumque postremum populus*  
*y) consules Gron.*

*iussisset, id ius ratumque esset; iussum populi et suf-* U. c. 400.  
*fragia esse. Quum* <sup>z)</sup> *intercedendo tribuni nihil aliud* a. C. 352.

quam ut differrent comitia, valuissent; duo patricii consules creati sunt, C. Sulpicius Peticus tertium, M. Valerius Publicola: eodemque die magistratum inierunt.

XVIII. Quadringentesimo anno, quam urbs Romana condita erat, quinto tricesimo, quam a Gallis recuperata, oblato post undecimum annum a plebe consulatu, patricii consules ambo ex interregno magistratum iniere, C. Sulpicius Peticus tertium, M. Valerius Publicola. Empulum eo anno ex Tiburtibus haud memorando certamine captum: sive duorum consulum auspicio bellum ibi gestum est, ut scripsere quidam; seu peridem tempus Tarquiniensium quoque sunt vastati agri ab Sulpicio consule, quo Valerius adversus Tiburtes legiones duxit. Domi maius certamen consulibus cum plebe ac tribunis erat. Fidei iam suae, non solum virtutis, ducebant esse, ut acceperant duo patricii consulatum, ita ambobus patriciis mandare, quin aut toto cedendum esse, si plebeius iam magistratus consulatus fiat, aut totum possidendum, quam possessionem integram a patribus acceperant. Plebes contra fremit: *Quid se vivere, quid in parte civium censi: si, quod duorum hominum virtute, L. Sextii ac C. Licinii, partum sit, id obtinere universi non possint? Vel reges, vel decemviros, vel, si quod tristius sit imperii nomen, patiendum esse potius, quam ambos patricios consules videant, nec in vicem pareatur atque imperetur; sed pars altera, in aeterno imperio locata, plebem nusquam alio natam, quam ad serviendum, putet.* Non desunt tribuni auctores turbarum, sed inter concitatos per se omnes vix duces eminent. Aliquoties frustra in campum descensum quum esset, multique per seditiones acti comitiales dies; postremo victae perseverantia consulum plebis eo dolor erupit, ut tribunos, actum esse de libertate vociferantes, relinquendumque

z) quumque Gron. Crev.

- U. c. 400. *non campum iam solum, sed etiam urbem captam atque*  
 a. C. 532. *obpressam regno patriciorum, moesta plebs sequeretur.*

Consules, relictis a parte populi, per infrequentiam comitia nihilo segnius perficiunt. creati consules ambo patricii, M. Fabius Ambustus tertium, T. Quinctius.

- U. c. 401. In quibusdam annalibus pro T. Quinctio M. Popillium  
 a. C. 351. consulem invenio.

XIX. Duo bella eo anno prospere gesta. cum Tiburtibusque ad deditionem pugnatum. Sassula ex his urbs capta: ceteraque oppida eandem fortunam habuissent, ni universa gens, positis armis, in fidem consulis venisset. Triumphatum de Tiburtibus: alioquin mitis victoria fuit. In Tarquinienses acerbè saevitum, multis mortalibus in acie caesis. ex ingenti captivorum numero trecenti quinquaginta octo delecti, nobilissimus quisque, qui Romam mitterentur; vulgus aliud trucidatum. Nec populus in eos, qui missi Romam erant, mitior fuit. medio in foro omnes virgis caesi ac securi percussi. id pro inmolatis in foro Tarquiniensium Romanis poenae hostibus redditum. Res bello bene gestae, ut Samnites quoque amicitiam peterent, effecerunt. Legatis eorum comiter ab senatu responsum: foedere in societatem accepti. Non eadem domi, quae militiae, fortuna erat plebi Romanae. nam etsi, unciario foenore facto, levata usura erat, sorte ipsa obruebantur inopes, nexumque inibant. eo nec patricios ambo consules, neque comitiorum curam, publicave studia prae privatis incommodis plebs ad animum admittebat. Consulatus uterque apud patricos manet. Consules creati C. Sulpicius Peticus quartum, M. Valerius Publicola iterum. In bellum Etruscum intentam civitatem, quia Caeritem populum misericordia consanguinitatis Tarquiniensibus adiunctum fama ferebat, legati Latini ad Volscos convertere, nunciantes, exercitum conscriptum armatumque iam suis finibus imminere: inde <sup>a)</sup>

a) deinde Gron. Crev.



populabundos in agrum Romanum venturos esse. Cen-<sup>U. c. 402.</sup>  
suit igitur senatus, neutram neglegendam rem esse:<sup>a. C. 550.</sup>  
utroque legiones scribi, consulesque sortiri provin-  
cias iussit. Inclinauit deinde pars maior curae in Etrus-  
cum bellum; postquam literis Sulpicii consulis, cui  
Tarquinii provincia evenerat, cognitum est, depopula-  
tum agrum circa Romanas salinas, praedaeque partem  
in Caeritum fines avectam, et haud dubie iuventutem  
eius populi inter praedatores fuisse. Itaque Valerium  
consulem, Volscis obpositum, castraque ad finem Tus-  
culanum habentem, revocatum inde senatus dictato-  
rem dicere iussit. T. Manlium L. filium dixit. Is,  
quum sibi magistrum equitum A. Cornelium Cossum  
dixisset, consulari exercitu contentus, ex auctoritate  
Patrum ac populi iussu Caeritibus bellum indixit.

XX. Tum primum Caerites, tamquam in verbis  
hostium vir maior ad bellum significandum, quam in  
suis factis, qui per populationem Romanos lacessie-  
rant, esset, verus belli terror invasit: et, quam non  
suarum virium ea dimicatio esset, cernebant. Poe-  
nitebatque populationis, et Tarquinienses exsecraban-  
tur defectionis auctores. nec arma, aut bellum quis-  
quam adparare, sed pro se quisque legatos mitti iube-  
bat ad petendam erroris veniam. Legati senatum quum  
adissent, ab senatu reiecti ad populum, Deos rogave-  
runt, quorum sacra bello Gallico accepta rite procu-  
rassent, ut Romanos florentes ea sui misericordia ca-  
peret, quae se rebus adfectis quondam populi Roma-  
ni cepisset; conversique ad delubra Vestae, hospi-  
tium flaminum Vestaliumque ab se caste ac religiose  
cultum invocabant. *Eane meritos, crederet quisquam  
hostes repente sine caussa factos? aut, si quid hostiliter  
fecissent, consilio id magis, quam furore lapsos, fecis-  
se, ut sua vetera beneficia, locata praesertim apud tam  
gratos, novis conrumperent maleficiis? florentemque po-  
pulum Romanum ac felicissimum bello sibi desumerent  
hostem, cuius adflicti amicitiam cepissent? ne adpella-*

U. c. 402. *rent consilium, quae vis ac necessitas adpellanda esset.*

a. C. 350. *Transeuntes agmine infesto per agrum suum Tarquinienses, quum praeter viam nihil petissent, traxisse quosdam agrestium, populationis eius, quae sibi crimini datur, comites. Eos, seu dedi placeat, dedere se paratos esse; seu supplicio adfici, daturos poenas. Cadere, sacrarium populi Romani, deversorium sacerdotum, ac receptaculum Romanorum sacrorum, intactum inviolatumque crimine belli, hospitio Vestalium cultisque Diis darent. Movit populum non tam caussa praesens, quam vetus meritum, ut maleficii, quam beneficii, potius in memores essent. Itaque pax populo Caeriti data, induciasque in centum annos factas in senatusconsultum referri placuit. In Faliscos, eodem noxios crimine, vis belli conversa est: sed hostes nusquam inventi. Quum populatione peragrati fines essent, ab obpugnatione urbium temperatum: legionibusque Romam reductis, reliquum anni muris turribusque reficiendis consumtum, et aedes Apollinis dedicata est.*

XXI. Extremo anno comitia consularia certamen Patrum ac plebis diremit, tribunis negantibus passuros comitia haberi, ni secundum Liciniam legem haberentur; dictatore obstinato tollere potius totum e republica consulatum, quam promiscuum Patribus ac plebi facere. Prolatandis igitur comitiis quum dictator magistratu abisset, res ad interregnum rediit. Infestam inde Patribus plebem interreges quum accepissent, ad undecimum interregem seditionibus certatum est. Legis Licinae patrocinium tribuni iactabant. Propior dolor plebi foenoris ingravescentis erat curaeque privatae in certaminibus publicis erumpebant. Quorum taedio Patres L. Cornelium Scipionem interregem concordiae caussa observare legem Liciniam comitiis consularibus iussere. P. Valerio Publicolae datus e

U. c. 403. plebe collega C. Marcius Rutilus. Inclinatoris semel  
a. C. 349. in concordiam animis, novi consules, foenebrem quoque rem, quae distinere unanimos videbatur, levare

adgressi, solutionem alieni aeris in publicam curam U. c. 403.  
 verterunt; quinqueviris creatis, quos mensarios ab<sup>a.</sup> C. 549.  
 dispensatione pecuniae adpellarunt. Meriti aequi-  
 tate curaque sunt, ut per omnium annalium monu-  
 menta celebres nominibus essent. Fuere autem C.  
 Duilius, P. Decius Mus, M. Papirius, Q. Publilius,  
 et Ti. Aemilius; qui rem, difficillimam tractatu, et  
 plerumque parti utrique, semper certe alteri, gravem,  
 quum alia moderatione, tum inpendio magis publico,  
 quam iactura, sustinuerunt. tarda enim nomina, et  
 inpeditiona inertia debitorum, quam facultatibus, aut  
 aerarium, mensis cum aere in foro positis, dissolvit,  
 ut populo prius caveretur; aut aestimatio aequis re-  
 rum pretiis liberavit: ut non modo sine iniuria, sed  
 etiam sine querimoniis partis utriusque, exhausta vis  
 ingens aeris alieni sit. Terror inde vanus belli Etru-  
 sci, quum coniurasse duodecim populos fama esset,  
 dictatorem dici coegit. dictus in castris (eo enim ad  
 consules missum senatusconsultum est) C. Iulius,  
 cui magister equitum adiectus L. Aemilius. Cete-  
 rum foris tranquilla omnia fuere.

XXII. Tentatum domi per dictatorem, ut ambo U. c. 404.  
 patricii consules crearentur, rem ad interregnum per-<sup>a.</sup> C. 543.  
 duxit. duo interreges C. Sulpicius et M. Fabius in-  
 terpositi obtinere, quod dictator frustra tetenderat,  
 mitiore iam plebe ob recens meritum levati aeris alie-  
 ni, ut ambo patricii consules crearentur. creati ipse  
 C. Sulpicius Peticus, qui prior interregno abiit, et T.  
 Quinctius Pennus. quidam Kaesonem, alii Caium  
 nomen Quinctio adiiciunt. Ad bellum ambo profecti  
 Faliscum Quinctius, Sulpicius Tarquiniense, nusquam  
 acie congresso hoste, cum agris magis, quam cum ho-  
 minibus, urendo populandoque gesserunt bella: cu-  
 ius lentae velut tabis senio victa utriusque pertinacia  
 populi est, ut primum a consulibus, dein permissu  
 eorum ab senatu inducias peterent. in quadraginta  
 annos inpetraverunt. Ita, posita duorum bellorum,

U. c. 404. quae imminebant, cura, dum aliqua ab armis quies  
 a. C. 543. esset, quia solutio aeris alieni multarum rerum  
 mutaverat dominos, censum agi placuit. ceterum quum  
 censoribus creandis indicta comitia essent, professus  
 censuram se petere C. Marcius Rutilus, qui primus  
 dictator de plebe fuerat, concordiam ordinum tur-  
 bavit. quod videbatur quidem tempore alieno fecisse;  
 quia ambo tum forte patricii consules erant, qui ratio-  
 nem eius se habituros negabant. Sed et ipse constan-  
 tia inceptum obtinuit, et tribuni, omni vi recuperando  
 ius consularibus comitiis amissum, adjuverunt: et  
 quum ipsius viri maiestas nullius honoris fastigium  
 non aequabat, tum per eundem, qui ad dictaturam  
 aperuisset viam, censuram quoque in partem vocari  
 plebes volebat. Nec variatum comitiis est, quin cum  
 Manlio Cnaeo censor Marcius crearetur. Dictatorem  
 quoque hic annus habuit M. Fabium, nullo terrore  
 belli, sed ne Licinia lex comitiis consularibus obser-  
 varetur. Magister equitum dictatori additus Q. Ser-  
 vilius. nec tamen dictatura potentiores eum consen-  
 sum Patrum consularibus comitiis fecit, quam censo-  
 riis fuerat.

U. c. 405. XXIII. M. Popillius Laenas a plebe consul, a  
 a. C. 547. Patribus L. Cornelius Scipio datus. Fortuna quoque  
 inlustriorem plebeium consulem fecit. Nam quum  
 ingentem Gallorum exercitum in agro Latino castra  
 posuisse nunciatum esset; Scipione gravi morbo in-  
 plicito, Gallicum bellum Popillio extra ordinem datum.  
 Is, inpigre exercitu scripto, quum omnes extra por-  
 tam Capenam ad Martis aedem convenire armatos iu-  
 niores iussisset, signaque eodem quaestores ex aera-  
 rio deferre, quatuor expletis legionibus, quod super-  
 fuit militum, P. Valerio Publicolae praetori tradidit;  
 auctor Patribus scribendi alterius exercitus, quod ad  
 incertos belli eventus subsidium reipublicae esset.  
 Ipse, iam satis omnibus instructis comparatisque, ad  
 hostem pergit: cuius ut prius nosceret vires, quam



periculo ultimo tentaret: in tumulo, quem proximum U. c. 425.  
castris Gallorum capere potuit, vallum ducere coepit. a. C. 347.

Gens ferox et ingenii avidi ad pugnam, quum, procul visis Romanorum signis, ut extemplo proelium initura, explicuisset aciem; postquam neque in aequum demitti agmen vidit, et quum loci altitudine, tum vallo etiam integri <sup>b)</sup> Romanos, percussos pavore rata, simul opportuniore, quod intenti tum maxime operi essent, truci clamore adgreditur. Ab Romanis nec opus intermissum, (triarii erant, qui muniebant) et ab hastatis principibusque, qui pro munitioribus intenti armatique steterant, proelium initum. Praeter virtutem locus quoque superior adiuvit, ut pila omnia hastaeque non, tamquam ex aequo missa, vana (quod plerumque fit) caderent, sed omnia librata ponderibus figerentur; oneratique telis Galli, quibus aut corpora transfixa, aut praegravata inhaerentibus gerebant scuta, quum cursu pene in adversum subissent, primo incerti resistere: dein, quum ipsa cunctatio et his animos minuisset, et auxisset hosti, impulsus retro ruere alii super alios, stragemque inter se caede ipsa foediorum dare. adeo praecipiti turba obtriti plures, quam ferro necati.

XXIV. Necdum certa Romanis victoria erat. alia in campum degressis supererat moles. Namque multitudo Gallorum, sensum omnem talis damni exsuperans, velut nova rursus exoriente acie, integrum militem adversus victorem hostem ciebat. stetitque subpresso inpetu Romanus; et quia iterum fessis subeunda dimicatio erat, et quod consul, dum inter primores incautus agitatur, laevo humero matari prope traiecit, cesserat parumper ex acie. Iamque ommissa cunctando victoria erat, quum consul, vulnere adligato, reiectus ad prima signa, *Quid stas, miles?* inquit. *Non cum Latino Sabinoque hoste res est, quem victum armis socium ex hoste facias. In belluas strin-*

b) tegi Gron. Crev.

U. c. 405. *ximus ferrum. hauriendus, aut dandus est sanguis.*  
 a. C. 347. *Populistis a castris, supina valle praecipites egistis, stratis corporibus hostium superstatis. Complete eadem strage campos, qua montes replestis. Nolite expectare, dum stantes vos fugiant. inferenda sunt signa, et vadendum in hostem.* His adhortationibus iterum coorti pellunt loco primos manipulos Gallorum; cuneis deinde in medium agmen perrumpunt. Inde barbari dissipati, quibus nec certa imperia, nec duces essent, vertunt in petum in suos; fusique per campos, et praeter castra etiam sua fuga praelati, quod editissimum inter aequales tumulos obcurrerebat oculis, arcem Albanam petunt. Consul, non ultra castra insecutus, (quia et vulnus degravabat, et subiicere exercitum pugna<sup>c</sup>) fessum tumulis ab hoste occupatis nolebat) praeda omni castrorum militi data, victorem exercitum, opulentumque Gallicis spoliis, Romam reduxit. Moram triumpho vulnus consulis adtulit. eademque causa dictatoris desiderium senatui fecit, ut esset, qui aegris consulibus comitia haberet. Dictator L. Furius Camillus dictus, addito magistro equitum P. Cornelio Scipione, reddidit Patribus possessionem pristinam consulatus. ipse ob id meritum ingenti Patrum studio creatus consul, collegam Ap. Claudium Crassum dixit.

XXV. Priusquam inirent novi consules magistratum, triumphus a Popillio de Gallis actus magno favore plebis: mussantesque inter se rogitabant, *num quem plebeii consulis poeniteret?* Simul dictatorem increpabant, qui legis Liciniae spretae mercedem consulatum, privata cupiditate, quam publica iniuria, foediorem, cepisset, ut se ipse consulem dictator cre-

U. c. 406. aret. Annus multis variisque motibus fuit insignis. Galli ex Albanis motibus, quia hiemis vim patii nequiverant, per campos maritimaque loca vagi po-

c) Sublata parenthesi in Gron. *do hoste continuit; tumulis ab et Crev. legitur: pugna fessum hoste occupatis. Praeda etc. novo labori nolebat, a persequen-*

pulabantur. Mare infestum classibus Graecorum erat, U. c. 406.  
a. C. 346.  
 oraque litoris Antiatis, Laurensque tractus, et Tiberis ostia: ut praedones maritimi, cum terrestribus congressi, ancipiti semel proelio decertarint, dubiique discesserint in castra Galli, Graeci retro ad naves, victos se, an victores, putarent. Inter hos <sup>d)</sup> longe maximus existit terror, concilia populorum Latinorum ad lucum Ferentinae habita: responsumque haud ambiguum imperantibus milites Romanis datum, *absisterent imperare iis, quorum auxilio egerent. Latinos pro sua libertate potius, quam pro alieno imperio, laturos arma.* Inter duo simul bella externa defectione etiam sociorum senatus anxius, quum cerneret metu tenendos, quos fides non tenuisset, extendere omnes imperii vires consules delectu habendo iussit. Undique, non urbana tantum, sed etiam agresti iuventute, decem legiones scriptae dicuntur quaternum millium et ducentorum peditum, equitumque trecenorum. Quem nunc novum exercitum, si qua externa vis ingruat, hae vires populi Romani, quas vix terrarum capit orbis, contractae in unum haud facile efficiant: adeo in quae laboramus sola crevimus, divitias, luxuriamque. Inter cetera tristia eius anni, consul alter Ap. Claudius in ipso belli adparatu moritur: redierantque res ad Camillum; cui unico consuli, vel ob aliam dignationem haud subiiciendam dictaturae, vel ob omen faustum ad Gallicum tumultum cognominis, dictatorem adrogari haud satis decorum visum est Patribus. Consul, duabus legionibus urbi praepositis, octo cum L. Pinario praetore divisus, memor paternae virtutis, Gallicum sibi bellum extra sortem sumit: praetorem maritimam oram tutari, Graecosque arcere litoribus iussit. et, quum in agrum Pomptinum descendisset, (quia neque in campis congregi nulla cogente re volebat, et prohibendo populationibus, quos

d) haec Gron. Crev.

U. c. 406. rapto vivere necessitas cogeret, satis domari credebatur  
 a. C. 346. hostem) locum idoneum stativis delegit.

XXVI. Ubi quum stationibus quieti tempus tenerent, Gallus processit, magnitudine atque armis insignis: quatiensque scutum hasta, quum silentium fecisset, provocat per interpretem unum ex Romanis, qui secum ferro decernat. M. erat Valerius tribunus militum, adolescens, qui haud indigniorem eo decore se, quam T. Manlium, ratus, prius sciscitatus consulis voluntatem, in medium armatus processit. Minus insigne certamen humanum numine interposito Deorum factum. namque conserenti iam manum Romano corvus repente in galea consedit, in hostem versus. quod primo, ut augurium coelo missum, laetus accepit tribunus. precatus deinde, *Si divus, si diva esset, qui sibi praepetem misset, propitius adesset.* Dictu mirabile, tenuit non solum ales captam semel sedem, sed, quotiescumque certamen initum est, levans se alis, os oculosque hostis rostro et unguibus adpetiit: donec territum prodigii talis visu, oculisque simul ac mente turbatum, Valerius obtruncat. corvus e conspectu elatus orientem petit. Hactenus quietae utrimque stationes fuere. postquam spoliare corpus caesi hostis tribunus coepit, nec Galli se statione tenuerunt, et Romanorum cursus ad victorem etiam ocior fuit. Ibi, circa iacentis Galli corpus contracto certamine, pugna atrox concitatur. Iam non manipulis proximarum stationum, sed legionibus utrimque effusis res geritur. Camillus laetum militem victoria tribuni, laetum tam praesentibus ac secundis Diis, ire in proelium iubet: ostentansque insignem spoliis tribunum, *Hunc imitare, miles, aiebat; et circa iacentem ducem sterne Gallorum catervas.* Dii hominesque illi adfuere pugnae; depugnatumque haudquaquam certamine ambiguo cum Gallis est. adeo duorum militum eventum, inter quos pugnatum erat,



utraque acies animis perceperat <sup>e)</sup>). Inter primos, U. c. 406.  
 quorum concursus alios exciverat, atrox proelium <sup>a. C. 346.</sup>  
 fuit: alia multitudo, priusquam ad coniectum teli  
 veniret, terga verit. Primo per Volscos Falernum-  
 que agrum dissipati sunt: inde Apuliam ac mare in-  
 ferum <sup>f)</sup>) petierunt. Consul, concione advocata, lau-  
 datum tribunum decem bubus <sup>g)</sup>) aureaque corona do-  
 nat. ipse, iussus ab senatu bellum maritimum curare,  
 cum praetore iunxit castra. ibi, quia res trahi segni-  
 tia Graecorum non committentium se in aciem vide-  
 bantur <sup>h)</sup>), dictatorem comitiorum caussa T. Manlium  
 Torquatum ex auctoritate senatus dixit. Dictator,  
 magistro equitum A. Cornelio Cosso dicto, comitia  
 consularia <sup>i)</sup>) habuit, aemulumque decoris sui absen-  
 tem M. Valerium Corvum (id enim illi deinde co- U. c. 407.  
 gnominis fuit) summo favore populi, tres et viginti a. C. 345.  
 natum annos, consulem renunciavit. collega Corvo  
 de plebe M. Popillius Laenas quartum consul futu-  
 rus datus est. Cum Graecis a Camillo nulla memo-  
 rabilis gesta res: nec illi terra, nec Romanus mari  
 bellator erat. Postremo, quum litoribus arcerentur,  
 aqua etiam praeter cetera necessaria usui deficiente,  
 Italiam reliquere. Cuius populi ea, cuiusque gentis  
 classis fuerit, nihil certi est. maxime Siciliae fuisse  
 tyrannos crediderim. nam ulterior Graecia, ea tem-  
 pestate intestino fessa bello, iam Macedonum opeſ  
 horrebat.

XXVII. Exercitibus dimissis, quum et foris pax  
 et domi concordia ordinum otium esset, ne nimis  
 laetae res essent, pestilentia civitatem adorta coegit  
 senatum imperare decemviris, ut libros Sibyllinos in-  
 spicerent; eorumque monitu lectisternium fuit. Eo-  
 dem anno Satricum ab Antiatis colonia deducta,  
 restitutaque urbs, quam Latini diruerant. et cum

e) *praeceperat* Crev.f) *superum* Crev.g) *bobus* Gron.Crev.h) *videbatur* Eaed.i) *consularia comitia* Eaed.

U. c. 407. Karthaginiensibus legatis Romae foedus ictum, quum  
a. C. 545. amicitiam ac societatem petentes venissent. Idem

U. c. 408. otium domi forisque mansit T. Manlio Torquato, C.

a. C. 544. Plautio consulibus: semunciarium tantum ex uncia-  
rio foenus factum, et in pensiones aequas triennii,  
ita ut quarta praesens esset, solutio aeris alieni dis-  
pensata est. et sic quoque parte plebis adfecta, fides  
tamen publica privatis difficultatibus potior ad curam  
senatui fuit. Levatae maxime res, quia tributo ac  
delectu supersessum. Tertio anno post Satricum re-

U. c. 409. stitutum a Volscis, M. Valerius Corvus, secundum  
a. C. 543. consul cum C. Poetelio factus, quum ex Latio nun-

ciatum esset, legatos ab Antio circumire populos La-  
tinorum ad concitandum bellum; priusquam plus ho-  
stium fieret, Volscis arma inferre iussus, ad Satricum  
exercitu infesto pergit. quo quum Antiates aliique  
Volsci praeparatis iam ante, si quid ab Roma move-  
retur, copiis obcurrissent, nulla mora inter infensos  
diutino odio dimicandi facta est. Volsci, ferocior ad  
rebellandum, quam ad bellandum gens, certamine victi,  
fuga effusa Satrici moenia petunt. et, ne in muris quidem  
satis firma spe, quum corona militum cincta iam scalis ca-  
peretur urbs, ad quatuor millia militum, praeter  
multitudinem inbellem, sese dedidere. Oppidum  
dirutum atque incensum: ab aede tantum Matris Ma-  
iutae abstinuere ignem. Praeda omnis militi data.  
Extra praedam quatuor millia deditorum habita. eos  
vinctos consul ante currum triumphans egit: venditis  
deinde magnam pecuniam in aerarium redegit. Sunt,  
qui hanc multitudinem captivam servorum fuisse scri-  
bant: idque magis verisimile est, quam deditos ve-  
nisse.

U. c. 410. XXVIII. Hos consules secuti sunt M. Fabius

a. C. 542. Dorso, Ser. Sulpicius Camerinus. Auruncum inde  
bellum ab repentina populatione coeptum. metuque,  
ne id factum populi unius, consilium omnis nominis  
Latini esset, dictator velut adversus armatum iam

Latium L. Furius creatus, magistrum equitum Cn. U. c. 410. Maunium Capitolinum dixit. et quum, (quod per<sup>a</sup>. C. 342. magnos tumultus fieri solitum erat) iustitio indicto, delectus sine vacationibus habitus esset; legiones, quantum maturari potuit, in Auruncos ductae. ibi praedonum magis, quam hostium, animi inventi. Prima itaque acie debellatum est<sup>k</sup>). Dictator tamen, quia et ultro bellum intulerant, et sine detrectatione se certamini obferebant, Deorum quoque opes adhibendas ratus, inter ipsam dimicationem aedem Iunoni Monetae vovit: cuius damnatus voti quum victor Romam revertisset, dictatura se abdicavit. Senatus duumviros ad eam aedem pro amplitudine populi Romani faciendam creari iussit. locus in arce destinatus, quae area aedium M. Manlii Capitolini fuerat. Consules, dictatoris exercitu ad bellum Volsicum usi, Soram ex hostibus, incautos adorti, ceperunt. Anno post, quam vota erat, aedes Monetae<sup>U. c. 411.</sup> dedicatur, C. Marcio Rutilo tertium, T. Manlio Tor-<sup>a. C. 341.</sup> quato secundum consulibus. Prodigium extemplo dedicationem secutum, simile vetusto montis Albani prodigio. namque et lapidibus pluit, et nox interdiu visa intendi: librisque inspectis, quum plena religione civitas esset, senatui placuit, dictatorem feriarum constituendarum caussa dici. Dictus P. Valerius Publicola. magister equitum ei Q. Fabius Ambustus datus est. Non tribus tantum supplicatum ire placuit, sed finitimos etiam populos; ordoque iis, quo quisque die supplicarent, statutus. Iudicia eo anno populi tristia in foeneratores facta, quibus ab aedilibus dicta dies esset, traduntur. Et res, haud ulla insigni ad memoriam caussa, ad interregnum rediit. Ex interregno, ut id actum videri posset, ambo patricii consules creati sunt, M. Valerius Corvus ter-<sup>U. c. 412.</sup> tium, A. Cornelius Cossus. <sup>a. C. 340.</sup>

k) est del. Gron. Crev.

U. c. 412.

a. C. 340.

XXIX. Maiora iam hinc bella, et viribus hostium, et longinquitate vel regionum, vel temporum spatio, quibus bellatum est, dicentur. namque eo anno adversus Samnites, gentem opibus armisque validam, mota arma. Samnitium bellum, ancipiti Marte gestum, Pyrrhus hostis, Pyrrhum Poeni secuti. Quanta rerum moles? quoties in extrema periculorum ventum, ut in hanc magnitudinem, quae vix sustinetur, erigi imperium posset? Belli autem caussa cum Samnitibus, Romanis, quum societate amicitiaque iuncti essent, extrinsecus venit; non orta inter ipsos est. Samnites Sidicinis iniusta arma, quia viribus plus poterant, quum intulissent, coacti inopes ad opulentiorum auxilium confugere, Campani sese coniungunt. Campani magis nomen ad praesidium sociorum, quam vires, quum adtulissent, fluentes luxu ab duratis usu armorum in Sidicino pulsus agro, in se deinde molem omnem belli vertunt. namque Samnites, omissis Sidicinis, ipsam arcem finitimorum Campanos adorti, unde aequae facilis victoria, praedae atque gloriae plus esset, Tifata, inminentes Capuae colles, quum praesidio firmo occupassent, descendunt inde quadrato agmine in planitiem, quae Capuam Tifataque interiacet. ibi rursus acie dimicatum: adversoque proelio Campani intra moenia compulsi, quum, robore iuventutis suae adciso, nulla propinqua spes esset, coacti sunt ab Romanis petere auxilium.

XXX. Legati, introducti in senatum, maxime in hanc sententiam locuti sunt: *Populus nos Campanus legatos ad vos, Patres conscripti, misit; amicitiam in perpetuum, auxilium praesens a vobis petitur, quam si secundis rebus nostris petissemus, sicut coepta celerius, ita infirmiore vinculo contracta esset. tunc enim, ut qui ex aequo nos venisse in amicitiam meminissemus, amici forsitan pariter ac nunc, subiecti atque obnoxii vobis minus essemus. nunc, misericordia*



*vestra conciliati, auxilioque in dubiis rebus defensi, U. c. 412.*  
*beneficium quoque acceptum colamus, oportet; ne in-*<sup>a. C. 310.</sup>  
*grati atque omni ope divina humanaque indigni videamur.* Neque, Hercule, quod Samnites priores amici  
*sociique vobis facti sunt, ad id valere arbitror, ne nos*  
*in amicitiam accipiamur: sed ut vetustate et gradu ho-*  
*noris nos praestent. neque enim foedere Samnitium, ne*  
*qua nova iungeretis foedera, cautum est. Fuit quidem*  
*apud vos semper satis iusta causa amicitiae, velle eum*  
*vobis amicum esse, qui vos adpeteret. Campani, etsi*  
*fortuna praesens magnifice loqui prohibet, non urbis*  
*amplitudine, non agri ubertate, ulli populo<sup>1)</sup> prae-*  
*terquam vobis cedentes, haud parva (ut arbitror) ac-*  
*cessio bonis rebus vestris in amicitiam venimus vestram.*  
*Aequis Volscisque, aeternis hostibus huius urbis, quan-*  
*do cumque se moverint, ab tergo erimus: et, quod vos*  
*pro salute nostra priores feceritis, id nos pro imperio*  
*vestro et gloria semper faciemus. Subactis iis gentibus*  
*quae inter nos vosque sunt, quod propediem futurum*  
*respondet et virtus et fortuna vestra, continens imperium*  
*usque ad nos habebitis. Acerbum ac miserum est, quod*  
*fateri nos fortuna nostra cogit. Eo ventum est, Pa-*  
*tres conscripti, ut aut amicorum, aut inimicorum Cam-*  
*piani simus. Si defenditis, vestri: si deseritis, Sam-*  
*nitium erimus. Capuam ergo et Campaniam omnem*  
*vestris an Samnitium viribus adcedere malitis, deli-*  
*berate. Omnibus quidem, Romani, vestram miseri-*  
*cordiam, vestrumque auxilium aequum est patere; iis*  
*tamen maxime, qui, eam inplorantibus aliis auxilium*  
*idum supra vires suas praestant, omnes ipsi in hanc ne-*  
*cessitatem venerunt. quamquam pugnavimus verbo pro*  
*Sidicinis, re pro nobis, quum videremus finitimum po-*  
*polum nefario latrocinio Samnitium peti; et, ubi con-*  
*flagrassent Sidicini, ad nos traiecturum illud incen-*  
*dium esse. Nec enim nunc, quia dolent iniuriam ac-*

1) populo ulli Crev.

U. c. 412. *ceptam Samnites, sed quia gaudent oblatam sibi esse*  
 a. C. 540. *caussam, obpugnatum nos veniunt. An, si ultio irae*  
*haec, et non occasio cupiditatis explendae esset, parum*  
*fuit, quod semel in Sidicino agro, iterum in Campa-*  
*nia ipsa legiones nostras cecidere? Quae est ista tam*  
*infesta ira, quam per duas acies fusus sanguis explere*  
*non potuerit? Adde huc populationem agrorum, prae-*  
*das hominum atque pecudum actas, incendia villarum*  
*ac ruinas, omnia ferro ignique vastata. Hiscine<sup>m)</sup>*  
*ira expleri non potuit? Sed cupiditas explenda est. ea*  
*ad obpugnandam Capuam rapit. aut delere urbem pul-*  
*cherrimam, aut ipsi possidere volunt. Sed vos potius,*  
*Romani, beneficio vestro occupate eam, quam illos*  
*habere per maleficiū sinatis. Non loquor apud recu-*  
*santem iusta bella populum; sed tamen, si ostenderitis*  
*auxilia vestra, ne bello quidem arbitror vobis opus fore.*  
*Usque ad nos contemptus Samnitium pervenit, supra non*  
*escendit<sup>n)</sup>. Itaque umbra vestri auxilii, Romani, tegi*  
*possumus: quidquid deinde habuerimus, quidquid ipsi*  
*fuerimus, vestrum id omne existimaturi. Vobis ara-*  
*bitur ager Campanus; vobis Capua urbs frequentabi-*  
*tur: conditorum, parentum, Deorum immortalium nu-*  
*mero nobis eritis. Nulla colonia vestra erit, quae nos*  
*obsequio erga vos fideque superet. Adnuite, Patres*  
*conscripti, nutum numenque vestrum invictum Campa-*  
*nis, et iubete sperare, incolumem Capuam futuram.*  
*Qua frequentia omnium generum multitudinis prose-*  
*quente creditis nos illinc profectos? quam omnia voto-*  
*rum lacrimarumque plena reliquisse? in qua nunc ex-*  
*spectatione senatum populumque Campanum, coniuges,*  
*liberosque nostros esse? Stare omnem multitudinem ad*  
*portas, viam hinc ferentem prospectantes, certum ha-*  
*beo, quid illis nos, Patres conscripti, sollicitis ac pen-*  
*dentibus animi renunciare iubeatis. Alterum respon-*  
*sum salutem, victoriam, lucem, ac libertatem; alte-*

m) *hiscene* Gron.n) *ascendit* Crev.

*um ominari horreo, quae ferat. Proinde ut aut de* U. c. 412.  
*vestris futuris sociis atque amicis, aut nusquam ullis* a. C. 340.  
*uturis nobis, consulite.*

XXXI. Submotis deinde legatis, quum consul-  
 us senatus esset, etsi magnae parti urbs maxima  
 opulentissimaque Italiae, uberrimus ager marique  
 propinquus ad varietates annonae horreum populi  
 Romani fore videbatur; tamen tanta utilitate fides  
 antiquior fuit, responditque ita ex auctoritate sena-  
 tus consul: *Auxilio vos, Campani, dignos censet sena-*  
*tus: sed ita vobiscum amicitiam institui par est, ne*  
*qua vetustior amicitia ac societas violetur. Samnites*  
*vobiscum foedere iuncti sunt. itaque arma, Deos prius,*  
*quam homines, violatura, adversus Samnites vobis ne-*  
*gamus. Legatos, sicut fas iusque est, ad socios atque*  
*amicos precatum mittemus, ne qua vobis vis fiat. Ad*  
*ea princeps legationis, (sic enim domo mandatum*  
*adtulerant) Quandoquidem, inquit, nostra tueri adver-*  
*sus vim atque iniuriam iusta vi non vultis, vestra certe*  
*defendetis. Itaque populum Campanum, urbemque Ca-*  
*puam, agros, delubra Deum, divina humanaque omnia*  
*in vestram, Patres conscripti, populiue Romani di-*  
*tionem dedimus; quidquid deinde patiemur, dediticii*  
*vestri passuri.* Sub haec dicta omnes, manus ad con-  
 sules tendentes, pleni lacrimarum in vestibulo cu-  
 riae procubuerunt. Commoti Patres vice fortunarum  
 humanarum, si ille praepotens opibus populus, lu-  
 xuria superbiaque clarus, a quo paullo ante auxilium  
 finitimi petissent, adeo infractos gereret animos, ut  
 se ipse suaque omnia potestatis alienae faceret: tum  
 iam fides agi visa, deditos non prodi, nec facturum  
 aequa Samnitium populum censebant, si agrum ur-  
 bemque, per deditionem factam populi Romani, ob-  
 pugnarent. Legatos itaque extemplo mitti ad Sam-  
 nites placuit. data mandata, *ut preces Campanorum,*  
*responsum senatus amicitiae Samnitium memor, dediti-*  
*onem postremo factam, Samnitibus exponerent. Pete-*

U. c. 412. *rent pro societate amicitiaque, ut dediticiis suis parcerent*: neque in eum agrum, qui populi Romani factus esset, hostilia arma inferrent. Si leniter agendo parum proficerent, denunciarent Samnitibus populi Romani senatusque verbis, ut Capua urbe Campanoque agro abstinerent. Haec legatis agentibus in concilio Samnitium adeo est ferociter responsum, ut non solum gesturos se esse dicerent id bellum, sed magistratus eorum e curia egressi, stantibus legatis, praefectos cohortium vocarent; iisque clara voce imperarent, ut praedatum in agrum Campanum extemplo proficiscerentur.

XXXII. Hac legatione Romam relata, positus omnium aliarum rerum curis, Patres, fecialibus ad res repetendas missis, belloque, quia non redderentur, sollemni more indicto, decreverunt, ut primo quoque tempore de ea re ad populum ferretur: iussuque populi consules ambo cum duobus ab urbe exercitibus profecti, Valerius in Campaniam, Cornelius in Samnium, ille ad montem Gaurum, hic ad Saticulam castra ponunt. Priori Valerio Samnitium legiones (eo namque omnem belli molem inclinaturam censebant) obcurrunt. simul in Campanos stimulabat ira tam promptos nunc ad ferenda, nunc ad arcessenda adversus se auxilia. Ut vero castra Romana viderunt, ferociter pro se quisque signum duces poscere adfirmare, eadem fortuna Romanum Campano latum opem, qua Campanus Sidicino tulerit. Valerius, evibus certaminibus, tentandi hostis caussa, haud ita multos moratus dies, signum pugnae proposuit, paucis suos adhortatus: *Ne novum bellum eos novusque hostis terreret. quidquid ab urbe longius proferrent arma, magis magisque in inbelles gentes eos prodire. Ne Sidicinorum Campanorumque cladibus Samnitium aestimarent virtutem. qualescumque inter se certaverint, necesse fuisse alteram partem vinci. Campanos quidem haud dubie magis nimio luxu fluentibus rebus mollitia-*



*que sua, quam vi hostium, victos esse. Quid autem es-* U. c. 412.  
*se duo prospera in tot seculis bella Samnitium adversus* a. C. 340.  
*tot decora populi Romani, qui triumphos pene plures,*  
*quam annos ab urbe condita numeret? qui omnia circa*  
*se, Sabinos, Etruriam, Latinos, Hernicos, Aequos,*  
*Volscos, Auruncos, domita armis habeat? qui Gallos,*  
*tot proeliis caesos, postremo in mare ac naves fuga com-*  
*pulerit? Quum gloria belli ac virtute sua quemque fre-*  
*tos ire in aciem debere, tum etiam intueri, cuius ductu*  
*auspicioque ineunda pugna sit. utrum qui audiendus*  
*dumtaxat magnificus adhortator sit, verbis tantum fe-*  
*rox, operum militarium experts: an qui et ipse tela tra-*  
*ctare, procedere ante signa, versari media in mole pug-*  
*nae sciat. Facta mea, non dicta, vos, milites, inquit,*  
*sequi volo; nec disciplinam modo sed exemplum etiam*  
*a me petere. Non factionibus modo nec per coitiones*  
*usitatas nobilibus, sed hac dextra, mihi tres consulatus*  
*summamque laudem peperit. Fuit, quum hoc dici po-*  
*terat: Patricius enim eras, et a liberatoribus patriae*  
*ortus: et eodem anno familia ista consulatum, quo urbs*  
*haec consulem habuit. Nunc iam nobis Patribus vobis-*  
*que plebeiis promiscuus consulatus patet, nec generis, ut*  
*ante, sed virtutis est praemium. proinde summum quod-*  
*que spectate, milites, decus. Non, si mihi novum hoc*  
*Corvi cognomen Diis auctoribus homines dedistis, Pub-*  
*licolarum vetustum familiae nostrae cognomen memo-*  
*ria excessit. Semper ego plebem Romanam militiae do-*  
*mique privatus, in magistratibus parvis magnisque, ae-*  
*que tribunus ac consul, eodem tenore per omnes*  
*deinceps consulatus colo atque colui. nunc, quod in-*  
*stat, Diis bene iuvantibus, novum atque integrum de*  
*Samnitibus triumphum mecum petite.*

XXXIII. Non alias militi familiarior dux fuit,  
 omnia inter infimos militum haud gravate munia obe-  
 undo. In ludo praeterea militari, quum velocitatis  
 viriumque inter se aequales certamina ineunt comi-  
 ter facilis vincere ac vinci vultu eodem; nec quem-

U. c. 412. quam adspernari parem, qui se obferret; factis benignus pro re, dictis haud minus libertatis alienae, quam suae dignitatis, memor; et quo nihil popularius est, quibus artibus petierat magistratus, iisdem gerebat. Itaque universus exercitus, incredibili alacritate adhortationem prosecutus ducis, castris egreditur. Proelium, ut quod maxime umquam, pari spe, utrimque aequis viribus, cum fiducia sui, sine contemptu hostium, commissum est. Samnitibus ferociam augebant novae res gestae et paucos ante dies geminata victoria; Romanis contra quadringentorum annorum decora et conditae urbi aequalis victoria: utrisque tamen novus hostis curam addebat. pugna indicio fuit, quos gesserint animos. namque ita conflixerunt, ut aliquamdiu in neutram partem inclinarent acies. Tum consul, trepidationem iniiciendam ratus, quando vi pelli non poterant, equitibus inmissis turbare prima signa hostium conatur. quos ubi nequidquam tumultuantes in spatio exiguo volvere turmas vidit, nec posse aperire in hostes viam, revectus ad antesignanos legionum, quum desilisset ex equo, *Nostrum, inquit, peditum illud, milites, est opus. agitedum, ut me videritis, quacumque incessero in aciem hostium, ferro viam facientem, sic pro se quisque obvios sternite. Illa omnia, quae nunc erectae micant hastae, patefacta strage vasta cernetis.* Haec dicta dederat, quum equites consulis iussu discurrunt in cornua, legionibus in mediam aciem aperiant viam. Primus omnium consul invadit hostem; et, cum quo forte contulit gradum, obtruncat. Hoc spectaculo accensi dextra laevaue, ante se quisque, memorandum proelium cient<sup>o</sup>). Stant obnisi Samnites, quamquam plura accipiunt, quam inferunt, vulnera. Aliquamdiu iam pugnatum erat: atrox caedes circa signa Samnitium, fuga ab nulladum parte erat adeo morte sola vinci destinaverant animis. Ita-

que Romani, quum et fluere <sup>p)</sup> iam lassitudine vires <sup>U. c. 412.</sup> sentirent et diei haud multum superesset <sup>q)</sup>, accensi <sup>a. C. 340.</sup> ira concitant se in hostem. Tum primum referri pedem atque inclinari rem in fugam adparuit; tum capi, occidi Samnis. nec superfuissent multi, ni nox victoriam magis, quam proelium, diremisset. Et Romani fatebantur, numquam cum pertinacior hoste conflictum: et Samnites, quum quaereretur, quaenam prima caussa tam obstinatos movisset in fugam? *oculos sibi Romanorum ardere visos, aiebant, vesanosque vultus et furentia ora: inde plus, quam ex alia ulla re, terroris ortum.* quem terrorem non pugnae solum eventu, sed nocturna profectione, confessi sunt. Postero die vacuis hostium castris Romanus potitur: quo se omnis Campanorum multitudo gratulabunda effudit.

XXXIV. Ceterum hoc gaudium magna prope clade in Samnio foedatum est. nam ab Saticula profectus Cornelius consul exercitum incaute in saltum, cava valle pervium, circaque insessum ab hoste, induxit: nec prius, quam recipi tuto signa non poterant, imminentem capiti hostem vidit. Dum id morae Samnitibus est, quoad totum in vallem infimam demitteret <sup>r)</sup> agmen, P. Decius tribunus militum conspiciit unum editum in saltu collem, imminentem hostium castris, aditu arduum inpedito agmini, expeditis haud difficilem. Itaque consuli territo animi, *Videsne tu, inquit, A. Corneli, cacumen illud supra hostem? Arx illa est spei salutisque nostrae, si eam, quam caeci reliquere Samnites, inpigre capimus. Ne* <sup>s)</sup> *tu mihi plus, quam unius legionis principes hastatosque, dederis. cum quibus ubievasero in summum, perge hinc omni liber metu, teque et exercitum serva. neque enim moveri hostis, subiectus nobis ad omnes ictus, sine sua pernicie poterit. Nos deinde aut fortuna populi Romani, aut nostra virtus expedit.* Conlaudatus ab consule, accepto prae-

p) quum effluere Gron.

r) demitterent Gron. c. Drak.

q) superesse Gron. Crev.

s) nec Gron. Crev.

U. c. 412. sidio, vadit occultus persaltum; nec prius ab hoste est  
 a. C. 340. visus, quam loco, quem petebat, adpropinquavit. Inde  
 admiratione paventibus cunctis, quum omnium in se  
 vertisset oculos, et spatium consuli dedit ad subdu-  
 cendum agmen in aequiorem locum, et ipse in summo  
 constitit vertice. Samnites, dum huc illuc signa ver-  
 tunt, utriusque rei amissa occasione, neque insequi con-  
 sulem, nisi per eandem vallem, in qua paullo ante sub-  
 iectum eum telis suis habuerant, possunt; nec erigere  
 agmen in captum super se ab Decio tumultum. Sed  
 quum ira in hos magis, qui fortunam gerendae rei eri-  
 puerant, tum propinquitas loci atque ipsa paucitas in-  
 citat: et nunc circumdare undique collem armatis vo-  
 lunt, ut a consule Decium intercludant; nunc viam pa-  
 tefacere, ut degressos in vallem adoriantur. incertos  
 quid agerent, nox obpressit. Decium primum spes  
 tenuit, cum subeuntibus in adversum collem ex supe-  
 riore loco se pugnaturum: deinde admiratio incsesit,  
 quod nec pugnam inirent, nec, si ab eo consilio iniqui-  
 tate loci deterrerentur, opere se valloque circumda-  
 rent. Tum centurionibus ad se vocatis, *Quaenam illa  
 inscitia belli ac pigritia est? aut quonam modo isti ex  
 Sidicinis Campanisque victoriam pepererunt? Huc at-  
 que illuc signa moveri, ac modo in unum conferri, modo  
 educi videtis. opus quidem incipit nemo, quum iam cir-  
 cumdati vallo potuerimus esse. Tum vero nos similes  
 istorum simus, si diutius hic moremur, quam commo-  
 dum sit. Agitedum, ite mecum; ut, dum lucis aliquid  
 superest, quibus locis praesidia ponant, qua pateat hinc  
 exitus, exploremus.* Haec omnia sagulo gregali ami-  
 ctus, centurionibus item manipularium militum habitu  
 ductis, ne ducem circumire hostes notarent, perlus-  
 travit.

XXXV. Vigiliis deinde dispositis, ceteris omni-  
 bus tesseram dari iubet: *ubi secundae vigiliae bucci-  
 na datum signum esset, armati cum silentio ad se con-*



venirent <sup>t)</sup>). Quo ubi, sicut edictum erat, taciti con- U. c. 412.  
venerunt, *Hoc silentium, milites, inquit, omisso mili-* a. C. 340.  
*tari adsensu, in me audiendo servandum est. ubi sen-*  
*tentiam meam vobis peregero, tum, quibus eadem place-*  
*bunt, in dextram partem taciti transibitis: quae pars*  
*maior erit, eo stabitur consilio. Nunc, quae mente agi-*  
*tem, audite. Non fuga delatos, nec inertia relictos hic*  
*vos circumvenit hostis. virtute cepistis locum; virtute*  
*hinc, oportet, evadatis. Veniendo huc exercitum egre-*  
*gium populi Romani servastis; erumpendo hinc vosmet*  
*ipsos servate. digni estis, qui pauci pluribus opem tuler-*  
*itis, ipsi nullius auxilio egueritis. Cum eo hoste res*  
*est, qui hesterno die delendi omnis exercitus fortuna per*  
*socordiam usus non sit; hunc tam opportunum collem*  
*inminentem capiti suo non ante viderit, quam captum*  
*a nobis; nos tam paucos tot ipsi millibus hominum nec*  
*adscensu arcuerint; nec tenentes locum, quum diei tan-*  
*tum superesset, vallo circumdederint. quem videntem ac*  
*vigilantem sic eluseritis, sopitum, oportet, fallatis;*  
*immo necesse est. In eo enim loco res sunt nostrae, ut*  
*vobis eo magis necessitatis vestrae index, quam consilii*  
*auctor, sim. neque enim, maneatis, an abeat hinc,*  
*deliberari potest; quum, praeter arma et animos armo-*  
*rum memores, nihil vobis fortuna reliqui fecerit, fame-*  
*que et siti moriendum sit, si plus, quam viros ac Ro-*  
*manos decet, ferrum timeamus. Ergo una est salus*  
*erumpere hinc atque abire. id aut interdiu aut nocte fa-*  
*ciamus, oportet. Ecce autem aliud minus dubium.*  
*quippe si lux exspectetur, quae spes est, non vallo perpe-*  
*tuo fossaque nos septurum hostem? qui nunc corporibus*  
*suis subiectis undique cinxerit, ut videtis, collem. At-*  
*qui, si nox opportuna est eruptioni, sicut est, haec pro-*  
*fecto noctis aptissima hora est. Signo secundae vigi-*  
*liae convenistis, quod tempus mortales somno altissimo*  
*premit. per corpora sopita vadetis; vel silentio incautos*  
*fallentes, vel sentientibus clamore subito pavorem inie-*

t) venirent Gron. Crev.

U. c. 4<sup>12</sup>. *cturi. Me modo sequimini, quem secuti estis. ego eam-*  
 a. C. 3<sup>10</sup>. *dem, quae duxit huc, sequar fortunam. Quibus haec*  
*salutaria videntur, agitedum, in dextram partem pedi-*  
*bus transite.*

XXXVI. Omnes transierunt, videntemque per intermissa custodiis loca Decium secuti sunt. Iam evaserant media castra, quum superscandens vigilum strata somno corpora miles offenso scuto praebuit sonitum. quo excitatus vigil quum proximum movisset, erectique alios concitarent, ignari cives an hostes essent, praesidium erumperet, an consul castra cepisset: Decius, quum non fallerent, clamorem tollere iussis militibus, torpidos somno insuper pavore exanimat; quo praepediti, nec arma inpigre capere, nec obsistere, nec insequi poterant. Inter trepidationem tumultumque Samnitium, praesidium Romanum, obviis custodibus caesis, ad castra consulis pervadit. Aliquantum supererat noctis, iamque in tuto videbantur esse; quum Decius, *Macti virtute*, inquit, *militēs Romanī, este. vestrum iter ac reditum omnia secula laudibus ferent. Sed ad conspiciendam tantam virtutem luce ac die opus est. nec vos digni estis, quos cum tanta gloria in castra reduces silentium ac nox tegat. hic lucem quieti opperiamur.* Dictis obtemperatum. atque ubi primum inluxit, praemisso nuncio ad consulem in castra, ingenti gaudio concitantur: et, tessera data, incolumes reverti, qui sua corpora pro salute omnium haud dubio periculo obiecissent, pro se quisque obviam effusi laudant, gratulantur, singulos universosque servatores suos vocant: Diis laudes gratesque agunt, Decium in coelum ferunt. Hic Decii castrensium triumphus fuit, incedentis per media castra cum armato praesidio, coniectis in eum omnium oculis, et omni honore tribunum consuli aequantibus. Ubi ad praetorium ventum est, consul classico ad concionem convocat: orsusque meritis Decii laudes, interfante ipso Decio, distulit concionem: qui auctor omnia postha-

bendi, dum occasio in manibus esset, perpulit consu-<sup>U. c. 412.</sup>  
 lem, ut hostes, et nocturno pavore adtonitos, et circa<sup>a. C. 510.</sup>  
 collem castellatim dissipatos, adgrederetur. credere et-  
 iam aliquos, ad se sequendum emissos, per saltum va-  
 gari. Iussae legiones arma capere: egressaeque ca-  
 stris, quum per exploratores notior iam saltus esset, via  
 patientiore ad hostem ducuntur. quem incautum in-  
 proviso adortae, quum palati passim Samnitium mili-  
 tes, plerique inermes, nec coire in unum, nec arma  
 capere, nec recipere intra vallum se possent, paven-  
 tem primum in castra compellunt: deinde castra ipsa,  
 turbatis stationibus, capiunt. Perfertur circa collem cla-  
 mor: fugatque ex suis quemque praesidiis. ita magna  
 pars absenti hosti cessit. quos intra vallum egerat pa-  
 vor, (fuere autem ad triginta millia) omnes caesi; ca-  
 stra direpta.

XXXVII. Ita rebus gestis, consul, advocata con-  
 cione, P. Decii non coeptas solum ante, sed cumulas  
 nova virtute laudes peragit: et praeter militaria alia  
 dona, aurea corona eum et centum bubus <sup>u)</sup>, eximio-  
 que uno albo opimo auratis cornibus, donat. Milites,  
 qui in praesidio simul fuerant, duplici frumento in  
 perpetuum, in praesentia singulis bubus binisque privis  
 tunicis donati. Secundum consulis donationem legio-  
 nes gramineam coronam obsidionalem, clamore do-  
 num adprobantes, Decio inponunt. altera corona,  
 eiusdem honoris index, a praesidio suo inposita est.  
 His decoratus insignibus bovem eximium Marti in-  
 molavit; centum boves militibus dono dedit, qui se-  
 cum in expeditione fuerant. iisdem militibus legiones  
 libras farris et sextarios vini contulerunt: omniaque  
 ea ingenti alacritate per clamorem militarem, indicem  
 omnium adsensus, gerebantur. Tertia pugna ad  
 Suessulam commissa est: qua fugatus a M. Valerio  
 Sannitium exercitus, omni robore iuventutis dono

<sup>u)</sup> *bobus* et sic deinceps Gron. Crev.

U. c. 412. adcito, certamine ultimo fortunam experiri statuit.  
 a. C. 340. Ab Suessula nuncii trepidi Capuam, inde equites citati ad Valerium consulem, opem oratum, veniunt. Con-  
 festim signa mota: relictisque inpedimentis castro-  
 rum valido praesidio, raptim agitur agmen: nec pro-  
 cul ab hoste locum perexiguum (ut quibus, praeter  
 equos, ceterorum iumentorum calonumque turba abes-  
 set) castris cepit. Samnitium exercitus, velut haud  
 ulla mora pugnae futura esset, aciem instruit: deinde,  
 postquam nemo obvius ibat, infestis signis ad castra  
 hostium succedit. ibi ut militem in vallo vidit, missi-  
 que ab omni parte exploratum, quam in exiguum or-  
 bem contracta castra essent, paucitatem inde hostium  
 colligentes, retulerunt; fremere omnis acies, com-  
 plendas esse fossas scindendumque vallum, et in castra  
 irrumpendum. transactumque ea temeritate bellum  
 foret, ni duces continuissent inpetum militum. Ce-  
 terum, quia multitudo sua commeatibus gravis, et  
 prius sedendo ad Suessulam, et tum <sup>x</sup>) certaminis  
 mora, haud procul ab rerum omnium inopia esset;  
 placuit, dum inclusus paveret hostis, frumentatum per  
 agros militem duci. interim et Romano, qui expeditus,  
 quantum humeris inter arma geri posset frumenti, se-  
 cum adtulisset, defutura omnia. Consul palatos per  
 agros quum vidisset hostes, stationes infrequentes re-  
 lictas, paucis milites adhortatus, ad castra obpugnanda  
 ducit. quae quum primo clamore atque inpetu cepis-  
 set, pluribus hostium in tentoriis suis, quam in portis  
 valloque, caesis, signa captiva in unum locum con-  
 ferri iussit; relictisque duabus legionibus custodiae et  
 praesidii caussa, gravi edicto monitis, ut, donec ipse  
 revertisset, praeda abstinerent; profectus agmine in-  
 structo, quum praemissus eques velut indagine dissi-  
 patos Samnites ageret, caedem ingentem fecit. nam  
 neque quo signo coirent inter se, neque, utrum ca-

x) *tunc* Gron. Crev.



stra peterent, an longiorem intenderent fugam, terri- U. c. 412.  
tis constare poterat. Tantumque fugae ac formidinis a. C. 340.  
fuit, ut ad quadraginta millia scutorum, nequaquam tot  
caesis, et signa militaria cum iis, quae in castris ca-  
pta erant, ad centum septuaginta ad consulem de-  
ferrentur. Tum in castra hostium reditum: ibique  
omnis praeda militi data.

XXXVIII. Illius certaminis fortuna et Fali-  
scos, quum in induciis essent, foedus petere ab senatu  
coegit; et Latinos, iam exercitibus comparatis, ab  
Romano in Pelignum vertit bellum. Neque ita rei  
gestae fama Italiae se finibus tenuit, sed Karthagi-  
nienses quoque legatos gratulatum Romam misere cum  
coronae aureae dono, quae in Capitolio in Iovis cella  
poneretur. fuit pondo viginti quinque. Consules am-  
bo de Samnitibus triumpharunt, sequente Decio in-  
signi cum laude donisque: quum incondito militari  
ioco haud minus tribuni celebre nomen, quam con-  
sulum, esset. Campanorum deinde Suessulanorum-  
que y) auditaee legationes: precantibusque datum, ut  
praesidium eo in hiberna mitteretur, quo Samnitium  
excursiones arcerentur. Iam tum minime salubris mi-  
litari disciplinae Capua instrumento omnium volupta-  
tium z) delentis militum animos avertit a memoria  
patriae: inibanturque consilia in hibernis eodem sce-  
lere adimendae Campanis Capuae, per quod illi eam  
antiquis cultoribus ademissent: *neque inmerito suum  
ipsorum exemplum in eos versurum. Cur autem potius  
Campani agrum Italiae uberrimum, dignam agro urbem,  
qui nec se nec sua tutari possint, quam victor exercitus  
haberet, qui suo sudore ac sanguine inde Samnites de-  
pulisset? An aequum esse, dediticios suos illa fertilitate  
atque amoenitate perfrui; se, militando fessos, in pesti-  
lente atque arido circa urbem solo luctari, aut in urbe  
insidentem tabem crescentis in dies foenoris pati?* Haec

y) Suessanorumque Gron. Crev. c. Drak.

z) voluptatum Gron. Crev.

U. c. 412. agitata occultis coniurationibus, necdum vulgata in  
 a. C. 340. omnes consilia, invenit novus consul C. Marcius Ru-  
 U. c. 413.  
 a. C. 339. tilus, cui Campania sorte provincia evenerat, Q. Ser-  
 vilio collega ad urbem relicto. Itaque quum omnia  
 ea, sicut gesta erant, per tribunos comperita haberet,  
 et aetate et usu doctus (quippe qui iam quartum con-  
 sul esset, dictatorque et censor fuisset) optimum ra-  
 tus, differendo spem, quandocumque vellent, consilii  
 exsequendi, militarem inpetum frustari; rumorem  
 dissipat, in iisdem oppidis et anno post praesidia hi-  
 bernatura. divisa enim erant per Campaniae urbes,  
 manaverantque a Capua consilia in exercitum omnem.  
 Eo laxamento cogitationibus dato, quievit in prae-  
 sentia seditio.

XXXIX. Consul, educto in aestiva milite, dum  
 quietos Samnites habebat, exercitum purgare missio-  
 nibus turbulentorum hominum instituit, aliis emerita  
 dicendo stipendia esse, alios graves iam aetate, aut  
 viribus parum validos. quidam in commeatus mitte-  
 bantur, singuli primo, deinde et cohortes quaedam,  
 quia procul ab domo ac rebus suis hibernassent. Per  
 speciem etiam militarium usum, quum alii alio mit-  
 terentur, magna pars ablegati. quam multitudinem  
 consul alter Romae praetorque, alias ex aliis fingendo  
 moras, retinebat. Et primo quidem, ignari ludifica-  
 tionis, minime inviti domos revisebant. Postquam ne-  
 que reverti ad signa primos, nec ferme alium, quam  
 qui in Campania hibernassent, praecipueque ex iis  
 seditionis auctores mitti viderunt; primum admiratio,  
 deinde haud dubius timor incessit animos, consilia sua  
 emanasse: *iam quaestiones, iam indicia*<sup>a)</sup>, *iam oc-*  
*culta singulorum supplicia, inpotensque et crudele con-*  
*sulum ac Patrum in se regnum passuros.* Haec, qui in  
 castris erant, occultis sermonibus serunt<sup>b)</sup>, nervos  
 coniurationis eiectos arte consulis cernentes. Cohors

a) iudicia Gron.

b) ferunt Gron. Grev.

una, quum haud procul Anxure esset, ad Lantulas U. c. 417.  
 saltu angusto inter mare ac montes consedit, ad ex- a. C. 339.  
 cipiendos, quos consul aliis atque aliis (ut ante dictum  
 est) caussis mittebat. Iam valida admodum numero  
 manus erat; nec quidquam ad iusti exercitus formam,  
 praeter ducem, deerat. incompositi itaque praedantes  
 in agrum Albanum perveniunt, et sub iugo Albae  
 longae castra vallo cingunt. Perfecto inde opere, re-  
 liquum diei de imperatore sumendo sententiis decer-  
 tant, nulli ex praesentibus satis fidentes. *Quem autem  
 ab Roma posse exciri? quem Patrum aut plebis esse, qui  
 aut se tanto periculo sciens obferat, aut cui ex iniuria  
 insanientis exercitus caussa recte committatur?* Poste-  
 ro die, quum eadem deliberatio teneret, ex praedato-  
 ribus vagis quidam compertum adtulerunt, T. Quin-  
 ctium in Tusculano agrum colere, urbis honorumque  
 inmemorem. Patriciae hic vir gentis erat: cui quum  
 militiae, magna cum gloria actae, finem pes alter ex  
 vulnere claudus fecisset, ruri agere vitam procul am-  
 bitione ac foro constituit. Nomine audito, extemplo  
 agnovere virum: et, quod bene verteret, adciri iusse-  
 runt. Sed parum spei erat, voluntate quidquam factu-  
 rum. vim adhiberi ac metum placuit. Itaque silentio  
 noctis quum tectum villae, qui ad id missi erant, in-  
 trassent; somno gravem <sup>c)</sup> Quinctium obpressum, ni-  
 hil medium, aut imperium atque honorem, aut, ubi  
 restitaret, mortem, ni sequeretur, denunciantes, in  
 castra pertraxerunt. Imperator extemplo adveniens  
 adpellatus: insigniaque honoris exterrito subitae rei  
 miraculo deferunt, et ad urbem ducere iubent. Suo  
 magis inde inpetu, quam consilio ducis, convulsis si-  
 gnis, infesto agmine ad lapidem octavum viae, quae  
 nunc Appia est, perveniunt: issentque confestim ad  
 urbem, ni venire contra exercitum dictatoremque ad-  
 versus se M. Valerium Corvum dictum audissent, et  
 magistrum equitum L. Aemilium Mamercinum.

c) *gravi* Gron. Crev.

U. c. 415.

a. C. 339.

**XL.** Ubi primum in conspectum ventum est, arma signaque agnovere; extemplo omnibus memoria patriae iras permulsit. Nondum erant tam fortes ad sanguinem civilem, nec, praeter externa, noverant bella: ultimaque rabies secessio ab suis habebatur. itaque iam duces, iam milites utrinque, congressus quaerere ad conloquia. Quinctius, quem armorum etiam pro patria satietas teneret, nedum adversus patriam; Corvus, omnes caritate cives, praecipue milites et ante alios suum exercitum, complexus, ad conloquium processit. Cognito ei extemplo haud minore ab adversariis verecundia, quam ab suis, silentium datum<sup>d)</sup>: *Deos, inquit, immortales, milites, vestros publicos, meosque, ab urbe proficiscens ita adoravi, veniamque supplex poposci, ut mihi de vobis concordiae partae gloriam, non victoriam, darent. Satis fuit eritque, unde belli decus pariat: hinc pax petenda est. Quod Deos immortales inter nuncupanda vota expoposci, eius me compotem voti vos facere potestis; si meminisse vultis, non vos in Samnio, nec in Volscis, sed in Romano solo castra habere: si illos colles, quos cernitis, patriae vestrae esse, si hunc exercitum civium vestrorum: si me consulem vestrum, cuius ductu auspicioque priore anno bis legiones Samnitium fudistis, bis castra vi cepistis. Ego sum M. Valerius Corvus, milites, cuius vos nobilitatem beneficii erga vos, non iniuriis, sensistis; nullius superbae in vos legis, nullius crudelis senatusconsulti auctor; in omnibus meis imperiis in me severior, quam in vos. Ac si cui genus, si cui sua virtus, si cui etiam maiestas, si cui honores subdere spiritus potuerunt; iis eram natus, id specimen mei dederam. ea aetate consulatum adeptus eram, ut potuerim, tres et viginti annos natus, consul Patribus quoque ferox esse, non solum plebi. Quod meum factum dictumve consulis gravius, quam tribuni, audistis? eodem tenore duo insequentes consulatus gessi; eodem*

d) haud minor ab adversariis tium, datum Gron. Crev. c. verecundia, quam ab suis silen- Diak.



*haec imperiosa dictatura geretur: ut neque in hos meos U. c. 417. et patriae meae milites mitior, quam in vos, horreo di-<sup>a</sup>. C. 359. cere, hostes. Ergo vos prius in me strinxeritis ferrum, quam in vos ego. istinc signa canent, istinc clamor prius incipiet atque inpetus, si dimicandum est. Inducite in animum, quod non induxerunt patres aviique vestri: non illi, qui in Sacrum montem secesserunt; non hi, qui postea Aventinum insederunt. Expectate, dum vobis singulis, ut olim Coriolano, matres coniugesque crinibus passis obviae ab urbe veniant. Tum Volscorum legiones, quia Romanum habebant ducem, quieverunt; vos, Romanus exercitus, ne<sup>e</sup>) destiteritis in pio bello? T. Quincti, quocumque istic loco, seu volens, seu invitus, constitisti, si dimicandum erit, tum tu in novissimos te recipito: fugeris etiam honestius, tergumque civi dederis, quam pugnaveris contra patriam. Nunc ad pacificandum bene atque honeste inter primos stabis, et conloqui huius salutaris interpretes fueris. Postulate aequa, et ferte: quamquam vel iniquis standum est potius, quam inpias inter nos conseramus manus. T. Quinctius plenus lacrimarum, ad suos versus, Me quoque, inquit, milites, si quis usus mei est, meliorem pacis, quam belli, habetis ducem. Non enim illa modo Volscus aut Samnis, sed Romanus, verba fecit; vester consul, vester imperator, milites: cuius auspiciapro vobis experti, nolite adversus vos velle experiri. Qui pugnarent vobiscum infestius, et alios duces senatus habuit: qui maxime vobis, suis militibus parceret, cui plurimum vos imperatori vestro crederetis, eum elegit. Pacem, etiam qui vincere possunt, volunt. quid nos velle oportet? quin, omissis ira et spe, fallacibus auctoribus, nos ipsos nostraque omnia cognitae permittimus fidei.*

XLI. Adprobantibus clamore cunctis, T. Quinctius, ante signa progressus, in potestate dictatoris milites fore dixit: oravit<sup>f</sup>), ut causam miserorum civium susciperet: susceptamque eadem fide, qua rem-

e) non Gron. Crev.

f) oravitque Gron. Crev.

U. c. 413. publicam administrare solitus esset, tueretur. *Sibi se*  
 a. C. 339. *privatim nihil cavere: nolle alibi, quam in innocentia,*  
*spem habere. Militibus cavendum, quod apud Patres*  
*semel plebi, iterum legionibus cautum sit, ne fraudise-*  
*cessio esset.* Quintio conlaudato, ceteris bonum ani-  
 mum habere iussis, dictator, equo citato ad urbem  
 revectus, auctoribus Patribus, tulit ad populum in luco  
 Petelino, ne cui militum fraudi secessio esset. Ora-  
 vit etiam bona venia Quirites, ne quis eam rem ioco  
 seriove cuiquam exprobraret. Lex quoque sacrata  
 militaris lata est, ne cuius militis scripti nomen, nisi  
 ipso volente, deleretur. additumque legi, ne quis, ubi  
 tribunus militum fuisset, postea ordinum ductor esset.  
 Id propter P. Salonium postulatum est ab coniuratis;  
 qui alternis prope annis et tribunus militum, et pri-  
 mus centurio erat, quem nunc primi pili adpellant.  
 Huic infensi milites erant, quod semper adversatus  
 novis consiliis fuisset, et, ne particeps eorum esset,  
 ab Lautulis fugisset <sup>g</sup>). Itaque quum hoc unum propter  
 Salonium ab senatu non inpetraretur; tum Saloni-  
 us, obtestatus Patres conscriptos, ne suum honorem plu-  
 ris, quam concordiam civitatis, aestimarent, perpulit,  
 ut id quoque ferretur. Aequè inpotens postulatum  
 fuit, ut de <sup>h</sup>) stipendio equitum (merebant autem tri-  
 plex ea tempestate) aera demerentur, quod adversati  
 coniurationi fuissent.

XLII. Praeter haec invenio apud quosdam, L.  
 Genucium, tribunum plebis, tulisse ad populum, ne  
 foenerare liceret: item aliis plebiscitis cautum, ne quis  
 eundem magistratum intra decem annos caperet; neu  
 duos magistratus uno anno gereret; utique liceret con-  
 sules ambos plebeios creari. quae si omnia concessa  
 sunt plebi, adparet, haud parvas vires defectionem  
 habuisse. Aliis annalibus proditum est, neque dicta-

g) *nec particeps eorum esset, nec legitur.*  
 qui ab Lautulis fugissent Gron. h) *de del. Gron.*  
 Crev. c. Drak. in qua et ne pro

torem **Valerium** dictum, sed per consules omnem rem actam: neque, antequam **Romam** veniretur, sed **Ro-**mae, eam multitudinem coniuratorum ad arma consternatam esse; nec in **T. Quinctii** villam, sed in aedes **C. Manlii**, nocte inpetum factum, eumque a coniuratis comprehensum, ut dux fieret; inde ad quartum lapidem profectos loco munito consedis-  
se. nec ab ducibus mentionem concordiae ortam; sed repente, quum in aciem armati exercitus processissent, salutationem factam: et permixtos dextras iungere, ac complecti inter se lacrimantes milites coepisse, coactosque consules, quum viderent aversos a dimicatione militum animos, retulisse ad patres de concordia reconcilianda. adeo nihil praeterquam seditionem fuisse, eamque compositam, inter antiquos rerum auctores constat. Et huius fama seditionis, et susceptum cum **Samnitibus** grave bellum, aliquot populos ab Romana societate avertit: et, praeter **Latinorum** infidum iam diu foedus, **Privernates** etiam **Norbam** atque **Setiam**, finitimas colonias Romanas, incursione subita depopulati sunt.

---

## EPITOME LIBRI VIII.

Latini cum Campanis defecerunt, et, missis legatis ad senatum, conditionem tulerunt, ut, si pacem habere vellent, alterum ex Latinis consulem facerent. Qua legatione perlata, praetor eorum Annius de Capitolio ita prolapsus est, ut exanimaretur. T. Manlius consul filium, quod contra edictum adversus 1) Latinos, quamvis prospere, pugnasset, securi percussit. Laborantibus in acie Romanis, P. Decius, tunc consul cum Manlio, devovit se pro exercitu: et, concitato equo quum in medios hostes se intulisset, interfectus morte sua Romanis victoriam restituit. Latini in deditionem venerunt. T. Manlio in urbem reverso nemo ex iuventute obviam processit. Minucia virgo Vestalis incesti damnata est. Ausonibus victis, in oppidum ex iis captum Cales colonia deaucta est. Item Fregellae colonia deductae sunt. Veneficium complurium matronarum deprehensum est 2): quarum plurimae statim epotis medicaminibus perierunt. Lex de veneficio tunc primum constituta est 3). Privernatibus, quum rebellassent, victis civitas data est. Palaepolitani, bello et obsidione victi, in deditionem venerunt. Q. Publilio, qui eos obsederat, primo et imperium prolatum, et pro consule decretus triumphus. Plebs nexu liberata est propter L. Papirii creditoris libidinem, qui C. Publilio debitori suo stuprum inferre voluerat. Quum L. Papirius dictator reversus in urbem ab exercitu esset propter auspicia repetenda, Q. Fabius magister equitum, occasione rei bene gerendae invitatus, contra edictum eius prospere adversus Samnites pugnavit. Ob eam causam quum dictator de magistro equitum supplicium sumturus videretur, Fabius Romam profugit: et, quum causa parum proficeret, populi precibus donatus est. Res praeterea contra Samnites prospere gestas continet.

1) *adversum* Gron. Crev.3) *est* del. Eaed.2) *est* del. Eaed.



## T. LIVII PATAVINI

## LIBER VIII.

Iam consules erant C. Plautius secundum, L. Aemi-<sup>U. c. 414.</sup>lius Mamercinus; quum Setini Norbanique Romam,<sup>a. C. 333.</sup>nuncii defectionis Privernatium, cum querimoniis acceptae cladis venerunt. Volscorum item exercitum, duce Antiati populo, consedissee ad Satricum, adlatum est. utrumque bellum Plautio sorte evenit. Prius ad Privernum profectus extemplo acie conflixit. haud magno certamine devicti hostes: oppidum captum redditumque Privernatibus, praesidio valido inposito: agri partes duae ademtae. Inde victor exercitus Satricum contra Antiates ductus. Ibi magna utrimque caede atrox proelium fuit: et quum tempestas eos, neutro inclinata spe, dimicantes diremisset, Romani, nihil eo certamine tam ambiguo fessi, in posterum diem proelium parant. Volscis, recensentibus quos viros in acie amisissent, haudquaquam idem animus ad iterandum periculum fuit. nocte pro victis Antium agmine trepido, sauciis ac parte impedimentorum relictis, abierunt. Armorum magna vis tum inter caesa corpora hostium, tum in castris inventa est. *Ea Luae matri dare se*, consul dixit: finesque hostium usque ad oram maritimam est depopulatus. Alteri consuli Aemilio, ingresso Sabellum agrum, non castra Samnitium, non legiones usquam obpositae. ferro ignique vastantem agros legati Samnitium pacem orantes adeunt, a quo reiecti ad senatum, potestate facta dicendi, positis ferocibus animis, pacem sibi ab Romanis, bellique ius adversus Sidicinos petierunt. *quae*

U. c. 414. *se eo iustius petere, quod et <sup>a)</sup> in amicitiam populi Ro-*  
 a. C. 554. *mani secundis suis rebus, non adversis, ut Campani,*  
*venissent: et adversus Sidicinos sumerent arma suos sem-*  
*per hostes, populi Romani numquam amicos. qui nec,*  
*ut Samnites, in pace amicitiam, nec, ut Campani, au-*  
*xilium in bello petissent, neque in fide populi Romani, nec*  
*in <sup>b)</sup> ditione essent.*

II. Quum de postulatis Samnitium Ti. Aemilius praetor senatum consulisset, reddendumque his foedus Patres censuissent, praetor Samnitibus respondit: *Nec quo minus perpetua cum eis amicitia esset, per populum Romanum stetisse: nec contradici, quin, quoniam ipsos belli culpa sua contracti taedium ceperit, amicitia de integro reconcilietur. Quod ad Sidicinos adtineat <sup>c)</sup>, nihil intercedi, quo minus Samniti populo pacis bellique liberum arbitrium sit.* Foedere icto, quum domum revertissent, extemplo inde exercitus Romanus deductus, annuo stipendio et trium mensium frumento accepto; quod pepigerat consul, ut tempus induciis daret, quoad legati redissent. Samnites, copiis iisdem, quibus usi adversus Romanum bellum fuerant, contra Sidicinos profecti, haud in dubia spe erant mature urbis hostium potiundae. Tum ab Sidicinis deditio prius ad Romanos coepta fieri est: dein, postquam Patres ut seram eam ultimaque tandem necessitate expressam adspernabantur, ad Latinos iam sua sponte in arma motos facta est. ne Campani quidem (adeo iniuriae Samnitium, quam beneficii Romanorum, memoria praesentior erat) his se armis abstinuere. Ex his tot populis unus ingens exercitus, duce Latino fines Samnitium ingressus, plus populationibus, quam proeliis, cladum fecit. et, quamquam superiores certaminibus Latini erant, haud inviti, ne saepius dimicandum foret, agro hostium excessere. Id spatium

a) et del. Gron.

b) in del. Gron.

c) attinet Gron. Crev.

Samnitibus datum est Romam legatos mittendi. qui U. c. 414. quum adissent <sup>d)</sup> senatum, conquesti eadem se foe- <sup>a.</sup> C. 333. deratos pati, quae hostes essent passi, precibus infinis petiere, *ut satis ducerent Romani victoriam, quam Samnitibus ex Campano Sidicinoque hoste eripuissent: ne vinci etiam se ab ignavissimis populis sinerent. Latinos Campanosque, si sub ditione populi Romani essent, pro imperio arcerent Samniti agro; sin imperium abnuerent, armis coercerent.* adversus haec responsum anceps datum, quia fateri pigebat, in potestate sua Latinos iam non esse, timebantque, ne arguendo abalienarent: *Campanorum aliam conditionem esse, qui non foedere, sed per deditionem, in fidem venissent: itaque Campanos, seu velint, seu nolint, quieturos. in foedere Latino nihil esse, quo <sup>e)</sup> bellare, cum quibus ipsi velint, prohibeantur.*

III. Quod responsum sicut dubios Samnites, quidnam facturum Romanum censerent, dimisit, ita Campanos metu abalienavit; Latinos, velut nihil iam non concedentibus Romanis, ferociores fecit. Itaque, per speciem adversus Samnites belli parandi crebra concilia indicentes, omnibus consultationibus inter se principes occulte Romanum coquebant bellum. huic quoque adversus servatores suos bello Campanus aderat. Sed quamquam omnia de industria celabantur, priusque, quam moverentur Romani, tolli ab tergo Samniternum hostem volebant; tamen per quosdam, privatis hospitibus necessitudinibusque coniunctos, indicia coniurationis eius Romam emanarunt, iussisque ante tempus consulibus abdicare se magistratu, quo maturius novi consules adversus tantam molem belli crearentur, religio incessit, ab eis, quorum inminutum imperium esset, comitia haberi. Itaque interregnum initum. duo interreges fuerunt, M. Valerius ac M. Fa- U. c. 415. bius. Creati consules, T. Manlius Torquatus tertium, <sup>a.</sup> C. 337.

d) adissent Gron. Crev.

e) quod Crev.

U. c. 415. P. Decius Mus <sup>f</sup>). Eo anno Alexandrum, Epiri regem, in Italiam classem adpulisse constat. quod bellum, si prima satis prospera fuissent, haud dubie ad Romanos pervenisset. Eadem aetas rerum Magni Alexandri est: quem, sorore huius ortum, in alio tractu orbis, invictum bellis iuvenem, fortuna morbo exstinxit. Ceterum Romani, etsi defectio sociorum nominisque Latini haud dubia erat; tamen, tamquam de Samnitibus, non de se, curam agerent, decem principes Latinorum Romam evocaverunt, quibus imperarent, quae vellent. Praetores tum duos Latium habebat <sup>g</sup>), L. Annium Setinum et L. Numisium <sup>h</sup>) Circeiensem, ambo ex coloniis Romanis: per quos, praeter Signiam Velitrasque, et ipsas colonias Romanas, Volsci etiam excitati ad arma erant. eos nominatim evocari placuit. Haud cuiquam dubium erat, super qua re adirentur. itaque, concilio prius habito, praetores, quam Romam proficiscerentur, evocatos se ab senatu docent Romano, et, quae actum iri secum credant, quidnam ad ea responderi placeat, referunt.

IV. Quum aliud alii censerent, tum Annius: *Quamquam ipse ego retuli, quid responderi placeret, tamen magis ad summam rerum nostrarum pertinere arbitror, quid agendum nobis, quam quid loquendum sit. facile erit, explicatis consiliis, adcommodare rebus verba. Nam, si etiam nunc sub umbra foederis, aequi servitutem pati possumus, quid abest, quin, proditis Sidicinis, non Romanorum solum, sed Samnitium quoque dicto pareamus, respondeamusque Romanis, nos, ubi innuerint, posituros arma? Sin autem tandem libertatis desiderium remordet animos, si foedus est, si societas aequatio iuris est, si consanguineos nos Romanorum esse, quod olim pudebat, nunc gloriari licet, si socialis illis exercitus is est, quo adiuncto duplicent vires suas, quem*

<sup>f</sup>) Is creavit consules, T. Manlium Torquatum tertium, P. Decium Murem. Gron. Crev.

<sup>g</sup>) Latini habebant Eaed.

<sup>h</sup>) Numisium Eaed.



*secernere ab se consules bellis propriis ponendis sumen—U. c. 415. disque nolint; cur non omnia aequantur? cur non alter a. C. 337. ab Latinis consul datur? ubi pars virium, ibi et imperii pars est? Est quidem nobis hoc per se haud nimis amplum, quippe concedentibus, Romam caput Latio esse. sed, ut amplum videri posset, diuturna patientia fecimus. Atqui, si quando umquam consociandi imperii, usurpandae libertatis tempus optastis, en hoc tempus adest, et virtute vestra et Deum benignitate, vobis datum. Tentastis patientiam negando militem, quis dubitat exarsisse eos, quum plus ducentorum annorum morem solveremus? pertulerunt tamen hunc dolorem. Bellum nostro nomine cum Pelignis gessimus. qui ne nostrorum quidem finium nobis per nos tuendorum ius antea dabant, nihil intercesserunt. Sidicinos in fidem receptos, Campanos ab se ad nos descisse, exercitus nos parare adversus Samnites foederatos suos audierunt, nec moverunt se ab urbe. Unde haec illis tanta modestia, nisi a conscientia virium et nostrarum et suarum? Idoneos auctores habeo, querentibus de nobis Samnitibus ita responsum ab senatu Romano esse, ut facile adpateret, ne ipsos quidem iam postulare, ut Latium sub Romano imperio sit. Usurpate modo postulando eo, quod illi vobis taciti concedunt. Si quem hoc metus dicere<sup>1)</sup> prohibet, en ego ipse, audiente non populo Romano modo senatuque, sed Iove ipso, qui Capitolium incolit, profiteor me dicturum; ut, si nos in foedere ac societate esse velint, consulem alterum ab nobis senatusque partem accipiant. Haec ferociter non suadenti solum, sed pollicenti, clamore et adsensu omnes permiserunt, ut ageret diceretque, quae e republica nominis Latini fideque sua viderentur.*

V. Ubi est Romam ventum, in Capitolio eis senatus datus est. Ibi quum T. Manlius consul egisset cum eis ex auctoritate Patrum, ne Samnitibus foederatis bellum inferrent; Annius, tanquam victor armis

i) dicere metus Gron. Crev.

U. c. 415. Capitolium cepisset, non legatus, iure gentium tutus,  
 a. C. 337. loqueretur, *Tempus erat, inquit, T. Manli, vosque Patres conscripti, tandem iam vos nobiscum nihil pro imperio agere, quum florentissimum Deum benignitate nunc Latium armis virisque, Samnitibus bello victis, Sidicinis Campanisque sociis, nunc etiam Volscis adiunctis, videretis; colonias quoque vestras Latinum Romano praetulisse imperium. Sed quoniam vos, regno inpotenti finem ut inponatis, non inducitis in animum; nos, quamquam armis possumus adserere Latium in libertatem, consanguinitati tamen hoc dabimus, ut conditiones pacis feramus aequas utrisque, quoniam vires quoque aequari Diis immortalibus placuit. Consulem alterum Roma, alterum ex Latio creari oportet: senatus partem aequam ex utraque gente esse: unum populum, unam rempublicam fieri: et, ut imperii eadem sedes sit, idemque omnibus nomen, quoniam ab alterutra parte concedi necesse est; quod utrisque bene vertat, sit haec sane patria potior, et Romani omnes vocemur. Forte ita accidit, ut parem ferociae huius et Romani consulem T. Manlium haberent: qui adeo non tenuit iram, ut, si tanta dementia Patres conscriptos cepisset, ut ab Setino homine leges acciperent, gladio cinctum in senatum venturum se esse, palam diceret, et, quemcumque in curia Latinum vidisset, sua manu interemturum. et, conversus ad simulacrum Iovis, *Audi, Iupiter, haec scelera, inquit, audite, Ius Fasque. Peregrinos consules et peregrinum senatum in tuo, Iupiter, augurato templo, captus atque ipse obpressus, visurus es? Haecine foedera Tullus Romanus rex cum Albanis, patribus vestris, Latini, haec L. Tarquinius vobiscum postea fecit? Non venit in mentem pugna apud Regillum lacum? adeo et cladium veterum vestrarum et beneficiorum nostrorum erga vos obliti estis?**

VI. Quum consulis vocem subsecuta Patrum indignatio esset, proditur memoriae, adversus crebram inplorationem Deum, quos testes foederum saepius

invocabant consules, vocem Annii, spernentis numina<sup>U. c. 415.</sup>  
 Iovis Romani, auditam. certe, quum commotus ira se<sup>a. C. 357.</sup>  
 ab vestibulo templi citato gradu proriperet, lapsus per  
 gradus, capite graviter obfenso, inpactus imo ita est  
 saxo, ut sopiretur. Exanimatum auctores quoniam  
 non omnes sunt, mihi quoque in incerto relictum sit:  
 sicut inter foederum ruptorum testationem ingenti  
 fragore coeli procellam effusam. nam et vera esse, et  
 apte ad repraesentandam iram Deum ficta possunt.  
 Torquatus, missus ab senatu ad dimittendos legatos,  
 quum iacentem Annium vidisset, exclamat, ita ut  
 populo Patribusque audita vox pariter sit, *Bene habet.*  
*Dii pium movere<sup>k)</sup> bellum. Est coeleste numen! es,*  
*magne Iupiter; haud frustra te patrem Deum hominum-*  
*que hac sede sacra vimus. Quid cessatis, Quirites, vos-*  
*que, Patres conscripti, arma capere Diis ducibus? Sic*  
*stratas legiones Latinorum dabo, quemadmodum lega-*  
*tum iacentem videtis.* Adsensu populi excepta vox  
 consulis tantum ardoris animis fecit, ut legatos profi-  
 ciscentes cura magistratuum magis, qui iussu consulis  
 prosequerentur, quam ius gentium, ab ira inpetuque  
 hominum tegeret. Consensit et senatus bellum: con-  
 sulesque, duobus scriptis exercitibus per Marsos Pe-  
 llignosque profecti, adiuncto Samnitium exercitu, ad  
 Capuam, quo iam Latini sociique convenerant, castra  
 locant. Ibi in quiete utrique consuli eadem dicitur  
 visa species viri maioris, quam pro humano habitu,  
 augustiorisque, dicentis: *Ex una acie imperatorem, ex*  
*altera exercitum Dii Manibus matrique Terrae deberi;*  
*utrius exercitus imperator legiones hostium, superque*  
*eas se devovisset, eius populi partisque victoriam fore.*  
 Hos ubi nocturnos visus inter se consules contulerunt;  
 placuit averruncandae Deum irae victimas caedi: si-  
 mul ut, si extis eadem, quae somno visa fuerant, por-  
 tenderentur, alteruter consulum fata inpleret. Ubi  
 responsa aruspicum insidenti iam animo tacitae reli-

k) *move* Gron. Crev.

U. c. 415. gioni congruerunt; tum, adhibitis legatis tribunisque  
 a. C. 337. et imperiis Deum propalam expositis, ne mors voluntaria consulis exercitum in acie terreret, comparant inter se, ut, ab utra parte cedere Romanus exercitus coepissent, inde se consul devoveret pro populo Romano Quiritibusque. Agitatum etiam in consilio est, ut, si quando umquam severo ullum imperio bellum administratum esset, tunc uti disciplina militaris ad priscos redigeretur mores. Curam acuebat, quod adversus Latinos bellandum erat, lingua, moribus, armorum genere, institutis ante omnia militaribus congruentes: milites militibus, centurionibus centuriones, tribuni tribunis compares collegaeque, iisdem praesidiis, saepe iisdem manipulis permixti fuerant. per haec ne quo errore milites caperentur, edicunt consules, ne quis extra ordinem in hostem pugnaret.

VII. Forte inter ceteros turmarum praefectos, qui exploratum in omnes partes dimissi erant, T. Manlius consulis filius super castra hostium cum suis turmalibus evasit, ita ut vix teli iactu ab statione proxima abesset. ibi Tusculani erant equites. praeerat Geminus <sup>1)</sup> Metius, vir tum genere inter suos, tum factis, clarus. Is ubi Romanos equites, insignemque inter eos praecedentem consulis filium, (nam omnes inter se, ulique illustres viri, noti erant) cognovit, *Unane*, ait, *turma Romani cum Latinis sociisque bellum gesturi estis? quid interea consules, quid duo exercitus consulares agent? Aderunt in tempore*, Manlius inquit, *et cum illis aderit Iupiter ipse, foederum a vobis violatorum testis, qui plus potest, polletque. Si ad Regillum lacum ad satietatem vestram pugnavimus, hic quoque efficiemus profecto, ne nimis acie vobis et conlata signa nobiscum cordi sint.* Ad ea Geminus, paullulum ab suis equo <sup>m)</sup> proventus, *Visne igitur, dum dies ista venit, qua magno conatu exercitus moveatis, interea tu ipse congredi mecum, ut nostro duorum iam hinc eventu cer-*

1) Geminus et sic semper Gron. Crev. m) eo Gron.



*natur, quantum eques Latinus Romano praestet?* Mo- U. c. 415.  
 vet ferocem animum iuvenis seu ira, seu detrectandi a. C. 337.  
 certaminis pudor, seu inexsuperabilis vis fati. oblitus  
 itaque imperii patrii, consulumque edicti, praeceps  
 ad id certamen agitur, quo, vinceret, an vinceretur,  
 haud multum interesset. equitibus ceteris velut ad  
 spectaculum submotis, spatio, quod vacui interiace-  
 bat campi, adversos concitant equos: et, quum infe-  
 stis cuspidibus concurrissent, Manlii cuspis super ga-  
 leam hostis, Metii trans cervicem equi elapsa est.  
 Circumactis deinde equis, quum prior ad iterandum  
 ictum Manlius consurrexisset; spiculum inter aures  
 equi fixit. ad cuius vulneris sensum quum equus, prio-  
 ribus pedibus erectis, magna vi caput quateret, ex-  
 cussit equitem: quem cuspidem parmaque innisum, ad-  
 tollentem se ab gravi casu, Manlius ab iugulo, ita ut  
 per costas ferrum emineret, terrae adfixit. spoliisque  
 lectis ad suos reiectus, cum ovante gaudio turma in  
 castra, atque inde ad praetorium, ad patrem, tendit,  
 ignarus fati <sup>n)</sup> futurique, laus an poena merita esset,  
*Ut me omnes, inquit, pater, tuo sanguine ortum vere*  
*ferrent, provocatus equestria haec spolia capta ex hoste*  
*caeso porto.* Quod ubi audivit consul, extemplo, fi-  
 lium aversatus, concionem classico advocari iussit.  
 quae ubi frequens convenit, *Quandoque* <sup>o)</sup>, inquit,  
*tu, T. Manli, neque imperium consulare, neque maie-*  
*statem patriam veritus, adversus edictum nostrum extra*  
*ordinem in hostem pugnasti, et, quantum in te fuit,*  
*disciplinam militarem, qua stetit ad hanc diem Romana*  
*res, solvisti, meque in eam necessitatem adduxisti, ut*  
*aut reipublicae mihi, aut mei meorumque obliviscendum*  
*sit; nos potius nostro delicto plectemur, quam respublica*  
*tanto suo damno nostra peccata luat. triste exemplum,*  
*sed in posterum salubre iuventuti, erimus. Me quidem*  
*quum ingenita caritas liberum, tum specimen istud vir-*

n) facti Crev.

o) quandoquidem Gron. Crev.

U. c. 415. *tutis, deceptum vana imagine decoris, in te movet. Sed*  
 a. C. 357. *quum aut morte tua sancienda sint consulum imperia,*  
*aut impunitate in perpetuum abroganda; ne te quidem,*  
*si quid in te nostri sanguinis est, recusare censeam,*  
*quin disciplinam militarem, culpa tua prolapsam, poena*  
*restituas. I, lictor, deliga ad palum.* Exanimati om-  
 nes tam atroci imperio, nec aliter quam in se quisque  
 dstrictam <sup>p)</sup> cernentes securim, metu magis, quam  
 modestia, quievire. Itaque, velut emerso ab admi-  
 ratione animo, quum silentio defixi stetissent <sup>q)</sup>, re-  
 pente, postquam cervice caesa fusus est cruor, tum  
 libero conquestu coortae voces sunt, ut neque lamen-  
 tis, neque execrationibus parceretur: spoliisque con-  
 lectum iuvenis corpus, quantum militaribus studiis  
 funus ullum concelebrari potest, structo extra vallum  
 rogo cremaretur: Manlianaque imperia non in prae-  
 sentia modo horrenda, sed exempli etiam tristis in  
 posterum essent.

VIII. Fecit tamen atrocitas poenae obedientiorem  
 duci militem: et, praeterquam quod custodiae vigi-  
 liaeque et ordo stationum intentioris ubique curae  
 erant, in ultimo etiam certamine, quum descensum  
 in aciem est, ea severitas profuit. Fuit autem <sup>r)</sup> ci-  
 vili maxime bello pugna similis. adeo nihil apud Lati-  
 nos dissonum ab Romana re, praeter animos, erat.  
 Clipeis antea Romani usi sunt: deinde, postquam sti-  
 pendarii facti sunt, scuta pro clipeis fecere: et, quod  
 antea phalanges similes Macedonicis, hoc postea ma-  
 nipulatim structa acies coepit esse. Postremo in plu-  
 res ordines instruebantur. ordo sexagenos milites, duos  
 centuriones, vexillarium unum habebat. prima acies  
 hastati erant, manipuli quindecim, distantes inter se  
 modicum spatium: manipulus leves vicos milites,  
 aliam turbam scutatorum habebat. leves autem, qui  
 hastam tantum gaesaque gererent, vocabantur. Haec

p) *districtam* Gron. Crev.

q) In Drak. post *stetissent* se-

micolon ponitur.

r) *enim* Gron.

prima frons in acie florem iuvenum pubescentium U. c. 415. ad militiam habebat. Robustior inde aetas totidem<sup>a</sup>. C. 337. manipulorum, quibus principibus est nomen, hos sequebantur, scutati omnes, insignibus maxime armis. hoc triginta<sup>s</sup>) manipulorum agmen antepilanos adpellabant, quia sub signis iam alii quindecim ordines locabantur: ex quibus ordo unusquisque tres partes habebat. earum unamquamque primum pilum vocabant. Tribus ex vexillis constabat. vexillum centum octoginta sex homines erant<sup>t</sup>). Primum vexillum triarios ducebat, veteranum militem spectatae virtutis: secundum rorarios, minus roboris aetate factisque: tertium accensos, minimae fiduciae manum. eo et in postremam aciem reiiciebantur. Ubi his ordinibus exercitus instructus esset, hastati omnium primi pugnam inibant. si hastati profligare hostem non possent, pede presso eos retrocedentes in intervalla ordinum principes recipiebant. tum principum pugna erat; hastati sequebantur. triarii sub vexillis considebant, sinistro crure porrecto, scuta innisa humeris, hastas subrecta cuspide in terra fixas, haud secus quam vallo septa inhorreret acies, tenentes. Si apud principes quoque haud satis prospere esset pugnatum, a prima acie ad triarios sensim referebantur. inde *rem ad triarios redisse*, quum laboratur, proverbio increbruit. Triarii consurgentes, ubi in intervalla ordinum suorum principes et hastatos recepissent, extemplo compressis ordinibus velut claudebant vias: unoque continenti<sup>u</sup>) agmine, iam nulla spe post relictam, in hostem incidebant: id erat formidolosissimum. hosti, quum, velut victos insecuti, novam repente aciem exurgentem auctam numero cernebant. Scribebantur autem quatuor fere legiones quinis millibus peditum, equitibus

s) viginti Crev.

t) Creverius totum hunc locum inde a verbis *ordo sexagenos* ex emendatione Lipsii textui in-

ruit, ita tamen, ut textum vulgatum una retineret. [Idem fecit Lallemand.]

u) continente Gron. Crev.

U. c. 415. in singulas legiones trecenis. alterum tantum ex latino  
 a. C. 337. delectu adiciebatur, qui ea tempestate hostes erant

Romanis, eodemque ordine instruxerant aciem: nec vexilla cum vexillis tantum, universi hastati cum hastatis, principes cum principibus; sed centurio quoque cum centurione, si ordines turbati non essent, concurrendum sibi esse sciebant. Duo primipili ex utraque acie inter triarios erant: Romanus corpore haudquaquam satis validus, ceterum strenuus vir peritusque militiae: Latinus viribus ingens bellatorque primus; notissimi inter se, quia pares semper <sup>x)</sup> ordines duxerant. Romano, haud satis fidenti viribus, iam Romae permissum erat ab consulibus, ut subcenturionem sibi, quem vellet, legeret, qui tutaretur eum ab uno destinato hoste. isque iuvenis, in acie oblatus, ex centurione Latino victoriam tulit. Pugnatum est haud procul radicibus Vesuvii montis, qua via ad Vesperim ferebat.

IX. Romani consules prius, quam educerent in aciem, inmolaverunt. Decio caput iocinoris <sup>y)</sup> a familiaris parte caesum aruspex dicitur ostendisse; alioqui acceptam Diis hostiam esse: Manlium egregie litasse. *Atqui bene habet, inquit Decius, si ab collega litatum est.* Instructis, sicut ante dictum est, ordinibus, processere in aciem. Manlius dextro, Decius laevo cornu praeerat. primo utrimque aequis viribus, eodem ardore animorum gerebatur res: deinde ab laevo cornu hastati Romani, non ferentes inpressionem Latinorum, se ad principes recepere. In hac trepidatione Decius consul M. Valerium magna voce inclamat: *Deorum, inquit, ope, Valeri, opus est. agendum, pontifex publicus populi Romani, praei verba, quibus me pro legionibus devoveam.* Pontifex eum togam praetextam sumere iussit, et, velato capite, manu subter togam ad mentum exserta, super telum subiectum pedibus stantem sic dicere. *Iane, Iupiter,*

x) semper pares Gron. Crev. y) iecinoris Eaed.



*Mars pater, Quirine, Bellona, Lares, Divi Novensiles, Dii Indigetes, Divi, quorum est potestas nostrorum hostiumque, Diique Manes, vos precor, veneror, veniam peto feroque, uti populo Romano Quiritium vim victoriamque prosperetis; hostesque populi Romani Quiritium terrore, formidine, morteque adficiatis. Sicut verbis nuncupavi, ita pro republica Quiritium, exercitu, legionibus, auxiliis populi Romani Quiritium, legiones auxiliaque hostium mecum Diis Manibus Tellurique devoveo.* Haec ita precatus, lictores ire ad T. Manlium iubet, matureque collegae se devotum pro exercitu nunciare. Ipse, incinctus cinctu Gabino, armatus in equum insiluit, ac se in medios hostes inmisit. Conspectus ab utraque acie aliquando augustior humano visu, sicut coelo missus piaculum omnis Deorum irae, qui pestem ab suis aversam in hostes ferret; ita omnis terror pavorque cum illo latus signa primo Latinorum turbavit; deinde in totam penitus aciem pervasit. Evidentissimum id fuit, quod, quacumque equo invectus est, ibi, haud secus quam pestifero sidere icti, pavebant: ubi vero conruit obrutus telis, inde iam haud dubie consternatae cohortes Latinorum fugam ac vastitatem late fecerunt. Simul et Romani, exsolutis religione animis, velut tum primum signo dato coorti, pugnam integram ediderunt. nam et rorarii procurrebant inter antepilanos, addiderantque vires hastatis ac principibus: et triarii, genu dextro innisi, nutum consulis ad consurgendum expectabant.

X. Procedente deinde certamine, quum aliis partibus multitudo superaret Latinorum, Manlius consul, audito eventu collegae, quum, ut ius fasque erat, lacrimis non minus quam laudibus debitis prosecutus tam memorabilem mortem esset; paullisper addubitavit, an consurgendi iam triariis tempus esset; deinde, melius ratus integros eos ad ultimum discrimen servari, accensos ab novissima acie ante signa procedere iubet. Qui ubi subiere, extemplo Latini, tamquam

U. c. 415. idem adversarii fecissent, triarios suos excitaverunt:  
 a. C. 337. qui aliquamdiu pugna atroci quum et semet ipsi fatigassent, et hastas aut praefregissent, aut hebetassent, pellerent vi tamen hostem, debellatum iam rati, perventumque ad extremam aciem; tum consul triariis, *Consurgite nunc, inquit, integri adversus fessos, memores patriae parentumque et coniugum ac liberorum; memores consulis pro vestra victoria morte occumbentis*. Ubi triarii consurrexerunt integri, refulgentibus armis, nova ex inproviso exorta acies, receptis in intervalla ordinum antepilanis, clamore sublato principia Latinorum perturbant. hastisque ora fodientes, primo robore virorum caeso, per alios manipulos, velut inermes, prope intacti evasere, tantaque caede perrupere cuneos, ut vix quartam partem relinquerent hostium. Samnites quoque, sub radicibus montis procul instructi, prae buere terrorem Latinis. Ceterum inter omnes cives sociosque praecipua laus eius belli penes consules fuit: quorum alter omnes minas periculaque ab Diis superis inferisque in se unum vertit: alter ea virtute eoque consilio in proelio fuit, ut facile convenerit inter Romanos Latinosque, qui eius pugnae memoriam posteris tradiderunt, utrius partis T. Manlius dux fuisset, eius futuram haud dubie fuisse victoriam. Latini ex fuga se Minturnas contulerunt. castra secundum proelium capta, multique mortales ibi vivi obpressi, maxime Campani. Decii corpus ne eo die inveniretur, nox quaerentes obpressit. postero die inventum inter maximam hostium stragem, coopertum telis; funusque ei par morti, celebrante collega, factum est. Illud adiiciendum videtur, licere consuli dictatorique et praetori, quum legiones hostium devoveat <sup>z)</sup>, non utique se, sed quem velit <sup>a)</sup> ex legione Romana scripta civem, devovere: si is homo, qui devotus est, moritur, probe factum videri: ni moritur, tum signum septem pedes altum, aut maius, in terram defodi, et

z) devoveant Gron. Crev.

a) velint Eaed.

piaculum hostiam <sup>b)</sup> caedi. Ubi illud signum defossum <sup>U. c. 415.</sup> erit, eo magistratum Romanum escendere fas non es- <sup>a. C. 337.</sup> se. Sin autem sese devovere volet, sicuti Decius devovit; ni moritur, neque suum, neque publicum divinum pure faciet, qui sese devoverit. Vulcano arma sive cui alii Divo vovere <sup>c)</sup> volet, sive hostia sive quo alio volet, ius est <sup>d)</sup>. Telo, super quod stans consul precatus est, hostem potiri, fas non est: si potiatur, Marti suovetaurilibus piaculum fieri.

XI. Haec, (etsi omnis divini humanique moris memoria abolevit, nova peregrinaque omnia priscis ac patriis praeferendo) haud ab re duxi, verbis quoque ipsis, ut tradita nuncupataque sunt, referre. Romanis post proelium demum factum Samnites venisse subsidio, expectato eventu pugnae, apud quosdam auctores invenio. Latinis quoque ab Lavinio auxilium, dum deliberando terunt tempus, victis demum ferri coeptum. et, quum iam portis prima signa et pars agminis esset egressa, nuncio adlato de clade Latinorum, quum conversis signis retro in urbem rediretur, praetorem eorum nomine Millionium <sup>e)</sup> dixisse ferunt, *pro paullula via magnam mercedem Romanis esse solvendam*. Qui Latinorum pugnae superfuerant, multis itineribus dissipati, quum se in unum conglobassent, Vescia urbs eis receptaculum fuit. Ibi in conciliis Numisius imperator eorum, adfirmando *communem vere Martem belli utramque aciem pari caede prostravisse, victoriaeque nomen tantum penes Romanos esse, ceteram pro victis fortunam et illos gerere: funesta duo consulum praetoria, alterum parricidio filii, alterum consulis devoti caede; trucidatum exercitum omnem; caesos hystatos principesque; stragem et ante signa et post signa factam: triarios postremo rem restituisse. Latinorum etsi pariter adcisae copiae sint, tamen supplemento vel Latium propius esse, vel Volscos,*

b) hostia Gron. c. Drak.

d) esto Crev.

c) devovere Gron. Crev.

e) Millionium Gron. Crev.

U. c. 415. *quam Romam. Itaque, si videatur eis, se, ex Latinis*  
 a. C. 557. *et ex Volscis populis iuventute propere excita, rediturum*  
*infesto exercitu Capuam esse; Romanosque, nihil tum*  
*minus quam proelium exspectantes, neopinato adventu*  
*perculsurum.* Fallacibus literis circa Latium nomen-  
 que Volscum missis, quia, qui non interfuerant pug-  
 nae, ad credendum temere faciliores erant, tumultu-  
 varius undique exercitus raptim conscriptus conve-  
 nit. Huic agmini Torquatus consul ad Trifanum  
 (inter Sinuessam Minturnasque is locus est) obcurrit.  
 prius, quam castris locus caperetur, sarcinis utrimque  
 in acervum coniectis, pugnatum debellatumque est.  
 adeo enim adcisae res sunt, ut consuli, victorem ex-  
 ercitus ad depopulandos agros eorum ducenti, dede-  
 rent se omnes Latini, deditionemque eam Campani  
 sequerentur. Latium Capuaque agro multati. La-  
 tinus ager, Privernati addito agro, et Falernus, qui  
 populi Campani fuerat, usque ad Vulturum flumen,  
 plebi Romanae dividitur. bina in Latino iugera, ita  
 ut dodrantem ex Privernati complerent, data; terna  
 in Falerno, quadrantibus etiam pro longinquitate ad-  
 iectis. Extra poenam fuerè Latinorum Laurentes  
 Campanorumque equites, quia non desciverant. Cum  
 Laurentibus renovari foedus iussum, renovaturque  
 ex eo quotannis post diem decimum Latinarum.  
 Equitibus Campanis civitas data: monumentoque ut  
 esset, aeneam tabulam in aede Castoris Romae  
 fixerunt. vectigal quoque eis Campanus populus ius-  
 sus pendere in singulos quotannis (fuere autem mille  
 et sexcenti) denarios nummos quadringenos quinquagenos.

XII. Ita bello gesto, praemiis poenaeque pro  
 cuiusque merito persolutis, T. Manlius Romam rediit:  
 cui venienti seniores tantum obviam exisse constat;  
 iuventutem, et tunc, et omni vita deinde, aversatam  
 eum exsecratamque. Antiates in agrum Ostiensem,  
 Ardeatem, Solonium incursiones fecerunt. Manlius



consul, quia ipse per valetudinem id bellum exsequi <sup>U. c. 415.</sup>  
 nequierat, dictatorem L. Papirium Crassum, qui tum <sup>a. C. 337.</sup>  
 forte erat praetor, dixit: ab eo magister equitum L.  
 Papirius Cursor dictus. Nihil memorabile adversus  
 Antiates ab dictatore gestum est, quum aliquot men-  
 ses stativa in agro Antiati habuisset. Anno insigni  
 victoria de tot ac tam potentibus populis, ad hoc  
 consulum alterius nobili morte, alterius sicut truci,  
 ita claro ad memoriam, imperio, successere consules <sup>U. c. 416.</sup>  
 Ti. Aemilius Mamercinus et Q. Publilius Philo; neque <sup>a. C. 336.</sup>  
 insimilem materiam rerum, et ipsi aut suarum rerum,  
 aut partium in republica magis, quam patriae, me-  
 mores. Latinos, ob iram agri amissi rebellantes, in  
 campis Fenectanis fuderunt, castrisque exuerunt. Ibi  
 Publilio, cuius ductu auspicioque res gestae erant, in  
 deditionem accipiente Latinos populos, quorum ibi  
 iuventus caesa erat, Aemilius ad Pedum exercitum  
 duxit. Pedanos tuebatur <sup>f)</sup> Tiburs, Praenestinus,  
 Veliternusque populus: venerant et ab Lanuvio <sup>g)</sup>  
 Antioque auxilia. Ubi quum proeliis quidem superior  
 Romanus esset, ad urbem ipsam Pedum castraque  
 sociorum populorum, quae urbi adiuncta erant, integer  
 labor restaret; bello infecto repente omisso, consul,  
 quia collegae decretum triumphum audivit, ipse quo-  
 que triumphi ante victoriam flagitator Romam rediit.  
 Qua cupiditate obfensis Patribus, negantibusque, nisi  
 Pedito capto aut dedito, triumphum, hinc alienatus ab  
 senatu Aemilius seditiosis tribunatibus similem deinde  
 consulatum gessit. Nam neque, quoad fuit consul,  
 criminari apud populum Patres destitit, collega haud-  
 quaquam adversante, quia et ipse de plebe erat:  
 (materiam autem praebebat criminibus ager in La-  
 tino Falernoque agro maligne plebei divisus) et,  
 postquam senatus, finire imperium consulibus cu-  
 piens, dictatorem adversus rebellantes Latinos dici  
 iussit, Aemilius, cuius tum fasces erant, collegam

f) tuebantur Gron. Crev.

g) Lavinio Eaed.

U. c. 416. dictatorem dicit: ab eo magister equitum Iunius  
 a. C. 336. Brutus dictus. Dictatura popularis, et orationibus in  
 Patres criminosis, fuit, et quod tres leges secundissi-  
 mas plebei, adversas nobilitati, tulit: unam, ut ple-  
 biscita omnes Quirites tenerent: alteram, ut legum,  
 quae comitiis centuriatis ferrentur, ante initum suf-  
 fragium Patres auctores fierent: tertiam, ut alter  
 utique ex plebe, quum eo ventum sit, ut utrumque  
 plebeium consulem fieri liceret, censor crearetur.  
 Plus eo anno domi acceptum cladis ab consulibus ac  
 dictatore, quam ex victoria eorum bellicisque rebus  
 foris auctum imperium, Patres credebant.

U. c. 417. XIII. Anno insequenti, L. Furio Camillo, C.  
 a. C. 335. Maenio consulibus, quo insignitius ommissa res Aemi-  
 lio, superioris anni consuli, exprobraretur, Pedum  
 armis virisque et omni vi expugnandum ac delendum  
 senatus fremit; coactique novi consules omnibus eam  
 rem praeverti, proficiscuntur. Iam Latio is status  
 erat rerum, ut neque bellum neque pacem pati pos-  
 sent. ad bellum opes deerant: pacem ob agri adempti  
 dolorem adspernabantur. Mediis consiliis standum  
 videbatur, ut oppidis se tenerent; ne lacessitus Ro-  
 manus caussam belli haberet; et, si cuius oppidi ob-  
 sidio nunciata esset, undique ex omnibus populis  
 auxilium obsessis ferretur. Neque tamen, nisi admo-  
 dum a paucis populis, Pedani adiuti sunt. Tiburtes  
 Praenestinique, quorum ager propior erat, Pedum  
 pervenere; Aricinos Lanuvinosque <sup>h)</sup> et Veliternos,  
 Antiatibus Volscis se coniungentes, ad Asturae flu-  
 men Maenius, inproviso adortus, fudit. Camillus ad  
 Pedum cum Tiburtibus, maxime valido exercitu, ma-  
 iore mole, quamquam aequo prospero eventu, pugnat.  
 Tumultum maxime repentina inter proelium eruptio  
 oppidanorum fecit: in quos parte exercitus conversa,  
 Camillus non compulit solum eos intra moenia, sed  
 eodem etiam die, quum ipsos auxiliaque eorum per-

h) *Laviniosque* Gron. Crev.

culisset, oppidum scalis cepit. Placuit inde, iam U. c. 417. maiore conatu animoque ab unius expugnatione urbis<sup>a</sup>. C. 335. ad perdomandum Latium victorem circumducere exercitum. nec quievire ante, quam, expugnando aut in deditionem accipiendo singulas urbes, Latium omne subegere. Praesidiis inde dispositis per recepta oppida, Romam ad destinatum omnium consensu triumphum decessere. additus triumpho honos, ut statuæ equestres eis, rara illa ætate res, in foro ponerentur. Prius, quam comitiis in insequentem annum consules rogarent, Camillus de Latinis populis ad senatum retulit, atque ita disseruit: *Patres conscripti, quod bello armisque in Latio agendum fuit, id iam Deum benignitate ac virtute militum ad finem venit. caesi ad Pedum Asturamque sunt exercitus hostium; oppida Latina omnia, et Antium ex Volscis, aut vi capta, aut recepta in deditionem, praesidiis tenentur vestris. Reliqua consultatio est, quoniam rebellando saepius nos sollicitant, quonam modo perpetua pace quietos obtineamus. Dii immortales ita vos potentes huius consilii fecerunt, ut, sit Latium deinde, an non sit, in vestra manu posuerint. Itaque pacem vobis, quod ad Latinos adtinet, parare in perpetuum, vel saeviendo, vel ignoscendo, potestis. Vultis crudeliter consulere in deditos victosque? licet delere omne Latium, vastas inde solitudines facere, unde sociali egregio exercitu per multa bella magnaue saepe usi estis. Vultis exemplo maiorum augere rem Romanam, victos in civitatem accipiendo? materia crescendi per summam gloriam subpeditat. certe id firmissimum longe imperium est, quo obedientes gaudent. Sed maturato opus est, quidquid statuere placet, tot populos inter spem metumque suspensos animi habetis: et vestram itaque de eis curam quam primum absolvi, et illorum animos, dum expectatione stupent, seu poena, seu beneficio, praecipuari oportet. Nostrum<sup>1)</sup> fuit efficere, ut omnium*

i) add. enim Gron. Crev.

U. c. 417. *rerum vobis ad consulendum potestas esset. vestrum est*  
 a. C. 535. *decernere, quod optimum vobis reique publicae sit.*

XIV. Principes senatus relationem consulis de summa rerum laudare; sed, quum aliorum caussa alia esset, ita expediri posse consilium, dicere, ut pro merito cuiusque statueretur, si de singulis nominatim referrent populis. Relatum igitur de singulis decretumque. Lanuvinis civitas data sacraque sua reddita cum eo, ut aedes lucusque Sospitae Iunonis communis Lanuvinis municipibus cum populo Romano esset. Aricini Nomentanique et Pedani eodem iure, quo Lanuvini, in civitatem accepti. Tusculanæ servata civitas, quam habebant; crimenque rebellionis a publica fraude in paucos auctores versum. In Veliternos, veteres cives Romanos, quod toties rebellassent, graviter saevitum: et muri deiecti, et senatus inde abductus, iussique trans Tiberim habitare: ut eius, qui cis Tiberim deprehensus esset, usque ad mille pondo clarigatio esset; nec prius, quam aere persoluto, is, qui cepisset, extra vincula captum haberet. In agrum senatorum coloni missi: quibus adscriptis, speciem antiquae frequentiae Velitrae receperunt. Et Antium nova colonia missa cum eo, ut Antiatibus permetteretur, si et ipsi adscribi coloni vellent. naves inde longae abactae, interdictumque mari Antiati populo est, et civitas data. Tiburtes Praenestinique agro multati, neque ob recens tantum rebellionis, commune cum aliis Latinis, crimen; sed quod, taedio imperii Romani, cum Gallis, gente efferrata, arma quondam consociassent. Ceteris Latinis populis connubia commerciaque et concilia inter se ademerunt. Campanis, equitum honoris caussa, quia<sup>k</sup>) cum Latinis rebellare noluissent, Fundanisque et Formianis, quod per fines eorum tuta pacataque semper fuisset via, civitas sine suffragio data. Cumanos Suessulanosque eiusdem iuris conditionisque, cuius

k) qui Gron. Crev.



Capuam, esse placuit. Naves Antiatum partim in<sup>U. c. 417.</sup>  
 navalia Romae subductae, partim incensae, rostrisque<sup>a. C. 335.</sup>  
 earum subgestum, in foro exstructum, adornari placuit: Rostraque id templum adpellatum.

XV. C. Sulpicio Longo, P. Aelio Paeto consu-<sup>U. c. 418.</sup>  
 libus, quum omnia non opes magis Romanae, quam<sup>a. C. 334.</sup>  
 beneficiis parta gratia bona pace obtineret, inter Sidicinos Auruncosque bellum ortum. Aurunci, a T. Manlio consule in deditionem accepti, nihil deinde moverant: eo petendi auxilii ab Romanis caussa iustior fuit. Sed prius, quam consules ab urbe (iusserat enim senatus defendi Auruncos) exercitum educerent, fama adfertur; Auruncos metu oppidum deseruisse, profugosque cum coniugibus ac liberis Suessam communisse, quae nunc Aurunca adpellata; moenia antiqua eorum urbemque ab Sidicinis deletam. Ob ea infensus consulibus senatus, quorum cunctatione proditi socii essent, dictatorem dici iussit. dictus C. Claudius Regillensis, magistrum equitum C. Claudium Hortatorem dixit. Religio inde iniecta de dictatore: et, quum augures vitio creatum videri dixissent, dictator magisterque equitum se magistratu abdicarunt. Eo anno Minucia Vestalis, suspecta primo propter mundio rem iusto cultum, insimulata deinde apud pontifices ab indice servo; quum decreto eorum iussa esset sacris abstinere, familiamque in potestate habere; facto iudicio, viva sub terram ad portam Collinam dextra via strata defossa Scelerato campo. credo, ab incesto id ei loco nomen factum. Eodem anno Q. Publilius Philo praetor primus<sup>1)</sup> de plebe, adversante Sulpicio consule, qui negabat, rationem eius se habiturum, est factus; senatu, quum in summis imperiis id non obtinisset, minus in praetura tendente.

XVI. Insequens annus, L. Papirio Crasso, K. U. c. 419.  
 Duilio consulibus, Ausonum magis novo, quam magno<sup>a. C. 335.</sup>

1) primum Gron. Crev. c. Drak.

- U. c. 419. bello fuit insignis. ea gens Cales urbem incolebat.  
 a. C. 333. Sidicinis finitimis arma coniunxerat: unoque proelio  
 haud sane memorabili duorum populorum exercitus  
 fusus, propinquitate urbium et ad fugam pronior, et  
 in fuga ipsa tutior fuit. nec tamen omissa eius belli  
 cura Patribus, quia toties iam Sidicini aut ipsi move-  
 rant bellum, aut moventibus auxilium tulerant, aut  
 caussa armorum fuerant. Itaque omni ope adnisi  
 sunt, ut maximum ea tempestate imperatorem M.
- U. c. 420. Valerium Corvum consulem quartum facerent. collega  
 a. C. 332. additus Corvo M. Atilius Regulus. et, ne forte casu  
 erraretur, petatum ab consulibus, ut extra sortem Cor-  
 vi ea provincia esset. Exercitu victore a superioribus  
 consulibus accepto, ad Cales, unde bellum ortum erat,  
 profectus, quum hostes, ab superioris etiam certa-  
 minis memoria pavidos, clamore atque inpetu primo  
 fudisset; moenia ipsa obpugnare est adgressus. et  
 militum quidem is erat ardor, ut iam inde cum scalis  
 succedere ad muros vellent, evasurosque contende-  
 rent. Corvus, quia id arduum factu erat, labore mi-  
 litum potius, quam periculo, peragere inceptum voluit.  
 itaque aggerem et vineas egit, turresque muro admo-  
 vit: quarum usum forte oblata opportunitas praevertit.  
 namque M. Fabius, captivus Romanus, quum, per  
 negligentiam custodum festo die vinculis ruptis, per  
 murum inter opera Romanorum, religata ad pinnam  
 muri recte suspensus, manibus se demisisset; perpulit  
 imperatorem, ut vino epulisque sopitos hostes adgre-  
 deretur. nec maiore certamine capti cum urbe Auso-  
 nes sunt, quam acie fusi erant. Praeda capta ingens  
 est. praesidioque inposito Calibus reductae Romam  
 legiones. Consul ex senatusconsulto triumphavit:  
 et, ne Atilius expers gloriae esset, iussi ambo consu-  
 les adversus Sidicinos ducere exercitum. Dictatorem  
 ante ex senatusconsulto comitiorum habendorum  
 caussa dixerunt L. Aemilium Mamercinum. is ma-  
 gistrum equitum Q. Publilium Philonem dixit. Di-

ctatore comitia habente, consules creati sunt T. Ve-<sup>U. c. 421.</sup>  
 turius, Sp. Postumius. Etsi belli pars cum Sidicinis<sup>a. C. 351.</sup>  
 restabat; tamen, ut beneficio praevenirent desiderium  
 plebis, de colonia deducenda Cales retulerunt: facto-  
 que senatusconsulto, ut duo millia quingenti homines  
 eo scriberentur, triumviros coloniae deducendae agro-  
 que dividendo creaverunt K. Duilium, T. Quinctium,  
 M. Fabium.

XVII. Novi deinde consules, a veteribus exer-  
 citu accepto, ingressi hostium fines, populando usque  
 ad moenia atque urbem pervenerunt. Ibi, quia,  
 ingenti exercitu comparato, Sidicini et ipsi pro extre-  
 ma spe dimicaturi enixe videbantur, et Samnium  
 fama erat conciri ad bellum; dictator ab consulibus  
 ex auctoritate senatus dictus P. Cornelius Rufinus;  
 magister equitum M. Antonius. Religio deinde in-  
 cessit, vitio eos creatos: magistratuque se abdicave-  
 runt. et, quia pestilentia insecuta est, velut omnibus  
 eo vitio contactis auspiciis, res ad interregnum rediit.  
 ab interregno inito per quintum demum interregem  
 M. Valerium Corvum creati consules A. Cornelius  
 iterum et Cn. Domitius. Tranquillis rebus, fama<sup>U. c. 422.</sup>  
 Gallici belli pro tumultu valuit, ut dictatorem dici<sup>a. C. 330.</sup>  
 placeret. Dictus M. Papirius Crassus, et magister  
 equitum P. Valerius Publicola. a quibus quum<sup>m)</sup>  
 delectus intentius, quam adversus finitima bella, ha-  
 beretur, exploratores missi adtulerunt, quieta omnia  
 apud Gallos esse. Samnium quoque iam alterum an-  
 num turbari novis consiliis suspectum erat. eo ex agro  
 Sidicino exercitus Romanus non est deductus. Cete-  
 rum Samnites bellum Alexandri Epirensis in Lucanos  
 traxit. qui duo populi adversus regem, exscensionem  
 a Paesto facientem, signis conlatis pugnaverunt. eo  
 certamine superior Alexander, incertum qua fide cul-  
 turus, si perinde cetera processissent, pacem cum  
 Romanis fecit. Eodem anno census actus, novique

m) *dum Gron.*

U. c. 422. cives censi: tribus propter eos additae Maecia et  
 a. C. 330. Scaptia: censores addiderunt Q. Publilius Philo, Sp. Postumius. Romani facti Acerrani, lege ab L. Papirio praetore lata, qua civitas sine suffragio data. Haec eo anno domi militiaeque gesta.

U. a. 423. XVIII. Foedus insequens annus seu intemperie  
 a. C. 529. coeli, seu humana fraude fuit, M. Claudio Marcello, C. Valerio consulibus. Flaccum Potitumque varie in annalibus cognomen consulis invenio: ceterum, in eo, parvi refert, quid veri sit. illud pervelim, (nec omnes auctores sunt) proditum falso esse, venenis absumptos, quorum mors infamem annum pestilentia fecerit. sicut proditur tamen res, ne cui auctorum fidem abrogaverim, exponenda est. Quum primores civitatis similibus morbis, eodemque ferme omnes eventu, morerentur; ancilla quaedam ad Q. Fabium Maximum aedilem curulem, indicaturam se causam publicae pestis, professa est, si ab eo fides sibi data esset, haud futurum noxae indicium. Fabius confestim rem ad consules, consules ad senatum referunt: consensuque ordinis fides indici data. Tum patefactum, muliebri fraude civitatem premi, matronasque ea venena coquere; et, si sequi extemplo velint, manifesto deprehendi posse. Secuti indicem, et coquentes quasdam medicamenta, et recondita alia, invenerunt. quibus in forum delatis, et ad viginti matronis, apud quas deprehensa erant, per viatorem adcitis, duae ex eis, Cornelia ac Sergia, patriciae utraque gentis, quum ea medicamenta salubria esse contenderent, ab consulante indice bibere iussae, ut se falsum commentam arguerent; spatio ad conloquendum sumto, quum, submoto populo, in conspectu omnium rem ad ceteras retulissent; haud abnuentibus et illis bibere, epoto medicamento, suamet ipsae fraude omnes interierunt. comprehensae extemplo earum comites magnum numerum matronarum indicaverunt: ex quibus ad centum septuaginta damnatae.



Neque de veneficiis ante eam diem Romae quaesitum U. c. 423.  
est. Prodigii ea res loco habita; captisque magis<sup>a.</sup> C. 329.  
mentibus, quam consceleratis, similis visa. Itaque,  
memoria ex annalibus repetita, in secessionibus quon-  
dam plebis clavum ab dictatore fixum, alienatasque  
discordia mentes hominum eo piaculo compotes sui  
fecisse, dictatorem clavi figendi caussa creari placuit.  
creatus Cn. Quinctilius magistrum equitum L. Vale-  
rium dixit: qui, fixo clavo, magistratu se abdicave-  
runt.

XIX. Creati consules L. Papirius Crassus ite- U. c. 425.  
rum, L. Plautius Venno. cuius principio anni legati<sup>a.</sup> C. 327.  
ex Volscis Fabraterni, et Lucani, Romam venerunt,  
orantes, ut in fidem reciperentur. si a Samnitium  
armis defensi essent, se sub imperio populi Romani  
fideliter atque obedienter futuros. Missi tum ab se-  
natu legati, denunciatumque Samnitibus, ut<sup>n</sup>) eorum  
populorum finibus vim abstinerent. valuitque ea lega-  
tio, non tam quia pacem volebant Samnites, quam  
quia nondum parati erant ad bellum. Eodem anno  
Privernas bellum initum: cuius socii Fundani, dux  
etiam fuit Fundanus<sup>o</sup>), Vitruvius Vaccus; vir non  
domi solum, sed etiam Romae, clarus. aedes fuere in  
Palatio eius, quae Vacca prata, diruto aedificio publi-  
catoque solo, adpellata. Adversus hunc, vastantem  
effuse Setinum Norbanumque et Coranum agrum, L.  
Papirius profectus, haud procul castris eius consedit.  
Vitruvio nec, ut vallo se teneret adversus validiorem  
hostem, sana constare mens, nec, ut longius a castris  
dimicaret, animus subpetere. vix tota extra portam  
castrorum explicata acie, fugam magis retro, quam  
proelium aut hostem, spectante milite, sine consilio,  
sine audacia depugnat: et ut levi momento nec am-  
bigue est victus; ita, brevitate ipsa loci facillique  
receptu in tam propinqua castra, haud aegre militem  
a multa caede est tutatus: nec fore quisquam in ipso

n) ut del. Gron.

o) Fundanus fuit Gron. Crev.

U. c. 425. certamine, pauci in turba fugae extremae, quum in  
 a. C. 327. castra ruerent, caesi; primisque tenebris Privernum  
 inde petitum agmine trepido, ut muris potius, quam  
 vallo, sese tutarentur. A Priverno Plautius alter  
 consul, pervastatis passim agris praedaeque abacta, in  
 agrum Fundanum exercitum inducit. Ingredienti  
 fines senatus Fundanorum obcurrit; *negant, se pro*  
*Vitruvio sectamque eius secutis precatum venisse, sed*  
*pro Fundano populo; quem extra culpam belli esse,*  
*ipsum Vitruvium iudicasse, quum receptaculum fugae*  
*Privernum habuerit, non patriam Fundos. Priverni*  
*igitur hostes populi Romani quaerendos persequendosque*  
*esse, qui simul a Fundanis ac Romanis, utriusque pa-*  
*triae inmemores, defecerint. Fundanis pacem esse, et*  
*animos Romanos, et gratam memoriam acceptae civita-*  
*tis. Orare se consulem, ut bellum ab innoxio populo*  
*abstineat: agros, urbem, corpora ipsorum, coniugum-*  
*que, ac liberorum suorum, in potestate populi Romani*  
*esse, futuraque. Conlaudatis Fundanis, consul, lite-*  
*risque Romam missis, in officio Fundanos esse, ad*  
 Privernum flexit iter. Prius animadversum in eos,  
 qui capita coniurationis fuerant, a consule scribit  
 Claudius: ad trecentos quinquaginta ex coniuratis  
 vinctos Romam missos; eamque deditionem ab senatu  
 non acceptam: quod egentium atque humilium poena  
 defungi velle Fundanum populum censuerint.

XX. Privernum duobus consularibus exerciti-  
 bus quum obsideretur, alter consul comitiorum caussa  
 Romam revocatus. Carceres eo anno in circo primum  
 statuti. Nondum perfunctos cura Privernatis belli  
 tumultus Gallici fama atrox invasit, haud ferme um-

U. c. 426. quam neglecta Patribus. Extemplo igitur consules  
 a. C. 326. novi, L. Aemilius Mamercinus et C. Plautius, eo ipso  
 die, Kalendis Quinctilibus, quo magistratum <sup>p)</sup> inie-  
 runt, comparare inter se provincias iussi; et Mamer-  
 cinus, cui Gallicum bellum evenerat, scribere exerci-

*p) magistratus Græc.*

tum sine ulla vacationis venia. quin opificum quoque <sup>U. c. 426.</sup>  
vulgus et sellularii, minime militiae idoneum genus, <sup>a. C. 326.</sup>  
exciti dicuntur: Veiosque ingens exercitus contractus,  
ut inde obviam Gallis iretur. longius discedi, ne alio  
itinere hostis falleret ad urbem incedens, non placuit.  
Paucos deinde post dies, satis explorata temporis eius  
quiete, a Gallis Privernum omnis conversa vis. Duplex  
inde fama est: alii vi captam urbem, Vitruviumque  
vivum in potestatem venisse: alii, priusquam ultima  
adhiberetur vis, ipsos se in deditionem consulis ca-  
duceum praeferentes permisisse, auctores sunt, Vi-  
truviumque ab suis traditum. Senatus, de Vitruvio  
Privernatibusque consultus, consulem Plautium, di-  
rutis Priverni muris, praesidioque valido inposito, ad  
triumphum arcessit; Vitruvium in carcerem adservari  
iussit, quoad consul redisset; tum verberatum necari.  
aedes eius, quae essent in Palatio, diruendas, bona  
Semoni Sanco censuerunt consecranda: quodque aeris  
ex eis redactum est, ex eo aenei orbes facti, positi in  
sacello Sancti versus <sup>q)</sup> aedem Quirini. De senatu  
Privernate ita decretum, ut, qui senator Priverni  
post defectionem ab Romanis mansisset, trans Tibe-  
rim lege eadem, qua Veliterni, habitaret. His ita  
decretis, usque ad triumphum Plautii silentium de  
Privernatibus fuit: post triumphum consul, necato  
Vitruvio sociisque eius noxae, apud satiatos iam  
supplicii nocentium tutam mentionem de Privernati-  
bus ratus; *Quoniam auctores defectionis, inquit, me-  
ritas poenas et ab Diis immortalibus et a vobis habent,  
Patres conscripti, quid placet de innoxia multitudine  
fieri? Equidem, etsi meae partes exquirendae magis  
sententiae, quam dandae sunt; tamen, quum videam,  
Privernates vicinos Samnitibus esse, unde nunc nobis  
incertissima pax est; quam minimum irarum inter nos  
illosque relinqui velim.*

XXI. Quum ipsa per se res anceps esset, prout

m) *adversus* Crev.

U. c. 426. cuiusque ingenium erat, atrocius mitiusve suadenti-  
 a. C. 326. bus; tum incertiora omnia unus ex Privernatibus  
 legatis fecit, magis conditionis, in qua natus esset,  
 quam praesentis necessitatis, memor: qui, interroga-  
 tus a quodam tristioris sententiae auctore, *quam poe-  
 nam meritos Privernates censeret? eam, inquit, quam  
 merentur, qui se libertate dignos censent.* cuius quum  
 feroci responso infestiores factos videret consul eos,  
 qui ante Privernatium caussam inpugnabant; ut ipse  
 benigna interrogatione mitius responsum eliceret,  
*Quid, si poenam, inquit, remittimus vobis, qualem nos  
 pacem vobiscum habituros speremus? Si bonam dede-  
 ritis, inquit, et fidam, et perpetuam: si malam, haud  
 diuturnam.* Tum vero minari, nec id ambigue, Pri-  
 vernatem quidam, et illis vocibus ad rebellandum  
 incitari pacatos populos: pars melior senatus ad me-  
 liora responsum <sup>r)</sup> trahere, et dicere, *Viri, et liberi,  
 vocem auditam. an credi posse, ullum populum, aut  
 hominem denique, in ea conditione, cuiuseum poeniteat,  
 diutius, quam necesse sit, mansurum? Ibi pacem esse  
 fidam, ubi voluntarii pacati sint; neque eo loco, ubi  
 servitutem esse velint, fidem sperandam esse.* In hanc  
 sententiam maxime consul ipse inclinavit animos,  
 idemtidem ad principes sententiarum consulares, uti  
 exaudiri posset a pluribus, dicendo, *Eos demum, qui  
 nihil, praeterquam de libertate, cogitent <sup>s)</sup>, dignos esse,  
 qui Romani fiant.* Itaque et in senatu caussam obti-  
 nuere, et ex auctoritate Patrum latum ad populum  
 est, ut Privernatibus civitas daretur. Eodem anno  
 Anxur trecenti in coloniam missi sunt: bina iugera  
 agri acceperunt.

U. c. 427. XXII. Secutus est annus nulla re belli domive  
 a. C. 325. insignis, P. Plantio Proculo, P. Cornelio Scapula con-  
 sulibus; praeterquam quod Fregellas (Sidicinorum is  
 ager, deinde Volscorum fuerat) colonia deducta; et  
 populo visceratio data a M. Flavio in funere matris.

<sup>r)</sup> responsa Gron. Crev.

<sup>s)</sup> cogitant Gron.



Erant, qui, per speciem honorandae parentis, meri-<sup>U. c. 427.</sup>  
 tam mercedem populo solutam interpretarentur; quod<sup>a. C. 3-5.</sup>  
 eum, die dicta ab aedilibus, crimine stupratae matris-  
 familiae absolvisset. Data visceratio in praeteritam  
 iudicii gratiam, honoris etiam ei caussa fuit: tribu-  
 natumque plebei, proximis comitiis, absens petentibus  
 praefertur. Palaepolis fuit haud procul inde, ubi  
 nunc Neapolis sita est. duabus urbibus populus idem  
 habitabat. Cumis erant oriundi. Cumani ab Chalcide  
 Euboica originem trahunt. Classe, qua advecti ab  
 domo fuerant, multum in ora maris eius, quod adco-  
 lunt, potuere. Primo in insulas Aenariam et Pithe-  
 cusas egressi, deinde in continentem ausi sedes trans-  
 ferre. Haec civitas, quum suis viribus, tum Samni-  
 tium infida adversus Romanos societate freta, sive  
 pestilentiae, quae Romanam urbem adorta nunciaba-  
 tur, fidens, multa hostilia adversus Romanos, agrum  
 Campanum Falernumque incolentes, fecit. Igitur,  
 L. Cornelio Lentulo, Q. Publilio Philone iterum con-<sup>U. c. 428.</sup>  
 sulibus, fecialibus Palaepolim ad res repetendas missis,<sup>a. C. 324.</sup>  
 quum relatum esset a Graecis, gente lingua magis  
 strenua, quam factis, ferox responsum; ex auctoritate  
 Patrum populus Palaepolitanis bellum fieri iussit.  
 Inter consules provinciis comparatis, bello Graeci  
 persequendi Publilio evenerunt; Cornelius altero ex-  
 exercitu Samnitibus, si qua se moverent, obpositus.  
 Fama autem erat, defectioni Campanorum imminentes  
 admoturos castra. ibi optimum visum Cornelio stativa  
 habere. Ab utroque consule, exiguum spem pacis  
 cum Samnitibus esse, certior fit senatus.

XXIII. Publilius, duo millia Nolanorum mili-  
 tum et quatuor Samnitium, magis Nolanis cogentibus,  
 quam voluntate Graecorum, recepta Palaepolim <sup>t)</sup>,  
 miserat: Cornelius, delectum indictum a magistrati-  
 bus, universum Samnium erectum, ac vicinos popu-  
 los, Privernatem, Fundanumque, et Formianum,

t) *Palaepoli* Gron. Crev.

U. c. 428. haud ambigue sollicitari. Ob haec quum legatos  
 a. C. 324. mitti placuisset prius ad Samnites, quam bellum fieret; responsum redditur ab Samnitibus ferox. Ultro incusabant iniurias Romanorum: neque eo neglegentius ea, quae ipsis obiicerentur, purgabant. *Haud ullo publico consilio auxiliove iuvare Graecos: nec Fundanum Formianumve a se sollicitatos, quippe minime poenitere se virium suarum, si bellum placeat. Ceterum non posse dissimulare, aegre pati civitatem Samnitium, quod Fregellas, ex Volscis captas dirutasque ab se, restituerit Romanus populus, coloniamque in Samnitium agro inposuerit, quam coloni eorum Fregellas adpellent. Eam se contumeliam iniuriamque, ni sibi ab iis, qui fecerint, dematur, ipsos omni vi depulsuros esse.* Quum Romanus legatus ad disceptandum eos ad communes socios atque amicos vocaret: *Quid perplexe agimus?* inquit. *Nostra certamina, Romani, non verba legatorum, nec hominum quisquam disceptator, sed campus Campanus, in quo concurrendum est, et arma, et communis Mars belli decernet. Proinde inter Capuam Suessulamque castra castris conferamus: et, Samnis Romanusne imperio Italiam regat, decernamus.* Legati Romanorum quum se, non quo hostis vocasset, sed quo imperatores sui duxissent, ituros esse respondissent; iam Publilius, inter Palaepolim Neapolinque loco opportune capto, diremerat hostibus societatem auxilii mutui; qua, ut quisque locus premeretur, inter se usi fuerant. Itaque quum et comitiorum dies instaret, et Publilium, imminentem hostium muris, avocari ab spe capiendae in dies urbis, haud e republica esset; actum cum tribunis est, ad populum ferrent, ut, quum Publilius Philo consulatu abisset, pro consule rem gereret, quoad debellatum cum Graecis esset. L. Cornelio (quia ne eum quidem in Samnium iam ingressum revocari ab inpetu belli placebat) literae missae, ut dictatorem comitiorum caussa diceret. dixit M. Claudium Marcellum. ab eo

magister equitum dictus Sp. Postumius. Nec tamen <sup>U. c. 428.</sup> ab dictatore comitia sunt habita, quia, vitione creatus <sup>a. C. 324.</sup> esset, in disquisitionem venit. consulti augures, vitiosum videri dictatorem; pronunciaverunt. Eam rem tribuni suspectam infamemque criminando fecerunt. *Nam neque facile fuisse id vitium nosci, quum consul oriens* <sup>u)</sup> *nocte silentio diceret dictatorem: neque ab consule cuiquam publice privatimve de ea re scriptum esse: nec quemquam mortalium exstare, qui se vidisse aut audisse quid dicat, quod auspiciū dirimeret: neque augures divinare Romae sedentes potuisse, quid in castris consuli vitii obvenisset. Cui non adparere, quod plebeius dictator sit, id vitium auguribus visum?* Haec aliaque ab tribunis nequidquam iactata: tamen ad interregnum res redit: dilatisque alia atque alia de causa comitiis, quartusdecimus demum interrex L. Aemilius consules creat C. Poetelium, L. Papirium <sup>U. c. 429.</sup> Mugillanum. Cursorem in aliis annalibus invenio. <sup>a. C. 325.</sup>

XXIV. Eodem anno Alexandriam in Aegypto proditum conditam; Alexandrumque, Epiri regem, ab exsule Lucano interfectum, sortes Dodonaei Iovis eventu adfirmasse. Adcito ab Tarentinis in Italiam data dictio erat, *caveret Acherusiam aquam Pandosiamque urbem: ibi fati eius terminum dari.* Eoque ocus transmisit in Italiam, ut quam maxime procul abesset urbe Pandosia in Epiro et Acheronte amni, quem ex Molosside fluentem in stagna inferna accipit Theprotius sinus. Ceterum (ut ferme fugiendo in media fata ruitur) quum saepe Bruttias Lucanasque legiones fudisset; Heracleam Tarentinorum coloniam, Consentiam ex Lucanis, Sipontumque, Bruttiorum Terinam, alias inde Messapiorum ac Lucanorum cepisset urbes, et trecentas familias inlustres in Epirum, quas obsidum numero haberet, misisset; haud procul Pandosia urbe imminente <sup>x)</sup> Lucanis ac Bruttiis finibus tris tumultos, aliquantum inter se distantes, insedit;

u) oriente Gron.

x) imminentes Gron. Crev.

U. c. 429. ex quibus incursiones in omnem partem agri hostilis  
 a. C. 523. faceret. et ducentos ferme Lucanorum exsules circa  
 se pro fidis habebat, ut pleraque eius generis ingenia  
 sunt, cum fortuna mutabilem gerentes fidem. Imbres  
 continui, campis omnibus inundantes, quum inter-  
 clussissent trifariam exercitum a mutuo inter se auxilio,  
 duo praesidia, quae sine rege erant, improviso hosti-  
 um adventu obprimuntur: deletisque eis, ad ipsius  
 obsidionem omnes conversi. Inde ab Lucanis exsu-  
 libus ad suos nuncii missi sunt: pactoque reditu pro-  
 missum est, regem, aut vivum, aut mortuum, in pote-  
 statem daturus. Ceterum cum delectis ipse, egregium  
 facinus ausus, per medios erumpit hostes, et ducem  
 Lucanorum cominus congressum obtruncat: contra-  
 hensque suos ex fuga palatos, pervenit ad amnem,  
 ruinis recentibus pontis, quem vis aquae abstulerat,  
 indicantem iter. quem quum incerto vado transiret  
 agmen, fessus metu ac labore miles, increpans nomen  
 abominandum fluminis, *Iure Acheros vocaris*, inquit.  
 quod ubi ad aures accidit regis; adiecit extemplo ani-  
 mum fati suis; substititque dubius, an transiret.  
 Tum Sotimus minister ex regiis pueris, *quid in tanto  
 discrimine periculi cunctaretur* interrogans, indicat,  
 Lucanos insidiis quaerere locum. Quos ubi respexit  
 rex procul grege facto venientes, stringit gladium, et  
 per medium amnem transmittit equum. Iamque in  
 vadum egressum eminus veruto Lucanus exsul trans-  
 figit. lapsum inde cum inhaerente telo corpus exani-  
 me detulit annis in hostium praesidia. Ibi foeda  
 laceratio corporis facta. namque, praeciso medio,  
 partem Consentiam misere: pars ipsis retenta ad lu-  
 dibrium, quae quum iaculis saxisque procul incesse-  
 retur, mulier una, ultra humanarum irarum fidem  
 saevienti turbae immixta, ut parumper sustinerent pre-  
 cata, flens ait, *virum sibi liberosque, captos apud hostes  
 esse: sperare, corpore regio utcumque mulcato se suos  
 redempturam*. Is finis lacerationi fuit. sepultumque



Consentiae, quod membrorum reliquum fuit, cura <sup>U. c. 429.</sup>  
 mulieris unius: ossaque Metapontum ad hostes re- <sup>a. C. 323.</sup>  
 missa; inde Epirum devecta ad Cleopatram uxorem  
 sororemque Olimpiadem: quarum mater Magni Alex-  
 andri altera, soror altera fuit. Haec de Alexandri  
 Epirensis tristi eventu, quamquam Romano bello for-  
 tuna eum abstinuit, tamen, quia in Italia bella gessit,  
 paucis dixisse satis sit.

XXV. Eodem anno lectisternium Romae, quin-  
 to post conditam urbem, iisdem, quibus ante, placan-  
 dis habitum est Diis. Novi deinde consules iussu  
 populi quum misissent, qui indicerent Samnitibus  
 bellum; et ipsi maiore conatu, quam adversus Grae-  
 cos, cuncta parabant: et alia nova nihil tum animo  
 tale agitantibus accesserunt auxilia. Lucani atque  
 Apuli, quibus gentibus nihil ad eam diem cum Ro-  
 mano populo fuerat, in fidem venerunt, arma virosque  
 ad bellum pollicentes. foedere ergo in amicitiam ac-  
 cepti. Eodem tempore etiam in Samnio res prospere  
 gesta. tria oppida in potestatem venerunt, Allifae,  
 Callifae, Ruffrium: aliusque ager primo adventu con-  
 sulum longe lateque est pervastatus. Hoc bello tam  
 prospere commisso, alteri quoque bello, quo Graeci  
 obsidebantur, iam finis aderat. nam, praeterquam  
 quod, interseptis munimentis hostium, pars parti ab-  
 scissa erat, foediora aliquanto intra muros iis, quibus  
 hostis territabat, patiebantur: et velut capti a suis met  
 ipsis praesidiis, indigna iam liberis quoque ac coniugibus,  
 et quae captarum urbium extrema sunt, patie-  
 bantur. Itaque quum, et a Tarento et a Samnitibus,  
 fama esset, nova auxilia ventura, Samnitium plus;  
 quam vellent, intra moenia esse rebantur: Tarenti-  
 norum iuventutem, Graeci Graecos, haud minus per  
 quos Samniti Nolanoque, quam ut Romanis hostibus  
 resisterent, expectabant. Postremo levissimum ma-  
 lorum deditio ad Romanos visa. Charilaus et Nim-  
 phius, principes civitatis, communicato inter se con-

U. c. 429. silio, partes ad rem agendam divisere, ut alter ad  
 a. C. 323. imperatorem Romanorum transfugeret, alter subsi-  
 steret ad praebendam opportunam consilio urbem.  
 Charilaus fuit, qui ad Publilium Philonem venit: et,  
*quod bonum, faustum, felix<sup>y</sup>) Palaepolitanis populoque*  
*Romano esset, tradere se, ait, moenia statuisset. Eo*  
*facto utrum ab se prodita, an servata, patria videatur,*  
*in fide Romana positum esse. sibi privatim nec pacisci*  
*quidquam, nec petere: publice petere, quam pacisci,*  
*magis, ut, si successisset inceptum, cogilaret populus*  
*Romanus, potius cum quanto studio periculoque reditum*  
*in amicitiam suam esset, quam qua stultitia et temeri-*  
*tate de officio decessum.* Conlaudatus ab imperatore  
 tria millia militum ad occupandam eam partem urbis,  
 quam Samnites insidebant, accepit: praesidio ei L.  
 Quinctius tribunus militum praepositus.

XXVI. Eodem tempore et Nymphius praetorem  
 Samnitium arte adgressus perpulerat, ut, quoniam  
 omnis Romanus exercitus aut circa Palaepolim aut in  
 Samnio esset, sineret se classe circumvehi ad Roma-  
 num agrum, non oram modo maris, sed ipsi urbi pro-  
 pinqua loca depopulaturum. Sed, ut falleret, nocte  
 proficiscendum esse, extemploque naves deducendas.  
 quod quo maturius fieret, omnis iuventus Samnitium,  
 praeter necessarium urbis praesidium, ad litus missa.  
 ubi dum Nymphius in tenebris et multitudine semet  
 ipsa inpediente, sedulo aliis alia imperia turbans, terit  
 tempus; Charilaus, ex composito ab sociis in urbem  
 receptus, quum summa urbis Romano milite inplesset,  
 tolli clamorem iussit: ad quem Graeci, signo accepto  
 a principibus, quievere. Nolani per aversam partem  
 urbis via Nola ferente effugiunt. Samnitibus exclu-  
 sis ab urbe, ut expeditior in praesentia fuga, ita foe-  
 dior, postquam periculo evaserunt, visa: quippe qui  
 inermes, nulla rerum suarum non relicta inter hostes,  
 ludibrium non externis modo, sed etiam popularibus,

y) *felixque* Gron. Crev.

spoliati atque egentes domos rediere. Haud ignarus<sup>U. c. 429.</sup> opinionis alterius, qua haec proditio ab Samnitibus<sup>a. C. 323.</sup> facta traditur, quum auctoribus hoc dedi, quibus dignius credi est, tum foedus Neapolitanum (eo enim deinde summa rei Graecorum venit) similis vero facit, ipsos in amicitiam redisse. Publio triumphus decretus; quod satis credebatur, obsidione domitos hostes in fidem venisse. Duo singularia haec ei viro primum contigere, prorogatio imperii non ante in ullo facta, et acto honore triumphus.

XXVII. Aliud subinde bellum cum alterius orae Graecis exortum. namque Tarentini, quum rem Palaepolitanam vana spe auxilii aliquamdiu sustinuissent, postquam Romanos urbe potitos acceperere, velut destituti, ac non qui ipsi destituissent, increpare Palaepolitinos: ira atque invidia in Romanos furere; eo etiam, quod Lucanos et Apulos (nam utraque eo anno societas coepta est) in fidem populi Romani venisse adlatum est. *quippe propemodum perventum ad se esse: iamque in eo rem fore, ut Romani aut hostes, aut domini habendi sint. Discrimen profecto rerum suarum in bello Samnitium eventuque eius verti. eam solam gentem restare, nec eam ipsam satis validam, quando Lucanus defecerit. quem revocari adhuc, impellique ad abolendam societatem Romanam posse, si qua ars serendis discordiis adhibeatur.* Haec consilia quum apud cupidos rerum novandarum valuissent; ex iuventute quidam Lucanorum pretio adsciti, clari magis inter populares, quam honesti, inter se mulcati ipsi virgis, quum corpora nuda intulissent in civium coetum, vociferati sunt, se, quod castra Romana ingredi ausi essent, a consule virgis caesos, ac prope securi percussos esse. Deformis suapte natura res quum speciem iniuria magis, quam doli, prae se ferret, concitati homines cogunt clamore suo magistratus senatum vocare: et alii, circumstantes concilium, bellum in Romanos poscunt: alii ad concitandam in arma multitudinem

U. c. 429. agrestium discurrunt: tumultuque etiam sanos con-  
 a. C. 323. sternante animos, decernitur, ut societas cum Samni-  
 tibus renovaretur<sup>z</sup>); legatique ad eam rem mittuntur<sup>a</sup>).  
 Repentina res quia quam caussam nullam, tam ne fidem  
 quidem habebat, coacti a Samnitibus et obsides dare,  
 et praesidia in loca munita accipere, caeci fraude et  
 ira nihil recusarunt. Dilucere deinde brevi fraus coe-  
 pit, postquam criminum falsorum auctores Tarentum  
 comunigravere: sed, amissa omni de se potestate, ni-  
 hil ultra, quam ut poeniteret frustra, restabat.

XXVIII. Eo anno plebi Romanae velut aliud ini-  
 tium libertatis factum est, quod ne<sup>b</sup>) desierunt:  
 mutatum autem ius ob unius foeneratoris simul libidi-  
 nem, simul crudelitatem insignem. L. Papirius is  
 fuit: cui quum se C. Publilius ob aes alienum paternum  
 nexum dedisset; quae aetas formaque misericordiam  
 elicere poterat, ad libidinem et contumeliam animum  
 accenderunt: et, florem aetatis eius fructum adventi-  
 cium crediti ratus, primo perlicere adolescentem ser-  
 mone incesto est conatus: dein, postquam adsperna-  
 bantur flagitium aures, minis territare, atque idem-  
 tidem admonere fortunae: postremo, quum ingenui-  
 tatis magis, quam praesentis conditionis, memorem  
 videret, nudari iubet, verberaque adferri. Quibus  
 laceratus iuvenis, quum se in publicum proripuisset,  
 libidinem crudelitatemque conquerens foeneratoris;  
 ingens vis hominum, quum aetatis miseratione atque  
 indignitate iniuriae accensa, tum suae conditionis li-  
 berumque suorum respectu in forum; atque inde, ag-  
 mine facto, ad curiam concurrit. et quum consules,  
 tumultu repentino coacti, senatum vocarent, introeun-  
 tibus in curiam Patribus laceratum iuvenis tergum,  
 procumbentes ad singulorum pedes, ostentabant. Vic-  
 tum eo die ob inpotentem iniuriam unius ingens vin-  
 culum fidei: iussique consules ferre ad populum,

z) *renovetur* Crev.

b) *ligari nexi* Gron.

a) *mittantur* Gron. Crev.



ne quis, nisi qui noxam meruisset, donec poenam <sup>U. c. 429.</sup> lueret, in compedibus aut in nervo teneretur; pecu- <sup>a. C. 323.</sup>niae creditae bona debitoris, non corpus obnoxium esset. Ita nexi soluti; cautumque in posterum, ne necerentur.

XXIX. Eodem anno, quum satis per se ipsum Samnitium bellum et defectio repens Lucanorum, auctoresque defectionis Tarentini sollicitos haberent Patres, accessit, ut et Vestinus populus Samnitibus sese coniungeret. quae res sicut eo anno sermonibus magis passim hominum iactata, quam in publico ullo concilio est; ita insequentis anni consulibus, L. Furio Camillo iterum, Iunio Bruto Scaevae, nulla prior <sup>U. c. 430.</sup> <sup>a. C. 322.</sup> potiorque visa est, de qua ad senatum referrent. et, quamquam nova res erat, tamen tanta cura Patres incessit, ut pariter eam susceptam neglectamque timerent: ne aut impunitas eorum lascivia superbiaque, aut bello poenae expetitae metu propinquo atque ira concirent finitimos populos. Et erat genus omne abunde bello Samnitibus par, Marsi Pelignique et Mar- rucini: quos, si Vestinus adtingeretur, omnes habendos hostes. Vicit tamen pars, quae in praesentia videri potuit maioris animi, quam consilii: sed eventus docuit, fortes fortunam iuvare. Bellum ex auctoritate Patrum populus adversus Vestinos iussit. Provincia ea Bruto, Samnium Camillo sorte evenit. Exercitus utroque ducti, et cura tuendorum finium hostes prohibiti coniungere arma. Ceterum alterum consullem L. Furium, cui maior moles rerum imposita erat, morbo gravi implicatum fortuna bello subtraxit: iussusque dictatorem dicere rei gerendae causa, longe clarissimum bello ea tempestate dixit L. Papirium Cursorem; a quo Q. Fabius Maximus Rullianus magister equitum est dictus; par nobile rebus in eo magistratu gestis, discordia tamen, qua prope ad ultimum dimicationis ventum est, nobilius. Ab altero consule in Vestinis multiplex bellum, nec usquam vario eventu,

U. c. 430. gestum est. nam et pervastavit agros, et, populando  
 a. C. 322. atque urendo tecta hostium sataque, in aciem invitos  
 extraxit: et ita proelio uno adcidit Vestinorum res,  
 haudquaquam tamen incruento milite suo, ut non in  
 castra solum refugerent hostes, sed, iam ne vallo  
 quidem ac fossis freti, dilaberentur in oppida, situ  
 urbium moenibusque se defensuri. Postremo oppida  
 quoque vi expugnare <sup>c)</sup> adortus, primo Cutinam in-  
 genti ardore militum aut vulnere ira, quod haud  
 fere quisquam integer proelio excesserat, scalis cepit:  
 deinde Cingiliam. utriusque urbis praedam militibus,  
 quod eos neque portae, neque muri hostium arcuerant,  
 concessit.

XXX. In Samnium incertis itum auspiciis est:  
 cuius rei vitium non in belli eventum, quod prospere  
 gestum est, sed in rabiem atque iras imperatorum ver-  
 tit. namque Papirius dictator, a pullario monitus, quum  
 ad auspicium repetendum Romam proficisceretur,  
 magistro equitum denunciavit, ut sese loco teneret,  
 neu, absente se, cum hoste manum consereret. Fa-  
 bius quum post profectionem dictatoris per explorato-  
 res comperisset, perinde omnia soluta apud hostes,  
 ac si nemo Romanus in Samnio esset: seu ferox  
 adolescens indignitate accensus, quod omnia in dicta-  
 tore viderentur reposita esse; seu occasione bene ge-  
 rendae rei inductus; exercitu instructo paratoque pro-  
 fectus ad Imbrinium (ita vocant locum), acie cum  
 Samnitibus conflixit. ea fortuna pugnae fuit, ut nihil  
 relictum sit, quo, si adfuisset dictator, res melius  
 geri potuerit: non dux militi, non miles duci defuit,  
 Eques etiam, auctore L. Cominio tribuno militum,  
 qui aliquoties impetu capto perrumpere non poterat  
 hostium agmen, detraxit frenos equis; atque ita con-  
 citatos calcaribus permisit, ut sustinere eos nulla vis  
 posset. per arma, per viros late stragem dedere. Se-  
 cutus pedes impetum equitum, turbatis hostibus in-

c) oppugnare Gron.

tulit signa. Viginti millia hostium caesa eo die tra-<sup>U. c. 430.</sup>  
duntur. Auctores habeo, bis cum hoste signa conlata,<sup>a. C. 322.</sup>  
dictatore absente, bis rem egregie gestam. Apud an-  
tiquissimos scriptores una haec pugna invenitur; in  
quibusdam annalibus tota res praetermissa est. Ma-  
gister equitum, ut ex tanta caede, multis potitus spo-  
liis, congesta in ingentem acervum hostilia arma sub-  
dito igne concremavit: seu votum id Deorum cuipiam  
fuit; seu credere libet Fabio auctori, eo factum, ne  
suae gloriae fructum dictator caperet, nomenque ibi  
scriberet, aut spolia in triumpho ferret. Literae  
quoque de re prospere gesta ad senatum, non ad dic-  
torem, missae, argumentum fuere minime cum eo  
communicantis laudes <sup>d)</sup>. Ita certe dictator id factum  
accepit, ut, laetis aliis victoria parta, prae se ferret  
iram tristitiamque. Misso itaque repente senatu, se  
ex curia proripuit: tum vero, non Samnitium magis  
legiones, quam maiestatem dictatoriam et disciplinam  
militarem, a magistro equitum victam et eversam dic-  
titans, si illi impune spretum imperium fuisset. Ita-  
que plenus minarum iraeque, profectus in castra, quum  
maximis itineribus isset, non tamen praevenire famam  
adventus sui potuit. Praecurrerant enim ab urbe,  
qui nunciarent, dictatorem avidum poenae venire,  
alternis pene verbis T. Manlii factum laudantem.

XXXI. Fabius, concione extemplo advocata, ob-  
testatus milites est, *ut, qua virtute rempublicam ab*  
*infestissimis hostibus defendissent, eadem se, cuius*  
*ductu auspicioque vicissent, ab impotenti crudelitate dic-*  
*tatoris tutarentur. Venire amentem invidia, iratum*  
*virtuti alienae felicitatique, ferere, quod, se absente, res-*  
*publica egregie gesta esset: malle, si mutare fortunam*  
*posset, apud Samnites, quam Romanos, victoriam esse.*  
*Imperium dictitare spretum, tamquam non eadem mente*  
*pugnari vetuerit, qua pugnatum doleat: et tunc invi-*  
*dia impedire virtutem alienam voluisse, cupidissimisque*

d) laudem Gron. Crev.

U. c. 430. *arma ablaturum fuisse militibus, ne, se absente, mo-*  
 a. C. 522. *veri possent; et nunc id furere, id aegre pati, quod sine*  
*L. Papirio, non inermes, non manci milites fuerint,*  
*quod se Q. Fabius magistrum equitum duxerit, ac non*  
*accensum dictatoris. Quid illum facturum fuisse, si,*  
*quod belli casus ferunt, Marsque communis, adversa*  
*pugna evenisset; qui sibi, devictis hostibus, republica*  
*bene gesta, ita ut non ab illo unico duce melius geri po-*  
*tuerit, supplicium magistro equitum minetur? Neque*  
*illum magistro equitum infestiozem, quam tribunis mi-*  
*litum, quam centurionibus, quam militibus esse, si*  
*possit, in omnes saeviturum fuisse: quia id nequeat, in*  
*unum saevire. Etiam invidiam, tanquam ignem, sum-*  
*ma petere; in caput consilii, in ducem incurrere. si se*  
*simul cum gloria rei gestae extinxisset, tunc victorem,*  
*velut in capto exercitu dominantem, quidquid licuerit*  
*in magistro equitum, in militibus ausurum. Proinde*  
*adessent in sua causa omnium libertati. Si consensum*  
*exercitus eundem, qui in proelio fuerit, in tuenda vic-*  
*toria videat, et salutem unius omnibus curae esse: incli-*  
*naturum ad clementiorem sententiam animum. Postremo*  
*se vitam fortunasque suas illorum fidei virtutique per-*  
*mittere.*

XXXII. Clamor e tota concione ortus, uti bonum animum haberet: neminem illi vim adlaturum, salvis legionibus Romanis. Haud multo post dictator advenit: classicoque extemplo ad concionem advocavit. Tum, silentio facto, praeco Q. Fabium magistrum equitum citavit. qui simul ex inferiore loco ad tribunal accessit, tum dictator, *Quaero, inquit, de te, Q. Fabi, quum summum imperium dictatoris sit; pareantque ei consules, regia potestas, praetores iisdem auspiciis, quibus consules, creati: aequum censeas, necne, magistrum equitum dicto audientem esse? Itemque illud interrogo, quum me incertis auspiciis profectum ab domo scirem, utrum mihi turbatis religionibus respublica in discrimen committenda fuerit, an auspicia repetenda,*



*ne quid dubiis Diis agerem? Simul illud, quae dicta-*<sup>U. c. 430.</sup>  
*tori religio impedimento ad rem gerendam fuerit, num*<sup>a. G. 322.</sup>  
*ea magister equitum solutus ac liber potuerit esse?*  
*Sed quid ego haec interrogo? quum, si ego tacitus ab-*  
*issem, tamen tibi ad voluntatis interpretationem meae*  
*dirigenda tua sententia fuerit. Quin tu respondes, ve-*  
*tuerimne, te quidquam rei, me absente, agere? vetue-*  
*rimne, signa cum hostibus conferre? quo tu imperio*  
*meo spreto, incertis auspiciis, turbatis religionibus, ad-*  
*versus morem militarem disciplinamque maiorum et nu-*  
*men Deorum, ausus es cum hoste configere. Ad haec,*  
*quae interrogatus es, responde. extra ea, cave, vocem*  
*mittas. Accede, lictor. Adversus quae singula*<sup>e)</sup>*quum*  
 respondere haud facile esset, et nunc quereretur, eun-  
 dem accusatorem capitis sui ac iudicem esse; modo,  
 vitam sibi eripi citius, quam gloriam rerum gesta-  
 rum, posse, vociferaretur; purgaretque se in vicem,  
 atque ultro accusaret: tunc Papirius, redintegrata ira,  
 spoliari magistrum equitum, ac virgas et secures ex-  
 pediri iussit. Fabius, fidem militum implorans, la-  
 cerantibus vestem lictoribus, ad triarios, tumultum  
 iam in concione miscentes, sese recepit. Inde clamor  
 in totam concionem est perlatus: alibi preces, alibi  
 minae audiebantur. qui proximi forte tribunal stete-  
 rant, quia subiecti oculis imperatoris noscitari pote-  
 rant, orabant, ut parceret magistro equitum, neu cum  
 eo exercitum damnaret. Extrema concio et circa Fa-  
 bium globus increpabant inclementem dictatorem: nec  
 procul seditione aberant. ne tribunal quidem satis  
 quietum erat. Legati circumstantes sellam orabant,  
 ut rem in posterum diem differret, et irae suae spa-  
 tium, et consilio tempus daret: *Satis castigatam ado-*  
*lescentiam Fabii esse: satis deformatam victoriam: ne*  
*ad extremum finem supplicii tenderet: neu unico iuveni,*  
*neu patri eius, clarissimo viro, neu Fabiae genti eam*  
*iniungeret ignominiam. Quum parum precibus, pa-*

z) add. Q. Fabio Gron. Crev.

U. c. 430. rum caussa proficerent, *intueri saevientem concionem*  
 a. C. 322. iubebant. *ita irritatis militum animis subdere ignem*  
*ac materiam seditioni, non esse aetatis, non prudentiae*  
*eius. neminem id Q. Fabio, poenam deprecanti suam;*  
*vitio versurum, sed dictatori, si obcaecatus ira infe-*  
*stam multitudinem in se pravo certamine movisset. Po-*  
*stremo, ne id se gratiae dare Q. Fabii crederet, se ius-*  
*iurandum dare paratos esse; non videri e republica, in*  
*Q. Fabium eo tempore animadverti.*

XXXIII. His vocibus quum in se magis incitarent dictatorem, quam in magistrum equitum placarent, iussi de tribunali descendere legati: et, silentio nequidquam per praeconem tentato, quum, prae strepitu ac tumultu, nec ipsius dictatoris, nec adparitorum eius vox audiretur; nox, velut in proelio, certamini finem fecit. Magister equitum, iussus postero die adesse, quum omnes adfirmarent, infestius Papirium exarsurum, agitatum contentione ipsa exacerbatumque, clam ex castris Romam profugit: et, patre auctore M. Fabio, qui ter iam consul dictatorque fuerat, vocato extemplo senatu, quum maxime conquereretur apud Patres vim atque iniuriam dictatoris, repente strepitus ante curiam lictorum submoventium auditur: et ipse infensus aderat, postquam comperit profectum ex castris, cum expedito equitatu secutus. Iterata deinde contentio<sup>f)</sup>; et prendi Fabium Papirius<sup>g)</sup> iussit. Ubi quum, deprecantibus primoribus Patrum atque universo senatu, perstaret in incepto inimitis animus; tum pater M. Fabius, *Quandoquidem, inquit, apud te nec auctoritas senatus, nec aetas mea, cui oratam paras, nec virtus nobilitasque magistri equitum, a te ipso nominati, valet, nec preces, quae saepe hostem mitigavere, quae Deorum iras placant: tribunos plebis adpello, et provoco ad populum. eumque tibi, fugienti exercitus tui, fugienti senatus iudicium, iudicem fero, qui certe unus plus, quam tua dictatura, potest polletque.*

f) add. est Gron. Crev.

g) Papirius Fabium Eaed.

*Videro, cessurusne provocationi sis, cui rex Romanus* U. c. 430.  
*Tullus Hostilius cessit. Ex curia in concionem itur.* a. C. 322.  
 quo cum paucis dictator, cum omni agmine principum  
 magister equitum quum escendisset; deduci eum de  
 rostris Papirius in partem inferiorem iussit. Secutus  
 pater, *Bene agis, inquit, quum eo nos deduci iussisti,*  
*unde et privati vocem mittere possemus. Ibi* <sup>h)</sup> primo  
 non tam perpetuae orationes, quam altercatio, exau-  
 diebantur. Vicit deinde strepitum vox et indignatio  
 Fabii senis, increpantis superbiam crudelitatemque  
 Papirii: *Se quoque dictatorem Romae fuisse, nec a se*  
*quemquam, ne plebis quidem hominem, non centurio-*  
*nem, non militem, violatum; Papirium, tamquam ex*  
*hostium ducibus, sic ex Romano imperatore victoriam*  
*et triumphum petere. Quantum interesset inter modera-*  
*tionem antiquorum, et novam superbiam crudelitatem-*  
*que. Dictatorem Quinctium Cincinnatum in L. Minu-*  
*cium consulem, ex obsidione a se ereptum, non ultra*  
*saevisse, quam ut legatum eum ad exercitum pro con-*  
*sule relinqueret. M. Furium Camillum in L. Furio, qui,*  
*contemta sua senectute et auctoritate, foedissimo cum*  
*eventu pugnasset, non solum in praesentia moderatum*  
*irae esse, ne quid de collega secus populo aut senatui*  
*scriberet, sed, quum revertisset, potissimum ex tribu-*  
*nis consularibus habuisse, quem, ex collegis optione ab*  
*senatu data* <sup>i)</sup>, *socium sibi imperii delegerit. Nam po-*  
*puli quidem, penes quem potestas omnium rerum esset,*  
*ne iram quidem umquam atrociolem fuisse in eos, qui*  
*temeritate atque inscitia exercitus amisissent, quam ut*  
*pecunia eos multaret. capite anquisitum ob rem bello*  
*male gestam de imperatore nullo ad eam diem esse. Nunc*  
*ducibus populi Romani, quae ne victis quidem bello fas*  
 *fuerit, virgas et secures victoribus, et iustissimos meri-*  
*tis triumphos intentari. Quid enim tandem passurum*  
*fuisse filium suum, si exercitum amisisset: si fusus,*

h) in Gron. Crev.

i) quem ex collegis, optione ab se-  
natu data Gron. Crev. c. Drak.

U. c. 450. *fugatus, castris exutus fuisset? quo ultra iram violentiamque eius excessurum fuisse, quam ut verberaret necaretque? Quam conveniens esse, propter Q. Fabium civitatem in laetitia, victoria, supplicationibus, ac gratulationibus esse: eum, propter quem Deum delubra pateant, arae sacrificiis fument, honore, donis cumulentur, nudatum virgis lacerari in conspectu populi Romani: intuentem Capitolium atque arcem, Deosque ab se duobus proeliis haud frustra advocatos? Quo id animo exercitum, qui eius ductu auspiciisque vicisset, laturum? quem luctum in castris Romanis, quam laetitiam inter hostes fore? Haec, simul iurgans, querens, Deum hominumque fidem obtestans, et complexus filium, plurimis cum lacrimis agebat.*

XXXIV. Stabat cum eo senatus maiestas, favor populi, tribunicium auxilium, memoria absentis exercitus. Ex parte altera imperium invictum populi Romani, et disciplina rei militaris, et dictatoris edictum pro numine semper observatum, et Manliana imperia, et posthabita filii caritas publicae utilitati, iactabantur. Hoc etiam L. Brutum, conditorem Romanae libertatis, antea in duobus liberis fecisse. nunc patres comes, et senes faciles de alieno imperio spreto, tamquam rei parvae, disciplinae militaris eversae iuventuti gratiam facere. Se tamen perstaturum in incepto: nec ei, qui adversus dictum suum, turbatis religionibus ac dubiis auspiciis, pugnasset, quidquam ex iusta poena remissurum. Maiestas imperii perpetua ne esset, non esse in sua potestate. L. Papirium nihil de eius iure deminuturum. optare, ne potestas tribunicia, inviolata ipsa, violet intercessionem suam Romanum imperium, neu populus <sup>k)</sup> in se potissimum dictatorem et ius dictaturae extinguat. Quod si fecisset, non L. Papirium, sed tribunos, sed pravam populi iudicium, nequidquam posteros accusaturos: quum, polluta semel militari disciplina, non miles centurionis, non centurio tribuni, non tribunus legati, non legatus

k) add. Romanus Gron. Crév.



*consulis, non magister equitum dictatoris pareat imperio; nemo hominum, nemo Deorum verecundiam habeat; non edicta imperatorum, non auspicia observentur; sine com-  
 meatu vagi milites in pacato, in hostico errent, inme-  
 mores sacramenti, licentia sola se, ubi velint, exauc-  
 torent; infrequentia deserantur signa; neque conveniatur  
 ad edictum, nec discernatur, interdium nocte, aequo ini-  
 quo loco, iussu iniussu imperatoris pugnent; et non sig-  
 na, non ordines servant; latrocinii modo caeca et for-  
 tuita, pro sollemni et sacrata militia sit. Horum cri-  
 minum vos reos in omnia secula obferte, tribuni plebi:  
 vestra obnoxia capita pro licentia Q. Fabii <sup>1)</sup> obiiicite.*

XXXV. Stupentes tribunos et suam iam vicem magis anxios quam eius, cui auxilium ab se peteba-  
 tur, liberavit onere consensus populi Romani; ad  
 preces et obtestationem versus, ut sibi poenam magi-  
 stri equitum dictator remitteret. Tribuni quoque, in-  
 clinatam rem in preces subsecuti, orare dictatorem in-  
 sistunt, ut veniam errori humano, veniam adolescen-  
 tia Q. Fabii daret: satiseum poenarum dedisse. Iam  
 ipse adolescens, iam pater M. Fabius contentionis ob-  
 liti, procumbere ad genua, et iram deprecari dictato-  
 ris. Tum dictator, silentio facto, *Bene habet, inquit,  
 Quirites. vicit disciplina militaris, vicit imperii maie-  
 stas, quae in discrimine fuerunt, an ulla post hanc  
 diem essent. Non noxae eximitur Q. Fabius, qui contra  
 edictum imperatoris pugnavit; sed, noxae damnatus, do-  
 natur populo Romano; donatur tribuniciae potestati,  
 precarium non iustum auxilium ferenti. Vive, Q. Fabi,  
 felicior hoc consensu civitatis ad tuendum te, quam, qua  
 paullo ante exultabas, victoria. vive, id facinus ausus,  
 cuius tibi ne parens quidem, si eodem loco fuisset, quo  
 fuit L. Papirius, veniam dedisset. Mecum, ut voles,  
 reverteris in gratiam: populo Romano, cui vitam debes,  
 nihil maius praestiteris, quam si hic tibi dies satis do-  
 cumenti dederit, ut bello ac pace pati legitima imperia*

1) Q. Fabio Gron. Crev.

U. c. 450. *possis*. quum se nihil morari magistrum equitum pro-  
 a. C. 522. nunciasset, degressum eum templo laetus senatus,  
 laetior populus, circumfusi, ac gratulantes hinc ma-  
 gistro equitum, hinc dictatori, prosecuti sunt: firma-  
 tumque imperium militare haud minus periculo Q.  
 Fabii, quam supplicio miserabili adolescentis Manlii,  
 videbatur. Forte ita eo anno evenit, ut, quotiescum-  
 que dictator ab exercitu recessit, hostes in Samnio  
 moverentur. ceterum in oculis exemplum erat Q. Fa-  
 bins M. Valerio legato, qui castris praeerat, ne quam  
 vim hostium magis, quam trucem dictatoris iram, ti-  
 meret. Itaque, frumentatores quum, circumventi ex  
 insidiis, caesi loco iniquo essent, creditum vulgo est,  
 subveniri eis ab legato potuisse, ni tristia edicta ex-  
 horruisset. ea quoque ira alienavit a dictatore militum  
 animos, iam ante infensos, quod inplacabilis Q. Fa-  
 bio fuisset: et, quod suis precibus negasset, eius po-  
 pulo Romano veniam dedisset.

XXXVI. Postquam dictator, praeposito in urbe  
 L. Papirio Crasso magistro equitum, Q. Fabio vetito  
 quidquam pro magistratu agere, in castra rediit; ne-  
 que civibus satis laetus adventus eius fuit, nec hosti-  
 bus quidquam adtulit terroris. namque posteró die,  
 seu ignari venisse dictatorem, seu, adesset an abes-  
 set, parvi facientes, instructa acie ad castra accesse-  
 runt. Ceterum tantum momenti in uno viro L. Pa-  
 pirio fuit, ut, si ducis consilia favor subsecutus mili-  
 tum foret, debellari eo die cum Samnitibus potuisse,  
 pro haud dubio habitum sit: ita instruxit aciem loco  
 ac subsidiis, ita omni arte bellica firmavit. cessatum  
 a milite, ac de industria, ut obtrectaretur laudibus  
 ducis, inpedita victoria est. Plures Samnitium ceci-  
 dere; plures Romani vulnerati sunt. Sensit peritus  
 dux, quae res victoriae obstaret: temperandum inge-  
 nium suum esse, et severitatem miscendam comitati.  
 Itaque, adhibitis legatis, ipse circum saucios milites  
 inserens in tentoria caput, singulos, ut sese haberent,

rogitans, curam eorum nominatim legatis, tribunis- U. c. 430.  
 que, et praefectis demandabat; rem per se popularem 4. C. 522.  
 ita dexter egit, ut, medendis corporibus, animi multo  
 prius militum imperatori reconciliarentur; nec quid-  
 quam ad salubritatem efficacius fuerit, quam quod gra-  
 to animo ea cura accepta est. Refecto exercitu, cum  
 hoste congressus haud dubia spe sua militumque, ita  
 fudit fugavitque Samnites, ut ille ultimus eis dies  
 conserendi signa cum dictatore fuerit. Incessit deinde,  
 qua duxit praedae spes, victor exercitus; perlustravit-  
 que hostium agros, nulla arma, nullam vim, nec aper-  
 tam nec insidiis, expertus. Addebat alacritatem, quod  
 dictator praedam omnem edixerat militibus: nec ira  
 magis publica, quam privatum compendium, in ho-  
 stem acuebat. His cladibus subacti Samnites pacem  
 a<sup>m</sup>) dictatore petiere: cum quo pacti, ut singula vesti-  
 menta militibus, et annum stipendium darent; quum  
 ire ad senatum iussi essent, secuturos se dictatorem  
 responderunt, unius eius fidei virtutisque causam suam  
 commendantes. ita deductus ex Samnitibus exercitus.

XXXVII. Dictator triumphans urbem est in- U. c. 431.  
 gressus: et, quam se dictatura abdicare vellet, iussu a. C. 421.  
 Patrum, priusquam abdicaret, consules creavit C. Sul-  
 picium Longum iterum, Q. Aemilium Cerretanum.  
 Samnites, infecta pace, quia de conditionibus ageba-  
 tur, inducias annuas ab urbe retulerunt. nec earum  
 ipsarum sancta fides fuit: adeo, postquam Papirium  
 abisse magistratu nunciatum est, arrecti ad bellandum  
 animi sunt. C. Sulpicio, Q. Aemilio (Aulium quidam  
 annales habent) consulibus<sup>n</sup>), ad defectionem Samni-  
 tium Apulum novum bellum accessit. Utroque exer-  
 citus missi. Sulpicio Samnites, Apuli Aemilio sorte  
 evenerunt. Sunt, qui non ipsis Apulis bellum inla-  
 tum, sed socios eius gentis populos ab Samnitium vi  
 atque iniuriis defensos scribant, Ceterum fortuna

m) ab Gron. Crev.

n) consulibus (Aulium quidam annales habent), ad etc. Crev.

U. c. 431. Samnitium, vix a se ipsis eo tempore propulsantium  
 a. C. 321. bellum, propius utsit vero, facit, non Apulis ab Samnitibus arma inlata, sed cum utraque simul gente bellum Romanis fuisse. nec tamen res ulla memorabilis acta: ager Apulus Samniumque evastatum; hostes nec hic, nec illic inventi. Romae nocturnus terror ita ex somno trepidam repente civitatem excivit, ut Capitolium atque arx, moeniaque et portae, plena armatorum fuerint. et quum concursatum conclamatumque ad arma omnibus locis esset, prima luce nec auctor, nec caussa terroris comparuit. Eodem anno de Tusculanis Flavia rogatione populi fuit iudicium. M. Flavius tribunus plebis tulit ad populum, ut in Tusculanos animadverteretur; quorum eorum ope ac consilio Veliterni Privernatesque populo Romano bellum fecissent. Populus Tusculanus cum coniugibus ac liberis Romam venit. ea multitudo, veste mutata, et specie reorum, tribus circuit, genibus se omnium advolvens. plus itaque misericordia ad poenae veniam inpetrandam, quam caussa ad crimen purgandum valuit. Tribus omnes, praeter Polliam, antiquarunt legem. Polliae sententia fuit, puberes verberatos necari, coniuges liberosque sub corona lege belli venire: memoriamque eius irae Tusculanis in poenae tam atrocis auctores mansisse ad °) patrum aetatem constat, nec quemquam ferne ex Pollia tribu candidatum Papiriam ferre solitum.

U. c. 432. XXXVIII. Insequenti anno, Q. Fabio, L. Fulvio  
 a. C. 320. consulibus, A. Cornelius Arvina dictator et M. Fabius Ambustus magister equitum, metu gravioris in Samnio belli (conducta enim pretio a finitimis iuventus dicebatur) intentiore delectu habito, egregium exercitum adversus Samnites duxerunt. Castra in hostico incuriose ita posita, tamquam procul abesset hostis: quum subito advenere Samnitium legiones tanta ferocia, ut vallum usque ad stationem Romanam inferrent. Nox iam adpetebat: id prohibuit munimenta

o) in Crev. (In Crev. min. ad legitur).



adoriri. nec dissimulabant, orta luce postero die fac-<sup>U. c. 431.</sup>  
 turos. Dictator, ubi propiorem spe dimicationem vi-<sup>a. C. 320.</sup>  
 dit, ne militum virtuti damno locus esset, ignibus cre-  
 bris relictis, qui conspectum hostium frustrarentur,  
 silentio legiones educit: nec tamen fallere propter pro-  
 pinquitatem castrorum potuit. Eques extemplo inse-  
 cutus ita institit agmini, ut, donec lucesceret, proelio  
 abstineret. ne pedestres quidem copiae ante lucem ca-  
 stris egressae. Eques, luce demum ausus incursare  
 in hostem, carpendo novissimos, premendoque ini-  
 quis ad transitum locis, agmen detinuit. interim pedes  
 equitem adsecutus; et totis iam copiis Samnis urgebat.  
 Tum dictator, postquam sine magno incommodo pro-  
 gredi non poterat, eum ipsum, in quo constiterat, lo-  
 cum castris dimetari iussit, id vero, circumfuso undi-  
 que equitatu, ut vallum peteretur, opusque inciperet,  
 fieri non poterat. Itaque, ubi neque eundi, neque  
 manendi copiam esse videt, instruit aciem, impedi-  
 mentis ex agmine remotis. instruunt contra et hostes,  
 et animis et viribus pares. auxerat id maxime animos,  
 quod, ignari loco iniquo, non hosti, cessum, velut fu-  
 gientes ac territos terribiles ipsi secuti fuerant. Id ali-  
 quamdiu aequavit pugnam, iam pridem desueto Sam-  
 nite clamorem Romani exercitus pati. At, hercule,  
 illo die ab hora diei tertia ad octavam ita anceps dici-  
 tur certamen stetisse, ut neque clamor, ut primo semel  
 concursu est sublatus, iteratus sit: neque signa pro-  
 mota loco, retrove recepta; neque recursum ab ulla  
 sit parte. In suo quisque gradu obnisi, urgentes scu-  
 tis, sine respiratione ac respectu pugnabant. fremitus  
 aequalis, tenorque idem pugnae in defatigationem ul-  
 timam aut noctem spectabat. Iam viris vires, iam ferro  
 sua vis, iam consilia ducibus deerant; quum sub-  
 ito Samnitium equites, quum, turma una longius pro-  
 vecta, acceperant, impedimenta Romanorum procul  
 ab armatis sine praesidio, sine munimento stare, avi-  
 ditate praedae inpetum faciunt. Quod ubi dictatori

U. c. 452. trepidus nuncius adtulit; *Sine modo, inquit, sese praeda*  
 a. C. 320. *praepediant. alii deinde super alios, diripi passim fer-*  
*rique fortunas militum, vociferabantur. Tum magi-*  
*stro equitum adcito, Vides tu, inquit, M. Fabi, ab*  
*hostium equite omissam pugnam? haerent inpediti in-*  
*pedimentis nostris. Adgredere, quod inter praedandum*  
*omni multitudini evenit, dissipatos: raros equis insiden-*  
*tes, raros, quibus ferrum in manu sit, invenies: equos-*  
*que dum praeda onerant, caede inermes, oruentamque*  
*illis praedam redde. Mihi legiones peditumque pugna*  
*curae erunt: penes te equestre sit decus.*

XXXIX. Equitum acies, qualis quae esse instruc-  
 tissima potest, invecta in dissipatos inpeditosque ho-  
 stes, caede omnia replet. inter sarcinas omissas re-  
 pente, obiacentes pedibus fugientium consternato-  
 rumque equorum, neque pugnae, neque fugae satis  
 potentes, caeduntur. Tum, deleto prope equitatu  
 hostium, M. Fabius, circumductus paullulum alis, ab  
 tergo pedestrem aciem adoritur. clamor inde novus  
 accidens et Samnitium terruit animos: et dictator, ubi  
 respectantes hostium antesignanos, turbataque signa,  
 et fluctuantem aciem vidit, tum adpellare, tum ad-  
 hortari milites, tribunos principesque ordinum nomi-  
 natim ad iterandam secum pugnam vocare. Novato  
 clamore, signa inferuntur: et, quidquid progredie-  
 bantur, magis magisque turbatos hostes cernebant.  
 Eques ipse iam primis erat in conspectu: et Cornelius,  
 respiciens ad manipulos militum, quod manu quod voce  
 poterat, monstrabat, vexilla se suorum parmasque  
 cernere equitum. Quod ubi auditum simulque visum  
 est, adeo repente laboris, per diem pene totum tole-  
 rati, vulnorumque obliti sunt, ut haud secus, quam  
 si tum integri e castris signum pugnae accepissent,  
 concitaverint se in hostem, nec ultra Samnis tolerare  
 terrorem equitum, peditumque vim potuit: partim  
 in medio caesi, partim in fugam dissipati sunt. Pedes  
 restantes ac circumventos cecidit: ab equite fugien-

U. c. 432.  
a. C. 320.

tium strages est facta; inter quos et ipse imperator cecidit. Hoc demum proelium Samnitorium res ita infregit, ut omnibus conciliis fremerent, *minime id quidem mirum esse, si impio bello, et contra foedus suscepto, infestioribus merito Diis quam hominibus, nihil prospere agerent. expiandum id bellum magna mercede, luendumque esse. Id referre tantum, utrum supplicia noxio paucorum, an omnium innoxio praebeant sanguine: audebantque iam quidam nominare auctores armorum.* Unum moxime nomen per consensum clamantium Brutuli Papii exaudiebatur. vir nobilis potensque erat, haud dubie proximarum induciarum ruptor. De eo coacti referre praetores decretum fecerunt, *Ut Brutulus Papius Romanis dederetur, et cum eo praeda omnis Romana, captivique ut Romam mitterentur; quaeque res per feciales ex foedere repetitae essent, secundum ius fasque restituerentur.* Feciales Romam, ut censuerunt, missi, et corpus Brutuli exanime; ipse morte voluntaria ignominiae se ac supplicio subtraxit. Placuit cum corpore bona quoque eius dedi. nihil tamen earum rerum, praeter captivos, ac si qua cognita ex praeda sunt, acceptum est: ceterarum rerum irrita fuit editio. dictator ex senatusconsulto triumphavit. Hoc bellum a consulibus bellatum, quidam auctores sunt, eosque de Samnitibus triumphasse: Fabium etiam in Apuliam processisse, atque inde magnas praedas egisse.

XL. Nec discrepat, quin dictator eo anno A. Cornelius fuerit. id ambigitur, belline gerendi causa creatus sit; an ut esset, qui ludis Romanis, quia L. Plautius praetor gravi morbo forte implicatus erat, signum mittendis quadrigis daret; functusque eo haud sane memorandi imperii ministerio, se dictatura abdicaret. nec facile est aut rem rei, aut auctorem auctori praeferre. Vitiatam memoriam funebribus laudibus reor, falsisque imaginum titulis, dum familia ad se quaeque famam rerum gestarum honorumque fallente mendacio trahunt. Inde certe et singulorum gesta et pu-

blica monumenta rerum confusa. nec quisquam aequalis temporibus illis scriptor exstat, quo satis certo auctore stetur.

## EPITOME LIBRI IX.

T. Veturius et Sp. Postumius apud Caudinas Furcas, deducto in locum artum exercitu, quum nulla spes evadendi esset, foedere cum Samnitibus facto et sexcentis equitibus Romanis obsidibus datis, ita exercitum abduxerunt, ut omnes sub iugum mitterentur. iidemque, auctore Sp. Postumio consule (qui in senatu suaserat, ut eorum deditione, quorum culpa tam deforme foedus ictum erat, publica fides liberaretur), cum duobus tribunis plebis et omnibus, qui foedus sponderant, dediti Samnitibus, non sunt recepti. nec multo post fuis a Papirio Cursore Samnitibus et sub iugum missis, receptisque sexcentis equitibus Romanis, qui obsides dati erant, pudor prioris flagitii abolitus est 1). Tribus duae adiectae sunt, Ufentina et Falerina. Suessa et Pontiae 2) coloniae deductae sunt. Ap. Claudius censor aquam 3) perduxit: viam stravit, quae Appia vocata est: libertinorum filios in senatum legit. Ideoque, quoniam is ordo videbatur inquinatus indignis, sequentis anni consules in senatu legendo observaverunt, quemadmodum ante per proximos censores observatum fuerat. Res praeterea contra Apulos, Etruscos, Umbros, Marsos, Pelignos, Aequos et Samnites, quibus foedus erat restitutum, prospere gestas continet. Flavius scriba, libertino patre natus, aedilis curulis fuit per forensem factionem creatus: quae quum comitia et campum turbaret, et in iis propter nimias vires dominaretur, a Q. Fabio censore in quatuor tribus redacta est, quas urbanas adpellavit. Eaque res Fabio Maximo nomen dedit. In hoc libro mentio Alexandri Magni, qui temporibus his fuit; et, aestimatis populi Romani viribus, quae tunc erant, colligitur 4), si Alexander in Italiam traiecisset, non tam facilem ei victoriam de populo Romano fore, quam de iis gentibus, quas ad Orientem imperio suo subiecerat.

1) est del. Gron. Crev.

2) Pontia Eaed.

3) add. Claudiam Eaed.

4) colligit Eaed.



## T. LIVII PATAVINI

## LIBER IX.

Sequitur hunc annum nobilis clade Romana Caudina <sup>U<sup>2</sup> c. 453.</sup>  
 pax, T. Veturio Calvino, Sp. Postumio consulibus. <sup>a. C. 319.</sup>  
 Samnites eo anno imperatorem C. Pontium, Herennii  
 filium, habuerunt, patre longe prudentissimo natum,  
 primum ipsum bellatorem ducemque. Is, ubi legati,  
 qui ad dedendas res missi erant, pace infecta redierunt,  
*Ne nihil actum, inquit, hac legatione censeatis, ex-*  
*piatum est, quidquid ex foedere rupto irarum in nos coe-*  
*lestium fuit. Satis scio, quibuscumque Diis cordi fuit,*  
*subigi nos ad necessitatem dedendi res, quae a nobis ex*  
*foedere repetitae fuerant, iis non fuisse cordi tam sum-*  
*perbe ab Romanis foederis expiationem spretam. Quid*  
*enim ultra fieri ad placandos Deos mitigandosque homi-*  
*nes potuit, quam quod nos fecimus? Res hostium in*  
*praeda captas, quae belli iure nostra videbantur, re-*  
*misimus: auctores belli, quia vivos non potuimus, per-*  
*functos iam fato dedidimus: bona eorum, ne quid ex*  
*contagione noxae remaneret penes nos, Romam portavi-*  
*mus. Quid ultra tibi, Romane, quid foederi, quid Diis*  
*arbitris foederis debeo? quem tibi tuarum irarum, quem*  
*meorum suppliciorum iudicem feram, neminem, neque po-*  
*pulum neque privatum, fugio. Quod si nihil cum potentiore*  
*iuris humani relinquitur inopi, at ego ad Deos vindices*  
*intolerandae superbiae confugiam; et precabor, ut iras*  
*suas vertant in eos, quibus non suae redditae res, non*  
*alienae accumulatae satis sint; quorum saevitiam non*  
*mors noxiorum, non deditio exanimatorum corporum;*  
*non bona sequentia domini deditioem exsatient; placari*

U. c. 433. *qui nequeant*<sup>a)</sup>, *nisi hauriendum sanguinem lanianda-*  
 a. C. 319. *que viscera nostra praeberimus. Iustum est bellum,*  
*Samnites, quibus necessarium; et pia arma, quibus*  
*nulla nisi in armis relinquitur spes. Proinde, quum*  
*rerum humanarum maximum momentum sit, quam pro-*  
*pitiis rem, quam adversis agant Diis, pro certo habete,*  
*priora bella adversus Deos magis, quam homines, ges-*  
*sisse; hoc, quod instat, ducibus ipsis Diis gesturos.*

II. Haec, non laeta magis, quam vera, vaticina-  
 tus, exercitu educto, circa Caudium castra, quam  
 potest occultissime, locat: inde ad Calatiam, ubi iam  
 consules Romanos castraque esse audiebat, milites de-  
 cem pastorum habitu mittit: pecoraque diversos, alium  
 alibi, haud procul Romanis pascere iubet praesidiis:  
 ubi inciderint in praedatores, ut idem omnibus sermo  
 constet, *legiones Samnitium in Apulia esse, Luceriam*  
*omnibus copiis circumsedere; nec procul abesse, quin vi*  
*capiant.* Iam is etiam rumor ante, de industria vul-  
 gatus, venerat ad Romanos; sed fidem auxere capti-  
 vi, eo maxime, quod sermo inter omnes congruebat.  
 Haud erat dubium, quin Lucerinis opem Romanus fer-  
 ret, bonis ac fidelibus sociis, simul ne Apulia omnis  
 ad praesentem terrorem deficeret. ea modo, qua irent,  
 consultatio fuit. Duae ad Luceriam ferebant viae; al-  
 tera praeter oram superi maris patens apertaue, sed,  
 quanto tutior, tanto fere longior; altera per Furcu-  
 las Caudinas brevior. Sed ita natus locus est. saltus  
 duo alti angusti silvosique sunt, montibus circa per-  
 petuis inter se iuncti. iacet inter eos satis patens clau-  
 sus in medio campus, herbidus aquosusque, per quem  
 medium iter est. Sed ante, quam venias ad eum, in-  
 trandae primae angustiae sunt: et aut eadem, qua te  
 insinuaveris, retro via repetenda; aut, si ire porro  
 pergas, per alium saltum artiozem impeditioremque  
 evadendum. In eum campum via alia per cavam ru-

a) *exsatient: placari nequeant Gron. Crev. exsotient. Pla-*  
*cari nequeunt Drak.*

pem, Romani, demisso agmine, quum ad alias angustias protinus pergerent, septas deiectu arborum saxorumque ingentium obiacentem molem <sup>b)</sup> invenere. quum fraus hostilis adparuisset, praesidium etiam in summo saltu conspicitur. Citati inde retro, qua venerant, pergunt repetere viam. eam quoque clausam sua obice armisque inveniunt. sistunt inde gradum sine ullius imperio; stuporque omnium animos, ac velut torpor quidam insolitus membra tenet: intuentesque alii alios (quum alterum quisque compotem magis mentis <sup>c)</sup> ac consilii ducerent) diu immobiles silent. Deinde ubi praetoria consulum erigi videre, et expedire quosdam utilia operi, quamquam ludibrio fore munientes, perditis rebus ac spe omni adempta, cernebant; tamen, ne culpam malis adderent, pro se quisque, nec hortante ullo nec imperante, ad munientium versi, castra propter aquam vallo circumdant; sua ipsi opera laboremque irritum (praeterquam quod hostes superbe increpabant) cum miserabili confessione eludentes. Ad consules moestos, ne advocantes quidem in consilium (quando nec consilio, nec auxilio locus esset) sua sponte legati ac tribuni conveniunt: militesque ad <sup>d)</sup> praetorium versi, opem, quam vix Dii immortales ferre poterant, ab ducibus exposcunt.

III. Querentes magis, quam consultantes, nox obpressit. quum pro ingenio quisque fremerent: alius *per obices viarum*; alius, *per adversa montium, per silvas, qua ferri arma poterunt, eamus. Modo ad hostem pervenire liceat, quem per annos iam prope triginta vincimus <sup>e)</sup>*; omnia aequa et plana erunt Romano, in perfidum Samnitum pugnanti. alius, Quo, aut qua eamus? Num montes moliri sede sua paramus? Dum haec imminuebunt iuga, qua tu ad hostem venies? Armati, inermes, fortes, ignavi, pariter omnes capti atque victi sumus. Ne ferrum quidem ad bene moriendum oblaturus est ho-

b) obiacente mole Gron.

d) in Eaed.

c) magis mentis compotem Gron. Crev. e) vicinus Gron.

U. c. 433. *stis: sedens bellum conficiet.* His in vicem sermonibus,  
 a. C. 319. qua cibi, qua quietis inmemor, nox traducta est. Ne  
 Samnitibus quidem consilium in tam laetis subpetebat  
 rebus. itaque universi Herennium Pontium, patrem  
 imperatoris, per literas consulendum censent. Iam is  
 gravis annis non militaribus solum, sed civilibus quo-  
 que, abscesserant muneribus: in corpore tamen ad-  
 fecto vigebat vis animi consiliique. Is, ubi accepit,  
 ad Furculas Caudinas inter duos saltus clausos esse  
 exercitus Romanos, consultus ab nuncio filii, censuit,  
 omnes inde quam primum inviolatos dimittendos. quae  
 ubi spreta sententia est, iterumque, eodem remeante  
 nuncio, consulebatur, censuit, ad unum omnes inter-  
 ficiendos. Quae ubi tam discordia inter se, velut  
 ex ancipiti oraculo, responsa data sunt; quamquam  
 filius ipse in primis iam animum quoque patris conse-  
 nuisse in adfecto corpore rebatur; tamen consensu  
 omnium victus est, ut ipsum in consilium adciret. Nec  
 gravatus senex plastro in castra dicitur advectus, vo-  
 catusque in consilium ita ferme locutus esse, ut nihil  
 sententiae suae mutaret; causas tantum adiceret:  
*Priore se consilio, quod optimum duceret, cum poten-  
 tissimo populo per ingens beneficium perpetuam firmare  
 pacem amicitiamque; altero consilio in multas aetates,  
 quibus, amissis duobus exercitibus, haud facile receptura  
 vires Romana res esset, bellum differre: tertium nullum  
 consilium esse.* Quum filius aliique principes percunc-  
 tando exsequerentur, *Quid si media via consilii capere-  
 tur; ut et dimitterentur incolumes, et leges iis iure belli  
 victis inponerentur? ista quidem sententia, inquit, ea est,  
 quae neque amicos parat, neque inimicos tollit. Servate mo-  
 do, quos ignominia irritaveritis. ea est Romana gens, quae  
 victa quiescere nesciat. Vivet semper in pectoribus illorum,  
 quidquid istuc praesens necessitas inusserit; neque eos  
 ante multiplices poenas expetitas a vobis quiescere sinet.*

IV. Neutra sententia accepta. Herennius domum  
 e castris est avectus. Et in castris Romanis quum



frustra multi conatus ad erumpendum capti essent, et iam omnium rerum inopia esset; victi necessitate legatos mittunt, qui primum pacem aequam peterent; si pacem non inpetrarent, uti provocarent ad pugnam. Tum Pontius, *debellatum esse*, respondit: *et, quoniam ne victi quidem ac capti fortunam fateri scirent, inermes cum singulis vestimentis sub iugum missurum; alias conditiones pacis aequas victis ac victoribus fore; si <sup>f)</sup> agro Samnitium decederetur, coloniae abducerentur, suis deinde legibus Romanum ac Samnitum aequo foedere victurum. His conditionibus paratum se esse foedus cum consulis ferire: si quid eorum displiceat, legatos redire ad se vetuit.* Haec quum legatio renunciaretur, tantus gemitus omnium subito exortus est, tantaque moestitia incessit, ut non gravius accepturi viderentur, si nunciaretur, omnibus eo loco mortem obpetendam esse. Quum diu silentium fuisset, nec consules aut pro foedere tam turpi, aut contra foedus tam necessarium hiscere possent; tum L. Lentulus, qui tum princeps legatorum virtute atque honoribus erat, *Patrem meum, inquit, consules, saepe audiui memorantem, se in Capitolio unum non fuisse auctorem senatui redimendae auro a Gallis civitatis, quando nec fossa valloque ab ignavissimo ad opera ac muniendum hoste clausi essent; et erumpere si non sine periculo magno, tamen sine certa perniciie possent. Quod si, ut illis decurrere ex Capitolio armatis in hostem licuit (quo saepe modo obsessi in obsidentes eruperunt), ita nobis aequo aut iniquo loco dimicandi tantummodo cum hoste copia esset, non mihi paterni animi indoles in consilio dando deesset. Equidem mortem pro patria praeclaram esse fateor: et me vel devovere pro populo Romano legionibusque, vel in medios me immittere hostes paratus sum. Sed hic patriam video, hic quidquid Romanarum legionum est. quae, nisi pro se ipsis ad mortem ruere volunt, quid habent, quod morte sua servant? Tecta urbis, dicat aliquis et moenia,*

f) si del. Gron. Crev.

U. c. 433.  
a. C. 319.

U. c. 433. *et eam turbam, a qua urbs incolitur. immo, hercule,*  
 a. C. 319. *produntur ea omnia, deleto hoc exercitu, non servantur*  
*Quis enim ea tuebitur? Inbellis videlicet atque inermis*  
*multitudo? tam, hercule, quam a Gallorum inpetu de-*  
*fendit. An a Veiis exercitum Camillumque ducem in-*  
*plorabunt? Hic omnes spes opesque sunt, quas servando*  
*patriam servamus: dedendo ad necem patriam deserimus*  
*ac prodimus. At foeda atque ignominiosa deditio est.*  
*Sed ea caritas patriae est, ut tam ignominia eam, quam*  
*morte nostra, si opus sit, servemus. Subeatur ergo ista,*  
*quantacumque est, indignitas; et pareatur necessitati,*  
*quam ne Dii quidem superant. Ite, consules, redimite*  
*armis civitatem, quam auro maiores vestri redemerunt.*

V. Consules profecti ad Pontium in conloquium,  
 quum de foedere victor agitaret, negarunt, iniussu  
 populi foedus fieri posse: nec sine fecialibus ceremo-  
 niisque alia sollemni. Itaque non, ut vulgo credunt,  
 Claudiusque etiam scribit, foedere pax Caudina, sed  
 per sponsonem, facta est. Quid enim aut sponsori-  
 bus in foedere opus esset aut obsidibus, ubi preca-  
 tione res transigitur? *per quem populum fiat, quo minus*  
*legibus dictis stetur, ut eum ita Iupiter feriat, quem-*  
*admodum a fecialibus porcus feriatur.* Spoponderunt  
 consules, legati, quaestores, tribuni militum; no-  
 minaque omnium, qui spoponderunt, exstant: ubi,  
 si ex foedere acta res esset, praeterquam duorum fe-  
 cialium, non exstarent; et propter necessariam foe-  
 deris dilationem obsides etiam sexcenti equites impe-  
 rat, qui capite luerent, si pacto non staretur. Tem-  
 pus inde statutum tradendis obsidibus exercituque  
 inermi mittendo. Redintegavit luctum in castris  
 consulum adventus, ut vix ab iis abstinerent manus,  
 quorum temeritate in eum locum deducti essent;  
 quorum ignavia foedius inde, quam venissent, abituri.  
 illis non ducem locorum, non exploratorem fuisse:  
 belluarum modo caecos in foveam missos. Alii alios  
 intueri, contemplari arma mox tradenda, et inermes

futuras dextras, obnoxiaque corpora hosti. proponere <sup>U. c. 433.</sup>  
 sibiinet ipsi ante oculos iugum hostile, et ludibria vic- <sup>a. C. 319.</sup>  
 toris, et vultus superbos, et per armatos inernium  
 iter. Inde foedi agminis miserabilem viam, per so-  
 ciorum urbes reditum in patriam ad <sup>g)</sup> parentes, quo  
 saepe ipsi maioresque eorum triumphantes venissent.  
 Se solos sine vulnere, sine ferro, sine acie victos: sibi  
 non stringere licuisse gladios, non manum cum hoste  
 conferre: sibi nequidquam arma, nequidquam vires,  
 nequidquam animos datos. Haec frementibus hora  
 fatalis ignominiae advenit, omnia tristiora expe-  
 riundo factura, quam quae praeceperant animis. Iam  
 primum cum singulis vestimentis inermes extra val-  
 lum exire iussi, et primi traditi obsides, atque in cu-  
 stodiam abducti. Tum a consulibus abire lictores iussi  
 paludamentaue detracta; tantam inter ipsos, qui,  
 paullo ante eos exsecrantes, dedendos lacerandosque  
 censuerant, miserationem fecit, ut, suae quisque  
 conditionis oblitus, ab illa deformatione tantae maie-  
 statis, velut ab nefando spectaculo, averteret oculos.

VI. Primi consules prope, seminudi sub iugum  
 missi: tum, ut quisque gradu proximus erat, ita  
 ignominiae obiectus: tum deinceps singulae legio-  
 nes. circumstabant armati hostes, exprobrantes elu-  
 dentesque: gladii etiam plerisque intentati: et vul-  
 nerati quidam necatique, si vultus eorum indigni-  
 tate rerum acrior victorem obfendisset. ita traducti  
 sub iugum, et, quod pene gravius erat, per ho-  
 stium oculos. quum e saltu evasissent, etsi, velut ab  
 inferis extracti, tum primum lucem adspicere visisunt,  
 tamen ipsa lux ita deforme intuentibus agmen omni  
 morte tristior fuit. Itaque, quum ante noctem Ca-  
 puam pervenire possent, incerti de fide sociorum, et  
 quod pudor praepediebat, circa viam haud procul Ca-  
 puam omnium egeni <sup>h)</sup> corpora humi prostraverunt. Quod  
 ubi est Capuam nunciatum, evicit miseratio iusta so-

g) ac Gron. c. Drak.

h) egena Crev.

U. c. 433. ciorum superbiam ingenitam Campanis. confestim in-  
 a. C. 319. signia sua consulibus, fascēs, lictores, arma, equos,  
 vestimenta, commeatus militibus benigne mittunt; et  
 venientibus Capuam cunctus senatus populusque, ob-  
 viam egressi, iustis omnibus hospitalibus, privatisque  
 et publicis funguntur officiis, neque illis sociorum comi-  
 tas, vultusque benigni, et adloquia non modo sermo-  
 nem elicere, sed ne, ut oculos quidem adtollerent,  
 aut consolantes amicos contra intuerentur, efficere po-  
 terant. Adeo super moerorem pudor quidam fugere  
 conloquia et coetus hominum cōgebat. Postero die  
 quum iuvenes nobiles, missi a Capua, ut proficiscen-  
 tes ad finem Campanum prosequerentur, revertissent;  
 vocatique in curiam percunctantibus maioribus natu,  
*multo sibi moestiores et abiectioris animi visos, referrent;  
 adeo silens ac prope mutum agmen incessisse; iacere<sup>i)</sup> indo-  
 lem illam Romanam, ablatosque cum armis animos, non  
 reddere salutem, non salutantibus dare responsum, non his-  
 cere quemquam prae metu potuisse, tamquam ferentibus  
 adhuc cervicibus iugum, sub quo emissi essent. Habere  
 Samnites victoriam, non praeclaram solum, sed etiam  
 perpetuam. cepisse enim eos non Romam, sicut ante  
 Gallos, sed, quod multo bellicosius fuerit, Romanam  
 virtutem ferociamque.*

VII. Quum haec dicerentur audirenturque, et de-  
 ploratum pene Romanum nomen in concilio sociorum  
 fidelium esset; dicitur Ofilius Calavius, Ovii filius,  
 clarus genere factisque, tum etiam aetate verendus,  
 longe aliter se habere rem dixisse: *Silentium illud ob-  
 stinatum, fixosque in terram oculos, et surdas ad om-  
 nia solatia aures, et pudorem intuendae lucis, ingen-  
 tem molem irarum ex alto animo<sup>k)</sup> cientes indicia esse:  
 aut Romana se<sup>l)</sup> ignorare ingenia, aut silentium illud  
 Samnitibus flebiles brevi clamores gemitusque excitatu-  
 rum; Caudinaeque pacis aliquanto Samnitibus, quam*

i) tacere Gron. Crev. c. Drak.

l) se Romana Eaed.

k) animi Gron. Crev.



*Romanis tristiorememoriam fore. Quippe suos quem-* U. c. 433.  
*que eorum<sup>m)</sup> animos habiturum, ubicumque congressuri* a. C. 319.  
*sint; saltus Caudinos non ubique Samnitibus fore. Iam<sup>n)</sup>*  
 Romae etiam<sup>o)</sup> sua infamis clades erat. Obsessos pri-  
 mum audierunt: tristior deinde ignominiosae pacis  
 magis, quam periculi, nuncius fuit. Ad famam obsi-  
 dionis delectus haberi coeptus erat: dimissus deinde  
 auxiliorum adparatus, postquam deditionem tam foede  
 factam acceperunt: extemploque sine ulla publica auc-  
 toritate consensum in omnem formam luctus est. Ta-  
 bernae circa forum clausae, iustitiumque in foro sua  
 sponte coeptum prius, quam indictum: lati clavi,  
 annuli aurei positi; bene moestior exercitu ipso civi-  
 tas esse: nec ducibus solum atque auctoribus spon-  
 soribusque pacis irasci, sed innoxios etiam milites  
 odisse, et negare urbe tectisque accipiendos. Quam  
 concitationem animorum fregit adventus exercitus,  
 etiam iratis miserabilis. non enim tamquam in patriam  
 revertentes ex insperato incolumes, sed captorum  
 habitu vultuque ingressi sero in urbem, ita se in suis  
 quisque tectis abdiderunt, ut postero atque insequen-  
 tibus diebus nemo eorum forum aut publicum adspi-  
 cere vellet. Consules, in privato abditi, nihil pro ma-  
 gistratu agere, nisi quod expressum senatus consulto  
 est, ut dictatorem dicerent comitiorum causa. Q.  
 Fabium Ambustum dixerunt, et P. Aelium Paetum  
 magistrum equitum. quibus vitio creatis, subfecti M.  
 Aemilius Papus dictator, L. Valerius Flaccus magister  
 equitum. Nec per eos comitia habita: et quia taedebat  
 populum omnium magistratuum eius anni, res ad in-  
 terregnum rediit. Interreges Q. Fabius Maximus, M. U. c. 434.  
 Valerius Corvus. is consules creavit Q. Publilium a. C. 318.  
 Philonem et L. Papirium Cursorem iterum, haud dubio  
 consensu civitatis, quod nulli ea tempestate duces  
 clariores essent.

m) *coram* Gron. Grev.n) *add. et* Eaed.o) *etiam del.* Eaed.

U. c. 434.  
a. C. 318.

VIII. Quo creati sunt die, eo (sic enim placuerat Patribus) magistratum inierunt, sollemnibusque senatusconsultis perfectis, de pace Caudina retulerunt. et Publilius, penes quem fascēs erant, *Dic Sp. Postumi*, inquit. Qui ubi surrexit, eodem illo vultu, quo sub iugum missus erat, *Haud sum ignarus*, inquit, *consules, ignominiae, non honoris causa me primum excitatum iussumque dicere, non tamquam senatorem, sed tamquam reum qua infelicis belli, qua ignominiosae pacis. Ego tamen, quando neque de noxa nostra neque de poena retulistis, omīssa defensione, quae non difficillima esset apud haud ignaros fortunarum humanarum necessitatumque, sententiam de eo, de quo retulistis, paucis peragam. quae sententia testis erit, mihi, an legionibus vestris pepercerim, quum me seu turpi seu necessaria sponsione obstrinxi. Qua tamen, quando iniussu populi facta est, non tenetur populus Romanus; nec quidquam ex ea, praeterquam corpora nostra debentur Samnitibus. Dedamur per feciales nudi vinctique: exsolvamus religione populum, si qua obligavimus; ne quid divini humanive obstet, quo minus iustum piumque de integro ineatur bellum. Interea consules exercitum scribere, armare, educere placet; nec prius ingredi hostium fines, quam omnia iusta in deditionem nostram perfecta erunt. Vos, Dii immortales, precor quae soque, si vobis non fuit cordi, Sp. Postumium, T. Veturium consules cum Samnitibus prospere bellum gerere; at vos satis habeatis, vidisse nos sub iugum missos, vidisse sponsione infami obligatos, videre nudos vinctosque hostibus deditos, omnem iram hostium nostris capitibus excipientes. Novos consules legionesque Romanas ita cum Samnite gerere bellum velitis, ut omnia ante nos consules bella gesta sunt. Quae ubi dixit, tanta simul admiratio miseratioque viri incessit omnes<sup>p)</sup>, ut modo vix crederent, illum eundem esse Sp. Postumium, qui auctor tam foedae pacis fuisset: modo miserarentur, quod*

p) homines Gron. Grev.

vir talis etiam praecipuum apud hostes supplicium passurus esset ob iram diremtae pacis. Quum omnes, laudibus modo prosequentes virum, in sententiam eius pedibus irent; tentata paullisper intercessio est ab L. Livio et Q. Maelio tribunis plebis: qui, *neque exsolvi religione populum*, aiebant, *deditione sua, nisi omnia Samnitibus, qualia apud Caudium fuissent, restituerentur: neque se pro eo, quod, spondendo pacem, servassent exercitum populi Romani, poenam ullam meritos esse; neque ad extremum, quum sacrosancti essent, dedi hostibus violari posse.*

IX. Tum Postumius, *Interea dedite*, inquit, *profanos nos, quos salva religione potestis: dedetis deinde et istos sacrosanctos, quum primum magistratu abierint; sed, si me audiat, prius, quam dedantur, hic in comitio virgis caesos, hanc iam ut intercalatae poenae usuram habeant. Nam quod deditione nostra negant exsolvi religione populum, id istos magis, ne dedantur, quam quia ita se res habeat, dicere, quis adeo iuris fecialium experts est, qui ignoret? Neque ego inficias eo, Patres conscripti, tam sponsiones quam foedera sancta esse apud eos homines, apud quos iuxta divinas religiones fides humana colitur: sed iniussu populi nego quidquam sanciri posse, quod populum teneat. An, si eadem superbia, qua sponsionem istam expresserunt nobis Samnites, coegissent nos verba legitima dedentium urbes nuncupare, deditum populum Romanum vos tribuni dicere-tis, et hanc urbem, templam, delubra, fines, aquas, Samnitium esse? Omitto deditionem, quoniam de sponsione agitur. quid tandem, si spopondissemus, urbem hanc relicturum populum Romanum? si incensurum? si magistratus, si senatum, si leges non habiturum? si sub regibus futurum? Dii meliora, inquis! atqui non indignitas rerum sponsionis vinculum levat. Si quid est, in quod<sup>a)</sup> obligari populus possit, in omnia potest. et ne illud quidem, quod quosdam forsitan moveat, refert, con-*

U. c. 434. *sul, an dictator, an praetor sponderit. Et hoc ipsi*  
 a. C. 318. *etiam Samnites iudicaverunt, quibus non fuit satis con-*  
*sules spondere, sed legatos, quaestores, tribunos militum*  
*spondere coegerunt. Nec a me nunc quisquam quaesiverit*  
*quid ita sponderim? quum id nec consulis ius esset;*  
*nec illis spondere pacem, quae mei non erat arbitrii, nec*  
*pro vobis, qui nihil mandaveratis, possem. Nihil ad Cau-*  
*dium, Patres conscripti, humanis consiliis gestum est. Dii*  
*inmortales et vestris et hostium imperatoribus mentem ad-*  
*emerunt. nec nos in bello satis cavimus; et illi male par-*  
*tam victoriam male perdiderunt, dum vix locis, quibus*  
*vicerant, credunt, dum quacumque conditione arma vi-*  
*ris in arma natis auferre festinant. An, si sana mens*  
*fuisset, difficile illis fuit, dum senes ab domo ad con-*  
*sultandum arcessunt, mittere Romam legatos? cum se-*  
*natu, cum populo, de pace ac foedere agere? Tridui iter*  
*expeditis erat. interea in induciis res fuisset, donec ab*  
*Roma legati aut victoriam illis certam, aut pacem ad-*  
*ferrent. ea demum sponsio esset, quam populi iussu spo-*  
*pondissemus. Sed neque vos tulissetis, nec nos sponpon-*  
*dissemus: nec fas fuit alium rerum exitum esse, quam*  
*ut<sup>r</sup>) illi, velut somnio laetiore, quam quod mentes eorum*  
*capere possent, nequidquam eluderentur: et nostrum exer-*  
*citum eadem, quae impedierat, fortuna expediret: va-*  
*nam victoriam vanior irritam faceret pax; sponsio inter-*  
*poneretur, quae neminem, praeter sponsorem, obligaret.*  
*Quid enim vobiscum, Patres conscripti, quid cum populo*  
*Romano actum est? quis vos adpellare potest? quis se*  
*a vobis dicere deceptum? hostis? an civis? Hosti nihil*  
*sponpondistis: civem neminem spondere pro vobis iussi-*  
*stis. Nihil ergo vobis nec nobiscum est, quibus nihil man-*  
*dastis; nec cum Samnitibus, cum quibus nihil egistis.*  
*Samnitibus sponsores nos sumus, rei satis locupletes. in id,*  
*quod nostrum est; in id, quod praestare possumus, corpora*  
*nostra et animos; in haec saeviant, in haec ferrum, in haec*  
*iras acuant. Quod ad tribunos adtinet, consulite, utrum*

r) add. et Crev.



*praesens deditio eorum fieri possit, an in diem differatur.* U. c. 434.  
*nos interim, T. Veturi, vosque ceteri, vilia haec capita* a. C. 318.  
*luendae sponsionis feramus, et nostro supplicio libe-*  
*remus Romana arma.*

X. Movit Patres conscriptos tum caussa, tum auctor; nec ceteros solum, sed tribunos etiam plebei, ut se in senatus dicerent fore potestate. Magistratu inde se extemplo abdicaverunt, traditique fecialibus cum ceteris Caudium ducendi. Hoc facto senatusconsulto, lux quaedam adfulsisse civitati visa est. Postumius in ore erat: eum laudibus ad coelum ferebant: devotioni P. Decii consulis, aliis claris facinoribus aequalibus. *Emersisse civitatem ex obnoxia pace illius consilio et opera: ipsum se cruciatibus et hostium irae obferre, piaculaque pro populo Romano dare* s). Arma cuncti spectant et bellum. *En umquam futurum, ut congredi armatis cum Samnite liceat?* in civitate, ira odioque ardente, delectus prope omnium voluntariorum fuit. rescriptae ex eodem milite novae legiones, ductusque ad Caudium exercitus. Praegressi feciales, ubi ad portam venerunt, vestem detrahi pacis sponsoribus iubent, manus post tergum vinciri. Quum adparitor verecundia maiestatis Postumium laxè vinciret, *Quin tu, inquit, adducis lorum, ut iusta fiat deditio?* Tum, ubi in coetum Samnitium et ad tribunal ventum Pontii est, A Cornelius Arvina fecialis ita verba fecit: *Quandoque hinc homines iniussu populi Romani Quiritium foedus ictum iri spoponderunt, atque ob eam rem noxam nocuerunt; ob eam rem,* quo populus Romanus scelere in-pio sit solutus, *hosce homines vobis dedo.* Haec dicendi feciali Postumius genu, femur quanta maxime poterat vi, perculit, et clara voce ait, *Se Samnitē civem esse, illum legatū; fecialem a se contra ius gentium violatū; eo iustius bellum gesturos.*

XI. Tum Pontius, *Nec ego istam deditionem accipiam,* inquit, *nec Samnites ratam habebunt.* *Quin tu,*

s) dare Romano Gron. Crev.

U. c. 434. *Sp. Postumi, si Deos esse censes, aut omnia irrita fa-*  
 a. C. 318. *cis, aut pacto stas? Samniti populo omnes, quos in pō-*  
*testate habuit, aut pro eis pax debetur. Sed quid ego te*  
*adpello, qui te captum victori, cum qua potes fide, re-*  
*stituis? Populum Romanum adpello; quem si sponsionis*  
*ad Furculus Caudinas factae poenitet, restituat legiones*  
*intra saltum, quo septae fuerunt. Nemo quemquam de-*  
*ceperit: omnia pro infecto sint: recipiant arma, quae*  
*per pactionem tradiderunt: redeant in castra sua. quid-*  
*quid pridie habuerunt, quam in colloquium est ven-*  
*tum, habeant. tum bellum et fortia consilia placeant, tunc*  
*sponsio et pax repudietur. Ea fortuna, iis locis, quae*  
*ante pacis mentionem habuimus, geramus bellum: nec*  
*populus Romanus consulum sponsionem, nec nos fidem*  
*populi Romani accusemus. Numquamne caussa defiet,*  
*cur victi pacto non stetis? Obsides Porsenae dedistis; fur-*  
*to eos subduxistis; auro civitatem a Gallis redemistis;*  
*inter accipiendum aurum caesi sunt; pacem nobiscum pe-*  
*pigistis, ut legiones vobis captas restitueremus; eam pacem*  
*irritam facitis, et semper aliquam fraudi speciem iuris in-*  
*ponitis. Non probat populus Romanus ignominiosa pace le-*  
*giones servatas? pacem sibi habeat, legiones captas victori*  
*restituat: hoc fide, hoc foederibus, hoc fecialibus ceremoniis*  
*dignum erat. Ut tu quidem, quod petisti, per pactionem ha-*  
*beas, tot cives incolumes; ego pacem, quam hos<sup>1)</sup> tibi re-*  
*mittendo pactus sum, non habeam: hoc tu, A. Corneli, hoc*  
*vos, feciales, iuris gentibus dicitis? Ego vero istos, quos*  
*dedi simulatis, nec accipio, nec dedi arbitror; nec mo-*  
*ror, quo minus in civitatem obligatam sponsione com-*  
*missa, iratis omnibus Diis, quorum eluditur numen, re-*  
*deant. Gerite bellum, quando Sp. Postumius modo lega-*  
*tum fecialem genu perculit. Ita Dii credent, Samnitem*  
*civem Postumium, non civem Romanum esse, et a Samnite*  
*Romanum legatum violatum, eo vobis iustum in nos factum*  
*esse bellum. Haec ludibria religionum non pudere in lucem*

t) hesti Gron. Crev. c. Drak.

*proferre? et vix pueris dignas ambages senes ac consu-* U. c. 454.  
*lares fallendae fidei exquirere? I, lictor, deme vincla Ro-* a. C. 518.  
*manis: moratus sit nemo, quo minus; ubi visum fue-*  
*rit, abeant.* Et illi quidem, forsitan et publica, sua  
 certe liberata fide, ab Caudio in castra Romana invio-  
 lati redierunt.

XII. Samnitibus, pro superba pace infestissimum  
 cernentibus renatum bellum, omnia, quae deinde ve-  
 nerunt, non in animis solum, sed prope in oculis esse:  
 et sero ac nequidquam laudare senis Pontii utraque  
 consilia; inter quae se media lapsos victoriae posses-  
 sionem pace incerta mutasse, et beneficii et maleficii  
 occasione amissa, pugnatueros cum eis, quos potuerint  
 in perpetuum vel inimicos tollere, vel amicos facere.  
 adeoque, nullodum certamine inclinatis viribus, post  
 Caudinam pacem animi mutaverant, ut clariorem inter  
 Romanos deditio Postumium, quam Pontium incruenta  
 victoria inter Samnites, faceret: et geri posse bellum  
 Romani pro victoria certa haberent, Samnites simul  
 rebellasse et vicisse crederent Romanum. Inter haec  
 Satricani ad Samnites defecerunt, et Fregellae colo-  
 nia necopinato adventu Samnitium (fuisse et Satrica-  
 nos cum iis satis constat) nocte occupata est. timor  
 inde mutuus utrosque usque ad lucem quietos tenuit:  
 lux pugnae initium fuit; quam aliquamdiu aequam,  
 et quia pro aris ac focis dimicabatur, et quia ex tec-  
 tis adiuuabat imbellis multitudo, tamen Fregellani sus-  
 tinuerunt. Fraus deinde rem inclinavit, quod vocem  
 audiri praeconis passi sunt: *Incolumem abiturum, qui*  
*arma posuisset.* ea spes remisit a certamine animos, et  
 passim arma iactari coepta. Pertinacior pars armata  
 per aversam portam erupit; tutiorque eis audacia fuit,  
 quam incautus ad credendum ceteris pavor: quos cir-  
 cumdatos igni, nequidquam Deos fidemque invocan-  
 tes, Samnites concremaverunt. Consules, inter se  
 partiti provincias, Papirius in Apuliam ad Luceriam  
 pergit, ubi equites Romani obsides ad Caudium dati

U. c. 434. custodiebantur: Publilius in Samnio substitit adver-  
 a. C. 316. sus Caudinas legiones. Distendit ea res Samnitium  
 animos; quod nec ad Luceriam ire, ne ab tergo in-  
 staret hostis, nec manere, ne Luceria interim amit-  
 teretur, satis audebant. Optimum visum est commit-  
 tere rem fortunae, et transigere cum Publilio certa-  
 men. Itaque in aciem copias educunt.

XIII. Adversus quos Publilius consul quum dimi-  
 caturus esset, prius adloquendos milites ratus, con-  
 cionem advocari iussit. ceterum sicut ingentialacritate  
 ad praetorium concursus est, ita prae clamore pos-  
 centium pugnam nulla adhortatio imperatoris audita  
 est. Suus cuique animus memor ignominiae adhor-  
 tator aderat. Vadunt igitur in proelium urgentes sig-  
 niferos: et, ne mora in concursu pilis emittendis strin-  
 gendisque inde gladiis esset, pila, velut dato ad id sig-  
 no, abiiciunt, strictisque gladiis cursu in hostem fe-  
 runt. Nihil illic imperatoriae artis ordinibus aut  
 subsidiis locandis fuit: omnia ira militaris prope ve-  
 sano impetu egit. Itaque non fusi modo hostes sunt;  
 sed, ne castris quidem suis fugam impedire ausi,  
 Apuliam dissipati petiere; Luceriam tamen, coacto  
 rursus in unum agmine, est perventum. Romanos ira  
 eadem, quae per mediam aciem hostium tulerat, et  
 in castra pertulit. ibi plus, quam in acie, sanguinis  
 ac caedis factum, praedaeque pars maior ira corrup-  
 ta. Exercitus alter cum Papirio consule locis mari-  
 timis pervenerat Arpos per omnia pacata, Samnitium  
 magis iniuriis et odio, quam beneficio ullo populi Ro-  
 mani. Nam Samnites, ea tempestate in montibus vi-  
 catim habitantes, campestria et maritima loca, con-  
 temto cultorum molliore atque, ut evenit fere, locis<sup>u)</sup>  
 simili genere, ipsi montani atque agrestes depopula-  
 bantur. quae regio si fida Samnitibus fuisset, aut per-  
 venire Arpos exercitus Romanus nequisset, aut in-  
 teriecta inter Romam et Arpos, penuria rerum om-  
 u) loci Gron. Crev.



nium, exclusos a commeatibus absumsisset. Tum quo- U. c. 434.  
 que profectos inde ad Luceriam, iuxta obsidentes ob- a. C. 513.  
 sessosque, inopia vexavit. omnia ab Arpis Romanis  
 subpeditabantur: ceterum adeo exigue, ut militi, oc-  
 cupato stationibus vigiliisque et opere, eques folliculis  
 in castra ab Arpis frumentum veheret; interdum ob-  
 cursu hostium cogeretur, abiecto ex equo frumento,  
 pugnare. obsessis <sup>x)</sup> prius, quam alter consul victore  
 exercitu advenit, et commeatus ex montibus Samni-  
 tium invecti erant, et auxilia intromissa. Artiora om-  
 nia adventus Publilii fecit; qui, obsidione delegata in  
 curam collegae, vacuus per agros cuncta infesta com-  
 meatibus hostium fecerat. Itaque quum spes nulla  
 esset, diutius obsessos inopiam laturos, coacti Sam-  
 nites, qui ad Luceriam castra habebant, undique con-  
 tractis viribus, signa cum Papirio conferre.

XIV. Per id tempus, parantibus utrisque se ad  
 proelium, legati Tarentini interveniunt, denuntian-  
 tes Samnitibus Romanisque, ut bellum omitterent.  
 per utros stetisset, quo minus discederetur ab armis,  
 adversus eos se pro alteris pugnatu-ros. Ea legatione  
 Papirius audita, perinde ac motus dictis eorum, cum  
 collega se communicaturum respondit: adcitoque eo,  
 quum tempus omne in adparatu consumsisset, conlo-  
 cutus de re haud dubia, signum pugnae proposuit.  
 Agentibus divina humanaque, quae adsolent, quum  
 acie dimicandum est, consulibus, Tarentini legati ob-  
 cursare, responsum exspectantes, quibus Papirius ait:  
*Auspicia secunda esse, Tarentini, pullarius nunciat.*  
*litatum praeterea est egregie. auctoribus Diis, ut vide-*  
*tis, ad rem gerendam proficiscimur.* Signa inde ferri  
 iussit, et copias eduxit, vanissimam increpans gen-  
 tem, quae, suarum inpotens rerum prae domesticis se-  
 ditionibus discordiisque, aliis modum pacis ac belli fa-  
 cere aequum censeret. Samnites ex parte altera, quum  
 omnem curam belli remississent, quia aut pacem vere

x) et obsessis. Gron. Crev.

U. c. 434. cupiebant, aut expediebat simulare, ut Tarentinos sibi  
 a. C. 318. conciliarent, quum instructos repente ad pugnam Romanos conspexissent, vociferari, *se in auctoritate Tarentinorum manere, nec descendere in aciem, nec extra vallum arma ferre. Deceptos potius, quodcumque casus ferat, passuros, quam ut sprevisse pacis auctores Tarentinos videantur. Accipere se omen*, consules aiunt, *et eam precari mentem hostibus, ut ne vallum quidem defendant. Ipsi, inter se partitis copiis, succedunt hostium munimentis, et, simul undique adorti, quum pars fossas explerent, pars vellerent vallum, atque in fossas proruerent, nec virtus modo insita, sed ira etiam, exulceratos ignominia stimularet animos, castra invasere: et pro se quisque, non haec furculas, nec Caudium, nec saltus invios esse, ubi errorem fraus superbe vicisset; sed Romanam virtutem, quam nec vallum, nec fossae arcerent, memorantes, caedunt pariter resistentes fusosque, inermes atque armatos, servos, liberos, puberes, inpuberes, homines, iumentaque. nec ullum superfuisset animal, ni consules receptui signum dedissent, avidosque caedis milites e castris hostium imperio ac minis expulissent. Itaque apud infensos ob interpellatam dulcedinem irae confestim oratio habita est, ut doceretur miles, minime cuiquam militum consules odio in hostes cessisse, aut cessuros: quin duces, sicut belli, ita insatiabilis supplicii, futuros fuisse, ni respectus equitum sexcentorum, qui Luceriae obsides tenerentur, praepedisset animos: ne desperata venia hostes caecos in supplicia eorum ageret, perdere prius, quam perire, optantes. Laudare ea milites; laetarique obviam itum irae suae esse, ac fateri, omnia patienda potius, quam proderetur salus tot principum Romanae iuventutis.*

XV. Dimissa concione, consilium habitum, omnibusne copiis Luceriam premerent, an altero exercitu et duce Apuli circa, gens dubiae ad id voluntatis, tentarentur. Publilius consul, ad peragrandam pro-

fectus Apuliam, aliquot expeditione una populos<sup>U. c. 434.</sup>  
aut vi subegit, aut conditionibus in societatem ac-<sup>a. C. 318.</sup>  
cepit. Papirio quoque, qui obsessor Luceriae restite-  
rat, brevi ad spem eventus respondit. nam, inses-  
sis omnibus viis, per quas commeatus ex Samnio sub-  
vehebantur, fame domiti Samnites, qui Luceriae in  
praesidio erant, legatos misere ad consulem Romanum,  
ut, receptis equitibus, qui caussa belli essent, absiste-  
ret obsidione. His Papirius ita respondit: *Debuisse eos*  
*Pontium, Herennii filium, quo auctore Romanos sub*  
*iugum misissent, consulere, quid victis patiendum cen-*  
*seret. ceterum, quoniam ab hostibus in se aequa statui,*  
*quam in se ipsi ferre, maluerint, nunciare Luceriam iussit,*  
*arma, sarcinas, iumenta, multitudinem omnem inbellem*  
*intra moenia relinquerent: militem se cum singulis ve-*  
*stimentis sub iugum missurum, ultiscentem inlatam, non*  
*novam inferentem ignominiam.* Nihil recusatum. sep-  
tem millia militum sub iugum missa, praedaque ingens  
Luceriae capta, receptis omnibus signis armisque, quae  
ad Caudium amiserant; et, quod omnia superabat gau-  
dia, equitibus recuperatis, quos pignora pacis custo-  
diendos Luceriam Samnites dederant. Haud ferme alia  
mutatione subita rerum clarior victoria populi Romani  
est: siquidem etiam (quod quibusdam in annalibus in-  
venio) Pontius, Herennii filius, Samnitium imperator,  
ut expiaret consulum ignominiam, sub iugum cum  
ceteris est missus. Ceterum id minus miror, obscurum  
esse de hostium duce dedito missoque sub iugum: id  
magis mirabile est, ambigi, Luciusne Cornelius dicta-  
tor cum L. Papirio Cursore, magistro equitum, eas  
res ad Caudium, atque inde Luceriam gesserit, ultor-  
que unicus Romanae ignominiae, haud sciam an iustis-  
simo triumpho ad eam aetatem secundum Furium Ca-  
millum, triumphaverit, an consulum Papiriique prae-  
cipuum id decus sit. Sequitur hunc errorem alius er-  
ror, Cursorne Papirius proximis comitiis cum Q. Au-  
lio Cerretano iterum, ob rem bene gestam Luceriae con-

U. c. 435. tinuato magistratu, consul tertium creatus sit: an L.  
a. C. 317. Papirius Mugillanus, et in cognomine erratum sit.

XVI. Convenit, iam inde per consules reliqua belli perfecta. Aulius cum Forentanis <sup>y)</sup> uno secundo proelio debellavit; urbemque ipsam, quo se fusa contulerat acies, obsidibus imperatis, in deditionem accepit. Pari fortuna consulum alter cum Satricanis, qui cives Romani post Caudinam cladem ad Samnites defecerant, praesidiumque eorum in urbem acceperant, rem gessit. nam quum ad moenia Satrici admotus esset exercitus, legatisque, missis ad pacem cum precibus petendam, triste responsum ab consule redditum esset, *nisi praesidio Samnitium interfecto aut tradito, ne ad se remearent*; plus ea voce, quam armis inlatis, terroris colonis iniectum. Itaque subinde exsequentes quaerendo a consule legati, quonam se pacto paucos et infirmos crederet praesidio tam valido et armato vim adlaturos, ab iisdem consilium petere iussi, quibus auctoribus praesidium in urbem accepissent, discedunt: aegreque inpetrato, ut de ea re consuli senatum, responsaque ad se referri sineret, ad suos redeunt. Duae factiones senatum distinebant; una, cuius principes erant defectionis a populo Romano auctores; altera fidelium civium. certatum ab utrisque tamen est, ut ad reconciliandam pacem consuli opera navaretur. Pars altera (quum praesidium Samnitium, quia nihil satis praeparati erat ad obsidionem tolerandam, excessurum proxima nocte esset) enunciare consuli satis habuit, qua noctis hora, quaque porta, et quam in viam egressurus hostis foret. altera, quibus invitis descitum ad Samnites erat, eadem nocte portam etiam consuli aperuerunt, armatosque clam hostes in urbem acceperunt. Ita duplici proditione et praesidium Samnitium, insessis circa viam silvestribus locis, necopinato obpressum est, et ab urbe plena hostium clamor sublatus; momentoque unius horae caesus Sam-

y) *Forentanis* Gron. Crev. c. Drak.



nis<sup>2)</sup>, Satricanus captus, et omnia in potestate con- U. c. 435.  
sulis erant. Qui, quaestione habita, quorum opera de- a. C. 317.  
fectio esset facta, quos fontes comperit, virgis caesos  
securi percussit: praesidioque valido inposito, arma  
Satricanis ademit. Inde ad triumphum decessisse Ro-  
nam Papirium Cursorem scribunt, qui eo duce Luce-  
ciam receptam, Samnitesque sub iugum missos aucto-  
res sunt. Et fuit vir haud dubie dignus omni bellica  
laude, non animi solum vigore, sed etiam corporis  
viribus excellens. Praecipua pedum pernecitas inerat,  
quae cognomen etiam dedit: victoremque cursu om-  
nium aetatis suae fuisse ferunt: et seu virium vi, seu  
exercitatione multa, cibi vinique eundem capacissi-  
mum: nec cum ullo asperiores (quia ipse invicti ad  
laborem corporis esset) fuisse militiam pediti pariter  
equitque. Equites etiam aliquando ausos ab eo petere,  
ut sibi pro re bene gesta laxaret aliquid laboris: qui-  
bus ille, *Ne nihil remissum dicatis, remitto*, inquit,  
*ne utique dorsum demulceatis, quum ex equis descende-*  
*is*. et viserat in eo viro imperii ingens pariter in so-  
cios civesque. Praenestinus praetor per timorem se-  
gnius ex subsidiis suos duxerat in primam aciem. quem  
quum inambulans ante tabernaculum vocari iussisset,  
victorem expedire securim iussit. ad quam vocem ex-  
animi stante Praenestino, *Agedum, lictor, excide ra-*  
*dicem hanc*, inquit, *incommodam ambulantes*: per-  
usumque ultimi supplicii metu, multa dicta, dimisit.  
Haud dubie illa aetate, qua nulla virtutem feracior fuit,  
nemo unus erat vir, quo magis innisa res Romana staret.  
quin eum parem destinant animis Magno Alexandro  
lucem, si arma, Asia perdomita, in Europam vertisset.

XVII. Nihil minus quaesitum a principio huius  
operis videri potest, quam ut plus iusto ab rerum or-  
dine declinarem; varietatibus distinguendo opere, et  
legentibus velut de verticula amoena, et requiem ani-  
mo meo quaererem: tamen tanti regis ac ducis men-  
tio, quibus saepe tacitis cogitationibus volutavit ani-

2) Samnis caesus Gron. Crev.

U. c. 435. mum, eas evocat in medium: ut quaerere libeat, qui-  
 a. C. 317. nam eventus Romanis rebus, si cum Alexandro foret  
 bellatum, faturus fuerit. Plurimum in bello pollere  
 videntur militum copia et virtus, ingenia imperato-  
 rum, fortuna per omnia humana, maxime in res bel-  
 licas, potens. Ea, et singula intuenti et universa, si-  
 cut ab aliis regibus gentibusque, ita ab hoc quoque,  
 facile praestant invictum Romanum imperium. Iam  
 primum, ut ordiar ab ducibus comparandis, haud equi-  
 dem abnuo, egregium ducem fuisse Alexandrum; sed  
 clariorem tamen eum facit, quod unus fuit, quod ado-  
 lescens in incremento rerum, nondum alteram fortu-  
 nam expertus, decessit. Ut alios reges claros ducesque  
 omittam, magna exempla casuum humanorum; Cyrum,  
 quem maxime Graeci laudibus celebrant, quid, nisi  
 longa vita, sicut Magnum modo Pompeium, vertenti  
 praebuit fortunae? Recenseam duces Romanos, nec  
 omnes omnium aetatum<sup>a)</sup>, sed in ipsos eos, cum qui-  
 bus consulibus aut dictatoribus Alexandro fuit bellan-  
 dum; M. Valerium Corvum, C. Marcium Rutilum, C.  
 Sulpicium, T. Manlium Torquatum, Q. Publilium  
 Philonem, L. Papirium Cursorem, Q. Fabium Maxi-  
 mum, duos Decios, L. Volumnium, M. Curium. Dein-  
 ceptus ingentes sequuntur viri, si Punicum Romano  
 praeventisset bellum, seniorque in Italiam traiecisset.  
 Horum in quolibet tum indoles eadem, quae in Alexan-  
 dro erat, animi ingeniique; tum disciplina militaris,  
 iam inde ab initiis urbis tradita per manus, in artis per-  
 petuis praeceptis ordinatae modum venerat. Ita reges  
 gesserant bella; ita deinde exactores regum Iunii Va-  
 leriique; ita deinceps Fabii, Quinctii, Cornelii; ita  
 Furius Camillus, quem iuvenes ii<sup>b)</sup>, quibus cum Ale-  
 xandro dimicandum erat, senem viderant. Militaria  
 opera pugnando obeunti Alexandro (nam ea quoque  
 haud minus clarum eum faciunt) cessisset videlicet in  
 acie oblatus par Manlius Torquatus, aut Valerius Cor-

a) aetatum Gron. Crev. b) duo Gron.

vus insignes ante milites, quam duces? cessissent De- U. c. 435.  
 cii, devotis corporibus in hostem ruentes? cessisset a. C. 317.  
 Papirius Cursor, illo corporis robore, illo animi? vic-  
 tus esset consiliis iuvenis unius, ne singulos nominem,  
 senatus ille, quem qui *ex regibus constare* dixit, unus  
 veram speciem Romani senatus cepit? Id vero erat  
 periculum, ne solertius, quam quilibet unus ex iis,  
 quos nominavi, castris locum caperet, commeatus ex-  
 pediret, ab insidiis praecaveret, tempus pugnae deli-  
 geret, aciem instrueret, subsidiis firmaret. Non cum  
 Dario rem esse dixisset: quem, mulierum ac spado-  
 num agmen trahentem, inter purpuram atque aurum,  
 oneratum fortunae adparatibus suae <sup>c)</sup>, praedam ve-  
 rius, quam hostem, nihil aliud quam bene ausus vana  
 contemnere, incruentus devicit. Longe alius Italiae,  
 quam Indiae, per quam temulento agmine comissa-  
 bundus incessit, visus illi habitus esset, saltus Apu-  
 liae ac montes Lucanos cernenti et vestigia recentia  
 domesticae cladis, ubi avunculus eius nuper Epiri rex  
 Alexander absumentus erat.

XVIII. Et loquimur de Alexandro nondum merso  
 secundis rebus, quarum nemo intolerantior fuit. qui,  
 si ex habitu novae fortunae novique, ut ita dicam, in-  
 genii, quod sibi victor induerat, spectetur, Dario ma-  
 gis similis, quam Alexandro, in Italiam venisset, et  
 exercitum Macedoniae oblitum degenerantemque iam  
 in Persarum mores adduxisset. Referre in tanto regē  
 piget superbam mutationem vestis, et desideratas humi  
 iacentium adulationes, etiam victis Macedonibus gra-  
 ves, nedum victoribus; et foeda supplicia, et inter  
 vinum et epulas caedes amicorum, et vanitatem emen-  
 tiendae stirpis. Quid, si vini amor in dies fieret acrior?  
 quid, si trux ac praefervida ira? (nec quidquam du-  
 bium inter scriptores refero) nullane haec damna im-  
 peratoriis virtutibus ducimus? Id vero periculum erat,  
 quod levissimi ex Graecis, qui Parthorum quoque con-

c) suae apparatibus Gron. Crev.

U. c. 435. tra nomen Romanum gloriae favent, dictitare solent,  
 a. C. 317. ne maiestatem nominis Alexandri (quem ne fama quidem illis notum arbitror fuisse) sustinere non potuerit populus Romanus, et, adversus quem Athenis, in civitate fracta Macedonum armis, cernente tum maxime prope fumantes Thebarum ruinas, concionari libere ausi sint homines (id quod ex monumentis orationum patet), adversus eum nemo ex tot proceribus Romanis vocem liberam missurus fuerit. Quantalibet magnitudo hominis concipiatur animo, unius tamen ea magnitudo hominis erit, conlecta paullo plus decem annorum felicitate; quam qui eo extollunt, quod populus Romanus, etsi nullo bello, multis tamen proeliis victus sit, Alexandro nullius pugnae non secunda fortuna fuerit; non intelligunt, se hominis res gestas, et eius iuvenis, cum populi iam octingentesimum bellantis annum rebus conferre. Miremur, si, quum ex hac parte secula plura numerentur, quam ex illa anni, plus in tam longo spatio, quam in aetate tredecim annorum, fortuna variaverit? Quin tu hominis cum homine, et ducis cum duce, fortunam cum fortuna confers? Quot Romanos duces nominem, quibus numquam adversa fortuna pugnae fuit? Paginas in annalibus magistratum fastisque percurrere licet, consulum dictatorumque, quorum nec virtutis, nec fortunae ullo die populum Romanum poenituit. Et, quo sint mirabiliores, quam Alexander aut quisquam rex, denos vicanosque dies quidam dictaturam, nemo plus quam annum consulatum gessit: ab tribunis plebis delectus inpediti sunt: post tempus ad bella ierunt: ante tempus committiorum caussa revocati sunt: in ipso conatu rerum circumegit se annus: collegae nunc temeritas, nunc pravitas, inpedimento aut damno fuit: male gestis rebus alterius successum est: tironem aut mala disciplina institutum exercitum acceperunt. At, hercule, reges non liberi solum inpedimentis omnibus, sed domini rerum temporumque, trahunt consiliis cuncta,



non sequuntur. Invictus ergo Alexander cum invictis U. c. 435.  
 ducibus bella gessisset, et eadem fortunae pignora in a. C. 317.  
 discrimen detulisset. immo etiam eo plus periculi sub-  
 isset, quod Macedones unum Alexandrum habuissent,  
 multis casibus non solum obnoxium, sed etiam obfe-  
 rentem se: Romanis multi fuissent, Alexandro, vel  
 gloria, vel rerum magnitudine, pares; quorum suo  
 quisque fato, sine publico discrimine, viveret more-  
 returque.

**XIX.** Restat, ut copiae copiis comparentur vel  
 numero, vel militum genere, vel multitudine auxi-  
 liorum. Censebantur eius aetatis lustris ducena quin-  
 quagena millia capitum. Itaque, in omni defectione so-  
 ciorum Latini nominis, urbano prope delectu decem  
 scribebantur legiones. quaterniquinque exercitus sae-  
 pe per eos annos in Etruria, in Umbria, Gallis hostibus  
 adiunctis, in Samnio, in Lucanis gerebant bellum,  
 Latium deinde omne cum Sabinis, et Volscis, et Aequis,  
 et omni Campania, et parte Umbriae Etruriaeque, et  
 Picentibus, et Marsis, Pelignisque, ac Vestinis atque  
 Apulis, adiunctaque omni ora Graecorum inferi maris a  
 Thuriis Neapolim et Cumas, et inde Antio atque Ostiis  
 tenus Samnites, aut socios validos Romanis, aut fra-  
 ctos bello invenisset hostes. Ipse traiecisset mare cum  
 veteranis Macedonibus, non plus triginta millibus ho-  
 minum et quatuor millibus equitum, maxime Thessa-  
 lorum. hoc enim roboris erat. Persas, Indos aliasque  
 si adiunxisset gentes, impedimentum maius, quam  
 auxilium, traheret. Adde, quod Romanis ad manum  
 domi supplementum esset: Alexandro (quod postea  
 Hannibali accidit), alieno in agro bellanti, exercitus  
 consenuisset. Arma, clipeus sarissaeque illis; Roma-  
 no scutum, maius corpori tegumentum, et pilum, haud  
 paullo, quam hasta, vehementius ictu missuque te-  
 lum. Statarius uterque miles, ordines servans: sed illa  
 phalanx immobilis, et unius generis: Romana acies  
 distinctior, ex pluribus partibus constans; facilis par-

U. c. 435. tienti, quacumque opus esset, facilis iungenti. Iam  
 a. C. 317. in opere quis par Romano miles? quis ad tolerandum  
 laborem melior? Uno proelio victus Alexander, bello  
 victus esset. Romanum, quem Caudium, quem Can-  
 nae non fregerunt, quae fregisset acies? Nae ille saepe,  
 etiamsi prima prospere evenissent, Persas et Indos et  
 inbellem Asiam quaesisset, et cum feminis sibi bel-  
 lum fuisse dixisset: quod Epiri regem Alexandrum,  
 mortifero vulnere ictum, dixisse ferunt, sortem bel-  
 lorum in Asia gestorum ab hoc ipso iuvene cum sua  
 conferentem. Equidem, quum per annos quatuor et  
 viginti primo Punico bello classibus certatum cum Poe-  
 nis recorder, vix aetatem Alexandri subfecturam fuisse  
 reor ad unum bellum, et forsitan quum et foederibus  
 vetustis iuncta Punica res Romanae esset, et timor  
 par adversus communem hostem duas potentissimas  
 armis virisque urbes armarét, simul Punico Romano-  
 que obrutus bello esset. Non quidem Alexandro duce,  
 nec integris Macedonum rebus, sed experti tamen sunt  
 Romani Macedonem hostem adversus Antiochum, Phi-  
 lippum, Persen, non modo cum clade ulla, sed ne cum  
 periculo quidem suo. Absit invidia verbo <sup>d)</sup>, et civi-  
 lia bella sileant, numquam ab equite hoste, numquam  
 a pedite, numquam aperta acie, numquam aequis, uti-  
 que numquam nostris locis laboravimus. Equitem, sa-  
 gittas, saltus inpeditos, avia commeatibus loca gra-  
 vis armis miles timere potest. Mille acies, graviores  
 quam Macedonum atque Alexandri, avertit, avertet-  
 que; modo sit perpetuus huius, qua vivimus, pacis  
 amor et civilis cura concordiae.

U. c. 436. XX. M. Foslius Flaccinator inde et L. Plautius  
 a. C. 316. Venno consules facti. Eo anno ab frequentibus Sam-  
 nitium populis de foedere renovando legati, quum se-  
 natum humi strati movissent, reiecti ad populum haud-  
 quaquam tam efficaces habebant preces. Itaque foedere  
 negato <sup>e)</sup>, induciae biennii, quum per aliquot dies fa-

d) vero Gron. Crev.

e) de foedere negatum Eaed.

tigassent singulos precibus, inpetratae. Et ex Apulia U. c. 476.  
 Teanenses Canusinique populationibus fessi, obsidi- a. C. 316.  
 bus L. Plautio consuli datis, in deditionem venerunt.  
 Eodem anno primum praefecti Capuae creari coepti,  
 legibus ab L. Furio praetore datis: quum utrumque  
 ipsi pro remedio aegris rebus discordia intestina petis-  
 sent. Et duae Romae additae tribus, Usentina ac Fa-  
 lerina. Inclinatorum semel in Apulia rebus, Teates quo-  
 que Apuli ad novos consules, C. Iunium Bubulcum, U. c. 457.  
 Q. Aemilium Barbulam, foedus petitum venerunt <sup>f)</sup>, a. C. 315.  
 pacis per omnem Apuliam praestandae populo Ro-  
 mano auctores. id audacter spondendo inpetravere, ut  
 foedus daretur: neque ut aequo tamen foedere, sed ut  
 in ditione populi Romani essent. Apulia perdomita,  
 (nam Forento quoque valido oppido Iunius potitus erat)  
 in Lucanos perrectum inde repentino adventu Aemi-  
 lii consulis Nerulum vi captum. Et postquam res Ca-  
 puae stabilitas Romana disciplina fama per socios vul-  
 gavit; Antiatibus quoque, qui se sine legibus certis, sine  
 magistratibus agere querebantur, dati ab senatu ad iura  
 statuenda ipsius coloniae patroni: nec arma modo, sed  
 iura etiam Romana late pollebant.

XXI. C. Iunius Bubulcus et Q. Aemilius Barbula U. c. 433.  
 consules exitu anni non consulibus ab se creatis, a. C. 314. Sp.  
 Nautio et M. Popillio, ceterum dictatori L. Aemilio le-  
 giones tradiderunt. Is, cum L. Fulvio magistro equi-  
 tum Saticulam obpugnare adortus, rebellandi caussam  
 Samnitibus dedit. Duplex inde terror inlatus Romanis.  
 hinc Samnis, magno exercitu coacto ad eximendos ob-  
 sidione socios, haud procul castris Romanorum castra  
 posuit: hinc Saticulani magno cum tumultu, patefa-  
 ctis repente portis, in stationes hostium incurrerunt.  
 Inde pars utraque, spe alieni magis auxilii, quam vi-  
 ribus freta suis, iusto mox proelio inito Romanos ur-  
 gent. et, quamquam anceps dimicatio erat, tamen  
 utrimque tutam aciem dictator habuit; quia et locum  
 haud facilem ad circumveniendum cepit, et diversa

f) *venere* Gron. Crev.

U. c. 438. statuit signa. Infestior tamen in erumpentes incessit:  
 a. C. 314. nec magno certamine intra moenia compulit. Tum totam aciem in Samnites obvertit. ibi plus certaminis fuit. Victoria sicut sera, ita nec dubia, nec varia fuit. Fusi in castra Samnites, extinctis nocte ignibus, tacito agmine abeunt: et, spe abiecta Saticulae tuendae, Plistiam ipsi, socios Romanorum, ut parem dolorem hosti redderent, circumsidunt.

XXII. Anno circumacto, bellum deinceps ab dictatore Q. Fabio gestum est. Consules novi, sicut superiores, Romae manserunt: Fabius ad accipiendum ab Aemilio exercitum, ad Saticulam cum supplemento venit. neque enim Samnites ad Plistiam manserant: sed, aditis ab domo novis militibus, multitudine freti, castra eodem, quo antea, loco posuerunt: lacessentesque proelio Romanos avertere ab obsidione conabantur. Eo intentius dictator in moenia hostium versus, id bellum tantum ducere, quod urbem obpugnabat: securior ab Samnitibus agere, stationibus modo obpositis, ne qua in castra vis fierit. Eo ferocius adequitare <sup>g</sup>) Samnites vallo, neque otium pati. et quum iam prope in portis castrorum esset hostis, nihil consulto dictatore, magister equitum Q. Aulius Cerretanus, magno tumultu cum omnibus turmis equitum evectus, submovit hostem. tum in minime pertinaci genere pugnae sic fortuna exercuit opes, ut insignes <sup>h</sup>) utrinque clades et clara ipsorum ducum ederet funera. Prior Samnitium imperator, aegre patiens, quo tam ferociter adequitasset, inde fundi fugarique, orando hortandoque equites proelium integravit. in quem, insignem inter suos cientem pugnam, magister equitum Romanus infesta cuspe ita permisit equum, ut uno ictu exanimem equo praecipitaret: nec, ut fit, ad ducis casum perculsa magis, quam irritata, est multitudo. Omnes, qui circa erant, in Aulium, temere invectum per hostium tur-

g) *obequitare* Gron.

h) *insignes* Gron. Crev.



mas, tela coniecerunt. Fratri praecipuum decus <sup>U. c. 459.</sup>ulti Samnitium imperatoris dederunt. is victorem <sup>a. C. 313.</sup>detra-  
ctum ex equo magistrum equitum, plenus moeroris at-  
que irae, trucidavit: nec multum afuit, quin corpore  
etiam, quia inter hostiles ceciderat turmas, Samnites  
potirentur. Sed extemplo ad pedes descensum ab Ro-  
manis est, coactique idem Samnites facere. et repen-  
tina acies circa corpora ducum pedestre proelium  
iniit, quo haud dubie superat Romanus: recuperatum-  
que Aulii corpus, mixta cum dolore laetitia, victores  
in castra referunt. Samnites, duce amisso, et per eque-  
stre certamen tentatis viribus, omissa Saticula, quam  
nequidquam defendi rebantur, ad Plistiae obsidionem  
redeunt; intraque paucos dies Saticula Romanus per  
deditionem, Plistia per vim Samnis potitur.

XXIII. Mutata inde belli sedes est. ad Soram ex  
Samnio Apuliaque traductae legiones. Sora ad Sam-  
nites defecerat, interfectis colonis Romanorum. quo  
quum prior Romanus exercitus, ad ulciscendam civium  
necem recuperandamque coloniam, magnis itineribus  
praevenisset <sup>i)</sup>, et sparsi per vias speculatores, sequi  
legiones Samnitium, nec iam procul abesse, alii su-  
per alios, nunciarent; obviam itum hosti, atque ad  
Lautulas ancipiti proelio dimicatum est. non caedes,  
non fuga alterius partis, sed nox incertos, victi vi-  
toresne essent, diremit. Invenio apud quosdam, ad-  
versam eam pugnam Romanis fuisse, atque in ea ce-  
cidisse Q. Aulium, magistrum equitum. Subfectus in  
locum Aulii C. Fabius magister equitum cum exercitu  
novo ab Roma advenit; et, per praemissos nuncios  
consulto dictatore, ubi subsisteret, quoque tempore,  
et qua ex parte hostem adgrederetur, substitit occul-  
tus, ad omnia satis exploratis consiliis. Dictator, quum  
per aliquot dies post pugnam continuisset suos intra  
vallum, obsessi magis quam obsidentis modo, signum  
repente pugnae proposuit; et, efficacius ratus ad ac-

i) pervenisset Crev.

U. c. 439. cendendos virorum fortium animos, nullam alibi, quam  
 a. C. 313. in semet ipso, cuiquam relictam spem, de magistro  
 equitum novoque exercitu militem celavit. et, tam-  
 quam nulla, nisi in eruptione, spes esset, *Locis,*  
 inquit, *angustis, milites, deprehensi, nisi quam*  
*victoria patefecerimus, viam nullam habemus. Sta-*  
*tiva nostra munimento satis tuta sunt; sed inopia*  
*eadem infesta. nam et circa omnia defecerunt, unde*  
*subvehi commeatus poterant; et, si homines iuvare ve-*  
*lint, iniqua loca sunt. Itaque non frustrabor ego vos,*  
*castra hic relinquendo, in quae, infecta victoria, sicut*  
*pristino die, vos recipiatis. armis munimenta, non mu-*  
*nimentis arma tuta esse debent. Castra habeant repe-*  
*tantque, quibus operae est trahere bellum: nos omnium*  
*rerum respectum, praeterquam victoriae, nobis abscin-*  
*damus. Ferte signa in hostem: ubi extra vallum agmen*  
*excesserit, castra, quibus imperatum est, incendant:*  
*damna vestra, milites, omnium circa, qui defecerunt,*  
*populorum praeda sarcientur. Et*<sup>k)</sup> oratione dictatoris,  
 quae necessitatis ultimae index erat, milites accensi  
 vadunt in hostem, et respectus ipse ardentium castro-  
 rum, quamquam proximis tantum (ita enim iusserat  
 dictator) ignis est subditus, haud parvum fuit irrita-  
 mentum. Itaque, velut vecordes inlati, signa primo  
 inpetu hostium turbant; et in tempore, postquam ar-  
 dentia procul vidit castra magister equitum (id conve-  
 nerat signum), hostium terga invadit. ita circumventi  
 Samnites, qua potest quisque, fugam per diversa petunt.  
 Ingens multitudo, in unum metu conglobata, ac se-  
 met ipsam turba inpediens, in medio caesa. Capta ho-  
 stium castra direptaque; quorum praeda onustum mili-  
 tem in Romana castra dictator reducit, haudquaquam tam  
 victoria laetum, quam quod, praeter exiguum deforma-  
 tam incendio partem, cetera contra spem salva invenit.

U. c. 440. XXIV. Ad Soram inde reditum; novique consu-  
 a. C. 312. les M. Poetelius, C. Sulpicius exercitum ab dictatore

k) ea Gron.

**F**abio accipiunt, magna parte veterum militum dimissa, <sup>U. c. 440.</sup>  
 novisque cohortibus in supplementum adductis. Cete- <sup>a. C. 312.</sup>  
 rum, quum propter difficilem urbis situm nec obpug-  
 nandi satis certa ratio iniretur, et aut tempore lon-  
 ginq̃ua, aut praeceps periculo victoria esset; Soranus  
 transfuga, clam ex oppido profectus, quum ad vigi-  
 les Romanos penetrasset, duci se extemplo ad consu-  
 les iubet, deductusque traditurum urbem promittit.  
**V**isus inde (quum, quonam modo id praestaturus esset,  
 percunctantes doceret) haud vana adferre, perpulit,  
 prope adiuncta moenibus Romana castra ut sex millia  
 ab oppido removerentur: fore, ut minus intentae in  
 custodiam urbis diurnae stationes ac nocturnae vigi-  
 liae essent. ipse insequenti nocte, sub oppido silve-  
 stribus locis cohortibus insidere iussis, decem milites  
 delectos secum per ardua ac prope invia in arcem du-  
 cit; pluribus, quam pro numero virorum, missilibus  
 telis eo conlatis. Ad haec saxa erant, et temere ia-  
 centia, ut fit, in aspretis, et de industria etiam, quo  
 locus tutior esset, ab oppidanis congesta. Ubi quum  
 constituisset Romanos, semitamque angustam et ar-  
 duam, erectam ex oppido in arcem, ostendisset: *Hoc*  
*quidem adscensu, inquit, vel tres armati quamlibet mul-*  
*titudinem arcuerint: vos et decem numero, et, quod plus*  
*est, Romani, Romanorumque fortissimi viri estis, et*  
*locus pro vobis, et nox erit, quae omnia ex incerto ma-*  
*iora territis ostentat. Ego iam terrore omnia implebo:*  
*vos arcem intenti tenete.* Decurrit inde, quanto maxime  
 poterat, cum tumultu, *ad arma, et pro vestram fidem,*  
*cives! clamitans, arx ab hostibus capta est; ite, de-*  
*fendite.* Haec incidens principum foribus, haec obviiis,  
 haec excurrentibus in publicum pavidis increpat. Ac-  
 ceptum ab uno pavorem plures per urbem ferunt. Tre-  
 pidi magistratus, missis ad arcem exploratoribus, quum  
 tela et armatos tenere arcem multiplicato numero au-  
 dirent, avertunt animos a spe recuperandae arcis. Fu-  
 ga cuncta complentur, portaeque ab semisomnis ac

U. c. 440.  
 n. C. 312. maxima parte inermibus refringuntur: quarum per unam praesidium Romanum clamore excitatum inrupit, et concursantes per viam pavidos caedit. Iam Sora capta erat, quum consules prima luce advenere; et, quos reliquos fortuna ex nocturna caede ac fuga fecerat, in deditionem accipiunt. Ex his ducentos viginti quinque, qui omnium consensu destinabantur et infandae colonorum caedis et defectionis auctores, victos Romam deducunt. ceteram multitudinem incolumem, praesidio inposito, Sorae relinquunt. Omnes, qui Romam deducti erant, virgis in foro caesi, ac securi percussi summo gaudio plebis, cuius maxime intererat, tutam ubique, quae passim in colonias mitteretur, multitudinem esse.

**XXV.** Consules, ab Sora profecti, in agros atque urbes Ausonum bellum intulerunt. mota namque omnia adventu Samnitium, quum apud Lautulas dimicatum est, fuerant, coniurationesque circa Campaniam passim factae. nec Capua ipsa crimine caruit. quin Romanam quoque et ad principum quosdam inquirendo <sup>1)</sup> ventum est. Ceterum Ausonum gens proditione urbium, sicut Sora, in potestatem venit. Ausona, et Minturnae, et Vescia, urbes erant: ex quibus principes iuventutis duodecim numero, in proditionem urbium suarum coniurati, ad consules veniunt: docent, suos, iam pridem exoptantes Samnitium adventum, simul ad Lautulas pugnatum audierunt, pro victis Romanos habuisse, iuventute, armis <sup>m)</sup> Samnites iuvisse. fugatis inde Samnitibus, incerta pace agere, nec claudentes portas Romanis, ne arcessant bellum: et obstinatos claudere, si exercitus admoveatur. In ea fluctuatione animorum obprimi incautos posse. His auctoribus mota propius castra: missique eodem tempore circa tria oppida milites, partim armati, qui occulti propinqua moenibus insiderent loca; partim togati, tectis veste gladiis, qui

1) inquirendos Gron. Crev. c. Drak.

m) et armis Gron. Crev.



sub lucem apertis portis urbes ingrederentur. Ab his<sup>n)</sup> U. c. 440.  
 simul custodes trucidari coepti, simul datum signum<sup>a. C. 312.</sup>  
 armatis, ut ex insidiis concurrerent. ita portae occu-  
 patae, triaque oppida eadem hora eodemque consilio  
 capta. Sed, quia absentibus ducibus inpetus est factus,  
 nullus modus caedibus fuit; deletaque Ausonum gens,  
 vix certo defectionis crimine, perinde ac si interne-  
 civo<sup>o)</sup> bello certasset.

**XXVI.** Eodem anno, prodito hostibus Romano  
 praesidio, Luceria Samnitium facta. nec diu prodito-  
 ribus impunita res fuit. Haud procul inde exercitus  
 Romanus erat: cuius primo inpetu urbs, sita in pla-  
 no, capitur. Lucerini ac Samnites ad internecionem  
 caesi. eoque ira processit, ut Romae quoque, quum  
 de colonis mittendis Luceriam consuleretur senatus,  
 multi delendam urbem censerent. Praeter odium, quod  
 execrabile in his captos erat, longinquitas quoque  
 abhorrere a relegandis tam procul ab domo civibus inter  
 tam infestas gentes cogeabat. Vicit tamen sententia, ut  
 mitterentur coloni. duo millia et quingenti missi.  
 Eodem anno, quum omnia infida Romanis essent, Ca-  
 puae quoque occultae principum coniurationes factae.  
 De quibus quum ad senatum relatum esset, haudqua-  
 quam neglecta res est. quaestiones decretae, dictato-  
 remque quaestionibus exercendis dici placuit. C. Mae-  
 nius dictus. is M. Foslium magistrum equitum dixit.  
 Ingens erat magistratus eius terror. itaque sive timore  
 eius, seu conscientia, Calavios, Ovium Noviumque,  
 (ea capita coniurationis fuerant) priusquam nomina-  
 rentur apud dictatorem, mors haud dubie ab ipsis con-  
 scita iudicio subtraxit. Deinde, ut quaestioni Campa-  
 nae materia decessit, versa Romam interpretando res:  
 non nominatim, qui Capuae, sed in universum, qui  
 usquam coissent coniurassentve adversus rempubli-  
 cam, quaeri senatum iussisse. et coitiones, honorum  
 adipiscendorum caussa factas, adversus rempublicam

n) *ius Gron. Crev.*o) *internecino Eaed.*

U. c. 410. esse: latiorque et re et personis quaestio fieri; haud  
 a. C. 312. abnuente dictatore, sine fine ulla quaestionis suae ius  
 esse. Postulabantur ergo nobiles homines. adpellan-  
 tibusque tribunos nemo erat auxilio, quin nomina re-  
 ciperentur. Inde nobilitas, nec hi<sup>p)</sup> modo, in quos  
 crimen intendebatur, sed universi simul, negare, no-  
 bilium id crimen esse; quibus, si nulla obstetur fraude,  
 pateat via ad honorem, sed hominum novorum. ipsos  
 adeo dictatorem magistrumque equitum reos magis,  
 quam quaesitores idoneos eius criminis esse: intel-  
 cturosque ita id esse, simul magistratu abissent. Tum  
 enimvero Maenius, iam famae magis, quam imperii,  
 memor, progressus in concionem ita verba fecit: *Et  
 omnes anteactae vitae vos conscios habeo, Quirites, et  
 hic ipse honos, delatus ad me, testis est innocentiae meae.  
 neque enim, quod saepe alias, quia ita tempora postu-  
 labant reipublicae, qui bello clarissimus esset, sed qui  
 maxime procul ab his coitionibus vitam egisset, dictator  
 diligendus exercendis quaestionibus fuit. Sed quoniam  
 quidam nobiles homines (qua de caussa, vos existimare,  
 quam me pro magistratu quidquam incompertum dicere,  
 melius est) primum ipsas expugnare quaestiones omni ope  
 adnisi sunt: dein, postquam ad id parum potentes erant,  
 ne caussam dicerent, in praesidia adversariorum, ad-  
 pellationem et tribunicium auxilium, patricii confuge-  
 runt. postremo repulsi inde (adeo omnia tutiora, quam  
 ut innocentiam suam purgarent, visa) in nos intruerunt,  
 et privatis dictatorem poscere reum verecundiae non fuit:  
 ut omnes Dii hominesque sciant, ab illis, etiam quae  
 non possint, tentari, ne rationem vitae reddant; me ob-  
 viam ire crimini, et obferre me inimicis reum, dictatura  
 me abdo. Vos quaeso, consules, si vobis datum ab se-  
 natu negotium fuerit, in me primum et hunc M. Foslium  
 quaestiones exerceatis; ut adpareat, innocentia nostra  
 nos, non maiestate honoris, tutos a criminationibus istis  
 esse. Abdicat inde se dictatura, et post eum confestim  
 Foslius magisterio equitum: primique apud consules*  
 p) ii Gron. Crev.

(iis enim ab senatu mandata res est) rei facti, adver- U. c. 440.  
sus nobilium testimonia egregie absolvuntur. Publilius a. C. 312.  
etiam Philo, multiplicatis summis honoribus, post res  
tot domi belloque gestas, ceterum invisus nobilitati,  
causam dixit, absolutusque est. Nec diutius, ut fit,  
quam dum recens erat, quaestio per clara nomina reo-  
rum vixit. inde labi coepit ad viliora capita, donec  
coitionibus factionibusque, adversus quas comparata  
erat, obpressa est.

XXVII. Earum fama rerum, magis tamen spes  
Campanae defectionis, in quam coniuratum erat, Sam-  
nites, in Apuliam versos, rursus ad Caudium revoca-  
vit: ut inde ex propinquo, si qui motus occasionem  
aperiret <sup>q)</sup>, Capuam Romanis eriperent. Eo consules  
cum valido exercitu venerunt. et primo circa saltus,  
quum utrimque ad hostem iniqua via esset, cunctati  
sunt: deinde Samnites per aperta loca brevi circuitu in  
loca plana, Campanos campos, agmen demittunt, ibique  
primum castra in conspectu hostibus data: deinde levi-  
bus proeliis, equitum saepius, quam peditum, utrimque  
periculum factum: nec aut eventus eorum Romanum,  
aut morae, qua trahebant bellum, poenitebat. Samni-  
tium contra ducibus, et carpi parvis quotidie damnis, et  
senescere dilatione belli vires suae videbantur. itaque  
in aciem procedunt, equitibus in cornua divisus: qui-  
bus praeceptum erat, intentiores ad respectum castro-  
rum, ne qua eo vis fieret, quam ad proelium, starent:  
aciem pediti tutam fore. Consul <sup>r)</sup> Sulpicius in dex-  
tro, Poetelius in laevo cornu consistunt. Dextra pars,  
qua et Samnites raris ordinibus, aut ad circumeundos  
hostes, aut ne ipsi circumirentur, constiterant, latius  
patefacta stetit. Sinistris, praeterquam quod confer-  
tiores steterant, repentino consilio Poetelii consulis  
additae vires: qui subsidiarias cohortes, quae integrae  
ad longioris pugnae casus reservabantur, in primam  
aciem extemplo emisit; universisque hostem primo

q) *aperirent* Gron. Crev.r) *consules* Eaed.

U. c. 44<sup>10</sup>. inpetu viribus inpulit. Commota pedestri acie Samni-  
 a. C. 3<sup>12</sup>. tium, eques in pugnam succedit. in hunc, transverso  
 agmine inter duas acies se inferentem, Romanus equi-  
 tatus concitat equos: signaque et ordines peditum at-  
 que equitum confundit, donec universam ab ea parte  
 avertit aciem. In eo cornu non Poetelius solus, sed  
 Sulpicius etiam, hortator adfuerat, auctus ab suis  
 nondum conserentibus manus ad clamorem, ab sini-  
 stra parte prius exortum. unde, haud dubiam victo-  
 riam cernens, quum ad suum cornu tenderet cum mille  
 ducentis viris, dissimilem ibi fortunam invenit; Ro-  
 manos loco pulsos, victorem hostem signa in per-  
 cussos inferentem. Ceterum omnia mutavit repente  
 consulis adventus. nam et conspectu ducis reffectus mi-  
 litum est animus: et, maius quam pro numero auxi-  
 lium, advenerant s) fortes viri: et partis alterius vi-  
 ctoria audita, mox visa etiam, proelium restituit. Tota  
 deinde iam vincere acie Romanus, et, omisso certa-  
 mine, caedi capique Samnites; nisi qui Maleventum,  
 cui nunc urbi Beneventum nomen est, perfugerunt.  
 Ad triginta millia caesa aut capta Samnitium, prodit-  
 um memoriae est.

XXVIII. Consules, egregia victoria parta, pro-  
 tinus inde ad Bovianum obpugnandum legiones du-  
 cunt: ibique hiberna egerunt, donec ab novis consu-  
 libus L. Papirio Cursore quintum, C. Iunio Bubulco  
 iterum, nominatus dictator C. Poetelius cum M. Fos-  
 lio magistro equitum exercitum accepit. Is, quum au-  
 disset arcem Fregellanam ab Samnitibus captam, omis-  
 so Boviano ad Fregellas pergit. unde, nocturna Sam-  
 nitium fuga sine certamine receptis Fregellis, praesi-  
 dioque valido inposito, in Campaniam reditum maxime  
 ad Nolam armis repetendam. eo se intra moenia, sub  
 adventum dictatoris, et Samnitium omnis multitudo  
 et Nolani agrestes contulerant. Dictator, urbis situ cir-  
 cumspecto, quo apertior aditus ad moenia esset, om-  
 s) advenerat Gron. Crev.



nia aedificia (et frequenter ibi habitabatur) circumiecta U. c. 441.  
 muris incendit. nec ita multo post, sive a Poetelio di- a. C. 311.  
 ctatore, sive ab C. Iunio consule (nam utrumque tra-  
 ditur) Nola est capta. Qui captae decus Nolae ad con-  
 sulem trahunt, adiiciunt, Atinam et Calatiam ab eodem  
 captas; Poetelium autem, pestilentia orta, clavi figendi  
 caussa dictatorem dictum. Suessa et Pontiae eodem  
 anno coloniae deductae sunt. Suessa Auruncorum fue-  
 rat: Volsci Pontias, insulam sitam in conspectu li-  
 toris sui, incoluerant. et, Interamna et Casinum ut  
 deducerentur coloniae, senatusconsultum factum est.  
 sed triumviros creavere, ac misere colonorum quatuor  
 millia insequentes consules M. Valerius, P. Decius.

XXIX. Profligato fere Samnitiū bello, prius- U. c. 442.  
 quam ea cura decederet Patribus Romanis, Etrusci a. C. 310.  
 belli fama exorta est. nec erat ea tempestate gens alia,  
 cuius secundum Gallicos tumultus arma terribiliora  
 essent, quum propinquitate agri, tum multitudine ho-  
 minum. Itaque, altero consulum in Samnio reliquias  
 belli persequente, P. Decius, qui graviter aeger Ro-  
 mae restiterat, auctore senatu dictatorem C. Iunium  
 Bubulcum dixit. is, prout rei magnitudo postulabat,  
 omnes iuniores sacramento adigit: arma, quaeque alia  
 res poscit, summa industria parat: nec tantis adparati-  
 bus elatus de inferendo bello agit, quieturus haud du-  
 bie, nisi ultro arma Etrusci inferrent. Eadem in com-  
 parando cohibendoque bello consilia et apud Etruscos  
 fuere. neutri finibus egressi. et censura clara eo anno Ap.  
 Claudii et C. Plautii fuit; memoriae tamen felicioris ad  
 posteros nomen Appii, quod viam munivit, et aquam in  
 urbem duxit, eaque unus perfecit; quia, ob infamem  
 atque invidiosam senatus lectionem verecundia vi-  
 ctus, collega magistratu se abdicaverat. Appius, iam  
 inde antiquitus insitam pertinaciam familiae gerendo,  
 solus censuram obtinuit. Eodem Appio auctore, Po-  
 titii, gens<sup>t)</sup>, cuius ad aram Maximam Herculis fami-

t) Potitia gens Gron. Crœv.

U. c. 442. liare sacerdotium fuerat, servos publicos, ministerii  
 a. C. 310. delegandi caussa, sollemnia eius sacri docuerat. Tra-  
 ditur inde lectu mirabile, et quod dimovendis statu  
 suo sacris religionem facere posset, quum duodecim  
 familiae ea tempestate Potitiorum essent, puberes ad  
 triginta, omnes intra annum cum stirpe extinctos:  
 nec nomen tantum Potitiorum interisse, sed censorem  
 etiam Appium, memori Deum ira, post aliquot an-  
 nos luminibus captum.

U. c. 443. XXX. Itaque consules, qui eum annum secuti  
 a. C. 309. sunt, C. Iunius Bubulcus tertium et Q. Aemilius Bar-  
 bula iterum, initio anni quaesti apud populum, de-  
 formatum ordinem prava lectione senatus, qua po-  
 tiores aliquot lectis praeteriti essent; negaverunt, eam  
 lectionem se, quae sine recti pravique discrimine ad  
 gratiam ac <sup>u)</sup> libidinem facta esset, observaturos: et  
 senatum extemplo citaverunt eo ordine, qui ante cen-  
 sores Ap. Claudium et C. Plautium fuerat. Et duo im-  
 peria eo anno dari coepta per populum, utraque per-  
 tinentia ad rem militarem: unum, ut tribuni militum  
 seni deni in quatuor legiones a populo crearentur;  
 quae antea, perquam paucis suffragio populi relictis  
 locis, dictatorum et consulum ferme fuerant benefi-  
 cia. tulere eam rogationem tribuni plebei L. Atilius,  
 C. Marcius. Alterum, ut duumviros navales classis  
 ornandae reficiendaeque caussa idem populus iuberet.  
 lator huius plebisciti fuit M. Decius tribunus plebis.  
 Eiusdem anni rem dictu parvam praeterirem, ni ad  
 religionem visa esset pertinere. Tibicines quia pro-  
 hibiti a proximis censoribus erant in aede Iovis vesci,  
 quod traditum antiquitus erat, aegre passi, Tibur uno  
 agmine abierunt: adeo ut nemo in urbe esset, qui sa-  
 crificiis praecineret. Eius rei religio tenuit senatum:  
 legatosque Tibur miserunt, ut darent operam, ut hi  
 homines Romanis restituerentur. Tiburtini, benigne  
 polliciti, primum aditos eos in curiam hortati sunt,

u) et Gron. Crev.

uti reverterentur Romam: postquam perpelli nequibant, consilio, haud abhorrente ab ingeniis hominum, eos adgrediuntur. Die festo alii alios per speciem celebrandarum cantu epularum<sup>x)</sup> invitant, et vino, cuius avidum ferme genus est, oneratos sopiunt: atque ita in plastra somno vinctos<sup>y)</sup> coniiciunt, ac Romam deportant. nec prius sensere, quam, plastris in foro relictis, plenos crapulae eos lux obpressit. Tunc concursus populi factus, inpetratoque, ut manerent, datum, ut triduum quotannis ornati, cum cantu atque hac, quae nunc sollemnis est, licentia per urbem vagarentur: restitutumque in aede vescendi ius iis, qui sacris praecinerent. Haec inter duorum ingentium bellorum curam gerebantur.

XXXI. Consules inter se provincias partiti; Iunio Samnites, Aemilio novum bellum Etruria sorte obvenit. In Samnio Cluviam, praesidium Romanum, quia nequiverat vi capi, obsessum fame in deditio- nem acceperant Samnites, verberibusque foedum in modum laceratos occiderant deditos. Huic infensus crudelitati Iunius, nihil antiquius obpugnatione Cluviana ratus, quo die adgressus est moenia, vi cepit, atque omnes puberes interfecit. Inde victor exercitus Bovianum ductus. caput hoc erat Pentrorum Samnitium, longe ditissimum atque opulentissimum armis virisque. Ibi quia haud tantum irarum erat, spe praedae milites accensi, oppido potiuntur. minus itaque saevitum in hostes est: praedae plus pene, quam ex omni Samnio umquam, egestum, benigneque omnis militi concessa. Et postquam praepotentem armis Romanum nec acies subsistere ullae, nec castra, nec urbes poterant; omnium principum in Samnio eo curae sunt intentae, ut insidiis quaereretur locus, si qua licentia populando effusus exercitus excipi ac circumveniri posset. Transfugae agrestes et captivi quidam, pars forte, pars consilio oblati, congruentia ad consulem adferen-

x) add. *caussa* Gron. Crev. c. Drak.      y) *victos* Gron. Crev.

U. c. 443. tes, quae et vera erant, pecoris vim ingentem in  
 a. C. 309. saltum avium compulsam esse, perpulerunt, ut prae-  
 datum eo expeditae ducerentur legiones. Ibi in-  
 gens hostium exercitus itinera occultus insederat, et,  
 postquam intrasse Romanos vidit saltum, repente ex-  
 ortus cum clamore ac tumultu incautos invadit. Et  
 primo nova res trepidationem fecit, dum arma capiunt,  
 sarcinas congerunt in medium: dein, postquam, ut  
 quisque liberaverat se onere, aptaveratque arnis, ad  
 signa undique coibant, et notis ordinibus in vetere  
 disciplina militiae, iam sine praecepto ullius sua sponte  
 struebatur acies, consul, ad ancipitem maxime pug-  
 nam advectus, desilit ex equo, et Iovem Martemque  
 atque alios testatur Deos, *se nullam suam gloriam inde,  
 sed praedam militi quaerentem, in eum locum deve-  
 nisse. neque in se aliud, quam nimiam ditandi ex hoste  
 militis curam, reprehendi posse: ab eo se dedecore nul-  
 lam rem aliam, quam virtutem militum, vindicaturam.  
 conniterentur modo uno animo omnes invadere hostem,  
 victum acie, castris exutum, nudatum urbibus, ulti-  
 mam spem furto insidiarum tentantem, et loco, non ar-  
 mis, fretum. Sed quem esse iam virtuti Romanae inex-  
 pugnabilem locum?* Fregellana arx, Soranaque, et  
 ubicumque iniquo successum erat loco, memoraban-  
 tur. His accensus miles, omnium inmemor difficulta-  
 tium <sup>2)</sup>, vadit adversus imminentem hostium aciem.  
 ibi paullum <sup>a)</sup> laboris fuit, dum in adversum clivum  
 erigitur agmen: ceterum, postquam prima signa pla-  
 niciem summam ceperunt, sensitque acies aequo se  
 iam institisse loco, versus extemplo est terror in in-  
 sidiatores, easdemque latebras, quibus se paullo ante  
 texerant, palati atque inermes fuga repetebant: sed  
 loca difficilia, hosti quaesita, ipsos tum sua fraude  
 impediebant. Itaque ergo perpauca effugium patuit:  
 caesa ad viginti millia hominum, victorque Romanus  
 ad oblatam ultro ab hoste praedam pecorum discurrit.

<sup>2)</sup> difficultatum Gron. Crev.

<sup>a)</sup> ubi paululum Eaed.



**XXXII.** Dum haec geruntur in Samnio, iam om-<sup>U. c. 443.</sup>  
 nes Etruriae populi praeter Arretinos<sup>b)</sup> ad arma ierant.<sup>a. C. 309.</sup>  
 ab obpugnando Sutrio, quae urbs, socia Romanis, ve-  
 lut claustra Etruriae erat, ingens orsi bellum. Eo al-  
 ter consulum Aemilius cum exercitu ad liberandos ob-  
 sidione socios venit. Advenientibus Romanis, Sutrini  
 commeatus benigne in castra ante urbem posita adve-  
 xere. Etrusci diem primum consultando, maturarent,  
 traherentne bellum, traduxerunt. Postero die, ubi  
 celeriora, quam tutiora, consilia magis placuere duci-  
 bus, sole orto signum pugnae propositum est, armati-  
 que in aciem procedunt. Quod postquam consuli nun-  
 ciatum est, exemplo tesseram dari iubet, ut prandeat  
 miles, firmatisque cibo viribus arma capiat. dicto pa-  
 retur. Consul, ubi armatos paratosque vidit, signa  
 extra vallum proferri iussit, et haud procul hoste in-  
 struxit aciem. Aliquamdiu intenti utrinque steterunt,  
 exspectantes ut ab adversariis clamor et pugna incipe-  
 ret. et prius sol meridie se inclinavit, quam telum hinc  
 aut illinc emissum est. inde, ne infecta re abiretur,  
 clamor ab Etruscis oritur, concinuntque tubae, et signa  
 inferuntur. Nec segnius ab Romanis pugna initur. con-  
 currunt infensis animis. numero hostis, virtute Ro-  
 manus superat. Anceps proelium multos utrimque, et  
 fortissimum quemque, absumit: nec prius inclinata  
 res est, quam secunda acies Romana ad prima signa,  
 integri fessis, successerunt. Etrusci, quia nullis re-  
 centibus subsidiis fulta prima acies fuit, ante signa  
 circaque omnes ceciderunt. nullo umquam proelio fu-  
 gae minus, nec plus caedis fuisset, ni obstinatos mori  
 Tuscos nox texisset; ita ut victores prius, quam victi,  
 pugnandi finem facerent. Post occasum solis signum  
 receptui datum est: nocte ab utroque in castra reditum.  
 Nec deinde quidquam eo anno rei memoria dignae apud  
 Sutrium gestum est; quia et ex hostium exercitu pri-  
 ma tota acies deleta uno proelio fuerat, subsidiariis

b) *Arretinos* Gron.

U. c. 443. modo relictis, vix quod satis esset ad castrorum praesidium: et ad apud Romanos tantum vulnerum fuit, ut plures post proelium saucii decesserint quam ceciderant in acie.

U. a. 444. XXXIII. Q. Fabius insequentis anni consul bellum ad Sutrium excepit. collega Fabio C. Marcius Rutilus datus est. Ceterum et Fabius supplementum ab Roma adduxit, et novus exercitus domo aditus Etruscis venit. Permulti anni iam <sup>c)</sup> erant, quum inter patricios magistratus tribunosque <sup>d)</sup> nulla certamina fuerant; quum ex ea familia, quae velut fatalis tum tribunis ac plebi erat, certamen oritur. Ap. Claudius censor, circumactis decem et octo mensibus, quod Aemilia lege finitum censurae spatium temporis erat, quum C. Plautius collega eius magistratu se abdicasset, nulla vi compelli, ut abdicaret, potuit. P. Sempronius erat tribunus plebis; qui finiendae censurae intra legitimum tempus actionem susceperat: non popularem magis, quam iustam; nec in vulgus, quam optimo cuique, gratiorem. Is, quum idem legem Aemiliam recitaret, auctoremque eius Mam. Aemilium dictatorem laudibus ferret; qui quinquennalem ante censuram, et longinquitate potestatem dominantem, intra sex mensium et anni coegisset spatium: *Dic, agedum, inquit, Ap. Claudii, quidnam facturum fueris, si eo tempore, quo C. Furius et M. Geganius censores fuerunt, censor fuisses.* Negare Appius, interrogationem tribuni magno opere ad causam pertinere suam. nam, etsi tenuerit lex Aemilia eos censores, quorum in magistratu lata esset, quia post illos censores creatos eam legem populus iussisset, quodque postremum iussisset, id ius ratumque esset; non tamen aut se, aut eorum quemquam, qui post eam legem latam creati censores essent, teneri ea lege potuisse.

XXXIV. Haec sine ullius adsensu cavillante Appio, *En, inquit, Quirites, illius Appii progenies, qui,*

c) iam anni Gron. Crev.

d) add. plebis Eaed.

*decemvir in annum creatus, altero anno se ipse creavit: tertio, nec ab se, nec ab ullo creatus, privatus fasces et imperium obtinuit. nec ante continuando abstinit magistratu, quam obruerent<sup>e)</sup> eum male parta, male gesta, male retenta imperia. Haec est eadem familia, Quirites, cuius vi atque iniuriis compulsi, extorres patria, Sacrum montem cepistis: haec, adversus quam tribunicium auxilium vobis comparastis: haec, propter quam duo exercitus Aventinum insedistis: haec, quae foenebres leges: haec, quae agrarias semper inpugnavit: haec connubia Patrum et plebis interrupit: haec plebi ad curules magistratus iter obsepsit. hoc est nomen multo, quam Tarquiniorum, infestius vestrae libertati. Itane tandem, Ap. Claudii, quum centesimus iam annus sit ab Mam. Aemilio dictatore, tot censores fuerint, nobilissimi fortissimique viri, nemo eorum duodecim tabulas legit? nemo id ius esse, quod postremo populus iussisset, scivit? Immo vero omnes sciverunt; et ideo Aemiliae potius legi paruerunt, quam illi antiquae, qua primum censores creati erant, quia hanc postremam iusserat populus<sup>f)</sup>: et quia, ubi duae contrariae leges sunt, semper antiquae obrogat nova. An hoc dieis, Appi, non teneri Aemilia lege populum? an populum teneri, te unum ex legem esse? Tenuit Aemilia lex violentos illos censores, C. Furium et M. Geganium; qui, quid iste magistratus in republika mali facere posset, indicarunt: quum, ira finitae potestatis, Mam. Aemilium, principem aetatis suae bellidomique, aerarium fecerunt: tenuit deinceps omnes censores intra centum annorum spatium: tenet C. Plautium collegam tuum iisdem auspiciis, eodem iure creatum. An hunc non, ut qui optimo iure censor creatus esset, populus creavit? tu unus eximius es, in quo hoc praecipuum ac singulare valeat? Quem tu regem sacrificiorum crees, amplexus regni nomen, ut qui optimo iure rex Romae creatus sit, creatum se dicet? quem semestri dictatura; quem interregno quinque dierum contentum*

e) obruerunt Gron. Crev.

f) populus del. Eaed.

U. c. 444. fore putes? quem clavi figendi, aut ludorum edussa  
a. C. 508. dictatorem audacter crees? Quam isti stolidos ac socor-

des videri creditis eos, qui intra vicesimum diem, ingentibus rebus gestis, dictatura se abdicaverunt, aut qui vitio creati abierunt magistratu? Quid ego antiqua repetam? Nuper intra decem annos C. Maenius dictator, quia, quum quaestiones severius, quam quibusdam potentibus tutum erat, exerceret, contagio eius, quod quaerebat ipse <sup>g</sup>), criminis obiectata ab inimicis est, ut privatus obviam iret crimini, dictatura se abdicavit. Nolo ego istam in te modestiam: ne degeneraveris a familia imperiosissima et superbissima: non die, non hora citius, quam necesse est, magistratu abieris; modo ne excedas finitum tempus. Satis est, aut diem, aut mensem censurae adiacere? Triennium, inquit, et sex menses ultra, quam licet Aemilia lege, censuram geram, et solus geram. hoc quidem iam regno simile est. An collegam subrogabis, quem ne in demortui quidem locum subrogari fas est? poenitet enim, quod antiquissimum sollemne, et solum ab ipso, cui sit, institutum Deo, ab nobilissimis antistitibus eius sacri ad servorum ministerium religiosus censor deduxisti. gens antiquior originibus urbis huius, hospitio Deorum immortalium sancta, propter te ac tuam censuram intra annum ab stirpe exstincta est: nisi universam rempublicam eo nefario obstrinxeris, quod ominari etiam reformidat animus. Urbs eo lustro capta est, quo, demortuo collega C. Iulio censore, L. Papirius Cursor, ne abiret magistratu, M. Cornelium Maluginensem collegam subrogavit. Et quanto modestior illius cupiditas fuit, quam tua, Appi? Nec solus, nec ultra finitum lege tempus L. Papirius censuram gessit, tamen neminem invenit, qui se postea auctorem sequeretur, omnes deinceps censores post mortem collegae se magistratu abdicarunt. Te, nec quod dies exit <sup>h</sup>) censurae, nec quod collega magistratu abiit, nec lex, nec pudor coercet: virtutem in superbia, in audacia, in contemptu Deorum ho-

g) quaerebat, ipsi Gron. Crev.

h) exiit Eaed.



*minumque ponis. Ego te, Ap. Claudii, pro istius magistratus maiestate ac verecundia, quem gessisti, non modo manu violatum, sed ne verbo quidem inclementiori a me adpellatum vellem: sed et haec, quae adhuc egi, pervicacia tua et superbia coegit me loqui; et, nisi Aemiliae legi parueris, in vincula duci iubebo; nec, quum ita comparatum a maioribus sit, ut, comitiis censoriis nisi duo confecerint legitima suffragia, non renunciato altero comitia differantur, ego te, qui solus censor creari non possis, solum censuram gerere patiar. Haec taliaque quum dixisset, prendi censorem, et in vincula duci iussit. Adprobantibus sex tribunis actionem collegae, tres adpellanti Appio auxilio fuerunt; summaque invidia omnium ordinum solus censuram gessit.*

U. c. 444.  
a. C. 308.

**XXXV.** Dum ea Romae geruntur, iam Sutrium ab Etruscis obsidebatur: consulique Fabio, imis montibus ducenti ad ferendam opem sociis tentandasque munitiones, si qua posset, acies hostium instructa obcurrit; quorum ingentem multitudinem quum ostenderet subiecta late planicies; consul, ut loco paucitatem suorum adiuveret, flectit paullulum in clivos agmen (adspreta erant strata saxis). inde signa in hostem obvertit. Etrusci, omnium, praeterquam multitudinis suae, qua sola freti erant, inmemores, proelium ineunt adeo raptim et avide, ut, abiectis missilibus, quo celerius manus consererent, stringerent gladios, vadentes in hostem. Romanus contra nunc tela, nunc saxa, quibus eos adfatim locus ipse armabat, ingerere. Igitur scuta galeaeque ictae quum etiam, quos non vulneraverant, turbarent (neque subire erat facile ad propiorem pugnam, neque missilia habebant, quibus eminus rem gererent), stantes et expositos ad ictus quum iam satis nihil tegeret, quosdam etiam pedem referentes fluctuantemque et instabilem aciem, redintegrato clamore, strictis gladiis hastati et principes invadunt. eum inpetum non tulerunt Etrusci, versis-

U. c. 414. que signis, fuga effusa castra repetunt. Sed equites  
 a. C. 308. Romani, praevecti per obliqua campi, quum se fu-  
 gientibus obtulissent, omisso ad castra itinere, mon-  
 tes petunt. Inde inermi pene agmine ac vexato vulne-  
 ribus in silvam Ciminiam penetratum. Romanus, mul-  
 tis millibus Etruscorum caesis, duodequadraginta sig-  
 nis militaribus captis, castris etiam hostium cum prae-  
 da ingenti potitur. Tum de persequendo hoste agitari  
 coeptum.

XXXVI. Silva erat Ciminia magis tum invia at-  
 que horrenda, quam nuper fuere Germanici saltus,  
 nulli ad eam diem ne mercatorum quidem adita. eam  
 intrare haud fere quisquam, praeter ducem ipsum, au-  
 debat. aliis omnibus cladis Caudinae nondum memoria  
 aboleverat. Tum ex iis, qui aderant, (consulis fratrem  
 M. Fabium, Kaesonem alii, C. Claudium quidam ma-  
 tre eadem, qua consulem, genitum tradunt) specula-  
 tum se iturum professus, brevique omnia certa adla-  
 turum. Caere educatus apud hospites, Etruscis inde li-  
 teris eruditus erat, linguamque Etruscam probe nove-  
 rat. Habeo auctores, vulgo tum Romanos pueros, si-  
 cut nunc Graecis, ita Etruscis literis erudiri solitos.  
 Sed propius est vero, praecipuum aliquid fuisse in eo,  
 qui se tam audaci simulatione hostibus inmiscuerit.  
 servus ei dicitur comes unus fuisse, nutritus una,  
 eoque haud ignarus linguae eiusdem: nec quidquam  
 aliud proficiscentes, quam summam regionis, quae  
 intranda erat, naturam ac nomina principum in popu-  
 lis acceperere; ne qua inter conloquia insigni nota hae-  
 sitantes deprehendi possent. Iere pastorali habitu,  
 agrestibus telis, falcibus gaesisque binis armati. Sed  
 neque commercium linguae, nec vestis armorumve  
 habitus sic eos texit, quam quod abhorrebat ab fide,  
 quemquam externum Ciminios saltus intraturum. Us-  
 que ad Camertes Umbros penetrasse dicuntur. Ibi,  
 qui essent, fateri Romanum ausum: introductumque  
 in senatum consulis verbis egisse de societate amici-

tiaque: atque inde comi hospitio acceptum, nunciare U. c. 444.  
 Romanis iussum, commeatum exercitui dierum tri- a. C. 308.  
 ginta praesto fore, si ea loca intrasset; iuventutem-  
 que Camertium Umbrorum in armis paratam imperio  
 futuram. Haec quum relata consuli essent, impedimen-  
 tis prima vigilia praemissis, legionibus post inpedi-  
 menta ire iussis, ipse substitit cum equitatu: et, luce  
 orta, postero die obequitavit stationibus hostium,  
 quae extra saltum dispositae erant: et, quum satis diu  
 tenuisset hostem, in castra sese recepit; portaque al-  
 tera egressus, ante noctem agmen adsequitur. Postero  
 die, luce prima, iuga Ciminii montis tenebat. inde,  
 contemplatus opulenta Etruriae arva, milites emittit.  
 Ingenti iam abacta praeda, tumultuariae agrestium  
 Etruscorum cohortes, repente a principibus regionis  
 eius concitatae, Romanis obcurrunt, adeo incompo-  
 sitae, ut vindices praedarum prope ipsi praedae fuerint.  
 Caesis fugatisque iis, late depopulato agro, victor Ro-  
 manus, opulentusque rerum omnium copia, in castra  
 rediit. Eo forte quinque legati cum duobus tribunis  
 plebis venerant, denunciatum Fabio senatus verbis, ne  
 saltum Ciminium transiret. laetati serius se, quam ut  
 inpedire bellum possent, venisse, nuncii victoriae  
 Romam revertuntur.

XXXVII. Hac expeditione consulis motum la-  
 tius erat, quam profligatum, bellum. vastationem nam-  
 que sub Ciminii montis radicibus iacens ora senserat,  
 conciveratque indignatione non Etruriae modo popu-  
 los, sed Umbriae finitima. Itaque, quantus non um-  
 quam antea, exercitus ad Sutrium venit: neque e sil-  
 vis tantummodo promota castra, sed etiam aviditate  
 dimicandi quam primum in campos delata acies: deinde  
 instructa primo suo stare loco, relicto hostibus ad in-  
 struendum<sup>i)</sup> contra spatium: dein<sup>k)</sup>, postquam detre-  
 ctare hostem sensere pugnam, ad vallum subeunt. Ubi  
 postquam stationes quoque receptas intra munimenta

i) instruendam Gron. Crev.

k) deinde Eaed.

U. c. 444. *sensere, clamor repente circa duces ortus, ut eo sibi*  
 a. C. 306. *e castris cibaria eius diei deferri inberent; mansuros se*  
*sub armis, et aut nocte, aut certe luce prima castra*  
*hostium invasuros.* Nihil quietior Romanus exercitus  
 imperio ducis continetur. decima erat fere diei hora,  
 quum cibum capere consul milites iubet; praecipit, ut  
 in armis sint, quacumque diei noctisve hora signum de-  
 derit. Paucis milites adloquitur, Samnitium bella extol-  
 lit, elevat Etruscos: *nec hostem hosti, nec multitudinem*  
*multitudini comparandam ait esse. Praeterea telum aliud*  
*occultum scituros in tempore: interea taceri opus esse.*  
 His ambagibus prodi simulabat hostes, quo animus  
 militum multitudine territus restitueretur: et, quod  
 sine munimento consederant, verisimilius erat, quod  
 simulabatur. Curati cibo corpora quieti dant, et quarta  
 fere vigilia sine tumultu excitati arma capiunt. Dola-  
 brae calonibus dividuntur ad vallum proruendum fos-  
 sasque inplendas. intra munimenta instruitur acies:  
 delectae cohortes ad portarum exitus conlocantur. da-  
 to deinde signo paullo ante lucem, quod aestivis no-  
 ctibus sopitae maxime quietis tempus est, proruto vallo  
 erupit acies: stratos passim invadit hostes: alios in-  
 mobiles, alios semisomnos in cubilibus suis, maxi-  
 mam partem ad arma trepidantes, caedes obpressit.  
 paucis armandi se datum spatium est. Eos ipsos, non  
 signum certum, non ducem sequentes, fundit Roma-  
 nus, fugatos eques persequitur. ad castra, ad silvas  
 diversi tendebant. Silvae tutius dedere refugium. nam  
 castra in campis sita eodem die capiuntur, aurum ar-  
 gentumque iussum referri ad consulem: cetera praeda  
 militis fuit. Caesa aut capta eo die hostium millia ad  
 sexaginta. Eam tam claram pugnam trans Ciminiam  
 silvam ad Perusiam pugnata, quidam auctores sunt;  
 metuque in magno civitatem fuisse, ne interclusus exer-  
 citus tam infesto saltu, coortis undique Tuscis Umbris-  
 que, obprimeretur. Sed, ubicumque pugnatum est,  
 res Romana superior fuit: itaque a Perusia, et Cor-



tona, et Arretio<sup>1)</sup>), quae ferme capita Etruriae popu-  
 lorum ea tempestate erant, legati, pacem foedusque  
 ab Romanis petentes, inducias in tringinta annos in-  
 petrauerunt.

U. c. 444.  
 a. C. 308.

XXXVIII. Dum haec in Etruria geruntur, consul alter C. Marcius Rutilus Allifas de Samnitibus vi cepit. multa alia castella vicique, aut deleta hostiliter, aut integra in potestatem venere. Per idem tempus et classis Romana a P. Cornelio, quem senatus maritimae orae praefecerat, in Campaniam acta, quum adpulsa Pompeios esset; socii inde navales ad depopulandum agrum Nucerinum profecti, proximis raptim vastatis, unde reditus tutus ad naves esset, dulcedine, ut sit, praedae longius progressi, excivere hostes. Palatis per agros nemo obuius fuit, quum occidione occidi possent: redeuntes agmine incauto haud procul navibus adsecuti agrestes exuerunt praeda, partem etiam occiderunt: quae superfuit caedi, trepida multitudo ad naves compulsa est. Profectio Q. Fabii trans Ciminiam silvam quantum Romae terrorem fecerat, tam laetam famam in Samnium ad hostes tulerat: *interclusum Romanum exercitum obsideri, cladisque imaginem Furculas Caudinas memorabant. eadem temeritate avidam ulteriorum semper gentem in saltus invios deductam, septam non hostium magis armis, quam locorum iniquitatibus esse.* Iam gaudium invidia quadam miscebatur, quod belli Romani decus ab Samnitibus fortuna ad Etruscos avertisset. itaque armis virisque ad obtinendum C. Marcium consulem concurrunt; protinus inde Etruriam per Marsos ac Sabinos petitori, si Marcius dimicandi potestatem non faciat. Obuius iis consul fuit. dimicatum proelio utrinque atroci, atque incerto eventu est. et quum anceps caedes fuisset, adversae tamen rei fama in Romanos vertit, ob amissos quosdam equestris ordinis, tribunosque militum, atque unum legatum, et (quod insigne maxime fuit) consulis ipsius vulnus. Ob haec etiam

U. c. 414. aucta fama (ut solet) ingens terror Patres invasit, dictatoremque dici placebat: nec, quin Cursor Papirius diceretur, in quo tum summa rei bellicae ponebatur, dubium cuiquam erat: sed nec in Samnium nuncium perferri, omnibus infestis, tuto posse; nec vivere Marcium consulem satis fidebant. Alter consul Fabius infestus privatim Papirio erat: quae ne ira obstaret bono publico, legatos ex consularium numero mittendos ad eum senatus censuit: qui sua quoque eum, non publica solum, auctoritate moverent, ut memoriam simultatum <sup>m)</sup> patriae remitteret. Profecti legati ad Fabium quum senatusconsultum tradidissent, adiecis-  
sentque orationem convenientem mandatis, consul, demissis in terram oculis, tacitus ab incertis, quidnam acturus esset <sup>n)</sup>, legatis recessit. nocte deinde silentio (ut mos est) L. Papirium dictatorem dixit: cui quum ob animum egregie victum legati gratias agerent, obstinatum silentium obtinuit, ac sine responso ac mentione facti sui legatos dimisit, ut adpareret, insignem dolorem ingenti comprimi animo. Papirius C. Iunium Bubulcum magistrum equitum dixit: atque ei, legem curiatam de imperio ferenti, triste omen diem diffidit, quod Fautia curia fuit principium, duabus insignis cladibus, captae urbis, et Caudinae pacis: quod utroque anno eadem curia <sup>o)</sup> fuerat principium. Macer Licinius tertia etiam clade, quae ad Cremeram accepta est, abominandam eam curiam facit.

XXXIX. Dictator postero die, auspiciis repetitis, pertulit legem: et, profectus cum legionibus, ad terrorem traducti silvam Ciminiam exercitus nuper scriptis, ad Longulam pervenit; acceptisque a Marcio consule veteribus militibus, in aciem copias eduxit. nec hostes detrectare visi pugnam. instructos deinde armatosque (quum ab neutris proelium inciperet) nox obpressit. Quietis aliquamdiu, nec suis diffidentes vi-

m) simultatum Gron. Crev.

o) eiusdem curiae Eaed.

n) esset acturus Eaed.

ribus, nec hostem spernentes, stativa in propinquo habuere. Interea res in Etruria gestae. nam et cum Umbro-<sup>a. C. 308.</sup>rum exercitu acie depugnatum est; (fusi tamen magis, quam caesi, hostes, quia coeptam acriter non tolerarunt pugnam) et ad Vadimonis lacum Etrusci, lege sacrata coacto exercitu, quum vir virum legisset, quantis nunquam alias antea <sup>p)</sup> simul copiis, simul animis, dimicarunt: tantoque irarum certamine gesta res est <sup>q)</sup>, ut ab neutra parte emissa sint tela. gladiis pugna coepit, et, acerrime commissa, ipso certamine, quod aliquamdiu anceps fuit, accensa est: ut non cum Etruscis toties victis, sed cum aliqua nova gente, videretur dimicatio esse. Nihil ab ulla parte movetur fugae: cadunt antesignani: et, ne nudentur propugnatoribus signa, fit ex secunda prima acies. Ab ultimis deinde subsidiis cietur miles: adeoque ad ultimum laboris ac periculi ventum est, ut equites Romani, omissis equis, ad primos ordines peditum per arma, per corpora evaserint: ea velut nova inter fessos exorta acies turbavit signa Etruscorum. Secuta deinde inpetum eorum, utcumque adfecta erat, cetera multitudo tandem perumpit ordines hostium. Tunc vinci pertinacia coepta, et averti manipuli quidam: et, ut semel dedere terga, etiam certiozem capessere fugam. Ille primum dies fortuna veteri abundantes Etruscorum fregit opes. caesum in acie, quod roboris fuit; castra eo inpetu capta direptaque.

XL. Parisubinde periculo gloriaeque eventu bellum in Samnitibus erat; qui, praeter ceteros belli adparatus, ut acies sua fulgeret novis armorum insignibus, fecerunt. Duo exercitus erant: scuta alterius auro, alterius argento caelaverunt. Forma erat scuti: summum latius, qua pectus atque humeri teguntur, fastigio aequali; ad imum cuneatior, mobilitatis caussa. spongia pectori tegumentum: et sinistrum crus ocrea tectum. galeae cristatae, quae speciem magnitudini cor-

p) ante Gron. Crev.

q) res gesta est Eaed.

U. c. 444. porum adderent. tunicae auratis militibus versicolores,  
 a. C. 308. argentatis linteae candidae. his dextrum cornu datum:  
 illi in sinistro consistunt. Notus iam Romanis adpara-  
 tus insignium armorum fuerat; doctique a ducibus erant,  
*horridum militem esse debere; non caelatum auro et ar-  
 gento, sed ferro et animis fretum. quippe illa praedam  
 verius, quam arma, esse; nitentia ante rem, deformia  
 inter sanguinem et vulnera. Virtutem esse militis decus,  
 et omnia illa victoriam sequi; et ditem hostem quamvis  
 pauperis victoris praemium esse.* His Cursor vocibus  
 instinctos milites in proelium ducit. dextro ipse cornu  
 consistit; sinistro praefecit magistrum equitum. Si-  
 mul est concursus, ingens fuit cum hoste certamen;  
 non segnius inter dictatorem et magistrum equitum,  
 ab utraque parte victoria inciperet. Prior forte Iunius com-  
 movit hostem, laevo dextrum cornu, sacros more  
 Samnitium milites, eoque candida veste et paribus can-  
 dore armis insignes. *eos se Orco mactare* Iunius dicti-  
 tans, quum intulisset signa, turbavit ordines, et haud  
 dubie impulit aciem. Quod ubi sensit dictator, *Ab lae-  
 vone cornu victoria incipiet?* inquit, *et dextrum cornu,  
 dictatoris acies, alienam pugnam sequetur, non partem  
 maximam victoriae trahet?* Concitat milites. nec pedi-  
 tum virtuti equites, aut legatorum studia ducibus ce-  
 dunt. M. Valerius a dextro, P. Decius ab laevo cornu,  
 ambo consulares ad equites in cornibus positos eve-  
 huntur: abhortatique eos, ut partem secum capesse-  
 rent decoris, in transversa latera hostium incurrunt.  
 Is novus additus terror quum ex parte utraque circum-  
 vasisset aciem, et ad terrorem hostium legiones Ro-  
 manae, redintegrato clamore, intulissent gradum, tum  
 fuga ab Samnitibus coepta. Iam strage hominum ar-  
 morumque insignium campi repleti; ac primo pavidos  
 Samnites castra sua acceperere: deinde ne ea quidem  
 retenta. captis direptisque ante noctem iniectus ignis.  
 Dictator ex senatusconsulto triumphavit. cuius trium-  
 pho longe maximam speciem captiva arma praebuere.



tantum magnificentiae visum in iis, ut aurata scuta U. c. 444.  
 dominis argentariarum <sup>r)</sup> ad forum ornandum divide- a. C. 308.  
 rentur. inde natum initium dicitur fori ornandi ab  
 aedilibus, quum tensae ducerentur. Et Romani quidem  
 ad honorem Deum insignibus armis hostium usi sunt:  
 Campani, ab superbia et odio Samnitium, gladiato-  
 res (quod spectaculum inter epulas erat) eo ornatu ar-  
 marunt, Samnitiumque nomine compellarunt. Eodem  
 anno cum reliquis Etruscorum ad Perusiam, quae et  
 ipsa induciarum fidem ruperat, Fabius consul nec du-  
 bia nec difficili victoria dimicat. ipsum oppidum (nam  
 ad moenia victor accessit) cepisset, ni legati dedentes  
 urbem exissent. Praesidio Perusiae inposito, legatio-  
 nibus Etruriae amicitiam petentibus prae se Romam  
 ad senatum missis, consul, praestantior etiam, quam  
 dictator, victoria triumphans, urbem est invecus.  
 Quin etiam devictorum Samnitium decus magna ex  
 parte ad legatos, P. Decium et M. Valerium, est ver-  
 sum: quos populus proximis comitiis ingenti consensu  
 consulem alterum, alterum praetorem declaravit.

XLI. Fabio ob egregie perdomitam Etruriam con- U. c. 445.  
 tinuatur consulatus; Decius collega datur. Valerius a. C. 307.  
 praetor quartum creatus. Consules partiti provincias.  
 Etruria Decio, Samnium Fabio evenit. Is profectus  
 ad Nuceriam Alfaternam, tum pacem petentes, quod  
 uti ea, quum daretur, noluissem, adspersus, ob-  
 pugando ad deditionem subegit. Cum Samnitibus acie  
 dimicatum. haud magno certamine hostes victi: ne-  
 que eius pugnae memoria tradita foret, ni Marsi eo  
 primum proelio cum Romanis bellassent. Secuti Mar-  
 sorum defectionem Peligni, eandem fortunam habue-  
 runt. Decio quoque alteri consuli secunda belli fortuna  
 erat. Tarquiniensem metu subegerat frumentum exer-  
 citui praebere, atque inducias in quadraginta annos pe-  
 tere. Volsiniensium castella aliquot vi cepit: quaedam  
 ex iis diruit, ne receptaculo hostibus essent: circumfe-

r) *argentariorum* Gron.

U. c. 445. rendoque passim bello, tantum terrorem sui fecit, ut  
 a. C. 307. nomen omne Etruscum foedus ab consule peteret. Ac  
 de eo quidem nihil inpetratum. induciae annuae da-  
 tae. stipendium exercitui Romano ab hoste in eum an-  
 num pensum, et binae tunicae in militem exactae. ea  
 merces induciarum fuit. Tranquillas res iam Etruscis  
 turbavit repentina defectio Umbrorum, gentis integrae  
 a cladibus belli, nisi quod transitum exercitus ager  
 senserat. Ii, concitata omni iuventute sua, et magna  
 parte Etruscorum ad rebellionem compulsa, tantum  
 exercitum fecerant, ut, relicto post se in Etruria De-  
 cio, ad obpugnandam inde Romam ituros, magnifice  
 de se, ac contentim de Romanis loquentes, iactarent.  
 Quod inceptum eorum ubi ad Decium consulem perla-  
 tum est, ad urbem ex Etruria magnis itineribus per-  
 git, et in agro Pupiniensi ad famam intentus hostium  
 consedit. Nec Romae spernebatur Umbrorum bellum:  
 et ipsae minae metum fecerant expertis a Gallica cla-  
 de, quam intutam urbem incolerent. Itaque legati ad  
 Fabium consulem missi sunt, ut, si quid laxamenti  
 a bello Samnitium esset, in Umbriam propere exerci-  
 tum duceret. Dicto paruit consul, magnisque itineri-  
 bus ad Mevaniam, ubi tum copiae Umbrorum erant,  
 perrexit. Repens adventus consulis, quem procul Um-  
 bria in Samnio bello alio occupatum crediderant, ita  
 exterruit Umbros, ut alii recedendum ad urbes muni-  
 tas, quidam omittendum bellum censerent. Plaga una  
 (Materinam ipsi adpellant) non continuit modo ceteros  
 in armis, sed confestim ad certamen egit. castra val-  
 lantem Fabium adorti sunt. Quos ubi effusos ruere in  
 munimenta consul vidit, revocatos milites ab opere,  
 prout loci natura tempusque patiebatur, ita instruxit<sup>s</sup>):  
 cohortatusque praedicatione vera qua in Tuscis, qua  
 in Samnio partorum decorum, exiguam adpendicem  
 Etrusci belli conficere iubet: et vocis inopiae poenas  
 expetere, qua se urbem Romanam obpugnaturos mi-  
 s) instruit Grœn. Crev.

nati sunt<sup>t)</sup>. Haec tanta sunt alacritate militum audita, U. c. 445.  
 ut clamor, sua sponte ortus, loquentem interpellave-  
a. C. 307.  
 rit ducem. ante imperium deinde concentu tubarum  
 ac cornuum cursu effuso in hostem feruntur. Non tam-  
 quam in viros aut armatos incurrunt: (mirabilia dictu!)  
 signa primo eripi coepta significeris; deinde ipsi signi-  
 feri trahi ad consulem, armatique milites ex acie in  
 aciem transferri. et, sicubi est certamen, scutis ma-  
 gis, quam gladiis, geritur res. Umbonibus incussa que  
 ala sternuntur hostes. plus capitur hominum, quam  
 caeditur: atque una vox ponere arma iubentium per  
 totam fertur aciem. Itaque inter ipsum certamen facta  
 deditio est a primis auctoribus belli. postero inse-  
 quentibusque diebus et ceteri Umbrorum populi de-  
 duntur. Oriculani sponsione in amicitiam accepti.

XLII. Fabius, alienae sortis victor belli, in suam  
 provinciam exercitum reduxit. itaque ei, ob res tam  
 feliciter gestas, sicut priore anno populus continua-  
 verat consulatum, ita senatus in insequentem annum<sup>u)</sup>,  
 quo Ap. Claudius, L. Volumnius consules fuerunt, pro- U. c. 446.  
 rogavit, maxime Appio adversante, imperium. Ap- a. C. 306.  
 pium censorem petisse consulatum, comitiaque eius  
 ab L. Furio tribuno plebis interpellata, donec se cen-  
 sura abdicavit, in quibusdam annalibus invenio. Crea-  
 tus consul, quum collegae novum bellum, Sallentini  
 hostes decernerentur, Romae mansit, ut urbanis ar-  
 tibus opes augeret, quando belli decus penes alios  
 esset. Volumnium provinciae haud poenituit. multa  
 secunda proelia fecit: aliquot urbes hostium vi cepit.  
 praedae erat largitor, et benignitatem per se gratam  
 comitate adiuvabat: militemque iis artibus fecerat et  
 periculi et laboris avidum. Q. Fabius proconsul ad  
 urbem Allifas cum Samnitiū exercitu signis conla-  
 tis confligit. minime ambigua res fuit. Fusi hostes,  
 atque in castra compulsi. nec castra forent retenta,  
 ni exiguum superfuisset diei: ante noctem tamen

t) *sint Gron. Crev.*

u) *senatus insequente anno Eaed.*

U. c. 446. sunt circumsessa, et nocte custodita, ne quis elabi  
 a. C. 305. posset. Postero die, vixdum luce certa, deditio fieri  
 coepta: et pacti, qui Samnitium forent, ut cum sin-  
 gulis vestimentis emitterentur. Hi omnes sub iugum  
 missi. sociis Samnitium nihil cautum. ad septem mil-  
 lia sub corona venire. qui se civem Hernicum dixe-  
 rat, seorsum in custodia habitus. Eos omnes Fabius  
 Romam ad senatum misit: et, quum quaesitum es-  
 set: delectu, an voluntarii pro Samnitibus adversus  
 Romanos bellassent, per Latinos populos custodiendi  
 dantur. iussique eam integram rem novi consules, P.  
 U. c. 447.  
 a. C. 305. Cornelius Arvina, Q. Marcius Tremulus, (ii enim  
 iam creati erant) ad senatum referre. id aegre passi  
 Hernici, concilium populorum omnium habentibus  
 Anagninis in circo, quem Maritimum vocant, prae-  
 ter Alatrinatem, Ferentinatemque, et Verulanum,  
 omnes Hernici nominis populo Romano bellum indi-  
 xerunt.

XLIII. In Samnio quoque, quia decesserat inde  
 Fabius, novi motus exorti. Calatia et Sora, praesi-  
 diaque, quae in iis Romana erant, expugnata: et in  
 captivorum corpora militum foede saevitum. itaque  
 eo P. Cornelius cum exercitu missus. Marcio novi  
 hostes (iam enim Anagninis Hernicisque aliis bellum  
 iussum erat) decernuntur. Primo ita omnia oppor-  
 tuna loca hostes inter consulum castra interceperunt,  
 ut pervadere expeditus nuncius non posset, et per  
 aliquot dies incerti rerum omnium, suspensique de  
 statu alterius, uterque consul ageret, Romamque is  
 metus manaret; adeo ut omnes iuniores sacramento  
 adigerentur, atque ad subita rerum duo iusti scribe-  
 rentur exercitus. Ceterum Hernicum bellum nequa-  
 quam pro praesenti terrore ac vetustate gentis glo-  
 riae fuit. nihil usquam dictu dignum ausi, trinis ca-  
 stris intra paucos dies exuti, triginta dierum inducias,  
 ita ut ad senatum Romam legatos mitterent, pacti  
 sunt bimestri stipendio frumentoque, et singulis in



militem tunicis. Ab senatu ad Marcium reiecti, cui U. c. 417.  
 senatusconsulto permissum de Hernicis erat: isque a. C. 305.  
 eam gentem in deditionem accepit. Et in Samnio  
 alter consul superior viribus, locis inpeditor erat.  
 Omnia itinera obseperant hostes. saltusque pervios  
 ceperant, ne qua subvehi commeatus possent: neque  
 eos, quum quotidie signa in aciem consul proferret,  
 elicere ad certamen poterat: satisque adparebat, ne-  
 que Samnitum certamen praesens, nec Romanum di-  
 lationem belli laturum. Adventus Marcii, qui, Her-  
 nicis subactis, maturavit collegae venire auxilio, mo-  
 ram certaminis hosti exemit. nam, ut qui ne alteri  
 quidem exercitui se ad certamen credidissent pares,  
 coniungi utique passi duos <sup>x)</sup> consulares exercitus ni-  
 hil crederent superesse spei, advenientem in composito  
 agmine Marcium adgrediuntur. Raptim conlatae sar-  
 cinae in medium; et, prout tempus patiebatur, in-  
 structa acies. Clamor primum in stativa perlatus,  
 dein conspectus procul pulvis, tumultum apud alte-  
 rum consulem in castris fecit. isque, confestim arma  
 capere iussis, raptimque eductis in aciem militibus,  
 transversam hostium aciem, atque alio certamine oc-  
 cupatam, invadit; clamitans, *summum flagitium fore,*  
*si alterum exercitum utriusque victoriae compotem si-*  
*nerent fieri, nec ad se sui belli vindicarent decus.* Qua  
 in petum dederat, perrumpit; aciemque per mediam  
 in castra hostium tendit, et vacua defensoribus capit  
 atque incendit. Quae ubi flagrantia Marcianus miles  
 conspexit, et hostes respexere, tum passim fuga coe-  
 pta Samnitium fieri. sed omnia obtinet caedes, nec  
 in ullam partem tutum perfugium est. Iam, triginta  
 millibus hostium caesis, signum receptui consules  
 dederant, conligebantque in unum copias, in vicem  
 inter se gratantes: quum repente visae procul ho-  
 stium novae cohortes, quae in supplementum scri-  
 ptae fuerant, integravere caedem. in quas, nec iussu

x) duo Gron. Crev.

U. c. 447. consulum, nec signo accepto, victores vadunt; *malo*  
 a. C. 305. *tirocinio inbuendum Samnitum*, clamitantes. Indulgent consules legionum ardori, ut qui probe scirent, novum militem hostium inter percussos fuga veteranos ne tentando quidem satis certamini fore. Nec eos opinio fefellit. omnes Samnitium copiae, veteres novaeque, montes proximos fuga capiunt. eo et Romana erigitur acies; nec quidquam satis tuti loci victis est. et de iugis, quae ceperant, funduntur; iamque una voce omnes pacem petebant. Tum, trium mensium frumento imperato, et annuo stipendio, ac singulis in militem tunicis, ad senatum pacis oratores missi. Cornelius in Samnio relictus. Marcius de Hernicis triumphans in urbem rediit; statuaque equestris in foro decreta est, quae ante templum Castoris posita est. Hernicorum tribus populis, Alatrinati, Verulano, Ferentinati, quia maluerunt, quam civitatem, suae leges redditae: connubiumque inter ipsos, quod aliquamdiu soli Hernicorum <sup>y)</sup> habuerunt, permissum. Anagninis, quique arma Romanis intulerant, civitas sine suffragii latione data: concilia connubiaque ademta: et magistratibus, praeterquam sacrorum curatione, interdictum. Eodem anno aedes Salutis a C. Iunio Bubulco censore locata est, quam consul bello Samnitium voverat. ab eodem collegaque eius M. Valerio Maximo viae per agros publica impensa factae. Et cum Karthaginiensibus eodem anno foedus tertio renovatum: legatisque eorum, qui ad id venerant, comiter munera missa.

XLIV. Dictatorem idem annus habuit P. Corneliū Scipionem, cum magistro equitum P. Decio Mure. ab iis, propter quae creati erant, comitia consularia habita, quia neuter consulum potuerat bello abesse. Creati consules L. Postumius, Ti. Minucius.

U. c. 448. Hos consules Piso Q. Fabio et P. Decio subgerit, bien-  
 a. C. 304. nio exemto, quo Claudium Volumnumque, et Cor-  
 y) *Hernicorum soli Gron. Crev.*

nelium cum Marcio consules factos tradidimus. me- U. c. 443.  
 moriane fugerit in annalibus digerendis, an consulto a. C. 304.  
 binos consules, falsos ratus, transcenderit, incertum  
 est. Eodem anno in campum Stellatam agri Campani  
 Samnitium incursiones factae. Itaque ambo consules,  
 in Samnium missi, quum diversas regiones, Tifer-  
 num Postumius, Bovianum Minucius, petissent; Po-  
 stumii prius ductu ad Tifernum pugnatum. Alii haud  
 dubie Samnites victos, ac viginti millia <sup>2)</sup> hominum  
 capta tradunt: alii Marte aequo discessum, et Postu-  
 mium, metum simulantem nocturno itinere, clam in  
 montes copias abduxisse: hostes secutos duo millia  
 inde locis munitis et ipsos consedissee. Consul, ut  
 stativa tuta copiosaque (et ita erant) petisse videretur,  
 postquam et munimentis castra firmavit, et omni  
 adparatu rerum utilium instruxit; relicto firmo prae-  
 sidio, de vigilia tertia, qua duci proxime potest, ex-  
 peditas legiones ad collegam, et ipsum adversus alios  
 sedentem, ducit. ibi, auctore Postumio, Minucius  
 cum hostibus signa confert; et, quum anceps proe-  
 lium in multum diei processisset, tum Postumius in-  
 tegris legionibus defessam iam aciem hostium impro-  
 viso invadit. Itaque, quum lassitudo ac vulnera fu-  
 gam quoque praepedissent, occidione occisi hostes,  
 signa unum et viginti capta: atque inde ad castra Po-  
 stumii perrectum. Ibi duo victores exercitus percul-  
 sum iam fama hostem adorti fundunt fugantque: si-  
 gna militaria sex et viginti capta, et imperator Sam-  
 nitium Staius Gellius, multique alii mortales, et  
 castra utraque capta: et Bovianum, ubi postero die  
 coeptum obpugnari, brevi capitur. magnaue gloria  
 rerum gestarum consules triumpharunt. Minucium  
 consulem, cum vulnere gravi relatum in castra, mor-  
 tuum, quidam auctores sunt, et M. Fulvium in lo-  
 cum eius consulem subfectum: et ab eo, quum ad  
 exercitum Minucii missus esset, Bovianum captum.

2) add. inde Gron.

U. c. 448. Eodem anno Sora, Arpinum, Censennia, recepta ab  
v. C. 304. Samnitibus. Herculis magnum simulacrum in Capi-  
tolio positum dedicatumque.

U. c. 449. XLV. P. Sulpicio Saverione, P. Sempronio So-  
a. C. 303. pho consulibus, Samnites, seu finem, seu dilatio-  
nem belli quaerentes, legatos de pace Romam misere.  
quibus suppliciter agentibus responsum est, *nisi saepe  
bellum parantes pacem petissent Samnites, oratione ul-  
tro citroque habita, de pace transigi potuisse. nunc,  
quando verba vana ad id locorum fuerint, rebus stan-  
dum esse. P. Sempronium consulem cum exercitu brevi  
in Samnio fore: eum, ad bellum pacemne inclinent ani-  
mi, falli non posse: comperta omnia senatui relatu-  
rum: decedentem ex Samnio consulem legati sequerentur.* Eo anno quum pacatum Samnium exerci-  
tus Romanus, benigne praebito commeatu, peragras-  
set, foedus antiquum Samnitibus redditum. Ad Ae-  
quos inde veteres hostes, ceterum per multos annos  
sub specie infidae pacis quietos, versa arma Romana:  
quod, incolumi Hernico nomine, missitaverant simul  
cum iis Samniti auxilia; et, post Hernicos subactos,  
universa prope gens, sine dissimulatione consilii pu-  
blici, ad hostes desciverat: et postquam, icto Ro-  
mae cum Samnitibus foedere, feciales venerant res  
repetitum, *tentationem aiebant esse, ut, terrore in-  
cusso belli, Romanos se fieri paterentur: quot quanto-  
pere optandum foret, Hernicos docuisse: quum, qui-  
bus licuerit, suas leges Romanae civitati praeoptave-  
rint: quibus legendi, quid mallent, copia non fuerit,  
pro poena necessariam civitatem fore.* Ob haec vulgo  
in conciliis iactata, populus Romanus bellum fieri  
Aequis iussit: consulesque ambo, ad novum profecti  
bellum, quatuor millia <sup>a)</sup> a castris hostium consede-  
runt. Aequorum exercitus, (ut qui suo nomine per-  
multos annos inbelles egissent) tumultuario similis,  
sine ducibus certis, sine imperio, trepidare. alii ex-

a) millibus Gron. Crev. c, Drak.



eundem in aciem, alii castra tuenda censent: mo-  
 vet plerosque vastatio futura agrorum, ac deinceps  
 cum levibus praesidiis urbium relictarum excidia. Ita-  
 que, postquam inter multas sententias una, quae,  
 omissa cura communium, ad respectum suarum quem-  
 que rerum vertisset, audita; ut prima vigilia diversi  
 e castris ad deportanda omnia tuendaque moenibus  
 in urbes abirent; cuncti eam sententiam ingenti ad-  
 sensu acceperunt. Palatis hostibus per agros, prima  
 luce Romani, signis prolatis, in acie consistunt; et,  
 ubi nemo obvius ibat, pleno gradu ad castra hostium  
 tendunt. Ceterum, postquam ibi neque stationes pro-  
 portis, nec quemquam in vallo, nec fremitum con-  
 suetum castrorum animadverterunt; insolito silentio  
 moti, metu insidiarum subsistunt. transgressi deinde  
 vallum, quum deserta omnia invenissent, pergunt  
 hostem vestigiis sequi: sed vestigia, in omnes aequae  
 ferentia partes, ut in dilapsis passim, primo errorem  
 faciebant; post, per exploratores compertis hostium  
 consiliis, ad singulas urbes circumferendo bello, unum  
 et quadraginta oppida intra dies quinquaginta omnia  
 obpugnando ceperunt; quorum pleraque diruta atque  
 incensa, nomenque Aequorum prope ad internecio-  
 nem deletum. De Aequis triumphatum: exemplo-  
 que eorum clades fuit, ut Marrucini, Marsi, Peligni,  
 Frentani mitterent Romam oratores pacis petendae  
 amicitiaeque. iis populis foedus petentibus datum.

XLVI. Eodem anno Cn. <sup>b)</sup> Flavius Cn. filius scriba,  
 patre libertino, humili fortuna ortus, ceterum calli-  
 dus vir et facundus, aedilis curulis fuit. Invenio in  
 quibusdam annalibus, quum adpareret aedilibus, fie-  
 ri se pro tribu aedilem videret, neque accipi no-  
 men, quia scriptum faceret; tabulam posuisse, et iu-  
 rasse, se scriptum non facturum. quem aliquanto an-  
 te desisse <sup>c)</sup> scriptum facere, arguit Macer Licinius,  
 tribunatu ante gesto triumviratibusque, nocturno al-

c) C. Gron. Crev.

d) antea desuisse Eaed.

U. c. 449. tero, altero coloniae deducendae. Ceterum (id quod  
 a. C. 303. haud discrepat) contumacia adversus contemnentes  
 humilitatem suam nobiles certavit: civile ius, repos-  
 situm in penetralibus pontificum, evulgavit, fastos-  
 que circa forum in albo proposuit, ut, quando lege  
 agi posset, sciretur: aedem Concordiae in area Vul-  
 cani summa invidia nobilium dedicavit; coactusque  
 consensu populi Cornelius Barbus pontifex maxi-  
 mus verba praeire, quum more maiorum negaret,  
 nisi consulem aut imperatorem, posse templum dedi-  
 care. Itaque ex auctoritate senatus latum ad popu-  
 lum est, ne quis templum aramve iniussu senatus aut  
 tribunorum plebei partis maioris dedicaret. Haud  
 memorabilem rem per se, nisi documentum sit ad-  
 versus superbiam nobilium plebeiae libertatis, refe-  
 ram. Ad collegam aegrum visendi caussa Flavius  
 quum venisset, consensuque nobilium adolescentium,  
 qui ibi adsidebant, adurrectum ei non esset, curu-  
 lem adferri sellam eo iussit, ac sede honoris sui an-  
 xios invidia inimicos spectavit. Ceterum Flavium di-  
 xerat aedilem forensis factio, Ap. Claudii censura  
 vires nacta, qui senatum primus libertinorum filiis  
 lectis inquinaverat. et postquam eam lectionem nemo  
 ratam habuit, nec in curia adeptus erat, quas petie-  
 rat, opes urbanas; humilibus per omnes tribus divi-  
 sis, forum et campum corrupit. tantumque Flavii  
 comitia indignitatis habuerunt, ut plerique nobilium  
 annulos aureos et phaleras deponerent. Ex eo tem-  
 pore in duas partes discessit civitas. aliud integer  
 populus, fautor et cultor bonorum, aliud forensis fa-  
 ctio tenebat; donec Q. Fabius et P. Decius censores  
 facti: et Fabius, simul concordiae caussa, simul ne  
 humillimorum in manu comitia essent, omnem fo-  
 rensem turbam excretam in quatuor tribus coniecit,  
 urbanasque eas adpellavit. adeoque eam rem acce-  
 ptam gratis animis ferunt, ut Maximi cognomen,  
 quod tot victoriis non pepererat, hac ordinum tem-

peratione pareret. Ab eodem institutum dicitur, ut equites Idibus Quinctilibus transveherentur.

## EPITOME LIBRI X.

Coloniae deductae sunt Sora, et Alba, et Carseoli. Marsi 1) in deditionem accepti sunt 2). Collegium augurum ampliatum est, ut essent novem, quum antea quaterni fuissent. Lex de provocatione ad populum a Valerio consule tunc tertium lata est. Duae tribus adiectae sunt, Aniensis et Terentina. Samnitibus bellum indictum, et adversus eos saepe prospere pugnatum est 3). Quum adversus Etruscos, Umbros, Samnites, Gallos, P. Decio et Q. Fabio ducibus, pugnaretur, Romanusque exercitus in maximo esset discrimine, P. Decius, secutus exemplum patris, devovit se pro exercitu, et morte sua victoriam eius pugnae populo Romano dedit. Papirius Cursor Samnitium exercitum, qui iureiurando obstrictus, quo maiore constantia virtutis pugnaret, in aciem descenderat, fudit. Census actus est. lustrum conditum. censa sunt civium capita ducenta sexaginta duo milia, et trecenta viginti duo.

- 1) *ac Alba. Carseoli Marsi* 2) *sunt del. Gron. Crev.*  
*Gron. ac Alba, Carseoli.* 3) *est del. Eaed.*  
*Marsi Crev.*

## T. LIVII PATAVINI

## LIBER X.

U. c. 450. **L.** Genucio, Ser. Cornelio consulibus, ab externis  
 a. C. 302. ferme bellis otium fuit. Soram atque Albam coloniae deductae. Albam in Aequos sex millia colonorum scripta. Sora agri Volsci fuerat; sed possederant Samnites. eo quatuor millia hominum missa. Eodem anno Arpinatibus Trebulanisque civitas data. Frusinates tertia parte agri damnati, quod Hernicos ab eis sollicitatos compertum: capitaque coniurationis eius, quaestione ab consulibus ex senatusconsulto habita, virgis caesi ac securi percussi. Tamen, ne prorsus inbellem agerent annum, parva expeditio in Umbria facta est; quod nunciabatur, ex spelunca quadam excursionses armatorum in agros fieri. In eam speluncam penetratum cum signis est: et ex eo loco obscuro multa vulnera accepta, maximeque lapidum ictu; donec, altero specus eius ore (nam pervius erat) invento, utraque fauces congestis lignis accensae: ita intus fume ac vapore ad duo millia armatorum, ruentia novissime in ipsas flammās, dum  
 U. c. 451. evadere tendunt, absunta. Marcio Livio Dentre et  
 a. C. 301. Aemilio consulibus, redintegratum Aequicum bellum. Coloniam, aegre patientes velut arcem suis finibus inpositam, summa vi expugnare adorti, ab ipsis colonis pelluntur. Ceterum tantum Romae terrorem fecere, quia vix credibile erat, tam adfectis rebus solos per se Aequos ad bellum coortos, ut tumultus eius caussa dictator diceretur C. Iunius Bulbus. is, cum M. Titinio magistro equitum profe-



ctus, primo congressu Aequos subegit, ac, die octavo triumphans in urbem quum redisset, aedem Salutis, quam consul voverat, censor locaverat, dictator dedicavit.

U. c. 451.  
a. C. 301.

II. Eodem anno classis Graecorum, Cleonymo duce Lacedaemonio, ad Italiae litora adpulsa, Thurias urbem in Sallentinis cepit. Adversos hunc hostem consul Aemilius missus proelio uno fugatum compulit in naves. Thuriae redditae veteri cultori: Sallentinoque agro pax parta. Iunium Bubulcum dictatorem missum in Sallentinos, in quibusdam annalibus invenio: et Cleonymum prius, quam confligendum esset cum Romanis, Italia excessisse. circumvectus inde Brundisii promontorium, medioque sinu Hadriatico ventis latus, quum laeva inportuosa Italiae litora, dextra Illyrii Liburnique et Istri, gentes ferae, et magna ex parte latrociniis maritimis infames, terrerent, penitus ad litora Venetorum pervenit: ibi expositis paucis, qui loca explorarent, quum audisset, tenue praetentum litus esse; quod transgressis stagna ab tergo sint, inrigua aestibus maritimis; agros haud procul proximos campestres cerni; ulteriora colles; inde esse ostium fluminis praealti, quo circumagi naves in stationem tutam vidisse: (Meduacus annis erat) eo invectam classem subire flumine adverso iussit. Gravissimas navium non pertulit alveus fluminis. in leviora navigia transgressa multitudo armatorum ad frequentes agros, tribus maritimis Patavinorum vicis colentibus eam oram, pervenit. Ibi egressi, levi praesidio navibus relicto, vicos expugnant, inflammant tecta, hominum pecudumque praedas agunt, et dulcedine praedandi longius usque a navibus procedunt. Haec ubi Patavium sunt nunciata, (semper autem eos in armis adcolae Galli habebant) in duas partes iuventutem dividunt. altera in regionem, qua effusa populatio nunciabatur; altera, ne cui praedonum obvia fieret, altero itinere

U. c. 451. ad stationem navium (millia autem quatuordecim <sup>a)</sup>  
 a. C. 501. ab oppido aberat) ducta. In naves parvas, custodi-  
 bus interemtis, inpetus factus; territique nautae co-  
 guntur naves in alteram ripam amnis transicere. et  
 in terra prosperum aequè in palatos praedatores proe-  
 lium fuerat: refugientibusque ad stationem Graecis  
 Veneti obsistunt. Ita in medio circumventi hostes  
 caesique; pars capti classem indicant regemque Cleo-  
 nymum tria millia abesse. Inde, captivis proximo  
 vico in custodiam datis, pars fluviatiles naves, ad  
 superanda vada stagnorum apte planis alveis fabrica-  
 tas, pars captiva navigia armatis complent. profecti-  
 que ad classem, immobiles naves, et loca ignota plus,  
 quam hostem, timentes, circumvadunt: fugientes-  
 que in altum acrius, quam repugnantes, usque ad  
 ostium amnis persecuti, captis quibusdam incensisque  
 navibus hostium, quas trepidatio in vada intulerat,  
 victores revertuntur. Cleonymus, vix quinta parte  
 navium incolumi, nulla regione maris Hadriatici pro-  
 sperè adita, discessit. Rostra navium spoliaque La-  
 conum, in aede Iunonis veteri fixa, multi supersunt,  
 qui viderunt. Patavii monumentum navalis pugnae  
 eo die, quo pugnatum est, quotannis sollemni certa-  
 mine navium in flumine oppidi medio exercetur.

III. Eodem anno Romae cum Vestinis, petenti-  
 bus amicitiam, ictum est foedus. Multiplex deinde  
 exortus terror. Etruriam rebellare, ab Arretinorum  
 seditionibus motu orto, nunciabatur: ubi Cilnium ge-  
 nus praepotens, divitiarum invidia pelli armis coe-  
 ptum: simul Marsos agrum vi tueri, in quem colonia  
 Carseoli deducta erat, quatuor millibus hominum  
 scriptis. Itaque propter eos tumultus dictus M. Va-  
 lerius Maximus dictator, magistrum equitum sibi le-  
 git M. Aemilium Paullum. id magis credo, quam Q.  
 Fabium ea aetate atque eis honoribus Valerio subie-  
 ctum. ceterum ex Maximi cognomine ortum errorem

a) *quindecim* Gron. Crev.

haud abnuerim. Profectus dictator cum exercitu<sup>U. c. 451.</sup> proelio uno Marsos fundit. compulsis deinde in urbes<sup>A. C. 501.</sup> munitas, Miloniam, Plestinam, Fresiliam, intra dies paucos cepit: et parte agri multatis Marsis foedus restituit. Tum in Etruscos versum bellum. et, quum dictator auspicio<sup>rum</sup> repetendorum causa profectus Romam esset, magister equitum, pabulatum egressus, ex insidiis circumvenitur; signisque aliquot amissis, foeda militum caede ac fuga in castra est compulsus. qui terror non eo tantum a Fabio abhorret, quod si qua alia arte cognomen suum aequavit, tum maxime bellicis laudibus: sed etiam, quod, memor Papirianae saevitiae, nunquam, ut dictatoris iniussu dimicaret, adduci potuisset.

IV. Nunciata ea clades Romam maiorem, quam res erat, terrorem excivit. nam, ut exercitu deleta, ita iustitium indictum; custodiae in portis, vigiliae vicatim exactae; arma, tela in muros congesta. Omnibus iunioribus sacramento adactis, dictator, ad exercitum missas, omnia spe tranquilliora et composita magistri equitum cura, castra in tutiorem locum redacta, cohortes, quae signa amiserant, extra vallum sine tentoriis destitutas invenit; exercitum avidum pugnae, quo maturius ignominia aboleretur. Itaque confestim castra inde in agrum Rusellanum promovit. Eo et hostes secuti. et quamquam ex bene gesta re summam et in aperto certamine virium spem habebant; tamen insidiis quoque, quas feliciter experti erant, hostem tentant. Tecta semiruta vici, per vastationem agrorum deusti, haud procul castris Romanorum aberant. Ibi abditis armatis, pecus in conspectu praesidii Romani, cui praeerat Cn. Fulvius legatus, propulsum. ad quam inlecebram quum moveretur nemo ab Romana statione, pastorum unus, progressus sub ipsas munitiones, inclamat alios, cunctanter ab ruinis vici pecus propellentes, *quid cessarent, quum per media castra Romana tuto agere pos-*

U. c. 451.<sup>sent?</sup> Haec quum legato Caerites quidam interpreta-  
 a. C. 301.<sup>rentur</sup>, et per omnes manipulos militum indignatio  
 ingens esset<sup>b)</sup>, nec tamen iniussu movere auderent<sup>c)</sup>;  
 iubet peritos linguae adtendere animum, pastorum  
 sermo agresti, an urbano, propior esset. Quum re-  
 ferrent, sonum linguae, et corporum habitum, et ni-  
 torem, cultiora, quam pastoralia, esse; *ite igitur,*  
*dicite*, inquit, *detegant nequidquam conditas insidias:*  
*omnia scire Romanum: nec magis iam dolo capi, quam*  
*armis vinci, posse.* Haec ubi audita sunt, et ad eos,  
 qui consederant in insidiis, perlata, consurrectum  
 repente ex latebris est, et in patentem ad conspectum  
 undique campum prolata signa. Visa legato maior  
 acies, quam quae ab suo praesidio sustineri posset.  
 Itaque propere ad dictatorem auxilia adcitum mittit;  
 interea ipse inpetus hostium sustinet.

V. Nuncio adlato, dictator signa ferri, ac sequi  
 armatos iubet. sed celeriora prope omnia imperio  
 erant. Rapta extemplo signa armaque; et vix ab  
 inpetu et cursu tenebantur. quum ira ab accepta nu-  
 per clade stimulabat, tum concitior accidens clamor  
 ab increcente certamine. Urgent itaque alii alios,  
 hortanturque signiferos, ut ocius eant. quo magis  
 festinantes videt dictator, eo inpensius retentat  
 agmen, ac sensim incedere iubet. Etrusci contra,  
 principio exciti pugnae, omnibus copiis aderant. Et  
 super alios alii nunciant dictatori, omnes legiones  
 Etruscorum capessisse pugnam: nec iam ab suis re-  
 sisti posse: et ipse cernit ex superiore loco, in quan-  
 to discrimine praesidium esset. Ceterum, satis fre-  
 tus esse etiam nunc tolerando certamini legatum, nec  
 se procul abesse periculi vindicem, quam maxime  
 vult fatigari hostem, ut integris adoriatur viribus fes-  
 sos. Quamquam lente procedunt, iam tamen ad in-  
 petum capiendum, equiti utique, modicum erat spa-

b) *ingens esset indignatio* c) *se auderent* Gron.  
 Gron. Grev.



tium: prima incedebant signa legionum, ne quid oc- U. c. 451.  
cultum aut repentinum hostis timeret: sed reliquerat<sup>a</sup>. C. 301,  
intervalla inter ordines peditum, qua satis laxo spa-  
tio equi permitti possent. Pariter sustulit clamorem  
acies; et emissus eques libero cursu in hostem inve-  
hitur, incompressisque adversus equestrem procel-  
lam subitum pavorem obfundit. Itaque, ut prope se-  
rum auxilium iam pene circumventis, ita universa  
requies data est. integri acceperere pugnam; nec ea  
ipsa longa, aut anceps fuit. Fusi hostes castra re-  
petunt, inferentibusque iam signa Romanis cedunt,  
et in ultimam castrorum partem conglobantur. Hae-  
rent fugientes in angustiis portarum: pars magna ag-  
gerem vallumque conscendunt, si aut ex superiore  
loco tueri se, aut superare aliqua et evadere possent.  
Forte quodam loco male densatus agger pondere su-  
perstantium<sup>d</sup>) in fossam procubuit: atque ea quum  
Deos pandere viam fugae conclamassent, plures in-  
ermes, quam armati, evadunt. Hoc proelio fractae  
iterum Etruscorum vires: et, pacto annuo stipendio,  
et duum mensium frumento, permissum ab dictatore,  
ut de pace legatos mitterent Romam. Pax negata,  
induciae biennii datae. dictator triumphans in urbem  
rediit. Habeo auctores; sine ullo memorabili proe-  
lio pacatam ab dictatore Etruriam esse, seditionibus  
tantum Arretinorum compositis, et Cilnio genere cum  
plebe in gratiam reducto. Consul ex dictatura factus  
M. Valerius. non petentem, atque adeo etiam absen-  
tem, creatum credidere quidam: et per interregem  
ea comitia facta. id unum non ambigitur, consula-  
tum cum Appuleio Pansa gessisse.

VI. M. Valerio et Q. Appuleio consulibus, satis U. c. 452.  
pacatae foris res fuere. Etruscum adversa<sup>e</sup>) belli res<sup>a</sup>. C. 300.  
et induciae quietum tenebant: Samnitum, multorum  
annorum cladibus domitum, haud dum foederis novi  
poenitebat. Romae quoque plebem quietam et ex-

d) *superstantium* Gron.

e) *adversae* Gron. Crev.

U. c. 452.  
a. C. 300.  
oneratam deducta in colonias multitudo praestabat. tamen, ne undique tranquillae res essent, certamen iniectum inter primores civitatis, patricos plebeiosque, ab tribunis plebis Q. et Cn. Ogulniis. qui, undique criminandorum Patrum apud plebem occasionibus quaesitis, postquam alia frustra tentata erant, eam actionem susceperunt, qua non infimam plebem accenderent, sed ipsa capita plebis, consulares triumphalesque plebeios: quorum honoribus nihil, praeter sacerdotia, quae nondum promiscua erant, deesset. Rogationem ergo promulgarunt, ut, quum quatuor augures, quatuor pontifices ea tempestate essent, placeretque augeri sacerdotum numerum, quatuor pontifices, quinque augures, de plebe omnes, adlegerentur. Quemadmodum ad quatuor augurum numerum, nisi morte duorum, id redigi collegium potuerit, non invenio; quum inter augures constet, inparem numerum debere esse, ut tres antiquae tribus, Ramnes, Titienses, Luceres, suum quaeque augurem habeant; aut, si pluribus sit opus, pari inter se numero sacerdotes multiplicent: sicut multiplicati sunt, quum ad quatuor quinque adiecti novem numerum, ut terni in singulas essent, expleverunt. Ceterum, quia de plebe adlegebantur, iuxta eam rem aegre passi Patres, quam quum consulatum vulgari viderent. Simulabant ad Deos id magis, quam ad se, pertinere: ipsos visuros, ne sacra sua polluantur. id se optare tantum, ne qua in rempublicam clades veniat. Minus autem tetendere, adsueti iam tali genere certaminum vinci. et cernebant, adversarios non id, quod olim vix speraverint, adfectantes magnos honores, sed omnia iam, in quorum spem dubiam erat certatum, tamen adeptos, multiplices consulatus, censurasque et triumphos.

VII. Certatum tamen suadenda dissuadendaque lege inter Ap. Claudium maxime ferunt, et inter P. Decium Murem. qui quum eadem ferme de iure Pa-

trum ac plebis, quae pro lege Licinia quondam con-U. c. 452.  
traque eam dicta erant, quum plebeiis consulatus ro-a. C. 300.  
gabatur, disseruissent; retulisse dicitur Decius pa-  
rentis sui speciem, qualem eum multi, qui in con-  
cione erant, viderant, incinctum Gabino cultu, su-  
per telum stantem, quo se habitu pro populo ac le-  
gionibus Romanis <sup>f)</sup> devovisset. tum *P. Decium con-  
sulem purum piumque Deis immortalibus visum*, aequè  
ac si *T. Manlius collega eius devoveretur. eumdem P.  
Decium, qui sacra publica populi Romani faceret, legi  
rite non potuisse? id esse periculum, ne suas preces mi-  
nus audirent Dii, quam Ap. Claudii? castius eum sa-  
cra privata facere, et religiosius Deos colere, quam se?  
quem poenitere votorum, quae pro republica nuncupa-  
verint tot consules plebei, tot dictatores, aut ad exer-  
citus euntes, aut inter ipsa bella? Numerarentur duces  
eorum annorum, quibus plebeiorum ductu et auspicio  
res geri coeptae sunt: numerarentur triumphi. iam ne  
nobilitatis quidem suae plebeios poenitere. pro certo ha-  
bere, si quod repens bellum oriatur, non plus spei fore  
senatui populoque Romano in patriciis, quam in plebe-  
iis ducibus. Quod quum ita se habeat, cui Deorum ho-  
minumve indignum videri potest, inquit, eos viros, quos  
vos sellis curulibus, toga praetexta, tunica palmata,  
et toga picta, et corona triumphali laureaue honora-  
ritis, quorum domus spoliis hostium adfixis insignes  
inter alias feceritis, pontificalia atque auguralia in-  
signia adiicere? qui, levis optimi maximi ornatus deco-  
ratus, curru aurato per urbem vectus in Capitolium  
adscenderit, si conspiciatur cum capide ac lituo, ca-  
pite velato victimam caedat, auguriumve ex arte ca-  
piat? Cuius imaginis titulo consulatus, censuraque, et  
triumphus, aequo animo legetur; si auguratum aut  
pontificatum adieceritis, non sustinebunt legentium  
oculi? Equidem (pace dixerim Deum) eos nos iam po-  
puli Romani beneficio esse spero, qui sacerdotiis non*

f) Romanis del. Gron. Grev.

U. c. 452. minus reddamus dignatione nostra honoris, quam accepimus; et Deorum magis, quam nostra causa expetamus, ut, quos privatim colimus, publice colamus.

VIII. Quid autem ego sic adhuc egi, tamquam integra sit causa patriciorum de sacerdotiis, et non iam in possessione unius amplissimi simul sacerdotii? Decemviros sacris faciundis, carminum Sibyllae ac fatorum populi huius interpretes, antistites eosdem Apollinaris sacri caeremoniarumque aliarum, plebeios videmus. Nec tum patriciis ulla iniuria facta est, quum duumviris sacris faciundis adiectus est propter plebeios numerus: et nunc tribunus, vir fortis ac strenuus, quinque augurum loca, quatuor pontificum adiecit, in quae plebei nominentur; non ut vos, Appi, vestro loco pellant, sed ut adiuvent vos homines plebei divinis quoque rebus procurandis, sicut in ceteris humanis pro parte virili adiuvant. Noli erubescere, Appi, collegam in sacerdotio habere, quem in censura, quem in consulatu collegam habere potuisti; cuius tam dictatoris magister equitum, quam magistri equitum dictator esse potes. Sabinum advenam, principem nobilitatis vestrae, seu Attum Clausum, seu Ap. Claudium mavultis, illi antiqui patricii in suum numerum acceperunt. Ne fastidieris nos in sacerdotum numerum accipere, multa nobiscum decora adferimus: immo omnia eadem, quae vos superbos fecerunt. L. Sextius primus de plebe consul est factus. C. Licinius Stolo primus magister equitum, C. Marcius Rutilus primus et dictator et censor, Q. Publilius Philo primus praetor. Semper ista audita sunt eadem, penes vos auspicia esse, vos solos gentem habere, vos solos iustum imperium et auspiciū domi militiaeque. Aequè adhuc prosperum plebeium ac patricium fuit, porroque erit. En umquam fando audistis, patricios primo esse factos, non de coelo demissos, sed qui patrem ciere possent, id est, nihil ultra quam ingenuos? Consulem iam patrem ciere possum; avumque iam poterit filius meus. Nihil est aliud in re, Quirites, nisi ut



*omnia negata adipiscamur. certamen tantum patricii* U. c. 452.  
*petunt, nec curant, quem eventum certaminum habeant.* a. C. 300.  
*Ego hanc legem, quod bonum, fastum, felixque sit vo-*  
*bis ac reipublicae, uti rogas, iubendam censeo.*

IX. Vocare tribus extemplo populus iubebat, ad-  
parebatque accipi legem: ille tamen dies est interces-  
sione sublatus. postero die, deterritis tribunis, in-  
genti consensu accepta est. Pontifices creantur suasor  
legis P. Decius Mus, P. Sempronius Sophus, C. Mar-  
cius Rutilus, M. Livius Denter. Quinque augures  
tem de plebe, C. Genucius, P. Aelius Paetus, M.  
Minucius Fessus, C. Marcius, T. Publilius. Ita octo  
pontificum, novem augurum numerus factus. Eodem  
anno M. Valerius consul de provocatione legem tulit,  
iligentius sanctam. tertio ea tum post reges exactos  
ata est, semper a familia eadem. Caussam renovan-  
lae saepius haud aliam fuisse reor, quam quod plus  
paucorum opes, quam libertas plebis, poterant. Por-  
tia tamen lex sola pro tergo civium lata videtur: quod  
travi poena, si quis verberasset necassetve civem Ro-  
manum, sanxit. Valeria lex, quum eum, qui provo-  
casset, virgis caedi, securique necari vetuisset, si quis  
adversus ea fecisset, nihil ultra, quam inprobe fa-  
ctum, adiecit. Id (qui tum pudor hominum erat) vi-  
um, credo, vinculum satis validum legis. nunc vix  
erio ita minetur quisquam. Bellum ab eodem con-  
sule haudquaquam memorabile adversus rebellantes  
Aequos, quum praeter animos feroces nihil ex anti-  
qua fortuna haberent, gestum est. Alter consul Ap-  
puleius in Umbria Nequinum oppidum circumse-  
dit. locus erat arduus, atque in parte una praeceps, ubi  
nunc Narnia sita est. nec vi, nec munimento capi po-  
erat. Itaque eam infectam rem M. Fulvius Paetinus, U. c. 455.  
T. Manlius Torquatus, novi consules, acceperunt. In a. C. 299.  
eum annum quum Q. Fabium consulem non peten-  
tem omnes dicerent centuriae, ipsum auctorem fuisse  
Macer Licinius ac Tubero tradunt differendi sibi con-

U. c. 453. sulatus in bellicosiorem annum: eo anno maiori s  
 a. C. 299. usui reipublicae fore, urbano gesto magistratu. it  
 nec dissimulantem, quid mallet, nec petentem tamen  
 aedilem curulem cum L. Papirio Cursore factum. I  
 ne pro certo ponerem, vetustior annalium auctor Pis  
 effecit; qui eo anno aediles curules fuisse tradit C  
 Domitium Cn. F. Calvinum et Sp. Carviliū Q. F. Ma  
 ximum. Id credo cognomen errorem in aedilibus fe  
 cisse; secutamque fabulam mixtam ex aediliciis e  
 consularibus comitiis, convenientem errori. Et lu  
 strum eo anno conditum a P. Sempronio Sopho et P  
 Sulpicio Saverione censoribus; tribusque additae duae  
 Aniensis ac Terentina. Haec Romae gesta.

X. Ceterum ad Nequinum oppidum quum segr  
 obsidione tempus tereretur, duo ex oppidanis, quo  
 rum erant aedificia iuncta muro, specu facto ad sta  
 tiones Romanas itinere occulto, perveniunt: inde a  
 consulem deducti, praesidium armatum se intra moe  
 nia et muros accepturos confirmant. Nec adspernand  
 res visa, neque incaute credenda. cum alter eorum  
 (nam alter obses retentus) duo exploratores per cu  
 niculum missi: per quos satis comperta re, trecenti  
 armati, transfuga duce in urbem ingressi, nocte por  
 tam, quae proxima erat, cepere. qua refracta, consti  
 exercitusque Romanus sine certamine urbem invasit  
 Ita Nequinum in ditionem populi Romani venit. Co  
 lonia eo adversus Umbros missa, a flumine Narnia ad  
 pellata: exercitus cum magna praeda Romam redu  
 ctus. Eodem anno ab Etruscis adversus inducias pa  
 ratum bellum. sed eos alia molientes Gallorum ingen  
 exercitus, fines ingressus, paullisper a proposito aver  
 tit. Pecunia deinde, qua multum poterant, freti, so  
 cios ex hostibus facere Gallos conantur, ut eo adiu  
 cto exercitu cum Romanis bellarent. De societate hau  
 abnuunt barbari: de mercede agitur. qua pacta acce  
 ptaque, quum parata cetera ad bellum essent, sequi  
 que Etruscus, iuberet, inficias eunt, *mercedem se bel*

*Romanis inferendi pactos. quidquid acceperint, acce-* U. c. 453.  
*pisse, ne agrum Etruscum vastarent, armisque lacesse-* a. C. 299.  
*rent cultores. Militaturos tamen se, si utique Etrusci*  
*velint; sed nulla alia mercede, quam ut in partem agri*  
*accipiantur, tandemque aliqua sede certa consistent.*  
 Multa de eo concilia populorum Etruriae habita. nec  
 perfici quidquam potuit; non tam quia imminui agrum,  
 quam quia adcolas sibi quisque adiungere tam efferae  
 gentis homines horrebat. ita dimissi Galli pecu-  
 niam ingentem sine labore ac periculo partam retule-  
 unt. Romae terrorem praebuit fama Gallici tumultus  
 ad bellum Etruscum adiecti: eo minus cunctanter  
 oedus ictum cum Picenti populo est.

XI. T. Manlio consuli Etruria provincia sorte eve-  
 nit; qui, vixdum ingressus hostium fines, quum exer-  
 eretur inter equites, ab rapido cursu circumagendo  
 quo effusus, extemplo prope exspiravit. tertius ab  
 o casu dies finis vitae consuli fuit. Quo velut omine  
 belli accepto, Deos pro se commisisse bellum memo-  
 antes Etrusci sustulere animos. Romae, tum deside-  
 rio viri, tum incommoditate temporis, tristis nuncius  
 vit: ut Patres ab iubendo dictatore consulis subro-  
 andi comitia, ex sententia principum habita, deter-  
 uerint. M. Valerium consulem omnes sententiae cen-  
 uriaeque dixere, quem senatus dictatorem dici iussus  
 fuerat. tum extemplo in Etruriam ad legiones pro-  
 cisci iussit. Adventus eius compressit Etruscos, ad-  
 o ut nemo extra munimenta egredi auderet, timor-  
 ue ipsorum obsidioni similis esset. neque illos novus  
 consul vastandis agris urendisque tectis, quum pas-  
 im non villae solum, sed frequentes quoque vici, in-  
 endiis fumarent, elicere ad certamen potuit. Quum  
 oc segnius bellum opinione esset, alterius belli, quod  
 ultis in vicem cladibus haud inmerito terribile erat,  
 ama Picentium, novorum sociorum, indicio exorta est:  
*Samnites arma et rebellionem spectare, seque ab iis sol-*  
*licitatos esse.* Picentibus gratiae actae; et magna pars

U. c. 453. curae Patribus ab Etruria in Samnites versa est. Ca-  
 a. C. 299. ritas etiam annonae sollicitam civitatem habuit: ven-  
 tumque ad inopiae ultimum foret, ut scripsere, quibus  
 aedilem fuisse eo anno Fabium Maximum placet, n-  
 eius viri cura, qualis in bellicis rebus multis tempe-  
 statibus fuerat, talis domi tum in annonae dispensa-  
 tione, praeparando ac convehendo frumento, fuisset.  
 Eo anno (nec traditur caussa) interregnum initum  
 interreges fuere Ap. Claudius, dein P. Sulpicius. Is  
 comitia consularia habuit. creavit L. Cornelium Sci-  
 pionem, Cn. Fulvium consules. Principio huius anni  
 oratores Lucanorum ad novos consules venerunt,  
 questum, *quia conditionibus perlicere se nequiverint ad  
 societatem armorum, Samnites infesto exercitu ingres-  
 sos fines suos vastare, belloque ad bellum cogere. Lu-  
 cano populo satis superque erratum quondam: nunc ita  
 obstinatos animos esse, ut omnia ferre ac pati tolerabi-  
 lius ducant, quam ut umquam postea nomen Romanum  
 violent. Orare Patres, ut et Lucanos in fidem accipiant,  
 et vim atque iniuriam ab se Samnitium arceant. Se,  
 quamquam, bello cum Samnitibus suscepto, necessaria  
 iam facta adversus Romanos fides sit, tamen obsides  
 dare paratos esse.*

XII. Brevis consultatio senatus fuit. ad unum  
 omnes iungendum foedus cum Lucanis, resque repe-  
 tendas ab Samnitibus, censent. Benigne responsum  
 Lucanis, ictumque foedus. Feciales missi, qui Sam-  
 nitem decedere agro sociorum, ac deducere exercitum  
 finibus Lucanis iuberent. quibus obviam missi ab  
 Samnitibus, qui denunciarent, *Si quod adissent in  
 Samnio concilium, haud inviolatos abituros.* Haec post-  
 quam audita sunt Romae, bellum Samnitibus et Pa-  
 tres censuerunt, et populus iussit. Consules inter se  
 provincias partiti sunt. Scipioni Etruria, Fulvio Sam-  
 nites obvenerunt; diversique, ad suum quisque bel-  
 lum, proficiscuntur. Scipioni, segne bellum et simile  
 prioris anni militiae expectanti, hostes ad Volaterras



instructo agmine obcurrerunt. Pugnatum maiore parte U. c. 454.  
 diei, magna utrimque caede. nox incertis, qua data a. C. 298.  
 victoria esset, intervenit: lux insequens victorem victumque ostendit. Nam Etrusci silentio noctis castra reliquerunt. Romanus, egressus in aciem, ubi profectione hostium concessam victoriam videt, progressus ad castra, vacuis cum plurima praeda (nam et stativa trepide deserta fuerant) potitur. inde in Faliscum agrum copiis reductis, quum impedimenta Faleriis cum modico praesidio reliquisset, expedito agmine ad depopulandos hostium fines incedit. Omnia ferro ignique vastantur; praedae undique actae: nec solum modo vastum hosti relictum, sed castellis etiam vicisque inlatus ignis: urbibus obpugnandis temperatum, in quas timor Etruscos compulerat. Cn. Fulvii consulis clara pugna in Samnio ad Bovianum haudquaquam ambiguae victoriae fuit. Bovianum inde adgressus, nec ita multo post Aufidenam vi cepit.

XIII. Eodem anno Carseolos colonia in agrum Aequicolorum deducta. Fulvius consul de Samnitibus triumphavit. Quum comitia consularia instarent, fama exorta, Etruscos Samnitesque ingentes conscribere exercitus; palam omnibus conciliis vexari principes Etruscorum, quod non Gallos quacumque conditione traxerint ad bellum: increpari magistratus Samnitium, quod exercitum, adversus Icanum hostem comparatum, obiecerint Romani: itaque suis sociorumque viribus consurgere hostes ad bellum, et haudquaquam pari defungendum esse certamine. Hic terror, quum illustres viri consulatum peterent, omnes in Q. Fabium Maximum, primo non petentem, deinde, ut inclinata studia vidit, etiam recusantem convertit. *Quid se iam senem, ac perfunctum laboribus laborumque praemiis, sollicitarent? Nec corporis, nec animi vigorem remanere eundem: et fortunam ipsam vereri, ne cui Deorum nimia iam in se, et constantior, quam velint humanae res, videatur. Et se gloriae se-*

U. c. 454. *niorum subcrevisse, et ad suam gloriam consurgentes*  
 a. C. 298. *alios laetum adspicere, nec honores magnos fortissimis*  
*viris Romae, nec honoribus deesse fortes viros. Acue-*  
*bat hac moderatione tam iusta studia; quae verecun-*  
*dia legum restringenda ratus, legem recitari iussit,*  
*qua intra decem annos eundem consulem refici non*  
*liceret. Vix prae strepitu audita lex est: tribunique*  
*plebis, nihil id impedimenti futurum, aiebant: se ad*  
*populum laturus, uti legibus solveretur. Et ille quidem*  
*in recusando perstabat, quid ergo adtineret leges ferri,*  
*rogitans, quibus per eosdem, qui tulissent, fraus fieret?*  
*Iam regi leges, non regere. Populus nihilominus suf-*  
*fragia inibat: et, ut quaeque intro vocata erat cen-*  
*turia, consulem haud dubie Fabium dicebat. Tum*  
*denuum consensu civitatis victus, Dii adprobent, in-*  
*quit, quod agitis, acturique estis, Quirites. Ceterum,*  
*quoniam in me, quod vos vultis, facturi estis, in col-*  
*lega sit meae apud vos gratiae locus. P. Decium, ex-*  
*pertum mihi concordi collegio virum, dignum vobis,*  
*dignum parente suo, quaeso, mecum consulem faciatis.*  
 Iusta suffragatio visa. omnes, quae supererant, cen-  
 turiae Q. Fabium, P. Decium consules dixere. Eo  
 anno plerisque dies dicta ab aedilibus, quia plus, quam  
 quod lege finitum erat, agri possiderent. nec quisquam  
 ferme est purgatus: vinculumque ingens inmodicae  
 cupiditatis iniectum est.

U. c. 455. XIV. Consules novi, Q. Fabius Maximus quar-  
 a. C. 297. tum et P. Decius Mus tertium, quum inter se agita-  
 rent, uti <sup>§</sup>) alter Samnites hostes; alter Etruscos de-  
 ligeret; quantaque in hanc aut in illam provinciam  
 copiae satis, et uter ad utrum bellum dux idoneus  
 magis esset; ab Sutrio et Nepete et Faleriis legati,  
 auctores, concilia Etruriae populorum de petenda pace  
 haberi, totam belli molem in Samnium averterunt.  
 Profecti consules, quo expeditiores commeatus essent,  
 et incertior hostis, qua venturum bellum foret, Fa-  
 g) ut Gron. Crev.

buius per Soranum, Decius per Sidicinum agrum, in Samnium legiones ducunt. Ubi in hostium fines ventum est, uterque populabundus effuso agmine incedit. explorant tamen latius, quam populantur. Igitur non fefellere ad Tifernum hostes in occulta valle instructi, quam ingressos Romanos superiore ex loco adoriri parabant. Fabius, impedimentis in locum tutum remotis, praesidioque modico imposito, praemonitis militibus adesse certamen, quadrato agmine ad praedictas hostium latebras succedit. Samnites, desperato improviso tumultu, quando in apertum semel discrimen evasura esset res, et ipsi acie iusta maluerunt concurrere. itaque et in aequum descendunt, ac fortunae se, maiore animo, quam spe, committunt. Ceterum, sive quia ex omnium Samnitium populis, quodcumque roboris fuerat, contraxerant, seu quia discrimen summae rerum augebat animos, aliquantum aperta quoque pugna prae-buerunt terroris. Fabius, ubi nulla ex parte hostem loco moveri vidit<sup>h)</sup>, M. Fulvium<sup>i)</sup> et M. Valerium, tribunos militum, cum quibus ad primam aciem procurrebat, ire ad equites iubet, et adhortari, *ut, si quando umquam equestri ope adiutam rempublicam meminerint, illo die adnitantur, ut ordinis eius gloriam invictam praestent. Peditem certamine immobilem hostem restare; omnem reliquam spem in inpetu esse equitum.* et ipsos nominatim iuvenes, pari comitate utrumque, nunc laudibus, nunc promissis onerat. Ceterum, quando ne ea quoque tentata vis proficeret, consilio grassandum, si nihil vires iuvarent, ratus. Scipionem legatum hastatos primae legionis subtrahere ex acie, et ad montes proximos, quam posset occultissime, circumducere iubet: inde adscensu abdito a conspectu erigere in montes agmen, aversoque hosti ab tergo repente se ostendere. Equites, ducibus tribunis, haud multo

h) videt Gron. Crev.

i) Maximum filium Crev.

U. c. 455. plus hostibus, quam suis, ex improviso ante signa eve-  
 a. C. 297. cti, praebuerunt tumultus. Adversus incitatas tur-  
 mas stetit inmotâ Samnitium acies, nec parte ulla  
 pelli aut perrumpi potuit. Et, postquam irritum in-  
 ceptum erat, recepti post signa proelio excesserunt.  
 Crevit ex eo hostium animus; nec sustinere frons  
 prima tam longum certamen increscentemque fiducia  
 sui vim potuisset, ni secunda acies iussu consulis in  
 primum successisset. Ibi integrae vires sistunt inve-  
 hentem se iam Samnitum: et tempore improvisa ex  
 montibus signa clamorque sublatus non vero tantum  
 metu terruere Samnitium animos. nam et Fabius De-  
 cium collegam adpropinquare exclamavit, et pro se  
 quisque miles, *adesse alterum consulem, adesse legio-  
 nes*, gaudio alacres fremunt; errorque utilis Romanis  
 oblatus fugae formidinisque Samnites inplevit, maxi-  
 me territos, ne ab altero exercitu integro intactoque  
 fessi obprimerentur: et, quia passim in fugam dissi-  
 pati sunt, minor caedes, quam pro tanta victoria, fuit.  
 tria millia et quadringenti caesi: capti octingenti<sup>k</sup>)  
 ferme et triginta: signa militaria capta tria et viginti.

XV. Samnitibus Apuli se ante proelium coniun-  
 xissent, ni P. Decius consul iis ad Maleventum castra  
 obiecisset, extractos deinde ad certamen fudisset. Ibi  
 quoque plus fugae fuit, quam caedis. duo millia Apu-  
 lorum caesa: spretoque eo hoste, Decius in Samnium  
 legiones duxit. Ibi duo consulares exercitus, diver-  
 sis vagati partibus, omnia spatio quinque mensium  
 evastarunt. Quadraginta et quinque loca in Samnio  
 fuere, in quibus Decii castra fuerunt: alterius consu-  
 lis sex et octoginta. nec valli tantum ac fossarum ve-  
 stigia relictâ, sed multo illis insigniora monumenta  
 vastitatis circa regionumque depopulatarum. Fabius  
 etiam urbem Cimetram cepit. ibi capta armatorum duo  
 millia quadringenti: caesi ferme pugnantes ad qua-  
 dringentos triginta. Inde, comitiorum caussa Romam

k) *ad trecentos Gron. Crev. trecenti Drak.*



profectus, maturavit eam rem agere. quum primo <sup>U. c. 455.</sup>  
 vocatae Q. Fabium consulem dicerent omnes centu- <sup>a. C. 297.</sup>  
 riae, Ap. Claudius consularis candidatus, vir acer et  
 ambitiosus, non sui magis honoris caussa, quam ut  
 patricii recuperarent duo consularia loca, quum suis,  
 tum totius nobilitatis viribus, incubuit, ut se cum Q.  
 Fabio consulem dicerent. Fabius primo, de se eadem  
 fere, quae priore anno, dicendo, abnuere. circum-  
 stare sellam omnis nobilitas; orare, ut ex coeno ple-  
 beio consulatum extraheret, maiestatemque pristinam  
 tum honori, tum patriciis gentibus redderet. Fabius,  
 silentio facto, media oratione studia hominum seda-  
 vit. *facturum enim se fuisse dixit, ut duorum patri-  
 ciorum nomina reciperet, si alium, quam se, consulem  
 fieri videret; nunc se sui rationem comitiis, quum con-  
 tra leges futurum sit, pessimo exemplo non habiturum.*  
 Ita L. Volumnius de plebe cum Ap. Claudio consul <sup>U. c. 456.</sup>  
 est factus, priore item consulatu inter se comparati. <sup>a. C. 296.</sup>  
 Nobilitas obiectare Fabio, fugisse eum Ap. Claudium  
 collegam, eloquentia civilibusque artibus haud dubie  
 praestantem.

XVI. Comitiis perfectis, veteres consules iussi  
 bellum in Samnio gerere, prorogato in sex menses  
 imperio. Itaque insequenti quoque anno, L. Volu-  
 mnius, Ap. Claudio consulibus, P. Decius, qui con-  
 sul in Samnio relictus a collega fuerat, proconsul idem  
 populari non destitit agros, donec Samnitium exerci-  
 tum, nusquam se proelio committentem, postremo  
 expulit finibus. Etruriam pulsi petierunt: et, quod  
 legationibus nequidquam saepe tentaverant, id se tanto  
 agmine armatorum, mixtis terrore precibus, acturos  
 efficacius rati, postulaverunt principum Etruriae con-  
 cilium. Quo coacto, per quot annos pro libertate di-  
 micent cum Romanis, exponunt. *omnia expertos esse,  
 si suismet ipsorum viribus tolerare tantam molem belli  
 possent: tentasse etiam haud magni momenti finitimarum  
 gentium auxilia: petisse pacem a populo Romano, quum*

U. c. 456. *bellum tolerare non possent: rebellasse, quod pax servientibus gravior, quam liberis bellum, esset. Unam sibi spem reliquam in Etruscis restare. Scire, gentem Italiae opulentissimam armis, viris, pecunia, esse: habere adcolas Gallos, inter ferrum et arma natos, feroces quum suopte ingenio, tum adversus Romanum populum: quem captum a se auroque redemptum, haud vana iactantes, memorent. Nihil abesse, si sit animus Etruscis, qui Porsenae quondam maioribusque eorum fuerit, quin Romanos, omni agro cis Tiberim pulsos, dimicare pro salute sua, non de intolerando Italiae regno, cogant. Samnitum illis exercitum paratum, instructum armis, stipendio, venisse: confestim secuturos, vel si ad ipsam Romanam urbem obpugnandam ducant.*

XVII. Haec eos in Etruria iactantes molientesque bellum domi Romanum urebat. nam P. Decius, ubi comperit per exploratores profectum Samnitium exercitum, advocato consilio <sup>1)</sup>, *Quid per agros, inquit, vagamur, vicatim circumferentes bellum? quin urbes et moenia adgredimur? nullus iam exercitus Samnio praesidet. cessere finibus, ac sibimet ipsi exilium conscivere. Adprobantibus cunctis, ad Murgantiam, validam urbem, obpugnandam ducit: tantusque ardor militum fuit, et caritate ducis, et spe maioris, quam ex agrestibus populationibus, praedae, ut uno die vi atque armis urbem caperent. ibi duo millia Samnitium et centum pugnantes circumventi captique: et alia praeda ingens capta est. quae ne impedimentis gravibus agmen oneraret, convocari milites Decius iubet. Haccine, inquit, victoria sola, aut hac praeda contenti estis futuri? Vultis vos pro virtute spes gerere? omnes Samnitium urbes, fortunaeque in urbibus relictas, vestrae sunt; quando legiones eorum, tot proeliis fusas, postremo finibus expulistis. Vendite ista, et illicite lucro mercatorem, ut sequatur agmen. ego subinde subgeram quae vendatis. Ad Romuleam urbem hinc eamus, ubi*

1) concilio Gron.

*vos labor haud maior* <sup>m)</sup>), *praeda maior manet*. Diven-<sup>U. c. 456.</sup>  
 dita praeda, ultro adhortantes imperatorem ad Romu-<sup>a. C. 296.</sup>  
 leam pergunt. Ibi quoque sine opere, sine tormentis,  
 simul admota sunt signa, nulla vi deterriti a muris,  
 qua cuique proximum fuit, scalis raptim admotis, in  
 moenia evasere. captum oppidum ac direptum est. ad  
 duo millia et trecenti occisi; et sex millia hominum  
 capta; et miles ingenti praeda potitus: quam ven-  
 dere, sicut priorem, coactus, Ferentinum inde, quam-  
 quam nihil quietis dabatur, tamen summa alacritate  
 ductus. Ceterum ibi plus laboris ac periculi fuit. et  
 defensa summa vi moenia sunt, et locus erat muni-  
 mento naturaue tutus: sed évicit omnia adsuetus  
 praedae miles. ad tria millia hostium circa muros  
 caesa: praeda militis fuit. Huius obpugnatarum ur-  
 bium decoris pars maior in quibusdam annalibus ad  
 Maximum trahitur. Murgantiam ab Decio, a Fabio Fe-  
 rentinum Romuleamque obpugnatas tradunt: sunt,  
 qui novorum consulum hanc gloriam faciant. Quidam  
 non amborum, sed alterius, L. Volumnii: ei Sam-  
 nium provinciam evenisse.

XVIII. Quum <sup>n)</sup> ea in Samnio, cuiuscumque du-  
 ctu auspicioque, gererentur; Romanis in Etruria ite-  
 rum bellum ingens multis ex gentibus concitur; cuius  
 auctor Gellius Egnatius ex Samnitibus erat. Tusci fere  
 omnes consciverant bellum: traxerat contagio proxi-  
 mos Umbriae populos: et Gallica auxilia mercede sol-  
 licitabantur. omnis ea multitudo ad castra Samnitium  
 conveniebat. Qui tumultus repens postquam Romam  
 perlatus est, quum iam L. Volumnius consul cum le-  
 gionibus, secunda ac tertia, sociorumque millibus  
 quindecim profectus in Samnium esset, Ap. Claudium  
 primo quoque tempore in Etruriam ire placuit. duae  
 Romanae legiones secutae, prima et quarta, et socio-  
 rum duodecim millia. castra haud procul ab hoste po-  
 sita. Ceterum magis eo profectum est, quod mature

m) *magnus* Gron. Crev.

n) *Dum* Gron. Crev. c. Drak.

U. c. 456. ventum erat, ut quosdam spectantes iam arma Etru-  
 a. C. 296. riae populos metus Romani nominis comprimeret,  
 quam quod ductu consulis quidquam ibi satis scite aut  
 fortunate gēstum sit. Multa proelia locis et tempo-  
 ribus iniquis commissa: spesque in dies gravio-  
 rem hostem faciebat. et iam propele-  
 rat, ut nec duci mili-  
 tes, nec militibus dux satis fideret. Literas ad col-  
 legam arcēssendum ex Samnio missas, in trinis anna-  
 libus invenio. piget tamen incertum ponere, quum ea  
 ipsa inter consules populi Romani, iam iterum eodem  
 honore fungentes, discrepatio fuerit: Appio abnuente  
 missas; Volumnio adfirmante, Appii se literis adci-  
 tum. Iam Volumnius in Samnio tria castella cepe-  
 rat, in quibus ad tria millia hostium caesa erant, di-  
 midium fere eius captum: et Lucanorum seditiones,  
 a plebeiis et egentibus ducibus ortas, summa optima-  
 tium voluntate per Q. Fabium proconsulem, missum  
 eo cum veteri exercitu, compresserat. Decio depo-  
 pulandos hostium agros relinquit. ipse cum suis co-  
 piis in Etruriam ad collegam pergit: quem advenien-  
 tem laeti omnes accepere. Appium ex conscientia  
 sua credo animum habuisse haud inmerito iratum, si  
 nihil scripserat: inliberali et ingrato animo, si egue-  
 rat ope, dissimulantem. Vix enim salute mutua red-  
 dita, quum obviam egressus esset, *Satin' salvae, in-*  
*quit, L. Volumni? ut sese in Samnio res habent? Quae*  
*te caussa, ut provincia tua excederes, induxit? Vo-*  
*lumnus in Samnio res prosperas esse ait, literis eius*  
*adcitum venisse. quae si falsae fuerint, nec usus sui sit*  
*in Etruria, extemplo conversis signis abiturum. Tu*  
*vero abeas, inquit, neque te quisquam moratur: etenim*  
*minime consentaneum est, quum bello tuo forsitan vix*  
*sufficias, hic te ad opem ferendam aliis gloriari venisse.*  
*Bene, Hercules, verteret, dicere Volumnius: mallo fru-*  
*stra operam insumtam, quam quidquam incidisse, cur*  
*non satis esset Etruriae unus consularis exercitus.*

XIX. Digredientes iam consules legati tribunique



ex Appiano exercitu circumsistunt: pars imperatorem suum orare, *ne collegae auxilium, quod adiciendum ultro fuerit, sua sponte oblatum sperneretur*: plures abeunti Volumnio obsistere atque obtestari, *ne pravo cum collega certamine rempublicam prodat. Si qua clades incidisset, desertori magis, quam deserto, noxiae fore. Eo rem adductam, ut omne<sup>o)</sup> rei bene aut secus gestae in Etruria decus dedecusque ad L. Volumnium sit delegatum. neminem quaesiturum, quae verba Appii, sed quae fortuna exercitus fuerit. Dimitti ab Appio eum, sed a republica et ab exercitu retineri; experiretur modo voluntatem militum.* Haec monendo obtestandoque, prope resitantes consules in concionem pertraxerunt. ibi orationes longiores habitae in eandem ferme sententiam, in quam inter paucos certatum verbis fuerat. Et quum Volumnius, caussa superior, ne infacundus quidem adversus eximiam eloquentiam collegae visus esset; cavillansque Appius, *sui acceptum referre, diceret, debere, quod ex muto atque elingui facundum etiam consulem haberent; priore consulatu, primis utique mensibus, hiscere eum nequisse, nunc iam populares orationes serere<sup>p)</sup>*: Quam mallem, inquit Volumnius, *tu a me strenue facere, quam ego abs te scite loqui didicissem. Postremo conditionem ferre, quae decretura sit, non orator, (neque enim id desiderare rempublicam) sed imperator uter sit melior. Etruriam et Samnium provincias esse: utram mallet, eligeret. suo exercitu se vel in Etruria, vel in Samnio rem gesturum. Tum militum clamor ortus, ut simul ambo bellum Etruscum susciperent. quo animadverso consensu, Volumnius, Quoniam in collegae voluntate interpretanda, inquit, erravi; non committam, ut, quid vos velitis, obscurum sit, manere, an abire me velitis, clamore significate.* Tum vero tantus est clamor exortus, ut hostes e castris exciret. armis adreptis in aciem descendunt.

U. c. 456.

a. C. 296.

o) omnis Gron. Crev.

haberen colon atque post

p) In Gron. et Drak. post

serere punctum ponitur.

U. c. 456. et Volumnius signa canere, ac vexilla efferri e castris  
 a. C. 296. iussit. Appium addubitasse ferunt, cernentem, seu  
 pugnante, seu quieto se, fore collegae victoriam: de-  
 inde veritum, ne suae quoque legiones Volumnium  
 sequerentur, et ipsum flagitantibus suis signum de-  
 disse. Ab neutra parte satis commode instructi fue-  
 runt. nam et Samnitium dux Gellius Egnatius pabu-  
 latum cum cohortibus paucis ierat; suoque inpetu  
 magis milites, quam cuiusquam ductu aut imperio,  
 pugnam capessebant. et Romani exercitus nec pariter  
 ambo ducti, nec satis temporis ad instruendum fuit.  
 Prius concurrit Volumnius, quam Appius ad hostem  
 perveniret. itaque fronte inaequali concursus est:  
 et, velut forte <sup>q)</sup> quadam mutante adsuetos inter se  
 hostes, Etrusci Volumnio, Samnites, parumper cun-  
 ctati, quia dux aberat, Appio obcurrere. Dicitur Ap-  
 pius in medio pugnae discrimine, ita ut inter prima  
 signa manibus ad coelum sublatis conspiceretur, ita  
 precatus esse: *Bellona, si hodie nobis victoriam duis,*  
*ast ego templum tibi voveo.* Haec precatus, velut in-  
 stigante Dea, et ipse collegae et exercitus virtutem  
 aequavit <sup>r)</sup>. Duces imperatoria opera exsequuntur;  
 et milites, ne ab altera parte prius victoria incipiat,  
 adnituntur. Ergo fundunt fugantque hostes, maiorem  
 molem haud facile sustinentes, quam cum qua manus  
 conserere adsueti fuerant. urgendo cedentes, insequen-  
 doque effusos compulere ad castra. Ibi, interventu Gellii  
 cohortiumque Sabellarum, paullisper recruduit pugna.  
 iis quoque mox fuis, iam a victoribus castra obpug-  
 nabantur: et, quum Volumnius ipse portae signa in-  
 ferret; Appius, Bellonam victricem idemtidem cele-  
 brans, accenderet militum animos, per vallum, per  
 fossas inruperunt. Castra capta direptaque: praeda in-  
 gens parta et militi concessa est. septem millia ac tre-  
 centi hostium occisi, duo millia et centum viginti  
 capti.

q) sorte Gron.

r) adaequavit Gron. Crev.

XX. Dum ambo consules omnisque Romana vis in Etruscum bellum magis inclinat, in Samnio novi exercitus, exorti ad depopulandos imperii Romani fines, per Vescinos in Campaniam Falernumque agrum transcendunt, ingentesque praedas faciunt. Voluminium, magnis itineribus in Samnium redeuntem (iam enim Fabio Decioque prorogati imperii finis aderat), fama de Samnitium exercitu populationibusque Campani agri ad tuendos socios convertit. Ut in Calenum agrum venit, et ipse cernit recentia cladis vestigia, et Caleni narrant, tantum iam praedae hostes trahere, ut vix explicare agmen possint<sup>s)</sup>: itaque iam propalam duces loqui, extemplo eundum in Samnium esse; ut, relicta ibi praeda, in expeditionem redeant, nec tam oneratum agmen dimicationi committant. Ea, quamquam similia veris erant, certius tamen exploranda ratus, dimittit equites, qui vagos praedatores in agros palantes excipiant: ex quibus inquirendo cognoscit, ad Vulturnum flumen sedere hostem; inde tertia vigilia moturum: iter in Samnium esse. His satis exploratis profectus, tanto intervallo ab hostibus consedit, ut nec adventus suus propinquitate nosci posset, et egredientem e castris hostem obrimeret. Aliquanto ante lucem ad castra accessit; gnarosque Oscanae linguae, exploratum quid agatur, mittit. Intermixti hostibus (quod facile erat in nocturna trepidatione) cognoscunt, infrequentia armatis signa egressa, praedam praedaeque custodes exire, ignobile agmen, et sua quemque molientem, nullo inter alios consensu, nec satis certo imperio. Tempus adgrediendi aptissimum visum est: et iam lux adpetebat. itaque signa canere iussit; agmenque hostium adgreditur. Samnites, praeda inpediti, infrequentes armati, pars adde-  
dere gradum, ac prae se agere praedam, pars stare, incerti utrum progredi, an regredi in castra tutius foret, inter cunctationem obprimuntur. et Romani iam

s) explicari a. possit Gron. Crev.

U. c. 456. transcenderant vallum, caedesque ac tumultus erat in  
 a. C. 296. castris. Samnitium agmen, praeterquam hostili tumultu, captivorum etiam repentina defectione turbatum erat: qui partim ipsi soluti vinctos solvebant: partim arma in sarcinis deligata rapiebant, tumultumque, proelio ipso terribiliorem, intermixti agmini praebebant. Memorandum deinde edidere facinus: nam Staium Minacium ducem, adeuntem ordines hortantemque, invadunt: dissipatis inde equitibus, qui cum eo aderant, ipsum circumsistunt, insidentemque equo captum ad consulem Romanum rapiunt. Revocata eo tumultu prima signa Samnitium: proeliumque iam profligatum integratum est, nec diutius sustineri potuit. Caesa ad sex millia hominum: duo millia et quingenti capti: in eis tribuni militum quatuor: signa militaria triginta; et, quod laetissimum victoribus fuit, captivorum recepta septem millia et quadringenti; praeda ingens sociorum: adcitique edicto domini ad res suas noscendas recipiendasque. Praestituta die, quarum rerum non exstitit dominus, militi concessae: coactique vendere praedam, ne alibi, quam in armis, animum haberent.

XXI. Magnum ea populatio Campani argi tumultum Romae praeberat: et per eos forte dies ex Etruria adlatum erat, post deductum inde Volumnianum exercitum Etruriam concitam in arma, et Gellium Egmatium, Samnitium ducem, et Umbros ad defectionem vocare<sup>t)</sup>, et Gallos pretio ingenti sollicitare<sup>u)</sup>). His nunciis senatus conterritus iustitium indici, delectum omnis generis hominum haberi iussit. nec ingenui modo aut iuniores sacramento adacti, sed seniorum etiam cohortes factae, libertinique centuriati: et defendendae urbis consilia agitabantur; summaeque rerum praetor P. Sempronius praeerat. Ceterum parte curae exonerarunt senatum L. Volumnii consulis literae, quibus caesos fusosque populos Campaniae cognitum

t) *vocari* Gron. Crev. c. Drak.

u) *sollicitari* Eaed.



est. Itaque et supplicationes ob rem bene gestam con- U. c. 456.  
sulis nomine decernunt. iustitium remittitur, quod fue- a. C. 296.  
rat dies decem et octo, supplicatioque perlaeta fuit.  
Tum de praesidio regionis depopulatae ab Samnitibus  
agitari coeptum. Itaque placuit, ut duae coloniae circa  
Vescinum et Falernum agrum deducerentur, una ad  
ostium Liris fluvii, quae Minturnae adpellata; altera  
in saltu Vescino, Falernum contingente agrum, ubi  
Sinope dicitur Graeca urbs fuisse, Sinuessa deinde ab  
colonis Romanis adpellata. Tribunis plebis negotium  
datum est, ut plebeiscito iuberetur P. Sempronius prae-  
tor triumviros in ea loca colonis deducendis creare.  
nec, qui nomina darent, facile inveniebantur, quia  
in stationem se prope perpetuam infestae regionis, non  
in agros, mitti rebantur. Avertit ab eis curis senatum  
Etruriae ingravescens bellum, et crebrae literae Ap-  
pii, monentis, ne regionis eius motum neglegerent:  
*quatuor gentes conferre arma, Etruscos, Samnites, Um-  
bros, Gallos. iam castra bifariam facta esse, quia unus  
locus capere tantam multitudinem non possit.* Ob haec,  
et (iam adpetebat tempus) comitiorum caussa L. Vo-  
lumniius <sup>x)</sup> consul Romam revocatus: qui prius, quam  
ad suffragium centurias vocaret, in concionem advo-  
cato populo, multa de magnitudine belli disseruit.  
*iam tum, quum ipse ibi cum collega rem pariter gesse-  
rit, fuisse tantum bellum, ut nec duce uno, nec exercitu  
geri potuerit: accessisse postea dici Umbros, et ingen-  
tem exercitum Gallorum. Adversus quatuor populos du-  
ces <sup>y)</sup> consules illo die deligi meminissent, se, nisi con-  
sideret, eum consensu populi Romani consulem declara-  
tum iri, qui haud dubie tum primus omnium ductor ha-  
beatur, dictatorem fuisse extemplo dicturum.*

XXII. Nemini dubium erat, quin Q. Fabius om-  
nium consensu destinaretur; eumque et praerogativa <sup>z)</sup>,

x) ob haec (et iam appetebat tempus comitiorum) L. Vol. Gron.

ob haec, (iam appetebat tempus) comitiorum causa L. Vol. Crev.

y) duos Gron.

z) praerogativae Gron. Crev. c. Drak.

U. c. 456. et primo vocatae omnes centuriae consulem cum L. a. C. 296. Volumnio dicebant. Fabii oratio fuit, qualis biennio ante: deinde, ut vincebatur consensu, versa postremo ad collegam P. Decium poscendum. *id senectuti suae adminiculum fore: censura duobusque consulatibus simul gestis expertum se, nil concordi collegio firmitus ad rempublicam tuendam esse. novo imperii socio vix iam ad-suescere senilem animum posse: cum moribus notis facilius se communicaturum consilia.* Subscripsit orationi eius consul, quum meritis P. Decii laudibus, tum, quae ex concordia consulum bona, quaeque ex discordia mala in administratione rerum militarium evenirent, memento, quam prope ultimum discrimen suis et collegae certaminibus nuper ventum foret: admonendo Decium Fabiumque, ut uno animo, una mente viverent. esse praeterea viros natos militiae, factis magnos, ad verborum linguaeque certamina rudes: ea ingenia consularia esse. Callidos solertesque, iuris atque eloquentiae consultos, qualis Ap. Claudius esset, urbi ac foro praesides habendos, praetoresque ad reddenda iura creandos esse. His agendis dies est consumtus. postridie ad praescriptum consulis et consularia et praetoria comitia habita. Consules creati Q. Fabius et P. Decius: Ap. Claudius praetor; omnes absentes. et L. Volumnio ex senatusconsulto et scito plebis prorogatum in annum imperium est.

XXIII. Eo anno prodigia multa fuerunt: quorum averruncandorum causa supplicationes in biduum senatus decrevit. Publice vinum ac tus <sup>a)</sup> praebitum. supplicatum iere frequentes viri feminaeque. Insignem supplicationem fecit certamen in sacello Pudicitiae patriciae, quae in foro boario est ad aedem rotundam Herculis inter matronas ortum. Virginiam, Auli filiam, patriciam plebeio nuptam L. <sup>b)</sup> Volumnio consuli, matronae, quod e Patribus enupsisset, sacris arcuerant. Brevis altercatio inde ex iracundia

a) add. sacrificiis Gron. Grev. (1)

b) L. del. Eaed.

muliebri in contentionem animorum exarsit. quum se U. c. 456.  
 Virginia et patriciam et pudicam in patriciae Pudici- a. C. 296.  
 tiae templum ingressam, et uni nuptam, ad quem vir-  
 go deducta sit; nec se viri honorumve eius ac rerum  
 gestarum poenitere, vero gloriaretur. Facto deinde  
 egregio magnifica verba adauxit. in vico Longo, ubi  
 habitabat, ex parte aedium, quod satis esset loci mo-  
 dico sacello, exclusit; aramque ibi posuit. et, convo-  
 catis plebeiis matronis, conquesta iniuriam patriciarum,  
*Hanc ego aram, inquit, Pudicitiae plebeiae dedico:*  
*vosque hortor, ut, quod certamen virtutis viros in hac*  
*civitate tenet, hoc pudicitiae inter matronas sit: detis-*  
*que operam, ut haec ara, quam illa, si quid potest,*  
*sanctius et a castioribus coli dicatur.* eodem ferme ritu  
 et haec ara, quo illa antiquior, culta est, ut nulla,  
 nisi spectatae pudicitiae matrona, et quae uni viro  
 nupta fuisset, ius sacrificandi haberet. Vulgata dein  
 religio a pollutis, nec matronis solum, sed omnis or-  
 dinis feminis, postremo in oblivionem venit. Eodem  
 anno Cn. et Q. Ogulnii aediles curules aliquot foene-  
 ratoribus diem dixerunt: quorum bonis multatis, ex  
 eo, quod in publicum redactum est, aenea in Capito-  
 lio limina, et trium mensarum argentea vasa in cella  
 Iovis, Iovemque in culmine cum quadrigis, et ad fi-  
 rum Ruminalem simulacra infantium conditorum ur-  
 bis sub uberibus lupae posuerunt; semitamque saxo  
 quadrato a Capena porta ad Martis straverunt. et ab  
 aedilibus plebeiis L. Aelio Paeto et C. Fulvio Curvo,  
 ex multatitia item pecunia, quam exegerunt pecuariis  
 damnatis, ludi facti: pateraeque aureae ad Cereris  
 positae.

XXIV. Q. inde Fabius quintum et P. Decius quar- U. c. 457.  
 tum consulatum ineunt, tribus consulatibus censura- a. C. 295.  
 que collegae; nec gloria magis rerum, quae ingens erat,  
 quam concordia, inter se clari. quae ne perpetua esset,  
 ordinum magis, quam ipsorum, inter se certamen in-  
 tervenisse reor: patriciis tendentibus, ut Fabius Etru-

U. c. 457. riam extra ordinem provinciam haberet; plebeiis au-  
 a. C. 295. ctoribus Decio, ut ad sortem revocaret. Fuit certe con-

tentio in senatu; et, postquam ibi Fabius plus pote-  
 rat, revocata res ad populum est. in concione, ut in-  
 ter militares viros, et factis potius, quam dictis, fre-  
 tos, pauca verba habita: Fabius, *quam arborem con-*  
*servisset, sub ea legere alium fructum, indignum esse,*  
*dicere; se aperuisse Ciminiam silvam, viamque per de-*  
*vios saltus Romano bello fecisse. Quid se id aetatis sol-*  
*licitassent, si alio duce bellum gesturi essent? Nimirum*  
*adversarium se, non socium imperii, legisse, sensim*  
*exprobrat: et invidisse Decium concordibus collegiis tri-*  
*buis. Postremo, se tendere nihil ultra, quam ut, si se*  
*dignum provincia ducerent, in eam mitterent: in sena-*  
*tus arbitrio se fuisse, et in potestate populi futurum.*  
 P. Decius senatus iniuriam querebatur: quoad potuerint,  
 Patres adnisos, ne plebeiis aditus ad magnos honores  
 esset: postquam ipsa virtus pervicerit, ne in ullo genere  
 hominum inhonorata esset, quaderi, quemadmodum ir-  
 rita sint non suffragia modo populi, sed arbitria etiam  
 fortunae, et in paucorum potestatem vertantur, Omnes  
 ante se consules sortitos provinciam esse; nunc extra  
 sortem Fabio senatum provinciam dare. Si honoris eius  
 causa: ita eum de se, deque republica meritum esse, ut  
 faveat Q. Fabii gloriae, quae modo non sua contumelia  
 splendeat. Cui autem dubium esse, ubi unum bellum sit  
 asperum ac difficile, quum id alteri extra sortem man-  
 detur, quin alter consul pro supervacaneo atque inutili  
 habeatur? Gloriari Fabium rebus in Etruria gestis. velle  
 et P. Decium gloriari: et forsitan, quem ille obrutum  
 ignem reliquerit, ita ut toties novum ex inproviso in-  
 cendium daret, eum se extincturum. Postremo se colle-  
 gae honores praemiaque concessurum verecundia aetatis  
 eius maiestatisque; quum periculum, quum dimicatio  
 proposita sit, neque cedere sua sponte, neque cessurum.  
 et, si nihil aliud ex eo certamine tulerit, illud certe la-  
 turum, ut, quod populi sit, populus iubeat potius, quam



*patres gratificentur. Iovem optimum maximum Deosque* <sup>U. c. 457.</sup>  
*immortales se precari, ut ita sortem aequam sibi cum* <sup>a. C. 295.</sup>  
*collega dent, si eandem virtutem felicitatemque in bello*  
*administrando daturi sint. certe id et natura aequum,*  
*et exemplo utile esse, et ad famam populi Romani perti-*  
*nere, eos consules esse, quorum utrolibet duce bellum*  
*Etruscum geri recte possit.* Fabius, nihil aliud preca-  
 tus populum, quam ut prius, quam intro vocaren-  
 tur ad suffragium tribus, Ap. Claudii praetoris adla-  
 tas ex Etruria literas audirent, comitio abit. nec  
 minore populi consensu, quam senatus, provincia  
 Etruria extra sortem Fabio decreta est.

XXV. Concursus inde ad consulem factus omnium  
 ferme iuniorum: et pro se quisque nomina dabant.  
 tanta cupido erat sub eo duce stipendia faciendi. Qua  
 circumfusus turba, *Quatuor millia, inquit, peditum*  
*et sexcentos equites dumtaxat scribere in animo est: ho-*  
*dierno et crastino die qui nomina dederitis, mecum du-*  
*cam. maiori mihi curae est, ut omnes locupletes reducam,*  
*quam multis rem geram militibus.* Profectus apto exer-  
 citu, et eo plus fiduciae ac spei gerente, quod non de-  
 siderata multitudo erat, ad oppidum Aharnam, unde  
 haud procul hostes erant, ad castra Appii praetoris  
 pergit. paucis citra millibus lignatores ei cum praesi-  
 dio obcurrunt; qui, ut lictores praegredi viderunt,  
 Fabiumque esse consulem accepere, laeti atque ala-  
 cres Diis populoque Romano grates agunt, quod eum  
 sibi imperatorem misissent. Circumfusi deinde quum  
 consulem salutarent, quaerit Fabius, quo pergerent;  
 respondentibusque, lignatum se ire, *ain' tandem, in-*  
*quit, nam castra vallata non habetis?* Ad hoc quum  
 subclamaturnum esset; *duplici quidem vallo, et fossa, et*  
*tamen in ingenti metu esse: habetis igitur, inquit, ad-*  
*fatim lignorum. redite et vellite vallum.* Redeunt in  
 castra, terroremque ibi, vellentes vallum, et iis, qui  
 in castris remanserant <sup>c)</sup>, militibus, et ipsi Appio fe-

c) remanserunt Gron.

U. c. 457. cerunt. Tum pro se quisque alii aliis dicere, *consulis*  
 v. C. 295. *se Q. Fabii facere iussu.* Postero inde die castra mota,  
 et Appius praetor Romam dimissus. inde nusquam  
 stativa Romanis fuere. negabat utile esse, uno loco  
 sedere exercitum: itineribus ac mutatione locorum  
 mobiliorem <sup>d)</sup> ac salubriorem esse. fiebant autem iti-  
 nera, quanta fieri sinebat hiems haud dum exacta. Vere  
 inde primo, relicta secunda legione ad Clusium, quod  
 Camars <sup>e)</sup> olim adpellabant, praepositoque castris L.  
 Scipione propraetore, Romam ipse ad consultandum de  
 bello rediit: sive ipse sponte sua, quia bellum ei ma-  
 ius in conspectu erat, quam quantum esse famae cre-  
 diderat; sive senatusconsulto adcitus. nam in utrum-  
 que auctores sunt. Ab Ap. Claudio praetore retractum  
 quidam videri volunt; quum in senatu et apud popu-  
 lum (id quod per literas adsidue fecerat) terrorem belli  
 Etrusci augeret: *non subfecturum ducem unum, nec*  
*exercitum unum, adversus quatuor populos. Periculosum*  
*esse, sive iuncti unum premant, sive id diversi gerant*  
*bellum, ne ad omnia simul obire unus non possit. Duas se*  
*ibi legiones Romanas reliquisse: et minus quinque millia*  
*peditum equitumque cum Fabio venisse. sibi placere, P.*  
*Decium consulem primo quoque tempore in Etruriam ad*  
*collegam proficisci: L. Volunnio Samnium provinciam*  
*dari. Si consul malit in suam provinciam ire, Volunnium*  
*in Etruriam ad consulem cum exercitu iusto consulari*  
*proficisci.* Quum magnam partem moveret oratio prae-  
 toris, P. Decium censuisse ferunt, ut omnia integra  
 ac libera Q. Fabio servarentur, donec vel ipse, si per  
 commodum reipublicae posset, Romam venisset, vel  
 aliquem ex legatis misisset: a quo disceret senatus,  
 quantum in Etruria belli esset, quantisque admini-  
 strandum copiis, et quot per duces esset.

XXVI. Fabius, ut Romam rediit, et in senatu  
 et productus ad populum median orationem habuit,  
 ut nec augere, nec minuere videretur belli famam;

d) nobiliorem Gron. Crev. c. Drak.

e) Camars Crev.

magisque in altero adsumendo duce aliorum indul-  
 gere timori, quam suo aut reipublicae periculo consu-  
 lere. *ceterum, si sibi adiutorem belli sociumpue imperii*  
*darent, quonam modo se oblivisci P. Decii consulis per*  
*tot collegia experti posse? Neminem omnium secum*  
*coniungi malle: et copiarum satis sibi cum P. Decio, et*  
*numquam nimium hostium fore. Sin collega quid aliud*  
*malit, at sibi L. Volumnium darent adiutorem. Om-*  
 nium rerum arbitrium et a populo, et a senatu, et ab  
 ipso collega, Fabio permissum est. et quum P. Decius  
 se in Samnium vel in Etruriam proficisci paratum esse  
 ostendisset, tanta laetitia ac gratulatio fuit, ut prae-  
 ciperetur victoria animis, triumphusque, non bellum  
 decretum consulibus videretur. Invenio apud quosdam,  
 extemplo, consulatu inito, profectos in Etruriam Fa-  
 bium Deciumque, sine ulla mentione sortis provin-  
 ciarum certaminumque inter collegas, quae exposui.  
 Sunt, quibus ne haec quidem certamina exponere sa-  
 tis fuerit. adiecerunt et Appii criminationes de Fabio  
 absente ad populum, et pertinaciam adversus praesen-  
 tem consulem praetoris, contentionemque aliam inter  
 collegas, tendente Decio, ut suae quisque provinciae  
 sortem tueretur. Constare res incipit ex eo tempore,  
 quo profecti ambo consules ad bellum sunt. Ceterum,  
 antequam consules in Etruriam pervenirent, Senones  
 Galli multitudine ingenti ad Clusium venerunt, legio-  
 nem Romanam castraque obpugnaturi. Scipio, qui ca-  
 stris praeerat, loco adjuvandam paucitatem suorum  
 militum ratus, in collem<sup>f)</sup>, qui inter urbem et castra  
 erat, aciem erexit. Sed, ut in re subita, parum ex-  
 plorato itinere ad iugum perrexit, quod hostes cepe-  
 rant, parte alia egressi. ita caesa ab tergo legio, at-  
 que in medio, quum hostis undique urgeret, circum-  
 venta. Deletam quoque ibi legionem, ita ut nuncius  
 non superesset, quidam auctores sunt: nec ante ad

U. c. 457.

a. C. 295.

f) colle Gron. c. Drak.

U. c. 457. consules, qui iam haud procul a Clusio aberant, fa-  
 a. C. 295. mam eius cladis perlatam, quam in conspectu fuere  
 Gallorum equites, pectoribus equorum suspensa ge-  
 stantes capita, et lanceis infixas, ovantesque moris sui  
 carmine. Sunt, qui Umbros fuisse, non Gallos, tra-  
 dant; nec tantum cladis acceptum: et circumventis  
 pabulatoribus cum L. Manlio Torquato legato Scipio-  
 nem propaetorem subsidium e castris tulisse, victo-  
 resque Umbros, redintegrato proelio, victos esse, ca-  
 ptivosque eis ac praedam ademptam. Similius vero est,  
 a Gallo hoste, quam Umbro, eam cladem acceptam;  
 quod, quum saepe alias, tum eo anno, Gallici tumultus  
 praecipuus terror civitatem tenuit. Itaque prae-  
 terquam quod ambo consules profecti ad bellum erant  
 cum quatuor legionibus, et magno equitatu Romano,  
 Campanisque mille equitibus delectis, ad id bellum  
 missis, et sociorum nominisque Latini maiore exer-  
 citu, quam Romani: alii duo exercitus haud procul  
 urbe Etruriae obpositi, unus in Falisco, alter in Va-  
 ticano agro. Cn. Fulvius et L. Postumius Megellus,  
 propaetores ambo, stativa in eis locis habere iussi.

XXVII. Consules ad hostes, transgresso Apen-  
 nino, in agrum Sentinatem pervenerunt. Ibi quatuor  
 millium ferme intervallo castra posita. Inter hostes  
 deinde consultationes habitae: atque ita convenit, ne  
 unis castris miscerentur omnes, neve in aciem descen-  
 derent simul. Samnitibus Galli, Etruscis Umbri ad-  
 iecti. dies indicta pugnae: Samniti s) Gallisque dele-  
 gata pugna: inter ipsum certamen Etrusci Umbrique  
 iussi castra Romana obpugnare. Haec consilia tur-  
 barunt transfugae Clusini tres, clam nocte ad Fabium  
 consulem transgressi. qui, editis hostium consiliis,  
 dimissi cum donis, ut subinde, ut quaeque res nova  
 decreta esset, exploratam perferrent. Consules Ful-  
 vio, ut ex Falisco, Postumio, ut ex Vaticano exer-  
 citum ad Clusium admoveant, summaque vi fines ho-

g) *Samnitibus* Gron. Crev.



stium depopulentur, scribunt. Huius populationis fa- U. c. 457.  
ma Etruscos ex agro Sentinate ad suos fines tuendos a. C. 295.  
movit. Instare inde consules, ut absentibus iis pug-  
naretur. per biduum lacessere proelio hostem. biduo  
nihil dignum dictu actum. Pauci utrimque cecidere:  
magisque irritati sunt ad iustum certamen animi, quam  
ad discrimen summa rerum adducta. tertio die descen-  
sum in campum omnibus copiis est. Quum instructae  
acies starent, cerva fugiens lupum e montibus exacta  
per campos inter duas acies decurrit: inde diversae  
ferae, cerva ad Gallos, lupus ad Romanos cursum de-  
flexit. Lupo data inter ordines via: cervam Galli con-  
fixere. Tum ex antesignanis Romanus miles, *Illac*  
*fuga, inquit, et caedes vertit: ubi sacram Dianae fe-*  
*ram iacentem videtis. Hinc victor Martius lupus, inte-*  
*ger et intactus, gentis nos Martiae et conditoris nostri*  
*admonuit.* Dextro cornu Galli, sinistro Samnites con-  
stiterunt. adversus Samnites Q. <sup>b)</sup> Fabius primam ac  
tertiam legiones pro dextro cornu; adversus Gallos  
pro sinistro Decius quintam et sextam instruxit. se-  
cunda et quarta cum L. Volumnio proconsule in Sam-  
nio gerebant bellum. Primo concursu adeo aequis vi-  
ribus gesta res est, ut, si adfuissent Etrusci et Um-  
bri, aut in acie, aut in castris, quocumque se incli-  
nassent, accipienda clades fuerit.

XXVIII. Ceterum, quamquam communis adhuc  
Mars belli erat, necdum discrimen fortuna fecerat, qua  
datura vires esset, haudquaquam similis pugna in dex-  
tro laevoque cornu erat. Romani apud Fabium arce-  
bant magis, quam inferebant, pugnam; extraheba-  
turque in quam maxime serum diei certamen: quia  
ita persuasum erat duci, et Samnites et Gallos primo  
inpetu feroces esse, quos sustineri satis sit; longiore  
certamine sensim residere Samnitium animos: Gallo-  
rum quidem etiam corpora intolerantissima laboris at-  
que aestus fluere; primaque eorum proelia plus quam

b) Q. del. Gron. Crev.

U. c. 457. virorum, postrema minus quam feminarum esse. In  
 a. C. 295. id tempus igitur, quo vinci solebat hostis,<sup>1</sup>quam inter-  
 gerrimas vires militis servabat. Ferocior Decius et aetate  
 et vigore animi, quantumcumque virium habuit, cer-  
 tamine primo effudit. et, quia lentior videbatur pede-  
 stris pugna, equitatum in pugnam concitat: et ipse,  
 fortissimae iuvenum turmae inmixtus, orat proceres  
 iuventutis, in hostem ut secum inpetum faciant: du-  
 plicem illorum gloriam fore, si ab laevo cornu et ab  
 equite victoria incipiat. Bis avertere Gallicum equita-  
 tum. iterum longius evectos, et iam inter media equi-  
 tum agmina proelium cientes, novum pugnae conter-  
 ruit genus: essedis carrisque superstans armatus ho-  
 stis ingenti sonitu equorum rotarumque advenit, et  
 insolitos eius tumultus Romanorum conterruit equos.  
 Ita victorem equitatum velut lymphaticus pavor dis-  
 sipat: sternit inde ruentes equos virosque improvida  
 fuga. Turbata hinc etiam signa legionum: multique  
 inpetu equorum ac vehiculorum raptorum per agmen  
 obtriti antesignani: et insecuta, simul territos hostes  
 vidit, Gallica facies nullum spatium respirandi reci-  
 piendique se dedit. Vociferari Decius, *quo fugerent?*  
*quamve in fuga spem haberent?* obsistere cedentibus,  
 ac revocare fusos. deinde, ut nulla vi perculsos susti-  
 nere poterat, patrem P. Decium nomine compellans,  
*Quid ultra moror, inquit, familiare fatum? datum hoc*  
*nostro generi est, ut luendis periculis publicis piacula*  
*simus. Iam ego mecum hostium legiones<sup>1</sup>) mactandas Tel-*  
*luri ac Diis Manibus dabo.* Haec locutus M. Livium pon-  
 tificem, quem, descendens in aciem, digredi vetuerat  
 ab se, praeire iussit verba, quibus se legionesque ho-  
 stium pro exercitu populi Romani Quiritium devoveret.  
 Devotus inde eadem precatione eodemque habitu, quo  
 pater P. Decius ad Vesperim bello Latino se iusserat  
 devoveri. Quum secundum sollemnes precationes ad-  
 iecisset, *prae se agere sese formidinem ac fugam, caedem-*

i) legiones hostium Gron. Grey.

*que ac eruorem, coelestium, inferorum iras: contactu-* U. c. 457.  
*rum funebribus diris signa, tela, arma hostium; lo-* a. C. 295.  
*cumque eundem suae pestis et Gallorum ac Samnitium*  
*fore. Haec exsecratus in se hostesque, qua confertis-*  
*simam cernebat Gallorum aciem, concitat equum: in-*  
*festis telis est interfectus.*

XXIX. Vix humanae inde opis videri pugna potuit. Romani, duce amisso, quae res terrori alias esse solet, sistere fugam, ac novam de integro velle instaurare pugnam. Galli, et maxime globus circumstans consulis corpus, velut alienata mente, vana incassum iactare tela. torpere quidam, et nec pugnae meminisse, nec fugae. At ex parte altera pontifex Livius, cui lictores Decius tradiderat, iusseratque pro praetore<sup>k</sup>) esse, vociferari, *Vicisse Romanos, defunctos consulis fato. Gallos Samnitesque Telluris matris ac Deorum Manium esse. Rapere ad se ac vocare Decium devotam secum aciem; furiarumque ac formidinis plena omnia ad hostes esse.* Superveniunt deinde his restituentibus pugnam L. Cornelius Scipio et C. Marcus, cum subsidiis ex novissima acie iussu Q. Fabii consulis ad praesidium collegae missi. ibi auditur P. Decii eventus, ingens hortamen ad omnia pro republica audenda. Itaque quum Galli structis ante se scutis conferti starent, nec facilis pede conlato videretur pugna; iussu legatorum conlecta humi pila, quae strata inter duas acies iacebant, atque in testudinem hostium coniecta. quibus plerisque in scuta, verutis in corpora ipsa fixis, sternitur cuneus; ita ut magna pars integris corporibus adtoniti conciderent. haec in sinistro cornu Romanorum fortuna variaverat. Fabius in dextro<sup>l</sup>) primo (ut ante dictum est) cunctando extraxerat diem: deinde, postquam nec clamor hostium, nec inpetus, nec tela missa, eandem viam habere visa; praefectis equitum iussis ad latus Samnitium circumducere alas, ut signo dato in transversos, quanto ma-

k) *propraetorem* Gron. Crev. c. Drak.

l) *add. cornu* Gron.

U. c. 457. ximo possent inpetu, incurrerent; sensim suos signa  
 a. C. 295. inferre iussit, et commovere hostem. Postquam non  
 resisti vidit, et haud dubiam lassitudinem esse: tum,  
 conlectis omnibus subsidiis, quae ad id tempus reser-  
 vaverat, et legiones concitavit, et signum ad inva-  
 dendos hostes equitibus dedit. Nec sustinuerunt Sam-  
 nites inpetum, praeterque aciem ipsam Gallorum, re-  
 lictis in dimicatione sociis, ad castra effuso cursu fe-  
 rebantur. Galli, testudine facta, conferti stabant. Tum  
 Fabius, audita morte collegae, Campanorum alam,  
 quingentos fere equites, excedere acie iubet, et cir-  
 cumvectos ab tergo Gallicam invadere aciem: tertiae  
 deinde legionis subsequi principes, et, qua turbatum  
 agmen hostium viderent inpetu equitum, instare ac ter-  
 ritos caedere. Ipse aedem Iovi Victori spoliaque hostium  
 quum vovisset, ad castra Samnitium perrexit; quo  
 multitudo omnis consternata agebatur. Sub ipso vallo,  
 quia tantam multitudinem portae non recepere, ten-  
 tata ab exclusis turba suorum pugna est. Ibi Gellius  
 Egnatius imperator Samnitium cecidit. compulsi deinde  
 intra vallum Samnites, parvoque certamine capta ca-  
 stra, et Galli ab tergo circumventi. Caesa eo die ho-  
 stium viginti quinque millia, octo capta. nec incruen-  
 ta victoria fuit. Nam ex P. Decii exercitu caesa septem  
 millia; ex Fabii mille septingenti <sup>mn</sup>). Fabius, dimis-  
 sis ad quaerendum collegae corpus, spolia hostium  
 coniecta in acervum Iovi Victori cremavit. Consulis  
 corpus eo die, quia obrutum superstratis Gallorum  
 cumulis erat, inveniri non potuit. postero die inven-  
 tum relatumque est cum multis militum lacrimis. In-  
 termissa inde omnium aliarum rerum cura, Fabius col-  
 legae funus omni honore laudibusque meritis celebrat.

XXX. Et in Etruria per eosdem dies ab Cn. Ful-  
 vio propraetore res ex sententia gesta; et, praeter in-  
 gentem inlatam populationibus agrorum hosti cladem,  
 pugnatum etiam egregie est: Perusinorumque et Clu-

m) mille ac ducenti Gron. Crev. c. Drak.



sinorum caesa amplius millia tria<sup>n)</sup>), et signa militaria U. c. 457.  
 ad viginti capta. Samnitium agmen, quum per Pelig- a. C. 295.  
 num agrum fugeret, circumventum a Pelignis est. ex  
 millibus quinque ad mille caesi. Magna eius diei, quo  
 in Sentinati agro bellatum, fama est, etiam vero  
 stanti. sed superiecere quidam augendo fidem; qui in  
 hostium exercitu peditum quadraginta millia trecen-  
 tos triginta, equitum sex millia, mille carpentorum  
 scripsere fuisse: scilicet cum Umbris Tuscisque, quos  
 et ipsos pugnae adfuisse. et, ut Romanorum quoque  
 augerent copias, L. Volumnium pro consule ducem  
 consulibus, exercitumque eius legionibus consulum  
 adiiciunt. In pluribus annalibus duorum ea consulum  
 propria victoria est. Volumnius in Samnio interim res  
 gerit, Samnitiumque exercitum, in Tifernum montem  
 compulsum, non deterritus iniquitate loci, fundit fu-  
 gatque. Q. Fabius, Deciano exercitu relicto in Etru-  
 ria, suis legionibus deductis ad urbem, de Gallis Etru-  
 scisque ac Samnitibus triumphavit. milites triumphan-  
 tem secutisunt. Celebrata inconditis carminibus mili-  
 taribus non magis victoria Q. Fabii, quam mors prae-  
 clara P. Decii est: excitataque memoria parentis, ae-  
 quata eventu publico privatoque filii laudibus. Data  
 ex praeda militibus aeris octogeni bini, sagaque et  
 tunicae; praemia illa tempestate militiae haudqua-  
 quam spernenda.

XXXI. His ita rebus gestis, nec in Samnitibus  
 adhuc, nec in Etruria pax erat. nam et, Perusinis au-  
 ctoribus, post deductum ab consule exercitum rebella-  
 tum fuerat: et Samnites praedatum in agrum Vesci-  
 num Formianumque, et parte alia in Aeserninum, quae-  
 que<sup>o)</sup> Vulturno adiacent flumini, descendere. Adver-  
 sus eos Ap. Claudius praetor cum exercitu Deciano  
 missus. Fabius in Etruria rebellante denuo quatuor mil-  
 lia et quingentos Perusinorum occidit: cepit ad mille  
 septingentos quadraginta: qui redempti singuli aeris

n) tria millia Gron. Crev.

o) quae Gron. c. Drak.

U. c. 457. trecentis decem. praeda alia omnis militibus concessa,  
 a. C. 295. Samnitium legiones, quum partim Ap. Claudius prae-  
 tor, partim L. Volumnius pro consule sequeretur, in  
 agrum Stellatam convenerunt. ibi et Samnitium <sup>p)</sup> om-  
 nes considunt, et Appius Volumniusque castra con-  
 iungunt. Pugnatum infestissimis animis, hinc ira sti-  
 mulante adversus rebellantes toties, illinc ab ultima  
 iam dimicantibus spe. Caesa ergo Samnitium sexde-  
 cim millia trecenti, capta duo millia septingenti. ex  
 Romano exercitu cecidere duo millia septingenti. Fe-  
 lix annus bellicis rebus, pestilentia gravis, prodigiis-  
 que sollicitus. nam, et terram multifariam pluisse, et  
 in exercitu Ap. Claudii plerosque fulminibus ictos, nun-  
 ciatum est: librique ob haec aditi. Eo anno Q. Fabius  
 Gurges, consulis filius, aliquot matronas ad populum  
 stupri damnatas pecunia multavit. ex quo multatio  
 aere Veneris aedem, quae prope circum est, facien-  
 dam curavit. Supersunt etiam nunc Samnitium bella,  
 quae continua per quartum iam volumen annumque  
 sextum et quadragesimum, a M. Valerio, A. Cornelio  
 consulibus, qui primi Samnio arma intulerunt, agimus:  
 et ne tot annorum clades utriusque gentis laboresque  
 actos nunc referam, quibus nequiverint tamen dura  
 illa <sup>q)</sup> pectora vinci; proximo anno Samnites in Sen-  
 tinati agro, Pelignis, ad Tifernum, Stellatibus cam-  
 pis, suis ipsi legionibus, mixti alienis, ab quatuor  
 exercitibus, quatuor ducibus Romanis caesi fuerant;  
 imperatorem clarissimum gentis suae amiserant; so-  
 cios belli, Etruscos, Umbros, Gallos, in eadem for-  
 tuna videbant, qua ipsi erant: nec suis, nec externis  
 viribus iam stare poterant; tamen bello non abstine-  
 bant. adeo ne infeliciter quidem defensae libertatis tae-  
 debat: et vinci, quam non tentare victoriam, malebant.  
 Quinam sit ille, quem <sup>r)</sup> pigeat longinquitatis bellorum  
 scribendo legendoque, quae gerentes non fatigaverunt?

p) add. *legiones* Gron. Crev. c. Drak. r) add. *non* Eaed. c. Drak.  
 q) *duriora* Gron. Crev.

U. c. 458.  
a. G. 494.

XXXII. Q. Fabium, P. Decium, L. Postumius Megellus et M. Atilius Regulus consules secuti sunt. Samnium ambobus decreta provincia est; quia tres scriptos hostium exercitus, uno Etruriam, altero populationes Campaniae repeti, tertium tuendis parari finibus, fama erat. Postumium valetudo adversa Romae tenuit: Atilius extemplo profectus, ut in Samnio hostes (ita enim placuerat Patribus) nondum egressos obprimeret. Velut ex composito ibi obvium habuere hostem; ubi et intrare, nedum vastare, ipsi Samnitium agrum prohiberentur: et egredi inde in pacata sociorumque populi Romani fines Samnitem prohiberent. Quum castra castris conlata essent, quod vix Romanus toties victor auderet, ausi Samnites sunt (tantum desperatione ultima temeritatis facit) castra Romana obpugnare. et quamquam non venit ad finem tam audax inceptum, tamen haud omnino vanum fuit. Nebula erat ad multum diei densa adea, ut lucis usum eriperet, non prospectu modo extra vallum adempto, sed propinquo etiam congredientium inter se conspectu. Hac velut latebra insidiarum freti Samnites, vixdum satis certa luce, et eam ipsam premente caligine, ad stationem Romanam in porta segniter agentem vigilias perveniunt. Inproviso obpressis nec animi satis ad resistendum, nec virium fuit. Ab tergo castrorum decumana porta inpetus factus. itaque captum quaestorium: quaestorque ibi L. Opimius Pansa occisus. conclamatum inde ad arma.

XXXIII. Consul, tumultu excitus, cohortes duas sociorum, Lucanam Suessanamque, quae proximae forte erant, tueri praetorium iubet: manipulos legionum principali via inducit. Vixdum satis aptatis armis, in ordines eunt: et clamore magis, quam oculis, hostem noscunt: nec, quantus numerus sit, aestimari potest. Cedunt primo incerti fortunae suae, et hostem introrsum in media castra accipiunt. inde quum consul vociferaretur, *expulsine extra vallum, castra deinde sua obpugnaturi essent*, rogitans; clamore sub-

U. c. 458. lato connisi primo resistunt: deinde inferunt pedem  
 a. C. 294. urgentque, et impulsos semel terrore eodem agunt,  
 quo coeperunt. Expellunt extra portam vallumque.  
 inde pergere ac persequi (quia turbida lux metum circa  
 insidiarum faciebat) non ausi, liberatis castris contenti,  
 receperunt se intra vallum trecentis ferme hostium oc-  
 cisis. Romanorum stationis primae vigilumque et eo-  
 rum, qui circa quaestorium obpressi, periire ad sep-  
 tingentos<sup>s)</sup> triginta. Animos inde Samnitibus non in-  
 felix audacia auxit; et non modo proferre inde castra  
 Romanum, sed ne pabulari quidem per agros suos,  
 patiebantur. retro in pacatum Soranum agrum pabula-  
 tores ibant. Quarum rerum fama, tumultuosior etiam,  
 quam res erant, perlata Romam, coegit L. Postumium  
 consulem, vixdum validum, proficisci ex urbe. Prius  
 tamen, quam exiret, militibus edicto Soram iussis  
 convenire, ipse aedem Victoriae, quam aedilis curu-  
 lis ex multatitia pecunia faciendam curaverat, dedi-  
 cavit. Ita ad exercitum profectus, ab Sora in Samnium  
 ad castra collegae perrexit. inde postquam Samnites,  
 diffisi duobus exercitibus resisti posse, recesserunt;  
 diversi consules ad vastandos agros urbesque obpug-  
 nandas discedunt.

XXXIV. Postumius Milonium obpugnare ador-  
 tus, vi primo atque inpetu, dein<sup>t)</sup>, postquam ea pa-  
 rum procedebant, opere ac vineis demum iniunctis  
 muro cepit. Ibi, capta iam urbe, ab hora quarta us-  
 que ad octavam fere horam omnibus partibus urbis diu  
 incerto eventu pugnatum est. postremo potitur oppi-  
 do Romanus. Samnitium caesi tria millia ducenti: capti  
 quatuor millia septingenti<sup>u)</sup>, praeter praedam aliam.  
 Inte Ferentinum ductae legiones; unde oppidani cum  
 omnibus rebus suis, quae ferriagique potuerunt, nocte  
 per aversam portam silentio excesserunt. Igitur, si-  
 mul advenit consul, primo ita compositus instructus-

s) ducentos Gron. Crev. c. Drak.

u) ducenti Eaed. c. Drak.

t) deinde Gron. Crev.



que moenibus successit, tamquam idem, quod ad Mi- U. c. 458.  
lioniam fuerat, certaminis foret: deinde, ut silentium a. C. 294.  
vastum in urbe, nec arma, nec viros in turribus ac  
muris vidit, avidum invadendi deserta moenia mili-  
tem detinet, ne quam occultam in fraudem incautus  
rueret. Duas turmas sociorum Latini nominis cir-  
cumequitare moenia, atque explorare omnia iubet.  
equites portam unam alteramque eadem regione in  
propinquo patentes conspiciunt, itineribusque iis ve-  
stigia nocturnae hostium fugae. Adequitant deinde  
sensim portis, urbemque ex tuto rectis itineribus per-  
viam conspiciunt: ad consulem referunt, excessum  
urbe; solitudine haud dubia id <sup>x)</sup> perspicuum esse, et  
recentibus vestigiis fugae, ac strage rerum in trepida-  
tione nocturna passim relictarum. [His auditis, con-  
sul ad eam partem urbis, qua adierant equites, cir-  
cumducit agmen: constitutisque haud procul porta sig-  
nis, quinque equites iubet intrare urbem, et, modi-  
cum spatium progressos, tres manere eodem loco, si  
tuta videantur: duos explorata ad se referre. Qui ubi  
redierunt retuleruntque, eo se progressos, unde in  
omnes partes circumspectus esset, longe lateque si-  
lentium ac solitudinem vidisse; extemplo consul co-  
hortes expeditas in urbem induxit; ceteros interim  
castra communire iussit. ingressi milites, refractis fo-  
ribus, paucos graves aetate aut invalidos inveniunt,  
relictaque, quae migratu difficilia essent. Ea direpta;  
et cognitum ex captivis est, communi consilio aliquot  
circa urbes conscisse fugam; suos prima vigilia pro-  
fectos. credere, eandem in aliis urbibus solitudinem  
inventuros. Dictis captivorum fides exstitit: desertis  
oppidis consul potitur.

XXXV. Alteri consuli M. Atilio nequaquam tam  
facile bellum fuit. Quum ad Luceriam duceret legio-  
nes, quam obpugnari ab Samnitibus audierat, ad finem

x) *id*, sublata distinctione post *urbe*, del. Grøn. Crev.

y) *quam* Crev.

U. c. 458. Lucerinum ei hostis obvius fuit. ibi ira vires aequavit. Proelium varium et anceps fuit: tristius tamen eventu Romanis; et quia insueti erant vinci, et quia digredientes magis, quam in ipso certamine, senserunt, quantum in sua parte plus vulnerum ac caedis fuisset. Itaque is terror in castris ortus, qui si pugnantibus cepisset, insignis accepta clades foret. Tum quoque sollicita nox fuit iam invasurum castra Samnitem credentibus, aut prima luce cum victoribus conserendas manus. Minus cladis, ceterum non plus animorum, ad hostes erat. ubi primum inluxit, abire sine certamine cupiunt. Sed via una, et ea ipsa praeter hostes, erat: qua <sup>y</sup>) ingressi, praebuere speciem recta tendentium ad castra obpugnanda. Consul arma capere milites iubet, et sequi se extra vallum; legatis, tribunis, praefectis sociorum imperat, quod apud quemque facto opus est. Omnes adfirmant, *se quidem omnia facturos, sed militum iacere animos. tota nocte inter vulnera et gemitus morientium vigilatum esse. Si ante lucem ad castra ventum foret, tantum pavoris fuisse, ut relicturi signa fuerint: nunc pudore a fuga contineri, alioquin pro victis esse.* Quae ubi consul accepit, sibimet ipsi circumeundos adloquendosque milites ratus, ut ad quosque venerat, cunctantes arma capere increpabat; *Quid cessarent, tergiversarenturque? Hostem in castra venturum, nisi illi extra castra exissent: et pro tentoriis suis pugnatos, si pro vallo nollent. armatis ac dimicantibus dubiam victoriam esse. Qui nudus atque inermis hostem maneat, ei aut mortem, aut servitutem patiendam.* Haec iurganti increpantique respondebant: *Confectos se pugna hesternae esse: nec virium quidquam, nec sanguinis superesse. maiorem multitudinem hostium adparere, quam pridie fuerit.* Inter haec adpropinquabat agmen; et, iam breviori intervallo certiora intuentes, vallum secum portare Samnitem adfirmant, nec dubium esse, quin castra circumvallaturi sint. Tunc, *enimvero, consul, indignum facinus esse, vociferari, tantam contumeliam quam Grev.*

*meliam ignominiamque ab ignavissimo accipi hoste.* U. c. 458.  
*Etiarne circumsedebimur, inquit, in castris, ut fame* a. C. 294.  
*potius per ignominiam, quam ferro, si necesse est, per*  
*virtutem, moriamur? Dii bene verterent, facerentque,*  
*quod se dignum quisque ducerent. Consulem M. Atilium*  
*vel solum, si nemo alius sequatur, iturum adversus ho-*  
*stes: casurumque inter signa Samnitium potius, quam*  
*circumvallari castra Romana videat. Dicta consulis le-*  
*gati, tribunique, et omnes turmae equitum, et cen-*  
*turiones primorum ordinum, adprobavere. Tum pu-*  
*dore victus miles segniter arma capit, segniter e ca-*  
*stris egreditur: longo agmine, nec continenti, moesti*  
*ac prope victi procedunt adversus* 2) *hostem, nec spe,*  
*nec animo certiozem. Itaque simul conspecta sunt Ro-*  
*mana signa, extemplo a primo Samnitium agmine ad*  
*novissimum fremitus perfertur, Exire, id quod timue-*  
*rint, ad impediendum iter Romanos. Nullam inde ne fu-*  
*gae quidem patere viam. illo loco aut cadendum esse, aut,*  
*stratis hostibus, per corpora eorum evadendum.*

XXXVI. In medium a) sarcinas coniciunt; ar-  
 mati suis quisque ordinibus instruunt aciem. Iam exi-  
 guum inter duas acies erat spatium, et stabant exspe-  
 ctantes, dum ab hostibus prius inpetus, prius clamor  
 inciperet. neutris animus est ad pugnandum. Diver-  
 sique integri atque intacti abissent, ni cedenti insta-  
 turum alterum timuissent. sua sponte inter invitost-  
 giversantesque segnis pugna, clamore incerto atque  
 impari, coepit: nec vestigio quisquam movebatur. Tum  
 consul Romanus, ut rem excitaret, equitum paucas  
 turmas extra ordinem inmisit: quorum quum plerique  
 delapsi ex equis essent, et alii turbati; et ab Samni-  
 tium acie ad obprimendos eos, qui ceciderant, et ad  
 suos tuendos ab Romanis procursum est. Inde paullu-  
 lum irritata pugna est, sed aliquanto et inipigre ma-  
 gis, et plures procurrerant Samnites: et turbatus eques  
 sua ipse subsidia territis equis proculcavit. hinc fuga

2) versus Gron.

a) medio Gron. Crev. c. Drak.

U. c. 458. coepta totam avertit aciem Romanam. Iamque in terga  
 a. C. 294<sup>+</sup> fugientium Samnites pugnabant, quum consul, equo  
 praevectus ad portam castrorum, ac statione equitum  
 ibi obposita, edicto<sup>a</sup>que, *ut, quicumque ad vallum tenderet<sup>b</sup>*, sive ille Romanus, sive Samnis esset, pro hoste  
 haberent; haec ipsa minitans, obstitit profuse tenden-  
 tibus suis in castra. Quo pergis, inquit, miles? et hic  
 arma et viros invenies. nec, vivo consule tuo, nisi vi-  
 ctor castra intrabis. Proinde elige, cum cive, an hoste,  
 pugnare malis. Haec dicente consule, equites infestis  
 cuspidibus circumfunduntur, ac peditem in pugnam  
 redire iubent. Non virtus solum consulem, sed fors  
 etiam adiuvit; quod non institerunt Samnites, spa-  
 tiumque circumagendi signa, vertendique aciem a ca-  
 stris in hostem fuit. Tum alii alios hortari, ut repe-  
 terent pugnam: centuriones ab signiferis rapta signa  
 inferre: et ostendere suis, paucos et ordinibus incom-  
 positis effuse venire hostes. Inter haec consul, manus  
 ad coelum adtollens, voce clara, ita ut exaudiretur,  
 templum Iovi Statori vovet, si constitisset a fuga Ro-  
 mana acies, redintegratoque proelio cecidisset vicis-  
 setque legiones Samnitium. Omnes undique adnisi  
 ad restituendam pugnam, duces, milites, peditum  
 equitumque vis: numen etiam Deorum respexisse no-  
 men Romanum visum. adeo facile inclinara res, re-  
 pulsique a castris hostes; mox etiam redacti ad eum  
 locum, in quo commissa pugna erat. Ibi, obiacente  
 sarcinarum cumulo, quas coniecerant in medium, hae-  
 sere inpediti: deinde, ne diriperentur res, orbem ar-  
 matorum sarcinis circumdant. Tum vero eos a fronte  
 urgere pedites, ab tergo circumvecti equites. ita in  
 medio caesi captique. Captivorum numerus fuit sep-  
 tem millium ac ducentorum<sup>c</sup>), qui omnes nudi sub  
 iugum missi. caesos retulere ad quatuor millia octin-  
 gentos. Ne Romanis quidem laeta victoria fuit. recen-  
 sente consule biduo acceptam cladem, amissorum mi-

c) pergeret Gron. Crev.

c) trecentorum Eaed.



litum numerus relatus septem millium ac ducento-<sup>U. c. 453.</sup>  
rum <sup>d)</sup>. Dum haec in Apulia gerebantur, altero exer-<sup>a. C. 294.</sup>  
citu Samnites Interamnam, coloniam Romanam, quae  
via Latina est, occupare conati, urbem non tenuerunt:  
agros depopulati quum praedam aliam inde mixtam ho-  
minum atque pecudum, colonosque captos agerent, in  
victorem incidunt consulem, ab Luceria redeuntem:  
nec praedam solum amittunt, sed ipsi longo atque <sup>e)</sup>  
inpedito agmine incompoti caeduntur. Consul, In-  
teramnam edicto dominis ad res suas noscendas reci-  
piendasque revocatis, et exercitu ibi relicto, comi-  
tiorum caussa Roman est profectus. Cui de triumpho  
agenti negatus honos, et ob amissa tot millia militum,  
et quod captivos sine pactione sub iugum misisset.

XXXVII. Consul alter Postumius, quia in Sam-  
nitibus materia belli deerat, in Etruriam traducto  
exercitu, primum pervastaverat Volsiniensem agrum:  
dein <sup>f)</sup> cum egressis ad tuendos fines haud procul moe-  
nibus ipsorum depugnat. duo millia octingenti <sup>g)</sup> Etru-  
scorum caesi: ceteros propinquitas urbis tutata est. In  
Rusellanum agrum exercitus traductus. ibi non agri  
tantum vastati, sed oppidum etiam expugnatum: capta  
amplius duo millia hominum, minus duo millia circa  
muros caesa. Pax tamen clarior maiorque, quam bel-  
lum in Etruria eo anno fuerat, parta est. Tres vali-  
dissimae urbes, Etruriae capita, Volsinii, Perusia,  
Arretium, pacem petiere; et, vestinentis militum fru-  
mentoque pacti cum consule, ut mitti Romam orato-  
res liceret, inducias in quadraginta annos inpetrave-  
runt. multa praesens quingentum millium aeris in sin-  
gulas civitates inposita. Ob hasce res gestas, consul  
quum triumphum ab senatu, moris magis caussa, quam  
pe inpetrandi, petisset, videretque alios, quod tar-  
lius ab urbe exisset: alios, quod iniussu senatus ex  
Samnio in Etruriam transisset: partim suos inimicos,

d) septem millia trecenti Gron. Crev.

f) deinde Eaed.

e) ac Eaed.

g) CC. Gron. ducenti Crev.

U. c. 458. partim collegae amicos, ad solatium aequatae re-  
 a. C. 294. pulsae sibi quoque negare triumphum: *Non ita, in-*  
*quit, Patres conscripti, vestrae maiestatis meminero,*  
*ut me consulem esse obliviscar. eodem iure imperii, quo*  
*bella gessi, bellis feliciter gestis, Samnio atque Etruria*  
*subactis, victoria et pace parta, triumphabo.* Ita sena-  
 tum reliquit. Inde inter tribunos plebis contentio orta:  
 pars intercessuros, ne novo exemplo triumpharet, aie-  
 bant; pars auxilio se adversus collegas triumphanti  
 futuros. Iactata res ad populum est: vocatusque eo  
 consul, quum M. Horatium, L. Valerium consules, C.  
 Marcium Rutilum nuper, patrem eius, qui tunc censor  
 esset, non ex auctoritate senatus, sed iussu populi, tri-  
 umphasse diceret; adiciebat, *se quoque laturum fuisse*  
*ad populum, ni sciret, mancipia nobilium tribunos ple-*  
*bis legem inpedituros: voluntatem sibi ac favorem consen-*  
*tientis populi pro omnibus iussis esse, ac futura<sup>h</sup>).* Po-  
 steroque die auxilio tribunorum plebis trium, adver-  
 sus intercessionem septem tribunorum et consensum  
 senatus, celebrante populo diem, triumphavit. Ethu-  
 ius anni parum constans memoria est. Postumium, au-  
 ctor est Claudius, in Samnio captis aliquot urbibus, in  
 Apulia fusum fugatumque, saucium ipsum cum pau-  
 cis Luceriam compulsum: ab Atilio in Etruria res ge-  
 stas, eumque triumphasse. Fabius, ambo <sup>i</sup>) consules  
 in Samnio et ad Luceriam res gessisse, scribit, tra-  
 ductumque in Etruriam exercitum (sed ab utro consule  
 non adiecit) et ad Luceriam utrimque multos occisos  
 inque ea pugna Iovis Statoris aedem votam, ut Ro-  
 mulus ante voverat: sed fanum tantum, id est locus,  
 templo effatus, sacratus <sup>k</sup>) fuerat. Ceterum, hoc de-  
 mum anno ut aedem etiam fieri senatus iuberet, bis  
 eiusdem voti damnata republica <sup>l</sup>), in religionem venit.

XXXVIII. Sequitur hunc annum et consul in-  
 signis L. Papirius Cursor, qua paterna gloria, qua sua,

<sup>h</sup>) futuram Gron. Crev.

<sup>k</sup>) iam sacratus Eaed.

<sup>i</sup>) ambos Eaed.

<sup>l</sup>) respublica omisso conunate Eaed. c. Drak.

et bellum ingens victoriaque, quantam de Samnitibus nemo ad eam diem, praeter L. Papirium patrem consulis, pepererat: et forte eodem conatu adparatuque omni opulentia insignium armorum bellum adornaverant: et Deorum etiam adhibuerant opes, ritu quodam sacramenti vetusto velut initiatis militibus, delectu per omne Samnium habito nova lege: ut, qui iuniorum non convenisset ad imperatorium edictum, quique iniussu abisset, caput Iovi sacratum esset. Tum exercitus omnis Aquiloniam est indictus. ad quadraginta millia militum, quod roboris in Samnio erat, convenerunt. Ibi mediis fere castris locus est conceptus cratibus pluteisque, et linteis contextus, patens ducentos maxime pedes in omnes pariter partes. Ibi ex libro vetere linteo lecto sacrificatum, sacerdote Ovio Pactio quodam, homine magno natu, qui se id sacrum petere adfirmabat ex vetusta Samnitium religione; qua quondam usi maiores eorum fuissent, quum adimendae Etruscis Capuae clandestinum cepissent consilium. Sacrificio perfecto, per viatorem imperator adciri iubebat nobilissimum quemque genere factisque. singuli introducebantur. Erat quum alius adparatus sacri, qui perfundere religione animum posset; tum in loco circa omni contexto arae in medio, victimaeque circa caesae, et circumstantes centuriones strictis gladiis. Admovebatur altaribus miles, magis ut victima, quam ut sacri particeps: adigebaturque iureiurando, quae visa auditaque in eo loco essent, non enuntiaturum. Dein iurare cogeatur diro quodam carmine, in execrationem capitis familiaeque et stirpis composito, nisi isset in proelium, quo imperatores duxissent: et si aut ipse ex acie fugisset, aut, si quem fugientem vidisset, non extemplo occidisset. Id primo quidam abnuentes iuratuos se, obtruncati circa altaria sunt: iacentes deinde inter stragem victimarum documento ceteris fuere, ne abnuerent. Primoribus Samnitium ea detestatione obstrictis, decem nominatis ab impera-

U. c. 459.  
a. C. 293.

U. c. 459. tore, eis dictum, ut vir virum legerent, donec sex-  
 a. C. 293. decim millium numerum confecissent. ea legio linteata  
 ab integumento consepti, quo sacrata nobilitas erat,  
 adpellata est. His arma insignia data, et cristatae ga-  
 leae, ut inter ceteros eminent. Paulo plus viginti  
 millium alius exercitus fuit, nec corporum specie, nec  
 gloria belli, nec adparatu linteatae legionis dispar. hic  
 hominum numerus, quod roboris erat, ad Aquilo-  
 niam consedit.

XXXIX. Consules profecti ab urbe: prior Sp. Carvilius, cui veteres legiones, quas M. Atilius, superioris anni consul, in agro Interamnati reliquerat, decretae erant, cum eis in Samnium profectus, dum hostes, operati superstitionibus, concilia secreta agunt, Amiternum oppidum de Samnitibus vi cepit. Caesa ibi millia hominum duo ferme atque octingenti; capta quatuor millia ducenti septuaginta. Papirius, novo exercitu (ita decretum erat) scripto, Duroniam urbem expugnavit. minus, quam collega, cepit hominum, plus aliquanto occidit. praeda opulenta utrobique est parta. Inde pervagati Samnium consules, maxime depopulato Atinate agro, Carvilius ad Cominium, Papirius ad Aquiloniam (ubi summa rei Samnitium erat) pervenit. ibi aliquamdiu nec cessatum ab armis est, neque naviter pugnatum: lacessendo quietos, resistentibus cedendo, comminandoque magis, quam inferendo pugnam, dies absumebatur. quod quum inciperetur, remittereturque, omnium rerum etiam parvarum eventus proferebatur in dies. Altera Romana castra viginti millium spatio aberant: et absentis collegae consilia omnibus gerendis intererant rebus: intentiorque Carvilius, quo maiore discrimine res vertebatur, in Aquiloniam, quam ad Cominium, quod obsidebat, erat. L. Papirius, iam per omnia ad dimicandum satis paratus, nuncium ad collegam mittit; *sibi in animo esse, postero die, si per auspicia liceret, configere cum hoste. Opus esse, et illum, quanta maxima vi posset, Comi-*



*nium obpugnare, ne quid laxamenti sit Samnitibus ad subsidia Aquiloniam mittenda. Diem ad proficiscendum nuncius habuit: nocte rediit, adprobare collegam consulta referens. Papirius, nuncio misso, extemplo concionem habuit; multa de universo genere belli, multa de praesenti hostium adparatu, vana magis specie, quam efficaci ad eventum, disseruit. Non enim cristas vulnera facere; et per picta atque aurata scuta transire Romanum pilum: et candore tunicarum fulgentem aciem, ubi res ferro geratur, cruentari. Auream olim atque argenteam Samnitium aciem a parente suo occidione occisam: spoliaque ea honestiora victori hosti, quam ipsis arma, fuisse. Datum hoc forsani nominifamiliaeque suae, ut adversus maximos conatus Samnitium obponerentur duces; spoliaque ea referrent, quae insignia publicis etiam locis decorandis essent. Deos immortales adesse propter toties petita foedera, toties ruptatum, si qua coniectura mentis divinae sit, nulli umquam exercitui fuisse infestiores, quam qui, nefando sacro mixta hominum pecudumque caede respersus, ancipiti Deum irae devotus, hinc foederum cum Romanis ictorum testes Deos, hinc iurisiurandi adversus foedera suscepti execrationes horrens, invitus iuraverit, oderit sacramentum, uno tempore Deos, cives, hostes metuat.*

XL. Haec, comperta perfugarum indicii, quum apud infensos iam sua sponte milites disseruisset, simul divinae humanaeque spei pleni, clamore consentienti pugnam poscunt; poenitet in posterum diem dilatum certamen: moram diei noctisque oderunt. Tertia vigilia noctis, iam relatis literis a collega, Papirius silentio surgit, et pullarium in auspicium mittit. Nullum erat genus hominum in castris intactum cupiditate pugnae: summi infimique aequae intenti erant: dux militum, miles ducis ardorem spectabat. Is ardor omnium etiam ad eos, qui auspicio intererant, pervenit. nam, quum pulli non pascerentur, pullarius, auspicium mentiri ausus, tripudium solistimum con-

U. c. 459. a. C. 295. sulī nunciavit. Consul laetus auspiciū egregium esse, et Deis auctoribus rem gesturos, pronunciat; signumque pugnae proponit. Exeunti iam forte in aciem nunciat perfuga, viginti cohortes Samnitium (quadringenariae ferme erant) Cominium profectas. quod ne ignoraret collega, extemplo nūncium mittit: ipse signa ocius proferri iubet, subsidiaque suis quaeque locis, et praefectos subsidiis adtribuerat. Dextro cornu L. Volumnium, sinistro L. Scipionem, equitibus legatos alios, Caios Caediciū et Trebonium, praefecit. Sp. Nautium mulos, detractis clitellis, cum cohortibus alariis<sup>m)</sup> in tumultum conspectum propere circumducere iubet, atque inde inter ipsam dimicationem, quanto maxime posset, moto pulvere ostendere. Dum his intentus imperator erat, altercatio inter pullarios orta de auspicio eius diei, exauditaque ab equitibus Romanis: qui, rem haud spernendam rati, Sp. Papirio fratris filio consulis, ambigi de auspicio, renunciaverunt. Iuvenis, ante doctrinam Deos spernentem natus, rem inquisitam, ne quid incompertum deferret ad consulem, detulit. Cui ille, *Tu quidem macte virtute diligentiaque esto: ceterum qui auspicio adest, si quid falsi nunciat, in semet ipsum religionem recipit. Mihi quidem tripudium nunciatum, populo Romano exercituique egregium auspiciū est.* Centurionibus deinde imperavit, ut pullarios inter prima signa constituerent. Promovent et Samnites signa; insequitur acies ornata armataque, ut hostium quoque magnificum spectaculum esset. Priusquam clamor tolleretur, concurreretque, emissio temere pilo ictus pullarius ante signa cecidit. quod ubi consuli nunciatum est, *Dii in proelio sunt*, inquit; *habet poenam noxium caput.* Ante consulem haec dicentem corvus voce clara obcinuit: quo laetus augurio consul, adfirmans numquam humanis rebus magis praesentes interfuisse Deos, signa canere, et clamorem tolli iussit.

<sup>m)</sup> alaribus Gron. Crev.

**XLI.** Proelium commissum atrox, ceterum longe <sup>U. c. 459</sup> disparibus animis. Romanos ira, spes, ardor certami- <sup>a. C. 293</sup> nis, avidos hostium sanguinis in proelium rapit: Sam-  
nitium magnam partem necessitas ac religio invitos  
magis resistere, quam inferre pugnam, cogit. nec  
sustinuissent primum clamorem atque inpetum Roma-  
norum, per aliquot iam annos vinci adsueti, ni po-  
tentior alius metus insidens pectoribus a fuga retine-  
ret. Quippe in oculis erat omnis ille occulti paratus  
sacri, et armati sacerdotes, et promiscua hominum  
pecudumque strages, et respersae fando nefandoque  
sanguine arae, et dira exsecratio, ac furiale carmen,  
detestandae familiae stirpique compositum. his vincu-  
lis fugae obstricti stabant, civem magis, quam hostem,  
timentes. Instare Romanus a cornu utroque, a media  
acie, et cadere Deorum hominumque adtonitos metu.  
repugnatur segniter, ut ab iis, quos timor moraretur  
a fuga. Iam prope ad signa caedes pervenerat,  
quum ex transverso pulvis, velut ingentis agminis in-  
cessus motus, adparuit. Sp. Nautius (Octavium Metium  
quidam eum tradunt) dux alaribus cohortibus erat.  
pulverem maiorem, quam pro numero, excitabant:  
insidentes mulis calones frondosos ramos per terram  
trahebant: arma signaque per turbidam lucem in primo  
adparebant: post altior densiorque pulvis equitum  
speciem cogentium agmen dabat. Fefellitque non Sam-  
nites modo, sed etiam Romanos: et consul adfirma-  
vit errorem; clamitans inter prima signa, ita ut vox  
etiam ad hostes accideret, *captum Cominium, victo-  
rem collegam adesse; adniterentur vincere prius, quam  
gloria alterius exercitus fieret.* Haec insidens equo. inde  
tribunis centurionibusque imperat, ut viam <sup>n)</sup> equiti-  
bus patefaciant. Ipse Trebonio Caedicioque praedixe-  
rat, ut, ubi se cuspidem erectam quatientem vidissent,  
quanta maxima vi possent, concitarent equites in ho-  
stem. Ad nutum omnia, ut ex ante praeparato, fiunt.

n) *vias* Gron. Crev.

U. c. 459. panduntur inter ordines viae: provolat eques, atque  
 a. C. 293. infestis cuspidibus in medium agmen hostium ruit:  
 perrumpitque ordines, quacumque inpetum dedit. instant Volumnius et Scipio, et perculsos sternunt. Tum, iam Deorum hominumque victa vi, funduntur linteatæ cohortes: pariter iurati iniuratique fugiunt, nec quemquam, praeter hostes, metuunt. Peditum agmen, quod superfuit pugnae, in castra ad Aquiloniam compulsus est. nobilitas equitesque Bovianum perfrugerunt: equites eques sequitur, peditem pedes: ac diversa cornua, dextrum ad castra Samnitium, laevum ad urbem tendit. Prior aliquanto Volumnius castra cepit: ad urbem Scipioni maiore resistitur vi; non quia plus animi victis est <sup>o)</sup>, sed melius muri, quam vallum, armatos arcent. inde lapidibus propulsant hostem. Scipio, nisi in primo pavore, priusquam conlegerentur animi, transacta res esset, lentiolem fore munitæ urbis obpugnationem ratus, interrogat milites, *Satin' aequo animo paterentur, ab altero cornu castra capta esse; se victores pelli a portis urbis?* Reclamantibus universis, primus ipse, scuto super caput elato, pergit ad portam: secuti alii, testudine facta, in urbem perrumpunt: detubatisque Samnitibus, qui circa portam erant, muros occupavere. penetrare in <sup>p)</sup> interiora urbis, quia pauci admodum erant, non audent.

XLII. Haec primo ignorare consul, et intentus recipiendo exercitui esse: iam enim praeceptis in occasum sol erat, et adpetens nox periculosa et suspecta omnia etiam victoribus faciebat. Progressus longius ab dextra castra capta videt: ab laeva clamorem in urbe mixtum pugnantium ac paventium fremitu esse. et tum forte certamen ad portam erat. Advectus deinde equo propius, ut suos in muris videt, nec iam integri quidquam esse, quoniam temeritate paucorum magnæ rei parta occasio esset, adciri, quas receperat, copias, signaque in urbem inferri iussit. Ingressi proxima ex

<sup>o)</sup> *esset* Gron. Crev.

<sup>p)</sup> *in* del. Eaed.



parte, quia nox adpropinquabat, quiescere. nocte op- U. c. 459.  
 pidum ab hostibus desertum est. Caesa illo die ad a. C. 293.  
 Aquiloniam Samnitium millia triginta trecenti quadra-  
 ginta: capta tria millia octingenti et septuaginta: signa  
 militaria nonaginta septem. Ceterum illud memoriae  
 traditur, non ferme alium ducem laetiozem in acie vi-  
 sum, seu suapte ingenio, seu fiducia bene gerundae  
 rei. Ab eodem robore animi neque controverso auspi-  
 cio revocari a proelio potuit; et in ipso discrimine,  
 quo templa Diis immortalibus voveri mos erat, vove-  
 rat Iovi Victori, si legiones hostium fudisset, pocil-  
 lum mulsi prius, quam temetum biberet, sese factu-  
 rum. id votum Diis cordi fuit: et auspicia in bonum  
 verterunt.

XLIII. Eadem fortuna ab altero consule ad Co-  
 minium gesta res. Prima luce, ad moenia omnibus  
 copiis admotis, corona cinxit urbem; subsidiaque fir-  
 ma, ne qua eruptio fieret, portis obposuit. Iam sig-  
 num dantem eum nuncius a collega trepidus de viginti  
 cohortium adventu et ab inpetu moratus est,<sup>1</sup> et par-  
 tem copiarum revocare instructam intentamque ad ob-  
 pugnandum coegit. D. Brutum Scaevam legatum cum  
 legione prima et decem <sup>q)</sup> cohortibus alariis <sup>r)</sup> equi-  
 tatuque ire adversus subsidium hostium iussit: quo-  
 cumque in loco fuisset obvius, obsisteret ac moraret-  
 tur; manumque, si forte ita res posceret, conferret:  
 modo ne ad Cominium eae copiae admoventi possent.  
 Ipse scalas ferri ad muros ab omni parte urbis iussit, ac  
 testudine ad portas successit. simul et refringebantur  
 portae, et vis undique in muros fiebat. Samnites, si-  
 cut, antequam in muris viderent armatos, satis animi  
 habuerunt ad prohibendos urbis aditu hostes; ita, post-  
 quam iam non ex intervallo nec missilibus, sed comi-  
 nus gerebatur res; et, qui aegre successerant ex plano  
 in muros, loco, quem magis timuerant, victo, facile  
 in hostem inparem ex aequo pugnabant; relictis tur-

q) viginti Gron. Crev.

r) alaribus Eaed.

U. c. 459-  
a. C. 293. ribus murisque, in forum omnes compulsi, paullisper inde tentaverunt extremam pugnae fortunam. Deinde, abiectis armis, ad undecim <sup>s)</sup> millia hominum et quadringenti in fidem consulis venerunt. caesa ad quatuor millia octingenti <sup>t)</sup> octoginta. Sic ad Cominium, sic ad Aquiloniam gesta res. Inde medio inter duas urbes spatio, ubi tertia exspectata erat pugna, hostes non inventi. septem millia passuum quum abessent a Cominio, revocati ab suis neutri proelio obcurrerunt. Primis ferme tenebris, quum in conspectu iam castra, iam Aquiloniam habuissent, clamor eos utrimque par accidens sustinuit: deinde e regione castrorum, quae incensa ab Romanis erant, flamma late fusa certioris cladis indicio progredi longius prohibuit. Eo ipso loco prope temere sub armis strati passim inquietum omne tempus noctis, exspectando timendoque lucem, egere. prima luce, incerti quam in partem intenderent iter, repente in fugam consternantur, conspecti ab equitibus: qui, egressos nocte ab oppido Samnites persecuti, viderant multitudinem, non vallo, non stationibus firmatam. Conspecta et ex muris Aquiloniae ea multitudo erat. iamque etiam legionariae cohortes sequebantur. Ceterum nec pedes fugientes persequi potuit: et ab equite novissimi agminis ducenti ferme et octoginta interfecti. Arma multa pavidi ac signa militaria duodeviginti reliquere. alio agmine incolumi, ut ex tanta trepidatione, Bovianum perventum est.

XLIV. Laetitia utriusque exercitus Romani auxit et ab altera parte feliciter gesta res. uterque ex alterius sententia consul captum oppidum diripiendum militi dedit; exhaustis deinde tectis ignem iniecit: eodemque die Aquilonia et Cominium deflagraverunt. et consules, cum gratulatione mutua legionum suarum, castra coniunxerunt. In conspectu duorum exercituum et Carvilius suos pro cuiusque merito laudavit donavitque; et Papirius, apud quem multiplex in acie, circa

<sup>s)</sup> quindecim Gron. Crev.

<sup>s)</sup> trecenti Eaed. c. Drak.

U. c. 459.  
a. C. 295.

castra, circa urbem, fuerat certamen, Sp. Nautium, Sp. Papirium, fratris filium, et quatuor centuriones, manipulumque hastatorum, armillis aureisque coronis donavit: Nautium propter expeditionem, qua magni agminis modo terruerat hostes: iuvenem Papirium propter navatam cum equitatu et in proelio operam, et nocte, qua fugam infestam Samnitibus ab Aquilonia clam egressis fecit: centuriones militesque, quia primi portam murumque Aquiloniae ceperant. equites omnes, ob insignem multis locis operam, corniculis armillisque argenteis donat. Consilium inde habitum, quum iam tempus esset deducundi ab Samnio exercitus, aut utriusque, aut certe alterius. Optimum visum, quo magis fractae res Samnitium essent, eo pertinacius et infestius agere cetera et persequi: ut perdomitum Samnium insequentibus consulibus tradi posset. Quando iam nullus esset hostium exercitus, qui signis conlatis dimicaturus videretur, unum superesse belli genus, urbium obpugnationes; quarum per excidia militem locupletare praeda, et hostem pro aris ac focus dimicantem conficere possent. Itaque literis missis ad senatum populumque Romanum de rebus ab se gestis, diversi, Papirius ad Saepinum, Carvilius ad Volanam obpugnandam ducunt.

**XLV.** Literae consulum ingenti laetitia et in curia et in concione auditae; et quadridui supplicatione publicum gaudium privatis studiis celebratum est. nec populo Romano magna solum, sed peropportuna etiam, ea victoria fuit; quia per idem forte tempus rebellasse Etruscos adlatum est. Subibat cogitatio animum, quoniam modo tolerabilis futura Etruria fuisset, si quid in Samnio adversi venisset; quae, coniuratione Samnitium erecta, quoniam ambo consules omnisque Romana vis aversa in Samnium esset, occupationem populi Romani pro occasione rebellandi habuisset. Legationes sociorum, a M. Atilio praetore in senatum introductae, querebantur, uri et vastari agros a finiti-

U. c. 459. mis Etruscis, quod desciscere a populo Romano nol-  
 a. C. 295. lent: obtestabanturque Patres conscriptos, ut se a vi  
 atque iniuria communium hostium tutarentur. Respon-  
 sum legatis, *curae senatui futurum, ne socios fidei suae*  
*poeniteret: Etruscorum prope diem eandem fortunam,*  
*quam Samnitium, fore.* Segnius tamen, quod ad Etru-  
 riam adtinebat, acta res esset, ni Faliscos quoque,  
 qui per multos annos in amicitia fuerant, adlatum fo-  
 ret, arma Etruscis iunxisse. Huius propinquitas po-  
 puli acuit curam Patribus, ut feciales mittendos ad res  
 repetendas censerent. quibus non redditis, ex aucto-  
 ritate Patrum iussu populi bellum Faliscis indictum est:  
 iussuque consules sortiri, uter ex Samnio in Etruriam  
 cum exercitu transiret. Iam Carvilius Volanam, et  
 Palumbinum, et Herculaneum ex Samnitibus ceperat:  
 Volanam intra paucos dies, Palumbinum eodem, quo  
 ad muros accessit. Ad Herculaneum bis etiam signis  
 conlatis ancipiti proelio, et cum maiore sua, quam  
 hostium, iactura dimicavit. Castris deinde positis, moe-  
 nibus hostem inclusit. obpugnatum oppidum captum-  
 que. In his tribus urbibus capta aut caesa ad decem  
 millia hominum: ita ut parvo admodum plures cape-  
 rentur. Sortientibus provincias consulibus, Etruria  
 Carvilio evenit secundum vota militum, qui vim fri-  
 goris iam in Samnio non patiebantur. Papirio ad Sae-  
 pinum maior vis hostium restitit <sup>u)</sup>. saepe in acie, saepe  
 in agmine, saepe circa ipsam urbem adversus erup-  
 tiones hostium pugnatum: neque obsidio, neque bel-  
 lum ex aequo erat: non enim muris magis se Samnites,  
 quam armis ac viris moenia, tutabantur. Tandem pug-  
 nando in obsidionem iustam coegit hostes: obsiden-  
 doque vi atque operibus urbem expugnavit. itaque ab  
 ira plus caedis editum, capta urbe: septem millia qua-  
 dringenti caesi: capta minus tria millia hominum:  
 praeda, quae plurima fuit, congestis Samnitium rebus  
 urbes in paucas, militi concessa est.

u) resistit Gron. Crev.



**XLVI.** Nives iam omnia oppleverant, nec durari <sup>U. c. 459.</sup>  
 extra tecta poterat; itaque consul exercitum de Sam- <sup>a. C. 293.</sup>  
 nio deduxit. Venienti Romam triumphus omnium con-  
 sensu est delatus. triumphavit in magistratu, insigni,  
 ut illorum temporum habitus erat, triumpho. Pedites  
 equitesque insignes donis transiere, ac transvecti sunt:  
 multae civicae coronae, vallaresque, ac murales con-  
 spectae. Inspectata spolia Samnitium: et decore ac  
 pulchritudine paternis spoliis, quae nota frequenti pu-  
 blicorum ornatu locorum erant, comparabantur. nobi-  
 les aliquot captivi, clari suis patrumque factis, ducti.  
 Aeris gravis transvecta vicies centena et ad triginta tria  
 millia <sup>x</sup>). id aes redactum ex captivis dicebatur. ar-  
 genti, quod captum ex urbibus erat, pondo mille tre-  
 centa triginta. omne aes argentumque in aerarium con-  
 ditum. Militibus nihil datum ex praeda est. auctaque  
 ea invidia est ad plebem, quod tributum etiam in sti-  
 pendium militum conlatum est: quum, si spreta glo-  
 ria fuisset captivae pecuniae in aerarium inlatae, et  
 militi tum dari ex praeda, et stipendium militare prae-  
 stari potuisset. Aedem Quirini, quam in ipsa dimica-  
 tione votam apud neminem veterem auctorem invenio,  
 (neque, hercule, tam exiguo tempore perficere potuis-  
 set) ab dictatore patre votam, filius consul dedicavit,  
 exornavitque hostium spoliis. quorum tanta multitudo  
 fuit, ut non templum tantum forumque his ornaretur;  
 sed sociis etiam colonisque finitimis, ad templorum lo-  
 corumque publicorum ornatum, dividerentur. A trium-  
 pho exercitum in agrum Vescinum, quia regio ea in-  
 festata ab Samnitibus erat, hibernatum duxit. Inter haec  
 Carvilius consul, in Etruria Troilium primum obpug-  
 nare adortus, quadringentos septuaginta ditissimos,  
 pecunia grandi pactos, ut abire inde liceret, dimisit:  
 ceteram multitudinem oppidumque ipsum vicepit. inde  
 quinque castella, locis sita munitis, expugnavit. Caesa

<sup>x</sup>) *vicies centies millies et quingenta triginta tria millia* Gron.  
 Crev.

U. c. 459. ibi hostium duo millia quadringenti; minus duo mil-  
 a. C. 293. lia capti. Et Faliscis pacem petentibus annuas in-  
 ducias dedit, pactus centum millia gravis aeris, et  
 stipendium eius anni militibus. His rebus actis ad tri-  
 umphum decessit, ut minus clarum de Samnitibus,  
 quam collegae triumphus fuerat, ita cumulo Etrusci  
 belli aequatum. Aeris gravis tulit in aerarium trecenta  
 octoginta <sup>y)</sup> millia: de reliquo aere aedem Fortis For-  
 tunae de manubiis faciendam locavit, prope aedem  
 eius <sup>z)</sup> Deae ab rege Ser. Tullio dedicatam. et militi-  
 bus ex praeda centenos binos asses, et alterum tan-  
 tum centurionibus atque equitibus (malignitate colle-  
 gae gratius accipientibus munus) divisit. Favor consu-  
 lis tutatus ad populum est L. Postumium legatum eius:  
 qui dicta die a M. Cantio <sup>a)</sup> tribuno plebis, fugerat in  
 legationem (ut fama ferebat) populi iudicium: iacta-  
 rique magis, quam peragi, accusatio eius poterat.

XLVII. Exacto iam anno, novi tribuni plebis  
 magistratum inierant: iisque ipsis, quia vitio creati  
 erant, quinque post dies alii subfecti. Lustrum con-  
 ditum eo anno est a P. Cornelio Arvina, C. Marcio  
 Rutilo censoribus: censa capitum millia ducenta se-  
 xaginta duo trecenta viginti duo. Censores vicesimi  
 sexti a primis censoribus; lustrum undevicesimum fuit.  
 Eodem anno coronati primum, ob res bello bene ge-  
 stas, ludos Romanos spectaverunt; palmaeque tum  
 primum, translato e Graecia more, victoribus datae.  
 Eodem anno ab aedilibus curulibus, qui eos ludos fe-  
 cerunt, damnatis aliquot pecuariis, via a Martis silice  
 ad Bovillas perstrata est. Comitia consularia L. Papi-  
 rius habuit: creavit consules Q. Fabium Maximi filium  
 Gurgitem et D. Iunium Brutum Scaevam. ipse Papi-  
 rius praetor factus. Multis rebus laetus annus vix ad  
 solatium unius mali, pestilentiae urentis simul urbem  
 atque agros subfecit; portentoque iam similis clades

y) *nonaginta* Gron. Crev.

z) *eidem* Eaed.

a) *Scantio* Eaed.

erat. et libri aditi, quinam finis, aut quod remedium eius mali ab Diis daretur. Inventum in libris, Aesculapium ab Epidauro Romam arcessendum. neque eo anno, quia bello occupati consules erant, quidquam de ea re actum: praeterquam quod unum diem Aesculapio supplicatio habita est.

## EPITOME LIBRI XI.

Quum Fabius Gurges consul male adversus 1) Samnites pugnasset, et senatus de removendo eo ab exercitu ageret, Fabius Maximus pater, deprecatus hanc filii 2) ignominiam, eo maxime senatum movit, quod iturum se filio legatum pollicitus est, idque praestitit. eius 3) consiliis et opera filius consul adiutus, caesis Samnitibus, triumphavit. C. Pontium, imperatorem Samnitium, ductum in triumpho securi percussit. Quum civitas pestilentia laboraret, missi legati 4), ut Aesculapii signum Romam ab Epidauro transferrent, anguem, qui se in navem eorum contulerat, in quo ipsum numen esse constabat, deportavere: eoque in insulam Tiberis egresso, eodem loco aedes 5) Aesculapio consecrata est 6). L. Postumius consularis, quoniam, quum exercitui praesset, opera militum in agro suo usus erat, damnatus est. Cum Samnitibus pacem petentibus foedus quarto renovatum est. Curius Dentatus consul, Samnitibus caesis, et Sabinis, qui rebellaverant, victis, et in deditionem acceptis, bis in eodem magistratu triumphavit. Coloniae deductae sunt, Castrum, Sena, Hadria. Triumviri capitales tunc primum creati sunt. Censu acto, lustrum conditum est 7). censa sunt civium capita ducenta septuaginta duo 8) millia. Plebs propter aes alienum, post graves et longas seditiones, ad ultimum secessit in Ianiculum: unde a Q. Hortensio dictatore deducta est; isque in ipso magistratu decessit. Res praeterea contra Volsinienses gestas continet: item adversus Lucanos, contra quos auxilium Thurinis ferre placuerat.

1) adversum Gron. Crev.

2) sibi Eaed.

3) atque eius Crev.

4) missi legatis Gron. Crev.

5) sedes Eaed.

6) constituta est Crev.

7) Censu actus est: lustrum conditum Ead.

8) tria Gron. Crev.

## EPITOME LIBRI XII.

Quum legati Romanorum a Gallis Senonibus interfecti essent, bello ob id Gallis indicto, L. Caecilius praetor cum legionibus ab iis caesus est. Quum a Tarentinis classis Romana direpta esset, duumviro, qui praeerat classi, occiso, legati, ad eos a senatu, ut de iis iniuriis quererentur, missi, pulsati sunt. ob id bellum iis indictum est. Samnites defece-  
runt. Adversus eos, et Lucanos, et Bruttios, et Etruscos aliquot proeliis a compluribus ducibus bene pugnatum est. Pyrrhus Epirotarum rex, ut auxilium ferret Tarentinis, in Italiam venit. Quum in praesidium Rheginorum legio Campana cum praefecto Decio Iubellio missa esset, occisis Rheginis Rhegium occupavit.

## EPITOME LIBRI XIII.

Valerius Laevinus consul parum prospere adversus Pyrrhum pugnavit, elephantorum maxime inusitata facie territis militibus. Post id 1) proelium cum corpora Romanorum, qui in acie ceciderant, Pyrrhus inspiceret, omnia versa in hostem invenit, populabundusque ad urbem Romam processit. C. Fabricius, missus ad eum a senatu, ut de redimendis captivis ageret, frustra, ut patriam desereret, a rege tentatus est. captivi sine pretio remissi sunt. Cineas, legatus a Pyrrho ad senatum missus, petiit, ut componendae pacis causa rex in urbem reciperetur. de qua re quum ad frequentiores senatum referri placuisset, Ap. Claudius, qui propter valetudinem 2) oculorum iamdiu consiliis publicis se abstinuerat, venit in curiam, et sententia sua tenuit, ut id Pyrrho negaretur. Cn. Domitius censor primus ex plebe lastrum condidit. censa sunt civium capita ducenta septuaginta octo millia, ducenta viginti duo. Iterum adversus Pyrrhum dubio eventu pugnatum est. Cum Karthaginiensibus quartum 3) foedus renovatum est. Quum C. Fabricio consuli is, qui ad eum a Pyrrho transfugerat, polliceretur, se regi venenum daturum, cum indicio ad regem remissus est. Res praeterea contra Etruscos, Lucanos, Bruttios, et Samnites prospere gestas continet.

1) id del. Gron.

5) quarto Gron. Crev.

2) in valetudinem Crev.



## EPITOME LIBRI XIV.

**P**yrrius in Siciliam traiecit. Quum inter alia prodigia fulmine deiectum esset in Capitolio Iovis signum, caput eius per aruspices inventum est. Curius Dentatus, quum delectum haberet, eius, qui citatus non responderat, bona prius vendidit. Pyrrhum iterum ex Sicilia in Italiam reversum vicit, et Italia expulit. Fabricius censor P. Cornelium Rufinum]consularem senatu movit, quod is decem pondo argenti 1) facti haberet. Lustrum a censoribus condito, censa sunt capita civium ducenta septuaginta unum millia, ducenta viginti quatuor. Cum Ptolemaeo Aegypti rege societas iuncta est. Sextilia virgo Vestalis, damnata incesti, viva defossa est. Coloniae deductae sunt Posidonia et Cosa 2). Karthaginensium classis auxilio Tarentinis venit. quo facto ab iis foedus violatum est. Res praeterea contra Lucanos, Samnites, et Bruttios feliciter gestas, et Pyrrhi regis mortem continet.

1) *argenti pondo Gron. Crev.*

2) *Cossa Eaed.*

## EPITOME LIBRI XV.

**V**ictis Tarentinis pax et libertas data est. Legio Campana, quae Rhegium occupaverat, obsessa, deditione facta, securi percussa est. Quum legatos Apolloniatium ad senatum missos quidam iuvenes pulsassent, dediti sunt Apolloniatibus. Picentibus victis pax data est 1). coloniae deductae, Ariminum in Piceno, Beneventum in Samnio. Tunc primum populus Romanus argento uti coepit. Umbri et Sallentini victi in deditionem accepti sunt. Quaestorum numerus amplius est, ut essent octo.

1) *est del. Gron. Crev.*

## EPITOME LIBRI XVI.

Origo Karthaginiensium et primordia urbis eorum 1) referuntur; contra quos et Hieronem regem Syracusanorum auxilium Mamertinis ferendum censuit senatus, quum de ea re inter suadentes, ut id fieret, dissuadentesque contentio fuisset. Transgressis 2) tum primum mare equitibus Romanis, adversus Hieronem saepius benepugnatum. Petenti pax data est. Lustrum a censoribus conditum est 3). censa sunt civium capita ducenta octoginta 4) duo millia, ducenta triginta 5) quatuor. D. Iunius Brutus munus gladiatorium in honorem defuncti patris edidit primus. Colonia Aesernia deducta est. Res praeterea contra Poenos et Vulsinios prospere gestas continet.

1) eorum del. Gron Crev.

2) transgressisque Eaed.

3) est del. Eaed.

4) nonaginta Eaed.

5) viginti Eaed.

## EPITOME LIBRI XVII.

Cn. Cornelius consul, a classe Punica circumventus, et per fraudem velut in conloquium evocatus, captus est. C. Duilius consul adversus classem Poenorum prospere pugnavit, primusque omnium Romanorum ducum navalis victoriae duxit triumphum. ob quam causam ei perpetuus honos habitus est, ut revertenti à coena, tibicine cante, funale praeferretur. L. Cornelius consul in Sardinia et Corsica contra Sardos, et Corsos, et Hannonem Poenorum ducem feliciter pugnavit. Atilius Calatinus consul, quum in locum iniquum, a Poenis circumsessum, temere duxisset exercitum, M. Calpurnii tribuni militum virtute et opera evasit: qui, cum trecentis militibus eruptione facta, hostes in se converterat. Hannibal dux Poenorum victa classe, cui praefuerat, a militibus suis in crucem sublatus est. Atilius Regulus consul, victis navali proelio Poenis, in Africam traiecit 1).

1) Verba: Atilius Regulus etc. Gron. et Crev. ad Epit. XVIII. referunt.

EPITOME LIBRI XVIII.

Atilius Regulus in Africa 1) serpentem 2) portentosae magnitudinis cum magna 3) militum clade occidit, et, quum aliquot proeliis bene adversus 4) Karthaginienses pugnasset, successorque ei a senatu prospere bellum gerenti non mitteretur, id ipsum per literas ad senatum missas questus est 5). in quibus inter causas petendi successoris erat 6), quod agellus eius a mercenariis desertus esset 7). Quaerente deinde fortuna, ut magnum utriusque casus exemplum in Regulo proderetur, arcesso a Karthaginiensibus Xanthippo Lacedaemoniorum duce, victus proelio et captus est. Res deinde a ducibus Romanis omnibus terra marique prospere gestas deformaverunt 8) naufragia classium. Ti. Coruncanius primus ex plebe pontifex maximus creatus est 9). P. Sempronius Sophus, M'. Valerius Maximus censores, quum senatum lederent, tredecim senatu moverunt. lustrum condiderunt, quo censa sunt civium capita ducenta nonaginta septem millia, septingenta nonaginta septem. Regulus missus a Karthaginiensibus ad senatum, ut de pace, et, si eam non posset inpetrare, de captivis commutandis ageret, et 10) iureiurando adstrictus 11), redituum se Karthaginem, si commutari captivos non placuisset; utrumque negandi auctor senatui fuit: et, quum fide custodita reversus esset, supplicio a Karthaginiensibus de eo sumto, periit.

1) *Atilius Regulus in Africa* del.  
Gron. Crev. Vid. supra ad Epit.  
xvii.

2) *et ibi serpentem* Eaed.

3) *maxima* Crev.

4) *adversum* Gron. Crev.

5) *conquestus est* Crev.

6) *erat* del. Gron.

7) *esset desertus* Crev.

8) *deformare* Eaed.

9) *est* del. Gron.

10) *et* del. Gron.

11) *add. est* Gron.

## EPITOME LIBRI XIX.

Caecilius Metellus, rebus adversus Poenos prospere gestis, speciosum 1) egit triumphum, tredecim ducibus hostium et centum viginti elephantis in eo ductis. Claudius Pulcher consul, contra auspicia profectus, iussis mergi 2) pullis, qui cibari nolebant, infeliciter adversus Karthaginienses classe pugnavit; et, revocatus a senatu, iussusque dictatorem dicere, Claudium Gliciam dixit, sortis ultimae hominem: qui, coactus abdicare se magistratu, postea ludos praetextatus spectavit. Atilius Calatinus primus dictator extra Italiam exercitum duxit. Cum Poenis captivorum commutatio facta est. Coloniae deductae sunt Fregenae 3), in agro Sallentino Brundisium. Lustrum a censoribus conditum est. censa sunt civium capita ducenta quinquaginta unum millia, ducenta viginti duo. Claudia, soror P. Claudii, qui, contemptis auspiciis, male pugnaverat, a ludis revertens, quum turba premeretur, dixit: Utinam frater meus viveret, iterumque classem duceret! ob eam causam multa ei dicta est. Duo praetores tum primum creati sunt. Caecilius Metellus pontifex maximus A. Postumium consulem, quoniam idem et flamen Martialis erat, quum is ad bellum gerendum proficisci vellet, in urbe tenuit, nec passus est a sacris recedere. Rebus adversus Poenos a pluribus ducibus prospere gestis, summam victoriae C. Lutatius consul, victa ad Aegates insulas classe Poenorum, inposuit. Petentibus Karthaginiensibus pax data est. Quum templum Vestae arderet; Caecilius Metellus pontifex maximus ex incendio sacra rapuit. Duae tribus adiectae sunt, Velina et Quirina. Falisci quum rebellassent, sexto die perdomiti, in deditionem venerunt.

1) *Speciosissimum Gron. Crev.*3) *Fregena Gron.*2) *immergi Eaed.*



## EPITOME LIBRI XX.

Spoletium <sup>1)</sup> colonia deducta est <sup>2)</sup>. Adversus Ligures tunc primum exercitus promotus est. Sardi et Corsi, quum rebellassent, subacti sunt. Tuccia virgo Vestalis incesti damnata est. Bellum Illyriis, propter unum ex legatis, qui ad eos missi erant, occisum, indictum est: subactique in deditionem venerunt. Praetorum numerus ampliatus est, ut essent quatuor. Galli Transalpini, qui in Italiam irruerant, caesi sunt. Eo bello populus Romanus sui Latiniq[ue] nominis trecenta millia armatorum habuisse dicitur. Exercitibus Romanis tum primum trans Padum ductis, Galli Insubres, aliquot proeliis fusi, in deditionem venerunt. M. Claudius Marcellus consul, occiso Insubrium Gallorum duce Viridomaro <sup>3)</sup>, opima spolia retulit. Istri subacti sunt. Item Illyrii, quum rebellassent, domiti in deditionem venerunt. Lustrum a censoribus conditum est, quo censa sunt civium capita ducenta septuaginta millia, ducenta tredecim. Libertini in quatuor tribus redacti sunt, quum antea dispersi per omnes essent; Esquilinam, Palatinam, Suburranam, Collinam. C. Flaminius censor viam Flaminiam munivit, et circum Flaminium extruxit. Coloniae deductae in agro de Gallis capto, Placentia et Cremona.

1) *Spoletum* Gron. Crev.

2) *est del.* Gron.

3) *Viridomaro* Gron. Crev.


---

L I P S I A E,

IMPRESSIT BENED. GOTTHILF TEUBNER.

---







LL

L7888K

Livy

14445


Historiarum libri qui supersunt... ex  
recens. Drakenborchii... ed. Kreyssig. Vol. 1.

**University of Toronto  
Library**

**DO NOT  
REMOVE  
THE  
CARD  
FROM  
THIS  
POCKET**

Acme Library Card Pocket  
LOWE-MARTIN CO. LIMITED

UTL AT DOWNSVIEW



D RANGE BAY SHLF POS ITEM C  
39 13 24 08 11 003 5